

Eta Táurinaquene máechajiruvahi ema
Viya eta viyehe, ticaijare puito Eta Nuevo
Testamento

Ignaciano New Testament

This Bible is published by the Bible Society of Bolivia (sociedadbiblicaboliviana.org) and is copyrighted by Wycliffe Bible Translators. This edition is printed with permission by the Digital Bible Society (dbs.org) for non-commercial use.

This Bible This Bible, and many others, are available for free download in a variety of digital formats at dbs.org/bibles.

San Mateo	4
San Marcos	49
San Lucas	78
San Juan	127
Hechos	160
Romanos	202
1 Corintios.....	220
2 Corintios.....	238
Gálatas	249
Efesios	256
Filipenses	263
Colosenses.....	268
1 Tesalonicenses	273
2 Tesalonicenses	277
1 Timoteo	280
2 Timoteo	286
Tito.....	290
Filemón	293
Hebreos.....	294
Santiago	308
1 Pedro	313
2 Pedro	318
1 Juan.....	322
2 Juan.....	327
3 Juan.....	328
Judas	329
Apocalipsis.....	331

San Mateo

Ena achaneana máchucáequeneanaini ema Jesús eta acane
(Lc 3.23-38)

1 Nuvaraha numetacaheya mayehe ema Jesucristo. Éma, vijaneanahi israelítahi, taicha eta mámaríequenériahi ema viáchucaini Abraham. Énerichuvare, ema Jesús rey-yarehi taicha eta mámaríequenériahi ema víyahaini rey David. Eta juca eta nalista ena máchucáequeneanaini ema Jesús.

² Ema víyahaini Abraham, macachichapa ema Isaac. Ema Isaac macachichapa ema Jacob. Ema Jacob macachichapa ema Judá énapa ena apamuriana maparapenaveana. ³ Ema Judá macachichapa ema Fares émapa ema Zara. (Esu naena ticaijaru Tamar.) Ema Fares macachichapa ema Esrom. Ema Esrom macachichapa ema Aram. ⁴ Ema Aram macachichapa ema Aminadab. Ema Aminadab macachichapa ema Naasón. Ema Naasón macachichapa ema Salmón. ⁵ Ema Salmón macachichapa ema Booz. (Esu maena ticaijaru Rahab.) Ema Booz macachichapa ema Obed. (Esu maena ticaijaru Rut.) Ema Obed macachichapa ema Isaí. ⁶ Ema Isaí macachichapa ema rey David. Ema rey David macachichapa ema Salomón. (Esu máenaini ticaijaru Betseba, esu mayenainihi ema Urías.) ⁷ Ema Salomón macachichapa ema Roboam. Ema Roboam macachichapa ema Abías. Ema Abías macachichapa ema Asa. ⁸ Ema Asa macachichapa ema Josafat. Ema Josafat macachichapa ema Joram. Ema Joram macachichapa ema Uzías. ⁹ Ema Uzías macachichapa ema Jotam. Ema Jotam macachichapa ema Acáz. Ema Acáz macachichapa ema Ezequías. ¹⁰ Ema Ezequías macachichapa ema Manasés. Ema Manasés macachichapa ema Amón. Ema Amón macachichapa ema Josías. ¹¹ Ema Josías macachichapa ema Jeconías énapa ena maparapenaveana, ena nacarataruanahi námaqueneanahi ena apavasana ticavasanahi te Babilonia.

¹² Te táequenepa eta juca, ema Jeconías macachichapa ema Salatiel. Ema Salatiel macachichapa ema Zorobabel. ¹³ Ema Zorobabel macachichapa ema Abiud. Ema Abiud macachichapa ema Eliaquim. Ema Eliaquim macachichapa ema Azor. ¹⁴ Ema Azor macachichapa ema Sadoc. Ema Sadoc macachichapa ema Aquim. Ema Aquim macachichapa ema Eliud. ¹⁵ Ema Eliud macachichapa ema Eleazar. Ema Eleazar macachichapa ema Matán. Ema Matán macachichapa ema Jacob. ¹⁶ Ema Jacob macachichapa ema José, ema

suímahi esu María, máenahi ema Jesús, ema ticaijare Cristo, ema vicuchapaquenehi.

¹⁷ Tacahe, catorcemuriana ena mámaríequeneanainihi ema Abraham. Ema rey David, émapa náichecuinehi eta natupa. Tacahe, ema rey David, catorcemurianavare ena mámaríequeneanainihi. Ema nacarataruanahi námaqueneanahi ena apavasana te Babilonia, énapa náichecuinehi eta natupa. Ema Jeconías, catorcemuriana ena mámaríequeneanainihi. Ema Jesucristo, émapa náichecuinehi eta natupa.

Eta máuchusira ema Jesús
(Lc 2.1-7)

¹⁸ Ani tacahehi eta máuchusirahi ema Jesucristo. Esu maena María, tráturipahi eta suítauchirayarehi ema José. Vuíchahasera nacachanecacahini. Ticajaripahisera ésu, mávajúechirahi ema Espíritu Santo. ¹⁹ Ema José, tétavicavahi eta máuriva. Eta tacahe, vahi tise-maimahi. Váhivare mavarahahini máimicatsiriachahini esu María. Mavarahahisera macaepaha eta matratune suyehe ésu. Váhisera mavarahahini náechahini ena achaneana eta tacayemaquenehi. ²⁰ Ema Viya máimamaracahi eta mapanereruhi. Eta tacahe, tiúcupacapa ema ángele mametapanahi te mavapure ema José. Ánipa máicha †:

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajaripahi ésu, mávajúechirahi ema Espíritu Santo. ²¹ Tacahe, te máuchucapa ema suchichayare, enacayare eta máijareyare **JESÚS**. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

²² (Títauchavapahi tamutu eta juca máechajirivanahi ema Viya mayehe ema víyahaini profeta Isaías. ²³ Ani tacahehi: “Sutiarhiyare esu amaperu esena témunahiricavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipanayare” tacahepa.)

²⁴ Tacahe, te téjamiuchavapa ema José eta macavapureirahi, ichaperinehi eta masuapirahi eta máechajirivanahi ema ángele mavaneruhi ema Viya, eta máítauchirayarehi esu María. ²⁵ Váhisera nánecacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi **JESÚS**.

† Ema ángele, eta máechajisirahi ema José, manacahi eta naye- herepi náechajisira ena israelítana. Ani macahehi: “Piti José, machicha ema David”.

Náejirapana ema amuya ena reye mágoana

2 Eta máuchusinehi ema Jesús te avasare ticaijare Belén tayehe eta departamento Judea. Te jena año, ema Aluresi ema tayehehi rey eta Judea. Tásiha, títecapanapa te Jerusalén ena reye mágoana tiásihanahi te tayerehiquene avasare tinapaica te táuchusine eta sache. ² Nacayasesererupaipahi, ánipa nache:

—Víti, tímitecavahi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vémetearuhi máucutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávihahi ema amuya? —nache.

³ Te masamairiricapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi. ⁴ Tacahe, ema Aluresi máimichuhavacapa namutu ena tuparairucana énapa ena títuruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticaijareyare Cristo? —macahepa.

⁵ Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víyarahaini profetaini Isaías. Máechajicahi éma eta avasare tímícutijiricavahi eta achanénahini. Ánipa macahe: ⁶ “Piti avasare Belén, tachichavihi eta Judea, picunachacarepánayare píti. Taicha eta máuchusihayarehi piyehe ema ichapequenyarehi eta maháquenucávayare. Éma, téchapajirimirihayare namutu ena vijaneanana israelítana”.

⁷ Tacahe, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui. ⁸ Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanuycare, apaesa nuyana núti apanavare néjirapanayare —máichavacapa.

⁹ Tacahe, ena mágoana, eta nasamirahi, tiyananavarepa. Tásiha, náimahavarepa eta jarairiqui náehirupahi. Tiyanapa te namirahu. Éta te Belén eta tatupihaiyahí, te táinahu eta mávihahi ema amuya. ¹⁰ Tétavica eta náurisamurevahi ena mágoana eta náimairahi eta tatupihairaripa. ¹¹ Títecapánavanepa eta te peti mávihahi ema amuya. Náimahapa éma, ésupa esu maena María. Tásiha, tépuyucanapa natsiucapa ema amuya. Navecuhapa eta námavahuanapahi. Náijaracasichapa eta oro, eta incienso éta te táijiyequene perfume. ¹² Te táequenepa eta náejirairahi ema amuya, tichavanayarepa te návasa. Apanapasera eta achene eta nayanihapahi, taicha ticametacasionapa te navapure vaipa nacuetavajica te mávihahi ema Aluresi.

Ema José ésupa esu María náimijunapa ema amuya te Egipto

¹³ Tacahe, te táequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Pécheputa, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi títecyare matanucayare ema amuya, mavarairahi macapacayare —máichapa ema ángele.

¹⁴ Tacahesera ema José técheputa. Tétupirícavanavanepa te jena yati. Tiyananapa námapa ema amuya tayehe eta Egipto. ¹⁵ Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirayare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: “Te Egipto nímijunaiyahí ema nuchicha. Te táequenepa, níchuhayarepa éma”.

Ema Aluresi máimicapapajicapa ena amuyanini te avasare Belén

¹⁶ Tacahe, ema Aluresi te masamairiricapa eta nánucuiraripa ena mágoana, tise marinehi eta navayuasirahi. Máimivanerecapa nacapapajicapana namutu ena amuyana ajairana tiávihanahi te Belén énapa ena tiávihanahi te tachacayahana, ena ticayehenaripa apina año énapa ena náuchusirávana. Máepanaequenehapa eta táuchusihahi eta jarairiqui náimahaquenehi ena mágoana. ¹⁷ Tacahe, te Belén eta táitauchiravahi eta májuchaquenehi ema víyarahaini profetaini Jeremías. Ani tacahehi: ¹⁸ “Tétavicavahi eta najapanuiravahi ena esenana. Ichape eta náiyairahi taicha ena suntaruana nacapapajisirahi ena nachichanaveana. Nájina naratahahini nacamatinaahini taicha eta najapanuiravahi ichape” tacahepa.

¹⁹ Tacahe, te jácani año te táequenepa eta máepeni-rahí ema Aluresi, tiápechavavarepa ema ángele máechajicahi ema José te mavapure ánaqui te Egipto. Ánipa maicha:

²⁰ —Pécheputa, José. Piveha ema amuya ésupa esu maena. Piyana pichava te piávasa Israel taicha vaipa táefnamavacare. Tépenaipahi ema tipanereuchainihi ticapacayarehini ema amuya —máichapa ema ángele.

²¹ Jéhesare, ema José técheputa. Tétupiricavapa, ésupa esu maena ema amuya. Tiyananapa tichavanahi tayehe eta návasa. ²² Tacahe, eta napaisirapahi eta nachavirapa tayehe eta návasa, masamairiricapa ema José eta maviravaipahi aquenuca ema Arquelao, machicha ema Aluresini. Tipicapa ema José machavahini tayehe eta Belén. Tásiha, ema ángele mápechavarepa máechajicahi te mavapure eta matupiruirayarepa te Nazaret te tinapaica Galilea. ²³ Te títecapanapa, ánaqui éta te náejirairahi. Tacahehi eta

táitachiravahi eta táechajirivanahi eta Sagrada Escritura nájureanahi ena profetanaini eta macajarerareyarehi Nazareno ema Jesús.

Ena Juan Tícachasiricarahi tépanavapa ticametarairu eta máechajirruva ema Viya nayehe ena vámahicuruhana

(Mr 1.1-8; Lc 3.1-9, 15-17; Jn 1.19-28)

3 Tacahe, te jácani treinta áñohe, matiarihivare ema achane ticajare Juan. Éma, máichuhaquenehi ema Viya eta macametarairuyare, máetupiricavacayare ena achaneana. Tacahe, masupahi eta matuparahahi. Tiyanapa vámahicuruhana. Váipa avasarecuruhainahini. Ticametarairupaipa nayehe ena macutiqueneanahi vámahicuruhana, ticavasani te tachaui eta Jordán te tinapaicahi eta Judea. ² Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, taicha márjapainapa ema aquenucayare mavaneruhi ema Viya —máichavacapa.

³ Ánaquiaparipahi eta áñoana acane, ema Viya mametacapa ema víyahaini profeta Isaías eta mapanereruhi, eta mavanerirayare ema Machicha te juca apaquehe, ticatiurahiyarehi eta tímitecayarehi. Énerichuvare matiarihiyareva ema apana achane máichuhaquenyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ema Machicha ema Viya. Émaripa ema Juan, ema máechajisiquenehi ema Viya, máetupiricavacayare ena achaneana. ⁴ Ema Juan, vanairucahi me Viya, profetahi éma. Eta mamuirihahi eta náitsameru tajiyaha eta náitátiquene ticajare camello. Eta máitijuhe, vácapi jayumepi. Eta maniriji manicasare eta tsacara. Eta matítivera eta mápama. ⁵ Tiyananavare nacapayaca ena achaneana ticavasana te Jerusalén, navarairahi nasamararaca eta máechajisiquene; énapa ena ticavasana te Judea, énapa ena tiávihanahi tayehe eta cajacure Jordán. ⁶ Tacahe, eta nametauresiravaipa, navarairahivare náinajica eta napecaturana, ema Juan máicachasicavacapaipa te cajacure Jordán.

⁷ Énaripa ena fariséoana énapa ena saducéoana nayanauachahivare ema Juan. Vahi náeneuchavahini, navarahahisera ticaicachasiana. Tacahe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairirahipuca eta járajapairayarepa eta táinehiquenyare ecuñaraqui. Evarahhipuca iúchucuhayare. ⁸ Tiuri puiti, te evarahapuca eta iúchucuha, yátupina tátupirruva eta epanereruana. Ímrecava eta ínajisiraya eta epecaturana.

⁹ Váhivare ecucajamurava eta mámariequenehárahahi ema viáchucaini Abraham. Taicha tayanapane mámarihupuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mávarahapuca, vahi máejecarachaimahi máepiyaca achaneanaina eta juca mari,

mavarairainahi yátupina ena mámariequeneanaina ema Abraham. ¹⁰ Ecauneuchava, taicha tiánehipa eta táitecapauchirahaviyare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijirícavaipa te máechucayarepa ema achane eta yucuqui máhireana. Ticaechuyarehi tamutu eta tapareana. Tíjuyarehi. ¹¹ Yátupi núti nícachasicahehi te une, te éneuchava mayehe ema Viya. Ávanepaipahisera mácani ema yátupiquene Cristo. Te yátupina ecasiñava mayehe, tícachasicaheyareva; tíjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yucu. Éma, ichapequenehi nuyehé núti. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhi núti páuresami. ¹² Puiti éma márjapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tiácatayajirica eta arusu. Máunacainapa. Tásiha, máquijicapa eta tapiraquiji. Máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacayarehi eta namuruira —máichavacapa ema Juan.

Ena macaicachasirahi ema Jesús

(Mr 1.9-11; Lc 3.21-22)

¹³ Tacahe, títecapavarepa ema Jesús te cajacure Jordán te mávihahi ema Juan. Éma, másihapahi te tinapaica eta Galilea. Mavarahahi ticaicachasiyare mayehe ema Juan. ¹⁴ Émasera ema Juan, vahi mávarahaini máicachasicahini. Ánipa macahe:

—Tata Jesús, nútira táuricahi nútivaina pícachasicanu. Nusapihapa núti picaijuhenuhi eta nícachasicaviya —máichapa.

¹⁵ Émasera ema Jesús majicapapa:

—Tájinachucha táichava. Ticamunucarehi nítauchayare eta mavarahaquenehi ema Nucaiyaquene —máichapa.

Tásiha, ema Juan tísapavapa. ¹⁶ Te tamutupa eta macaicachasirahi ema Jesús, tiúcupaicapa tayehe eta une. Tásiha, tíjahúchavapa téjiaca eta anuma. Máimahaipa ema Espíritu Santo tiúcupaicapaipahi, mavasimahaipa eta paloma. Tavenesicapa ema Jesús. ¹⁷ Tacahe, tiáramicarepa eta mahu ema Viya tásihaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétavicavahi eta núrismurevahi máicha —macahepa.

Ena Váinaraji Satanás mavaraha macaitsamaraji ema Jesús

(Mr 1.12-13; Lc 4.1-13)

4 Tacahe, ema Espíritu Santo enurujipa máimitucaipahi ema Jesús eta mayaniraya te mávapahi apaquehe. Ánaqui macuchapayarehi eta máitsamariyare ema Váinaraji. ² Tájina manicahini ema Jesús te jena cuarentaquenehi sache, cuarentavare yati eta mayerevahi. Ichapepa eta máecuavahi. ³ Tásiha, ema

Váinaraji témeñahavapa mayehe. Mavarahapa macaetemayarehi. Ánipa máicha:

—¿Pécuhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tacarichuimahi eta tinicacare ticaitarecayare ena achaneana. Tacachaneyarehi eta máechajiriruvana ema Viya. Jéhevare, éta ticaitarecarahiyare” macahepa.

⁵ Tásiha, ema Váinaraji mámavarepa tayehe eta tacapicahuquene avasare Jerusalén. Máimiapanapa te táinahu eta Templo. ⁶ Tásiha, máichapa:

—Te yátupina machichavina ema Viya, písapavayare pémirica te apaquehe. Tájiha píchavaimahi eta pémirisirayare. Pécharichuhi eta táechajiriruvahi eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricaviana. Tiámaviayanayare te navahuana, apaesa vahi picucayutetu eta máriana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

⁷ Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya, taicha Piáquenuhi éma” —máichapa.

⁸ Tacahe, ema Váinaraji mámavarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. Máimechavarepa eta ichapequeneana náimahaqueneana ena achaneana. ⁹ Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumasera te numirahu. Pitsiucanu apaesa níjaracavisarepa tamutu —máichapa ema Váinaraji.

¹⁰ Émasera ema Jesús majicapapa:

—Pévuisihatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumi-rauchayare. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

¹¹ Tacahe, ema Váinaraji térajicavapa. Majunijicapa ema Jesús. Tásiha, tiúcupaicanapa ena ángeleana, náechapajiricapa ema Jesús.

Ema Jesús tépanavapa ticametarairu

(Mr 1.14-15; Lc 4.14-15)

¹² Tacahe, te jena sácheana, nacaratacapa ema Juan. Námapa te jácani tayerehiquene. Tacahe, ema Jesús, eta masamairirisirapa eta macaeratairahi te cárcel ema macheji Juan, tiyanapa tichava te mávasa Nazaret te Galilea. ¹³ Váipasera mánasihini te majurusinehi. Tiyanapa tayehe eta avasare Caperaum. Éta máejasihahi. Eta juca avasare távihahi te tachausi eta

cáquiure Galilea. Eta macametarairuirahi, tamutuhi mapaica eta tinapaica eta provincia Galilea †

—Éneuchava mayehe ema Viya. Ítsivacha eta epanereruana, taicha tiánehi eta sáchezare tímerecavaya eyehe ema ticatiuchaheyare. Aquenucayare mavaneruhi ema Viya, téchaheyare éma —máichavacapa.

Eta juca títauchavahi eta májureanahi ema víyarahaini profeta Isaías, ani tacahehi: “Tiúricacareanainapa ena achaneana cávasanahi te tachausi eta cáquiure Galilea tayehe eta provincia Zabalón éta pa eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Puítisera máitecapauchavacarihi ema timícauchamurihi. Ticatiuchavacayarehi tayehe eta nacatajivairahi. Éma, tétumechavachivare eta mamícauchiravacahi” tacahepa.

Ema Jesús máichuha ena cuátroqueneana ténicarahiana, máimitureanayare

(Mr 1.16-20; Lc 5.1-11)

¹⁸ Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticajarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecachi eta nayehe tarrafa. ¹⁹ Tacahe, ema Jesús máichuhavacapa:

—Yare, éhicanu. Núti níjaracaheyare eta apana ématanerepiyare. Éti ítucavaparacahi eta jímana; tacheheyare eta ítusiravayareva ena achaneana, machaneranayare ema Viya —máichavacapa.

²⁰ Enevanepa náinajicapa éna eta náenisirahi. Tiyanapa náehicapa ema Jesús.

²¹ Ánaquipanavarepa máimahavarepa ema Jesús ena apinana ticaparapeacánavare: ema Jacobo émapa ema Juan. Téjacanahi te napacure. Matiarihivare ema naiya Zebedeo. Náititijiricahi eta nayehe tarrafa. Ema Jesús máichuhavarepa. ²² Enurujipa náehicavare. Nanaquicavarepa eta napacure, émapa ema naiya. Najunijicavarepa.

Ema Jesús máimitucavacapa ena camuriqueneana achaneana

(Lc 6.17-19)

²³ Eta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuhuana tayehe eta náurujsirarevana. Mavanecapa eta náneuchiravaina taicha tiánehipa eta sáchezare tímerecavayare ema ticatiuchayare, ema aquenucayare mavaneruhi ema Viya. Énerichuvare ema Jesús macanaracpahivare tamutu eta apananequeneanahi jumareana eta najumanapahi ena achaneana. ²⁴ Tacahe, nasamairiricapa ena achaneana ticavasanihi eta tasimutuqueneana avasareana te

† Ema profeta Isaías, ánvare macahehi eta máechajisihairahi: “...étaripa eta provincia táviha náitecapihahi ena apavasana”. (Acane eta juca apaquehe, apina eta apana tájijareanani; eta Zabalón éta pa Neftalí.) Eta máimitusiravacahi ena achaneana, ánipa maicha ema Jesús:

tinapaica eta Siria. Tásiha, námavacapaipa ena nacaju-maqueneana, apanapanenejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracakuhihana. Namutu ena nani, macanaracavacapahi ema Jesús. ²⁵ Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, éta pa te apachara eta Jordán.

Ena Jesús máimitucahi nayehe ena ticunachacare-anahi me Viya
(Lc 6.20-23)

5 Tacahe, eta máimairavacahi ema Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjcaripa éma, énapa ena máimitureana nachayacaipahi. ² Ani tacahehi eta máimiturapianahi:

³ —Ena náimatihahi eta tacamunuqueneanahi eta náchanevana, tétavicavahi eta náuricacarevaya taicha máejerare eta najacapirayare eta máechajiriruva ema Viya, machaneranayarehi.

⁴ Ena nani tijapanujiricavanahi, tétavicavahi eta náuricacareva taicha émaripa ema Viya macurisamurechavacayare.

⁵ Ena nani tisuapajirahianahi me Viya, mánsuanahi mayehe, tétavicavahi eta náuricacareva taicha máijararuanayare eta arairu apaquehe náicuchihi me Viya.

⁶ Ena nani, ichape eta najamurachirahi eta náitare-sirahi eta matapiravacare te mamirahu ema Viya, tétavicavahi eta náuricacarevaya taicha máijaracayare éma eta navarahaquenehi.

⁷ Ena nani tijapanurahianahi nayehe ena apamuriana achaneana, tétavicava eta náuricacarevaya; taicha ema Viya, éma apanava majapanuvacayare éna.

⁸ Ena nani vahi náisapajiricavahíni tahapapicahini eta náehisirahi ema Viya, tétavicavahi eta náuricacarevaya; taicha éna, títecanainapa te mamirahu ema Viya, náimarracainapa éma.

⁹ Ena nani ticonsejarahianahi nayeheana ena achaneana, nacaepahirahi eta semanereana, tétavicava eta náuricacarevaya éna; taicha máimereuchainapa ema Viya eta machichairavacahi éma.

¹⁰ Ena nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náitaresirahi, tétavicavahi eta náuricacarevaya; taicha éna aquenucarahanaya majupahanayare ema Viya.

¹¹ Eti nuchaneranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequenehaheanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, ¡ecurisamurechavachucha, evapinavachucha! ¡Tétavicavahi eta iúricacareva taicha

ejacapayare eta ícuchiyare te anuma, taicha ichape eta macunachirahehi ema Viya!

Ena Jesús tímitucahavi eta vicamunucareravayarehi tacutihahi eta tacamunucarevahi eta icheve, éta pa te tijarahi
(Mr 9.50; Lc 14.34-35)

¹³ Eti ímijanavayare eta ecamunucareravahi nayehe ena achaneana, tacutihahi eta tacamunucarevahi eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevevainahíni. Tásiha, nájinapa ticamunuimahi. Náepuruinapa namutu.

¹⁴ Tacutiquene éti ecutihahi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tauriqueneana. Ímereuchayarehivare eta iúri va, ecutiya eta avasare tiávi vahahi te tajirumane eta anuquehe mari. ¹⁵ Tacutiquene, vahi ecucuti nácani súnsuana tiyustacanahi jácani lámpara, tásiha nanacapapucaini te tajuhe eta cajune, nayumurusihahini. Nanacayarehisera te anuquehe apaesa náimairicasarepa namutu ena tiávi hanahi te peti, tamicaureanayarehi. ¹⁶ Ene ecaheyare éti, ímerecayare eta ejaravayare nayehe ena achaneana apaesa eta náimairainahi eta táurique-neana íchaqueneanayare; tásiha nacunachainapa ema Tata Vicaiyaquene tiávi vahahi te anuma.

Ena Jesús tímitucahavi tayehe eta tasuapacarevahi eta Sagrada Escritura

¹⁷ Vahi étaina tímitecanuhi núti nucaepahahini eta mavanairipiana ema víyarahaini Moisés, étaripa eta náimiturapianaini ena profetanaini. Eta tímitecanuhi núti, níminicapaequenehaheyare eta nájureanahi.

¹⁸ Nutupiruva numetacahe: Títauchavaya tamutu eta máechajiriruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahi, tayanapane táitavapuca eta anuma étapuca eta apaquehe. ¹⁹ Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuruiraya. Nácanisera tisuapanayarehi, tímiturecanahivare eta juca nayehe ena apamuriana achaneana eta náehisiraini; éna, ichapeyare eta nacunachacarevayare eta nasiapiraipa te anuma.

²⁰ Táicha te evaraha ítuji cava esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

Ena Jesús tímitucahavi vahi tacunasi te visamure eta visemaneva
(Lc 12.57-59)

²¹ Eti écharichucha eta nayeherepiana ena iáchuca naveanaini ani tacahe: “Vahi ecucapaca mácani piparaepiya; taicha mácani ticaparecachi, ticaicuña-

yarehi". ²² Nútisera numetacahe eta apana: Mácani tisemahi mayehe ema maparape, énerichuvare ticaicuñayare. Mácani tíumehahi ema maparape, ticayaserehiyare te namirahu nácani tuparairucanahi tayehe eta avasare. Tacutiquene mácani ticaecahihi ema maparape, mávacuhaipahi eta ecuñaraqui tayehe eta infierno.

²³ Eta tacahe, te piámapahi eta piámavahu te mami- rahu ema Viya, tásiha, péchapanainapapuca eta pitapi- ravahi mayehe ema piparape. ²⁴ Vuíchaha picuiya- racuha eta piámavahu. Tativanumayare piyasea- panaya eta perdón ema piparape. Pétupiricanumayare tativa eta píchavaquenevahi mayehe éma. Táurica- sarepa pichava píyaracuhapanainapa eta piámavahu te mami- rahu ema Viya.

²⁵ Tacutiquene te matiarhiyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétupirica eta píchavaquenevahi mayehe, mapurare vuíchaha picaeratahini mayehe ema juez tayehe eta cárcel.

²⁶ Taicha te náimisipavipa tayehe eta cárcel, ticajerae- quenénapa eta piúchusiraya.

Ena Jesús tímitucahavi vicuneuchavaya eta jácani táimiaquipaicahavi tayehe eta pecatu

²⁷ Énerichuvare écharichuhi éti eta náimiturapihi ena iáchucanaveanaini: "Vahi ecuveha esu apana esena".

²⁸ Puítisera núti numetacahe eta apana: Mácani majamurachahi esu apana esena, ticapecaturaipahi te masamure taicha eta majamurachirahi. ²⁹ Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi táimahayare eta tauriqueneana tájiparacana, tíuripana evecuhau- quichava iáquijicaya. Taicha tíuripanahi táéjiacava ánichichaina te iáquehe, váhisera tacuimicuñacahe eta te yucu infierno, tamutupahi eta iáquehe. ³⁰ Étaripa eta evahu váure, te tavarahapuca tímiaquipaicaheyare tayehe eta pecatu, tapamisirahénapapuca íchayare eta tauriqueneana, tíuripana eyuchatica iáquijica. Taicha tíuripanahi táéjiacava eta evahu, váhisera tacuimicasiapahe támutu eta iáquehe tayehe eta yucu infierno.

Ena Jesús manacahi eta máimiturapi nayehe ena tina- jicacana

(Mt 19.9; Mr 10.11-12; Lc 16.18)

³¹ Énerichuvare ena viáchucanaveanaini náisapahi eta máejerare eta máinajisira mácani achane esu mayena. Ani nacahehi: "Mácani tina- jicahi esu mayena, máemepiyarecahi eta ajumeruca táechajisihayarehi eta máinajisiraya esu mayena". ³² Nútisera numetaca- he eta apana: Mácani achane, te máinajicapuca esu mayena, ticapecaturaipahi me Viya. (Váhinénipuca sucaecahihini mayehe ema apana achane.) Éneri- chuvare te tiápechavahipuca ticaima ésu, tamuriacahi ésu eta maviurevahi ema suima. Tásiha, mácani arairuhi suima, émapa tamuriacahi eta máeje- capiravahi taicha eta mavirahi esu esena sucaimaquenehi.

Ena Jesús tímitucahavi eta vahi vijurachaimahi

³³ Énerichuvare esamairiricavare eta náimitucasivahi ena iáchucanaveanaini: "Machu vahi ecuitaucha jácani ejurachirahipuca. Yátupinasera eta ítauchiraina tamu- tu eta íjarasiravahi me Viáquenu" nacahepa. ³⁴ Nútis- era numetacahe éti: Vahi táuricahini íchahini eta jura- mento. Vaipa échajisihahini eta anuma taicha éta, má- vacurehi ema Viya. ³⁵ Váipavare échajisihahini eta apaquehe taicha éta, macaematanéyahi éma. Vái- pavare échajisihahini eta Jerusalén, taicha éta, mávacureyarehi ema yátupiquenehi Rey, mavane- ruyare ema Viya. ³⁶ Váipavare échajisihahini eta ejura- chirahi te echuti, taicha vahi áratahaimahi ehapamai- chahini, ítsivachirahini eta táimahi, tijapupuca, tiquisa- puca. ³⁷ Numetacahe: Te tatiarihipuca eta íjarasira- vayare, átupiruva ácahe: "Tiuri". Te váhipuca evara- hahi, átupiruva: "Vahi" ácahe. Te émunahacavapuca ejuracha, ema Váinaraji títurucaheripa.

Ena Jesús tímitucahavi eta vahi vicusema ne nácani ticaetemajiricahaviana

(Lc 6.29-30)

³⁸ Énerichuvare esamairiricahi eta acane: "Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, éneri- chuvare nacavetuquiahechayareva ena tuparai- rucana". ³⁹ Nútisera numetacahe: Vahi ecujicapa te masema mácani achane váinarajihí. Tíuripana, te náe- hahepuca nácani te emira, íjaracayare eta apachacaya eta emira. ⁴⁰ Tacutiquene, te natiarhipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihi. Íjaracavare eta apana eta epacuha. ⁴¹ Ísapayare te nácani navaneca- hepuca eta enaracureca eta tijitacare. Te navaraha iámina étanaina kilómetro, evapinava eta eservichira- vacaina. Vahi ecobrachavacaimahi. ⁴² Mácaniripa tája- hapuca mayaseacahe, íjaracayare. Vahi ecueñamiha mácani ticapucahe eta ecayehequeneana.

Ena Jesús tímitucahavi eta vémunasirayare nácani ticatianacahaviana

(Lc 6.27-28, 32-36)

⁴³ Énerichuvare esamairiricahi eta acane eta náimitu- casivahi ena iáchucanaveanaini: "Émunasirahi nácani témunacaheanahi. Tásiha, ecatichayarepa nácani ticatianacaheanahi". ⁴⁴ Nútisera numetacahe: Émuna- cayareva nácani ticatianacaheanahi. Eyaseaca ema Viya eta nayujarahuina nácani téchajicanahi eyehe. Ímereca eta iúri- va nayehe nácani ticaticahéanahi. Eyujaracha nácani tíumehaheanahi ticaetemajirica- heanahi. ⁴⁵ Te ítaucha eta juca, éta tímereuchaheyare eta machichahéirahi ema Vicaiyaquene te anuma. Taicha éma nájina manerejiruina, namutu máemuna- cavaca: ena achaneana váinarajiana, énapa ena tíuri- ana. Éma, tíjaracahavi vimutu eta sache vimícahuhi,

étapa eta tiquiva. ⁴⁶ Éti, tájina ecunachacarevaina eta me Viya, te nacarichuhi émunaca nácani témunacahanahi éti. Apanasica ena tisipecaturarahiana náichahi eta juca. ⁴⁷ Tacutiquene, tájinavare ecunachacarevaina eta me Viya, te iúriyare nacarichuhi ena eparapenaveanahi. Apanasica ena máimatirahanahi eta Viya tiúrianahi eta nayehe ena naparapenaveana. Étisera tatuparacahe ecachuricayare eta iúriya.

⁴⁸ Tétavicavasareya eta iúriya nayehe namutu. Vahi enerejicaimahi ena achaneana. Váhivare eyavanaimahi eta iúriya. Ecutiya eta Vicaiyaquene te anuma eta máurivahi.

Ena Jesús tímitucahavi eta vahi vicusiñavavaicapa eta víchira eta táuriqueneana

6 Eta ecajirayare ena páureana, échapavayare. Ena Tata Vicaiyaquene, tájina ticunachahemahi te evarahapuca náimaha ena achaneana eta ecajirahi, evarairahi ticunachahemayare. Tájinavare máitsirijicavahini éma eta eyehe. ² Eta tacahe, te ímicatacayarepuca nácani ticamunuvanahi, vahi ecumetajirica. Vahi ecucuti ena apimirana timetajiricanapa te viúrujisirarevana, téhepa te anecapahiana. Eta juca náichahi, navarairahi ticunachacareanayarehi nayehe ena achaneana. Nútisera numetacahe: Ena nani ticaheanahi, tájina nacunachacarevaimahi me Viya. ³ Te jácani píjaraca nácani ticamunuvanahi piyehe, vahi picumetajirica. Váhivare picumetaca nácani pémunacasareana. ⁴ Piñajichayare eta píjarasirayare nácani píjaracasiruyare. Tacahe, ena Tata Vicaiyaquene te anuma máimamaracahi tamutu. Jácani píchaqueneana tayumurevana, éma títsirijiequenehayare, tíjaracaviyare eta pícuhihi.

Ena Jesús tímitucahavi eta viyujarasirayare (Lc 11.2-4)

⁵ Te eyujaracahi, vahi ecucuti ena apimirana tiyujaracana te viúrujisirarevana, téhepuca te anecapahiana. Titupihanahi éna eta nayujarasirahi, navarairahi náimamaracayarehi ena achaneana. Nútisera numetacahe: Tájinachucha nacunachacarevaimahi me Viya.

⁶ Étisera ani tacaheyare te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare ena Tata Vicaiyaquene. Éma, tímararacahavihi; masamayarehi eta piyujaracasa.

⁷ Tacutiquene, váhivare ecuapepirica eta ecayemaqueneanayare. Vaipa tácomesahini eápepiricahini eta eyujarasirahi. Vahi ecucuti ena máimatirahanahi eta Viya. Tiúpiemanapa eta nayujarasirahi, náimijachaipa tisamacareanahi mayehe ena Viya. ⁸ Vahi ecucuti éna, taicha ena Viya máimatiripahi éma jácani vivarahuquenehi viyaseaca. ⁹ Éti, ani tacaheya eta eyujarauhivahina: Tata Vicaiyaquene, piti piávihi te anuma, vipi-cauchahi yátupi eta píjare. ¹⁰ Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. ¹¹ Pájapanuhavi píjaracahavi puiti jena sache eta vicamunuirava eta vinica-

queneana. ¹² Pájapanuhavi piperdonachahavi eta viviurevana piyehe, tacuti eta viperdonachira víti ena ticaviurevana viyehe. ¹³ Vahi picuisapahavi eta vicha eta tauriquene. Picatiuchahavivare mayehe ena Váinaraji. Taicha píti yátupiquenevihi Viáquenuvihi. Nájina pácuti eta pítipajijiasiravahi. Máichecuaraquire eta píjaravahi. Amén.

¹⁴ Taicha te yátupihahi eta eperdonachirahi nácani ticaviurevanahi eyehe, ena Tata Vicaiyaquene te anuma tiperdonachaheyare éti apanava. ¹⁵ Téhesera te vahi eperdonachahi ena ticaviurevanahi eyehe, ena Tata Vicaiyaquene váhivare tiperdonachahémahi eta éjecapiravanahi éti.

Ena Jesús tímitucahavi tayehe eta ayuna

¹⁶ Tacutiquene, te ayunahepuca, vahi ecajapanuraimahi te namirahu ena achaneana. Vahi ecucuti ena apimirana ena tímicaecherachavanahi eta ayunairanahi. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe. ¹⁷ Étisera, te ayunahepuca, ímiyanava eta esipauquichiravaya, etaticavavare, apaesa nacuija nacuimatiacahe eta ayunairahahi. ¹⁸ Ena Tata Vicaiyaquene tímararacahahi tamutu eta esamureana. Tisamacareyarehi eta eyasearuhi.

Ena Jesús tímitucahavi eta vahi vicuisapava vicasamure eta vímahaqueneanahi

(Lc 12.33-34; 11.34-36)

¹⁹ Váhivare tacuavasamurecahe eta ímahaqueneana te juca apaquehe. Eta juca ticamitiequenehacareana taicha eta tajararesira eta cachusiri, étapa eta táichasivayare. Natiarivare ena tíámeyechaheanayare. ²⁰ Epanerechase ena ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájinavare tíámerahina tayehe. Tájina témitiacaimahi. ²¹ Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneayare.

²² Tacutiquene, ecuneuchava, machu tacueta-viuchava eta ejamurachira eta ímahaqueneana. Ecaratavahi, vahi ecuisapa tahapasamurecahe eta ecaimahaquenerahi. Taicha te tahapasamureruhepuca eta ímahaquene, tétavicavahi eta tamapicuvahi eta te iáchanevana. Téhesera esuapa eta nímiturapiana, tétavicavahi eta tamicauchiraya eta iáchanevana, tímijunijicayare eta emaurivahi, étapa eta ejamurachiravahi eta ímahaqueneana. Eta tacahe, machu ísapava tayanariana eta timapicu eta te iáchanevanasami. ¡Páurehesami éti te ísapavapuca tanasipa!

²⁴ Tacutiquene éti, eta ítaresirahi, vahi táuricahini apinanainahini ena iáquenuana. Taicha émunacapanyarehi ena émana, tisuapacarepanayarehivare; tásiha ena apana, apaesarineya eta émunasiraya, váipaina-

pa tisuapacaremahi éma. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, éta-pa eta ecaemataneasirahi éma.

Ena Jesús tímitucahavi eta majaneasirahavihi ema Viya viti machichanaveana
(Lc 12.22-31)

²⁵ Étasera nuvaraha yátupina eta ecasiñavairaina mayehe ema Tata Vicaiyaquene. Vahi ecucaañamara-cavaicha tayehe eta enicaquenerepi éta-pa eta emuiriharapi puiti juca ítaresiraichaha. Eta enicaquenerepi, éta-pa eta emuiriharapi, tájina táeñamavacarevahini. Ímararacarichuhi eta cáyureana. Vahi táevacahini, váhivare táechatijiricahini, táunacahipucaini eta tanicaqueneyare. Émasera ema Tata Vicaiyaquene máechapajiricahi, máijarasirahi tamutu eta tanicaquenerepiana. Evetijipa éti, íapajupanavahi eta éñamacaré-vahi me Viya tayehe eta cáyureana. ²⁷ Tájina táuricahíni eta éñamiravahi eta júcana. Éti, nájina tiratahaimahi étijivainahini ecajurucavahini, tayanapane tahapasamurechahehipuca.

²⁸ Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacañamaracavahini tacaematanehini, táijururecahipucaini. ²⁹ Táitsivahisera, te tépnehapa, tétavicavahi táurinavahi eta taflurene. Nájina tácuti eta nacamuirihaira eta táurinava, émaripa ema víyahaini rey Salomón eta tajanunusira eta macamuirihairahi. ³⁰ Apanasicahi, ema Viya máijaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, máijarasiraheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe? ³¹ Eta tacahe, vahi ecucaañamara-cavaicha tayehe eta enicaquenerepiana étaripa te echuririacapuca eta une érayare, váhivare eta emuiriharapi. ³² Ena achaneana vahi náimatihini ema Viya, ichapemurihi eta tacañamarasiravacahi eta júcana. Vahi nácasiñavahini mayehe ema Viya, nacuchapahipucahini eta máijararuyarehi éma. Étisera, écharine eta mararihirahi ema Ecaiyaquene te anuma. Máimatihi éma tamutu eta ecamunuqueneanahi. ³³ Tásihasera éti, tativayare íjaracava ecaemataneacaya ema Viya, ecasamureirahi eta ítauchirayare tamutu eta mavara-haqueneanahi. Tihapasamurechaheyarehivare eta tátupiruvairaya eta ítaresira, ecurisamurechirayare éma. Máimaharinépa éma. Tíjaracaheyare tamutu eta juca ecamunuqueneana. ³⁴ Eta tacahe, ácasiñava mayehe éma. Vahi tacuimipanerechahe eta íchararacavayare achichu. Puiti ecuchapaipa eta máimicatasi-rayare. Ímianava eta ecuchapirayare eta máimicatasi-rayare.

Ena Jesús tímitucahavi eta vahi vicunemahi eta nájecapiravana ena apamuriana achaneana; vi-cuneuchavasera víti
(Lc 6.37-38, 41-42)

7 Vahi ecunemahi eta nájecapiravana ena apamuriana achaneana, váhivare ecucaecahivaca, machu étaina táimicuñacahe me Viya. ² Te ecunerahipuca nayehe ena apamuriana achaneana, ecaheyare éti eta macunerahénapa ema Viya tayehe tamutu eta éjecapiravanahi éti. ³ Piti ajaira, pítipa piti esena, vahi táurica eta picunerahi eta ánichichaqueneana nájecapiravanahi éna. Tituparacavi pítipivaina picuneuchava eta táichapeva eta péjecapirava. ⁴ Vahi tatuparacavimahi pétupirica eta jácani nájecapiravahi ichipichuana ena piparaepiyana. Tájina piviyahini eta piconsejachihaimahi. Ichapesera eta tatuparasiravihi pétupirica eta péjecapiravanahi píti. Tapaenumava pé-tupirica eta píchavaquenévani, táuricapaini piconsejacha ema piparaepiya tayehe eta máichavaquenévahi.

Ena ticaecahirahiana, vahi vicuijaraca jácani téñamacareana

⁶ Vahi ecuumituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayayajica.

Vahi vicuyacuji eta viyaseasiraina ema Tata Vicaiyaquene
(Lc 11.9-13; 6.31)

⁷ Ánivare tacahe eta máechajiriruva ema Jesús: —Numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tíjaracaheyareva. Vahi ecuyacuji eta eyaseasiraina. Énerichuvare, te tatiarihinapapuca eta jácani íchiraya ichapehi eta tacajeravayarehi, eyaseacayare máijaracahehini eta ítupajijasiravaya. Éma, tíjaracaheyare. Te jararihipuca eta táichejimiráuchahe, éma macaevuisinaheyarehi.

⁹ Eta juca tímicutijiricavahi te natiarhipuca ena echichanaveanahi éti, te tiyaseacaheanapuca eta pananicyare, váiparinehi táuricaimahi íjaracahini éti eta márijahi. Tímicutijiricava evijaruinahini ena echichanaveana. ¹⁰ Étaripa te tiyaseacaheanapuca eta jima, váhivare táuricaimahi íjaracaimahi eta quichare.

¹¹ Etiaríhi éti vahi ecajirahihini nayehe ena achaneana. Íuríhisera nayehe ena echichanaveana. Mavetijicha ema Tata Ecaiyaquene tiávihihi te anuma. Éma, vahi ticavijaruhemahi eta eyaseserepi. Tíjaracaheyarehi tamutu eta táuriqueneana eyasearuanayarehi.

¹² Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta iúriya nayehe. Taicha eta tacahehi eta táimiturapi eta Sagrada Escritura eta eyehe.

Jararihi eta apina achene

(Lc 13.24)

¹³ Esamanuchaha. Jararihi eta apina achene. Eta ichape achene, vahi tácajéra eta náehisira ena achaneana. Camurianapana ena téhicana eta ticaijuhe tayehe eta ecuñaraqui. Étasera eta achene ánicuchi-charichu, ticaijuhe tayehe eta vítaresirayare, tájina ecuñaraqüina. Váhisera camurianaina ena téhicana éta. Éti epamicava esiapa tayehe eta achene ánicuchi-charichu.

Ema Jesús máimicutichahi ena achaneana tépiyahirahiana, nacuti eta yucuqui máurinisiráha eta tahi

(Lc 6.43-44)

¹⁵ Échapavayare tayehe eta náimiturapiana ena tépiyahirahiana tímijachavana machanerana ema Viya. Tépiyacavánapahi tiúriana tacutihi eta tamansuva eta uvesa. Téhesera te nasamureana, tétavicavahi eta navainarajiva, nacutihi eta ichini. ¹⁶ Ímatiacavacahisera éna táichavene eta náichaqueneana. Nacutihi eta yucuquiiana. Eta yucuqui, tímaticarehi eta táhi. Étaripa eta sitavere, váiparinehi tiúchucaimahi eta tacahihini narasahinahipucaini. Tásiha, eta ijicaqui váiparinehivare tacahimahi eta táhi cachicheruhinahipucaini. ¹⁷ Tacutiquene, tímaticarehi eta táhi eta yucuqui tiúrinisi. Tímaticarevare eta táhi eta máurinisiráhana. ¹⁸ Eta yucuqui tiúrinisihini eta táhi, vahi témunahiricavaimahi vahi tacurinisihini eta táhi. Étaripa eta máurinisiráhana, váhivare témunahiricavaimahi táurinisihini eta táhi. ¹⁹ Tamutu eta yucuquiiana máurinisiráhana ticaechuyarehi, tíjuyarepa te yucu. ²⁰ Eta tacahe, ímativacayare ena tépiyahirahiana táichavene eta náichaqueneana tamauriqueneana.

Vahi námutuimahi títujicavana tisiapanaimahi te anuma

(Lc 13.25-27)

²¹ Nararihinapa ena achaneana tépiyacavana nuchanerana. Váhisera títujicavanaimahi tisiapana tayehe eta mávasa ema Viya. Tayanapane náichanuinapapuca "Tata Viáquenu", vahi tisiapanaimahi. Taicha vahi yátupinahini eta nacaemataneasirahi ema Tata Nucaiyaquene te anuma. ²² Te táitecapapa eta juicio, camurianayare ena tíchanuanayare: "Tata Viáquenu, víti véchajisihaparacahi eta píjare. Vipiarcavahi te píjare eta viáquijsirahi ena váinarajiana, téhevare te píjare vímerecohi eta tiáramicareana" náichanuina-papuca. ²³ Nútisera nujicapainapa: "Éti vahi nuchane-rahéna. Nímatysera núti eta íchaqueneanahi tamauriqueneana. Évuisiha te numirahu" níchainapa éna.

Ema Jesús máimicuticha ena tisuapajirahiana énapa ena masuapajirahana

(Lc 6.47-49; Mr 1.22)

²⁴ Nácani tisuapanuanahi náitauchahivare eta juca nuvanairipianahi, téchemarahianahi táicha. Nacuti-yarehi mácani títucahi tépiyareca peti, manacayarehi

eta túmeana yucuqui emuruquiiana. ²⁵ Jéhesare, te járajapapa eta muraca técativaca, tiámaquiha tiquiva, tisiapapa eta une, váipasera tacayayacahini eta peti, taicha tiúsiapiravacahi. ²⁶ Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihi ema máitucaraha tépiyareca peti. Vahi manacaimahi eta túmeana yucuqui, váhivare táusiapiravacahini máicha. ²⁷ Te járajapapa eta muraca técativaca, tiámaquiha tiquiva, tisiapapa eta une, tacajimuyapaicapa eta apaquehe. Tiáquipaicavapa eta peti, tamutusamipa témítiequeneha —máichavacapa ema Jesús.

²⁸ Te títapiricapa ema Jesús eta máimitusiravacahi ena achaneana, ichaperinehi eta náramirahi eta máimiturapiana. ²⁹ Vahi nasamasarénahini. Tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

Ema Jesús macanaraca ema émana achane leproso

(Mr 1.40-45; Lc 5.12-16)

8 Te tiúcupaicapa ema Jesús tayehe eta cerro te mávinehi, camuriana éna achaneana téhicanapahi. ² Tacahe, macahepaipa ema émana achane leproso. Témeñahavapa mayehe ema Jesús. Tépuycapa te mamirahu. Tásiha, máichapa:

—Tata, nucasiñavahi eta piyehe, picanaracanupaini.

³ Tacahe, ema Jesús majicapapa:

—Nuvaraha nuncanaracavi. Tájinapa píchiravaina puiti —máichapa.

Máemamahacapa. Tásiha, enevanepa tinaracahi ema macajumaquenénihini eta máechajisirahi ema Jesús.

⁴ Tásiha, ema Jesús máichapa:

—Pímaha, nacuija picumetaca eta nútirahi nuncanaracavihi. Piyanavanesera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

Ema Jesús macanaraca ema mamusura ema capitán romano

(Lc 7.1-10)

⁵ Tacahe, ema Jesús títecapapa tayehe eta Capernaúm. Matiarihini ema achane apavasana. Comandan-tehi éma nayehe ena suntaruana romanoana. Capitán eta mávacure. Tiyanapa mapauchapa ema Jesús.

⁶ Mayaserecapa, ánipa máicha:

—Tata, mararihi puiti te nupena ema amaperu numusura ticajumahi eta áire. Tétavicavahi tacativa masama. Pájanupaini, picanarasinanupaini éma —máichapa.

⁷ Ema Jesús, majicapapa:

—Tiuri, nuyanayare nuncanarapanayare —máichapa.

⁸ Tásiha, ema capitán majicapapa:

—Tata, vahi picucañamacava eta pítesiraina eta nuyehe, taicha vahi táuricahini pisiapahini te nupe-nasami. Németeaca taratarichu picavanairipi eta

picanarasiraya ema numusura. ⁹ Taicha núti nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuavacapuca, tisuapanuanahi. Te nuvanecapuca ema nuvaneru, enurujipa tisuapanuvane —máichapa.

¹⁰ Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vijaneana israelíta mácutihini ema maca achane apavasana eta macasiñavairahi eta nuyehe. ¹¹ Nutmetacahe puiti: Járjapainapa eta sache, náitecapiraya ena camuriqueneana achaneana apavasana tiásihayanare te tamutu avasareana te juca apaquehe. Tisiapanayare eta mávasa ema Tata, te mávihahi ema viáchucaini Abraham, ema Isaac, émapa ema Jacob. Tétavicavainapa eta náurismurevaya. ¹² Tacahe, tamapuruji eta náimatiequenehairahi ena vijaneana israelítana eta máechajiriruva ema Tata, váhisera nácasíñavahini eta nuyehe. Eta tivichavacayarehi tayehe eta nacaicuñaiyaya eta te tamapicuquene te távihahi eta táijurequenehi yucu. Ticapitiquiahechavainapa eta tacatavayare nasama. Tíyahanainapa —máichapa.

¹³ Tásiha, ema Jesús máichapa ema capitán:

—Piyana pichava te pipena. Tinaracripa ema pimusura, taicha eta picasiñavairahi eta nuyehe —máichapa.

Tacahe, ema amaperu ticajumahi tinaracripahi te jena hora eta náechajirisiravahi éna.

Ena Jesús macanaraca esu máimase ema Pedro

(Mr 1.29-31; Lc 4.38-39)

¹⁴ Ena Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi.

¹⁵ Máemamahacapa, enevanepa táetaviacahi eta fiebre. Tinaracapa. Enurujipa téchepuca. Tásiha, tépanavapa ésu eta suítátirahi ema Jesús.

Camuriana ena macanararuapahi ema Jesús

(Mr 1.32-34; Lc 4.40-41)

¹⁶ Te yátipa, títecaparácana paichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavapaipa ena éreanana tiávahácanahi ena nacajumaqueneanahi. Macanaracavacapa ena apamuriana tisamanahi eta apana jumareana. ¹⁷ Eta juca títauchavapahi eta táechajisihairahi eta májurehi ema víyahaini profeta Isaías, ani tacahehi: “Masaminahavivare eta vijumana eta macanarasirahavihi”.

Tituparacahavi vahi véñamavaimahi eta víjarasiravahi véhica ema Jesús

(Lc 9.57-62)

¹⁸ Te máimahapa ema Jesús ena camuriqueneana achaneana nachayacahi, macavanairipipa ena máimitureana natsecava eta nánuesirayarehi te apachara cáquiure. ¹⁹ Tacahe, ema émana escribáno témeñahavapa mayehe ema Jesús. Máichapa:

—Tata máestro, núti apana nuvaraha néhicavi te jácani pivarahaquenyare piámianu —máichapa.

²⁰ Ena Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera nuti Manerejirunuhi ema Viya, tájina nuviya nusiapihahini —máichapa.

²¹ Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupeña. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

²² Ena Jesús majicapapa:

—Péhicanchucha. Pésamirica náecaracacaichaha ena máecharaireana. Tájina tájjaracavimahi eta juca tihapasamurerecavihi —máichapa.

Ena Jesús macaesamirica eta táepacusirahi eta une étapa eta técatícava

(Mr 4.35-41; Lc 8.22-25)

²³ Te títapiricapa ema Jesús, tiávacuhapa te pacure. Énapa ena máimitureana, náehicapaipa éma. ²⁴ Te itupierecanapa, járajapapa eta muraca técatícava. Ichapevaca eta táepacuruhana. Tisiapapaipahi eta une tayehe eta pacure. Ena Jesús, tímacapaichucha éma.

²⁵ Tacahe, ena máimitureana tipiararecanapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

²⁶ Ena majicapavacapa:

—¿Tájaha tacayema epica? ¿Vahi ácasíñavapahini eta nutiarihirapahi eta eyehe? —macahepa.

Tásiha, téchepucapa. Macamatinacapa eta técatícava étapa eta une. Enevanepe tésamiricavahi eta táepacusirahi. Tájinapa táichiravainahini.

²⁷ Ena máimitureana ichaperinehi nárami. Ánipa nacahe:

—¡Tétavicavahi eta máitupajjiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatinacahi eta técatícava étapa eta une eta táepacusirahi! —nacahepa.

Ena apinana ajairana návaháruana ena ichape-muriqueneana éreanana

(Mr 5.1-20; Lc 8.26-39)

²⁸ Te títecapapa ema Jesús te apachara eta cáquiure te apaquehe Gadara, tíuchujicanapa te ecari ena apinana ajairana, návaháruanahi ena éreanana. Tétavica-

va eta náíñehivavacahi. Náehayarehi nácani tiánucuhanapahi. Tacahe, napauchapa ema Jesús. ²⁹ Tipiararecanapa, ánipa nacahe:

—¿Tájaha picha píteca pipauchahavi piti Jesús, Machichaquenevihi ema Viya? ¿Pivarahapa picaetema-jirichahaviyare víti? ¡Pájanuhavi, vuíchaha picuvanechahavi tayehe eta vicaicuñaiyayare! —nacahepa.

³⁰ Tásiha, tatiarihivare nacachacayahi eta camuriqueneana cúchiana tinihicanahi. ³¹ Ena éreanana nayaseacapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiapahacavaca eta jena cúchiana —náichapa.

³² Tacahe, ema Jesús máisapapa:

—Tiuri, eyana esiapahacavaca —máichapa.

Tacahe, tiúchucanapa ena éreanana nayehe ena návaháruanainihi. Tiáramemurihanainehi eta cúchiana. Tijunaparacanapa témiririjicanapa te tachausi eta cáquiure. Téririjicanapa. ³³ Ena tijanearecanainihi eta cáchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruanahi ena éreanana. ³⁴ Tacahe, tiyananapa ena achaneana te mávihahi ema Jesús, náimahapanahi. Te náimahapa éma, nayaseacapa vahi macuitecapahini te návasa, machavahini te másinehi.

Ena Jesús macanaraca ema émana achane macajumaquene eta muracaquiha

(Mr 2.1-12; Lc 5.17-26)

9 Tacahe, ema Jesús tichavapa tiávacuhavarepa te pacure. Tichavapa tayehe te mávasahi Capernaum. ² Ánaqui náimipauchavarepa ema achane macajumaquene eta muracaquiha. Ema tivecahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Pétumechava, nuchicha! Nucaepahainavipa eta pipecaturanaini —máichapa.

³ Natiarihi ena escribánoana. Eta nasamirahi ema Jesús, ánipa nacahe te nasamure: “Ena maca tépiyacava tímijachavahi Viya eta macaepahairahiji eta pecatua. ¡Tétavicava eta matapirava!” ⁴ Émasera ema Jesús máimatihí eta napanereruanahi. Máichavacapa:

—¿Tájaha tacayema eta éjecapirava nuyehe te epanereruanahi? Núti tájina nutapiravaina eta níchirahi eta juca. ⁵ Núti, eta nucaepahairahi eta mapecaturana ema maca, tacutihí eta máejererahi eta nuncanarasirahi eta máquehe. ⁶ Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa.

⁷ Enevanerinehi téchepuca ema macajumaquenéni. Tiyanapa te mapena. ⁸ Ichaperinehi eta náramirahi namutu ena achaneana natiarihiqueneanahi. Tétavicavarinehi eta nacunachirahi ema Viya taicha eta máitupajijiasirava ema Jesús eta máijarasirahi ema Maiya.

Ena Jesús máichuha ema achane ticaijare Mateo, mayeheyare apóstole

(Mr 2.13-17; Lc 5.27-32)

⁹ Te apanapa sache, nuti Mateo néjacahi eta te nucobrarésirare eta impuesto. Tacahe, tiánucuhapaipa ema Jesús. Te tímahanupa, tíchuhanupa.

—Yare, péhicanu —máichanupa.

Enevanepa, néchepucahi. Néhicapa éma.

¹⁰ Tacahe, námapa éma te nupena, énapa ena máimitureana. Níchuhavacapa ena nuchamuriana ticobrararahianahi eta impuesto énapa ena apamuriana tisipecaturana. Nénicavacayarehi éna. Macachanemurihivare ema Jesús eta vinisirahi. ¹¹ Títecapanavarepa ena fariséoana. Eta náimairahi namutu ena némunaruqueneana, eta vicachanerahi ema Jesús, ticaecahirecanapa. Ánipa nacahe nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta manisirahi ena nánitatajiana ticobrararahiana eta impuesto? ¡Ticapecaturarahiana éna! —nacahepa.

¹² Te masamairiricapa ema Jesús eta náechajiriruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico. ¹³ Nútiripa vahi étaina tímitecanuhi nutanucayarehi nácani matapiravareanahi. Nutanucapahi núti ena tisipecaturana, apaesa náneuchava, náinajica eta napecaturana. Tásiha éti, eyana ecaravahu eta máechajiriruvana ema Viya. Ánipa macahe: “Núti nuvaraha yátupinaini eta eجانوراivainihini. Taicha te vahi, tamapurujiyare eta ecamavahuirahi eta nuyehe” macahepa ema Viya.

Nayaserecapa ema Jesús tayehe eta ayuna

(Mr 2.18-22; Lc 5.33-39)

¹⁴ Títecapanapa ena máimitureana ema Juan Tícachasiricarahi, nayaserecapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihiní viti máimitureana ema Juan, énapa ena fariséoana?

¹⁵ Ema Jesús majicapavacapa:

—Nímicutichinahe puiti. Vahi táuricaímahi ticatisamurevana nácani ticaichuhacasianahi tinicanahi nayehe ena araimana. Tiúrisamureanayarehi taicha matiarihihi ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaímahi eta ayunanainahini ena nímitureana. Járापainapasera eta sáchehare, ticaverejicasianayare taicha ticaratacanuanainapa ena ticapacuanaya núti.

¹⁶ Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi ticuticacaimahi eta nayeherepiana ena achaneana. Eta ítusira éti eta nímiturapiana, tavaraha ínajica eta ichasi eyehe-

repiana tauriqueneanahi —máichavacapa ema Jesús.

Ema Jesús macanaraca esu machicha ema Jairo, ésupa esu apana esena sucajumaquenehivare
(Mr 5.21-43; Lc 8.40-56)

¹⁸ Téchajiricavaichahahi ema Jesús nayehe ena achaneana, títecapanechavare ema émana achane ticaijare Jairo. Tupairucahi éma. Matupirupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecahina —máichapa.

¹⁹ Tásiha masuapapa ema Jesús. Tiyanapa te mapena ema Jairo, vimutupaichu viti máimitureana. ²⁰ Tásiha, sutiaririhivare esu ésuna esena sucajumaquene. Doce áñoripahi eta sucatajivairahi, táichirahi eta suítine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiraha. ²¹ Taicha te supanereru ésu, sucahehi: “Taratarichu jácani te né-mamaca eta ñimuiraha, éta ticanaracanuyare” sucahepa. ²² Émasera ema Jesús masamarichucha eta suémamajiasirahi, macaicutiarahi eta macanararesirahi. Téquerucavapa. Máimahapa eta supisirahi esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi —máichapa.

Tacahe, tinaracapa esu esena. Vaipa tápechahini eta sujumainihi.

²³ Tiyanavarepa ema Jesús. Títecapapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecari esu suépenaquene. Énapa ena achaneana, tijajamurianaripahi eta náiyairahi. ²⁴ Tásiha, ema Jesús máichavacapa: —Íuchucachaha te aneca. Váhinéni suépenahini esu suca amaperu. Tímacarichucha ésu —máichavacapa. Énasera nacaecahirichucha éma, técavanapa. ²⁵ Te tiúchucanapa ena achaneana, tisiapapa ema Jesús te suávihihi esu suépenaquene. Macaratavauchapa ésu. Macaechepucapa. Tichavapa títarecahi ésu. ²⁶ Te nasamairiricapa ena ticavasanahi eta te Capernaum, náraminehi namutu. Nacatsatsaicaipa timetajiricanapa.

Ema Jesús macanaraca ena apinana púchuquiana

²⁷ Tiuri, tichavayarepa ema Jesús te mapena. Eta mapaisirahi te calle, náehicapaiapa ena apinana púchuquiana. Tipiaracanapaipahi te máequene.

—¡Tátachicha Jesús, pájapanuhavi picanaracahavi. Vicasiñavi piti yátupiquenévihi Cristo! —náichapa.

²⁸ Váhisera masuapavanehina éma. Te tisiapapa ema Jesús te mapena, ena púchuquiana tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñanuhi eta nuncanarasiraheyare? —macahepa.

Ena najicapapa:

—Yátupi, tata.

²⁹ Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare —máichavacapa.

³⁰ Jéhesare, enevanepa tinaracanahi. Tímairicanapa. Tásiha, muracapa eta matuparasira vahi nacumetajirica eta macanarasiravacahi éma. ³¹ Váhisera nácahehina éna. Étarichuhi te tiúchucanapa, timetajiricanapa eta macanarasiravacahi. Tásiha, náechapa namutu te tachacayarahanahi eta avasare eta juca máichaquenehi ema Jesús.

Ema Jesús macanaraca ema achane upa, macaechajicahi

³² Te viúchucavarepa, nacahepaipavare ena achaneana. Námapahi ema achane. Úpahi éma, taicha mávaháruhi ema éreana. ³³ Tacahe, ema Jesús máquijicapa ema éreana, ema tiávahácainihi. Tásiha, ema achane tinaracapa. Téchajicapa. Ichaperinehivare eta náramirahi ena achaneana eta náimairahi. Ánipa nacahe:

—¡Tétavicava eta máitupajijiasirava ema Jesús! Te viávasa Israel, nájina tiratahaina tíchaina tácutihini eta juca vímahaquenehi —nacahepa.

³⁴ Nararirihivare ena fariséoana. Ánipa nacahehi:

—Ema maca Jesús, vémeteaca majupahahi ema Satanás, ema náquenumurihi ena éreanana. Máijararuhi jácani eta máitupajijiasiravahi eta macuchusiravacahi éna —nacahepa.

Ema Jesús majapanuvaca ena achaneana

³⁵ Ema Jesús tamutuhi mapaica eta avasareana étapa eta ánichichaqueneana avasarechichana. Tímiturecapahi tayehe te jácani máitecapihapahi te náurujsirarevana. Ticametarairupahi eta máechajiriruva ema Viya eta náuchucuirayare ena ticasañanahi éma, machaneranayarehi éna. Ticanararecapahivare ena ticatajivanahi ticacatiruhanahi. ³⁶ Camuriana ena achaneana títanajirícavanahi. Taicha ticatajivanahi éna, nájina nácasañahini. Nacutihi eta uvesa te nájina tijaneacaina. Eta máimairavacahi ema Jesús, ichape eta majapanuiravacahi. ³⁷ Tacahe, ema Jesús máichahavipa viti máimitureana:

—Tétavicavapa eta vicamunuirava ena tímicitacahavianaya tayehe eta juca vématanerepihi. ³⁸ Eyaseacayaresera ema Tata Vicaiyaquene, máijaracahavi ena tímicitacahavianayare. Eta juca tímicutijiricavahi mácani achane eta macamunuiravahi ena tímicitacacanaya te máechatijicaya eta maharusura —máichahavipa.

Ena dócequeneana apostóleana manerejiruanahi ema Jesús

(Mr 3.13-19; Lc 6.12-16)

10 Tacahe, ema Jesús tíchuhahavipa viti dócequeneana, mayeaneanayare apóstole. Tíjaracahavipa eta vítupajijiasiravayare viratahairayarehi vicuchu-

cavaca ena éreanana, vicanarasirayareva ena nacaju-maqueneana étapa eta nacatiruhavana.

² Eta juca víjareana viti apóstoleana †: Ema títapuca ema Simón Pedro, émapa ema maparapeichu Andrés, ema Jacobo ema maparapeichu Juan, ema Felipe, ema Bartolomé, ema Tomás, nútupa Mateo, ema apana Jacobo, ema Lebeo, ema apana Simón, émapa ema Júlasí Iscariote (ema tíjararecahi ema Jesús).

Ema Jesús mavanecavacapa ena dócequeneana apóstoleana napaicayare tamutu avasareana, ticametarairuanayarepahi
(Mr 6.7-13; Lc 9.1-6)

⁵ Tacahe, ema Jesús tévatacavavipa viti dócequeneana apóstoleana vicametarairuyarehi. Ánipa máichahavi:

—Vahi ecuyana tayehe eta návasana ena apavasa-juecuana. Váhivare ecuyana nayehe ena samarítanoana. ⁶ Eyanayaresera tayehe eta avasareana návasanahi ena vijaneanana israelítana. Taicha éna nacutihi eta uvesana máqueneana. ⁷ Eyana ecametarairuyare nayehe. Emetacayare eta nútijapairainapa nuti Náquenuyare, nuti nucuchucuhavacayare éna, taicha mavanerunuhi nútí ema Viya. ⁸ Ecanaracavacayarepahi ena leprósoana énapa nácani ticatajivanahi taicha eta apana jumare. Ecaechepucayareva ena nápenaqueneana. Ecuchucayareva ena éreanana. Éti, vahi evachareruinihi eta juca ítipajijiasiravahi, váhivare ecobrachimahi nácani ecanararuanayare.

⁹ Váhivare íamaimahi eta oro, eta plata, eta reale. Tacuija iama eta enirurucuha te alforja. ¹⁰ Étanarichuvare emuiriha, éta íamayare. Éta eta éparupeva, étaripa eta eyupairiquiana. Ema ticaematanerahi, tatuparacahi náenicayarepahi te jácani macaemataneiyapahi. Ene ecaheya éti, títátíheanayare ena tijacapanaya eta ecametarairuyarepahi.

¹¹ Te ítecapaucha jácani avasare, etanucayare ema achane tiuri, témunarahi. Enasiyare mayehe. Tíamainucava te táitecapa eta íuchusirayareva tayehe eta avasare, epaenumavaya ejunijica eta ítecapihahi. ¹² Te esiapayarepa tayehe eta peti, eyaseacayare ema Viya eta náuricacarevaina ena achaneana ticapenana eta peti. ¹³ Te tíurianahi ena achaneana ticapenana eta peti, ímiyanava eyaseuchayare eta náuricacarevaina. Téhesera te vahi nacuri, váhi eyaseuchaimahi. ¹⁴ Étaripa te váhipuca nacujacapahe te jácani avasare, étapa te jácani peti ítecapihayare, váhivare nacubaraha nacusamahe, íuchucavaneyareva. Étatapevachavanúmayareséra eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehíni. ¹⁵ Nutupiruva numetacahe, te táiteca-

† Ema nani apinana ajairana ema Jacobo émapa ema Juan, naparapecacahi, machichanaveanahi ema Zebedeo. Ema Mateo, eta máematanepepiníhi, ticobrareca eta impuesto. Ema apana Jacobo, machichahi ema Alfeo. Ema Lebeo, mapapihi eta máijare. Ticáijarehivare Tadeo étapa eta Judas. (Te pivaraha pecha, pitanuca te Marcos 3.16-19 étapa te Lucas 6.14-16.) Ema apana Simón, tímaticarehi éma, nachamurinihi ena revolucionárioana ticáijareanahi “cananístana”. Navaraha náquijica ena extranjeroana romanoana.

pa eta juicio, tíapajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaeni te Sodoma étapa eta Gomorra.

Nacatianacainapa ena téhicanapahi ema Jesús
(Lc 12.2-7)

¹⁶ Esamanuchaha. Nútí nuvanecahehi éti eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táíñehiqueneánahi. Étisera ecutiyahe eta uvesa eta tamansuvahi. Ítucahe eta ecaichepaysirayare eta navainarajivana. Váhisera ecujicapachava te návarahapuca náehahe. ¹⁷ Échapava, taicha nararihiyare ena achaneana ticatianacaheanayare táichavenehi eta éhisiranuhi. Ticaratacaheanainapa, écyaserehinapa nayehe ena juéseana. Téstaheanainavarepa eta te náurujisirevaneana. ¹⁸ Tásiha, etiarhiyare éti tíamahanaya te namirahu ena aquenucana, téhevale te namirahu ena Presidenteana gobiernonahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana. ¹⁹ Tacahe, te jácani námahepauca te namirahu ena aquenucana, vahi ecueñamava tayehe eta jácani échajiuchiravayare, ecatiuchiravayare. Échajicayare eta échajiriruvana máijjararuheya ema Espíritu Santo te jena sache. ²⁰ Taicha máimahaheinapa, tímitucaheyahe eta échajisiraya. Vahi étijivaimahi eta échajisiraya.

²¹ Natiarihiyareva nácani achaneana tíjararecanaya ena naparapequeneana, navarairahi náimicapaca táichavenénahi eta náehisiranuhi nútí. Natiarihiyareva ena nácani náiyana, navarahayareva náijjarareca ena nachichanaveana táichavenehi eta náehisiranuhi nútí. Natiarihiyareva nácani nachichanaveana nacana-rainapa ena náiyana, náimicapacainapa táichavenehi eta náehisiranuhi nútí. ²² Namutuyaréni ena achaneana ticatianacaheanayare táichavenénahi eta éhisiranuhi nútí. Téhesera ecamichahi tamutu, ímiyanavahi eta éhisiranuhi te táitavapa tamutu, nucuchucaheyaheya nútí. ²³ Te napanajicahapuca te jácani avasare íávihahi, táichavenehi eta ecametarairuirahi, ejunayare tayehe eta apana avasare. Jéhesare, nuti Manerejirunuhi ema Viya, nútijapavanénapa. Vuíchaha ecuitahi epaica eta avasareana ne vijaneanana israelítana.

²⁴ Éti nímitureana, ticatianacaheanaya ena achaneana. Vahi epicaucharémahi nayehe, táichavenehi éhisiranuhi nútí. Ticatianacaheyaesera tacuti eta nacatianasiranuhi nútí. ²⁵ Tíjarechaheanayare váinarajihe, máurishihepuca, tacuti eta náumehairanuhi nútí. Étisera, evapinavaya eta ecutiranyare eta nacatianasiranuhi nuti íáquenu, nútí eyehenuhi maestro.

²⁶ Váhisera ecupicavaca ena ticatianacaheana. Ema Viya tímararacaheya. Ticunachaheya eta ecamichirahi, evehainapa eta ícuchihi. ²⁷ Tásiha, étumechava eta

ecametarairiraya tamutu eta nímiturapiana te tamutu avasareana. Jácani néchajiriruvanahi te timapicu, éti ecuchujicayarehi te tijarahi, emicauchiravacaya ena achaneana. Étaripa eta nujajiruhehi te vicarichuhi, epiaracainapa te calle. ²⁸ Vahi ecupica nácani nacapacapa eta iáquehe, tacarichuchucha náituruequenehayare. Váhisera naratahaimahi nacamitiequeneha eta iáchaneva. Macarichu ema Viya epicayare, taicha éma máituruequenehahi tamutu. Maratahahi macamitiequeneha eta iáchanevana tayehe eta táíñehiquene infierno, te ecainajiruva táichavenehi eta episirapuca eta nacapasiraheyare.

²⁹ Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresirahi, éta eta táepenirahi. ³⁰ Evetijipa éti, éñamacarepanahi me Viya. Éma, tímatipa eta tatupa eta echutimacana. Téchahehivare éma tamutu eta itaresirana. ³¹ Eta tacahe, vahi ecueñamavahi éti tayehe eta itaresirana, taicha tétavicavahi eta emunavahi mayehe.

Vímereuchavayare eta véhisira ema Jesús

(Lc 12.8-9)

³² Tímiyanava ema Jesús tímitucavahi. Ánivare macahe:

—Namutu ena tímereuchavanahi eta náehisiranuhi te namirahu ena achaneana, núti apanavare nímereuchavaya eta nuchanerairavacahi éna mayehe ema Tata Nucaiyaque, ema tiávihahi te anuma. ³³ Nácanisera vahi návarahahini tímereuchavanahi eta náehisiranuhi, núti apanava nímereuchaya eta vahi nuchanerainahini éna, te mamirahu ema Tata Nucaiyaque.

Ena achaneana náepuruvacainapa nácani téhicanayare ema Jesús

(Lc 12.51-53; 14.26-27)

³⁴ Éti ímijachaipapuca eta nítesirahi te juca apaquehe, tájina tácyemacarémahí, tíuricacareyarehi nícha. Váhisera ene tacahe. Níchaveneya núti, ena achaneana tépuruheanaya térajicavanaya eyehe. Eta tacahe, nuvaraha échapirica yátupina eta juca éhisiranuhi. ³⁵ Taicha puiti juca vicaijuheyare, mácani achane, te natiarihi ena machichanaveana, nacatichayarehi ema naiya táichaveneyarehi eta máehisiranuhi éma. Ésuripa esu naena, nacatianacayareva. Ésupa esu chinenaca, sucatianacayareva esu suímase taicha eta suéhisiranuhivare esu apana. ³⁶ Ene nacaheya, nararihiyare ena tachichanaveana eta peti ticatianacana ena náiyana te peti níchavenehi núti.

³⁷ Nácanisera tñajicavana eta náehisiranuhi táichavenehi eta nactianasira ena nachichanaveana, váipa tatuparacahini nuchanerainahini. Énaripa nácani tñajicavana eta náehisiranuhi táichavenehi eta nactianasira ena náiyana, énerichuvare vaipa tatuparacahini nuchanerainahini. ³⁸ Énerichuvare nácani apaesarichu eta navarairahi téhicanuanahi, váhivare nájaracavahini táimicacahini eta náehisiranuhi,

vaipa tátuparacahini nuchanerainahini. ³⁹ Taicha nácani téñamavanahi eta náitaresira, tiávamirahuana eta náehisiranuhi, énajivayare ticamitiequenehavanaya. Énasera nácani yátupi tíjararecavanahi téhicanuana, táimicaparuanayarepuca eta náehisiranuhi, éna tíuchuchuanayare eta náitaresirayare.

Jararihi eta vícuchihi te anuma

(Mr 9.41)

⁴⁰ Ema Viya máitsivachayare nácani tíuriana ena najacapiraheyare nasamahe éti. Taicha eta najacapi-rahehi, ticaecheranahi eta najacapiranuhivare núti; énerichuvare najacapahivare ema Tata Nucaiyaque. ⁴¹ Énerichuvare nácani tijacapanahi ema profeta nuvaneruhi, énapa ena achaneana tiuri eta náehisiranuhi, máitsivachayare ema Tata, máijarasiravacayare eta náicuchi. ⁴² Énaripa ena témunarahanahi nayehe ena nani ánichichaqueaneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchiquene —máichahavipa ema Jesús.

Ena Juan Tícachasiricarahi mavanecavacapa ena máimitureana

(Lc 7.18-35)

11 Te tamutupa eta máimitusirahavihi ema Jesús viti dócequeneana mayeheana apóstole, tiyanavarepa eta te avasareana tayehe eta Galilea. Taicha mavarahahi máimitucayare ena achaneana eta máechajiriruvana ema Viya.

² Tiuri puiti, ema Juan Tícachasiricarahi, mávinehi te cárcel. Ánaqui masamairicapa eta máíchaque-
neanahi ema Jesús. Tacahe, máevatacapa ena apinana máimitureana, nayaserepanayarehi ema Jesús. ³ Te náitecapauchapa, náichapa:

—Ema viáquenu Juan tivanecahavihi viyaserepanaviyare te yátupihipuca pítipahipuca Cristo ema vicuchapaquenehi, ¿téheserapuca vímiyanavayarepuca vicuchapa? —náichapa.

⁴ Ema Jesús majicapavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiana. Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacai-pavare ena náepenaqueaneanaini. Énerichuvare níchuhahi ena páureana náeneuchavaya apaesa náuchucuha. Tásiha, eyana emetaca ema Juan tamutu. ⁶ Vaipa macueñamava ema Juan eta nuyehe. Tétavicavahi eta máuricacarevahi éma, te ticasiflavahi eta nuyehe —máichavacapa.

⁷ Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani víuchaha nacaratacaini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametairuirahi? Éti ímijachaipapuca

mamapachichijiriruvaichucha eta máechajisirahi tacutihi te vímararaca ta taflurena eta acutena te tacayamuririjica eta técticava. ⁸ Ímijachaipavarepuca tavayuaruhi éma tíurinanácavayarehi eta macamuiri-hairahi. Écharichuhi éti mácani tíurinanacavahi, pín-canillahi eta máitaresira, váiparinehi tíuchucaimahi te sache, váhivare tíyanaimahi te mávapahiana apaquehe. Manasiqueneyarehi te jácani tíurina peti. ⁹ Nuyase-recahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavanneruhi ema Viya eta yátupiquenehi profetahi éma. Nájina mácutihini ena apamuriana profetana. ¹⁰ Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvanecayare ema tínapumirauchaviyarepahi ema ticametarairuyarepahi, apaesa natsecavapaipa ena achaneana eta najacampiraviyare” tacahepa eta Sagrada Escritura. ¹¹ Núti nutupiruva numetacahe: Ema maca Juan, nájina mácuti nayehe ena achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchanerananya, apaesachichapucaini eta nacaicutiarairahi eta mapanereruana ema Tata.

¹² Ema Juan tépanavapa eta máimitusirahi ena achaneana tacamunuirahi eta náneuchirava me Viya. Nararihisera ena vahi náuricahini nasamararahini. Éta pa tímicitichahi témecatájívachahi éma. Puíticha tanasihi ticatichanuana núti apanava, témecatájivachanuayare. ¹³ Ema víyarahaini Moisés téchajisihanuhi eta te májurehi. Énaripa ena víyarahaini profetana náechajisihahi eta nítesirayarehi nuti Manerejirunuhi ema Viya. ¹⁴ Puiti numetacahe: Ema Juan émaripahi ema profeta máiteruyarehi mavasiyarehi ema víyarahaini Elías, eta máinapumirauchiranuyare. ¹⁵ Te evarahapuca ecaicutiara, tavaraha eta epanerechivanavaya.

¹⁶ Etiaririhisera eti achaneana puiti juca sácheana, eta emasuapajiraivahi, nímicutichahesa ena amaperuana tíutseruanahi. Apapipijichucha eta nacayemaque-neanapahi. Ema apana macahepuca: “Vépiyacaya eta piéstachicha”. Énasera ena apamuriana vahi náisapavahini. Tásiha, ema apana macahepuca: “Vépiyacaya eta ecari”. Váhivaresera náisapavahini.

¹⁸ Ema Juan, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi ema éreana. ¹⁹ Nuti Manerejirunuhi ema Viya, eta nítecapauchirahepa, nucachanehepaipa eti achaneana eta enisirahi. Etiaririhivare eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena achaneana tisipecaturaralianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihini échemarahi, ímatinuhini eta nucavanahirahi eta me Tata —máichapa ema Jesús.

Eta táicuñayare eta návasana ena achaneana masuapajirairahana (Lc 10.13-15)

²⁰ Ema Jesús tépanavapa máechajisiha eta táicuñayarehi eta avasareana máichinehi eta tíamicareana. Tícaicuñanayarehi ena tachichanaveanahi táichavenehi eta namasuapajiraivahi. Váhivare náneuchavahini, náinajicahipucaini eta napecaturana. Máechajicapa ena achaneana tímicitijiricavahi natiarihinahini te mamirahu. Ánipa macahe:

²¹ —¡Páurehesami eti nujaneanana ecavasanahi te avasare Corazín! ¡Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu eta tíamicareana níchaqueneanahi te emirahu, váhisera ávarahahini éneuchavahini. Ema nani achaneana ticavasanahi te Siria, apavasananahinéni, tétavicavahinéni eta namaurivahi, németeacasera núti nasapihipucaini téneuchavana te náimahahini eta níchaqueneanapahi. Enévanenahíni náimerecavahini yátupi eta náneuchiravainahini. ²² Numetacahevanesera: Te jena sáchezare, muracapanayare eta ícuñayare éti, taicha eta emavarairahi éneuchavahini. Tacachuricayare eta nacaicuñairaya ena achaneana apavasanana ticavasanahi te Siria. ²³ Étiripa eti ecavasanahi te avasare Capernaum, tamapurujihíni eta nímitusirahéni éta pa eta ímairahi eta tíamicareana níchaqueneana. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti. Taicha te nímerecavahini eta tíamicareana tayehe eta avasaréni váinarajiquenehi Sodoma, tácutihini eta ímairahi éti, ichapehipucaini eta náneuchiravainahini, váipapuca macuicuñacahini ema Viya. ²⁴ Numetacahevanesera: Ichape eta ícuñayare te táitecapapa eta júcioyare. Tacachuricayare eta náicuñayare ena ticavasanahini te avasare Sodoma —macahepa ema Jesús.

Ema Jesús tíurisamuréinehi mayehe ema Maiya (Lc 10.21-22)

²⁵ Étarichuhi te jena hórahi, ema Jesús ánipa macahe: —Tata Nucaiyaquene, tétavicava eta nucunachiravi. Jéhevare píti táquenuvivi eta anuma éta pa te juca apaquehe. Títauchavaipa eta pipanereruhi. Vahi písapahini náitucahini eta júcana ena tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahini. Puiti nasapiharipahi nacachuricahi ena títipajijiacavanahi. ²⁶ Tétavicavahi eta táurivahi eta pipanereruhi píti, Tata Nucaiyaquene.

Ema Jesús máichuhavaca ena navitajiruana, mavaraha macanaracavaca

²⁷ Tacahe, ema Jesús máichavacapa ena achaneana:

—Ema Tata Nucaiyaquene, ema tįjaracanuhi eta nůtiraya néchaya tamutu. Nájina énaĵivainahini náimatihini ema Tata. Nucarichu nůti néchinavahi ena nímimati-ruanayare éma. Taicha nůti yátupihhi eta nímatirahhi ema Tata Nucaiyaquene; tacutiĵuenehi eta yátupirahivare eta máimatiranuhi éma.

²⁸ Yare, ecasiĵanu emutu eti evitajiruanahi te iáchanevana eti éyarecarahiana eta éĵecapiravana. Nůti nuncanaracaĵeyare. ²⁹ Ísapava nunacasicahē eta nuyehē yugo. Nucachanehe apaesa ecaravahu nuyehē, taicha nůti mánsunu, tétavicava eta nůriva eta nusamure. Éti tétavicavaya eta iúricacarevaya te iáchanevana te eĵacapa eta nímiturapiana. ³⁰ Taicha eta nuyehē yugo vahi tácaĵera. Tipeveĵiyare esama —máichavacapa ema Jesús.

Ena fariséoana náimipicauchahi eta nayeĵerepiana tayehe eta sávarumuhuana. Émasera ema Jesús máimereuchahi émarichu téchahi eta nayeĵerepiana ena achaneana eta sache nanarasirayare.

(Mr 2.23-28; Lc 6.1-5)

12 Eta jena sávaru, ema Jesús tiyanapa tipaica. Tiámahavipa viti máimitureana. Témehicavanapa ena fariséoana. Vétavijicapaipahi eta isanitia. Tacahe, eta vipaisirapahi, vécuĵapaipa viti máimitureana. Tásiha, vivechuĵihapaipahi étajavapahi eta trigo. Vivepiraquihapaipa, vépurajacachavaipahi. Vinicapaipa, taicha tísapacareichucha. ² Énasera ena fariséoana eta náimararasirapahi, tisemamajuĵeanapa. Ánipa naicha ema Jesús: —Pímaha ena pímitureana. Ticaemataneana paichucha eta navepiraquihapahi eta trigo puiti juca sache tétavicavahi eta tacapicahuirahi. Vahi tísapacaremahi eta juca nacaematanérahhi puiti —náichapa.

³ Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyahaini David eta mapaisirapahi técuĵapaipa, énerichuva ena téhicanapahi. ⁴ Écharichuhi éti te masiapa eta mapena ema Viya, tiyaseserecapa eta manicayarehi. Náĵjaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi. ⁵ Váhipuca échajicuha éti eta te Sagrada Escritura eta mavanairipi ema víyahaini Moisés eta nayehe ena tiyujaracarahiana téchapajiricanahi eta Templo. Éna, táĵina natapiravainahini eta nacaematanerahi te sávarumuhuana. ⁶ Tavetijichapuca puiti nutiarhipahi nůti. Ichápequenénupánahi tayehe eta Templo. ⁷ Éti váhivare ecaicutiara eta juca máechajirivana ema Viya: “Nůti nuvaraha yátupinaini eta eĵapanuraivainaini. Taicha te vahi, tamapurujiyare eta ecamavahuirahi eta nuyehē” macaĵera. Te ecaicutiarahini, váhiyarehini ecaecahivaca ena nímitureana, taicha éna táĵina natapiravainapahi. ⁸ Tiuri puiti, numetacaĵeyare: Nůti Manereĵirunuhi ema Viya,

nůtirichu néchahi eta sache nanarasiraya ena achaneana —máichapa.

Ema Jesús macanaraca ema achane tépenavahu

(Mr 3.1-6; Lc 6.6-11)

⁹ Te apanavarepa sávaru, tiyanavare ema Jesús tisiapahi tayehe eta náuruĵisirareva. ¹⁰ Ánaqui matiarihhi ema achane vaipa tayamuricahini eta mavahu, tépenavahuipa. Natiarihhivare ena fariséoana, natanujiricahi eta ticaviurevayarehi ema Jesús. Nayaserecapa éma:

—¿Táuricapuca vicanaracavaca ena nacajumaqueneana te sávarumuhuana tacapicahuquenehi? —náichapa.

¹¹ Ema Jesús majicapavacapa:

—Nímicutichinahe puiti. Németeaca máĵina émanaina achane vahi macuĵapanuhini eta máititiquene uvesa, te téchapaicavapuca te pusu te jena sache tacapicahuquenehi. Eta máéñamirahi, tipatsicava mavecuha eta paure sárare. ¹² Nůti numetacahe: Ema maca achane tiápajucavahi eta téñamacare tayehe eta uvesa. Tacahe, tísapacaréchucha víchayare eta táuriqueneana te sávarumuhuana —máichavacapa.

¹³ Tásiha, ema Jesús máichuhapa ema achane ticajumavahuhi:

—Nímaha. Picajaruvauchava, pímereca eta pivahu —máichapa.

Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tichava, tacutipa eta mavahu sapa. ¹⁴ Tisemanarinehi ena fariséoana eta náimairahi eta máichaquenehi ema Jesús. Tiyananapa. Tinacuchavanapa eta napanerechirahi eta nacapasirayarehi ema Jesús.

Ema Jesús tiyanavarepa tipaichahi

¹⁵ Tacahe, ema Jesús, te máechapa eta napanererihi ena fariséoana, navarairahi nacapaca, tiyanavarepa tipaichahi. Náehicapa ena camuriqueneana achaneana. Énerichuvare, náitecapauchapaipa ena nacajumaqueneana. Macanaracavacapaipa namutu. ¹⁶ Mavane-capasera ena macanararuanapahi vahi nacumetajirica eta émairahi ticanaraca. ¹⁷ Eta juca títauchavapahi eta máechajirivahi ema Viya tayehe eta máĵurehi ema víyahaini profetaini Isaías. ¹⁸ Ánipa tacaĵehi: “Nuvaraha ímatiya ema vanairucahi nuyehē, nunereĵiruhi nůti. Tétavicavahi eta némunasirahi, nůrisamurehivare máicha. Ímatiyare éma taicha mávaháruhi ema Espiritu Santo máĵjararuhi éma. Ema nuvanara, tímitucavacayare ena achaneana te tamutu avasareana eta nuvanairipianahi. ¹⁹ Éma, táĵina máitucaimahi téhacaca. Váhivare tipiararecaimahi, macunachiravahi te cálleana tayehe eta máichaqueneanahi. ²⁰ Mánsuhi éma taicha ticayehēhi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máeĵacapa tayehe eta mávacureyare, muracainapa eta mávacureyare. ²¹ Tásihasera, namutu ena achaneana te avasareana

ticunevanayare eta mayehe, navarairayare máurichayare éma” macahepa ema Viya.

Ena fariséoana téjecapavanahi eta náimijachirahi ema Jesús mávaháruhi ema Váinaraji Satanás
(Mr 3.19-30; Lc 11.14-23; 12.10)

²² Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímairicavarepa. ²³ Ichaperinehi nárami ena achaneana. Tásiha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víyarahaini David —nacahepa.

²⁴ Énaserá ena fariséoana napanerechahi náepiyaquenehayarehi. Ánipa nacahe:

—Ema maca Jesús, eta macuchusiravacahi ena éreanana, vémeteaca máijararuhi eta máitupajijiasiravahi mayehe ema Satanás, ema náquenumurihi ena éreanana —nacahepa.

²⁵ Ema Jesús máimatihí eta napanereruhi éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimurihacacanaímahi apinainhipucaini partido. Te típutsimuriacacanapa, énajicacai-papucaini tiáquipaicacana. Énaripa ena achaneana te avasare, vahi táurica náiputsimuriavahini. Émaripa mácani achane, te camurianahi ena machichanaveana, váiparinehivare típutsimuriavanaimahi náehajiricacahini, énajiricacahini náquipairicacahini.

²⁶ Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tásimutuanayarehi éna, tímiyanavanayarehi eta nacaetemajirisirahaviyarehi. ²⁷ Éti ímijachaiha nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanereruana. Te émahipuca tímícatacanuhi ema Satanás, énerichuhivare éti máimícataruanahivare jácani éma, eta ecuchusiravaca ena éreanana. Epanerechinávanuma. ²⁸ Émaquenehisera ema Espíritu Santo, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

²⁹ Nájina tisiapaimahi eta námerechahini te jácani peti matiarihíhi ema túmequenehi. Tacamunuhi nacaratacanamayare, náiticanumayarehi éma. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

³⁰ Te vahi éhicanu, ecaemataneasiranuya, machamuríhehi éti ema ticatianacanuhi. Masapiha ímicatacachi éma eta macaetemajirisiranuhi.

³¹ Nutupiruva numetacahe: Eperdonachacareana eti achaneana eta epecaturana, tamutu jácani échajisihaira eta táíñemahiqueneana. Jácani te ecaecahinu-

hipuca nuti Manerejirunuhi ema Viya. Jararihísera eta epecatura vahi tiperdonachacaremahi. Éti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi núti, émaquenehi ema Espíritu Santo. Éti epanararacaripa éma. Tásiha, tájina eperdonachacareímahi puiti juca ítaresi-raichaha, evetijipa te apana ítaresira —máichavacapa.

Ema Jesús máimicuticha eta táhi eta yucuqui
(Lc 6.43-45)

³³ Tímaticare eta yucuqui te tiúrinisihí eta tacahira. Tímaticarehivare eta apana yucuqui, máuriraha eta tacahira. ¡Epanerecha! Núti níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarechahini, níchahini eta máematane-repiana ema Váinaraji, jéhevareserapucaini eta tímereuchanuhi eta mávahásiranuinahini éma.

³⁴ ¡Étiserá machichanaveanatataji ema Váinaraji! Váiparinehi ítucaímahi échajisihá eta táurinaqueneana, taicha éti tamaverasiavahi eta evainarajivana. Eta échajirivanahi ticaecherahi eta evainarajiva te esamureana. ³⁵ Nácani tiúriana achaneana, tatupiruvahi eta náechajirisirava taicha tiúrihi eta nasamure. Nácaniserá achaneana váinarajiana, vahi tiúrimahi eta náechajirisirava. Tíñemahipivacahi taicha tavayuchahi eta tavainarajiva eta nasamure. ³⁶ Nutupiruva numetacahe: Te táitecapapa eta sache táitecapirayare eta júicio, emutu ecayaserehiyare eta échajisihairana eta tamaeperajiqueneana. ³⁷ Étaripa eta tiviucaheyare. Téhesera tiúrihipuca eta échajisihairahi, vahi ecaicuñaimahi. Tájina tiviucahémahi —máichavacapa.

Ema Jesús macajachavaca ena fariséoana taicha eta namasuapajiravahi
(Mr 8.12; Lc 11.29-32)

³⁸ Tacahe, nayaseacapa ema Jesús ena fariséoana énapa ena escribánoana. Ánipa náicha:

—Tata maestro, vivaraha picuchucaini eta tiáramicare, te yátupipuca mavaneruvíhi ema Viya —náichapa.

³⁹ Ema Jesús majicapavacapa:

—¡Eti achaneana váinarajiqueneana! Núti nímatihé. Vahi esuapanuímahi, te nímercapucaini eta tiáramicare. Tásiha, váhinéni étina tatuparaca ímahahini eta tiáramicareana. Ímahayaresera eta tiáramicare tacuti-yare eta máichavaquenevahi ema víyarahaini profetaíni Jonás. ⁴⁰ Taicha ema Jonás masiapajuechahi eta ichapequene jima, mapana sache eta mayerevahi, mapanavare yati. Ene nucaheyare, núti Manerejirunuhi ema Viya, mapanayare sache, mapanavare yati, eta nucaheyare eta nucaecarasirayare. ⁴¹ Eta jena sáche-yare téchepucanayare namutu, tiúchuchuanayare ena achaneana ticavasanáinihi acane te Nínive. Tisipecaturarahianahinéni éna. Natupiruvahiserá nasuapa eta mametarairu ema Jonás. Téneuchavanavanehi. Tásiha, te jena sáche-yare, nacahenapa eyehe éti: “Táuricapa

nacaicuñaini ena nani maparajuruana ema Cristo, táichavenehi eta namasuapirahi éma. Taicha éma, máuriquenepanahi mayehe ema Jonás” nacakénapa. ⁴² Tacutiquene esu reina Seba eta acane, te susamairiricapa eta máitupajjiasiravahi yátupi ema Salomón. Ésu, tayérehiquenehinéni eta suávasa, tiyanahisera su-capayaca ema Salomón taicha suvarahahi susamayarehi éma. Tacahe te téchepucanapa namutu, ésu suyaseacainapa eta ecaicuña éti máetupicushmanahi puiti. Sucahenapapuca: “Táuricapa nacaicuñahini ena nani máetupicushmana, tájina náetseraruina nasamari-pa ema Cristo, ema títipajjijápanavahi mayehe ema Salomón, tásiha vuíchahacaruva nasuapa” sucahénapuca jácáni.

Ena Jesús máimicutichinahi ena masuapajirairahana mayehe
(Lc 11.24-26)

⁴³ Tímiyanava eta máechajisiravahi ema Jesús, ánipa macahe: —Énerichuvare éti ecuti mácani achane máinajiruhi ema émana éreana. Ema éreana tiyana matanucainapa eta jácáni masiapihayarehi. Eta mamaichimavira eta mavarahaquene, mapanerechayarehi tichava. ⁴⁴ Macahénapapuca: “Nuyanayare nuchava, nusiapayareva mayehe ema návaháruinihi”. Te títecapapa ema éreana mayehe ema achane mávaháruinihi, máimahapa ema achane máinajicaripa eta mapeaturana, vuíchahasera máehicahini ema Viya. ⁴⁵ Tásiha, tíurísamurepa ema éreana. Tásiha, tíchuarecapa ena sítequeneana machamuriana. Váinarajipanana éna. Nasiapahacainavarepa namutu éna. Jéhesare, tíapajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

Suítecapauchapa esu maena ema Jesús énapa ena maparapenaveana
(Mr 3.31-35; Lc 8.19-21)

⁴⁶ Tímiturecarichaha ema Jesús nayehe ena achaneana, títecapanecha esu maena énapa ena maparapenaveana. Nanasihisera te aneca. Navarahahi náechajicayarehi éma. ⁴⁷ Natiarihihi ena timetapananahi ema Jesús. Ánipa nacahe:

—Esu pémunaruquenehi pena énapa ena piparapenaveana, nararihi ani te aneca. Navarahahi téchajicaviana —náichapa.

⁴⁸ Émasera majicapapa:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

⁴⁹ Tásiha, tisuvechahavipa viti mayeheana apóstoleana. Tásiha, macahepa:

—Numetacahe, ena nani ena némunaruanahivare.

⁵⁰ Taicha namutu nácani ticaemataneacanahi me Tata tiávihihi te anuma, énahi ena némunaruanahivare —máichavacapa.

Ena Jesús máimicutichinavaca ena achaneana eta evaraqui tacaevaquenehi te apanapanenejiquene máteji

(Mr 4.1-9; Lc 8.4-8)

13 Te jena sache, tiyanavarepa ema Jesús, macaijuhe te tachausi eta cáquiure. Téjacavarepa eta ánaqui eta máimituresirayarehi. ² Tásiha, camuriana-pahivare ena achaneana títecapauchanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachausi tiájipahi. ³ Tásiha, camurihi eta máimicutichaqueneanahi eta máimitusiravacahi. Ánipa macahe:

—Matiarihi ema émana achane. Tévapapanahi te máesane. ⁴ Eta mapaisirapahi, témiricapaipa eta evaraqui te achene. Táimahapa eta cáyure, tanicapa. ⁵ Eta mayeherepi éma eta máevasira, máevajajapaica eta apaquehe. Tásiha, eta apamuri evaraqui témiricapa te váhirichu tamitutihini eta máteji taicha máripahi eta apaquehe. Tímarucavanepaneni táicha. ⁶ Téhesera te tíjurepa eta sache, tacapajicapa; taicha váhirichu táuparevacahíni. ⁷ Tacahe, eta apana evaraqui témiricapaipa te tataracu eta itapepaire. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca. ⁸ Tacahe, eta apamuri evaraqui témiricapaipa te tíurina máteji. Tiúrinapanahi eta tajurusira. Eta étana, ticahipa tétupicavapanapa. Eta apanavare, ticahipa ánimuríchu. Eta apanavare, ticahivare apaesasajiruichu. ⁹ Esamararacanu emutu éti. Te evarahapuca ecaicutiara, tavaraha eta epanerechinavayare.

Ena Jesús máitametacaquenevacapa ena apóstoleana eta juca máimiturapihi

(Mr 4.10-20; Lc 8.9-15)

¹⁰ Tacahe, viti mayeheana apóstoleana vémeñahavapa eta mayehe ema Jesús. Viyaserecapa tájahapuca tacayemahi eta máimicutiarachiravacaichucha eta máimitusiravacahi ena achaneana.

¹¹ Tásiha, ema Jesús tijicapahavipa:

—Ena Tata tituparacanuhi nítametacaheyare éti eta juca táequenereruana mapanereruana. Mavaraha ímatiequenehaya éti. Énasera ena apamuriana achaneana vahi nítametacavacaimahi, náimainavainepa éna. ¹² Éti, te esuapa yátupihini eta nímiturapiana, ema Espíritu Santo tímitucaheya tamutu eta tacayemaqueneanahi. Énasera nácani vahi návarahahini nasuapa, énajivayare tíchavana ticaverejicasianaya eta nasamaqueneanahi. ¹³ Eta tacahehi eta nímitusiravacahi, nímicutiarachinavacaichucha. Te apaesarichu eta navairahi náitua, vahi nacaicutiarahini eta juca nímechaqueneanahi. Nasamahini eta néchajiruvana, váhisera nacaicutiarahini eta nímitusirahi. ¹⁴ Puiti ena nani achaneana nacuti ena achaneana acane, vahi nasuapahini ema víyarahaini profeta Isaías. Ánipa macahe: “Nímatihe éti. Esamayarénipuca, váhisera ecaicutiaraimahi. Ímahayarehi-

nénipuca, váhivaresera ímatiequenehaimahi. ¹⁵ Taicha eta esamureana eti achaneana, tétavicavahi eta tamuracava. Vahi evaraha esama. Épiyacavahivare púchuquihe, emavarairahi esuapahini te esamureana. Tájina pa táichahíni vicuchapahini eta éneuchiravainahíni, evarairapucaini ecasiñavahini me Viya, apaesa macanaracahehíni” macahepa ema víyarahaini Isafas.

¹⁶ Étiserá eti nímitureana, tétavicavahi eta iúricacarevahi, taicha esuapahi eta juca ímahaqueneanahi éta pa eta esamaqueneanahi. ¹⁷ Nutupiruva numetacahe: Acane ichapemuriana ena achaneana tíuriana éna pa ena víyarahaini profetana, tétavicavahi eta navarairahi tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímituresirahi. Váipasera nacapayacahini.

¹⁸ Ácaicutiaráicha eta juca nímicutiarachaquenehi mayehe ema tévacarahi. ¹⁹ Núti níchuhavaca ena achaneana, machaneranyare ema Viya ena téhicanuanayare. Tásiha, natiarihi ena achaneana nasamari-pahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamitisicavaca eta náimitucasivanainihí. Éna nacutihí eta máteji muracapahiquenehi te achene.

²⁰ Natiarihivare ena apamuriana achaneana, nacutihí eta máteji máripahi. Te nasamararaca eta nímiturapiana, natupiruvanehi nasuapa, tíurisamureanainehi. ²¹ Váhisera náratahahini nacaravahuhini yátupinahíni. Vahi nácutihíni eta evaraquí tíuparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahíni te tatiarihípa eta jácani nacatichaira ena achaneana táichavenehi eta náehisiranuhi. ²² Natiarihivare ena apamuriana achaneana nacutihí eta máteji te távihahi eta itapequijiana. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani táichararacavayarehi eta náitaresira. Tavayuacavacavare eta tájiparacana, éta pa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacapirahi eta nímiturapiana. ²³ Natiarihiserá ena apamuriana achaneana nacutihí eta tíurina máteji. Éna, tisamanuanahi. Náunacahi yátupi eta nímiturapiana, náimatiequenehairahi. Tájina vavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —macahepa ema Jesús.

Éma Jesús máimicutiarachina eta sucureca trigo éta pa eta ejare

²⁴ Éma Jesús máimicutiarachavare ena achaneana eta máimitusiravacahi:

—Puiti nuvaraha nímitucahe tatiarihíyare eta sáche-yare te táitecapapa eta nacayeserehiraya me Viya ena achaneana. Tacutihí eta máichavaqueneva mácani achane tévacarahi eta tíurina evaraquí tayehe eta tíuri-

na máteji. ²⁵ Étasera te tímacapa ema ticayehe eta sucureca, macahepaipa ema macatianaru. Máimisiriqichinapa eta táíñemahiqueneana ejare. Tásiha, tiyanapa. ²⁶ Tacahe, te tímarucainipa eta evaraquí trigo, tíuchucavarepa eta ejare, tacachanepeipa eta evaraquí. ²⁷ Náraminehi ena machaneranahi ema achane tévacarahi. Tiyananapa nametapana ema náejaháruhi. Ánipa náicha: “Tata, eta jena pévaraquihi, tájina tacasiriqihini eta táíñemahiqueneana ejare. Puítiserá tíuchucapa tacachanepeipahi eta pévaraquihi” náichapa. ²⁸ Éma náejaháruhi májicapapa: “Matiarihi mácani ticatianacanuhi. Éma tíchahi eta juca, tímisiriqichinanuhi”. Tásiha, ema machanerana náichapa: “¿Pivarahapuca, tata, víyana víti vívepuríha eta jena ejareana?” ²⁹ Éma májicapapa: “Vahi tíuririne, taicha machu táimivepurica eta névaraquí trigo. ³⁰ Tácuticacárichaha eta tajurusirayare. Tíámainucava te tacaechatijipa, nuvanecahénapa éti nuchanerana tatíyayare epepurica eta ejarejiana, ítijicainapa eta tacajuirayare. Tásiha, evehainasarepa eta trigo, ticaunainapa te tacaunairare”.

Éma Jesús máimicuticha eta taquí eta mostaza

(Mr 4.30-32; Lc 13.18-19)

³¹ Éma Jesús máimicutiarachavare eta taquí eta mostaza eta máimituresirahi. Ánipa macahe:

—Puiti nuvaraha nímitucaheya eta apana tayehe eta evaraquí ánichichaquene, étasera te tíjurucapa, tíñejiyarehi. Tacaheyare eta tajurusirayare eta nímiturapiana nayehe nácani tíjacapanayare. Ímatichuhi éti eta taquí eta mostaza, eta ánichichapanahi tayehe eta apamuriana evaraquiana. Tásihasera te tímarucapa, tíunayarehi eta táenaquí, tacutiharehi eta yucuquí eta táichapeva. Tacachuricayarehi eta apamuriana evaraquiana. Járajapainapa eta cáyureana. Táepiyacainapa eta tamacajiana te tatavavajiana. Ene tacaheyare eta tajurusirayare eta nímiturapiana núti Maneréjirunuhi ema Viya.

Éma Jesús máimicuticha eta levadura

(Lc 13.20-21)

³³ Énerichuvare máimicutichina eta juca apana máimituresirahi. Ánipa macahe:

—Tacutiquene, eta juca nímiturapiana tímicutijiricavahi eta levadura. Esu súcani esena tíuríhi eta tasisijisira eta suyehe levadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tíapucayarehi tíuri.

Camuri eta máimicutichaqueneana

(Mr 4.33-34)

³⁴ Éma Jesús tamutu máimicutiarachinapahi eta máimituresirahi. Tájina étahena te tímitureca, vahi macunacahini eta máimicutichinaqueneana. ³⁵ Títauchavahi eta juca máechajirivanahi ema émana profeta. Ani macahehi: “Tamutu eta nímiturapianayare nímicutichinayarepahi. Nímicaecherachainapa eta

táeñaurevaquenehi te tépanavainapa máepiyacainapa ema Viya eta apaquehe” macahepa.

EMA JESÚS MÁIMICAECHECHACHAPA ETA MÁIMICUTICHAQUE-NEANAHÍ TAYEHE ETA TRIGO ÉTAPA ETA EJARE

³⁶ Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa viti mayeaneanahi apóstoleana. Tacahe, te véjacapa vimutu, viyaserecapa máimicaecherachahini eta máimiturapihi máimicutichaquenehi eta ejare tacachanequenehi eta trigo. ³⁷ Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tiúrina evaraqui. ³⁸ Eta apaquehe tacaevaiyahi eta trigo, énahi ena achaneana te juca apaquehe. Eta tiúrina evaraqui, étihi eti nuchaneranihi núti. Tásiha, eta ejare énahi ena machaneranihi ema Váinaraji. ³⁹ Taicha ema ticatianacanuhi, manacahi eta ejare, mavarairahi máepacuchayarehi eta névaruhi núti. Eta tacaechatijirapa eta trigo, étahi eta táitavirayare eta apaquehe. Nárajapayarepa ena ángeleana, ticurujiricanayarehi. ⁴⁰ Tásiha, te jena sáchezare, nuti Manerejirunuhi ema Viya nuvecaínapa ena nuyeheana ángeleana nacavehasi ena tíchanahi eta máeperajiqueneana énapa ena tímiaqui-paicana ena apamuriana achaneana. Tásiha, náquijicavacainapa eta te táijurequenehi yucu. Ticapitiquiahechavanainapa eta tacativayare nasama. Tíyahanainapa. ⁴³ Tásiha, nácani títauchanahi eta mavanairipianahi ema Viya, tétavicavayare eta najaraivayare tacutiyare eta tajaraiva eta sache. Téjacanainapa tayehe eta macatuparahaiyahi ema Vicaiaquene. Te evarahapuca ecaicutiara, tavaraha eta epanerechinavaya.

EMA JESÚS MÁIMICUTICHA ETA ENTIERRO

⁴⁴ Eta nímiturapiana nuti násihaquenehi te anuma tacuti eta tayumurevaquenehi entierro. Te máichimavahi mácani achane eta entierro, tiúrisamureyarehi. Tásiha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane táimijarecayarepa tamutu eta macayehequeneanainihi.

MÁIMICUTICHAVARE ETA PERLA TASIVACHAQUENEHI

⁴⁵ Énerichuvare eta najacampirahi ena achaneana eta nímiturapiana nuti násihaquenehi te anuma tacuti eta macaematanerahi mácani achane comerciantepahi. Matanucapahi eta tasivachaqueneanahi perla. ⁴⁶ Te máichimavapa eta perla matanurepahi, tétavicavahi eta tasivachavahi. Mavarahasera mavachareca eta perla, tayanapane táimijarecayarehi tamutu eta macayehequeneanainihi.

MÁIMICUTICHAVARE ETA ICHAPE NAYUTAHE

⁴⁷ Énerichuvare nuvaraha nímitucahe tayehe eta sáchezare eta táitecapirayarehi eta ecuñaraqui. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutuqueneana jímana.

⁴⁸ Te náimahapa tínica eta nayutahe, navehayarepa nachurupaicapa te tiájipahi tachausi. Nanerejicayarepa eta jímana tiúrinana. Nanacacuhayarepa te ichape maha. Tásiha, náquijicayarepa eta apamuri máurirahanahi. ⁴⁹ Ene tacahezare eta táitavirayare eta apaquehe. Nárajapayare ena ángeleana, nanerejicainapa ena achaneana tíchanahi eta taurique-aneanahi. ⁵⁰ Náijuchainapa te yucu, táetaviuchahi eta táijureva. Ticapitiquiahechavanainapa eta tacativayare nasama. Tíyahanainapa —macahepa ema Jesús.

EMA JESÚS MAYASERECAVACA TE NACAICUTIAHIPUCA ETA MÁIMITURAPIANAHÍ

⁵¹ Tacahe, ema Jesús tiyaserecavavipa. Ánipa macahe:

—¿Ecaicutiarapuca éti tamutu eta juca nímiturapianahi? —máichahavipa.

Tásiha, víti vijicapapa:

—Vicaicutiara, tata —vicahepa.

⁵² Tacahe, máichahavipa:

—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímitucavacaya ena achaneana. Tétavicavaya eta ítamuturusirayare eta ímituresirayare eta mapanereruana ema Viya —máichapa.

TICHAVAPA EMA JESÚS TE MÁVASA NAZARET

(Mr 6.1-6; Lc 4.16-30)

⁵³ Te tamutupa eta máimicutichirahi ema Jesús eta juca máimiturapiana, viyanapa. ⁵⁴ Vichavapa tayehe eta mávasa. Te sávarumuhuquenepa, viyanavarepa tayehe eta náurujsirareva eta nayujarauchirahi ena achaneana. Tímiturecapa ema Jesús. Ichape eta tahapasamurechiravacahi ena achaneana. Váhisera návarahahini nasupahini. Náepururichucha éma. Ánipa nacahe:

—Témunahiricava eta máitupajijiasiravapahi ema maca. ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta jácani máichaqueneanahiji visamairiruanahi. Taicha vímatihí ema maca. Carpintérohi éma. Vímativare ema máiyaini, ésupa esu maena María, énapa ena maparapenaveana ema Jacobo †, ema José, ema Simón, émapa ema Judas. Vímativare ena esenana maparapenaveanahivare, ticavasanahi eta ani. ¿Távihasica máitusiavahi eta juca máitucaqueneanahicacha? —nacahepa.

Émasera máichavacapa:

† Ema maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenumavahi máehica ema Jesús te táequenepa eta máechepusirahi te máecari ema Viáquenu.

—Tatuparaca epicauchahaviya vimutu viti mavaneruna ena ema Viya. Étiserá éti nujaneananahi ecavasanahi eta te juca viávasa, étipa eti nuparapenaveana, vahi epicauchanuimahi —máichavacapa.

⁵⁸ Tásiha, tájina máimerecachichaini eta tiáramicareana táichavenehi eta namasuapajiraivanahi, váhivare nacasiñavahini eta mayehe.

Ena Herodes masamairicapa eta máichaqueneanahi ema Jesús

(Mr 6.14-29; Lc 9.7-9)

14 Tacahe, ema Herodes ema aquenucahi tayehe eta Galilea masamairicavarepa eta máichaqueneanahi ema Jesús. ² Tacahe, ema Herodes máimijachahi ema tichavahi téchepuca ema Juan. Tásiha, máichavacapa ena máevanachanahi:

—Ena mácara, émaripa ema Juan Tícachasiricarahi, ema nímicaparuihi. Tichavaripa téchepuca te máecari. Táitusiava máiturucahi macuchuca eta tiáramicareana —macahepa.

³ Taicha ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacarpa éna eta naviracacairahi. Éta pa tímica-tichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanaripipa náitiaca te cadena. ⁵ Taicha supamicahi ésu eta máimicapasirayarehi. Tipicahisera éma nasemahini ena achaneana. Taicha ema Juan, tétavica-vahi eta náemunasirahi ena achaneana. Náimatihí éma, eta vanairucairahi me Viya.

⁶ Tásihasera, títecapapa eta sache máijaremuhu ema Herodes, sutiarihíhi esu amaperu, suchícha esu Herodías. Tiúchucapa tírimaica te mamirahu ema Herodes, énapa ena machimaranahi. Ema Herodes máuricaínehí ichape. ⁷ Tacahe, máichapa ésu:

—Nujuracha te pimirahu, eta níjarasiraviya jácani piyasearunuyare —máichapa.

⁸ Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare ani píchaya: “Píjaracanu eta ñichuti eñi Juan te curuja” píchayare.

⁹ Tásiha, eta masamirahi eta juca suyasearuhi, ema rey Herodes ichaperinehi eta mapanereresirahi. Tájinapasera máicharacavahini taicha máechajiriruvapahi majurachapahi te namirahu ena machimaranahi eta máijarasirayare eta suyasearuyarehi ésu.

¹⁰ Tacahe, macavanairipipa nayuchati piquenuhapana ema Juan. ¹¹ Tacahe, námapaipa te curuja eta machutini, náijaracapa esu amaperu. Tásiha, ésu sujacapapa, súijaracapa esu suena.

¹² Títicapanecha ena máimitureanahi ema Juan. Navehapa eta máquehe, náecarapanapa. Tásiha, tiyananapa nametapanahi ema Jesús.

Ena Jesús máitaparavacapa máenicavacapa ena camuriqueneana achaneana

(Mr 6.30-44; Lc 9.10-17; Jn 6.1-14)

¹³ Te masamairicapa ema Jesús eta nacapasirahi ema Juan, viyanapa viávacuhapa tayehe eta pacure. Vicaíjuhepa tayehe eta apaquehe mávapahi. Énaserá ena achaneana náecharichucha eta viyanirahi.

Tiyananapa náehicahi tipaicanapahi. ¹⁴ Te tiúcupaicapa ema Jesús tayehe eta pacure, máimahapa ena camuriqueneana achaneana. Majapanuvacarinehi eta máimairavacahi. Macanaracavacapa ena nacajumaqueneanahi námaqueneanapahi. ¹⁵ Tacahe, viti mayeheana apóstoleana vímahapa eta cáperehíchi-charínehí. Vimetacapa éma máevatamuríhahini ena achaneana natiarihiqueneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivanecavaca ena achaneana nayanapa, navachareca eta nanica; taicha ani tájina naviyavaimahi eta te juca —víchapa.

¹⁶ Ema Jesús tijicapahavipa:

—Vahi nuvaraha nuvaneca nayana. Tájina naviyava eta nácaíjuhéhini. Íjaraca étina eta nanica.

¹⁷ Tásiha, viti víchapa:

—Tájina vácayehe eta tinicacare. Jucarihisera cíncochichahi eta pan, apina eta jima.

¹⁸ Ema Jesús máichahavipa:

—Íama ani.

¹⁹ Tacahe, macavanairipipa náejahahapaica ena achaneana te táinahu eta mujíjipahi. Mavehapa eta cíncoquene pan étapa eta apina jima. Máesenicapa eta anuma. Mahasalupayachapa ema Viya. Mayuvetuavacapa eta pan, tásiha, tíjaracahavipa víti. Víti víjaracavacapa ena achaneana. ²⁰ Vinicapa vimutu, visatuhevacapa. Tásiha, vícaemacharichahavare doce saye ichapehiana táinicachaichahava eta vémacharajiana.

²¹ Ena tinicanahi eta juca, cinco mil ena ajairana eta náichapemurívahi, énerichuvare ena esenana énapa ena amaperuana.

Ena Jesús mapaicaeca eta une

(Mr 6.45-52; Jn 6.16-21)

²² Tiuri, ema Jesús tivanecahavipa viti mayeheana apóstoleana viávacuhayare eta te pacure. Vínapucayarehi víánueca te apachara eta cáquiure. Émasera manasiyarehi máevatamuríhanumayarehi ena achaneana nachava te napenana. ²³ Te tamutupa eta macametavairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Éta pa tavinehi eta yati, manasipa macarichuhi eta te cerro. ²⁴ Tacahe, víti te túpierechaviripahi, tichimaracahavipa eta muraca técatícava, víacapaquihapahí. ²⁵ Te tíjararahichichapa, vímahapa ema Jesús mapaicaecapahi eta une eta macapayasirahaviya. ²⁶ Eta vímairahi éma, vipicarinehi. Vímijachapa cunare. Vipiararecapa eta vipisirahi.

²⁷ Émasera ema Jesús téchajichavipa:

—Vahi ecupica. Nútichucha. Étumehava —máichahavipa.

²⁸ Tásiha, ema Pedro majicapapa:

—Te yátupipuca pítiquenehi, piti Tata, pivanecanu nútí apanavare nupaicaeca eta une. Nuvaraha nu-pauchavi —máichapa.

²⁹ Ema Jesús majicapapa:

—Yare, pipauchanu.

Enevanepa tiúcupaicahi te pacure ema Pedro.

Tiyanapa mapaicaecapa eta une, macapayacayarehi ema Jesús. ³⁰ Étasera eta máramesirahi taicha eta muraca técatícava, timutserahavapaipa téricapaipa. Tásiha, tipiararecapa:

—¡Picatajicanu, Tata! ¡Néricainapa!

³¹ Enevanepasera macaratavauchapa ema Jesús eta macuchucuirayarehi. Tásiha, máichapa:

—¿Ticamitisicavipapuca eta pipisirahi eta picasiñanuirahi?

³² Te tiávacu hapa ema Jesús émapa ema Pedro tayehe eta pacure, enevanepa tésamiricavahi eta técatícava. Tícheapa eta táepacuirahi. ³³ Tacahe, viti apamuriana vicunachainehi ema Jesús eta vímairahi. Vépuymurihapa te mamirahu. Tásiha, víchapa:

—¡Jéhevare piti Tata, Machichaquenévihí ema Viya! —víchapa.

Ena Jesús macanaraca ena nacajumaqueneana te avasare Genesaret

(Mr 6.53-56)

³⁴ Tacahe, te apanapa sache, viápechavavarepa viánueca eta cáquiure. Vítecapapa eta te apaquehe ticaijare Genesaret. ³⁵ Tásiha, ena achaneana ticavasanahi tayehe náimativanehi eta émairahi ema Jesús. Timetajiricacanapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajumaqueneana. ³⁶ Nayaseacapa éma eta máisapirainahíni náemamajiaca eta tacheyarapí eta mamuiríha. Tacahe, nácani témamajiacanapahi, enevanepaipa tinaracanapahi.

Ena Jesús mametaca ena achaneana eta timaeperajicarahi

(Mr 7.1-23)

15 Tacahe, títecapanapa ena apamuriana fariséoana tiásihanahi tayehe eta Jerusalén, éna-pa ena escribánoana. Témeñahavanapa eta mayehe ema Jesús. Ánipa naicha:

² —Pímaha, ena pímitureana vahi náitauchahini eta viyeherepiana. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

³ Tásiha, ema Jesús majicapavacapa:

—¿Tájaha tacayema éti apanavare, vahi ítauchahini eta mavanairipiana ema Viya, tasapihapa epicauchahi eta eyeherepiana nanaquiruhi ena iáchucanaveanaini?

⁴ Ema Viya ani macahehi eta macavanairipirahi eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Ecapacayarehi mácani tíñemahi eta nacayemaquene mayehe ema máiya, ésupa esu maena”. ⁵ Étisera vahi epicauchahini eta júcana mavanairipiana ema Viya. Taicha te mararihi mácani achane ticamavahupuca me Viya eta máimahaqueneanahi, eta ímitucasivahi éti: “Vaipa tatuparaca ema achane eta máimicatasiraya ema maiya ésupa esu maena”. Tasapihapa, ichape ticapicahuhi eyehe eta eyeherepiana. Étasera eta mavanairipi ema Viya, vaipa epicauchahini. ⁷ ¡Éti ecaijarehi apimirana! Tatupiruvahi eta máechajiriruvahi ema Viya, téchajisiahehi éti eta te Sagrada Escritura †. ⁸ Ánipa macahe: “Ena nani achaneana, tétserajicanuanahi te najaca; váhisera táetupicavahíni te nasamureana. Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeheripiana táuchurechucha te napanereruana ena náchucanaveánaini” macahepa ema Viya.

¹⁰ Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara.

¹¹ Tájina máeperajina eta viáchanevana te vinicapuca eta vimacasipavahunumahini. Jácani tasiapaquenehi te vijaca, tájina tamaeperajicahivihini. Vahi étaparacaina. Étasera eta evainarajivana táuchureanapuca te ejaca, etapa eta evainarajipanereruana, jéhevare éta timaeperajicahehi —máichapa.

¹² Tacahe, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tisemanahi taicha eta juca píchiravacahi —víchapa.

¹³ Émasera máichahavipa:

—Ena nani nacutihi eta ejare, vaipa émaimahi máechahini ema Tata Nucaiyaquene. Ticavepuricasianayaresera éna. ¹⁴ Ésamiricachucha. Vahi ecuimi-siapava nayehe, taicha éna, púchuquianahi tayehe eta juca nímiturapiana. Ena púchuquiana, te tichurucacapanuca, tiáquiapaicanayarehi táicha vahi náimahahini eta nayanihayarehi —máichapa.

¹⁵ Tásiha, ema Pedro mayaserecapa:

—Picatajicahavi pímitucahavi apaesa vímatiequeneha eta juca pímicutiarachirahi eta táuchureanahi te vijaca —máichapa.

¹⁶ Ema Jesús máichahavivarepa:

—¿Énerichuvare éti mapanererurehehi? ¹⁷ ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinicasareanahi, tatupiru te viami. Tásiha, te tiúchucapa, apanapa eta táuchusihahi. Vahi timaeperajicahavimahi. ¹⁸ Étasera jácani táuchurehi te vijaca tásihaquenehi te amahe eta visamure. Eta taurivahi eta náechajisirana ena achaneana, étara timaeperajicavacahi éna. ¹⁹ Táicha jácani táíñemahi-queneanahi panererucana, eta tásihaqueneanahi te

† *Májurehi ema víyarahaini profeta Isaías eta juca máechajiriruvana ema Viya.*

nasamureana. Ema achane mapanerechahi maveha esu apana esena mayena ema apana achane. Esu esena supanerechahi suveha ema apana achane suima esu apana esena. Ena amaperuana napanerechahi eta natuhusivaya. Nácanivare, tipanerechanahi eta ticaparecana, tiámerecana, tivayuarecana, téchajihiana.

²⁰ Tamutu eta juca panererucana tauriqueneana, te náichahi ena achaneana, éta timaeperajicahi éna.

Étasera jácani nanicaqueneana, tayanapanepuca vahi náichahi eta nayeherepi eta nasipavauchirava, vahi tamaeperajicaimahi —máichahavipa.

Esu ésuna esena apavasana sucasiña ema Jesús

(Mr 7.24-30)

²¹ Tacahe, tiámahavivarepa ema Jesús te apana avasareana táunavahi eta departamento Siria, návasa ena apaechajiriruvana. ²² Ánaqui, ticapayacahavipa esu esena. Supiaracapaipa eta supauchirahi ema Jesús. Ánipa sucahe:

—Pájapanunu, tata. Píti yátupiquenevihi Cristo, ñivaneruvahi eñi Viya, vicuchapaquenevihi. Esu nuchicha ñávahácahi eñi éreana, tétávicavahi eta sucatajivairahi. Picatajicanu, tata, eta picanarasinanuini ésu nuchicha —suíchapa.

²³ Émasera ema Jesús vahi majicapahini. Tipaica-paichucha. Vipauchapa viti mayeheana apóstoleana, vimetacapa éma:

—Tata, pévatata suyana esu suna esena apavasana tipiararecapahi te véquene —vicahepa.

²⁴ Tásiha, ema Jesús máichahavipa:

—Jéhevare eta epanereruhi. Ema Tata tivanecanuhi nacarichu néchapajiricayare ena vijaneanana israelítana. Nacutihi éna eta uvesana máqueneana, taicha ticamunuanahi eta nujaneasiraya —máichahavipa.

²⁵ Ésusera esu esena tépuyucapa te mamirahu. Suíchapa:

—¡Tátachicha, picatajicanupaini, pímicatacanu! ¡Picanarasinanuini esu nuchichasami! —suíchapa.

²⁶ Ema Jesús majicapapa:

—Nativa néchapajiricavacaya ena nujaneanana. Taicha vahi táuricahini ásapihahini néchapajiricahéhiní éti apavasana émetavichahini ena nujaneanana —máichapa.

²⁷ Esu esena sujicapapa:

—Énehinehi tacahehi, tátachicha. Yátupihahi vahi pijaneananuinahini. Pájapanunusera, picatajicanuchuchaini. Víti apanava vácasíñavahi eta piyehe eta vítátijivairaina —suíchapa.

²⁸ Ema Jesús majicapavarepa:

—Páurevi piti nuchicha, ichape eta picasiñavairahi eta nuyehé. Puiti títauchavayare eta piyasearapihi nuyehé. Nucanarasinaviyare esu pichicha —máichapa. Jéhesare enevanepa tinaracahi esu amaperu.

Camurianahi ena nacajumaqueneana macanararuanahi ema Jesús

²⁹ Tacahe, tiyanavarepa ema Jesús. Véhicavarepa víti apanava. Vichavavarepa te Galilea. Tásiha, vijuche-

chausichapaipahi eta cáquiure, vicaijuheya eta te mávapaihahi apaquehe anuquerehi, te távihahi eta céroana. Vinasipanapa eta jena sácheana eta ánaqui.

³⁰ Tacahe, nacahepaipavare ena camuriqueneana achaneana te viávihahi víti. Námaquenepanepahi ena nacajumaqueneana: ena masariana, énapa ena púchuquiána, énapa ena úpana, énapa ena túpupáiqueana. ³¹ Namutu ena nani nacajumaqueneana macanaracavacapaipahi éma. Ichaperinehi eta náramirahi ena achaneana eta náechajisiraipa ena úpana, énapa ena túpupáiqueana tinaracanapaipa, tíuripaipa eta napaisira ena masariana. Tímairiricanapaipa ena púchuquiána. Eta náurisamurevapaihahi, nacunachapaipa ema Viya.

Ema Jesús máenica ena cuatro mílqueneana achaneana

(Mr 8.1-10)

³² Tásiha, ema Jesús tíchuhavipa viti mayeheana apóstoleana. Máichahavipa:

—Nujapanuvaca ena nani achaneana natiarihique-neanahi ani, taicha mapanaripahi sache puiti eta nacahehi eta viyehe. Tájinahivare naviyahini nanica. Nujapanuvacaicha névatacavacahini, machu náquipaicava te achene taicha eta náecuavana. Vájapanu eta náecuava, vénicavaca —máichahavipa.

³³ Tásiha, víti vijicapapa:

—¿Távihapucaini vítusivahini eta tinicacare eta te juca mávapaihahi vámahí? ¡Váhivare vítaparahaimahi vénicavaca ena nani camuriqueneana achaneana! —víchapa.

³⁴ Tacahe, ema Jesús tiyaserechavipa:

—¿Áyanachaha eta pan eta íamaqueneanapahi?

Víti vijicapapa:

—Jucarihi siéterine. Ánimurichicharinehivare eta jímachicha —vicahepa.

³⁵ Tásiha, macavanairipipa eta náejahapaimuriahíni namutu te apaquehe. ³⁶ Mavehapa eta siétequene pan, étapa eta jímana. Mahasalupayachapa ema Viya. Tásiha, mayuvetucavacapa, tíjaracahavipa víti. Tásiha, víti víjaracavacapa ena camuriqueneana achaneana.

³⁷ Tacahe, vimutu vinicahi, visatuhevacapa. Vicaemacharichavare. Siétehi eta sáyeana táinicaruihi eta vémacharajiana. ³⁸ Eta nasimutuvahi ena achaneana, cuatro mílqueneana ena ajairana. Natiarihivare ena esenana énapa ena amaperuana. ³⁹ Te tamutupa eta juca, mavanecavacapa ema Jesús ena achaneana nayanapa nachava te napenana. Tásiha, éma tiávacuhavarepa te pacure. Viyanavarepa. Vicaijuhe eta te avasare Magdalena.

Ema Jesús mápechavare mayunacavaca eta namasuapajiraivahi ena fariséoana

(Mr 8.11-13; Lc 12.54-56)

16 Tacahe, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerechahini eta tíaramicareana, máimerechahini

te yátupihipuca vanairucahi me Viya. ² Émasera majicapapa:

—Te cáperehichicha, te ímahahi eta táitsirahi eta úcaji, éti ímijacha tímiyanavayare eta tíuriyare eta sácheana. ³ Te yáticarahi, te ímaha eta timapicurume, títsitsimehi, ímijachahi tiquivayare. Éti, ímijachavahi ímatiequeneha eta tapaisira eta anuma. ¡Tétavicavahisera eta emasuapajiraivahi! Taicha éti ímijachavahi religiósohe, ímijachavavare ímatiequeneha eta mavarahaqueneanahi ema Viya, váhisera ávarahahini ímatiequeneha eta máimeruhehi ema Viya, te juca sácheana nucachanerahehi. ⁴ ¡Eti achaneana váinarajiqueneana! Núti nímatihe. Vahi esuapanuimahi, te nímercapucaini eta tiáramicare. Tásiha, váhira étina tatuparaca ímahahini eta tiáramicareana. Ímahayareresera eta tiáramicare tacutiyare eta máichavaquenevahi ema víyahaini profetaini Jonás —máichavacapa.

Tásiha, majunijicavacapa, tianapa.

Ena Jesús máimicuticha eta levadura eta náimiturapi- ana ena fariséoana

(Mr 8.14-21)

⁵ Tacahe, eta viánuesiravarepa eta cáquiure, vipane-rechapaipahi eta vémitisisirapa eta pan.

⁶ Ena Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapaivaicha tayehe, vahi ecuehica éna —macahepa.

⁷ Vítisera viti apóstoleana, eta véñamavairahi, víchacacapa:

—Tímicajachavahi eta vémitisisirahi eta pan. Eta tacahe, macahehi tayehe eta levadura —víchapa.

⁸ Éna tímatiacahavihi. Tásiha, máichahavipa:

—¿Tájaha tacayema ecahechajiruvahi eta vahi íamapahini eta pan? ¿Váhipuca ácasíñavahi eta nuyehé? ⁹ ¿Vuíchahacaru ácaicutiaraini? ¿Vuíchahhipuca ímatinu? ¿Váhivare échaini eta nucaejapasirahi eta cíncoquene pan nanicaquenehi ena cinco mílqueneana achaneana étapa eta náemacharajiana? ¹⁰ ¿Váhivarepa écha eta siétequene pan naniruhi ena cuatro mílqueneana achaneana étapa eta náemacharajiana? ¹¹ Nímijachapa ecaicutiarayarehi eta níchirahéhi eta échapiravainahini eta nayehe levadura ena fariséoana énapa ena saducéoana. Váhira étainahini néchajisihahíni eta levadura tayehe eta pan —máichahavipa.

¹² Vipaenumavahi véchahi eta máichirahavihi éma eta véchapiravainahini vahi vicucuti ena fariséoana énapa ena saducéoana eta apimirairanahi.

Ena Pedro máimereucha ema Jesús eta émairahi ema Cristo

(Mr 8.27-30; Lc 9.18-21)

¹³ Tacahe, te apanapa sache, viyanavarepa vipaica. Vicaijuhe eta te Cesarea máepiyaruihí ema rey Felipe. Te viánehipa, ema Jesús tiyaserecavipa:

—¿Tájaha nacayema ena achaneana eta nuyehé nuti Manerejirunuihí ema Viya? ¿Nájahapuca náimijachanuhi éna? —máichahavipa.

¹⁴ Vijicapapa víti:

—Ena apamuriana náimijachavihi ema Juan, tichavahi téchepucahi. Ena apamuriana tímijachavianahi ema víyahaini profeta Elías, téchepucahi éma. Ena apamuriana tímijachavianahivare ema víyahaini profeta Jeremías; émapuca ema apana profetaini antívuini, téchepucahi —vicahepa.

¹⁵ Ena Jesús tíápechahavivare tiyaserecavipa:

—Étiyapa ¿nájaha ímijachanuhi núti?

¹⁶ Ena Pedro majicapapa:

—Pítira yátupiquenevahi Cristo, machichaquenevahi ema yátupiquenehi Viya.

¹⁷ Ena Jesús majicapapa:

—Píti Pedro †, tétavicavahi eta pétupisiravahi taicha manacasamureruvahi ema Tata Nucaiyaquene tíávihahi te anuma. Vahi étainahini eta máimiturapinahíni piyehé mácani achane. ¹⁸ Núti apanavare nutupiruva numetacaví. Píti picaijarehi Pedro. Píti picutiyare eta mari, tétavicavayare eta pitumevaya. Namutu ena picutiqueneana eta pisuapiranuhi nútirahi yátupiquenehi Cristo, éna nuchaneranayare. Éna apanavare nacutiyareva eta mari eta natumevayare eta náehisiranuhi. Tájina vahi máratahaimahi macaetemavaca ema Váinaraji. ¹⁹ Píti picatuparahayare eta llave tayehe eta anuma, apaesa nasiapa nácani pijacapaqueneanayare píti —máichapa.

²⁰ Tacahe, tituparacavipa muraca ema Jesús nacuija vicumetaca eta émairahi ema Cristo.

Ena Jesús máimereucha eta máepenirayarehi

(Mr 8.31-9.1; Lc 9.22-27)

²¹ Tacahe, ema Jesús tépanavapa timetacahavihi eta táicharacavayare eta máepenirayare. Máichahavipa:

—Nutí nucatuparahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, énapa ena aquenucarahana, énapa ena escribánoana. Éna, tímicapacuanayareva. Mapanayareichuhisera sache nucaheyare eta népenirayare. Tásiha, nuchavayarehi néchepuca —máichahavipa.

²² Tásiha, máiputsicapa mámahí ema Pedro ema Jesús. Ánaqui macajachapa, máijarasiravahi eta mapanereruhi:

—Núti vahi návarahahini táitauchavahini nacapacavihini.

²³ Tacahe, ema Jesús máichapa ema Pedro:

—Píti téjecapavahi eta pipanereruhi. Pínajica eta juca tauriqueneanahi. Pivarahapuca pihapapicayare eta mapanereruhi ema Viya. Eta juca pipanereruhi tacuti eta mapanereruanahi ema Satanás, énapa ena machanerana —máichapa.

²⁴ Tásiha, máichahavivarepa víti:

† Ena Jesús téchjicahi te máechajiruvahi hebreo, máimijarechahi ema Pedro: “Simón, machicha ema Jonás”.

—Nácani navaraha náehicanu, tacamunu náinajicava tamutu eta tihapapiricavaca eta náehisiranuhi. Nacaravahuyareva eta nímiturapiana. Nájaracavavare eta táimicapasiraina eta náehisiranuhi. ²⁵ Nácanisera téñamanahi eta náitaresira, tiávamirahuanaya eta náehisiranu, énajivayare ticamitiequenehavanaya eta náitaresira. Énaserá nácani yátupiquenehi tíjaracavana téhicanuana, tayanapane táimicapacainepuca eta náehisiranuhi, éna títujicavanayare tíuchuchuanayare eta náitaresiranaya. ²⁶ Énerichuvare nácani tacañamararuanahi eta nacaimahaquenéiraya te juca apaquehe, tájina náimaequenehaimahi, taicha eta tacañamara-siravacahi tahapapiricavacahi tayehe eta náuchucuirayarehini. Taicha vahi máratahaimahi mácani achane mavachachahini eta máuricacarevaya te apana vítare-sira. ²⁷ Taicha nuti Manerejirunuhi ema Viya nuchavayarehi. Námainapaipa eta majaraiva ema Tata, nuchachanénapaipavare ena ángeleana. Te jena sáche-yare, níjaracavacainapa eta náicuchianahi ena nuchan-erana te tíuríhi eta nacaemataneasiranuhi, te jácani náemataneanapachuhi. ²⁸ Nutupiruva numetacahe: Puitiripa éti, etiaríhi enerejicavayare vahi épenava-némahi, ímahanumaya eta nucatuparahairaya aquenucanuirayare nuti Manerejirunuhi ema Viya —macahepa.

Emá Jesús tihapamaichava eta máimahi

(Mr 9.2-13; Lc 9.28-36)

17 Tiuri, sáisipa sache eta vinasirahi ánaqui. Taca-he, tinaquicahavipa ema Jesús. Nacarinehi má-ma ema Pedro, ema Jacobo émapa ema Juan. Tiyananapa eta te étana cerro anuquehepana. ² Eta ánaqui, náimahapa tihapamaichavahi eta máimahi ema Jesús te namirahu éna. Eta mamira, tétavicava eta tajararasira tacuti eta sache. Eta mamuiríha, tétavicava eta tajanunusirahi, étapa eta tajapuvahi. ³ Tásiha, tiáramicareanavarepa tímerecavana ena apinana ajairana: ema víyarahaini Moisés émapa ema víyarahaini profetaini Elías. Téchajiricavanaripahi mayehe ema Jesús. ⁴ Tásiha, ema Pedro tímisiapavapa téchajicapa. Ánipa macahe:

—Tata Náquenu, tétavicavapa eta víuricacareva eta víávihairahi eta áni. Tiúrihipucaini vépiyarechahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —macahepa.

⁵ Tacahe, téchajicahaha ema Pedro, tiáramicarepa eta úcaji táepacumurihahi éna. Tétavicavahisera eta tajanunusirahi eta úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunar-quenehi. Tétavicavahi eta núsamurevahi máicha. Éma esuapayti, mapenainarichuhivarare —macahepa.

⁶ Eta nasamirahi ena vichamuriana, tipicanarinehi. Tépuycanapa titsiucapairicanapa. ⁷ Tásiha, ema Jesús témeñahavapa eta nayehe. Máemamasicavacapa. Máichavacapa:

—Échepuca, nuchichanaveana. Vahi ecupica —máichapa.

⁸ Tacahe, te téchepucanapa éna, nájinaripahi éna apinana náimahaqueneanahi. Macarinehi ema Jesús.

⁹ Te tichavanapa tayehe eta cerro, ema Jesús mametacavacapa vahi nacumetajiricahini eta juca náimahaquenehi. Tiámainucava te máechepucapaini te máecari éma. ¹⁰ Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare títareca ema víyarahaini Elías, tínapucayarehi eta máimeresiravayare piyehe piti Cristo. ¿Énapuca téjecapavanahi ena escribánoana? —náichapa.

¹¹ Ema Jesús majicapavacapa:

—Yátupi ema víyarahaini Elías títecapayarehi, máetupiripanayarehi tamutu. ¹² Nútisera nutupiruva numetacahe: Títecaripahi ema Elías, váhisera náimati-hini ena escribánoana. Váhivare najacpahini éma ena tuparairucana. Nacatianacahi nacapacahi éma. Ene nuchaeyare nuti Manerejirunuhi ema Viya, ticitianacuanayarehiva, éneyaréichuvare ticapacuanayare —máichapa.

¹³ Tásiha, ena vichamuriana náechapa eta máechajisihairahi ema Jesús ema Juan Tíchasiricarahihi.

Emá Jesús macanaraca ema amaperu mávaháruhi ema éreana

(Mr 9.14-29; Lc 9.37-43)

¹⁴ Tacahe, te tichavanapa éna tayehe eta víávihairahi víti énapa ena achaneana, témeñahavapa ema émana achane mayehe ema Jesús. Tépuycapa te mamirahu. Máichapa:

¹⁵ —Picatajicanu, tata, pímicatacanu. Picanarasi-nanuini ema maca nuchicha. Tétavicavahi eta macata-jivairahi. Tacaeharipairica te tanahaca eta majuma. Tatiarihi te táquipaica te une, téhepuca yucu.

¹⁶ Námaripahinéni nayehe ena pímitureana, váhisera náratahahini nacanaracahini éna —máichapa.

¹⁷ Ema Jesús máichahavipa:

—¡Tétavicava emasuapajiravacapa eti achaneana! ¡Cúverarecachicáini eta nucamichirahenahini! Jámani ema amaperu —máichapa.

¹⁸ Tacahe, ema Jesús, muraca eta máevatasirahi ema éreana, máinajiacapa ema amaperu. Enevanepa tinaracavanahi éma.

¹⁹ Tásiha, te táequenepa, víti víputsiacavapa ema Jesús, viyaserecapa:

—¿Tájahapuca tacayemahi eta vahi váratahahini vicuchuca ema éreana mayehe ema amaperu? —víchapa.

²⁰ Ema Jesús tijicapahavipa:

—Eta tíchahi éti vúchaha yátupinahini ácasíñavahini me Viya. Nutupiruva numetacahe: Te yátupiquene-nahini ácasíñavahini mayehe éma, eratahayarehini. Váhinéni tácomesahini ichapenahini eta ecasiñavairahi. Tayanapanepuca ánichichainaichu eta ecasiñairavahi, tacutihucaini eta táquichicha eta mostaza, tamuturihini erataha. Étaripa eta jácani cerro ávara-

hahini ecayejeca, eratahayarehi. Te íchapuca: “Piyejecava eta te juca. Piyana ánaquipana”. Tásiha, tiyjecavahini éta. Jéhesare, tájina tacucajerarajihini eyehe.

²¹ Étasera eta juca, muracapanahi ema éreana ema tiávahácahi ema maca amaperu. Eta vicuchusira, tavaraha víchanumayare eta ayuna étapa eta viyujaraca —máichahavipa.

Tiápechavavare ema Jesús máimereucha eta máepeni-rayarehi

(Mr 9.30-32; Lc 9.43-45)

²² Tacahe, eta vipaisirapahi tayehe eta avasareana eta te táunavahi eta Galilea, tiápechahavivarepa timetacahavi ema Jesús eta máepeni-rayarehi. Ánipa macahe:

—Nuti Manerejirunuhi ema Viya, járajapainapa eta sáchezare tíjararecanuyare mácani achane nayehe ena ticitianacuananahi. Ticaratacanuanayare éna.

²³ Ticapacuananayareva. Néche-pucayaresera te mapanaquenena sache —máichahavipa.

Tacahe, eta visamirahi, ichaperinehi eta véñamiravahi víti.

Ticavacha eta impuesto tayehe eta Templo

²⁴ Tacahe, te vítecapapa tayehe eta viávasa Capernaúm, natiarihihi ena ticobrarecarahiana eta impuesto tayehe eta Templo. Nárajapapa náechajipanahi ema Pedro. Nayaserecapa:

—¿Mavachachapuca ema eyehe máestro éti eta impuesto tayehe eta Templo? —náichapa.

²⁵ Ema Pedro majicapapa:

—Mavachacha —macahepa.

Te visiapayarepa te peti, ema Jesús máechajicnumapa ema Pedro. Ánipa macahe:

—¿Tájaha picayema, piti Pedro, nájahasica tatuparacahi navachachayare eta impuesto mavarahaquene ema mácani rey? ¿Énapuca ena machichaqueneana, énapuca ena machanerana? —máichapa.

²⁶ Ema Pedro majicapapa:

—Ena machanerana.

Tásiha, ema Jesús macahepa:

—Tiuri, viti machichahavihi ema Viya. Vahi tatuparacahini vivachachahini víti eta juca impuesto. ²⁷ Vinaquicasera eta impuesto apaesa tacuija tacucayemacare nayehe ena achaneana. Piyamayare pénica eta jima te cáquiure. Te piáquiijecapa eta pénirave, eta tínapuca jima tacaratacaya eta pénirave, tatiarihiyare eta plata te tajaca. Pivehainapa eta reale, tásiha taratahayare tavachacha eta nuyehe parte núti, étapa eta piyehe píti —máichapa.

¿Nájahapuca ema apóstole ticapicahupana?

(Mr 9.33-37; Lc 9.46-48)

18 Tacahe, te jena sácheanahi, viyaserecapa ema Jesús:

—¿Nájahapuca ema ticapicahupanaya viyehe víti te táitecapapa eta sache aquenucaviraya? —vicanacuicasera eta impuesto apaehepa.

² Tacahe, máichuhapa ema Jesús ema émana amaperuchicha, macatupihapa te vimirahu. ³ Máichahavipa:

—Nutupiruva numetacahe: Ínajicayare eta ecasiñavavaisira. Echávayare ecutiyare ema maca amaperu, apaesa ítujicava esipa ecachanenu tayehe eta néjasihayare. ⁴ Nácani navarahahi ticapicahupananayare te jena néjasihayare núti, tacamunu mánsuanayare. Vahi máitucaimahi tiácapauchava. ⁵ Tacutiquene nácani tijacapanayare ena amaperuana níchavenénahi núti, ena nani yátupihahi náimereca eta náemunasiranuhi núti, taicha tímicutijiricavahi núninahini najacapa.

Ichape eta máicuñayare mácani tímiaquipaica te pecatu ena amaperuana

(Mr 9.42-48; Lc 17.1-2)

⁶ Tacutiquene mácani tiáquipaicaya ema émana amaperu téhicanuhi, tíuripannahipucaini máepenhini mativainahini éma. Váhirichupucaini macucaicuñahini, taicha vahi macuaquipaicahe ema amaperu tayehe eta pecatu. ⁷ Taicha muracayare eta náicuñayare nácani tímiaquipaicanayare ena achaneana. Yátupi vahi téjiacavaimahi eta tímiaquipaicaya ena achaneana tayehe eta pecatu. Ichapesera eta náicuñayare nácani ticitapiravanahi eta náimiaquipaisirahi ena achaneana tayehe eta pecatu.

⁸ Eta tacahe, te táimipecurachahepuca eta evahu, étapuca eta ívapeana, tíuripana eyuchatica, iáquiijica; apaesa vahi tacuimiaquipaicahe tayehe eta pecatu. Tíuripana táejiacava eta iáquehe eta esiapirayare te anuma, váhisera tacumutuhi tasiapa te yucu eta iáquehe. ⁹ Étaripavare eta iúquiha, te tímiaquipaicahepuca tayehe eta pecatu, tavarairahi táimahayare eta tamauriqueneana tájiparacana, tíuripana evечuhauquichava iáquiijicaya. Taicha tíuripana eta ejacapacarehi éti eta esiapiraya te anuma tayanapane táejiacavapuca eta iúquiha. Páurehesamisera éti, te náepujuquichahepuca te yucu infierno, tamutuyare eta iáquehe.

Ema Jesús máimicutiarachinahi te témitiaca étana uvesa

(Lc 15.3-7)

¹⁰ Vahi ecuepuru ena amaperuana. Numetacahavane: Nararihi ena ángeleana tijaneacavacahi éna. Títupajijiacavanahi eta nacatiuchiravacahi ena amaperuana, máicha ema Viya. ¹¹ Nuti Manerejirunuhi ema Viya, eta tímitecanuhi nucuchucuhayare nácani tiávacuhanahi táíñehiquene eta náitaresira.

¹² Esamanuchaha. Nímicutichinaheyare puiti. Matiarahi ema émana achane. Ticayehe eta cien uvesana. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, manaquicayarepa eta apamuriana noventa y nueve te majanearesihahi. ¹³ Te máichimavapa, tichavapa. Té-

tavicava eta máurisamurevapaipahi eta mámira-paipahi eta táejaruvahi.

¹⁴ Ene macahe ema Tata Ecaiyaquene éti, ema tiávi-hahi te anuma. Vahi mávarahahini náemitiacahini ena nani amaperuana.

Tatuparaca viperdonacha ena téjecapavana eta viyehe (Lc 17.3)

¹⁵ Te tatiarihipuca eta máejecapiravahi ema piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta máejecapiravahi. Te tisuapavihi éma, tájinapa íchiravaimahi. Tiúrinapa eta ítaresirana.

¹⁶ Téhesera te vahi macusuapavi, pitanucayare apinanaina ena piyeheanayare testigo apaesa tasuapacarepa eta piconsejarapiyare. ¹⁷ Te vuíchaha macusuapavi, pimetcapava namutu ena pichamurianahi picatupihapa te namirahu. Téhesera te váhiquenechapuca macusuapahe, tímaticaréinapa éma eta mamasuapajiraivahi me Viya. Vaipa ecuimisiapava mayehe, taicha eta mamasuapajiraivahi. ¹⁸ Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasirichuhi. Émaripa ema Viya, máimarracahi eta evarairahi etupirica éma. Téhesera te máneuchavapuca, emetacayare éma eta táepahairaripa eta mapecatura. Ema Viya, tiúriripa eta máimaira.

¹⁹ Énerichuvare te etiarihipuca éti te juca apaquehe apinahehi, mapanahehipuca ecurujicacahi te níjare núti, nutiarihiyarechuhivare núti te emuri. Tásiha, te étanaichuhi eta epanererihi, ticuticacahi eta eyaseserepi te mayehe ema Tata, éma tíjaracaheyare —máichahavipa.

²¹ Tásiha, ema Pedro mapauchapa, mayaserecayarehi ema Jesús. Ánipa macahe:

—Tata, ¿áyahepuca tatuparaca nuperdonachaya ema nuparape, te máejecapava eta nuyehe? ¿Táuricapuca siéteheyare eta nuperdonachirayare? —macahepa.

²² Ema Jesús majicapapa:

—Vahi tácarichuimahi siétehéinarichuyare eta piperdonachirayare. Tímiyanavayarechucha eta piperdonachiranayare. Vahi pitupachaimahi —máichapa.

Ema Jesús máimicutiarachina ema achane máuriraha vahi máitucaimahi maperdonacha ema maparape

²³ Nuti Manerejirunuhi ema Viya nucuti mácani rey rícoquenehi te mavarahahi máechayare eta nanteveana ena mamusurana. ²⁴ Tásiha, námapaipahi ema tétavacavahi eta manteve. Tisintevapanahi éma. ²⁵ Tásiha, ema achane musu, tájina maviyahini mavachachihahini ema máquenuhi. Tacahe, ema rey macavanairipipa macaijararecasi, namutu esu mayena énapa ena machichanaveana, étapa eta macayehequeneanaini te mapena, apaesa mavachachahini apaesachichainarinahini eta mantevehi. ²⁶ Tásiha, ema achane musu tépuyucapa te mamirahu ema máquenu. Ánipa máicha: “Tátachicha, picatajicanuhini. Picuchapanuini.

Te nítucavapaini, nuvachachapaini tamutu eta nunteve piyehe” macahepa. ²⁷ Jéhesare, ema máquenu mapijapanupa. Maperdonachapa tamutu eta mantevenihi. Macaiticapa. ²⁸ Vuíchahasera táyerehinehi eta máuchusirahi, mácapajicapa ema apana achane ticantevehi eta mayehe. Macompañeroinihivare. Váhinéni camurinahini eta mantevehi. Macaratachahisera, macobrachapa. Masemaracapa macapitinucapa. “Pivachachanu puítirichu” máichapa. ²⁹ Ema achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te nítucavapa, nuvachachavipa”. ³⁰ Váhiquenesera maperdonachahini. Máimicasiapapa te cárcel, mavarairahi mavachachavaneyarehinehi eta mantevehi. ³¹ Tacahe, te náimahapa ena apamuriana machamurianahi, ticatirinehi te nasamure eta náimairahi ema nachamuri présuiraipahi. Tiyananapa nametacahi ema náquenu tamutu eta máichavaquenevahi ema nachamuri. ³² Tacahe, ema máquenuhi máimichuhapa ema tipresurecainihi. Ichape eta masemanevahi. Ánipa maicha: “¡Piti máeperajitataji musu! Váiparinehi péchavahinehi eta nuperdonachiravihi eta pinteve ichapequenehi. Taicha eta piyaseasiranuhi, nuperdonachavihi. Piúriháinehi pájapanuhinehi píti apanavare ema pichamusuvahi, tácutihinehi eta nuperdonachiravihi núti” máichapa ema rey. Tásiha, macavanairipipa náicuñaca, étapa mavachachayarehi tamutu eta mantevehi.

³⁵ Tacahe, ema Jesús te títapiricapa eta juca máimiturapiana, ánipa macahe:

—Ene máichaheyare ema Tata Nucaiyaquene éti apanavare, te vahi ecuituca eperdonacha nácani eparapenaveana náejecaparuvanahi eta eyehe —máichahavipa.

Ema Jesús tímiturecahi máechajisihahi mácani achane tínajicahi esu mayena

(Mr 10.1-12; Lc 16.18)

19 Te tamutupa eta juca máimiturapianahi ema Jesús, viúchucapa te Galilea. Vivanapa tayehe eta Judea. Viánuecapa eta cajacure Jordán te tinapaicahi te táuchusine eta sache. ² Camuriana ena achaneana tíurujicavanahi. Ánaqui macanaracapai-pavare ema Jesús ena nacajumaqueneana.

³ Tásiha, títecapanapa ena apamuriana fariséoana. Napauchapa ema Jesús. Natanucahi eta tivichayarehi éma. Ánipa naicha:

—Vívaraha pimetcachavi ¿te táuricapuca máinajica ema achane esu mayena taicha jácani tájiparacana? —náichapa.

⁴ Ema Jesús majicapavacapa:

—Németeaca vahi ácaicutiarahi eta échajicuirahi eta Sagrada Escritura. Te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayare. ⁵ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títáticacanayare. Eta

navehacacairahi, tímicutijiricavaipa étanarinehi eta náqueheana” macahepa ema Viya. ⁶ Tacahe, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini náinajicacahini. Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

⁷ Tásiha, ánvire nacahe:

—¿Tájahasica tacayema eta mavanairipihi ema víyahaini Moisés ticaepiyarehi eta ajureca suyehe esu esena eta máinajisiryarehi ema suima? —náichapa.

⁸ Ema Jesús majicapavarepa:

—Ena íachucanaveanaini, te jácani eta nasemirahi, náinajicapa ena nayenana. Ema víyahaini Moisés máisapahi tínajicacana táichavenehi eta tájinairahi eta náimitucacarevaihini, táetaviuchirahi eta namuracacacarevaihini. Váhisera máuricahini ema Viya eta náinajicacahini. ⁹ Puiti nuvaraha numetacahe: Te máinajicapuca esu mayena mácani achane, te tájinapuca suíchiravainahini; tásiha, mavehapa esu apana esena, ticapecaturaipahi me Viya. Tacutiquene, mácani mavehahipuca súcani esena máinajiruhi ema suima, ticapecaturaipavare éma, taicha ésu, matiarichahahi ema suímaquenehi —máichavacapa.

¹⁰ Tacahe, te víputsicavavarepa, viti mayeheana apóstole viyaserecapa ema Jesús:

—Te énehipuca tacahehi eta juca, eta vivira viti ajairana esu esena, tíuripanaichuhipuca vahi vicutanuca esu esena —víchapa.

¹¹ Ema Jesús máichahavivarepa:

—Vahi ámutu árataha ímatiequeneha eta juca. Nararhisera tinerejicavanayarehi náimatiequenehayare máicha ema Viya. ¹² Nararihi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararhivare ena ticavechianahi, navetijipa éna vaipa náesenicaimahi esu esena. Nararhivare ena apamuriana tinerejicavanahi vahi natanucahini esu nayenainahini, navarairahi tacuija jácani tahapapicahini eta nacaemataneasiraya ema Viya. Ticunachacarepanayare ena tiratahanayare eta juca náijarasirava yátupiquene nacaemataneacaya ema Viya —máichahavipa.

Ema Jesús mayujaraucha ena amuyana

(Mr 10.13-16; Lc 18.15-17)

¹³ Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tíamanapahi ena amuyana.

¹⁴ Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi eucachepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna —máichahavipa.

¹⁵ Tásiha, máemamahacavacapa ena amuyana, mayujarauchavacapa. Te tamutupa, viyanavarepa te apana avasare.

Ema achane rico téchajiricava mayehe ema Jesús

(Mr 10.17-31; Lc 18.18-30)

¹⁶ Matiarahi ema achane amaperu rico. Mapauchapa ema Jesús. Mayaserecapa:

—Tata maestro, piti piúriquene. ¿Tájahapucaini eta nícharacavahíni eta nítujisiravaina me Viya máichecuaraquirénahini eta nítaresira? —máichapa.

¹⁷ Ema Jesús majicapapa:

—¿Tájaha tacayema pímiarechanu “Piti piúriquene”? Mararihi ema Viya. Jéhevare éma, tétavicavahi eta máurivahi. Téhesera te pivarahapuca pécha te apana vítaresira, pisuapayare eta vanairipiana —máichapa.

¹⁸ Mayaserecavarepa ema achane:

—¿Tájahasica eta vanairipianahi eta nusuapaqueneya?

Majicapavare ema Jesús:

—Eta juca eta mavanairipiana ema Viya: Vahi picuapareca. Vahi picuveha esu esena apayena. Vahi picuamereca. Nacuija pépiyéqueneruina. ¹⁹ Pipicau-chayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

²⁰ Tacahe, ema achane majicapapa:

—Tamutu eta juca nusuapahi nítauchahi. ¿Tájahase-rapuca eta jácani néjequeruichahahi? —macahepa.

²¹ Ema Jesús majicapavare:

—Te pivaraha pítaucha tamutu, piyana píjararecaya tamutu eta pímahaqueneana. Tásiha, píjaracavacapa ena páureana. Jéhevare éta, pijacapayare eta pímahaquenezare te anuma táitsivayare. Te tamutupa eta juca, pítecavanepa péhicanu —máichapa.

²² Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyana tipanererecapaipa.

²³ Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujihini eta náijarasiravainahini eta náehisiranuinhini ena rícoana eta nasiapirainahini te anuma. ²⁴ Esamanuchaha. Eta juca tímicutijiricavahi eta vípera camello, máitujihini tánucuhahini te támicuejehe eta parirapa. Ene nacahahi ena rícoana —macahepa.

²⁵ Eta visamirahi viti, víáraminehi. Víchacacapa:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

²⁶ Ema Jesús tímararacahavipa. Tásiha, máichahavipa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya. Tamutu marataha —máichapa.

²⁷ Ema Pedro máichavarepa:

—Vítisera, Tata, vinaquicahi tamutu eta vicayeheque-
neanahi, vivarairahi véhicavi. ¿Tájahasica eta vímaha-
quenéya? —máichapa.

²⁸ Ema Jesús majicapavarepa:

—Nutupiruva numetacahe: Járájapayare eta sácheva-
yare, tacaitsivairayare tamutu arairuya. Tásiha, nuti
Manerejirunuhi ema Tata néjacainapa te tajarahi-
quenehi trono. Tásiha, eti éhicanuanahi éjacaina-
varepa tayehe eta dócequene trono. Ecavanairipinapa
nayehe ena dócemuriqueneana vijaneanana israelí-
tana. ²⁹ Tásiha, emutu eti enaquicanahi eta epenana,
ejunijicahivare ena ticachichaheana †, ena eparape-
naveana, ena echichanaveana, eta eyehe apaquehe,
táichavenehi eta éhisiranuhi puiti, tiápajucavainapa
camuripanayare ena ejaneananayare étapa eta ímaha-
queneanaya. Énerichuvare táurivayare eta ítaresira
máichecuaraquirenapa. ³⁰ Maverahesera eti etiaríhi-
queneanahi puiti, váhirichuhi ecapicahuhini. Te jena
sácheyare, ichapepanainapa eta ecapicahuiraya. Ena
puiti ticapichuanahi, te táitachavapa te jena sáche-
yare, énapavainapa téquenehanayare.

**Ema Jesús máimicutichahi ema achane rico tiuri eta
mavachachira ena ticaemataneychana**

20 Te jena sácheyare te níjaracahénapa eta ícuchi-
yare eti nuchanerana, tacuti eta mavachachirahi
ema émana achane ticayehe eta ichape quinta úvaqui-
ji nayehe ena ticaematanearahiana. Ema maca may-
atiruhi tipaica matanuca ena achaneana ticaemata-
neanayarehi mayehe. Tírerecanayarehi eta uva. ² Te tí-
tucavapa ena ajairana, mametacavacapa eta mavacha-
chirayarehi étana reale te sache. Tiúrihi eta mavacha-
chiravacahi. Mavanecavacapa tiyanana tayehe eta
náireresihayarehi. ³ Tásiha, macamunuichahava ena
apamuriana achane. Te las nuévapa sache, tiyana-
varepa te plaza. Máimahainevare ena apamuriana
ajairana máemataneanahi. ⁴ Máechajiacavarepa eta
náireresirayarehi. Mametacavacavarepa eta táuriva-
yarehi eta mavachachirayarehi. Tiyanavarepa éna,
tírerecanahi. ⁵ Te las dócepa sache, tiyanavarepa
matanuca ena apamuriana. Títucavavare, máevatamu-
rihavare tírerecanayare. Te las trespa sache, tiápecha-
vavare tiyana títucavavare ena apamuriana, éneri-
chuvare tírerecanayarehi. ⁶ Te las cócropa sache,
tiyanavare tiúchucahi tayehe eta plaza. Títucavavare
ena apamuriana ajairana máemataneanahi. Tásiha,
máichavacapa: “¿Tájaha tacayema tájina ématane-
nahini puiti jena sache?” ⁷ Éna najicapapa: “Nájina
náechajiacahavihini”. Tásiha, ema máichavacapa:
“Eyana éti apanava írereca ánaqui te nuyehe quinta
úvaquiji”. Mametacavarepa eta táurivayarehi eta
mavachachiraya. ⁸ Tacahe, te yátipa, mametacapa ema
mayehe empleado máichuhavacapa namutu,
mavachachavacayarepa. Mavarahahi náinapuca

† Te jácani apanana versiónéana, tatiarihi te juca lista eta
táechajiriruva “ena nayenana”. Tájinasera nalistanahini te libro anti-
vupanahi. Eta tacahehi, vímatiequeneha vahi manacahini ema Ma-
teo. Mácani apana achane mavejuchahipuca te Lucas 18.29.

nacavacha ena náequenereruanahi ticaemataneana.
Nasapihapa téquenehanahi ticavachana ena náinapu-
reanahi. ⁹ Tásiha, ena nasiapaqueneanahi te las cócropa
sache, mavachachavacapa ema achane eta étape-
vacahi eta reale, tacutirichuhi eta navachahi ena
ticaemataneanahi tamutu sache. Énapa ena nasiapa-
queneanahi te las trespa sache, énerichuvare eta
étapevaca reale eta navachahi. ¹⁰ Tacahe, te ticava-
chanapa ena náinapureanahi tisiapana, náimahapa
éna tacutirichuhi eta navachanahi ena náequenereru-
queneanahi. ¹¹ Tásiha, tise-manapa mayehe ema
náquenuhi. ¹² Ánipa nacahe: “Ena nani náequeneru-
ruanahi titecapana, vicutivachavacaichuhi eta
navachahi, étanainehinéni hora eta nacaematanerahi.
Tacutirichuhisera eta vivachahi viti vínapureanahi.
Váhiquene táuricaímahi eta juca, taicha ichapemurihi
eta vicamichirahi víti eta táijureva muracaquene eta
sache. Táurica vicachuricavacayarehini éna eta
navachahi” nacahepa. ¹³ Émasera ema náquenu
majicapavacapa: “Váhira nucaetmahémahi éti. Énari-
pa ena náequenereruanahi, váhivare nucaetemava-
caímahi. Tínunahi eta nuvachachirahehi étapevacahi
eta reale níjaracahe. Vahi ecusema. ¹⁴ Ésamirica-
vachucha. Evehachucha eta juca evachahi. ¹⁵ Núti
néchinava taicha nuyeherichuhi eta plata. Nuvaraha
ácuticacahini eta evachana emutu. ¿Éti ecapinarunu-
pauca eta núrivahi nayehe ena nani?” máichavacapa.

¹⁶ Ema Jesús macahevarepa:

—Ene nacaheyare te jena sácheyare, nácani
náequenereruanahi téhicanuana, éna nasapihayare tí-
napucana. Tásiha, nácani náinapureanahi, nasapi-
hayare téquenehanayare †† —macahepa.

**Ema Jesús tiápechavavare máechajisiha eta máepeni-
rayare**

(Mr 10.32-34; Lc 18.31-34)

¹⁷ Tacahe, eta vipaisirapahi te achene te vicaijuhepa
eta Jerusalén, típutsiacahavipa ema Jesús viti dóceque-
neana apóstoleana. Máichahavipa:

¹⁸ —Ímaha puiti, viyanainapaipa vicaijuheyare eta
Jerusalén. Ánaqui nucaijararecasiyare nuti Manerejiru-
nuhi ema Viya. Ticaratacanuanainapa ena tuparairu-
cana. ¹⁹ Tímicapacuananayare taicha tíjararecanua-
nainapa nayehe ena suntaruana romanoana. Éna, náji-
na najapanuquenéna. Ticaecahinuanainapa. Téstaca-
nuanayareva. Tétatacanuanayareva te crusu. Tási-
hasera, te mapanaquenenapa sache, néchepucainapa
te nécarí —máichahavipa.

†† Te jácani apanana versiónéana, tatiarihi eta juca táechajiriru-
vana “porque muchos son llamados, pero pocos son escogidos”.
Tájinasera eta juca táechajiririvanahi te libro antivupanahi. Eta taca-
he, vímatiequeneha vahi manacahini ema Mateo. Mácani apana
achane mavejuchahahi eta juca te Mateo 22.14.

Esu naena ema Jacobo émapa ema Juan suyaseaca
ema Jesús eta macajupahavahini ena
suchichanaveana
(Mr 10.35-45)

²⁰ Tásiha, témeñahavapa esu naena ena vichamuriana ema Jacobo émapa ema Juan, suámavacapaipahi éna. Tépuycapa ésu te mamirahu ema Jesús, suyaseacayarehi énainahini majupahanainahini ena suchichanaveanahi. ²¹ Éma mayaserecapa:

—¿Tájahasica ecamunu, nuchicha?

Ésu suíchapa:

—Nuvaraha pácchanéni ena nuchichanaveana tayehe eta péjasihayare picavacureraya. Náejacahini te pichacaya, eñi éñina te pivaure, eñi apana te sapa —suíchapa.

²² Ema Jesús majicapavacapa éna:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenévayare ecatajivairayare, ecutinuyarepuca eta nucamichirayare nútí? —máichapa.

Éna najicapapa:

—Virataha vicamicha —nacahepa.

²³ Tásiha, máichapa:

—Yátupi ichape eta ecatajivairaya, vicuticacaya eta nacapasirahaviyare. Étapasera eta éjasirayare eta te nuchacaya, vaipa nútina necha nucaejacahini. Ema Tata Nucaiyaquene, émahí tinerejicayarehi ena nujupahanayare —máichapa.

²⁴ Tacahe, eta visamirahi viti diésqueneana mayeheana apóstole, visemapá nayehe ena apinana.

²⁵ Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacavanairipira. Énaripa ena tuparairucana, tétavicavahi tisuapacareanahi eta nacavacurerahi. ²⁶ Váhisera ecucahehi éti nayehe ena echamuriana. Mácani tímerecavahi ticapicahupana, tacamunuhi máitativacayare ena apamuriana. ²⁷ Te etiarivarepuca eti evarahahi ínapuca, tacamunuhi ímerecavaya navanarahayarehi ena echamuriana.

²⁸ Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútiyarehi nítatihe. Énerichuvare níjaracavayarehi nímicapacava íchavenequeneanainahi éti camuriqueneanaya nucuchucureanaya —máichahavipa.

Ema Jesús macaimairiricavaca ena apinana
púchuquiana

(Mr 10.46-52; Lc 18.35-43)

²⁹ Tacahe, te vijunijicavarepa eta avasare Jericó, camurianahivare ena achaneana ticavasanahi tayehe, téhichavianahi. ³⁰ Natiaríhi ena apinana ajairana púchuquiana. Téjacanahi te achenechacaya. Te nasamapa ema Jesús eta mánucuirapahi, tipiararecanapa. Ánipa nacahe:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

³¹ Natiaríhisera ena achaneana vahi náuricahini eta napiarasirahi ena púchuquiana. Navarahapa nacamatina. Énasera napiaracaichucha:

—¡Tátachicha! ¡Pítiqueneripa yátupiquenévi Cristo! ¡Picatajicahavipaini pájapanuhavi! —nacahepa.

³² Tacahe, ema Jesús eta masamiravacahi, titupihapa. Máichuhavacapa ena púchuquiana. Mayaserecapa tájahhipuca navarahahi.

³³ Éna najicapapa:

—Tátachicha, vivaraha pípuhauquichahavini apaesa vímairiricapaini —nacahepa.

³⁴ Tacahe, ema Jesús majapanuvacainehi. Máemama-hauquichavacapa. Enevanerinehi tímairiricana. Tásiha, téhichavianapa.

Títecapapa ema Jesús eta te Jerusalén

(Mr 11.1-11; Lc 19.28-40; Jn 12.12-19)

21 Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoquiji. Ánaqui ema Jesús mavanecapa ena apinana vichamuriana. ² Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitihahi eta esena burrico, étapa eta tachicha te tachacaya. Evejapuacayare íáminanuyare eta áni. ³ Te natiaríhinapuca náeñama, emetacayare eta nucamunuirahi nútí. Vahi táyeréimahi vímichavavaneyare —máichavacapa.

⁴ Eta juca tamutuhi títauchavapahi eta májuchaquenehi ema mácani víyarahaini profeta. ⁵ Ani tacahehi: “Emétaca ena achaneana ticavasanahi te Jerusalén, apaesa natsecava eta najacapirayare ema nayeheyare Rey. Emétacayare vahi nacupica, taicha tétavicavapahi eta mamansuvapahi, étapa eta máurivahi. Mámapahi eta iúritaresirayare. Tímaticareyarepahi ema, taicha ticaperayare eta burricuchicha” tacahehi eta Sagrada Escritura.

⁶ Tacahe, ena vanairucanahi náitauchahi eta navanahi mayehe ema Jesús. ⁷ Námapaipahi eta burricochicha étapa eta tachicha. Nanacamaequechapa eta náepacuhana. Tásiha, ticaperapa ema Jesús. ⁸ Camuriana ena achaneana tíacapanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanahayarehi éma. ⁹ Ena apamuriana tínapumirauchanapahi énapa ena téquenehanapahi tipiaracanapaipa:

—Yare, Tata. Píti yátupiquenevivihi Cristo réyvihi viyehé viti israelítana. Ichape eta vicunachiravivihi píti. ¡Vanairucaquenevivihi me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹⁰ Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricanapaipa:

—¿Nájaha ema maca achane?

¹¹ Ena apamuriana najicapapa:

—Émara ema profeta ticaijare Jesús, ticavasa te Nazaret te tinapaica te Galilea —nacahepa.

Emá Jesús macuchuchujicavaca ena tǵararecanahi eta sárareana, cáyureana te tajuhe eta Templo

(Mr 11.15-19; Lc 19.45-48; Jn 2.13-22)

¹² Tacahe, te apanapa sache, tiyanapa tisiapa emá Jesús tayehe eta te Templo. Máimaharinehi ena achaneana tǵararecanahi eta sárareana, cáyureana. Ena apamuriana ena tivacharecanahi. Natiarihivare ena tǵsiriperecarahiana eta naplataneana ena apavasanana. Máichavacapa:

—Emá Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étiserá eti tiámerahiana, ecasiapavapa eta te juca. Emaeperajicapa eta tacapichuirahi. ¡Eyana iúchucataaji! —máichavacapa.

Tásiha, macuchuchujicavacapa namutu. Máequehepuichinavacapa eta namesarana étapa eta nasiyana.

¹⁴ Eta mávihairahi te Templo emá Jesús, napauchapa ena púchuquiána énapa ena masariana. Tásiha, éma macanaracavacapaipahi. ¹⁵ Tacahe, ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevivi Cristo manerejiruvivi emá Viya” nacahepa. Énaserá ena tuparairucana énapa ena escribánoana vaipa náuricahini eta náimairahi tamutu eta juca. Tisemanapa. ¹⁶ Náurujiacapa. Navarahapa nacaichepaica eta máichaqueneanahi. Tásiha, náichapa éma:

—¿Tájaha tacayema písapa tipiararecana ena nani amaperuana? ¿Váhiyapa picamatinacavacapai? —náichapa.

Emá Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táechajisihairahi eta juca najirasahi ena nani amaperuana? Ani tacahehi: “Piti, Tata, pinacasamurechavacahi ena amaperuana eta máejerarayarehi naicha eta najirairayare eta táurinaquene alabanza” —máichavacapa.

¹⁷ Te títapiricapa eta majicapiravacahi, majunjicavacapa. Tiyanapa eta te avasarechicha Betania, étapa máimasinehi. Véhicapaichuhisera víti.

Emá Jesús májiquiha eta higo taicha máhiriquirehi

(Mr 11.12-14, 20-26)

¹⁸ Te apanapa sache, te yáticarahichicha, tiyanavarepa emá Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma. ¹⁹ Máimahapa eta yucuqui ticaicare higo te achenechacaya. Tiyanapa mapauchahi. Tájinasera táhinahini. Tapacajianachucha. Tásiha, máichapa emá Jesús eta higo:

—¡Pépiyainapa píti eta máhiriquerevviare! —máichapa.

Eta macaherahi, enevanepa tijiuyjipa eta tapacajiana. ²⁰ Eta vímairahi víti, viáraminehi ichape. Viyaserecapa emá Jesús:

—¿Tájaha táicharacavahi eta táijahúchiravahi tiájiqui eta higo? —vicahepa.

²¹ Emá Jesús tǵicpahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaitucaimahi. Eratahayare ícha, ecutinuya eta níchaquenehi. Eratahayareva ecayejea eta cerro te apachacaya. ²² Tamutu jácáni eyaseserepiyare eta mayehe emá Viya te eyujarasirana, ecaijaracasiyare te yátupina eta ecasiñavairahi me Viya —máichahavipa.

Nayaserecapa emá Jesús nájahhipuca tituparacahi éma

(Mr 11.27-33; Lc 20.1-8)

²³ Tacahe, visiapavarepa tayehe eta te Templo. Emá Jesús, tímiturecavarepa nayehe ena achaneana. Tacahe, napauchapa ena tuparairucanahi. Natiarihivare ena tinerejicavanahi ena aquenucarahana. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímitucavivi? ¿Nájaha tituparacavivi eta juca píchaqueneana? —náichapa.

²⁴ Emá Jesús majicapavacapa:

—Núti apanavare nuvaraha nuyaserecahe. Ejicapanyaresera apaesa numetacahe eta nucatuparahairahi eta níchirahi eta júcana. ²⁵ ¿Nájahapuca tivanecahi emá Juan eta máitesirahi máicachasirisirahi? ¿Émapuca emá Viya tivanecahi, émajivapuca eta máitesirahi? —máichavacapa.

²⁶ Váhisera náituruequenehahini eta najicapirayarehi. Tiácapaemajiricacanapa. Ánipa nacahe:

—¿Tájahasica vicayemayare eta vijicapirayare emá maca? Te vémunahacava vícha: “Mavaneruhi emá Viya”, éma macahénapapuca: “Tásiha, ¿váhiyapa esuapahini éma?” Téhesera vácahepuca: “Émajivaichucha eta máitesirahi”, ticauyayaceripa titupisichaviana eta te márijahiana ena achaneana, taicha namutuhi náimijachahi emá Juan profetaquenehi yátupiquene, mavaneruhi emá Viya —téhajiricacanapa.

²⁷ Tásiha, náichapa emá Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca emá tituparacanuhi. ²⁸ Nuvarahasera nímicutiarchinaheyare. Nararihi ena apinana ticapapecacana. Ticavanahipa emá émana mayehe emá naiya. Ánipa máicha: “Nuchicha, piyana picaematane puiti jena sache. Pírerecaya eta uva” máichapa. ²⁹ Emá machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi.

³⁰ Tásiha, emá naiya mavanecavarepa emá émana machicha, mayanahini macaematanehini éma apanavare. Tásiha, emá amaperu majicapapa: “Tiuri, nuyanyare” macahepa. Váhinéni mayanahini. ³¹ Puiti nuyaserecaheyare: ¿Nájaha emá tisuapajirahihimayehe emá maiya? —máichavacapa emá Jesús.

Éna najicapapa:

—Emá títapuca, éma tisuapajirahihini.

Tásiha, emá Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapana te anuma ena túhusianainihi énapa ena tisipecaturarahianainihi. Éti vahi esi-apaimahi. ³² Taicha vahi esuapahini eta máimiturapiana eta Juan Tícachasiricarrahini, váhivare ávarahahini étupiricavahini eta ítaresirana. Nararihisera ena tisipecaturarahiana, ichape eta nasuapirahi. Étisera, tétavicava eta emasuapajiraiva, tayanapane ímahahi masuapacarevahi éma —máichavacapa.

Éma Jesús máimicutichina ena pártirárioana máurirahana

(Mr 12.1-12; Lc 20.9-19)

³³ Éma Jesús máichavarepa:

—Esamanu eta juca apana nímiturapiya. Nímicutichinaheyare. Matiarihi eta achane. Ticaevaruhi camuri eta uva te máesane. Manaruchapa eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Tásiha, tiyanapa ena achane te apana avasare.

³⁴ Tacahe, te títecapapa eta caje tayairahi eta uva, máimivanerecapa ena mamusurana nayaseapanavacayarehi ena pártirárioanahi eta tatucachaquene-yarehi éma. ³⁵ Énasera ena pártirárioanahi tise-mauchavanarichucha. Nacaratacavacapa, náehapa ena vanairucana. Nacapacapa ena émana. Éma apana nayucaracapa te márijahiana. ³⁶ Tásiha, ena achane máimivanerecavarepa ena apamuriana. Camuripananapa. Váhiquesera náijaracahini, náehavacavarepa. Nacapacavacapa ena apamuriana.

³⁷ Tacahe, émajacaruvapa máevataca ena machicha. Máimijachaipahi émapapucaini napicauchahini. ³⁸ Te náimahapa ena machicha ena ticayehe eta úvaquiji, ánipa nacahe: “Émainapapuca ticayeheyare ena maca. Yare, vicapaca apaesa tánasipa viyehe tamutu. Tájina máicharachavimahi ena achanénavaji”. ³⁹ Tacahe, nacaratapaca ena machicha, nacuchucapa eta tayehe eta isaniti, nacapacapa.

⁴⁰ Puiti, nuyaserecaheyare: ¿Tájahapuca máicharacavayare ena ticayehe eta úvaquiji ena pártirárioanahi máurirahana? —macahepa ena Jesús.

⁴¹ Éna najicapapa:

—Éma tise-mainapa. Vaipa májapanuvacaimahi. Macapapanavacayarepa ena pártirárioanainihi. Máijaracainapa ena apamuriana pártirárioanayareva, nácani tipicaurahianahi, náijaracahini eta mayehe parte —náichapa.

⁴² Tásiha, ena Jesús máichavacapa:

—Jehe tíurihi eta ejicapiranuhi. Nuvarahasera epane-rechinavapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyareca-rahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ena Viya macaitecapahi eta te táicuchihi eta tatuparahahi. Tacapicahuquenehi puiti. Táitusiava,

tétavicavahi eta vicunachirahi víti ena Viya” tacahehi eta Sagrada Escritura. Nuvaraha ecaicutiaraya.

⁴³ Puiti numetacahe: Táichavenehi eta emasuapajiraivahi, vaipa étiparacaimahi tayehe eta mavanairipi ena Viya. Ena tisuapajirahianahi, éna ticavacureanayare te jena sáche-yare. Énainapa téchanayare eta vanairipiana. ⁴⁴ Puiti, núti nucutihi eta ichape mari náepuruquenehi. Eti épurunuanahi, íáquipaicavayare évetutujicayare. Tichimaracahenapa eta muraca ecuñaraqui taicha eta emavarahairahi éhicanu —máichavacapa.

⁴⁵ Étasera eta nasamirahi ena tuparairucana énapa ena fariséoana, tise-manarinehi taicha tímatiacavanapa eta énaираhi tayunacavaca eta máimicutichiravacahi ena Jesús. ⁴⁶ Navarahapa nacaratacayarehíni. Tipicavanachuchasera nayehe ena achaneana taicha namutu nacunachahi ena Jesús eta émaираhi vanairuca me Viya.

Éma Jesús tímicutichava mácani rey te máichuhavacapa ena machimaranaya, máichayarehi eta ichape piesta

22 Éma Jesús máimitucavare ena achaneana eta apana máimicutichaquene. Ánipa macahe:

² —Éma Viya, macutihi mácani rey te máimiyenachayare ena machicha, máichayarehi eta ichape piesta. ³ Mavanecapa ena mavanarana náichuhapanavaca ena machimaranaya. Váhisera návarahahini nayanahini éna. ⁴ Tásiha, ena rey máevatacavare ena apamuriana mavanarana. Ánipa máichavaca: “Eyanavare étipava ímitatajiricavaca ena níchuhaqueneanahi, náitecavanepa. Nucaparecaripahi eta vaca nirureyare nésinaruanahi. Tiúrinapa tamutu eta juca tinicacare. Énanecha nucuchapahi náitecavanepa” macahepa.

⁵ Énasera ena máichuhaqueneanahi vahi nasuapahini. Nájina nayanahini. Éma émana tiyanapa te máesane. Éma apana máimahapana eta mayehe tienda. ⁶ Éna apamuriana nacaratapaca ena vanairucanainihi, náehavacapa, nacapacavacapa. ⁷ Tacahe, te máechapa ena rey, tise-mapa. Mavanecapa ena masuntaruana nacapapanavaca ena ticapahianahi. Náijuchavare eta tamutu eta napenanaini. ⁸ Tásiha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera nuvaraha náiteca ena náinapureanahi níchuhaqueneanainihi. ⁹ Eyana te tamutu cálléana. Íchuhavacayare namutu nácani ecaínunaqueneanayare” máichavacapa. ¹⁰ Tacahe, ena mavanaranahi tiyananapa, náchehupanevacapa. Nacurujicavacapa namutu nácani nacainunaqueneanapahi: nácani achaneana tíuriana énapa ena súnsusurujiana. Camurianahi. Tínicanarinehi eta te távihayarehi eta piesta.

¹¹ Tacahe, ena rey tisiapapa, máimahayarehi ena machimaranahi. Máimahapa ena émana achane ena matiarihiquenehi vahi manacahini eta namuirihasa te ticaichuasiana. ¹² Tacahe, máichapa: “Ajaira, ¿tájaha tacayema vahi pinacahini eta múiriare níjararuheanahi tayeheyarehi puiti juca piéstayarehi?” Émasera ena

achane vahi majicapahini. ¹³ Tacahe, ema rey mavane-cavacapa ena mavanarana: “Eveha ema maca. Ítiji-vaucha, ítiápechavare. Íyarcuhapana te timapicu tayehe eta máiyauchiavayare macapitiquiahechia-vayare” macahepa ema rey.

¹⁴ Ema Jesús máichavarepa:

—Numetacahe puiti: Camurianahi ena níchuhaque-
neanapaipahi. Ánimurianarichusera ena títaurahia-
nayare —macahepa ema Jesús.

Navaraha náemejecapavacha ema Jesús tayehe eta impuesto

(Mr 12.13-17; Lc 20.20-26)

¹⁵ Tacahe, eta nasamirahi ena fariséoana, tisemana-rinehi. Tiyananapa ticurujicacanapa, navarahaipa náemejecapavachayarehi apaesa étainahipucaini tavi-uchahini ema Jesús. ¹⁶ Tacahe, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihí eta tatupiruvairahi táurivahi eta juca pímiturapianahi. Yátupihí eta pímitusiravacahí eta táurinaquene achene ticaijuhe me Viya. Váhivare pipicacaracavahini eta péchajisihairahi eta náichava-
quenévanihi nácani achaneana, tayanapanehi aque-
nucahi. ¹⁷ Vivarahahisera viyaserecaviyare eta pipane-
reruhi: ¿Táurichhipuca vivachacha eta viyasehana im-
puesto mayehe ema Presidente Emperador romano?
Taicha víti, machanerahavihi ema Viya, ¿masí?
—náichapa.

¹⁸ Émasera ema Jesús máimatiacavacapa eta tamaurivapahi eta napanereruana. Tacahe, máichava-
capa:

—¡Apimirahetataji! ¿Tájaha tacayema evaraha ímiaquipaicanu? ¹⁹ Nímahaseji, íáminanu étapena eta reale —máichavacapa.

²⁰ Eta náijarasirapa, éma máichavacapa:

—¿Nájaha ticaijare eta juca? ¿Nájahavare ticava-
simahi eta juca mirare eta te juca reale? —máichavaca-
pa.

²¹ Éna najicapapa:

—Mayehe ema Presidente Emperador —náichapa.

Tacahe, éma máichavacapa:

—Tiuri, táuricahí íjaraca ema Presidente Emperador
eta juca mayehericuhi éma. Tásiha, íjaracavare ema
Viya eta mayehericuhivare éma —máichavacapa.

²² Te nasamapa ema Jesús eta majicapiravacahí,
ichaperinehi titsirihacavanahi. Náramipa eta máitupa-
jjiasiravahi. Tiyananapa tichavanahi.

Nayasereca ema Jesús náicharacavayarepuca ena náepenaqueneana eta náechepusirayare

(Mr 12.18-27; Lc 20.27-40)

²³ Étarichu te jena sache, nacahepaipahi ena sa-
ducéoana. Ena nani saducéoana, apanahivare eta
náimiturapiana. Éna, vahi nasuapa eta náechepusi-
rayare ena náepenaqueneana. Tiyananapa náimaha-
panahi ema Jesús. Natanucahi eta táetseraruvayarehi
náicha. Ánipa nacahe:

²⁴ —Tata maestro, ema víyarahaini Moisés, man-
aquicahí eta máechajiruvahi eta viyehe: “Te
máepenaquenehahipuca ema achane esu mayena,
tásiha nájinahipuca manaquiequeneruvainahini
machichainahini; te matiarhihipuca mácani mapara-
pehi, mavehayare esu machinenaqueneéni, apaesa
émainapuca macachicha eta suyehe, máitsvainahí
ema maparapéni”. ²⁵ Tacutiquene te juca vitaracu,
natiarhihihi ena siétequeneana ticaparapejiricacana.
Tacahe, ema náechavimuri títauchavapa. Máepenae-
quenehapasera esu mayena. Nájinahí machichai-
nahini. ²⁶ Tacahe, ema maparape máitauchavare esu
machinenahini. Énerichuvasera máepenaquene-
havare, nájinavare máchichainahini. Ema émana ma-
parape máitauchavare ésu. Énerichuvare máepena-
quenehavare. Namutupa ena siétequeneana navehahí
ésu, tásihasera náepenaquenehapaipa, nájina
émanainahini macachichahini eta suyehe. ²⁷ Te táe-
quenepa, tépenapa esu esenahini. ²⁸ Tacahe puiti, te
apanapapuca eta náitaresirayare ena nani, ¿nájahapu-
ca ena siétequeneana ema yátupiquenehi suímaque-
nehi esu esena, taicha ena siétequeneana namutuhí
suímanarihi? —náichapa.

²⁹ Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutia-
rahini eta táimiturapí eta Sagrada Escritura? ¡Váhivare
evarahahini esuapahini eta tamutuirahi marataha ema
Viya! ³⁰ Ánaqui te apana náitaresiraya, vaipa nácamu-
nuimahí esu esena. Énaripa ena esenana, váipavare
nácamunuimahí ema ajaira. Nacutinapa ena ánge-
leana tiávihanahí te anuma eta namaepenacacairahí.
³¹ Éti váhivarepuca ácaicutiara eta yátupirahí eta vahi
táepenhahini eta náchanevana ena náepenaqueneana.
Váhhipuca ácaicutiara eta máechajiriruva ema Viya. Ani
macahehi éma: ³² “Nútira yátupiquenenuhi Viya,
macasiñaquenehi ema Abraham, ema Isaac émapa
ema Jacobo” macahepa ema Viya. Nutupiruvahi nu-
metacahe: Ema Viya, éma téchahí eta náitaresirana
ena téhicanahí, tayanapane tépenanaripa. Eta
náchanevana, tímiyanavarichucha títareca te mami-
rahu. Éti, ichape eta éjecapiravahi —máichavacapa
ema Jesús.

³³ Tacahe, eta nasamirahi ema Jesús, ichaperinehi eta
náramirahi ena achaneana eta máimiturapihí.

Eta tisuapacarepanahi te mavanairipiana ema Viya

(Mr 12.28-34)

³⁴ Tacahe, ena fariséoana eta náimairahi macamati-
nasiravacahí ema Jesús ena saducéoana, ticurujica-
canapa éna. ³⁵ Tásiha, tiyananapa náemejecapavacha-
yarehi ema Jesús. Ema émana ticainapucavapa, máe-
strohi éma tayehe eta nayeherepiana. Mayaserecapa
éma:

³⁶ —Tata maestro, nuvaraha pimetacanuini ¿tájaha-
puca eta vanairipi tisuapacarepanahi tayehe eta
mavanairipiana ema Viya? —macahepa.

³⁷ Ema Jesús majicapapa:

—Eta máechajiriruva ema Viya te Sagrada Escritura, ani tacahehi: “Yátupina eta émunasiranuina nuti Iáquenu. Iúnaca te esamureana. Yátupina eta ecachanevairanuina núti. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, títapuca tayehe eta apamuri vanairipiana. ³⁹ Eta apana táehiruhi eta juca, ánvare tacahe: “Pémunacayare ema piparaepiyahi, tácuti eta pémunasiravahi píti”. ⁴⁰ Eta juca apinaquene vanairipi, éta máehicahi ema víyarahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

Yátupi ema Cristo mámariequenénihini ema rey David, Víyahivare éma

(Mr 12.35-37; Lc 20.41-44)

⁴¹ Tacahe, eta náurujiásiraichaha ena fariséoana te machacaya ema Jesús, ⁴² máichavacapa:

—Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimerecavapa? —máichavacapa.

Éna najicapapa:

—Vímatinapa éma taicha tíuchucayare mámariequeneare ema víyaraháini rey David —nacahepa.

⁴³ Majicapavarepa:

—Yátupihini ema Cristo achanequenehi eta máimahi taicha mámariequenearehi ema víyaraháini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: ⁴⁴ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pímirahu ena ticitianacavianahi” macahepa. ⁴⁵ Ema David, eta máimijarechirahi ema Cristo “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

⁴⁶ Eta nasamirahi eta juca, nájina nájaracavahini najicapahini. Eta tacahe, nájinapa napatsicavahini nápechahini nayaserecachini.

Ema Jesús máimereuchavaca eta náejecapiravana ena fariséoana énapa ena escribánoana

(Mr 12.38-40; Lc 11.37-54; 20.45, 46)

23 Tacahe, ema Jesús máichavacapa ena achaneana vítipa viti máimitureana. Ánipa máichahavi:

² —Ena escribánoana énapa ena fariséoana tímijachavana catuparahana eta navepaisirayarehi eta mavanairipiana ema Moisés. ³ Tacahe, éna esuapayare. Ítauchayare eta navanairipiana. Váhisera ecuehica eta nayeherepiana taicha ena apapipijichucha eta napanereruana. ⁴ Tacutiquene tipamicheana ítauchaya eta camuriqueneana nayeherepiana. Éti, tájina eta eJapanucarehíni nayehe. Nájinapa tiratahaimahi títaucha. Apanasica éna, vahi náratahahini

náitauchahini tamutu. ⁵ Tímijachavanahi tamutu náitaucha, navarairahi ticunachacareanayarehi nayehe ena achaneana. Tisiñavavaicanahi eta nápajusiravahi religiósana. Nanacahi te nanahuana eta ajureca navejurehi eta te Sagrada Escritura. Tacutiquene eta nacamuirihaira tísapepeacavanahi píncanillanahi. Ticamatsivacahi eta nacamuirihaira. ⁶ Ena nani, te ticaichuhasiana eta nanisiraya, éna tinerejisinavanahi eta tíurinapanána eta náejasihaya. Navarahahivare ichape eta napicauchiraya ena achaneana te náuruji-rarevanahi. ⁷ Tétavicavahi eta navarairahi ticapicahuana. Navarahahivare ticacajamicasianayarehi te jácani nácapajisiha ena náimitureana téhepahi calle.

⁸ Étiserá vahi ecujamuracha eta nacajamisirahe-nahini ena achaneana, étainapapucaini nacunachira-henahini. Taicha éti eparapejiricacahi, ecuticacahi te mamirahu ema Viya. Nucarichu núti yátupiquenénihini eyehenuhi Maestro, nuti Cristo. ⁹ Váhivare “Tata Nucaiyaquene” ecuquicha nácani achaneana te juca apaquehe. Taicha mararíhi ema yátupiquene Ecaiyaquehe, ema tíávihihi te anuma. ¹⁰ Váhivare tísapacarémahini eta náimijarechahe, “Tata nuyehe jefe”, taicha nucarichuhi núti yátupiquenénihini jéfenuhi eyehe. ¹¹ Nuvarahasera ítátijiricacayare. Nácani tíátirahiana, éna ticunachacarepananayarehi eta eyehe. ¹² Énerichuvare nácani mánsuanahi, éna ticunachacarepananayare me Viya. Nácanisera ticasíñavavaicanahi ticunachavanapuca, tímitsiriávanayare me Viya —macahepa.

Ema Jesús mayunacavaca eta náejecapiravanahi ena escribánoana énapa ena fariséoana

¹³ Tacahe, títecapanapa ena escribánoana énapa ena fariséoana. Tásiha, ema Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Muracayare eta ícuñayare taicha eta apimirairahehi! ¿Tájaha tacayema ímijachavahi éti echa eta tapaja eta anuma? Vahi ísapa nasiapahini ena achaneana, nácani tivarahana tisiapana. ¡Étiripa vahi ítujúicavaimahi esiapal!

¹⁴ Jucarihi eta apana tiviucahehi. Tatuparacahi eJapanuyare ena tépenaimana te váhipuca narataha navachachahini eta nantéve. Étiserá everejicavacahi tamutu eta nacayehequeneana. ¡Apimirahini! Épiyacavahi religióshehi, íchahi íúpiemahi eta eyujarasira te namirahu ena achaneana, evarairahi vahi tacuimi-caeherachava eta emaurivanahi. Ichapeyare eta ícuñayare táicha.

¹⁵ ¡Jucarihivare eta apana tiviucahehi, éti escribánoana étipa eti fariséoana! ¡Muracayare eta ícuñayare taicha eta apimirairahehi! Éti, tétavicavahi eta éñamavairahi eta ítura ena téhicana eta ímiturapiana, eyanirahi te avasareana tiyerehiana. Tasapihahi ímitucavacahi eta nacutiheraya eta evainarajivahi. Tíápajucava eta namaurivahi ícha. Eta tacahe, ecachanevacayare éna te yucu infierno.

¹⁶ Jéhevare éti ecaijare páurehe. Ichape eta ícuñayare taicha eta ímiaquipaisiravacahi ena ecutiqueneana

púchuquiana. Éjecapavahi tayehe eta juca ímiturapihi. Ímituca eta tájinahi eta taviuchaimahi nácani najurachahi eta Templo. Étasera te najuracha tayehe eta oro eta tiávihihi eta te Templo, ticaviurevanainapa ícha éti. ¹⁷ ¡Tétavicavahi eta emaecharaireva eti púchuquiana! Eta Templo, étara tipicauchacarepanahi tayehe eta oro tiávihihi tayehe. ¹⁸ Iápechavavare eta éjecapiravahi tayehe eta apana ímiturapi. Éti íchavare: “Te náichapuca nácani eta promesa, najurachapuca tayehe eta náijuchirare eta sárareana, tájinaipavare ticaviurémahi. Téhesera najurachahi tayehe eta nanaquiruvahi te táinahu eta náijuchirarehi, étasera ticaviurevanaripa” íchahi éti. ¹⁹ ¡Tétavicavahi eta emaecharaireva eti púchuquiana! Eta náijuchirarehi eta sárareana, étara tipicauchacarepanahi tayehe eta enaquiruvahi. Éta tímipicauchahi eta enaquiruvahi. ²⁰ Taicha nácani tijurachanahi tayehe eta náijuchirarehi, vahi tácarichuhini napicauchayare éta, napicauchayarehiva tamutu eta námavahuana tiávihihanahi te náijuchirarehi. ²¹ Tacutiquene nácani tijurachanahi tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihihi tayehe. ²² Énaripa ena tijurachanahi tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

²³ ¡Jucarihivare eta apana tiviuchahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiana tayehe eta titucareana. Ímijachavahi yátupiquenehi eta religiósóhéirahi eta epamisiravahi eta ítauchira eta vanairipi eta ecamavahuiru me Viya eta diésmuri tayehe eta sucurecana. Ecnachacarehi taicha éta. Váhisera epamicavahini eta táuriqueneana ticunachacarepanahi me Viya. Tatuparacahe emutu ájapanurahi; ecatiuchavacayarehi ena macatiuchavarahanahi; yátupina eta ítauchiraya tamutu eta íjarasiravahi; yátupina eta ecasiñavairaina me Viya. Tatuparacahehivare ecamavahu eta me Viya eta diésmuri. Éti éñamavahi eta ítauchirahi eta ánichichana, étasera eta tisuapacarepanaqueneanahi táuriqueneana, tasapihahi vahi esuapahini †.

²⁵ ¡Tétavicavahi eta apimirairahehi! Éti ímijachavahi yátupiquenehi religiósóhehi, ecañamaracavahi eta ímiyaniravaya ítaucha eta eyeherepiana. Étasera eta esamureana, tétavicavahi eta tachipejivavacahi taicha eta ecaetemaraivana étapa eta íjarasiravahi icha tamutu eta ejamuraraivana. ²⁶ ¡Tétavicavahi eta epuchuqui-va eti fariséoana! Tamapurujihí eta religiósóhéirahi. Tacamunuhi tativa esipaca eta esamureana, apaesa yátupinasarepa eta iúrivayare, tipachinainapa eta ítaresiraya.

²⁷ ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eta covacha. Tiúrinahi te táinahu, téhesera te amahe távihihi eta máeperejiqueneana. ²⁸ Tacahehi

† Ani tacahe eta mayeherepi ema Jesús te máechajiriruva: “Eti ecatiñica eta chupi; ejiricasera eta camello”.

eta ítaresirahi éti. Ticutimahinehi iúrihi te namirahu ena achaneana. Étasera te esamureana táurujisiavahi eta evainarajivana, tacutiquene eta apimirairahehi.

²⁹ ¡Páurehesamichapucaini eti escribánoana étipa eti fariséoana! ¡Ichapemuriquene eta eviurevanahi! Eti, ímijachavaipahi puiti ecunachacarehi eta evarairahi échapajirica eyeheheacahi eta náecariana ena profetanaini matapiravarequeneanahi, nacaparuanahi ena iáchucanaveanaini éti. Épiyacavahi yátupiquenénahini eta iúrivahi. ³⁰ Tásiha, ánvare ecahe: “Te vitiarihinari-pahini víti eta acane te ticaparecanapa ena viáchuca- naveanaini, vahi vicuimicasiapavahini tayehe éta” ecahepa. ³¹ Étijivapa ímereuchavahi eta apimirairahehi, taicha puiti éti epanerechahi ecapacanuya, tacutihi eta napanerervanahi ena iáchucanaveanaini. Tásiha, ecuticacayare eta naviurevahi ena iáchucanaveanaini.

³³ ¡Éti tachichanaveanatajahi eta quichare, tétavicavahi eta evainarajivahi! ¡Váhiquene ticaicahémahi eta ícuñaya te infierno! ³⁴ Nímicaecherachayare eta evainarajivahi. Nuvanecayare napauchahe ena nuchanerana. Éna, timetacaheanayare eta mapanereruana ema Tata. Tímitucaheanayareva tamutu eta nímiturapiana. Nasapihayare vahi esuapaimahi éna. Éna, yátupihí náituca. Émepururecayaresera éti eta náitupajijiasiravahi éna. Esapihainapa, éti ecapacavacainapa éna; ena apamuriana émetatacayare te crusu. Tásiha, ena apamuriana éstacavacainapa te iúrujisirarevana. Éhicarairicavacainapa te jácani avasareana najunaiyayarepahi.

³⁵ Tásiha, eta ecapasiravacainapa ena nuvanervanahi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhi, máetaviuchainihí eta máuriva. Émapa ema máequeneruhi Zacarías (machichainihí ema Berequías), ema nacaparuhi te tamirahu eta Templo. Camurianahisera ena apamuriana náumurivanainihí. ³⁶ Nutupiruva numetacahe puiti: Étinapa tamuriacayare tamutu eta náepeniranahi. Títecapainapa eta ícuñayare eti achaneana ítarervanahi puiti —macahepa ema Jesús.

Ema Jesús ticatisamurevahi táichavenehi eta namasuapajiravahi ena achaneana ticavasanahi te Jerusalén
(Lc 13.34-35)

³⁷ Tacahe, ema Jesús tiápechavava máechajicavacapa ena achaneana. Ánipa macahe, taicha eta macatisamureravahi:

—¡Tétavicavahi nucatisamureravahi ícha étisami eti tachichanaveanahi te juca viávasa Jerusalén! Ena iáchucanaveanaini, éna ticapapajicanahi ena profetana mavanervanahi ema Tata. Puiti étipavapa evaraha ecutiya ena iáchucanaveanaini. Ichapemurihinéhi eta níchuirahéhi éti, iúrujiacanuhini, tácutihini eta varayu te tacurujimurihi eta tachichanaveana eta te tapava. Váhisera ávarahahíni. ³⁸ Ímahainapasera puiti eta íchararacavayare. Ticaquipaicasiyare tamutu eta epenana, étiripa ticuchucaheanainapa. ³⁹ Numetacahévane puiti vaipa iápechavaimahi ímahanu, tiámainu-

cavainapa te ítshivachapa eta epanereruana, evarai-rayare ejacapanu. Ecahénapa: “Ichape eta vicunachiravihi píti vanairucaquenévihi me Viya” ecahénapa.

Ena Jesús máimereucharipa eta táquipaisiravaya eta Templo

(Mr 13.1-2; Lc 21.5-6)

24 Tacahe, ema Jesús tiúchucapa tayehe eta Templo, tiyanayarepaini. Vítisera viti máimitureana vémeñahavapa eta mayehe. Eta viáramirahi, vímechapa eta táurinaqueneana mari tayehe eta anuquehe peti te Témposami. ² Émasera ema Jesús tijicapa-havipa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járjapayare eta sáchezare ticaquipaicasiyare tamutu eta juca Templo. Téjanerepaicainapa tamutu eta juca táurinaqueneanahi ímahaqueneanahi puíti —máichahavipa.

Tatiarihiyare eta ecutiarareanaya te tánehipaicha eta táichecuiraya

(Mr 13.3-23; Lc 21.7-24; 17.22-24)

³ Tásiha, viyanapa tayehe eta cerro Olivoquiji, víputsi-cavapa. Te vítecapapa, téjacapa ema Jesús. Tásiha, víti máimitureana viyaserecapa:

—Vivaraha pimetacahavi. ¿Tájamuhupuca eta náimiaquipaisirayare eta Témposami? ¿Jararihiya-repuca eta ecutiarareyare eta piápechiravayare píteca, étapa eta táitachirayare eta táequenereruhi mapanereru ema Viya? —víchapa.

⁴ Tásiha, ema Jesús máichahavipa:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayare nuyehé. ⁵ Nacaheyarepahi éna: “Nútiripar Cristo”. Nasapiha navayuacayare ena camuriana achaneana.

⁶ Énerichuvare esamairicayare eta táehacacairayare eta ichapequeneana avasareana. Ticanarajiricainainapa eta te avasareana tayerehiqueneana, énerichuvare ticauyayacarenapa guieraina eyehe éti. Váhisera ecuameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecuirayare. Énerichuvare tatiarihiyareva eta ichape ecuhamuhuyareva te avasareana. Tatiarihiyareva eta ichape tayamurisiranyaya eta apaquehe te jácani távihanapahi táetupiarayare. ⁸ Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásiha, eti nuchaneranahi, ticitianacaheanainapa ena achaneana, táichaveneyare eta éhisiranuhi. Tipanjiricaheanainapa te tamutu avasareana. Ticaratacaheanayareva. Ticapacaheanayareva. ¹⁰ Tásiha, nararihinapa camuriana ena tínajicavanayare eta náehisiranuhi. Tásiha, ticitianacaheanainapa éti yátupiquene eta éhisiranuya. Tíjararecaheanainapa éti.

¹¹ Natiarihinavarepa nácani tépiyacavanayare manereruana ema Tata. Tamutusera eta námiturapiana

náepiyahiraivayarechucha, camurianayare ena navayuaruanayare. ¹² Énaripa ena arajuruana, tétavichavainapa eta namasuapajiraivaya, vaipa napicauchaimahi ema Viya. Camurianayare éna vaipa témunarahianáimahi. ¹³ Étisera nuchaneranahi, te ecamichahi tamutu, ímianavahivare eta éhisiranuhi te táitavapa tamutu, nucuchucaheyare núti.

¹⁴ Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu ena téneuchavanahi, étapa eta apamuriana nímiturapiana. Te ítecapapa te tamutu eta avasareana, nápechavayare nuchava.

¹⁵ Numetacahevaneyare eta apana. Járjapayare eta sache táíñehiqueneyare. Tímerecavaya ema achane váinarajiquene, máechajisiquenehi ema víyarahaini profeta Daniel. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuanayare eta májurehi ema víyarahaini Daniel.)

¹⁶ Tásiha, te ímahapa eta juca, esamairicapapuca, táuricapa etatajipa ejunavane, éti etiarihiqueneanahi te Judea. Ecaijuheyare eta te céroana, étaina eyumurusivaina. ¹⁷ Nácani tiávihanahi te nayehe canchón te nasamairicapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náeñamaqueneanainihi.

¹⁸ Nácani tachimararuayanayare te vámahí eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana.

¹⁹ ¡Páureanasami nácani esenana tachimararuayanayare, nácani ticajarianahipuca, nácani esenana ticachichanahi eta amuya tiájicachaha! ²⁰ Eta tacahe, eyaseacayare ema Viya tacuija táichejicahe †; váhivare tacuchimaracahe eta ichape tiquiva te achene te eyanapapuca ejuna. ²¹ Te jena sácheanayare, tétavivayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta náitaresirahi ena achaneana te juca apaquehe. Te táequenénapa eta tíñehi, tájinainapa tácutimahi. ²² Nájina tacaitruimahi eta nacatajivairayarehi ichape. Macaichecavaneyaresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuqueneanahivare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

²³ Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo.

† Ema Jesús máechajisihahi eta ticasarahimuhu, tiquivamuhuvare te jena mávasa Judea. Máechajisihahivare eta nayeherapi ena israelítana eta váhiquene náisapavahini tiyanana tipaicana te jácani sávarumuhua.

Matiarihipahi te juca vitaracu". Ena apamuriana áni-vare nacaheya: "Náepiyahiraivahi éna. Ema Cristo mávihahi te viávasa víti". Étiserá vahi ecusuapavaca. Eta navarairahi tivayucaheanaya eti machanerana ema Tata, náituruequenehayare naicha eta ichapequeneana tíáramicareana ecutiarareanayare. Camurianasamiyare ena navayuaruanayare. ²⁵ Étiserá vahi tivayucaheanaimahi taicha numetacahevanehi puiti. ²⁶ Te náichahepuca: "Ímaha máenahi ema Cristo ánaqui te mávapahi apaquehe", vahi ecuyana. Étaripa te náichahepuca: "Mararihipa jácani tayumurevaquenehi cuarto. Vicarichu viti vímatihí eta mávihahi", váhiquenevare ecusuapavaca. ²⁷ Taicha te yátupinapa eta nitesirayare núti, nucutiyaare eta táijahúchirava titecapa eta térameca. Namutuyare ena achaneana te juca apaquehe tinecapuanayare. Tacaheyare eta nuchavirayare nuti Manerejirunhi ema Viya. ²⁸ Vahi ecueñamava távihapuca nítecapihaya. Núti nítecapauchaheya te jácani iávihahi éti †.

Eta machavirayare ema Manerejiruhi ema Viya

(Mr 13.24-27; Lc 21.25-33; 17.26-30, 34-36)

²⁹ Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta tiávihanahi te anuma vímaimahaqueneanahi énerichuvare tiyamuricanainapa, tiyejecavanainapa. ³⁰ Tásiha, náimahainapa te anuma eta nícutiara núti Manerejirunhi ema Viya. Tiyahanainapa eta napisira namutu ena achaneana távacuanahi eta avasareana te apaquehe. Tásiha, tímahanuanainapa núti. Tiámanuinapaipa eta úcaji eta núcupaisirayare. Tétavicavayare eta nujaraivayarepahi, níñehinapaipa. ³¹ Nuvanecaya ema Arcángele, muracayare eta macachujairayapahi, apaesa ena ángeleana nacurujicainapa namutu ena nuchanerana nunerejiruanahi, tiásihanayare te tamutu eta juca apaquehe.

³² Tiuri puiti, nuvaraha nímicutichinahe eta jácani yucuqui. Eta táitsivachiravacapa eta tapacajiana, te ímahapa eta tajimuyairapa eta tatavaqui, tiúchuca-yarepa eta tapacajianaya arairu, tímaticarehi tiánehiripa eta únemuhuirayarépa. ³³ Ene tacahehi, te ímahayarepa tacacherapa eta júcana ecutiarareana, ímatiacainapa eta tánehirainapa eta nuchavira. ³⁴ Numetacahevanacha: Vuíchaha títavanaimahi ena achaneana náitareruanaichaha te táitecapapa eta júcana ecutiareanayare. ³⁵ Títavainapa eta anuma étapa eta apaquehe. Tativayaresera títauchava tamutu eta numetaruheanahi.

³⁶ Eta juca tíáramicareyarechucha. Nájjina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucáini néchahini. Macarichu ema Tata, ema téchahi. ³⁷ Tacutiyaare eta acane eta nájjahúchiravahi tépenana ena achaneana machamurianaini ema Noé. Ena nani

† Te máechajiruvahi ema Jesús, áni macahehi: "Te jácani mávihahi ema máepenaquene, eta távihayare eta sipuquiana". Eta juca mayehehi proverbio, tatiarihi eta tacayemaquenehi tayumurevahi.

tinicairihianarinecha, náematanerinecha térana, tímarerecanahi ena nachichanaveana. Vahi téñamavainaimahi eta náimairahi ema Noé eta masiapirahi tayehe eta ichapequene pacure. ³⁹ Tájjina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheayare. Vahi natsecavahini tayehe eta nuchaviraya. ⁴⁰ Te jena sácheanayare, natiarihiyare ena apinana ajairana ticaemataneanahi te isaniti, ema émana tíáramicareyare tíara. Ema apana manasinapa. ⁴¹ Tacutiquene, apinanahipuca ena esenana cáemataneanahi tiyuvarecanahipuca. Énerichuvare esu ésuna tíáramicareya tíara. Esu apana manasinapa.

⁴² Eta tacahe, etsecavahi ecauneuchava éti machu vahi ecunecapachava eta nitesirayarehi nuti Iáquenu. ⁴³ Nuvaraha ácaicutiaraqueneéna. Machu ácutiriana mácani achane námeyeruhi ena tíamerahiana. Tájjina máechapiavahini tájjahapuca hóravayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuameyechahini. ⁴⁴ Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunhi ema Viya, machu iáramecariana.

Nararihi ena músuana tíúriana. Nararihivare ena músuana máurirahana.

(Lc 12.41-48)

⁴⁵ Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta máijjarasiraya eta tinicacareana ena apamuriana machamusuvanahi. ⁴⁶ Tétavicava eta máuricacarevaya ema maca ticatuparahahi, te tamutuhi máitauchahi jácani machimampirana ema máquenu. ⁴⁷ Németeaca, eta tamutuirahi tiuri eta machimampirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíúrihi eta máitauravahi. ⁴⁸ Téhesera váhipuca tiuri eta mapanereruana ema mácani empleado, máimijachachucha tiyereyarehi eta máitecapirayarehi ema máquenu. ⁴⁹ Tásiha, macaetmajiricavacapapuca ena machamusuvanahi. Máichapapuca eta piesta, tinahacavapa téra macachanevacahi ena macutiqueneana térahiana, téniricapa. ⁵⁰ Tásiha, vaipa manecapau-chavahini te títecapapa ema máquenu. Machimacacapa ema empleado eta mamapachichijisiraipa eta máimahaqueneana. ⁵¹ Eta tacahe, ema máquenu macavanairipinapa náestacayare muraca. Tájjina najapanuhini, tayanapane máiyahainepuca, macapiti-quahechavainepuca éma. Tásiha, machu ácutihini ema maca empleado máurirahahi, machu ecaquipaicasisami eta te yucu infierno.

Ena Jesús máimicutichina ena diésqueneana amaperuana esenachichana

25 Puiti nuvaraha nímicutichinaheyare nayehe ena tiúchucuhanaya ticachanenuanayare eta néjasi-haya eta návacureya, énapa ena vahi ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámpanana. ²Ena cincoqueneana, téchemarahianahi. Tiámauchavavacapahi eta nabotellana eta aceite natseruvapahi. Ena apamuriana cincoqueneanahivare máechemarairahana mapanerereana. Vahi námauchavapahina eta nahaceiteyarehi. Tásiha, tájina naviyahini. ⁵Tacahe, vahi náitecapavanehini ena araimana. Navarahaipahi tímacana éna. Tavehapa eta ichapu, tímacanapa. ⁶Tacahe, te enumuhupa yati nasamapa ema tipiaracahi. Ánipa macahe: “¡Nárajapa ena araimanayare! ¡Yare iácapa!” nacahepa. ⁷Téhepucanapa namutu ena esenachichana. Náetupiricapa eta namicahuana. ⁸Tásiha, ena cincoanavare tiájicuvacaipahi eta namicahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tiájicuvacaipahi eta juca vimícahuana, vémahaequenehaipa” nacahepa. ⁹Énaser ena cincoqueneana najicapapa: “Vahi víjaracahémahi machu véchuriaca víti apanava. Vahi várataimahi. Tiúripana eyana evachareca eta ehaceitena” nacahepa. ¹⁰Tásiha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távihayarehi eta piesta. Náehicapa ena cincoana natseruvanahi te távihayarehi eta piesta. Tacahe, ticaeratapa eta tapaja. ¹¹Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejjequenehahavi. Vivaraha visiapa” nacahepa. ¹²Énaser ena arayanayare majicapapa: “Eti, ¿nájahahhipuca? Vahi nímatihe. Németeaca vahi étina tavanaranaina eta peti” máichavacapa ema arayanayarehi.

¹³Tacahe, ema Jesús máichahavipa:

—Éti, vahi ecucuti ena máechemarairahana. Ecutiya-resera ena téchemarahiana. Ecuneuchavaicha éti, machu vahi ecunecapauchava eta jácani sáchezare eta nuchavirayare núti Manerejirunuhi ema Viya.

Ena Jesús máimicutichinavaca ena achaneana ticaijaracasianahi eta maplatane ema achane rico

¹⁴Puiti nuvaraha nímicutichinahe tayehe eta níjarasiraheya eti nuchanerana eta evacurecana taicha eta táurirahi eta ecaemataneasiranuhi. Matiarahi ema achane rico. Tiyanayarehi te apana avasare. Máichuhavacapa ena mapanana mamusurana. Máijaracapa eta maplatane.

¹⁵Ena achane máimativacahi eta náechemaraivahi ena mamusurana. Ema émana máijaracapa cinco mil-

lone. Ema apana máijaracapa apina millone. Ema apana máijaracapa étana millone. Nacaejapacayare eta plata. Tásiha, ema rico tiyanapa te macaijuheyarehi te apana avasare. ¹⁶Tacahe, ema tijacapahi eta cinco millone, macaemataneacapa eta plata. Macaejapacapa eta plata. Diez millonepa maicha eta maplatane eta macaejapahirahi. ¹⁷Ena apana, ema tijacapahi eta apina millone, énerichuvarepa macaejapacapa eta plata. Títucavavare éma eta cuatro millone eta plata.

¹⁸Énaser ena tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

¹⁹Tiyere eta mapairirisirahi ema náejaharu. Téhesera te tichavapa, mayaserecavacapa eta plata máijararuanahi éma. ²⁰Tacahe, tínapucapa ema tijacapahi eta cinco millone. Máijaracapa ema máquenu eta máiturevahi. Ánipa macahe: “Tata, píti píjaracanuhi cinco millone eta plata. Júcahisera cinco millonevare eta táejapahirahi”. ²¹Ena máejaharu majicapapa: “Tiuri, nuchicha. Tájina táichava. Tétavicava eta piúri-va. Pí-tauchahi eta picaemataneasirahi eta nuplatane. Puiti vahi támapurujimahi eta piúrivahi tayehe eta juca ánimurichichahi níjararuvahi. Nutuparacavinapa eta camuriquene. Puiti pisiapainapa eta nuyehe. Piúrisamurereacaváinapa”. ²²Tásiha, títecapavarepa ema apana ema tijacapahi eta apina millone eta plata.

Máichavarepa: “Tata, júcahi eta apina millone eta plata píjararunuhi. Júcahivare eta apinavare millone eta táejapahirahi”. ²³Ena máejaharu majicapavarepa: “Tiuri, nuchicha. Tétavicava eta piúri-va píti apana. Puiti, váhivare támapurujimahi eta piúrivahi tayehe eta juca ánimurichichahi níjararuvahi. Nutuparacavinapa eta camuripanaquene. Puiti pisiapainapa eta nuyehe. Piúrisamurereacaváinapa”. ²⁴Tásiha, títecapavarepa ema tijacapahi eta étana millone. Máichapa ema máejaharu: “Tata, núti nímativahi eta pimajapanuraivahi. Piverejicanuyarehi eta táejapahirayarehi eta piplatane. Pítahacanuyarehiva eta nématanevachahi.

²⁵Eta nupisirahi nácaetehahini eta piplatane, nécarapa. Puiti, júcahi nímicahava tamutu eta piplatane”.

²⁶Ena máejaharu majicapapa: “Tétavicava eta pisun-suva, piti plújutataji. Te pímatinuhipuca eta numajapanuraivahi, nítharahi eta apaematanevacha, téhevare pími-jachahi nuverejicaviyare eta táejapahirayarehi eta níjararuvahi nuplatane; ²⁷váhiyapa pinacaini te banco eta nuplatane. Puiti váequeneipahini puiti eta táejahacaripahini eta nuchaviraipahi”. ²⁸Tásiha, máichavacapa ena apamuriana mamusurana natiarhiqueneanahi: “Everejica ema mácatataji eta plata. Íjaraca ema ticayehehi eta diez millone. ²⁹Taicha, mácani máiturequenehahi eta macaemataneasirava, tatuparacahi eta nímicatasiraya. Ticayeheyare camuripana. Énaser nácani vahi náiturequenehahini eta nacaemataneasirava, ticaverejicasianayarehi eta náijaracasianahi. ³⁰Émechareca muraca ema maca musu máurirahataataji. Vahi ecujapanu, tayanapane máiyahainepuca, macapitiquiahechavainepuca. Tási-

ha, iáquijica eta te cuarto tamapicujuhequenepanahi" macahepa ema achane rico.

Ena achaneana, te jena sáchezare ticayaseserehi-anainapa, étpa tiámavacaya eta náitátirahi ena apamuriana, ticaevatanainapa tayehe eta návihayare

³¹ Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuinapa. Tásiha, névatacaya ena nuyeheana ángeleana nacurujicavacaya te numirahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena vahi nuchanerainainahini nunacainapa te sapa. ³⁴ Tásiha, nuti Rey ánipa níchayare ena nuchanerana tiávihanayarehi te nuvaure: "Yare, eti iúricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaquehe.

³⁵ Taicha te ímahanuhi eta nécuavahi, éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapahi, éti íjaracanuhi eta nítecapihayare. ³⁶ Tájina numuirihainapahini, éti emuriachanuhi. Nucajumahi, éti ípuchapananuhi. Nucaeratahi te cárcel, éti ejirapananuhivare". ³⁷ Tásiha, ena níchuhaqueneanahi tijicapuanainapa: "Tata, ¿tájamuhu vímahavihi pécuahapahi, tásiha vénicavipa? ¿Tájamuhuvare vímahavihi pimaunepahi, tásiha víti vésicavipa eta une? ³⁸ ¿Tájamuhuvare vímahavihi te pipaisirana tájina pítecapihahini, tásiha, víti víjaracavipa eta pítecapihahi? Váhivare vímahavihini mamuriarevinahini, tásiha víti vimuriachavipa.

³⁹ ¿Tájamuhuvarehipuca picajumahi, tásiha víti vípuchapanavipa? ¿Tájamuhuvarehipuca picaeratahi, tásiha víti véjirapanavipa?" náichanupa. ⁴⁰ Tásiha, nuti Rey nujicapainavarepa: "Nutupiruva numetacahe: Nútira íjaracanuhi tamutu eta eJapanuraivahi, ímicatasiravacahi ena echamuriana nuchaneranhivare, ena nani namaesachaqueneanahi najacpahini ena apamuriana ena achaneana" níchavacapa.

⁴¹ Tásiha, ena tiávihanahi te sapa, níchavacainapa: "Étiserá évuishi te numirahu, eti masuapajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema iáquenuhi ema Váinaraji énapa ena majupahana ángeleanainihi. ⁴² Taicha te nécuahapahi, éti vahi íjaracanuhi eta nunica. Numaunepahi, váhivare ésicahinuhi une. ⁴³ Étaripa te nupaisiranapahi, váhivare íjaracanuhi eta nítecapihahini. Néchurihavare eta numuirihá, váhivare íjaracanuhi numuirihainahini. Nucajumahivare, nucaeratahare, váhivare éjirapananuhini" níchavacainapa éna. ⁴⁴ Tacahe, éna náichanupa: "Tátachicha, ¿tájamuhu vímahavihi pécuahapahi, pimaunepahi, pipairiricapahi, mamuriarevahi, picajumapahi, picaeratahi, eta jácani vimáimicatasirávihipuca?" ⁴⁵ Nuti Rey nujicapainavarepa: "Nutupiruva numetacahe: Éti, vahi eJapanunuhini, taicha vahi ájapanuvacahini apaesainahini ena nani nuchanerana emaesachaqueneanahi". ⁴⁶ Emutu éti eyanayare

tayehe eta ecaicuñaiyare máitavacayare. Énaserá ena nunerejiruana, matapiravareanahi. Námavacainapa tayehe eta táurivayare eta náitaresira, máitavacacayareva.

Napanerechaipahi ena tuparairucana eta nacaratasirayare ema Jesús

(Mr 14.1-2; Lc 22.1-2; Jn 11.45-53)

26 Te títapiricapa eta juca máimiturapianahi, máichahavipa viti máimitureana:

² —Écharichuhi éti eta apinarine sache eta Pascuáiraya. Tásiha, núti Manerejirunuhi ema Viya, ticaratacuanainapa témetatarecanuanainapa —máichahavipa.

³ Tiuri, ena tuparairucana énapa ena aquenucarahana, énapa ena escribánoana ticurujicacanaripahi te tajuhe eta mayehe palacio ema Caifás, ema corregidor. ⁴ Tacahe, náechajisihapahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi. ⁵ Tipicacavanarichuchasera. Ánipa nacahehi eta náechajiriruvahi:

—Vuíchaha vicucarataca éma achichu juca piéstairaya. Taicha camurianayarehi ena achaneana, machu tájahapuca náicharachavi taicha navaraha-yarehi nacatiucha éma. Vicuchapasera nayana —nacahepa.

Esu esena tiámasichahi ema Jesús te táijiyequene perfume

(Mr 14.3-9; Jn 12.1-8)

⁶ Tacahe, ema Jesús, tiyanapa tichava eta te avasarechicha Betania. Náichuhasivahi eta manisiraya te mapena ema achane ticaijare Simón ema leprosoinihi. ⁷ Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta táijiyeve. ⁸ Eta náimairahi ena nuchamuriana máimitureana ema Jesús, váiparinehi náuricahini eta suémepururesirahi eta tasivachaquene perfume sujucusisirahi ema Jesús. Ánipa nacahehi:

—¿Tájaha tacayema suémepurureca eta juca tasivachaquenehi perfume? ⁹ Tiúripanahipucani víjaracahini eta juca táijiyeamaquenehi. Vivehahini eta camuriquene plata; tásiha, vímicatasihahini ena páureana —nacahepa.

¹⁰ Émasera ema Jesús máimatihí eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi. ¹¹ Ena páureanasami, tamutuchucha sácheana eta ecachaneravacayare éna. Ímicatacayarehi te jácani ecaimahaquenerana. Nútiserá vahi nánasiquenémahi eta eyehe. ¹² Eta juca sujucusisiranuhi eta perfume, sucainapuchahi ésu eta suíjiyechirahi eta náquehe tayehe-yarehi eta nucaecarasirayare. ¹³ Nutupiruva numetacahe: Nácani ticametarairuanayare eta tiúrina echajirucava, náechajisihayareva eta juca suíchaquenehi

esu suca esena. Témechanayare suyehe te tamutu avasareana te juca apaquehe —macahepa.

Eta máijararesirahi ema Júlasí ema Jesús

(Mr 14.10-11; Lc 22.3-6)

¹⁴ Ema Júlasí, émarichu vichamurinihi éma vidoce-nénihi apóstole mayehe ema Jesús. Tiyanapa téchajiri-panavahi nayehe ena tuparairucana. ¹⁵ Ánipa máichavacahi:

—Te yátupihpuca evarahahi ecaratata ema Jesús, núti nímechaheyare. Nucamunuhisera néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna náijaracapa eta treinta reale. ¹⁶ Jéhevare-pasera ema Júlasí matanucaipa eta máicharacayarehi eta máijararesirayarehi ema Jesús.

Ema Jesús máenimurihapa ena máimitureana

(Mr 14.12-25; Lc 22.7-23; Jn 13.21-30)

¹⁷ Tacahe, títecapapa eta piesta Pascua, étaripa eta tínapuca sache eta semana vinicahi eta pan mayehere levadura. Viti máimitureana viyaserecapa ema Jesús:

—¿Távihapuca pivarahahi vácaijuhe eta vétupirisiahini eta vinisirayare eta uvesachicha eta viyeherepi? —nacahepa.

¹⁸ Éma tivanecahavipa:

—Eyana tayehe eta Jerusalén, te mapena ema nímaticasare. Aní íchayare: “Ema maestro tivanecahavihi eta piyehe. Aní macahehi: Tiánehipa eta nítavirayare eta nématanehi. Te pipena eta nunisihayare eta uvesachicha eta viyeherepi, nénisihayare ena nímitureana” íchayare.

¹⁹ Tacahe, tiyananapa ena máimitureana. Éta paichuhi náichahi eta máimiturapiyanihi. Tinahacavanapa náetupiricahi eta naniruyare tayehe eta Pascua.

²⁰ Tacahe, te jena yátiquenehi ema Jesús, ténicahavipa viti dócequeneana máimitureana. ²¹ Te vinicari-pahi, máichahavipa éma:

—Jéhesareinehi, te etaracu éti, mararihi ema émana tíjararecanuyare —máichahavipa.

²² Tacahe, víti ichaperinehi eta máimipaneresirahavihi eta juca máichirahavihi. Vimutu viyaserecapa éma:

—¿Nútichupuca, Tata, jácani? —víchavacapai víti éma.

²³ Tásiha, éma máichahavipa:

—Mácani néniruyare eta pan néchipaejiruhi te juca nuplatura, émara ema tíjararecanuyare. ²⁴ Tacahe, núti Manerejirunuhi ema Viya, éta paichuhi eta nacapasiranuyarehi, tátauchiravayarehi eta nuyehe eta táechajiruvahi eta Sagrada Escritura. ¡Páuresamisera ema tíjararecanuyare! Tiúripaichuhipucani vahi macuchuahini te sujuhe esu maena —máichahavipa.

²⁵ Tacahe, téchajicapa ema Júlasí:

—Maestro, ¿nútipuca jácani níjararecaviyare?

Tásiha, ema Jesús majicapapa:

—Pítisami —máichapa.

Ema Jesús tímechahavi eta macaejasiraya eta matratune arairu mayehe ema Maiya

(1 Co 11.23-26)

²⁶ Tásiha, eta vinisirahi, mavehapa eta pan ema Jesús. Mahasulupayachapa ema Viya. Mayuvetucapa, tíjaracahavivacapa viti máimitureana. Tásiha, máichahavipa: —Eta juca neche. Enica —macahepa.

²⁷ Tacahe, mavehavarepa eta vasu vérirare, mahasulupayachavarepa ema Viya. Tásiha, tíjaracahavivare. Máichahavipa:

—Era eta juca ámutu éti. ²⁸ Taicha eta juca eta nítine, táepusiruvayare eta nucaepahairayare eta epecaturana emutu eti achaneana, esimutuqueneyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe.

²⁹ Nutupiruva numetacahe: Vaipa nápechavaimahi néráhivaréni eta juca tachi eta uva. Tiámainucava te táitauchavapa eta nusiapiraya eta nucavacuréraya, nucajupahairaya ema Tata Nucaiyaquene. Te jena sache, níjaracaheya vérainapa eta aramaruama. Vicajupahainapa ema Tata.

Ema Jesús máimereucha ema Pedro tépiyacavayare vahi máimati ema Jesús

(Mr 14.26-31; Lc 22.31-34; Jn 13.36-38)

³⁰ Tásiha, eta vítanesisrapa, vijirapa eta jirasare eta vihasulupayachirahi ema Viya. Te vítapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoquiji. ³¹ Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásiha, títauchavayarehi eta máechajiruvahi ema Tata eta te Sagrada Escritura: “Nísapayare nacaratata ema Pastor, nacapasirasamiyare. Tásiha, tíjunaracanainapa eta uvesana macurujiruanainihi” macahepa. ³² Téhesera te néchepucapa te nécari, nínapucainapa te Galilea. Ánaqui nucuchapiaheyare éti —máichahavipa ema Jesús.

³³ Tásiha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

³⁴ Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahuinapaichaha eta táechajisirayare eta varayu, mapahe eta pépiyasiravayare vahi pímatinu —máichapa.

³⁵ Ema Pedro macahevarepa:

—Tayanapanepuca pímicapacanu, váhiquenesera népiyacavaimahi vahi nucuimativihini, váhivare níñajiacavimahi —máichapa.

Viti apamuriana étarichuvare tacahehi eta véchajiruvahi.

Ema Jesús tiyujaraca te Getsemaní

(Mr 14.32-42; Lc 22.39-46)

³⁶ Te vítecapapa víti tayehe eta huerta Getsemaní, máichahavipa ema Jesús:

—Éjacachaha eta ani te juca. Ecuchapanuchaha. Núti nuyanayare ánaquipana, nuyujaracayare —macahepa.

³⁷ Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa.

³⁸ Tásiha, máichavacapa:

—Tétavicava eta táeñamirava muraca eta nusamure. Tavaraha ticapacanu. Ácahéchaha ani te juca. Váhisera ecuimaca. Ecauneuchanuhi —máichavacapa.

³⁹ Tásiha, tipaipanapa ánaquipanachíchahi. Tiáquipai-cavapa máetipaisinapa, macaitecapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti —macahepa.

⁴⁰ Tásiha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásiha, máichapa:

—Váiparinehi ímicatacanuhini ejaneacavahini étanainahipucaini hora ácahehinehi. ⁴¹ Éjamiuchava. Eyuja-rauchava apaesaina. Eyaseaca ema Viya eta étumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

⁴² Tásiha, tiápechavavarepa tiyanavarepa ema Jesús. Apihepa eta mayujarasirahi. Ánipa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítauchiraya eta pivarahaquenehi puiti. Nísapava nacapacanu —macahepa.

⁴³ Tásiha, tichavavare eta viyehe viti máimitureana. Tímahahavipa víti vímamurihaipa taicha taveharipa eta ichapu eta viúquihana. ⁴⁴ Tacahe, mapahequenepa tichavapa tiyujarapana. Étarichuhi eta máechajiririvanahi. ⁴⁵ Te tichavapa, téchajicahavipa:

—¿Íápechavapa ímaca? ¿Vuíchahapuca enaracahini? Jéhesare, puiti títecapapa eta nutuparahahi nacaratasiranuyare ena ticatianacuanahi. ⁴⁶ Ávane ema tíjararecanuyare. Échepuca. Viyana viácapavaca —máichahavipa.

Nacaratacava ema Jesús

(Mr 14.43-50; Lc 22.47-53; Jn 18.2-11)

⁴⁷ Téchajiricavaichaha ema Jesús, macahepainecha ema Júlasí, ema vichamurinihi. Mámamurihapaipahi ena camuriqueneana achaneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena aquenucarhana. ⁴⁸ Ema Júlasí, tatiarihihi eta máicutiarayarehi eta náimatira-

yarehi ena suntaruana ema Jesús. Ani macahehi eta máechajiriruvahi ema Júlasí:

—Ecnenuyare. Ema nétserareruyare, éma ecaratatacava —macahepa.

⁴⁹ Tacahe, ema Júlasí témeñahavapa mayehe ema Jesús. Máichapa:

—Yátiheipa, tata Maestro —máichapa.

⁵⁰ Tásiha, máetserecapa. Ema Jesús majicapapa:

—Piti nímiturevihi, ¿tájaha tímitecavi? —máichapa.

Tásiha, ena suntaruana enevanepa nacaratacavi, napresuchapa. ⁵¹ Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás. ⁵² Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheyare, espada eta ticapacayare.

⁵³ Váhipuca pecha te návarahahini núti nuyaseacahini ema Tata, puítinaichuhini macucupaicahini ena 80,000queneana ángeleana. ⁵⁴ Váhisera nuvaraha nuyaseaca. Tatuparacavi títauchavayarehi eta táechajiririvanahi eta Sagrada Escritura eta níchavaquenevayarehi —tásiha, máichavacapa ena suntaruana—.

⁵⁵ ¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijiricavapa námerahihini? Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini.

⁵⁶ Títauchavahisera tamutu eta juca taicha tacahehi eta náechajiriruvahi ena profetanaini, tayehe eta Escritura táechajisihairanuhi —macahepa.

Tacahe, viti máimitureana vimutu vijunaracapa, vinaquicapa ema Jesús.

Nacatupihapa ema Jesús te namirahu ena tuparairucana

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ema ticaratacanahi ema Jesús námapa te mami- rahu ema Caifás, ema corregidorhi te jena ñoñi. Natiarihivare ena escribánoana énapa ena aquenuca- rahana. ⁵⁸ Ema Pedro, máehiequenehapahi, mayerehi- pahisera. Te náimisiapapa, tisiapavarepa éma te tajuhe eta canchón mayehe ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharacayarehi ema Jesús. ⁵⁹ Tacahe, ena tuparairucana énapa ena aquenu- carhana natanucaipahi ena tépiyaequenehanayarehi ema Jesús, navarairahi tatiarihiyarehi eta tiviuucha- yarehi eta máepenirayare. ⁶⁰ Váhisera náichimavahini, camurianahinéni ena tépiyaequenehanahi. Tisiapananechaserá ena apinana tépiyaequenehanayarehi.

⁶¹ Ánipa nacahe:

—Ema maca achane visamahí víti eta mavarairahi máquipaica eta Templo mayehe ema Viya tacapicahu- quenehi. Tásiha, máimichavayarehiji macaechepuca te mapanaquenenaji sache —nacahepa.

⁶² Tacahe, ema corregidor téchepurucainehi. Mayaserecapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

⁶³ Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecaviyare. Vahi nuvaraha pépiyahirahi. Némechavi máimahavihi ema Viya. Pátupiruva pimetaçahavi te yátupihipuca pítiquenehi Cristo, Machichaquenevihi ema Viya —máichapa.

⁶⁴ Tacahe ema Jesús majicapapa:

—Yátupi nútí Cristonuhi. Nuti Manerejirunuhi ema Viya. Tásiha, numetacaheyare eta apana. Járájapaya eta sáçheyare ímahanuyare eta néjasirayare te mavau-re eta Viya máitupajijíárúvaquenehi. Ímahanuyareva nútí eta núcupaisirayareva násihairayare te anuma, támiranuyarepahi eta úcaji —macahepa.

⁶⁵ Tacahe, ema corregidor eta masamirahi, tise-marínehi ichape. Tivetsayujíacavapa eta mamuiríha eta masemanevahi. Tásiha, macahepa:

—¡Tétavícaivaipa eta maviurevahi ema maca taicha macaecañihi ema Viya! ¡Puiti émaquenepa visama éma tépiyacavahi Machicha ema Viya! ¡Váipa tácomesa vítanucahíni ena testígoañahíni! ¡Puiti esamarípa éti eta juca macayemaquenehi! ⁶⁶ ¿Tájaha víchara-cayare puiti ema maca? —macahepa.

Tásiha, najicapapa éna:

—¡Tícavíurevapa! ¡Étáina táimícapaca! —nacahepa.

⁶⁷ Tacahe, náehavacapa ema Jesús. Nátutuquichapa. Náehamirahavare. ⁶⁸ Tásiha, náichapa:

—Vímahasejicacha, te yátupihipuca pítihi Cristo. Te pijarauquipuca, pímatihaviyare nájahahipuca ema téhamirahavíhi —nacahepa.

Éma Pedro tépiyacavapa vahi máimati ema Jesús

(Mr 14.66-72; Lc 22.56-62; Jn 18.15-18, 25-27)

⁶⁹ Tiuri, ema Pedro, matiaríhichahahi eta te canchón. Téjacaipahi tíasacavahi. Tacahe, sucahepaipahi esu mavanara ema corregidor. Suímahapa éma. Tásiha, suíçhapa:

—Németeaca pítiríchu ñímiture eñi Jesús eñi ticavasahi te Galilea —suíçhapa.

⁷⁰ Émasera majicapapa:

—Vahi nímati ema péçhajisíhaquenehi. ¿Távíhapuca pímatinenuhi píti? —máichapa.

⁷¹ Tásiha, mavarahapa tíuchucavaneyarehíni. Suímahavare esu apana vanaraca. Suíçhavacapa ena natíaríhiqueneañahi:

—Eñi ñica achane éñiríchu ñíçhamuri eñi Jesús Nazareno. Nímahahi ñíçchanepahi —suíçhavacapa.

⁷² Tíápeçhavavarepa ema Pedro téçhajica, áñipa macahe:

—Nujuracha te emirahu. Váhíquene nímati ema píçhaquenehi —macahepa.

⁷³ Te tíyererehachíhavarepa, náimahavarepa ena apamuriana. Náíçhavarepa:

—Yátupíquene pítiríchu machamuri ema maena Jesús, taicha eta péçhajisíra éta tímereuchavihi —náichapa.

⁷⁴ Tásiha, macahevarepa:

—Máicuñacanuine ema Viya te vahi nucucahe yátupina. Váhíquenesera nímati ema achane éçhajisíhaquenehi —macahepa.

Tásiha, enurujípa téçhajícanecha eta varayu. ⁷⁵ Te masamapa eta varayu, enevanepa máechahi ema Pedro eta máíçhirahi ema Jesús: “Te tamirahuína-paichaha eta táçhajisírayare eta varayu, píti mapaheyare eta pépiyacavayare vahi pímatínu”. Tásiha, tíúçhucavanepa ema Pedro. Tíyahavanepa taicha máímativanepa eta táíçapevahi eta máéjcapíravahi.

Námapa ema Jesús te mamirahu ema Pilato

(Mr 15.1; Lc 23.1-2; Jn 18.28-32)

27 Te tíjararahípa, tíúrujícavanapa namutuyaréni ena tuparairucana énapa ena aquenucarahana.

Tícaechacasípa eta náimícapasírayarehi ema Jesús. ² Nacuchucapa tícaítíhapaípa eta námírapahi te mamirahu ema Poncio Pilato, ema aquenucahi prefecto-híquene.

Éta macapasíravahi ema Júlasí

³ Tacahe, ema Júlasí eta máímairahi eta táíçapevahi eta macatájívairahi ema Jesús étapa eta nacapasírayarehi, íçaperínehi tícatísamurevahi taicha eta máéjcapíravaríhi. Tíyanapa máímíçhavapanahi eta treinta reale eta plata mavachahi nayehe éna. ⁴ Tásiha, máíçhavacapa:

—Néjcapavahi íçape eta níjararesírahi ema maca achane matapíravarequene. Nuvaraha nímiçhavaya eta nuvachainíhi —máíçhavacapa éna.

Énasera najicapapa:

—Jéhepuca, vahi vecha víti. Péçhaquenevaíçhuhi píti —náíçhapa.

⁵ Émasera ema Júlasí máquíjímírauçhavacapa eta te tajuhe eta Templo návíhahi éna. Tásiha, tíúçhucapa. Tíyanapa. Táíçhavenehi eta macatísamurevairahi, tíçhumucavapa.

⁶ Ena tuparairucana navehapa eta plata. Tásiha, nacahepa:

—Vahi táurícahíni víyaracuhahíni eta juca plata tayehe eta caja vínaquisírareva taicha mavachaequeneya eta máépenírayarehi ema maca achane —nacahepa.

⁷ Tásiha, eta plata máímíçhavaquenehi ema Júlasí, napanereçhapa eta navacharesírayarehi eta apaquehe nacaecarasírayare ena apavasanana. Eta juca apaquehe naseresírayarehi ena típuarecarahiana eta yupi. ⁸ Puiti éta tícaíjarehi “Apaquehe máítínevacha ema Jesús”. ⁹ Tacahehi eta táítauçhíravahi eta májurehi ema víyaraha profetaíni Jeremías. Aní tacahehi: “Navehapa eta treinta reale eta plata. Ena tuparairucana navacharecapa eta apaquehe nayehe ena típuarecarahiana. Tacahe eta juca mametasíranuhi ema Viya eta náíçhirayarehi eta juca” macahepa ema víyarahainí Jeremías.

Emá Pilato mayaserecapa emá Jesús

(Mr 15.2-5; Lc 23.3-5; Jn 18.33-38)

¹¹ Emá Jesús ticayaserehipa te mamirahu emá aquenucahi Pilato. Ánipa macahe eta mayaseresirahi:

—¿Jéhesareji réyvihi píti nayehe ena pijaneanana israelítana? —máichapa.

Emá Jesús majicapapa:

—Pitupiruvahi eta juca piyaseresiranuhi. Yátupihí eta nurreyvahi —máichapa.

¹² Tásihasera, te nametauchaipa ena tuparairucana, vahi majicapavacahini emá Jesús. ¹³ Tacahe, emá Pilato máichapa:

—¿Vahi péchajiuchava eta juca nametauchiravihi? Camurihi eta piviuerevana eta nayehe —máichapa.

¹⁴ Émasera emá Jesús váhiquene majicapahini. Tásiha, emá Pilato máramipa eta mamajicapirahi. Váipa máitucacarehini.

Emá Pilato macavanairipipa eta náetatasiraya emá Jesús

(Mr 15.6-15; Lc 23.13-25; Jn 18.38-19.16)

¹⁵ Tiuri puiti, tatiarihi eta mayeherepi emá Pilato, te Páscuamuhuana, macaiticayarehi emá émana preso, mácani nayasearuyarehi ena achaneana. ¹⁶ Tiuri, matiarihi emá achane ticaijare Barrabás, ichape eta maviurevahi. ¹⁷ Eta náurujisiravahi ena achaneana, mayaserecapa emá Pilato:

—¿Nájahapuca emá eyasesereruyare emá nucaitiruya? ¿Émapuca emá Barrabás, téhesera émapuca evaraha nucaítica emá Jesús, emá ticaijare Cristo —máichavacapa. ¹⁸ (Taicha máimatiacaripahi eta nametauchahi emá Jesús ena tuparairucana taicha nacapinaruhi éma.)

¹⁹ Eta máejasirahi emá Pilato tayehe eta mávacure, suímimetarecapa esu mayena: “Vahi picuimisiapava ñiyehe eñi ñira achane matapiravare taicha yati tametasiranuhi eta nuvapure eta ñíchararacavayare éñi” sucahepa.

²⁰ Énasera ena tuparairucana énapa ena aquenuca-rahana náimitumurihapa ena achaneana nayaserecahi emá Barrabás, émainahini máuchucuha. Tásiha, nayaserecapa máepenahini emá Jesús. ²¹ Máechajimurihavarepa emá Pilato, mayaserecapa:

—¿Nájahasica emá evarahaquenehi nucaítica? —macahepa.

Éna najicapapa:

—¡Émaina máuchucuha emá Barrabás! —nacahepa.

²² Emá Pilato mayaserecapa:

—¿Tájahasica nícharacaini emá Jesús ticaijare Cristo?

Éna najicapapa:

—¡Pémetatareca te crusu! —nacahepa.

²³ Emá Pilato máichavacavarepa:

—¿Tájaha tacayemahi eyaseacahi eta németatasiraya emá maca? ¿Tájahasica eta maviurevahi? —máichavacapa.

Énasera tipiararemurihanavare muracapana:

—¡Pémetatareca te crusu! —nacahepa.

²⁴ Tacahe, máimahapa emá Pilato eta vahi máiturucahini macatiuchahini, taicha ena achaneana tivayuchavapaichucha eta nasemanevanahi. Tacahe, máemepanapa eta une, ticasipavahupa te namirahu ena achaneana. Tásiha, máichavacapa:

—Nuvaraha nímerrecava te emirahu vahi nútiparacaina eta máepeniraya emá maca achane matapiravarehi. Éti échinavayarehi —máichavacapa.

²⁵ Tásiha, najicapapa namutu ena achaneana:

—Vítinarine vicatapirava, énapa ena vichichanaveana. Vítinarine taeha eta máepeniraya emá maca achane —nacahepa.

²⁶ Tacahe, emá Pilato macavanairipipa nacaitica emá Barrabás. Tásiha, macavanairipipa náestaca emá Jesús; tásiha náetatacayarevare te crusu.

Nacavayumarajipa emá suntaruana emá Jesús

(Mr 15.16-20; Jn 19.1-3)

²⁷ Tásiha, emá suntaruana námapa emá Jesús tayehe eta náestasihayarehi te távirarehi eta guardia. Nachayacapa emá camuriqueneana suntaruana náumurivana.

²⁸ Navejamuhiacapa eta mamuiriha. Namuriachapa eta muíriare títsime. ²⁹ Náítsamemacapa eta itapepi eta majarapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayahiji. Eta nacavayumarajirahi, náepuyumirauchapajicacha. Ánipa nacahe:

—Tata, ¡pítitataji nayehevihiji Rey ena israelítana! —náichapa.

³⁰ Tásiha, nátutuquichapa. Náetetuvauchapa eta matsucurupahi, náepuchisicapa tayehe. ³¹ Te tamutu-
pa eta nacaecahijirisirahi, navejamuhiacavarepa eta mamuiriha títsime. Namuriachapa eta mamuirihai-
haichu. Tásiha, námapa tayehe eta macaetataiyarehi.

Náetatacapa emá Jesús te crusu

(Mr 15.21-32; Lc 23.26-43; Jn 19.17-27)

³² Eta napaisirapahi te calle, nácapajicapa emá achane ticaijare Simón ticavasahi te Cirene. Napamica-
pa éma manaracuha eta macurusura emá Jesús. ³³ Taca-
ahe, nacaitecapapa tayehe eta masihi nacaetatairare
ticaijare Gólgota. ³⁴ Ánaquipa náesichinehi emá Jesús
eta vino tisucareama ticasiriquiama eta ipuruji. Te
masamaecapa emá Jesús, vaipa mávarahahini máer-
ahini.

³⁵ Te náitauchapa eta náetatasirahi emá Jesús, emá
suntaruana nasuertehachapa eta mamuiriha eta
náijarajirisiracacahi. Tacahehi eta táitauchiravahi eta
májurehi emá víyahaini profetaini David. Ánipa taca-
he: “Tíjarajiricanapa eta numuirihaini. Nasuertehachapa
eta náijarasiricacairahi”. ³⁶ Tásiha, najaneaca-
pa emá Jesús emá suntaruana. ³⁷ Te tápusi eta macu-
rusura, tatiarihihi eta ajureca táechajisihahi eta tivi-
uchahi. Ani tacahehi eta ajureca: “Emá Jesús, Rey
nayehe ena israelítana”.

³⁸ Natiarihihivare emá apinana tiámerahiana. Ticaeta-
tanahivare te machacaya, emá émana te mavaure,

ema apana te masapa. ³⁹ Tásiha, ena tiánucumiraucha-napahi, tépiupiusicavanapaipa eta nacaecahirapaipahi éma. ⁴⁰ Ánipa nacahe:

—¡Pítitataji! Picahechajiriruvahi eta piáquipaisiraya-rehíji eta Templo, pirátahahivaréji pímicahava picatupíha eta arairu Templo te mapanayarericuhíji sache. Puiti vivaraha vímaha eta pítupajijiasiravahi, te yátupipuca Machichavi ema Viya. Piúcupaica te jara crusu. ¡Picatiuchava pítijivaina! —náichapa.

⁴¹ Énerichuvare ena tuparairucana nacaecahijiricavare, énapa ena escribánoana énapa ena fariséoana, énapa ena apamuriana aquenucarahana. Náichajiricacapa:

⁴² —Ema mácacacha, macahehi eta máechajiriruvahi eta marátahairahíji macatiuchavaca ena apamuriana achaneana. Tásiha, puiti váhivare marátahahini émajivainahíni macatiuchavahini eta te jara mávihahi. Te yátupinahíni Réyinaíni viyehe viti israelítana, macatiuchavaipahini, ¿masí? Máucupaicaripahini te jara crusu, ¿masí? Visuapasarepaini eta vímairinahini. ⁴³ Téhevare te yátupihipuca ticasíñavahi me Viya, vivaraha vímaha macuchucuha éma puítinaríchu, te yátupihipuca máemunacahi éma. Taicha macahehi eta máechajiriruvahi eta machichairahi ema Viya —nacahepa.

⁴⁴ Ena tímerahiana ticaetatanahivare te machacaya, énerichuvare nacaecahivare éna apanavare.

Eta máepenirahi ema Jesús

(Mr 15.33-41; Lc 23.44-49; Jn 19.28-30)

⁴⁵ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. ⁴⁶ Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaque! ¡Tata Nucaiyaque! ¡Vahi picujunijicanu!”

⁴⁷ Tacahe, ena natiarihiqueneanahi ena tisamanahi, ánivarepa nacahe:

—Esama ema maca achane mapiaracahi ema víyahaini profeta Elías —nacahepa.

⁴⁸ Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca ema Jesús, machuchujicayarehi. ⁴⁹ Énaserá ena apamuriana, ánivarepa nacahe:

—Ésamiricachucha. Vímahayare te títecapayarepuca macatiuchapana ema Elías —nacahepa.

⁵⁰ Tásiha, tíapechavavarepa tipiaraca muraca ema Jesús. Tásiha, tépenapa. ⁵¹ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare. ⁵² Étaripa eta ecariana téjiacavacapa. Téchepucanavarepa ena náepenaqueneana ena tisuapajirahianahi mayehe ema Viya. ⁵³ Tásiha, te mapanaquenepa sache, téhevare te táequenepa eta máechepusirahi ema Jesús te máecari, éna apanavare

tiúchucanapa tayehe eta náecariana. Tásiha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahi éna.

⁵⁴ Tacahe, ena tijanearecanahi, émapa ema nacapitara, te náimahapa eta tayyacarevahi eta apaquehe, étapa eta apamuriana tíamicareanahi, ichaperinehi eta napisirahi. Tásiha, nacahepa:

—Yátupiquenerichuyapa Machicha ema Viya ema maca —nacahepa.

⁵⁵ Natiarihivare ena camuriana esenana. Tímararacanahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea. ⁵⁶ Nacarichusera ticajuanahi eta náijaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

Nacucupaicapa te crusu ema Jesús, náecarayarepa

(Mr 15.42-47; Lc 23.50-56; Jn 19.38-42)

⁵⁷ Matiarhivare ema achane rico ticaijare José. Ticavasahi te avasare Arimatea. Émarichuhi téhicahi ema Jesús. ⁵⁸ Te capererehipa, eta máimairahi máepenirapahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavnairipipa náisapahini eta náecarairaya. ⁵⁹ Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana.

⁶⁰ Nanacapa tayehe eta máecari máemepiyareruhi máecariyahini ema José. Eta juca ecari, nasecajureruhi eta mari. Najihachapa tayehe eta tajitacarequene márime. Te náítauchapa, tiyananapa. ⁶¹ Esu María Magdalena, ésupa esu apana María, téjacanahi éna, náimarararacaipahi eta ecari.

Ticavanahianapa ena suntaruana najaneaca eta ecari

⁶² Tásiha, te apanapa sache tiyananavarepa ena tuparairucana mayehe ema Pilato. ⁶³ Náechajicapa ema Pilato. Ánipa nacahe:

—Tímitcachavihi, tata, vimetapanavi eta máechajiriruvahi ema Jesús te achanerichaha eta máechepusirayarehiji te máecari te mapanaquenénapaji sache.

⁶⁴ Puiti, vivarahahi picavnairipihini náeratahina muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téchepucaripa te máecari”. Tásiha, ena achaneana nasuapainapapuca, náimijachainapa yátupi. Tisuapacarepanainapapuca tayehe eta máichaqueneanahi te achanerichaha —náichapa.

⁶⁵ Ema Pilato máichavacapa:

—Tiuri, níjaracahe ena nusuntarurana. Eyana iama. Evaneca najaneacaquenéna. Nachujichaquenéna muraca eta máecari —máichavacapa.

⁶⁶ Tacahe, tiyananapa nachujichapa muraca eta ecari. Nanacapa eta táicutiaranayarehi. Tásiha, najaneacahi ena suntaruana.

Eta máechepusira ema Jesús te máecari

(Mr 16.1-8; Lc 24.1-12; Jn 20.1-10)

28 Te apanapa sache te tijarahichichapa eta lumíncuquenehi, tiyanapa esu María Magdale-na, sucachanehi esu apana María, náimahapanayarehi eta ecari. ² Tíjuhúchavapa tiyayacarehi eta apaquehe. Émahi ema ángele eta máucaupaisirahi te anuma. Te máitecapauchapa eta ecari, máequehepuichapa eta mari tajihainihi eta máecari. Máejahamecapa eta mari. ³ Tétavicava eta majaraivahi, tivayuhauquirahi. Eta mamuiraha, tétavicavavare eta tajapuva. ⁴ Eta náimairahi ena suntaruana, tiáquipapaicavanapa, tiyayacareanapa eta napisirahi. Tiánehini tépenaracana. ⁵ Tásiha, ema ángele máechajicavacapa ena esenana. Ánipa macahe:

—Vahi ecupicanu. Núti néchahi eta etanusirapahi ema Jesús ema macaetataquenénihini. ⁶ Májinaipahi eta te tajuhe eta máecari. Téchepucaripahi taicha tacahehi eta máechajiriruvahi. Yare, ímaha eta juca mávinénihini. ⁷ Eyana púitinarichu, emetapanavaca ena echamurianaahi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanahayarehi —máichavacapa.

⁸ Tacahe, ena esenana tiyananapa tichavanahi tijunaparanapaipa eta nametasirayarehi ena nachamuriana. Tipicanapaipa, tásihasera tacachanepahi eta náurisamurevapahi ichape. ⁹ Eta najunapirapahi, tíjuhúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuycanapa natsiucapevachapa. ¹⁰ Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare —máichavacapa.

Eta nametarapianahi ena suntaruana

¹¹ Eta najunapirapahi ena esenana, ena suntaruana tijanearecanainihi tiyananapa éna, nametapanavaca-

yarehi ena tuparairucana tamutu eta náimahaqueneanahi. ¹² Tacahe, ema corregidor ticurujiricapa namutu ena apamuriana aquenucarachana, mavarairahi téchajiricavana napanerechayare eta náicharacavayarehi. Jéhesare, navachachavacapa eta camuriquene plata ena suntaruana. ¹³ Tásiha, náimitucavacapa, ánipa náicha:

—Te natiarihinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare. ¹⁴ Émaripa ema aquenuca te máechapuca, vímaharinépa víti. Vitanucayare eta vivayuarasirayare, apaesa tacuija eviurevaina éti —náichapa.

¹⁵ Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacahehi eta nametarapi, te natiarihi ena tiyaserecana.

Ema Jesús mavanemurihapa ena máimitureana eta náimituresihaya te tamutu avasareana

(Mr 16.14-18; Lc 24.36-49; Jn 20.19-23)

¹⁶ Ene tacahehi eta viyanirahi viti óncequeneana apóstoleana tayehe eta Galilea te cerro taicha tacahehi eta mamentarapihi éma Jesús. ¹⁷ Tacahe, te vímahapa ema Jesús, vépuyumurihavanépa. Vimutu vitsiucapa. Natiarihisera ena vuíchaha nasuapapajicahini. ¹⁸ Tásiha, ema Jesús témeñahavapa eta viyehe. Máichahavipa:

—Ema Tata te anuma tituparacanuhi núti néchayare tamutu te anuma étapa te juca apaquehe. ¹⁹ Eta tacahe, eyanayare puiti epaicayare tamutu eta avasareana. Ímitucayare ena achaneana, nuchaneranaina éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo. ²⁰ Ímitucayareva eta nasuapiraina éna apanavare tamutu eta nímiturapianahi eta eyehe. Núti, tayanapané nuyerehehi, nímicatacaheyaresera. Níjaracahénapaipa eta nítupajijasirava. Tamutu sácheana nucachanehevacyarehi. Váhiquene nujunijiacahéimahi —máichahavipa.

Tamutupa eta juca nájuchaquenehi eta nímahaquenehi nuti Mateo.

San Marcos

1 Nuparapenaveana, puiti nuvaraha numetacahe eta máitaresirahi ema Jesucristo, Machicha ema Viya, te títecapauchahavipa te vitaracu. Ichaperinehi eta víuricacarevahi puiti taicha eta mametasirahavihi eta táurinaquenehi máechajiruvana ema Viya.

Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanésirayare ema Machicha te juca apaquehe. Éma, tímitecahi ticatiurahiyarehi. Énerichuvare matiarhiyareva ema apana achane máichuhaqueneharehi ema Viya. Macametarairu-yarehi, máetupiricavacayare ena achaneana, náinajisi-rayarehi eta tauriqueneana napanereruana apaesa táuri eta najacapirayare ema Machicha ema Viya.

Emá Juan Tícachasiricarahi tépanavapa ticametarairu eta máechajiruvá ema Viya nayehe ena vámahicuruhana

(Mt 3.1-12; Lc 3.1-9, 15-17; Jn 1.19-28)

4 Tiuri, te táequenepa eta juca, camuriquenehi áñoana, tíuchucapa ema achane ticaijare Juan. Éma, máichuhaquenehi ema Viya eta macametarairuirayare, máetupiricavacayare ena achaneana. Tacahe, masupahi eta matuparahahi. Tiyanapa vámahicuru-hapa. Vaipa avasarecuruhainini. Ticametarairupaipa nayehe ena macutiqueneana vámahicuru-hana. Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, apaesa maperdonachahe eta epecaturana. Te éneuchavapa, núti nícachasicahénapa, apaesa etsecavaipa eta ejacapirayare ema Cristo —máichavacapa ema Juan.

5 Tacahe, nárajapapa napaucha ena achaneana ticavasana eta te ichape avasare Jerusalén étapa eta apamuriana avasareana te táunavahi eta provincia Judea. Eta nametauresiravaipa ena achaneana, navarairaiipa náinajica eta napecaturana, ema Juan máicachasicavacapaipa tayehe eta cajacure Jordán.

6 Ema Juan, vanairucahi me Viya, profetahi éma. Eta macamuirihairahi eta náitsameru tajiyaha eta náitiquene ticaijare camello. Eta máitijuhe, vácapi jayumepi. Eta manicasareanahi eta tsacara. Eta máitiverahi eta mápama. **7** Ánivare macahe eta macametarairuirahi:

—Ávanepaipahisera mácani yátupiquene Cristo. Éma, tíapajupanavahi nuyehe núti eta mapicauchacaré-vahi. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamur-anuhini núti páuresami. **8** Yátupi núti nícachasi-

cahehi te une, te éneuchavapa mayehe ema Viya. Émainapa, tícachasicahénavarepa eti ecasiñavanahi mayehe éma, tíjaracahénasarepa ema Espíritu Santo —macahepa ema Juan.

Eta macaicachasirahi ema Jesús

(Mt 3.13-17; Lc 3.21-22)

9 Te jena sácheana eta mávihairarichaha ema Juan te cajacure Jordán, títecapapa ema Jesús. Másihapahi te avasare Nazaret te tinapaica eta Galilea. Tásiha, ema Juan máicachasicapa ema Jesús. **10** Te tamutupa, te tíucupaicapa eta te une ema Jesús, tíjuhúchavapa máimaha téjiacahi eta anuma. Máimahavarepa ema Espíritu Santo ticutipahi eta paluma. Máucupauchapa ema Jesús, mávahácapa éma. **11** Tacahe, nasamapa eta mahu ema Viya tásihaquenehi te anuma. Ani macahehi eta nasamirahi:

—Pítira nuchicha némunaruquene. Núrisamurecha piyehe —macahepa.

Emá Váinaraji Satanás mavarahapa macaitsamaraji ema Jesús

(Mt 4.1-11; Lc 4.1-13)

12 Tacahe, ema Espíritu Santo eta mávahásamurechirahi, enurujipa máimitucaipahi ema Jesús eta mayaniraya te mávapahi apaquehe. **13** Eta mayerevahi ema Jesús cuarenta sácheana. Tásiha, ema Satanás macaitsamarajipa, mavaraha macaetema ema Jesús. Váhisera máratahahini. Tatiarihivare eta sárareana eta te mávihahi ema Jesús. Te tamutupa, ena ángeleana náechapajiricahi éma.

Emá Jesús tépanavapa ticametarairu

(Mt 4.12-17; Lc 4.14-15)

14 Tacahe, te jena sácheana, nacaratacapa ema Juan. Námapa te tiyerehi. Tacahe, tiyanapa tichavahi ema Jesús eta te provincia Galilea. Tépanavapa ticametarairu. Máichuhavacapa ena achaneana náehicayarhi ema Viya. **15** Ánipa tacahehi eta mametarapi:

—Éneuchava mayehe ema Viya. Ítsivacha eta epanereruana. Taicha puiti tíchuhahénapa ema Viya. Tíánehipa eta sácheyare títecapauchahénapa eyehe ema ticatiuchaheyare. Aquenucayare mavaneruhi ema Viya, éma téchaheyare. Ichape eta iúricacarevaya te esuapa eta nímiturapiana —macahepa.

**Emā Jesús máichuhavaca ena cuátroqueneana
ténicarāhiana, máimitureanayarehi**

(Mt 4.18-22; Lc 5.1-11)

¹⁶ Tacahe, eta mapaisirapahi emā Jesús te tachausi eta cáquiure Galilea, máimahavacapa ena apinana ajairana, emā émana ticaijarehi Simón Pedro émapa emā maparape Andrés. Eta náematanerepi ena nani, ténicarāhianahi. Náquijierēcahi eta nayutahe. ¹⁷ Tacahe, emā Jesús máichavacapa éna:

—Yare, éhicanu. Núti níjaracaheya eta apana émata-nerepiyare. Éti ítucavaparacahi eta jímana; tacaheyare eta ítusiravayareva ena achaneana, machanerānyare emā Viya —máichavacapa.

¹⁸ Enevanepa náinajicahi éna eta náenisirahi. Tiyananapa náehicapa emā Jesús.

¹⁹ Ánaquipanavarepa máimahavarepa ena apinana ticaparapēcānavare emā Jacobo émapa emā Juan. Téjācanahi te napacure. Matiarīhivare emā naiya Zebedeo. Náititijiricahi eta nayutaheana. ²⁰ Emā Jesús máichuhavarepa ena apinana. Tásiha, náehicavarepa. Najunijicapa emā naiya Zebedeo. Manasipa éma te pacure, macachānehi ena mamusurana.

**Emā Jesús máimijunapa emā éreana tiávahácainihi
emā achane**

(Lc 4.31-37)

²¹ Tacahe, títecapanapa tayehe eta avasare ticaijare Capernaum. Eta juca sache sávarumuhuhi, tiyanapa emā Jesús eta te náurujisirareva ticaijarehi sinagoga. Máimitucavacapa ena tiúrujicavanahi. ²² Ichape náramihi ena achaneana eta máimiturāpianahi táicha vahi nasamasarēnahini. Tétavīcavahi eta máitusirahi mayunapaicahi tamutu. Tétavīcavahi eta tasuapacārevahi eta máimiturāpiana.

²³ Te nataracu ena náurujiruvanahi, matiarīhihi emā émana achane mávaháruhi emā éreana. Tipiārecapa, ánipa macahe:

²⁴ —Núti nímativi. Pítira Sántoquenevīhi. Machīchāquenevīhi emā Viya. Pésamīricahavīpāini, piti Jesús Nazareno. Váhini picuesirujicahavīni. Pivarāhaināpāpuca pijarārechavīyare —macahepa emā achane.

²⁵ Tacahe, emā Jesús macajachapa emā éreana. Ánipa maicha:

—¡Pámatina! Piyana pijunijica emā maca achane —máichapa.

²⁶ Tacahe, emā achane tíjahúchavapa tiáquīpaicava, tiyayacarepa. Tipiārecapa muraca maicha emā éreana eta majunijisirayarehi emā achane. ²⁷ Tásiha, náramīnehi ichape ena natiarīhiqueneanahi. Tiyaserejirācanapa, ánipa nacahe:

—¿Tájahasica tacayema eta juca? Emā maca Jesús, tétavīcava eta máitupājijīásiravahi, maratahahi máquījica ena éreana. Tásiha, ichape eta napisirahi emā. Vahi nácapāemāchahīni. Tamutupa arairu eta máimiturāpianahi emā maca —nacahepa.

²⁸ Tacahe, nasamāirīricapa namutu ena achaneana eta juca máichāqueneanahi emā Jesús. Énarīpa ena

ticavasānāhi te avasareana eta te táunavahi eta Galilea.

Emā Jesús macānaraca esu máimase emā Pedro

(Mt 8.14-15; Lc 4.38-39)

²⁹ Tacahe, te tiúchucanapa tayehe eta náurujisirareva, tiyanapa emā Jesús te napena emā Pedro emā Andrés. Náehicavarepa ena apinana emā Jacobo émapa emā Juan. ³⁰ Sutiarihihi esu máimase emā Pedro. Sunasiqueneipahi tívecāhi, ticājumāhi ésu eta muraca fiebre. Nametacapa emā Jesús eta sucājumāirahi esu esena. ³¹ Tásiha, mapāuchapa. Macaratavāuchapa, macāchepucapa ésu. Táetavīcavāneinehi eta fiebre. Tacahe, suéchapājirīcapa emā Jesús, énapa ena máimitureana.

Camuriana ena macānararuanapahi emā Jesús

(Mt 8.16-17; Lc 4.40-41)

³² Te jena cáperehīquēnehi, te tēricapa eta sache, ena achaneana námavacāpaipa eta mayehe emā Jesús namutu ena nacājumaqueneana énapa ena návahāruanahi ena éreana. ³³ Jéhesarēinehi, namutu ena achaneana ticavasānāhi tayehe eta avasare tiúrujicavanapa te tapaja eta peti. ³⁴ Camuriana ena macānararuana tayehe eta apanapane jumareana. Mavānavare ena váinarājiana máquijiruanapahi te náqueheana ena achaneana. Váhisera máisapāhini náechajīcāhini ena éreana, taicha náimatīhi éna eta émāirahi emā Cristo.

Tamutu avasareana te Galilea mapāica emā Jesús

(Lc 4.42-44)

³⁵ Tacahe, te tijarāhipa, téchepucāvanepa ena Jesús. Tiyanapa eta te mayujārsirare. ³⁶ Te téjamicapa emā Pedro, májinarīpa emā Jesús. Tásiha, tiyananapa nacāpayacapa éma eta te mayujārsirare eta te mávapāhi apaquehe. ³⁷ Te náitecapāuchapa, náichapa: —Namutu ena achaneana titanucāvianahi —náichapa.

³⁸ Tásiha, máichavacapa emā Jesús:

—¡Páureanasamī! Nuvarāhapasera viyanayare tayehe eta apana avasareana apaesa nucāmetarairu taicha nutuparacasivaichuhi níchuhavacāya namutu ena achaneana náehica emā Viya —máichapa.

³⁹ Tacahe, emā Jesús tiyanapa tipāica tayehe eta avasareana te Galilea. Ticāmetarairupaipa eta te náurujisirarevana. Énerīchūvare nayānāuchāpaipa ena achaneana návahāruanahi ena éreana, máquijīcācapāipa ena éreana.

Emā Jesús macānaraca emā émana achane leproso

(Mt 8.1-4; Lc 5.12-16)

⁴⁰ Tacahe, te apanapa sache, títecāpāpa emā émana achane macājumaquene eta lepra. Mapāuchapa te mamīrahu emā Jesús, máepuyūmīrauchapa. Tásiha, máichapa:

—Tata, nucāsīñavahi eta piyēhe, picānarācanūpāini —máichapa.

⁴¹ Tacahe, ema Jesús tijimuyainehi majapanuinehi. Manacapa eta mavahu. Máichapa:
—Nuvaraha nucanaracavi. Tájina píchiravaina puiti —máichapa.

⁴² Enevanepa tinaraca. Vaipa leprósoinahíni. ⁴³ Tacahe, ema Jesús máevatacapa ema achane. Matuparacapa ichape vahi macumetajirica. Ánipa máicha:

⁴⁴ —Pímaha, piyanayaresera pímerrecava nayehe ena tupairucana, apaesa náimamacavi. Énainapa timetajiricanayare eta yátupirahi pinaraca, pipachihapa. Nacuijasea picumetacavaca eta nútirahi nucanaracavi. Tásiha, piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

⁴⁵ Tacahe, tiyanapa ema achane. Timetajiricapaisera, mametacapa namutu ena achaneana eta máichavaquenevahi. Eta tacahe, ema Jesús vaipa máimerecavahini te avasareana taicha enevaneyarehi náurujiaca ena achaneana tímarahijiana. Tacarine tiyanahi tayehe eta nájinaricha achanenahichaini. Énasea ena achaneana tiyananaichucha napauchahi. Tiásihana tayehe tamutu avasareana.

Emá Jesús macanaraca ema émana achane macajumaquene eta muracaquiha
(Mt 9.1-8; Lc 5.17-26)

2 Tacahe, te apanavarepa sache, tichavapa ema Jesús eta te Capernaum. Eta nasamairirisirahi eta matiarahiraripa éma, títecapanapaipa ena achaneana, camuriqueneana. ² Tiyutucavanapa eta te peti mávihahi éma. Tájinapá táviravainahini eta te tapajachacaya. Ema Jesús máimitucavacaipa eta nacaijuheraya me Viya. ³ Tacahe, títecapanavarepa ena apamuriana, námapahi te áchuijema achane muracaha. Cuátroana ena tíamanapahí. ⁴ Váhisera náitecapauchahini eta te mávihahi ema Jesús, taicha eta nayutusiravahi ena achaneana. Tacahe, navetatamaequechapa eta peti eta te máinahu te manapaicahi ema Jesús. Te náitauchapa navetataca, nacajuchucupapa ema macajumaquene eta te áchuijema mamirahu ema Jesús. ⁵ Te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi nucaepahainavipa —máichapa.

⁶ Tacahe, énerichuavare natiaririhivare téjacanahi ena escribánoana. Napanerequenehapa eta macayemaquenehi ema Jesús. Tásiha, tisemanarinehi. ⁷ Ánipa nacahe te nasamureana: “Ema maca tímijachavai-papuca Viya eta macaepahairayaréji eta pecatuana. ¡Tétavícava eta matapirava! Taicha macarichu ema Viya marataha macaepaha eta pecatuana. Nájina apanaina tiratahaina ticaepahaina eta pecatuana” tacahehi eta napanereruana. ⁸ Enurujipa ema Jesús máimararacavacahi eta nasamureana étapa eta napanereruanahi éna. Tacahe, máichavacapa:

—¿Tájaha tacayema téjecapava eta epanereruana?

⁹ Tájina táejeravaina eta níchirahi ema maca:

“Nucaepahainavipa eta pipecaturanahi”. Máejerarepá-

napuca níchahini: “Nucanaracavipa. Pécheputa, piveha eta pímacaraji, piyana pipaica”. ¹⁰ Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi pécheputa. Piveha eta jara piyereruva. Piyana te pipena —máichapa ema Jesús.

¹² Enevanerinehi técheputa ema macájumaquenehi. Mavehapa eta mayereruva. Tipaicapa te namirahu ena achaneana. Tiyanapa tíuchucapa. Eta náimairahi, ichape eta náramirahi namutu ena natiarihique-
neanahi. Tétavícavainehi eta nacunachirahi ema Viya. Ánipa nacahe:

—¡Tétavícava táramicareva eta máichaqueneana ema Viya! ¡Asulupaya, Tata! ¡Vahi vímahasarénahini! —nacahepa.

Emá Jesús máichuha ema achane ticaijare Mateo, mayeheyare apóstole
(Mt 9.9-13; Lc 5.27-32)

¹³ Tiuri, te apanapa sache, tiyanavarepa ema Jesús te tachaui eta cáquiure. Náitecapauchavarepa namutu ena achaneana eta mayehe. Tásiha, máimitucavacapa.

¹⁴ Tacahe, te tíapechavapa tipaica ema Jesús, máimahapa ema Mateo, machicha ema Alfeo. (Ema Mateo ticaijarehivare Leví.) Téjacahi eta te macatuparahaiyahi eta macobresirahi eta impuesto.

—Yare, péhicanu —máichapa ema Jesús.

Tacahe, ema Mateo enevanepa tiyana máehica ema Jesús.

¹⁵ Te jena sácheana, ema Mateo téniricapa eta te mapena. Mámapa ema Jesús énapa ena máimitureana. Camuriqueneana ena téhicanahi ema Jesús. Natiaririhivare maverana ena macutiqueneana ema Mateo ticobrarecarahiana tayehe eta impuesto. Maveranahivare ena apamuriana máemunacasareana ema Mateo. Tiúrisamureanahi eta nanisirahi. ¹⁶ Títecapanavarepa ena apanamuri achaneana: ena escribánoana énapa ena fariséoana. Eta náimairahi eta macachanérahahi ema Jesús ena máichuhaqueneana ema Mateo, nacaecahipa. Ánipa nacahe nayehe ena máimitureana:
—¿Tájaha tacayema tísapava ema eyehe maestro macachanevaca eta manisirahi ena nánitátajiana ticobrarecarahiana eta impuesto? ¡Tétavícavahi eta nacapecaturaravahi! —nacahepa.

¹⁷ Te masamapa ema Jesús eta náechajirivanahi, máichavacapa:

—Ena ticajumanahi, tétavícavahi eta nacamunuirahi ema médico. Énasea ena majumareanahi vahi nácamunui mahi ema médico. Puítisera, eta tímitecanuhi nútí nutanucayare namutu ena tisipecaturana apaesa náeneuchavahini, náinajica eta napecaturana. Nácani matapiravareanahi vahi nasamavahini nácamununuhini —máichavacapa.

Nayaserecapa ema Jesús tayehe eta ayuna

(Mt 9.14-17; Lc 5.33-39)

¹⁸ Tacahe, te apahevarepa, ayunanahi ena máimitureana ema Juan. Ayunanahivare ena fariséoana. Náitecapauchapa ema Jesús ena apamuriana achaneana témejecapavarahiana. Nayaserecapa:

—¿Tájaha tacayema vahi naháyunachahini ena pímitureana? ¿Tájaha tacayema vahi nácutihini ena máimitureana ema Juan énapa ena fariséoana? —náichapa.

¹⁹ Majicapapa ema Jesús:

—Nímicutichinahe puiti. Vahi táuricaímahi ayúnanáinahini nácani ticaichuhacasianahi tinicanaya nayehe ena araimana. Tiúrisamureanayarehi taicha matiarihini ema arayena. Vahi táuricahini ayúnanáinahini. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaímahi ayunanainahini ena nímitureana. ²⁰ Járjapainapasera eta sáchezare, ticaverejicasianayare, taicha ticaratacuanainapa ena ticapacuanayare núti. Jéhevarepa ayunanainapa.

²¹ Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticaímahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínájica eta ichasi eyeherepiana tamauriqueneanahi —máichavacapa ema Jesús.

Ena fariséona náimipicauchahi eta nayeherepiana tayehe eta sávarumuhuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare

(Mt 12.1-8; Lc 6.1-5)

²³ Eta jena sávarumuhu, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanítiana. Tacahe, eta napaisirapahi, ena máimitureana navechuihapaipahi étajavapahi eta trigo. Navepiraquihapaipa, tépurajacachavanapaipahi. Tinicanapaipa. Tísapacareichucha éta, taicha técuhanapahi. ²⁴ Énasera ena fariséoana eta náimarasirapahi, tiseமானapaipa. Ánipa naicha ema Jesús:

—Pímaha ena pímitureana. Ticaemataneana-paichucha eta navepiraquirapahi eta trigo puiti juca sache tétavacavahi eta tacapicahuquenehi. Vahi tísapacarémani eta juca nacaemataneahi puiti —náichapa.

²⁵ Tacahe, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyahaini David eta mapaisirapahi técuhanapaipa énerichuva ena téhicanapahi. ²⁶ Te émarichaha ema Abiatar náquenumurihi ena tiyujaracarahiana, ema David tisiapapa eta te mapena ema Viya. Tiyaseserecapa eta manicayarehi. Náijaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi,

manicapa eta pan, énapa ena macachanequeneanapahi.

²⁷ Tímiyanava eta mametasirahi éna:

—Ema Viya máepiyacahi nativa ena achaneana. Te táequenepa, máimijarechinapa eta sache nanarasiraya ena achaneana, tiúrichayarehi éna. Vahi étainahini témepiyaca eta tihapapiricavacayare éna. ²⁸ Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichavacapa.

Ema Jesús macanaraca ema achane tépenavahu

(Mt 12.9-14; Lc 6.6-11)

3 Tacahe, te apanavarepa sávarumuhu, tiyanavare ema Jesús, tisiapahi eta te náurujisirareva.

Matiarihihivare ema émana achane vaipa tayamuricahini eta mavahu, tépenavahuipa. ² Natiarihihivare ena fariséoana, ena ticanarajiricanahi ema Jesús. Náimarasacapa éma te macanaracayarepuca ema achane eta te jena sache tacapicahuquenehi. Natanuuiricahi eta tiviuchayarehi ema Jesús. ³ Tacahe, máichapa ema Jesús ema achane:

—Yare, pitupihayare ani te namirahu ena achaneana —máichapa.

⁴ Tacahe, máichapa ena achaneana:

—Núti nuvaraha epanerechaya. Puiti juca sache sávarumuhuhi, ¿tájahapuca táurica eta víchayare? ¿Tísapacarepuca vícha eta táuriqueneana? ¿Étapuca víchayare eta tamauriqueneana? ¿Táuricapuca vípuchavaca ena achaneana? ¿Vicaparecapuca? —máichavacapa.

Énasera tímatinamurianarinehi. ⁵ Tacahe, ticatisamurevarine ema Jesús eta muracairahi eta nasamureana. Tacahe, tiseமானjuhepa eta máesenimurihairahi éna. Máichapa ema achane macajumaquene:

—Nímaha. Picajaruvauchava, pímechanu eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. ⁶ Énasera ena fariséoana, tiseமானarinehi eta náimairahi eta juca máichaquenehi ema Jesús. Tiyananapa tiseமானacana nayehe ena políticoana, machanerana ema Herodes, taicha navaraha nacapacaya ema Jesús.

Títecapanapa ena camuriqueneana achaneana

⁷ Émasera ema Jesús tiyanapa térajicavapa eta te mávapahi apaquehe eta te tachausi eta cáquiure. Mámapa ena máimitureana. Náehicavare ena ichapemuriqueneana achaneana ticavasanahi eta te provincia Galilea. ⁸ Jéhesare, te nasamairiricapa eta máichaqueneanahi ema Jesús, títecapanapa ena ichapemuriqueneana achaneana. Tíásihanahi eta te avasare Jerusalén, eta te provincia Judea, eta provincia Idumea, eta provincia Siria, étapa eta avasareana te apachara eta cajacure Jordán. ⁹ Tásiha, ema Jesús mavanecapa ena máimitureana natsesinahini étasina pacure apaesa vahi nacutupiaraca ena ichapemuriqueneana achaneana.

¹⁰ Taicha camuriana ena macanararuanapahi. Namutu ena nacajumaqueneana témeñahavanapahi tiyumususujicavanapahi eta náemeñahairavaya, taicha navarahahi náemamacayare. ¹¹ Jéhesare, ena éreanana tiávahácanahi ena achaneana, te náimahapa ema Jesús, tíaquipaicavanapa te mamiraha éma. Tipiararecanapa:

—¡Pítira Machicha ema Viya! —náichapa.

¹² Mavanecapasera máecatihavacapa nacuija nacumetaruína taicha vuíchaha mávarahahini náimati-híni ena achaneana eta émaquenérahí Machicha ema Viya.

Ena Jesús manerejica ena dócequeneana apóstoleana (Mt 10.1-4; Lc 6.12-16)

¹³ Tacahe, tiyanapa ema Jesús eta te mávapahi apaquehe máripahi. Mámamuríhapa ena ánimuriana máimitureana. ¹⁴ Tacahe, ánaqui manerejicavacapa te nataracu ena dócequeneana mayeaneanayarehi apóstoleana. Vaipa najunijiacaimahi éma, macachaneyarehi tamutu sácheana. Matuparacavacapa eta nacameta-rairuirayare. ¹⁵ Máijaracavacapa ena dóceana eta naratahairayarehi ticanararecana ena nacajuma-queneana, náimijunairayareva ena éreanana tiávahácanahi ena achaneana.

¹⁶ Eta juca náijareana ena manerejiruanahi †: Ema Pedro (éma ticaijarevare Simón), ema Jacobo, ema maparape Juan, ema Andrés, ema Felipe, ema Bartolomé, ema Mateo, ema Tomás, ema apana Jacobo, ema Tadeo, ema apana Simón, émapa ema Júlasí Iscariote (ema tíjararecachi ema Jesús).

Ena escribánoana téjecapavanahi eta náimijachirahi ema Jesús mávaháruhi ema Váinarají Satanás (Mt 12.22-32; Lc 11.14-23; 12.10)

²⁰ Tacahe, tichavapa ema Jesús, énapa ena mayeheana apóstoleana te napena. Tiápechavana-varepa tiúrujicavana ena achaneana. Tásiha, vaipa náitujicavahini tinicana taicha tétavicavahi eta nasimutuvahi ena achaneana. ²¹ Énaserá ena maparape-naveana ema Jesús, te nasamairicapa, tiyananapa náepanayarehini éma, taicha náimijachaipahi máurishi éma.

²² Énerichuvare natiaríhipa ena escribánoana, tiásihanahi te Jerusalén. Náepiyaequenehapa ema Jesús, ánipa nacahepa:

† *Ena nani apinana ajairana ema Jacobo émapa ema Juan, naparapecacahi, machichanaveanahi ema Zebedeo. Émasera ema Viáquenu Jesucristo máimararacahi eta náchanevana, máimativacahi éna. Manacapa eta náchucarapianahi “Boanerges”. (Eta táecha-jiriruvahi eta juca, Tijuricati eta náechajisira, téyayarasiánavare.) Matiaríhivare ema apana achane ticaijarehivare Jacobo. Ema maiya ticaijarehi Alfeo. Matiaríhivare ema apana ticaijarehivare Tadeo. Eta tápipine eta máijare Lebeo, étapa Judas. Tacahe, mapana eta máijare. (Pitanuca te Lucas 6.16 étapa te Mateo 10.2.) Ema apana Simón, tímaticarehi ema, náumurivainíhi ena revolucionárióana ticaijareanahi “cananístana”. Navaraha náquijica ena extranjeríoana romanoana.*

—Ema maca Jesús, vémeteaca majupaha ema náquenumuríhi ena éreanana, émarípa ema Satanás. Táitusiava máijaracahi eta máitupajijiasiravahi eta macuchusirahi ena éreanana —nacahepa.

²³ Tacahe, ema Jesús máichuhavacapa ena ticaecahirahianahi. Eta máimitusiravacahi, máimicutichinapa. Ánipa máichavaca:

—Éti, téjecapavahi eta epanereruana ímijachanuhi majupahanuhi ema Satanás. Ímijachapuca ticatianacacani ena éreanana. Váhisera éneña tácahe. ²⁴ Tacutihí ena machanerana ema gobierno. Éna, vahi típutsimuriavanaimahi apinainahipucaini partido. Te típutsimuriavanapa, énajicacaini tíaquipaicacana. ²⁵ Émarípa mácani achane te camurianahi ena machichanaveana, váiparinehivare típutsimuriavanaimahi, náehajiricacahini, énajicacahini náquipaicacahini. ²⁶ Ene macahehi ema Váinarají Satanás, váiparine máisapahini típutsi-cacana ena machanerana, taicha mavarahahi tisimutuanayarehi éna, tímiyanavayarehi eta nacaetemajirisi-rahaviyarehi.

²⁷ Macutihí ema mácani achane tume. Te macaratacachi eta mataquiríqui eta majaneasirahi jácani macayehequeneana, nájina tiámeyechaimahi. Tacamunuhi nacaratacanumayare, náiticanumayarehi ema túmequenehi achane. Jéhesare, náituruyechasareyarepa eta máimahaqueneana. Ene nucahehi núti, túmepanenuhi mayehe ema maca Satanás.

²⁸ Puiti nutupiruva numetacahe: Tiperdonachacareanayare ena achaneana eta napecaturana, tamutu jácani náechajisihaira eta táíñemahiqueneana. ²⁹ Jararíhisera eta epecatura vahi tiperdonachacaremahi. Eti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi nuti, émaque-nehi ema Espíritu Santo. Éti epanararacarípa éma. Tásiha, máitavacaca eta etapiravanaya —máichavacapa ema Jesús.

³⁰ Tacahehi eta máechajiriruvahi taicha eta nacahechajiriruvairahi: “Ema maca Jesús, majupaha ema Satanás”.

Suítecapauchapa esu maena ema Jesús énapa ena maparapenaveana (Mt 12.46-50; Lc 8.19-21)

³¹ Tacahe, te apanapa sache, tiúrujicavanavarepa ena camuriqueneana achaneana te tajuhe eta peti. Téjacanapa te machacaya ema Jesús. Títecapanecha esu maena énapa ena maparapenaveana. Nanasipasera te aneca taicha tiyututucavanahi ena achaneana. Navarahahi náechajicayarehi éma. Tásiha, nametacapa ena apamuriana ema Jesús, ánipa naicha:

—Esu pémunaruquenehi pena, énapa ena piparapenaveana nararíhi ani te aneca. Navarahahi téchajicaviana —náichapa.

³³ Majicapapa éma:

—Yátupi némunacavacahi esu meme, énapa ena nuparapenaveana. Nararíhisera ani te juca nuchacaya ena némunaruanahivare, nuparapenaveanahi.

³⁴ Tacahe, máesenimuríhapa ena máimitureana ena téjacanahi te machacaya. Tásiha, macahepa:

—Ena nani ena némunaruanahivare. ³⁵ Taicha namutu nácani ticaemataneacanahi ema Tata, énahi ena némunarqueneanahi —máichavacapa.

Eta máimicutichinaquenehi evaraqui tacaevaquenehi te apanapanenéji máteji te apaquehe

(Mt 13.1-9; Lc 8.4-8)

4 Tacahe, te apanapa sache, tiápechavavare tímitureca ema Jesús te tachausi eta cáquiure. Tásiha, camurianapahivare ena achaneana títecapauchanahi éma. Eta navayuchiravaripa ena achaneana, ema Jesús tíavacuhapa tayehe eta pacure, tiápajuecavapa apaesahi. Téjacapa eta máimituresirahi. Ena achaneana nanasipa tayehe eta te tachausi. ² Camuri eta máimicutichaqueneanahi eta máimitusiravacahi. Áni-pa macahe:

³ —Esamararacanuchaha. Matiarihahi ema émana achane. Tévacahi te máesane. ⁴ Eta mapaisirapahi, témiricapaipa eta evaraqui te achene. Táimahapa eta cáyure, tanicapa. ⁵ Eta mayeherepi éma eta máevasira, máevajajapaicapaipa eta apaquehe. Tásiha, eta apamuri evaraqui témiricapa te váhirichu tamitutuhini eta máteji taicha máripahi eta apaquehe. Tímarucavane-panéni táicha. ⁶ Téhesera te tíjurepa eta sache, tacapajicapa; taicha vaipa táuparevacahíni. ⁷ Tacahe, eta apana evaraqui témiricapaipa te tapare eta itapequiji. Tiúrinahinéni eta táimarusira, étasera eta itape tacachuricapa eta tajurusirahi. Táemuriachapa eta sucureca. Tanasipa, vaipa tacahihini. ⁸ Tacahe, eta apamuri evaraqui témiricapaipa te tiúrina máteji. Tijuruca-rahahi eta táimarusira. Ichapemurihi eta tahi. Eta étana, ticahipa apaesasajiruichucha. Eta apana, ticahipa tativarerehapanapa. Eta apanavare, ticahivare tétupicavapanapa. ⁹ Esamararacanu emutu éti. Te evarahapuca ecaicutiara, tavaraha eta epanerechinavaya —macahepa ema Jesús.

Ema Jesús máitametacavaca ena máimitureana eta juca máimiturapi

(Mt 13.10-23; Lc 8.9-15)

¹⁰ Tacahe, te najunijicapa ena apamuriana achaneana, témeñahavanapa eta mayehe ema Jesús ena dócequeneana apóstoleana énapa ena apamuriana máimitureana. Nayaserecapa tájahapuca tacayemahi eta máimicutiarachiravacaichucha eta máimitusiravacahi ena achaneana. ¹¹ Tacahe, majicapapa éma:

—Ema Tata tituparacanuhi nítametacahayare éti eta juca mapanereruana táequenereruana tayehe eta macuchucuirahayare eti achaneana. Mavarahahi ímatiequenehaya éti. ¹² Énasera ena apamuriana achaneana nímicutiarachinavacaichucha, apaesa vahi máejerarémahi eta nacaicutiarairaya eta nasamaquenehi. Tavaraha napanerechinavaya. Eta nacaicutiarairaya, náitsivachahini eta náitaresira, apaesa naperdonachacarepaini —máichavacapa ema Jesús.

¹³ Énerichuvare máichavarepa:

—Éti, ¿vuíchaha íturuequeneha eta juca nímicutichaquenehi? Tavaraha eta epanerechinavaya éti apanava apaesa íturuequeneha eta apamuriana nímicutichaqueneanahi. Tiuri, numetacahe: ¹⁴ Eta evaraqui eta máevaruhi ema achane tacutihi eta nímiturapiana.

¹⁵ Natiarihi ena achaneana nacuti eta apaquehe muracapahi te achene, te táemirishahi eta evaraqui. Ena nani nasamararacahi eta nímiturapiana. Émasera ema Satanás macamitisicavanepa eta nasamaquenehi.

¹⁶ Natiarivare ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehinéni nasuapa, tiúrisamureanainehi. ¹⁷ Váhisera náratamahini nacaravahuhini yátupinahíni. Vahi nácutihíni eta evaraqui tiúparehi.

Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahini te tatiarihipa eta jácani nacatichaira ena achaneana táichavenehi eta náehisiranuhi. ¹⁸ Natiarivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. ¹⁹ Napaneréquenehahinéni, tahapapiricavacahisera eta jácani táicharacavayare eta náitaresira. Tavayuacavacavare eta tájiparacana, najamurachahi tamutu. Tahapapiricavare eta navarairahi tirricuchavana. Tamutu eta juca táemeta-
vichahi eta navarairahi téhicanuana. Tamapurujihahi eta najacapirahi eta nímiturapiana. ²⁰ Natiarihisera ena apamuriana achaneana nacuti eta tiúrina máteji. Éna, nasamararacahi náunacahi yátupi eta nímiturapiana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —máichapa ema Jesús.

Ema Jesús tímitureca eta apamuriana yátupiqueneana

(Lc 8.16-18)

²¹ Tímiyanava eta máimituresirahi, áni-pa macahe: —Te viyustaca eta vimícahu, váiparinehi táuricaimahi vijihapaicahini, vinacahivarepucaini te tápecu eta vét-satsame vímasirarehi. Tacamunuhi vinacayarehi te anuquehe. ²² Jéhesare, tayanapanepuca nacayumuruqui, tamutuyarehisera ticaechera jácani tayumurevanahi. Tájjina tépacuchaimahi jácani najajairu-
vanahi. Tamutuyarehi téchacareya. ²³ Te evarahapuca ecaicutiara, tavaraha eta epanerechinavaya.

²⁴ Máichavarepa:

—Tacamunuvare epanerecha yátupina eta esamaqueneana. Te apaesarichuhi eta epanerechirahi, apaesarichuvare eta ecaicutiarairaya. Te esuapa yátupina eta nímiturapiana, ema Espíritu Santo tímitucaheya tamutu eta tacayemaquenehi. Jéhevare, tímitucaheya éma eta apamuriana yátupiqueneanahi. Énasera nácani vahi návarahahini napanerecha, váhivare nasuapa, énajivayare tíchavana ticaverejicasianaya eta nasamaqueneanahi.

Emá Jesús máimicutiarachava eta táimarusira eta evaraquiana

²⁶ Máichavacavarepa:

—Nuvaraha nímicutichinahe eta nímiturapiána nuti Manerejirunuhi emá Viya. Te yátupihí eta nasuapirahí eta nímiturapiána ena achaneana, náitsivachainapa arairuinapa eta napanereruana étapa eta nayeherepianaya eta náitaresira. Tacutihí eta máevaraquí mácani achane. Tévacahí te máesane. Tásiha, tinaracapa, macuchapayarepa eta tacahirayare eta máevaraquí. ²⁷ Tímarucapa eta evaraquiana. Tijurucavare. Emá achane, tájina macaicutiarahini eta táimarusirahí. Váhivare macaicutiarahini eta tajurusirahí. ²⁸ Taicha eta apaquehe, éta ticaimarucahí. Tacuchucahí tativa eta tapacají, táehicapa eta tanaquí. Te ticahipa, tiúchucapa eta tapiraquí. ²⁹ Te tiyahapa eta tahi, ticaechatijipa te tumare, taicha étainapa eta tacavehasiraya —macahepa emá Jesús.

Emá Jesús máimicuticha eta taquí eta mostaza

(Mt 13.31-32; Lc 13.18-19)

³⁰ Ánivare macahe:

—Puiti nuti Manerejirunuhi emá Viya, nímicutichinahe eta ichapemurivaya eti íjaracavanahí éhicanu. ³¹ Ecutiya eta ánichichaquene taquí eta sucureca ticaijare mostaza. Éta juca, ániquititavacapaná eta taquí te tamutu eta evaraquiana tatiarihiqueneanahí tayehe eta juca apaquehe. ³² Téhesera te ticaevapa, tijurucapa eta tiápajucavahí ichapepaná tayehe eta apamuriana sucurecana. Tatiarihi eta ichapetavavaca. Tásiha, tacapenajicapa eta cáyureana —macahepa emá Jesús.

Camuri eta máimicutichaqueneana

(Mt 13.34-35)

³³ Ani tacahe tamutu eta máimitusiravacahí ena achaneana. Camuriana eta máimicutichaqueneanahí. Tamutuhí ticaicutiaracarevaca nayehe ena tivarahánahí náituruequeneha. ³⁴ Tájina étahena te tímitureca, vahí macunacahini eta máimicutichira. Téhesera te macarichupa emá Jesús énapa ena máimitureana, máimicaecherachapa tamutu eta máimicutichinaqueneanahí.

Emá Jesús macaesamirica eta une eta táepacusirahí étapa eta técatícava

(Mt 8.23-27; Lc 8.22-25)

³⁵ Tacahe, te jena sache, eta máejasirahí emá Jesús te pacure, tímiturecahí. Te cáperehichichapa, máichapa emá Jesús ena máimitureana:

—Viyánaya viánueca te apachara —máichavacapa.

Tacahe, ticametavanapa nayehe ena achaneana. Tásiha, námápa emá Jesús eta te pacure. Náehicapa ena apamuriana te pacure eta napaisirapahí. ³⁷ Te ítipierecanapa, tachimaracapa eta muraca técatícava. Tépacucapa ichape eta cáquiure. Tisiapapaipahí eta une tayehe eta pacure. Tiánehipaipahí tacaericavaca.

³⁸ Émasera emá Jesús, tímacapaichucha te tahivu eta pacure te machunusi. Tásiha, nacajamicapa éma. Ánipa náicha:

—¡Tata maestro! ¡Picatiuchahavi, véricainapa! ¿Váhípuca péñamava eta viyehe? —náichapa.

³⁹ Tásiha, enurujipa téhepuca éma. Titupihapa. Manecapa eta técatícava étapa eta une. Ánipa macahe: —¡Pámatina, pésamiricava! —máichapa.

Tacahe, tíhecapa eta técatícava. Tésamiricavapa eta une. Tésamiriecavapa tamutu.

⁴⁰ Tacahe, máichavacapa ena máimitureana:

—¿Tájaha tacayema epica? ¿Váhípuca ecasiñavahini eta nutiarihirapahí eta eyehe? —máichavacapa.

⁴¹ Ena máimitureana, tétaavicavainehí eta náramirahí. Tiyaserecacanapa, ánipa nacahe:

—¡Tétaavicavapa eta máitupajijiasiravahí emá maca vímaestro! ¡Jéhesare, yátupiquene eta émairahí machichahí emá Viya! ¡Taicha tamutu tasuapahí, macamatinacahí eta técatícava étapa eta une eta táepacusirahí! —nacahepa.

Emá achane návaháruhi ena ichapemuriqueneana éreanana

(Mt 8.28-34; Lc 8.26-39)

5 Títecapanapa te apachara eta cáquiure eta te apaquehe ticaijare Gadara. ² Ánaquí tatiarihi eta ecariana. Tacahe, te tiúcupaicapa emá Jesús eta te pacure, tiúchujicavanepa emá émana achane návaháruhi ena éreanana. ³ Éma másíhapahí eta te ecarí, taicha macapenajuechavacahí eta covachana. Nájina náratahahini náitiacahini éma. Étaripa eta ichapepi cadena, vahí táratahahini. ⁴ Taicha máejeharipa nacarataca. Náitijivauchahí te cadena. Nanacavare eta grillo te mapiquí. Émasera mavenarurujica eta cadena, mavenarucavare eta mayehe grillo. Jéhesare, nájina naratahahini namansuchahini emá maca achane. ⁵ Eta máitaresirahí, eta mávirarehí tayehe eta ecarí étapa eta mávapahí te anuqueheana mari. Tamutu sácheana, yátiana, tipiararerecahí éma. Tijarachava te máriahiana. ⁶ Tacahe, tiyerehipaichaha máimahapa emá Jesús, tijunapapa mapauchapa. Máepuyumi-rauchapa.

⁷ Emá Jesús, eta máimairahí emá achane, máichapa:

—¡Pijunijica emá maca achane, piti éreana! —máichapa.

Tipiararecapa muraca eta majicapirahí emá achane. Ánipa macahe:

—¿Tájaha picha píteca pipauchanu, piti Jesús, Machichaquenevihí emá Viya? ¡Pájapanunu, vúichaha picuvanecanu ánaquí te nucaicuñaiyayare! —macahepa.

⁹ Tacahe, emá Jesús mayaserecapa emá éreana. Ánipa maicha:

—¿Tájaha píjare píti?

Majicapapa éma:

—Núti nucaijare “Nacapenaharu ena ichapemuriqueneana éreanana”. Jéhesarehí, ichapemurihavíhí víti. ¹⁰ ¡Pájapanuhavisera! Te piáquiijicahiviyarepuca,

¡vahi picuevatacavahi viyanaya te tiyerehi! —nacahepa ena éreanana tiávahácanahi ema achane.

¹¹ Tiuri puiti, tatiarihihivare eta camuriqueneanahi cúchiana. Tinihicanahi ánaqui te táemiripaisine eta masihi. ¹² Tacahe, ena éreanana tiyaseuchavanapa mayehe ema Jesús. Ánipa nacahe:

—¡Picatajicahavi! Pévatacavahi eta te táviahahi eta jena cúchiana. Písapahavi visiapahacavaca eta jénana —náichapa.

¹³ Tacahe, ema Jesús macuchuchujicavacapa eta te máquehe ema achane, máisapapa nasiapahacavaca eta cúchiana. Tatiarihi cútimahi apina mil eta cúchiana. Tacahe, te tasamapa eta cúchiana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririjicanapa tamutu.

¹⁴ Natiarihihisera ena tijaneacanainihi eta cúchiana. Te náimahapa, tiáramecanarinehi. Tiyananapa tijunapanapaipa, timetajiricanapaipa nácani nácapajiruvanapahi, étapa te avasare namutuvare nametaca. Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana.

¹⁵ Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinariipahi máichiravainihini. Ticamuirihapahivare. Tásihasera, tipicanarinehi ena achaneana. ¹⁶ Tavetijipa te náitametacapa ena tímahanihi eta táichavaquenevahi eta cúchiana te macuchuchujicavacapa ena éreanana ema Jesús.

¹⁷ Tacahe, nayaseacapa ema Jesús váhini macuitecapauchavacaini tayehe eta návasahi éna, machavavanehini te másinehi.

¹⁸ Tacahe, te tiávacuhayarepa ema Jesús, ema achane manararuhi tiyaseserecapa eta mavarairapa máehica ema Jesús. ¹⁹ Émasera, vahi máisapahini. Ánipa maicha:

—Pijanachucha pichava nayehe ena pijaneanana te piávasa. Pimetacaya eta macanarasiravihi ema Viya taicha eta majapanuiravihi —máichapa ema Jesús.

²⁰ Tacahe, tiyanapa tichava ema achane. Timetajirica-paipasera mametacavacapaipa eta máichaquenehi ema Jesús mayehe. Náraminehi namutu ena ticavasanahi eta te provincia ticaijare Decápolis.

Ema Jesús macanaraca esu machicha ema Jairo, ésupa esu apana esena sucajumaquenehivare
(Mt 9.18-26; Lc 8.40-56)

²¹ Tiuri, tichavavarepa tiánueca ema Jesús te apachara. Te títecapanapa, náurujiacavanepa ena ichapemuriqueneana achaneana te mávinehi te tachausi eta cáquiure. ²² Tacahe, títecapanapa ema émana achane ticaijare Jairo. Ema maca achane, tévavicavahi eta mapicauchacarevahi. Tuparairucahi tayehe eta náurujisirareva. Te máitecapauchapa, tépuyucapa te mamirahu ema Jesús. ²³ Mayaseacapa, ánipa máichapa:

—Tátachicha, surarihi esu nuchichasami, ticajumahi. Puiti téñamajiricavaipa ésu. Picatajicanupaini, tata.

Pinasinanu eta pivahuana suyehe apaesa sunaraca —máichapa.

²⁴ Tacahe, masuapapa ema Jesús. Tiyanapa máehicahi ema achane. Náehicavarepa ena camuriqueneana achaneana. Náevatajiricanecha éma.

²⁵ Tásiha, te nataracu sutiarhipahivare esu esena sucajumaquenehi. Doce áñoripahi eta sucajumairahi táichirahi eta suítine. ²⁶ Ichaperipa eta sucatajivairahi taicha camurianaripa ena típuchanahi médicoana. Títaharipa eta suímahaqueneanainihi. Tájinasera vahi suátivarehini. Suáviraparasiavaichuhi suvayupaichucha eta sujuma. ²⁷ Ésu, sutanucapaipahi ema Jesús, susamairiricahi eta tiáramicareana máichaqueneanahi. Supauchapa suéhiquécuchapaipahi te maquecu. ²⁸ Taicha tacahehi eta supaneruhi: “Taratachuchaini némamajiacahini eta ñimuiriha, németeaca nunaracapucaini”, sucahesamurepa. ²⁹ Tacahe, suémamajiacapa eta tacheyarapi eta mamuiriha. Jéhesaréinehi, enurujipa tíchecha eta suítine. Tisamavapa ésu eta sunarasiraipahi tayehe eta sujumainihi.

³⁰ Émasera ema Jesús macaicutiaravanepa eta sutiarahirahi esu tacanararuhi eta máitupajijiasiravahi. Enurujipa téviurucavahi te namuri ena ichapemuriqueneana achaneana. Ánipa macahe:

—¿Nájaha témamajiacanuanahi?

³¹ Tacahe, ena máimitureana náichapa:

—Tata, téñiatuhejiricacanahi namutu eta achaneana taicha ichape eta nasimutuvahi. Piyaserechavirichahava nájahapuca ena témamajiacavianahi —náichapa.

³² Émasera ema Jesús máesenimurihapa, matanucapa nájahapuca ena témamajiacanahi. ³³ Tásiha, su-pauchapa esu esena. Tiyayacarepaipa taicha tipicariipahi. Taichasuéchahi eta suíchaquenehi ésu. Suépuyumirauchavanepa te mamirahu. Sumetacapa tamutu. ³⁴ Tásiha, máichapa ema Jesús:

—Tiuri, nuchicha. Pinaracapa puiti táichavenehi eta picasiñairanuhi. Vaipa picueñamava eta pichaviraya te pipena. Vaipa tichavaimahi eta pijumainihi —máichapa.

³⁵ Téchajiricavaichahahi ema Jesús eta suyehe esu esena, títecapananecha ena tiásihanahi te mapena ema Jairo. Nametacavanepa:

—Esu pichicha tépenasamipahi. Vaipa picucamesa ema Maestro —náichapa.

³⁶ Émasera ema Jesús vahi masuapahini eta nametansirahi. Mavarahaichucha tiyana. Tacahe, máichapa:

—Vahi picueñamava, piti Jairo. Pácasiñavachucha eta nuyehe —máichapa.

³⁷ Tacahe, ema Jesús vaipa máisapahini náehica ena apamuriana achaneana. Nacarinepa ema Pedro, ema Jacobo, émapa ema Juan. ³⁸ Te títecapanapa te mape-na ema Jairo, máimahapa ema Jesús ena achaneana vaipa náitucacarahahíni, tijajamurianaripahi eta náiyairahi. Tipiararecanaripahi muraca. ³⁹ Émasera ema Jesús eta masiapirahi, máichavacapa:

—¿Tájaha tacayema eta iúrujiricavahi eta ani, íyaha-racavapa? Vahi ecuiyaha. Esu suca amaperu, váhinéni suépenahini. Tímacarichucha ésu —máichavacapa.

⁴⁰ Énaserá ena achaneana nacaecahirichucha éma, técavanapa. Tacahe, ema Jesús macuchucavacapa te aneca namutu. Tacahe, tisiapapa te suávihihi esu amaperu, émapa ema suiya, ésupa esu suena, énapa ena mapanana máimitureana. ⁴¹ Tacahe, macarata-vauchapa ésu. Máichapa:

—Nuchicha, néchajicavi. Péjamicá, péchepuca —máichapa.

⁴² Enurujipa esu amaperu téjamicapa, téchepuca. Tipaicapa te namirahu. Ichaperinehi eta náramirahi ena tímahanahi. Tásiha, ema Jesús mavanecavacapa náijaraca eta sunica esu amaperu. Matuparacavarepa muraca eta vahi nacuechajisihi eta náimahaquenehi. Esu amaperu, dóceripahi eta suhañora.

Tacahe, tiyanapa ema Jesús. Tichavapa te mapena.

Tichavapa ema Jesús te mávasa Nazaret

(Mt 13.53-58; Lc 4.16-30)

6 Tacahe, te apanapa sache, tiyanavarepa tipaica. Tichavapa tayehe eta mávasa Nazaret, mámamurihapaipa ena máimitureana. ² Tacahe, te jena sache sávarumuhuquene, tiyanapa tayehe eta náuruji-rareva nayujarasirare ena achaneana. Tímiturecapa. Camuriana ena tisamararacanahi. Ichape eta tahapa-samurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—¿Távihapuca mavínehi eta júcana máimiturapianahicacha ema máca? ¡Témunahiricavapa títipajijiacavai-pahíjicacha! ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta máichaqueneanahíji visamairiruanahi. Taicha vímatihí ema maca. Carpintérohucha éma. Vímatihivare esu maena María. Vímatihivare ema maparape Jacobo †, émapa ema José, émapa ema Judas, émapa ema Simón. Vímatihivare ena esenana maparapenevanahi, ticavasanihi ani —náichacacapa.

⁴ Ema Jesús máimatihí eta napanereruanahi. Tásiha, máichavacapa:

—Tatuparaca epicauchahaviya vimutu viti mavaneruaná ema Viya. Étisera eti nujaneananahi ecavasanihi eta te juca viávasa, étipa eti nuparapenevaneana, vahi epicauchanuhini —máichavacapa.

⁵ Éma, ichape eta máramirahi eta namasuapajiraivahi éna. Eta tacahe, tájina máimerecachihaini eta tiárami careana. Tacarichu eta macanarasirahi ena nacajumaqueneana eta máemamamahásiravacahi te mavahuana. Vahi camurianainahíni ena macanaruaruanahi.

† Ema maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenumavahi máehica ema Jesús te táequenepa eta máechepusirahi te máecari ema Viáquenu.

Emá Jesús mavanecavacapa ena dócequeneana apóstoleana napaicayare tamutu avasareana, ticametarairuanayare

(Mt 10.5-15; Lc 9.1-6)

Tacahe, ema Jesús tiyanapa mapaicahi eta avasareana máimitucavacapaipa ena achaneana.

⁷ Étana sache, macurujimurihapa ena dócequeneana mayeheana apóstoleana. Tacahe, máijaracavacapa eta náitupajijiasiravayare naratahairayare náquijica ena éreanana. Tacahe, mavanecapa tiyanana eta te apanapaneeana avasareana, apinanayarepahi eta napaisirayarepahi. ⁸ Matuparacapa, ánipa máichavaca:

—Tájina iámaimahi eta eyereruvana eta epaisiraya. Váhivare ecuama eta enirurucuha te alforja, étapa eta plata. ⁹ Étanarichuvare iámayare eta emuiriha.

Tacarichu iámaya eta eyupairiqui. Ecaeparupevayaresera. ¹⁰ Te ítecapapa tayehe eta jácani peti ítecapihaya te jácani avasare, ánasi tayehe. Te iúchuca-yarepa eta te jena avasare, epaenumava ejunijica eta ítecapihahi. ¹¹ Te váhipuca nacujacapahe te jácani avasare, váhivare nacuvamaha nacusamahe, iúchucavanezare. Étatapevachavanumayaresera eta máteji te ívapeana. Táicutiarayare eta máicuñasiravacayare ema Viya taicha eta namavarairahi najacapahehíni. Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te Sodoma étapa eta Gomorra —máichavacapa ema Jesús.

¹² Tacahe, tiyananapa ena dóceana. Ticametarairuana eta tacamunuirayarehi eta náeneuchiravaya ena achaneana, náinajica eta napecaturana.

¹³ Náimijunavacapaipa ena éreanana tiávahácanahi ena achaneana. Camurianahivare ena nacanararuana tayehe eta najumanaini, nacapajasisirapahi te nachuti eta aceite.

Emá Herodes masamairiricapa eta máichaqueneanahi ema Jesús

(Mt 14.1-2; Lc 9.7-9)

¹⁴ Tacahe, ema Herodes ema aquenucahi tayehe eta Galilea masamairiricavarepa eta máichaqueneanahi ema Jesús, taicha náechajisihahi namutu ena achaneana. Nararihi ena téjecapavanahi eta napaneruana, ánipa nacahe:

—Ema maca Jesús, ¿váhipuca émaina ema Juan Tícachasirícarahíni macaparuhi ema Herodes? Tichavahichupuca títareca. Étapuca tacahehi puiti maratahahi maicha eta tiáramicareana —nacahepa.

¹⁵ Nararihisera ena apamuriana nacahepa:

—Émapuca ema víyahaini profeta Elías, téchepucahi.

Ena apamuriana nacahepa:

—Émarichuhi profeta, macatiquenehi ena náinapureanáini antivuanaini. Váhisera téchepucaimahi éma —nacahepa.

¹⁶ Émasera ema Herodes, eta masamairirisirahi, macahepa:

—Németeacahi ema maca émaripa ema Juan, ema nímiyuchatipiquenurehi, téchepucahipuca te máecari —macahepa.

Eta táichararacavahi eta máepenirahi ema Juan

(Mt 14.3-12)

¹⁷ Eta macapasirahi ema Herodes ema Juan, ani tacahe eta táichararacavahi: Te jena año, ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacapa éna eta naviracacairahi. Éta tamicatichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanairipipa náitiaca te carenapi. ¹⁹ Esu Herodías, tétavicava eta sucatichirahi ema Juan. Suvarahahi sucapaca éma. ²⁰ Váhisera suratahahini, taicha matsirihacahi mapicauchahi ema Herodes ema Juan, taicha máechahi tétavicava eta máurivahi ema Juan. Máimatihivare eta mavaneruhi ema Viya. Eta tacahehi, macatiuchahi éma apaesa tacuija suícharaca ésu. Táitusiava, ema Herodes máuricapa masamararacahi eta máimiturapiana ema Juan; váhisera máituruequenehahini tájahapuca máichararacavayahahi. ²¹ Tacahe, eta te jena yati ticajaremuhupa ema Herodes, sucamapurapa esu Herodías eta máepiyasirahi eta ichape piesta ema Herodes. Máichuhapa ena máevanachana énapa ena oficiáleana, énapa ena ticaimahaqueneana ticavasanahi tayehe eta Galilea. ²² Te tinicanapa téranapa, esu suchicha esu Herodías tisiapapa eta te návihahi ena achaneana. Esenachiripahi ésu. Tírimaicapa te namirahu. Ema Herodes máuricainehi ichape, énapa ena machimarana. ²³ Tacahe, ema Herodes máichapa ésu:

—Nujuracha te pimirahu. Piyaseacanu tájahapuca eta pivarahaquenéna. Núti níjaracaviyare jácani piyasearunuyare, tayanapane vácuticaca eta nímahaqueneana —máichapa ésu.

²⁴ Tacahe, tiyanapa tíuchucapa esu amaperu. Suyase-repanapa esu suena, ánipa suícha:

—¿Tájahapuca eta nuyaseacaini eñi ñina Herodes? —sucahepa.

Tásiha, suíchapa esu suena:

—Píyaseacaya eta ñichuti eñi Juan, puítinarichu ñíjaracaví —suíchapa.

²⁵ Enurujipa tichava tisiapa esu amaperu eta te mávihahi ema aquenuca Herodes. Suyaseacapa éma, ánipa suícha:

—Nuvaraha píjaracanu puítinarichu eta ñichuti eñi Juan eñi tícachasiricarahi. Píjaracanu te curuja —suíchapa.

²⁶ Tásiha, eta masamirahi eta juca suyasearuihi ema rey Herodes, ichaperinehi eta mapanereresirahi. Váhisera mávarahahini mavayuacahini ésu táicha nasamaripahi ena machimarana eta máijarasirayahahi eta suyasearuyarehi ésu. ²⁷ Tacahe, enurujipa mavaneca ema suntaru eta te cárcel. Mayuchatipiquenu-

hapana ema Juan. Tacahe, mámapaipahi eta machuti-ni te curuja. Máíjaracapa esu esena amaperu. Tásiha, suíjarapanapa esu suena.

²⁹ Te nasamairiricapa ena máimitureana ema Juan, tiyananapa náepanapa eta máquehéni, náecarapanapa.

Ema Jesús máitaparahavacahi máenicavaca ena camuriqueneana achaneana

(Mt 14.13-21; Lc 9.10-17; Jn 6.1-14)

³⁰ Tacahe, tichavanapa tiúrujicavana ena apóstoleana mayehe ema Jesús. Nametacapa tamutu eta náichaqueneanapahi étapa eta najacapirahi ena achaneana eta náimiturapianahi. ³¹ Tacahe, máichavacapa ema Jesús:

—Tiuri. Tájina táichava. Puiti viyana vácarichu eta te mávapahi apaesa vinaraca ánipina —máichavacapa.

Taicha vahi téjiacavana ena achaneana. Tévacajiricacananahi tiyanana. Vahi náitujicavahini nanicanumahini ena apóstoleana émapa ema Jesús. ³² Tacahe, tiyananapa te pacure, tiávacuhanapa. Nacaijuhepa te mávapahi apaquehe. ³³ Énasera ena achaneana nanecapaichucha eta nayanirahi. Camurianahi ena tímatianahi. Tacahe, tiyananapa tijunapanapaipa, nametapanayahahi ena apamuriana achaneana. Tásiha, tiúrujicavanapa ena tiásihana te tamutu avasareana. ³⁴ Te tíucupaicapa ema Jesús, máimahapa ena camuriqueneana achaneana natiarihiripahi. Tétavica-vainehi eta majapanuiravacahi, taicha nacutihi eta uvesana nájina tijaneacaina. Tacahe, máimitumuriharipa. Camuri eta máimiturapiana. Tiuna eta máimitusiravacahi. ³⁵ Te cáperehipa, ena máimitureana napauchapa éma. Náichapa:

—Cáperehipa juca sache. Tiyerehivacahi eta pétiana.

³⁶ Tacahe, táuricapa pimetacavaca ena achaneana nayanapa, navachareca eta nanica te jácani isanitianana, avasarechichanapuca te vichacayarahanahi. Taicha ani, tájina naviyaimahi eta nanicahini —náichapa.

³⁷ Majicapapasera éma:

—Íjaraca étina eta nanica.

Éna náichavare:

—¿Pivarahapuca viyana vivachareca eta pan? Tacamunuhi vácayehihini eta camuri plata apaesa námupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —nacahepa.

³⁸ Tacahe, mayaserecapa ema Jesús:

—¿Áyana eta pan ecayehe puiti? Eyana ímaha.

Te náechapa, nametacapa:

—Cíncochichaichu eta pan, apiquipa eta jima jitaruca —nacahepa.

³⁹ Tacahe, macavanairipipa náejahahacapaicahini namutu te muíjipahi, náijamuripaichuhi. ⁴⁰ Tacahe, téjahapaicanapa ena achaneana. Náijamuripaichuhi eta náejasirahi. Cincuantanapahi, ciéntoanapahi.

⁴¹ Tacahe, ema Jesús mavehapa eta cincoquene pan étapa eta apiqui jima. Máesenicapa eta te anuma. Mahasulupayachapa ema Viya. Mayuvetutujicapa eta

pan, tásiha máijaracapa ena apóstoleana. Éna, náijaracapa ena achaneana. Énerichuvare mayuvetutuhesinavare eta apiqui jima. Tisimurivacapaipa eta náijaracapa. ⁴² Tacahe, námutu tinicana, tísatueanapa. ⁴³ Tásiha, nacaemacharichahavare eta doce saye ichapehiana táinicachavacaichahava eta náemacharajiana eta pan étapa eta jima. ⁴⁴ Camuriana ena máeniruanahi. Te nataracu, natiarihini ena cinco mílqueneana ajairana.

Ena Jesús mapaicaeca eta une
(Mt 14.22-27; Jn 6.16-21)

⁴⁵ Te tamutupa, enevanepa mavanecahi ema Jesús tiávacuhana eta te pacure ena máimitureana. Tínapucanayarehi tiánuecana te apachara eta te avasare Bet-saida. Émasera ema Jesús manasiyarehi máevatamurihanumayarehi ena achaneana.

Tásiha, tiyananapa ena máimitureana. ⁴⁶ Tacahe, te tamutupa eta macametavairahi ema Jesús nayehe ena achaneana, tiyanapa tiápanahi tayehe eta anuquehe mari. Tiyujaracayarehi tayehe.

⁴⁷ Tacahe, te tiúyatipa jena yati, ema Jesús manasirichaha macarichuhi eta te anuquehe mari. Ena máimitureana itupierecanaipa tayehe eta cáquiure. ⁴⁸ Tásiha, tachimaracavacapa eta muraca técatícava, nácapaqui hapaipahi. Te tijarahipa, ema Jesús máimahapa eta nanausirapahi muraca. Tacahe, tiyanapa macapayamuriha. Mapaicaepaipa eta une. Máetavicavacapaipasera. ⁴⁹ Éna máimitureana tipicanarinehi eta náimairahi eta mapaicaesirapahi eta une, náimijachapahi cunare. ⁵⁰ Tipiararecanapa namutu eta náimairahi.

Máechajicavanepasera éma. Ánipa maicha:

—Vahi ecupica. Nútichucha. Étumechava —máichavacapa.

⁵¹ Tacahe, mapauchapa éna. Tiávacuhapa nayehe. Tacahe, tíjahúchavapa tíchecapa eta técatícava. Náramirinehi ichape ena máimitureana. ⁵² Taicha vuíchaha nacaicutiarahini eta tacayemaquenehi eta macaejapasirahi eta pan, eta táimereuchirahi éma eta vanairucairahi me Viya. Muracasamuremurianarichaha.

Ena Jesús macanaraca ena nacajumaqueneana ticavasana te Genesaret
(Mt 14.34-36)

⁵³ Tacahe, te apanapa sache, tiápechavanavarepa tiánuecana eta cáquiure. Títecapanapa eta te avasare ticaijare Genesaret. ⁵⁴ Te tiúcupaicanapa, náitícapa eta napacure. Ena natiarihiqueneanahi náimativanepa ema Jesús. ⁵⁵ Tásiha, tiyananapa tijunapana timetajiricanayarehi tayehe tamutu eta avasarechichana tachacayarahanahi. Tacahe, tiúrujicavanapahi ena achaneana te jácani máitecapihapahi ema Jesús. Námapacapaipahi eta te áchuji ena nacajumaqueneana. ⁵⁶ Énerichuvare, te jácani mayanirahapahi te acheneana téhepuca cálleana, nanaquipaicapahi ena nacajumaqueneana. Tacahe, nayaseacapahi éma máisapirainahini náemamajiacapa eta tacheyarapi eta

mamuiraha. Tacahe, nácani témamajiacanapahi, enevanepaipa tinaracanapahi.

Ena Jesús mametaca ena achaneana eta timaepera-jicarahi
(Mt 15.1-20)

7 Tiuri, te apanapa sache, náitecapauchapa ena apamuriana fariséoana énapa ena escribánoana, tiásihanahi tayehe eta Jerusalén. Témeñahavanapa eta mayehe ema Jesús. ² Te nataracu ena máimitureana ema Jesús, nararihi éna vahi nacasipavahunumahini eta nanisirahi. Tacahe, ena fariséoana, eta náimairahi eta namaitauchirahi eta nayeherepihi, ichaperinehi eta nasemanevahi, taicha náimijarechahi “máeperaji” eta juca. ³ Taicha namutu ena israelítana, napicauchahi eta nayeherepiana ena náchucanaveanaini, navetijipa ena fariséoana. Te vahi ticasipavahunumanahi, váhivare náisapaimahi tinicana. Taicha éna vahi návaraha tánasihíni eta tachipejihini ánichichainahini, taicha tipicanahi tamaeperajicahini eta náchanevana. ⁴ Étaripa násihapahipuca te mercado, te plázapuca, te títecapanapa te napena, ticasipavahunayarehi. Maverá eta apamuri nayeherepianahi tipicauchacareanahi nayehe, étaripa eta nasipasiraparaca eta náeresiana, étapa eta jarra, étapa eta návacuruhiana étapa eta catre náimasirare.

⁵ Tacahe, nacajachapa ema Jesús ena fariséoana énapa ena escribánoana. Ánipa náicha:

—Pímaha. Ena pímitureana vahi náitauchahini eta viyeherepi. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

⁶ Tacahe, majicapapa ema Jesús, ánipa maicha:

—¡Éti ecaijarehi apimirahe! Tatupiruvahi eta máechajiriruvahi ema Viya, téchajisiahehi éti eta te Sagrada Escritura. Ánipa macahe: “Ena nani achaneana, tétserajicanuanahi te najaca; váhisera táetupicavahini te nasamureana. ⁷ Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ema Viya. ⁸ Ichape eta éjecapiravahi éti, taicha tasapihapa epicauchahi eta eyeherepiana. Étasera eta mavanairipi ema Viya, vaipa epicauchahini. Tasapihapa épuruhi eta mavanairipiana taicha tivayuacahehi ichape eta itauchirahi eta eyeherepiana. ¹⁰ Émarichuhi ema víyahaini Moisés tíájuchahi eta mavanairipi ema Viya eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Mácani tiúmehahi ema maiya ésupa esu maena, vahi tijapanucarémahi nacapacayarehi”. ¹¹ Étisera vahi epicaucha eta júcana vanairipiana mayehe ema Viya. Taicha te mararihipuca mácani achane ticamavahupuca me Viya eta máimahaqueneanahi, eta ímiturapi éti “Vaipa tatuparacaimahi ema achane

eta máimicatasiraya ema maiya ésupa esu maena".

¹³ Ani tacahehi eta ecaepahaira eta tasuapacarevahi eta mavanairipiana ema Viya. Tasapihapa, ímicapicáuchahi eta eyeherepianachucha. Jararihivare eta apamuriana eta éjecapiravanahi tavasiqueneanahi —máichavacapa ema Jesús.

¹⁴ Tacahe, máichuhapa ena achaneana, náurujicava eta máimitusiravacayare. Tásiha, máichavacapa:

—Nuvaraha esamanu yátupina, apaesa ácaicutiara.

¹⁵ Tájina timaeperajicaina eta viáchanevana te vahi vicasipavahunumahi te vinicayare. Vahi étaparacaina eta vinicaqueneana. Étasera eta jácani evainarajivana táuchureanapuca te ejaca, étapa eta evainarajipaneruana; jéhevare éta timaeperajicahahi —máichavacapa.

¹⁷ Tacahe, te tiyanaracanapa ena achaneana, macarinepa ema Jesús énapa ena máimitureana, nayaserecapa máitametacavacahini eta máimiturapi.

¹⁸ Tacahe, máichavacapa:

—¿Énerichuvare éti mapanererurehe? ¿Váhipuca ácaicutiarahini eta juca? Tamutu eta juca tasiapaqueneanahi te vijaca vinicasareanahi, vahi timaeperajicahavimahi, taicha vahi tasiapa te visamure. ¹⁹ Tatupiruhi te vijuhe. Tásiha, te tiúchucapa eta, apanapa eta táuchusihahi —máichavacapa ema Jesús. (Eta máichiravacahi eta juca, máimicaecherachapa eta táurivahi tamutu eta tinicacareana.)

²⁰ Macahevarepa:

—Étasera jácani panerercucana tamauriqueneana, te náisapavapuca ena achaneana, étara timaeperajicavacahi éna. ²¹ Taicha te amahe eta nasamureana napanerechahi eta tamauriqueneanahi. Ema achane mapanerechahi maveha esu apana esena mayena ema apana achane. Esu esena supanerechahivare suveha ema apana achane suima esu apana esena. Éna amaperuana napanerechahi eta natuhusivaya. Nácani tipanerechanahi eta ticaparecana, tiámerecana, tivayurecana, téchajihihana. Te nasamureana, najamuracha eta apayeheana, ticapinarurahiana, tétserajicavana eta nasiñavairahi. Mapicaurairahana, camuriqueneana eta napanerercucana máecharaireana.

²³ Tamutu eta juca panerercucana tamauriqueneana tiásihahi te nasamureana. Jéhesare, eta júcana eta timaeperajicahi eta náchanevana ena achaneana —máichavacapa ema Jesús.

Esu ésuna esena apavasana sucasiña ema Jesús

(Mt 15.21-28)

²⁴ Tacahe, tiyanavarepa tipaica ema Jesús, énapa ena máimitureana. Nacaijuheyarehi eta avasareana táunavanahi eta provincia Siria. Tásiha, títecapanapa te jácani peti. Váhisera mávarahahini náechahini ena apamuriana achaneana eta matiarahirahi. Tásihasera náecharichucha éna. ²⁵ Tacahe, susamairiricapa esu ésuna esena. Ésu, apavasana, sirofeníciana. Eta suéchejiriruva eta griego. Esu suchicha mávaháruhi ema émana éreana. ²⁶ Títecavanepa esu, suépuyumi-
rauchapa te mamirahu ema Jesús. Tiyaseuchavapa

mayehe ema Jesús eta máimijunijicahini ema éreana suyehe esu suchicha. ²⁷ Tacahe, máichapa esu:

—Nativaya néchapajiricavaca ena nujaneanana.

Taicha vahi táuricahini ásapihahíni néchapajiricahehini éti apavasana, émétavichahini ena nujaneanana —máichapa.

²⁸ Esu esena sujicapapa:

—Énehineni tacahehi, tátachicha. Yátupihi vahi pijaneananuinahini. Pájapanunusera, picatajicanuchuchaini. Víti apanava vácasiñavahini eta piyehe eta vítátijivairaina —suíchapa.

²⁹ Tacahe, máichapa ésu:

—Tiuri eta péchajiriruva. Pijanapa pichava te pipena. Táichavene eta picasiñairanuhi, nímiijunijicaripa ema éreana suyehe esu pichicha —máichapa.

³⁰ Tacahe, tichavapa ésu te supena. Suchimapapa tívecahi esu suchicha te sucamane. Jéhesaréinehi, májinaripa ema éreana, majunijicaripa ésu.

Ema Jesús macanaraca ema túhuquiña upa

³¹ Tacahe, tiyanavarepa tipaicana najunijicapa eta provincia Siria. Nánucuhapa eta provincia ticaijare Decápolis. Tacahe, títecapanapa eta te tachausi eta cáquiure Galilea, te tinapaica te táuchusine sache.

³² Tacahe, ena achaneana námapa ema émana achane mayehe ema Jesús. Túhuquiña, úpavare ema achane. Náechajichapa eta manaca eta mavahu mayehe ema achane, macanarasirayarehi. ³³ Tacahe, ema Jesús mañajichapa ema achane nayehe ena achaneana. Manacapa eta masuveraqui te maquiñana. Tacahe, tiátutuquivauchavapa. Tásiha, máemamacapa eta manene ema achane. ³⁴ Tacahe, máesenicapa te anuma. Tiúmitipa. Tacahe, máichapa:

—¡Téchujihapa eta piquiñana!

³⁵ Enurujipa tisamarahipa ema achane. Tijimuyapa eta manene, tiúripa téchejica. ³⁶ Tacahe, máimichavapa ema achane nayehe ena majaneanana. Matuparacapa éna eta nacuija nametaca. Énasera timetajiricanaichucha. ³⁷ Tétavacava eta náramirahi ena nametaruani. Ánipa nacahe:

—Tétavacava táuricacareva tamutu eta máichaqueneanahi ema Jesús. Téchajicanapahi ena úpana, tisamarahianavarepa máicha ena túhuquiñana —nacahepa.

Ema Jesús tiápechava máenica ena achaneana

(Mt 15.32-39)

8 Tacahe, eta juca sácheanahi tiúrujicavanapa ena ichapemuriqueneana achaneana te mávihahi ema Jesús. Mapanaripa sache nacahehi ena achaneana, tájinaipa nanicahini. Tacahe, máichuhavacapa ema Jesús ena máimitureana. Máichapa:

² —Nujapanuvaca ena nani achaneana, taicha mapanaripahi sache puiti eta nacahehi eta viyehe. Tájinaipavare naviyahini nanica. Téchurihanaripa eta nanicaquene. ³ Te névatacavaca nayana te napenana, machu náquipaicava te achene taicha vaipa túmeva-

caimahi eta náecuavahi. Taicha natiarihi ena tiásihanahi te tiyerehiana. Vénicavacayare —máichapa.

⁴ Tacahe, najicapapa ena máimitureanahi. Ánipa naicha:

—¿Távihapucaini viviyahini eta vénisihayarehi ena nani camuriqueneana achaneana? Eta te juca mávapa-pahi vámahí, tájina vítusiávámahi eta tinicacareana —nacahepa.

⁵ Tacahe, mayaserecapa éna. Ánipa máicha:

—¿Áyanachaha eta pan eta íaмаqueneanapahi?

—Jucarihi siéterine —náichapa.

⁶ Tacahe, macavanairipipa eta náejahapaimuriahini namutu ena achaneana. Tacahe, mavehapa eta siétequene pan, mahasulupayachapa ema Viya te anuma. Tásiha, mayuvetucavacapa, máijaracapa ena máimitureana. Éna, náijaracavacapa ena achaneana.

⁷ Tatiarihivare eta ánimurichicha eta jímachichana. Mahasulupayachavare ema Viya tayehe eta jima. Tacahe, mavanecavarepa eta náijarasiravacayare ena achaneana. ⁸ Tacahe, tinicanapa namutu, tísatuehapanapa. Tacahe, nacurujicapa eta náemacharájiana. Siete sáyericahahivare eta náemachana. ⁹ Eta nasimutuvahi ena tinicanahi táetavica eta cuatro mil achaneana. Tacahe, te tamutupa eta juca, máevatamuríhasarepa ema Jesús ena achaneana nayanaya nachava te napenana. ¹⁰ Enurujipa tiávacuhanapa te pacure ema Jesús énapa ena máimitureana. Tiyanavarepa. Tiánuecana nacaijuhepa eta te avasare ticaijare Dalmanuta.

Ema Jesús macajachavaca eta namasuapajiravahi ena fariséoana

(Mt 16.1-4; Lc 12.54-56)

¹¹ Tacahe, títecapanapa ena apamuriana fariséoana. Tépanavanapa nacanarajirica ema Jesús. Eta navarairahi náimiaquipaicayarehi, nayaseacapa máimerecaini eta tiáramicareana, máimerecavahini te yátupihipuca vanairucahi me Viya. ¹² Tásiha éma, tichuruamichavarime muraca. Tacahe, máichavacapa:

—¿Tájaha tacayema eti achaneana eyaseacanu nímereca eta tiáramicareana? Núti nímatihe. Vahi esuapanuimahi te nímerecapucaini eta tiáramicare. Tásiha, váiparine étina tatuparaca ímahahini eta tiáramicareana —máichavacapa.

¹³ Tacahe, majunijicavacapa éna. Tiyanavarepa tiávacuha te pacure. Tiyananapa tiánuecana te apachara eta cáquiure.

Ema Jesús máimicuticha eta levadura eta apimirairanahi ena fariséoana

(Mt 16.5-12)

¹⁴ Tiuri puiti, náemitisicahi ena máimitureana eta nanirurucuha. Tatiarihiserahera eta étanahi pan eta te pacure. ¹⁵ Eta nayanirahi, máimitumurihapa ema Jesús éna. Máichavacapa:

—Tímaticarehi eyehe eta levadura eta tasisijisira tamutu eta masa. Tacutirichu eta tapareasirahi eta apimirairavacahi ena fariséoana étapa eta tacañama-

rasira eta ecaimahaquenerayare. Vahi ecucuti ena políticoana. Échapaváicha tayehe, machu éhica éna —máichavacapa.

¹⁶ Tacahe, náichacacapa ena máimitureana. Ánipa nacahe:

—Tímicajachahavihi eta vémitisisirahi eta pan. Eta tacahe, macahehi tayehe eta levadura.

¹⁷ Éma máimatiacavacapa. Tásiha, máichavacapa:

—¿Tájaha tacayema ecahechajiruvahi eta émitisisirahi eta pan? ¿Vuíchahacaru ácaicutairahini? ¿Tájina-caruichaha epanereruina éti? ¿Muracachutiherichaha?

¹⁸ Tamapurujichuchapuca eta ímairahi eta níchaqueneana. ¿Vuíchahacaru ácaicutiarahini? Tamapurujipuca eta esamirahi eta nímiturapiana. ¹⁹ ¿Váhivare échahini eta nucaejapasirahi eta cincoquene pan, naniruhi ena cinco mílqueneana achaneana? ¿Áyanahi sáyeana eta náemacharajiana evehaqueneanahi? —máichavacapa.

Tacahe, najicapapa:

—Doce sáyeana.

²⁰ —Étapa eta siétequene pan naniruhi ena cuatro mílqueneana achaneana, ¿áyanahivare sáye eta náemacharajianahi evehaqueneanahi? —máichavacapa.

Najicapavare:

—Siete sáye —náichapa.

²¹ Tacahe, máichavacapa:

—¿Vuíchahacaruva ácaicutiara? —máichapa.

Ema Jesús macanaraca ema émana achane púchuqui eta te avasare Betsaida

²² Tiuri, títecapanapa eta te avasare Betsaida. Ánaqui, námapa ema achane púchuqui. Náechajiuchapa éma eta macanarasiraya ema Jesús. ²³ Tacahe, ema Jesús macaratavauchapa ema púchuqui, mámapa te tachachacu eta avasare. Tacahe, mayajihauquichapa eta mátureta eta te máuquihana. Tásiha, manacapa eta mavahuana eta te machuti. Tásiha, mayaserecapa:

—¿Pímairiricapa? —máichapa.

²⁴ Tacahe, téseninicapa ema púchuqui. Macahepa:

—Nímairiricapa apaesa. Eta nímairahi ena achaneana, ticutimahichuchasera yucuquiana, tiyamuricanahisera —máichapa ema púchuqui.

²⁵ Tacahe, ema Jesús mápechavare manaca eta mavahuana eta te máuquihana ema púchuqui. Te mavehapa eta mavahuana, yátupipa tijarahipa eta máimairirisirahi. Tamutupa máimaha. ²⁶ Tacahe, ema Jesús máevatacapa ema púchuquinihi, mayanapa te mapena. Máichapa:

—Piyanapa pitupiru te pipena. Váhisera picusiapa eta te jena avasare eta piyanihaya —máichapa.

Ema Pedro máimereucha ema Jesús émairahi ema Cristo

(Mt 16.13-20; Lc 9.18-21)

²⁷ Te táequenepa eta juca, tiyanavarepa tipaica ema Jesús, énapa ena máimitureana. Nacaijuhepa eta te avasarechichana tachacaya eta ichape avasare ticaijare Cesarea, máepiyaruihi ema rey Felipe. Eta napaisi-

rapahi, mayaserecapa ena máimitureana. Ánipa maicha:

—¿Tájaha nacayema ena achaneana eta nuyehe? ¿Nájahanuhipuca náimijachanuhi núti? —máichavacapa.

²⁸ Tacahe, najicapapa:

—Ena apamuriana náimijachavihi téchepuca ema Juan Tícachasiricarhini. Ena apamuriana tímijachavianahi ema víyahaini profeta Elías, téchepucahi éma. Ena apamuriana tímijachavianahivare ema mácani apana profetai antívuini, téchepucahi —náichapa ena máimitureana.

²⁹ Tacahe, tiápechavavare mayaserecavaca:

—Étiyapa, ¿nájaha ímijachanuhi núti?

Majicapavanepa ema Pedro:

—Pítira yátupiquenévihí Cristo —macahepa.

³⁰ Tacahe, matuparacapa muraca éna, nacuija nacumetaca eta émairahi ema Cristo.

Ena Jesús tímereuchava eta máepenirayare

(Mt 16.21-28; Lc 9.22-27)

³¹ Tacahe, tépanavapa máimitucavacahi eta táicharacavayare eta máepenirayare. Ánipa maicha:

—Nuti Manerejirunuhi ema Viya, nutuparahaichuhi ichapemuri eta nucatajivairayare. Tépurunanayare ena tuparairucana énapa ena aquenucarhana. Éna, tímicapacuanayareva. Mapanayareichuhisera sache eta nucaheyare eta népenirayare. Tásiha, nuchavayahéhi néchepuca —macahepa.

³² Máimicaecherachapa eta macayemaquenehi. Tacahe, ema Pedro máiputsiacapa ema Jesús. Ánaqui macajachapa, máijarasiravahi eta mapanereruhi.

³³ Tacahe, téviurucavapa ema Jesús. Máesenicapa ena apamuriana máimitureana. Tásiha, macajachavarepa émapava ema Pedro. Máichapa:

—Píti, téjcapavahi eta pipanereruhi. ¡Pínajica eta juca tauriquenehi! Pivarahapa pihapapica eta mapanereruhi ema Viya. Eta juca pipanereruhi tacutihí eta mapanereruanahi ema Satanás, énapa ena machanerana —máichapa.

³⁴ Tacahe, máichuhavacapa ena máimitureana énapa ena apamuriana achaneana. Máichavacapa éna:

—Nácani navaraha náhecanu, tacamunu náinajica tamutu eta tihapapirica eta náehisiranuhi. Nacaravahuyareva eta nímiturapiana. ³⁵ Nácanisera téñamanahi eta náitaresira, tiávamirahuanaya eta náehisiranu, énajivayare ticamitiequenehavanaya eta náitaresira. Énaserá nácani yátupi tíjaracavana téhicana eta náehisiranuhi, étapa eta námirahi eta tíurina échajirirucava, tayanapane táimicapacavacapuca, éna títujicavanayare tíuchucuhayare eta náitaresiranaya. ³⁶ Énerichuvare nácani tacañamararuanahi eta nacaimahaquenéraya te juca apaquehe, tíñehiyare eta náitaresira taicha eta tacañamarasiravacahi tahapapiricavacahi tayehe eta náuchucuirayarehini. Tiyananainapa eta te yucu nacaicuñaiyayare. ³⁷ Taicha vahi máratahaimahi mácani achane mavachachahini eta máurivaya te apana vítaresira. ³⁸ Énaripa nácani titsiriha-

napuca téhicanuana, náimitsirihapuca eta nímiturapiana te namirahuana ena achaneana mapicauruirahana pecatumareana, núti apanava nutsirihayareva nayehe ena nani. Nucaerajicainapa ena nani, nuti Manerejirunuhi ema Viya, te táitecapapa eta sáche-yare nuchavirayare aquenucanuinapaipa. Te jena sáche-yare, námainapaipa núti eta majaraiya ema Tata, nucachanénapaipa ena sántoqueneana ángeleana.

9 Énerichuvare máichavacapa:

—Nutupiruva numetacahe: Puítiripa te etaracu éti etiarihi éti vahi épenavanémahi, ímahanunumaya eta táepaniraya eta nítipajijasiravahi eta nucatuparahairahi aquenucanuya me Viya —máichavacapa.

Ena Jesús tihapamaichava eta máimahi

(Mt 17.1-13; Lc 9.28-36)

² Tiuri, sáisipa sache eta nanasirahi ánaqui. Tacahe, ema Jesús manaquicavacapa ena máimitureana. Nacarinehi máma ema Pedro, ema Jacobo, émapa ema Juan. Tiyananapa eta te étana mari anuquehepana. Nacarichu éna. Eta ánaqui, náimahapa tihapamaichavahi eta máimahi ema Jesús te namirahu éna. Tétavicavapa eta tajapuvahi tajararasirahi tamutu eta máquehe. ³ Eta mamuiraha, táetaviucha eta tajanunumehirahi. Nájina tiratahaina tépachinacha tajanunumecahini náicha eta muíriare. ⁴ Tacahe, tíamicareanavarepa tímerecavana ena apina ajairana: ema víyahaini profeta Elías émapa ema víyahaini Moisés. Téchajiricavanaripahi mayehe ema Jesús. ⁵ Tásiha, ema Pedro tímisiapavapa, téchajicapa ema Jesús. Ánipa macahe:

—Tata Náquenu, tétavicavapa táuricacareva eta viávihairahi eta ani. Tiúripanahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

⁶ Váhinéni máimatiequenehaini ema Pedro tájahahipuca eta mavarahaquenehi macayema. Namutu tíñacavana ichape ena mapanana máimitureana. ⁷ Tacahe, tíamicarevarepa eta úcaji táepacúmurihahi éna. Nasamavarepa eta mahu ema Viya tayehe eta úcaji. Ánipa macahe:

—Ema maca, ema yátupiquenehi nuchicha némunaruquenehi. Éma esuapayare —macahepa.

⁸ Tíjuhúchavavarepa, te náesenicavarepa, macarinehi ema Jesús. Nájinaripa ena apinana náimahaqueneanahi.

⁹ Tacahe, te tichavanapa tíúcupaicanavarepa, ema Jesús matuparacavacapa éna. Ánipa maicha:

—Vuíchaha ecumetajirica eta juca ímahaquenehi puiti. Tiámainucava te néchepuca te nécari núti —macahepa.

¹⁰ Tásiha, nasuapa eta matupararuhi. Napanerequenehahisera eta macayemaquenehi. Tiyaserejiricanapa:

—¿Tájahapuca tacayemarihi eta máechepusirayare te máecari? —nacahepa.

¹¹ Te tichavanapa tayehe eta anuquehe mari, nayase-recapa éma, ánípa naicha:

—Ena escribánoana tímitucanahi eta machavirayare tiápechavaya títareca ema víyarahaini Elías, títapucayarehi eta pímeresiravayarehi piti Cristo. ¿Énapuca téjcapavanahi ena escribánoana? —náichapa.

¹² Majicapapa ema Jesús:

—Yátupi, ema víyarahaini Elías títecapayarehi, máetupiripanayarehi tamutu. Nútisera numetacahe: Títecaripahi ema Elías, váhisera náimatihini ena escribánoana. Váhivare najacpahini ena tuparairucana éma. Nacatianacahisera nacapacahi éma, tacuti eta táechajisihaqueneanahi eta Sagrada Escritura eta máichavaquenevayarehi éma. Ene nucaheyare nútí Manerejirunuhi ema Viya. Ticatianacuanayarehivare, tépurunuanayarehi. Ichape eta náemecatajichiranuyare eta náimicapasiranuya, tacutihi eta táechajisihaquenehi eta Sagrada Escritura eta nuyehe —máichapa ema Jesús.

**Emá Jesús macanaraca ema amaperu mávaháruhi
ema éreana**

(Mt 17.14-21; Lc 9.37-43)

¹⁴ Tacahe, te tichavanapa éna te návihahi ena apamuriana máimitureana, natiarihihi ena camuri-queneana achaneana te nachacaya. Natiarihivare ena apamuriana escribánoana, nacanarajiricavacahi ena máimitureana. ¹⁵ Eta náimairahi ema Jesús, náraminehi ena achaneana. Tijunaparacanapa namutu náechajipanaya. ¹⁶ Te títecanapa te návihahi ena máimitureana, ema Jesús mayaseremurihapa éna. Ánípa maicha:

—¿Tájaha eta ecanarajiricavacahi ena nani escribánoana? —máichapa.

¹⁷ Tacahe, tiúchujicávanepa ema émana achane. Majicapapa, ánípa maicha:

—Tata maestro, picatajicanu. Námapahi piyehe ema maca nuchichasami. Éma, vahi téchajica maicha ema éreana. ¹⁸ Mavarahapa jácani ema éreana, máijahúchava máquipaicahi ema nuchicha. Tásiha, ema amaperu ticarisasajacapa, tinirataquiahechavapa muraca. Tivirajipa máicha ema éreana, muracaquihevarepa. Nuyaseacahi ena pímitureana eta náimijunairayarehini ema éreana. Váhiserá náratahahini —máichapa ema achane.

¹⁹ Tacahe, máichapa ema Jesús:

—¡Tétavícava emasuapajiraivavaca eti achaneana! ¡Cúverarecachasacaini eta nucamichirahénahini! Iámani ema amaperu —máichapa.

²⁰ Tacahe, náepanapa ema amaperu. Te máimahapa ema éreana ema Jesús, enurujipa macaeñamaca ema amaperu. Tacahe, tiáquipaicavapa te apaquehe. Téchariripáicavapa ticarisasajacapa. ²¹ Tacahe, mayaserecapa ema Jesús ema maiya ema amaperu. Macahepa:

—¿Tiyeriripahipuca eta juca máichavaquenevahi? —macahepa.

Majicapapa ema achane:

²² —Te amuyarichaha. Máejeharipa máquipaica ema mara éreana te yucu téhevere une, taicha mavaraha macapaca éma nuchicha. Pítisera, te piratahapucaini, pájapanuhavini picatajicahavisamíni —macahepa ema achane.

²³ Majicapapa ema Jesús:

—¿Tájaha picayemaquene eta píchanuhi eta te nuratahahipucaini nútí? ¡Pítinapucaini, te pirataha! ¡Pá-casiñanu! ¡Tamutu títujicacare te ecasiña eti achaneana! —máichapa ema Jesús.

²⁴ Enurujipa majicapa ema achane. Tijaranu eta majicapirahi, ánípa macahe:

—¡Nucasiñavi, tata! ¡Pímicatacanu eta néchuriasirahi eta nucasiñairavaina piyehe! —macahepa.

²⁵ Tacahe, máimahapa ema Jesús ena achaneana tiúrujicavanaripa mayehe. Tásiha, macajachapa ema éreana, ánípa maicha:

—¡Piti váinaraji, piti péтуhuquiñarahi, úpahi pícha éma! Nútí nuvanecavi: ¡Pijunijicayare ema maca amaperu! ¡Vaipa picuchavaucha ema maca! —máichapa ema Jesús.

²⁶ Tacahe, tipiararecapa ema éreana. Mavayuyujicapa tiyayacare ema amaperu máicha. Tacahe, majunijicapa ema amaperu. Ema amaperu ticutipá máepenaquene. Tacahe, nacahepa ena achaneana:

—Tépenasamipa —nacahepa.

²⁷ Tacahe, ema Jesús macaratavauchapa, macaeche-pucapa ema amaperu. Tacahe, titupihapa ema amaperu, tiúripa. Tájina máichava.

²⁸ Tacahe, te táequenepa, náiputsiacapa ema Jesús ena máimitureana. Nayaserecapa:

—¿Tájaha tacayemahi eta vahi váratahahini vicuchahini ema éreana mayehe ema amaperu? —náichapa.

²⁹ Tacahe, majicapapa éma:

—Ema maca éreana, muracapanahi éma. Eta ecuchusiraina ena nani macutiqueneanahi tavaraha íchanumayare eta eyujarasiraina étapa eta íchiraya eta ayuna —máichapa.

Tiápechavavare ema Jesús tímereuchava eta máepenirayarehi

(Mt 17.22-23; Lc 9.43-45)

³⁰ Tacahe, tiyananavarepa tipaicana. Nánucuhapa eta provincia Galilea. Vahi mávarahahini ema Jesús eta nasamairiricahini ena achaneana eta nánucuirahi éna, machu nahapapiricapucaini eta máimitusiravacahi ena máimitureana. ³¹ Eta máimitusiravacahi, ánípa macahe:

—Nuti Manerejirunuhi ema Viya, járajapainapa eta sácheyare eta máijarasiránuya mácani achane nayehe ena ticatianacuananahi. Ticaratacuanayare, ticapacuanayareva. Téhesera te mapanaquenénapa sache eta népeniraya, néchepucayare —macahepa.

³² Énaserá ena máimitureana váhiquene nacaicutia-rahini eta macayemaquenehi. Natsirihacapasera nayaserecahini.

¿Nájahapuca ema apóstole ticapicahupana?

(Mt 18.1-5; Lc 9.46-48)

³³ Tacahe, títecapanapa eta te avasare Capernaúm. Te peti náitecapihahi, mayaserecavacapa ena máimitureana. Ánipa macahe:

—¿Tájahapuca eta ejicapaemaracacahi eta epaisirapahi te achene? —macahepa.

³⁴ Tásiha, vahi najicapahini, taicha vahi návarahahini náimereuchavahini eta najicapaemajiricacairapahi eta nájahairayarepuca mácani ticapicahupana. ³⁵ Tásiha, téjacapa ema Jesús. Máichuhamuripa ena dócequeneana eta napauchirayare náejaca eta te machacaya. Tacahe, máichavacapa:

—Nácani navarahahi ticapicahupananayare te etaracu, tavaraha náechapajiricavaca namutu ena nachamuriana. Nacachuricayare eta náemunaraivahi nayehe ena apamuriana —máichavacapa.

³⁶ Tacahe, máichuhapa ema émana amaperuchicha. Majupacapa te namirahu éna. Tacahe, máichavacapa:

³⁷ —Nácani tijacapanayare ena amaperuana níchavenénahi núti, ena nani yátupi náimerecaya eta náemunasiranuhi núti taicha tímicutijiricavahi nútinahini najacapa. Taicha nácani tijacapanuanahi núti, énerichuyareva tacahehi eta najacapirahi ema Ticachichanu, ema tivanecanuhi —máichapa.

Tímicatacavahanahi nácani vahi ticatianacavahiana

(Lc 9.49-50; Mt 10.42)

³⁸ Tacahe, ema Juan mametacapa, ánipa máicha:

—Tata maestro, vímahahi ema émana achane máquijicavacahi ena éreanana te píjare ticutirinehi pítinahini píjaraca eta máitupajijiasiravahi. Tásihasera vicavacahi éma, taicha vahi viúmurvainahini —máichapa ema Juan.

³⁹ Émasera ema Jesús máichapa:

—Vahi ecucavaca éma. Taicha te máichahipuca ema mácani eta tiáramicare, mámapicahi eta níjare, vahi macaecahinuhini. ⁴⁰ Tímicatacavahanahi nácani vahi ticatianacavahanahi. ⁴¹ Jéhesare, nácani ticumpirachaheana eta une éti étaripa táichavenera eta étirahi nuchaneranairahahi nuti Cristo, vahi námapurujimahi. Yátupihí ticavachaequeneanayarehi éna —macahepa.

Ichape eta máicuñayare mácani tímiaquipaica te pecatu ena amaperuana

⁴² Tímiyanava eta máimituresirahi ema Jesús, ánipa macahe:

—Tacutiquene mácani tímiaquipaicaya nácani ena téhicanuanahi mánsuqueneanahi. Tiúripanahipucaini tájihúchavahini máepenahini mativainahini éma. Váhirichupucaini macucaicuñahini, taicha vahi macuimiaquipacahini ena téhicanuanahi —macahepa.

Ecunevaicha ichape, machu náepujuquichahe eta te yucu máemahacacaquene

(Mt 18.6-9; Lc 17.1-2)

⁴³ Énerichuvare máichavacapa:

—Jéhevare, te tavarahapuca táimipeaturachaheyare eta evahu, tapamisirahénapapuca íchayare eta tauriqueneana, tiúripana eyuchatica, apaesa vahi tacuímiaquipaicahe tayehe eta pecatu. Étaripa eta ívape, te tavarahapuca támahe íchayare eta tauriqueneana, tiúripana eyuchaticavare, apaesa vahi tacuímiaquipaicahe tayehe eta pecatu. Étaripavare eta iúquiha, te tímiaquipaicahepuca tayehe eta pecatu, tavarairahi táimahayare eta tauriqueneana tájiparacana, tiúripana evecuhauquichava. Taicha tiúripana eta ejacapacarehi éti eta esiapiraina eta te mávasa ema Viya, tayanapane táejicavapuca eta iáquehe. Páurehesamisera éti, te náepujuquichahepuca eta te yucu infierno, tayanapanéni tamutuchahahini eta iáquehe. Taicha ánaqui máemahacacaquenehi eta yucu. Máitavacaca eta ecatajivairanayare. ⁴⁹ Tacuti eta vépurarajica eta icheve eta viniru, ene nacaheyare ena tiyana te yucu, ticaepuraracasianayare tayehe eta yucu.

Vahi ecuisapa táepaha eta ecamunucarevahi

(Mt 5.13; Lc 14.34-35)

⁵⁰ Eta icheve, tétavicavahi eta táurivahi, taicha ticamunucarehi. Ene ecaheyare éti eta ecamunucarevahi eta nayehe ena achaneana. Váhi tacuepaha eta ecamunucareva. Vahi ecucuti eta tajachira eta icheve, taicha tájina eta táichevevainahini. Tacuijavare tahapapicahe eta iúrivahi —máichapa ema Jesús.

Ema Jesús tímítirecahi, máechajisihahi mácani achane tínajicahi esu mayena

(Mt 19.1-12; Lc 16.18)

10 Tacahe, tiyananavarepa tipaicana te tinapaica te vana. Nánucuhapa eta provincia Judea. Tásiha tiánuecanapa eta te apachara eta cajacure Jordán. Ánaqui tiápechavanavare tiúrumurivavana ena ichape-muriana achaneana te jácani máitecapihapahi ema Jesús. Tásiha, tímítirecavare éma, taicha tacahehi eta mayeherepihi. ² Tacahe, náitecapauchapa ena apamuriana fariséoana. Natanucahi eta ticaviureyarehi ema Jesús. Ánipa náicha:

—Vivaraha pimetacahavi ¿te táuricapuca máinajica ema achane esu mayena?

³ Tásiha, ema Jesús mayaserecavarepa ema apana: —¿Tájahasica eta tacayema eta mavanairipi ema víyahaini Moisés? —máichapa.

⁴ Najicapapa éna:

—Ema víyahaini Moisés máisapahi ema suima máejerare eta máinajisira esu mayena. Macavanairipiser májucha eta ajureca tayehe eta náinajicacaira. Tásiha, eta máijarasirahi ésu eta juca ajureca, máinajica ésu. Tásiha, vaipa mayenainahini —nacahepa ena fariséoana.

⁵ Tacahe, ema Jesús máichavacapa éna:

—Ena iáchucanaveanaini, te jácani eta nasemairahi, náinajica ena nayenana. Ema víyarahaini Moisés máis-apahi tínajicacana táichavenehi eta namuracasmurevanahi éna, vahi náimitucarehini táicha. ⁶ Váhisera máuricahini ema Viya eta náinajicacahini. Taicha te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayarehi. ⁷ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títaticacanayare. Eta navehacacairahi, tímicutijiricavaipa étanarinehi eta náqueheana” tacahepa. Éna, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini eta náinajicacairahini. ⁹ Eta tacahe, mácani máinajicahi ema mayena, éma máepuruhi eta juca mavanairipi ema Viya —máichavacapa.

¹⁰ Te táequenepa, nacarichuipahivare ena tayehe eta peti náitecapihahi, ena máimitureana nayaserecapa ema Jesús tayehe eta juca máechajirivanahi. ¹¹ Tacahe, máichavacapa éna:

—Te máinajicapuca esu mayena mácani achane, eta maviraya esu apana esena, ticapecaturaipa éma me Viya. Ichapevare eta máejecapiravahi suyehe. ¹² Tacutiquene súcani esena, te suínajicapuca ema suima, eta suviraya ema apana achane, ticapecaturaipavare ichape ésu —máichavacapa.

EMA JESÚS MAYUJARAUCHA ENA AMUYANA

(Mt 19.13-15; Lc 18.15-17)

¹³ Tacahe, ena achaneana námavacapaipahi ena amuyana eta mayehe ema Jesús. Navarahahi máemamahacavacayarehi éna, mayujaravacahivaréni. Énasera ena máimitureana vahi náisapahini. Nacaichepaicapa ena tiámanapahi ena amuyana. ¹⁴ Te máimahapa ema Jesús eta nacaichepaisirahi, tisemapa. Tásiha, máichavacapa ena máimitureana:

—Ésamiricachucha ena amuyana, náitecaichaha eta nuyehe. Vahi eucacichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna. ¹⁵ Nutupiruva numetacahe: Nácani vahi nácutihini ena amuyana eta nasuapajiraiva, vahi nuchaneranimahi —macahepa.

¹⁶ Tacahe, majupacavacapa ena amuyana. Máemamasicavarepa, mayujaravacapa.

EMA ACHANE RICO TÉCHAJIRICAVA MAYEHE EMA JESÚS

(Mt 19.16-30; Lc 18.18-30)

¹⁷ Tiuri, te apanapa sache, tiyananavarepa. Eta napaisirapahi, macahepaipa ema émana achane. Tijunapaipahi. Matupiru máepuyumiraucha te mami-rahú ema Jesús. Mayaserecapa, ániapa maicha:

—Tata maestro, piti piúrique ne ¿Tájahapucaini eta nícharacavahini eta nítujisiravaina me Viya máichecua-raquirénahini eta nítaresira? —máichapa.

¹⁸ Ema Jesús majicapapa:

—¿Tájaha tacayema pímijsarechanu “Piti piúrique ne”? Mararihi ema Viya. Jéhevare éma, tétavicavahi eta máurivahi. ¹⁹ Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Píti pímatipa eta júcana: “Vahi picucapareca. Váhivare picuveha esu esena apayena. Váhivare picuamereca. Nacuija pépiyáequeneruina. Váhivare picuvayuareca. Pipicauchayareva ena ticachichaviana” —máichapa.

²⁰ Tacahe, majicapapa ema achane:

—Tata, tamutu eta juca vanairipiana nusuapahi nítauchahi eta námaperuvahi, puíticha juca ajairairanui —macahepa.

²¹ Tacahe, ema Jesús máimararacapa ema achane, máemunacainehi. Tásiha, máichapa:

—Jucarihichaha eta pítauchaqueneyare. Piyana, píjararecaya tamutu eta pímahaqueneana. Tásiha, píjaracavacapa ena páureana. Jéhevare eta, pijacapayare eta pímahaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

²² Tásiha, témahasamurerinehi ema achane taicha eta macayemaquenehi ema Jesús. Ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanachucha.

²³ Tacahe, máesenicapa ema Jesús ena máimitureana natiarihueneanahi te machacaya. Tacahe, máichavacapa:

—Yátupiquenehi máitujiana eta náijarasiravainahini eta náehisiranuina ena rícoana eta nasiapirainahini te anuma —máichapa.

²⁴ Ema máimitureana náramine eta nasamirahi eta máechajirivana. Tásiha, mápechavacapa máicha: —Nuchichanaveana, esamanu. ¡Máitujiquenehi eta náijarasiravainahini téhicanuana ena ticasifanahi eta nacaimahaquenerahi! ²⁵ Eta juca tímicutijiricavahi eta vipera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

²⁶ Tásiha, náramine ena máimitureana, eta nasamirahi eta juca. Náichapa:

—¡Tétavicavahi eta tamaitujicacarevahi! ¡Nájina títujicavaimahi náuchucuhahini!

²⁷ Tacahe, máimararacavacapa ena máimitureana. Tásiha, máichavacapa:

—Nájina émanaina achane émajivainahini ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya, tamutu marataha —máichapa.

²⁸ Tacahe, máichapa ema Pedro:

—Vítisera, Tata, vinaquicahi tamutu eta vicayehequeneana, vivarairahi véhicavi —máichapa.

²⁹ Ema Jesús majicapavarepa:

—Nutupiruva numetacahe: Namutu nácani nanaquicahi eta napena, najunijicahivare ena ticachichana †, ena naparapenaveana, ena nachichanaveana;

† Te jácani apanana versiónéana, tatiaríhi te juca lista eta táechajirirúva: “ena nayenana”. Tájinasera nalistanahini te libro anti-

étapa eta nayehe apaquehe, te nanaquicahi táichavenehi eta náehisiranuhi, etapa eta námirayare eta tiúrina echajirirucava; ³⁰ tiápajucavainapa camuripanayare ena naparapenaveanayare ajairana, esenana, énapa ena náenanaveanayare, énapa ena nachichanaveanayare. Camuripanayareva eta náitsirijisiravayare. Ticaticacareanayaresera nayehe ena apamuriana achaneana. Énerichuvare níjaracavacaya eta nápechiravayare títarecana. Máichecuaraquirenapa eta náuricacarevanayare. ³¹ Maverahesera eti etiarihiqueneanahi puiti, váhirichuhi ecapicahuhini. Te jena sáchezare, ichapepanainapa eta ecapicahuiraya. Éna puiti ticapicahuanahi, te táitachavapa te jena sáchezare, énapavainapa téquenehanayare —máichavacapa ema Jesús.

Éma Jesús tiápechavavare máechajisiha eta máepeni-rayarehi

(Mt 20.17-19; Lc 18.31-34)

³² Te apanavarepa sache, tiyanavarepa tipaicana. Nacaijuhepa eta te Jerusalén. Tínapucapaipa ema Jesús te namirahu ena máimitureana. Náramipaipahi éna. Natiarivare ena tipicanapaipahi. Tacahe, ema Jesús mañajichamuripa macaetavajimurivarepa ena dóceana apóstoleana. Mametacavacapa eta jácani máichararacavayarehi éma. ³³ Máichapa:

—Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanayare ena tuparairucana. Tímicapacuanayarehi, taicha tíjararecanuanayare nayehe ena suntaruana romanoana. Éna, nájina najapanuquenéna. ³⁴ Ticaecahinuanayare. Tiátutuquichanuanayareva. Téstanuanayareva. Tásiha, ticapacuanainapa. Tásihasera, te mapanaquenénapa sache néchepucainapa te nécarí —máichavacapa.

Éma Jacobo émapa ema Juan nayaseacapa ema Jesús eta macájupahávachahini éna

(Mt 20.20-28)

³⁵ Tacahe, te apanapa sache, témeñahavanapa ema Jesús ena apinana ticapapecacana ema Jacobo émapa ema Juan. Náichapa:

—Tata maestro, vivaraha picatajicahavini eta viyasearuviyare —nacahepa.

³⁶ —¿Tájaha ecamunu? —máichapa ema Jesús.

³⁷ Najicapapa éna:

—Te jena sáchezare te péjacapa te piávacurezare aquenucavirayare, vivaraha picajacahavivareni te pichacaya, pijupahavinahini, véjacaini te pivare, ema émana te sapa —náichapa.

³⁸ Tacahe, majicapapa ema Jesús:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenevayare ecatajivairayare, te ecutinuyarepuca eta nucamichirayare núti? ¿Váhivarepuca epicavupanahi. *Eta tacahehi, vímatiequeneha vahi manachahini ema Marcos. Mácani apana achane mavejuchahipuca te Lucas 18.29.*

yare ticapacaheana tacuti eta nacapasiránuyare núti? —máichapa.

³⁹ Ena najicapapa:

—Viratahayare vicamicha. Váhivare vipicaimahi.

Tásiha, máichavacapa:

—Yátupi ichape eta ecatajivairaya, vicuticacaya eta nacapasirahaviyare. ⁴⁰ Étapasera eta nucaejasiraya ena nujupahanayare, vaipa nútímahi necha. Ema Tata Nucaiyaquene, émahí tinerejicayarehi éna nujupahanayare —máichapa.

⁴¹ Tacahe, te náechapa ena apamuriana apóstoleana, tisemamajuheanapa nayehe ena apinana. ⁴² Tásiha, máichuhamuripa namutu. Máichavacapa:

—Écharichuhi éti ena aquenucana tayehe eta avasare, muraca eta nacavanairipira. Énaripa ena tuparairucana, tétavicavahi tisuapacareanahi eta nacavacurerahi. ⁴³ Váhiserá ecucahe éti nayehe ena echamuriana. Mácani tímerecavahi ticapicahupana, tacamunuhi máitátivacayare ena apamuriana. ⁴⁴ Te etiarihivarepuca éti evarahahi ínapuca, tacamunuhi ímerecavayare navanarahayare ena echamuriana.

⁴⁵ Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútiyarehi níttíihe éti. Énerichuvare níjaracavayarehi nímicapacava íchaveneyarehi éti camuriqueneanaya nucuchucureanayare —máichavacapa.

Éma Jesús macaimairirica ema púchuqui ticajare Bartimeo

(Mt 20.29-34; Lc 18.35-43)

⁴⁶ Tiuri, títecapanapa eta te avasare Jericó. Te apanapa sache tiyananayarepa. Náehicapaipa ena camuriqueneana achaneana. Te achenechacaya, matiarihini ema achane púchuqui. Ticajare Bartimeo, machicha ema Timoteo. Téjacahi tiyaseserecahi limosna. ⁴⁷ Te masamapa eta mánuuirapahi ema Jesús Nazareno, tipiaracapa. Ánipa macahe:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuíni!

⁴⁸ Tacahe, nacavacapa camuriana ena natiarihiqueneanahi. Náichapa:

—Pámatina. Vaipa picupiaraca —náichapa.

Émasera tipiaracaichucha:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuíni! —macahepa.

⁴⁹ Tacahe, tícheapaicapa titupihapa ema Jesús.

Máichapa:

—Íchuha ema mara.

Tacahe, náichuhapa ema púchuqui. Náichapa:

—¡Pétumehava! Péchepuca, taicha tíchuhavipa ema Jesús —náichapa.

⁵⁰ Eta mananesirahi ema púchuqui, macamiricapa eta máepacuha. Téchepucapa, tiyanapa mapauchahi ema Jesús. ⁵¹ Tacahe, mayaserecapa ema Jesús ema púchuqui. Ánipa máicha:

—¿Tájaha picamunu nuyehé?

Majicapapa éma:

—Tátachicha, nuvaraha picaimairicanupaini —macahepa ema púchuqui.

⁵² Tacahe, máichapa ema Jesús:

—Tiuri, nuchicha. Táichavenehi eta picasiñairanuhi, pinaracapa puiti. Tiúrinapa eta piyaniraya pipaisiraya —máichapa.

Enurujirinehi tímairirica. Tacahe, máehicapa macachanepaipa ema Jesús eta mapaisirapahi te achene.

Títecapapa ema Jesús eta te Jerusalén

(Mt 21.1-11; Lc 19.28-40; Jn 12.12-19)

11 Tacahe, te apanapa semana tiyananavarepa. Tétavajicanaya tayehe eta avasarechichana ticajare Betfagé étapa eta Betania, te tachacaya eta cerro ticajarehi Olivoquiji. Tiánehianapa eta te Jerusalén. Ánaqui, ema Jesús mavanecapa ena apinana máimitureana. ² Ánipa máicha:

—Eyanayare eta te jena avasarechicha Betfagé. Te ítecapapa ánaqui, ímahayare ticaitihahi eta burrico. Eta jena sárare mávaequehéchaha. Nájinaihaha ticaperainahi. Evejapuacayare, íáminanuyare eta ani. ³ Te natiarihinapuca náēñama, emetacayare eta nucamunuirahi núti. Vahi táyerémahi vímichavavayare —máichavacapa.

⁴ Tacahe, tiyananapa ena vanairucanahi. Jéhesare, nachimapapa eta burrico. Ticaitihahi eta te calle te tapajachacaya eta peti. Tacahe, navejapuacapa.

⁵ Náichapasera ena ticayeheana:

—¿Tájaha tacayema íamayare eta viyehe burrico?

⁶ Tacahe, najicapapa éna, nametacapa eta máimiturapihi ema Jesús. Tásiha, náisapapa eta námirahi eta burrico. ⁷ Tacahe, te títécapanapa te mávihahi ema Jesús, náepacamaequechapa eta náepacuhana. Tásiha, ticaperapa ema Jesús. ⁸ Tacahe, tiúrujicavanapaipa ena achaneana. Camuriana éna tiácapanahi, náepacapaipa eta namuirihana eta te mayanihayarepahi éma. Ena apamuriana navehapa eta cáchipaca. Nanacavare te achene. ⁹ Ena títapumirauchanapaipahi énapa ena téquenehanapahi, namutu tipiaracanaipa. Ánipa nacahe:

¹⁰ —¡Yare, Tata! ¡Píti yátupiquenévihi Cristo, réyvihi viyehe! ¡Asulupaya! ¡Vanairucaquenévihi píti me Viya! ¡Ichape eta vicunachiravi píti! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹¹ Tacahehi eta máitecapirahi ema Jesús eta te Jerusalén. Matupirapa tiyanahi te Templo. Te tamutupa máimahahi, tiyanapa tichava te Betania, namutupaichu ena dóceana apóstoleana, taicha cáperehichicharipa.

Ema Jesús májiquiha eta yucuqui ticajare higo taicha máhiriquirehi

(Mt 21.18-19)

¹² Te apanavarepa sache, te yáticarahi, tichavanavare te Jerusalén. Eta najunijisirahi eta Betania, técuhaipahi ema Jesús. ¹³ Eta máimairahi tiyerehi eta étana yucuqui ticajare higo. Ticainapucavahi ticápácaji. Tacahe,

ema Jesús tiyanapa máimahapana te ticahhipuca. Téhesera te máitecapauchapa, máimahainehi tájina táhinahini. Tacarichuhi eta tapacajiana, taicha vúichaha tacahirainahini. ¹⁴ Tacahe, máichapa ema Jesús eta higo:

—¡Píti pépiyainapa eta máhiriquireviyare! —macahepa.

Nasamararacahi ena máimitureana.

Ema Jesús macuchuchucavaca ena tíjararecanahi eta sárareana, cáyureana te tajuhe eta Templo

(Mt 21.12-17; Lc 19.45-48; Jn 2.13-22)

¹⁵ Tacahe, te títécapanapa te Jerusalén, tiyananavarepa eta te Templo. Máimaharinehi ema Jesús ena achaneana tíjararecanahi eta sárareana, cáyureana. Ena apamuriana tivacharecanahi. Natiarihivare ena títsiriperecarahiana eta taplataneana eta apanapane avasareana. Tásiha, macuchuchujicapa namutu.

Máequehepuichinavacapaipa eta namesarana étapa eta nasiyana. ¹⁶ Nájinavare máisapaquenénahini eta nánucuhahini eta canchón tayehe eta Templo, námapahini jácani eta nájarareruanahi. ¹⁷ Tásiha, máimitucavacapa ena natiarihiqueneanahi. Ánipa máicha:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana tiásihana te tamutu avasareana” macahepa. Étiserá eti tímerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatajil! —máichapa.

¹⁸ Ena ticatianacanahi ema Jesús, te nasamairicapa eta juca máechajiriruvanahi, tisemanapa. Tásiha, natanucapa eta jácani náicharasirayare eta náimicapsirayarehi éma. Taicha napicarinehi éma, taicha náimahahi tétavicavahi eta masuapacarevahi eta nayehe ena achaneana.

¹⁹ Tacahe, te cáperehichicharinehi, tiyanavarepa ema Jesús, tiúchuca eta te Jerusalén.

Tiájiriquipa eta yucuqui higo

(Mt 21.20-22)

²⁰ Tacahe, te yáticarhipa, eta nachaviravarepa eta te Jerusalén, náetavicapaipahivare eta yucuqui higo. Náimahainehi tiájiriquipahi éta. ²¹ Tacahe, téchavapa ema Pedro eta máechajiriruvanahi ema Jesús cape sache. Tásiha, máichapa:

—¡Pímaha, tata! ¡Tiájiriquipa eta higo eta pévajariaruhi!

²² Majicapapa ema Jesús:

—Ácasiñava yátupina eta me Viya. ²³ Jéhesare, éti apana esamacareyareva, te yátupina eta écasiñavairaina eta me Viya. Tájina ématucaimahi. Eratahayareva ecayejea eta cerro te apachacaya, tájina iávamirahuimahi te esamureana.

²⁴ Tacahe, numetacahé eta juca: Te eyaseacapuca ema Viya eta jácani, ecasiñava mayehe. Vahi ecueñamava eta ejacapisirayare. Tásiha, tíjaracahéna éma tamutu eta eyasearuanaya. ²⁵ Énerichuvare, eta eyuja-

rasiraina, eperdonacha éti nácani náejecapavaquenehi eta eyehe. Eperdonachavaca apaesa maperdonachavevare eta éjecipiravana ema Tata Ecaiyaquene te anuma. ²⁶ Téhesera vahi eperdonachahi, váhivare tiperdonachahemahi eta éjecipiravana ema Tata Ecaiyaquene te anuma —macahepa ema Jesús.

Nayasereca ema Jesús nájahhipuca tituparacahi éma

(Mt 21.23-27; Lc 20.1-8)

²⁷ Tiuri, títecapanavarepa eta te Jerusalén. Natupiruvarepa tiyanana te Templo. Te mapairirijuecharipa ema Jesús eta Templo, napauchapa ena ticatianacanahi éma. ²⁸ Nayaserecapa éma, ánipa naicha:

—Píti, vahi vitupararuvinahini víti eta píchirahi eta júcana. ¿Nájahasica tímitucavihi? ¿Nájaha tituparacavianahi eta juca píchaqueneanahi? —náichapa.

²⁹ Tacahe, majicapapa éma:

—Núti apanava nuvaraha nuyaserecahe. Ejicapanyaresera apaesa numetacahe eta nucatuparahairahi eta níchirahi eta júcana. ³⁰ ¿Nájahapuca tivanecahi ema Juan eta máitesirahi máicachasirisirayare? ¿Émapuca ema Viya tivanecahi, émajivahipuca eta máitesirahi? Ejicapanu —máichavacapa.

³¹ Váhisera náituruequenehahini eta najicapirayarehi. Tiácapaemajiricacanapa, ánipa nacahe:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, ema macahénapapuca: “Tásiha, ¿váhiyapa esuapahini éma?” ³² Váhivare táurica víchahini: “Émajivaichucha eta máitesirahi”. ¿Tájahapuca vicayemayare eta vijicapirayare? —náechajiricacapa.

Nacahehi éna, taicha napicaracahi eta jácani náicharasirahipuca ena apamuriana achaneana, taicha namutuhi námijachahi ema Juan profetaquenehi yá-tupiquene mavaneruhi ema Viya. ³³ Tacahe, najicapapa ema Jesús:

—Vahi vecha víti —nacahepa.

Ema Jesús máichavarepa:

—Énerichuvare núti, vahi numetacahemahi nájahapuca ema tituparacanuhi —máichavacapa.

Ema Jesús máimicutichina ena pártirárioana máurirahana

(Mt 21.33-46; Lc 20.9-19)

12 Tacahe, tépanavavarepa tímitureca eta juca máimicutichaquenehi. Ánipa macahe:

—Matiarihi ema achane. Camuri eta máevaru uva te máesane, manaruacahivare eta masucure. Máepiyacavarepa eta nacaticasihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Taicha tiyanayarehi ema achane te apana avasare. ² Tacahe, te tiyahapa eta uva, máimivanerecapa ema mamusura mayaseapanavacayarehi ena pártirárioanahi eta tatucachaquenevarehi éma.

³ Énasera ena pártirárioana tisemauchavanarichucha. Nacaratacapa náehapa ema vanairucahi. Tichavapa

éma, tájina nájaracahini. ⁴ Tacahe, tiápechavavare mavaneca ema apana mamusura. Váhivare nasuapahini éma. Natupisicapa eta te márijahiana, najarasicapa. Náumehavarepa éma vanairucahi. ⁵ Tacahe, ema achane mavanecavarepa ema apana mamusura. Tásiha, ena pártirárioana nacapacapa éma. Vuíchasesa masemahini ema achane. Ticayehehi paciencia. Máimivanerecapa ena apamuriana, camurianapa. Énerichuvare, tiápechavanapa náehavacavarepa. Nacapacavacapa ena apamuriana.

⁶ Tacahe, matiarihichahasera ema apana mavaneruyare. Émajacaruvapa máevataca ema machicha máemunaruquenehi. Máimijachaipahi émainahipucaini napicauchahini. ⁷ Énasera ena pártirárioana, te náimahapa ema machicha ema achane, ánipa nacahe: “Émainapapuca ticayeheyare ema maca. Yare, vica-paca éma apanavare, apaesa tánasipa viyehe tamutu. Tájina máicharachavimahi ema achanenavaji” nacahepa. ⁸ Tacahe, nacaratacapa ema machicha. Nacapacapa éma, náquijicapavarepa eta máquehe te aneca tayehe eta úvaquiji.

⁹ Puiti, nuyaserecaheyare: ¿Tájahapuca máicharacavacayare ema achane ticayehe eta úvaquiji? Jéhesare, vaipa macayehehinehi paciencia. Títecavanénapa macapapanavacayarepa ena pártirárioanahi máurirahanahi. Tásiha, máijaracainavarepa eta úvaquiji ena apamuriana pártirárioanayareva.

¹⁰ Nuvaraha epanerechapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitcapa eta te táicuchihi eta tatuparahahi. Tacapicahuquenehi puiti. Táitusiava tétavicavahi eta vicunachirahi víti ema Viya” tacahehi eta Sagrada Escritura. Nuvaraha eacicutiaraya —máichavacapa ema Jesús.

¹² Tacahe, ena ticatianacanahi ema Jesús, eta nasamirahi, tisemanarinehi taicha tímatiacavanapa eta énaírahi tayunacavaca eta máimicutichiravacahi. Eta nasamirahi, tisemanarinehi. Navarahapa nacaratacayarehíni. Tipicacavanachuchasera nayehe ena achaneana, nacatiuchahini ema Jesús. Tacahe, najunijiacapa éma, tiyananapa natanuca eta táicharacavaya eta nacaratasirayare éma.

Navaraha náemejecapavacha ema Jesús tayehe eta impuesto

(Mt 22.15-22; Lc 20.20-26)

¹³ Tacahe, ena ticatianacanahi ema Jesús navanecapa ena témejecapacachanayare apaesa étainahipucaini taviuchahini ema Jesús. Natiarihi ena tinerejicavanahi ena fariséoana. Natiarihivare ena políticoana. ¹⁴ Te náitecapauchapa, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahi. Vahi pipicacaracavahini eta péchajisihairahi eta náichavaquenevahi nácani achaneana, tayanapanepuca aquenucahi. Taicha pi-varaha náehicahini namutu eta táurinaquene achene

ticaijuhe me Viya. Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahávihi ema Viya, ¿masi? —nacahepa.

¹⁵ Máimativanehisera ema Jesús eta apimirairavacahi éna, navarairahi ticaviureyarehi éma. Tásiha, ema máichavacapa:

—¿Tájaha tacayema evaraha ímiaquipaicanu? Nímahaseji, iáminanu étapena eta reale —macahepa.

¹⁶ Éna náijaracapa eta reale. Tásiha, máichavacapa:

—¿Nájaha ticaijare eta juca? ¿Nájahavare ticavasi máhi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador —nacahepa.

¹⁷ Tacahe, máichavarepa:

—Tiuri. Táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

Te nasamapa ema Jesús eta majicapiravacahi, náramipa eta máitupajjiasiravahi.

Nayasereca ema Jesús náichararacavayarepuca ena náepenaqueneana eta náechepusirayare

(Mt 22.23-33; Lc 20.27-40)

¹⁸ Nacahepaipavare ena apamuriana achaneana. Saducéonahi. Ena nani saducéonana, apanahi eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahanahi ema Jesús. Ánipa nacahe:

¹⁹ —Tata maestro, ema víyahaini Moisés manaquicahi eta ajureca máechajiriruvahi eta viyehe: “Te máepenaquenehahipuca ema achane esu mayena, tásiha, nájinahipuca manaquiequeneruvainahini machichainahini, te matiarihihipuca mácani maparapehi, mavehayare esu machinenaquenehi, apaesa émainapuca macachicha eta suyehe, máitsivainahini ema maparapeni”. ²⁰ Tacutiquene te natiarihipuca ena siétequeneana ticaparapejiricacana, te títauchavapa ema náechavimuri. Máepenaquenehapasera esu mayena. Nájinahi machichainahini. ²¹ Tacahe, ema maparape máitauchavare esu machinena. Énerichuvarera máepenaquenehavare, nájinavare machichainahini. Ema émana maparape máitauchavare ésu. Énerichuvarera máepenaquenehavare. ²² Namutu ena siétequeneana navehahi ésu, tásihasera náepenaquenehapachucha, nájinaquene émanainahini mácachichahini eta suyehe. Te táequeneapa, tépenapa esu esenaini. ²³ Tacahe puiti, te apanapapuca eta náitaresirayare ena nani, ¿nájahapuca ena siétequeneana éma yátupiquenehi suímaquenehi esu esena, taicha ena siétequeneana namutuhi suímanaríhi? —náichapa.

²⁴ Tásiha, ema Jesús majicapavacapa:

—Éjecapava éti. ¿Tájaha tacayema vahi evaraha ácaicutiarahini eta táimiturapi eta Sagrada Escritura? Váhivare evarahahini esuapahini eta tamutuirahi

marataha ema Viya. ²⁵ Ánaqui te apana náitaresiraya, vaipa nácamunuimahi esu esena. Énaripa ena esenana váipavare nácamunuimahi ema ajaira. Nacutinapa ena ángeleana tiávihanahi te anuma eta vahi náitauchacacahini. ²⁶ Éti, váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruvana ema Viya májuchaqueneanahi ema víyahaini Moisés. Te juca Sagrada Escritura, eta te libro ticaijare Éxodo, téchajicapa ema Viya. Ánipa macahe: “Núti- ra yátupiquenenuhi Viya, macasiñaquenehi ema Abraham, ema Isaác émapa ema Jacobo” macahepa ema Viya. ²⁷ Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripapuca. Eta náchanevana, tímiyanavana- richucha títareca te mairahu éma. Éti, ichape eta éjecapiravahi —máichavacapa ema Jesús.

Eta tisuapacarepanahi te mavanairipiana ema Viya

(Mt 22.34-40)

²⁸ Tacahe, matiarihivare ema émana escribáno. Masamararacahi eta nacanarajirisiracacahi. Máimativanepa eta táurivahi eta majicapirahi ema Jesús. Tásihasera, tíjaracavahi mayasereca ema Jesús, ánipa maicha:

—Tata, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

²⁹ Majicapapa ema Jesús:

—Eta máechajiriruva ema Viya te Sagrada Escritura, ani macahehi: “Esama, emutu eti achaneana israelítana. Nuti Viya, nuarichuhi nuti Iáquenu. Nacuija apanaina iáquenuina esiñarajina. ³⁰ Tásiha, yátupina eta émunasiranuina nuti Iáquenu, táunasiraina te esamureana. Yátupina eta ecaemateasiranuina núti. Epanerecha eta nímiturapiana tamutu sácheana, yá-tiana. Yátupina eta ecaemataneasiranu te tamutu eta ítupajjiasiravana”. ³¹ Jararihivare eta apana táehiruhi eta juca, ánvare tacahe: “Pémunacayare ema piparaepiyahi, tacuti eta pémunasiravahi píti”. Eta juca apinaquene vanairipi, tacachurica eta tasuapacareva tamutu eta apamuriana vanairipiana —macahepa ema Jesús.

³² Tacahe, máichapa ema escribáno:

—Yátupiquene, tata maestro, tétupicavahi eta péchajiriruva. Yátupihí eta macarichuirahi ema Viáquenu, eta nájinairahi apanainahini Viáquenuinahini. ³³ Yátupihivare tavaraha eta vémunasiraina ema Viáquenu, etapa eta viúnasirayare te visamure, etapa eta vipanerechiraina eta máimiturapiana tamutu sácheana, etapa eta vícaemataneasiraina éma te tamutu eta vítupajjiasiravana, etapa eta vémunasiraina ema viparaepiyahi. Jéhesare, eta táuriva eta vémunasirahi táetavicahi eta táuriva eta víjaracasichira eta sárareana eta víjuchaqueneana eta me Viya. Táetavichivare tayehe eta táuriva tamutu eta apamuriana víamavahuana eta me Viya —máichapa ema escribáno.

³⁴ Ema Jesús máimatiequenehapa eta táuriva eta majicapira ema achane. Tásiha, máichapa:

—Píti piánehi eta píjarasiravaina eta péhisirayare ema Viya —máichapa.

Tacahe, nájinapa nájaracavahini nayaserecahina ema Jesús eta náemejecapavachirayarehi éma.

Ema Cristo, yátupihí mámaríequenénihi ema rey

David, Vyahivare éma

(Mt 22.41-46; Lc 20.41-44)

³⁵ Tacahe, ema Jesús tímiyanava tímiturecahi, eta máejasirahi eta te Templo. Ánipa macahe:

—Ena escribánoana, ani tacahehi eta náimiturapiana: “Tiúchucayare ema Cristo, mámaríequenezare ema víyahaini rey David” nacahehi. ³⁶ Yátupihí ema Cristo achanequenehi eta máimahi taicha mámaríequenénihi ema víyahaini David. Nuvarahasera epanerechaya eta juca máechajiruvahi ema David te májurehi Salmo, ani macahehi: “Ema Viya máichapa ema Tata Náquenu Cristo: Yare péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. ³⁷ Ema David, eta máimijarechirahi ema Cristo, “Tata Náquenu”, ¿tájahapuca eta macayemaquenehi? Núti németeaca Vyahivare ema Cristo. ¿Tájaha íchahi éti? —máichavacapa.

Ena camuriqueneana achaneana náuricahi eta nasamararaca eta máimiturapiana ema Jesús.

Ema Jesús máimereuchavaca eta náejecapiravana ena escribánoana

(Mt 23.1-36; Lc 11.37-54; 20.45-47)

³⁸ Tímiyanavahi eta máimituresirahi ema Jesús, ánipa macahe:

—Échapavayare éti, machu éhica eta nayeherepiana ena escribánoana taicha tétavicavahi eta apimiranairahi éna. Tétavicavahi eta náurisirahi éna tiúmajihána, navarairahi ticunachacareanayarehi nayehe ena achaneana eta nareligiósovanahi. Navarahavare ticapihanayarehi eta náechajisiraya ena achaneana te jácani nácapajisihapahi éna. ³⁹ Tacutiquene tinerejiurucavana eta táurinaqueneana téjasihacareana, te tiyanana te víurujisirevana. Étaripa te nanisirana, ticaejacavanavare te jácani tiávihanahi eta tiúrinisipana tinicacare. ⁴⁰ Tacutiquene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósoanahi, tiúpiemána eta nayujarasira, namavarairahi tácaeche-rhini eta náichiraqueneanahi eta tamauriqueneana. Énasera tiápajucavanahi eta náicuñayayare muraca —macahepa ema Jesús.

Eta sunaquiruva esu máimaru tacachuricahi eta nanaquiruvana ena apamuriana achaneana

(Lc 21.1-4)

⁴¹ Eta máejasihahi ema Jesús, mávihahi te tamirahu eta chapamana eta nanacacuirarehi eta plata námavahuana ena achaneana. Máimarraca ena camuri-

queneana eta nanacacuirarehi eta námavahuana. Natiarihihi ena rícoana, tinaquicavanapahi eta ichapemuripavaca. ⁴² Tacahe, títecapapa esu esena suépenaimaquene, páurehi ésu. Sunaquicahi eta apipechichahi eta suplatane, váhirichu tasivachahini. ⁴³ Tásiha, ema Jesús, eta máimairahi eta juca, máichuhamuripa ena máimitureana. Ánipa maicha:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímeapanávahi eta sunaquiruva, sucachuricavacahi namutu ena apamuriana achaneana. Ichaperinehi eta sucunachacarevahi me Viya. ⁴⁴ Taicha namutu éna, tacarichu nanaquicahi eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunícavachayaréhiní —máichapa.

Ema Jesús máimereucharipa eta táquipaisiravaya eta Templo

(Mt 24.1-2; Lc 21.5-6)

13 Tacahe, tiyanayarehini ema Jesús, énapa ena máimitureana. Eta náuchusiraya tayehe eta Templo, máichapa ema émana máimiture:

—¡Tata maestro! ¡Pímaha eta juca máriana! ¡Tétavicava eta táichapeva! ¡Tétavicava táurinava eta juca peti! —macahepa.

² Ema Jesús majicapapa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járjapayare eta sáchezare ticaquipaicasiyare tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneanahi puiti —máichapa.

Tatiarihiyare eta ecutiarareanaya te tánehipaicha eta táichecuraya

(Mt 24.3-28; Lc 21.7-24; 17.22-24)

³ Tacahe, tiyananapa eta te cerro ticaijare Olivoquiji, távihahi te apacharahi eta te tatavarapihi te tamirahuhi eta Templo. Te téjacanapa nacarichuhi eta te jena quinta, nayaserecapa eta macayemaquenehi. Matiaríhi ema Pedro, émapa ema Jacobo, émapa ema Juan, émapa ema Andrés. Ánipa náicha:

⁴ —Vivaraha pimetacahavi. ¿Tájamuhupuca eta náimiauquipaisirayare eta Témplosami? ¿Jararihiyarepuca eta ecutiarareyare te tánehipaicha eta táitauchiravayare eta apana péchajisihaqueneana? —náichapa.

⁵ Tacahe, majicapapa ema Jesús:

—Ecuneuchavaicha yátupina, machu navayuacahe, taicha nárajapayare eta tépiyacavanayarepahi tímivasichavanayare nuyehe. ⁶ Nacaheyarepahi éna: “Nútiripapa Cristo”. Nasapiha, navayuacayare ena camuriana achaneana.

⁷ Énerichuvare esamairicayare eta táehacairayare eta ichapequeneana avasareana. Ticanarajiricacainapa eta te avasareana tayerehiqueneana, énerichuvare ticauyacarenapa guerrina eyehe éti.

Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecurayare. Énerichuvare tatiarihiyareva eta ichape tayamurisiranya eta apaquehe te jácani távihanaya táitupiaruanayare. Tatiarihiyareva eta ichape ecuhamuhuyareva te jácani avasareana. Ichape eta nacatajivairayare ena achaneana. Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásihaserá eti nuchaneranahi, ecuneuchavayare, étumechavayare. Taicha natiarihiyare ena ticatianacaheanayare táichavenehi eta éhisiranuhi. Ticaratacaheanainapa, ecayaseserehinapa nayehe ena juéseana. Téstaheanainapava eta te náurujisirarevana. Tásiha, etiarihiyare éti tiámaheanaya te namirahu ena aque-nucana, téhevare te namirahu ena Presidenteana gobiernoanahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare. ¹⁰ Énerichuvare, éti nuchanerana ecametarairuyareva eta tíurina echajirucava nayehe ena achaneana tayehe tamutu avasareana te juca apaquehe. Te ítecapapa te tamutu, tápanavayarehi eta táichecurayare. ¹¹ Tacahe, te jácani nacaratacahepapuca, námahe te namirahu ena aquenucana, vahi ecueñamava tayehe eta jácani échajiuichiravayare, ecatiuchiravaya. Échajisihaya eta échajirucavana máijjaruheyare ema Espiritu Santo te jena sache. Taicha máimahaheinepa. Tíjaracaheyare eta ítusirayare échajica. Vahi étijivaimahi eta échajisiraya.

¹² Natiarihiyareva nácani achaneana tíjararecanaya ena naparapequeneana, navarairahi námicapaca táichavenénahi eta náehisiranuhi núti. Natiarihiyareva ena nácani náiyana, navarahayareva náijjarareca ena nachichanaveana táichevenehi eta náehisiranuhi núti. Natiarihiyareva nácani nachichanaveana nacana-rainapa ena náiyana, námicapacainapa táichavenehi eta náehisiranuhi núti. ¹³ Namutuyaréni ena achaneana ticatianacaheanayare táichavenénahi eta éhisiranuhi. Téhesera ecamichahi tamutu, ímiyanavahi eta éhisiranuhi te táitavapa tamutu, núti nucuchucaheyare.

¹⁴ Numetacahevaneyare eta apana. Járjapayare eta sache táíñehiqueneyare. Tímerecavayare ema achane váinarajiquene. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuyare eta májurehi ema víyarahaini profetai Daniel.) Tásiha te ímahapa eta juca, esamairicapuca, táuricapa etátájipa ejunavane, eti etiarihiqueneanahi te Judea. Ecaijuheyare eta te céroana, étaina eyumurusavaina. ¹⁵ Nácani tiávihanahi te nayehe canchón te nasamairiricapa eta juca téchacarehi, táuricapa najunavane. Vaipa táuricahini nasiapanumahi te napenana, navehahini jácani náeñamaqueneanainihi. ¹⁶ Nácani tachimararuanyare te vamáhi eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana.

¹⁷ ¡Páureanasami nácani esenana tachimararuanyare nácani ticajarianahipuca, nácani esenana ticachichanahi eta amuya tiájicachaha! ¹⁸ Eta tacahe, eyaseacayare ema Viya tacuija táichejicahe; váhivare tacuchimaracahe eta ichape tiquiva te achene te eyanapapuca ejuna †. ¹⁹ Te jena sácheanayare, tétavicavayare eta nacatajivairayarehi ena achaneana. Tájiña tácutimahi eta táíñehivayare eta nacatajivairayare, te táepaniravahi eta máepiyasirahi ema Viya eta juca apaquehe. Te táequenenapa eta tíñehiyare, tájinainapa tácutimahi. ²⁰ Nájiña tacaitiruimahi eta nacatajivairayarehi ichape. Macaichecavaneyare ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuqueneanahivare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

²¹ Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarihipahi te juca vitaracu”. Ena apamuriana ánvare nacaheya: “Náepiyahiraivahi éna. Ema Cristo mávihahi te viávasa víti”. Étisera vahi ecusuapavaca. Eta navarairahi tivayuacaheanaya eti machanerana ema Tata, náituruequenehayare naicha eta ichapequeneana tiáramicareana ecutiarareanayare. Camuriasamiyare ena navayuaruanayare. ²³ Tásiha, ecuneuchavaya nayehe. Numetacahevanehi puiti apaesa écharipa —máichapa.

Eta machavirayare ema Manerejiruhi ema Viya

(Mt 24.29-35, 42-44; Lc 21.25-36)

²⁴ Máichavarepa ema Jesús:

—Te jena sácheanayare te táequenénapa eta jena nacatajivairayare ichape ena achaneana, eta sache témahainapa, étaripa eta caje váipavare tíjarahimahi.

²⁵ Témiricanainavarepa eta jarairiquiana. Étaripa eta tiávihanahi te anuma vimaimahaqueneanahi, énerichuvare tiyamuricanainapa, tiyejejecavanainapa.

²⁶ Nupaenumavainapa níteca nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Tétavicavayare eta nujaraivayarepahi, níñehinapaipa. ²⁷ Tacahe, nuvanecainapa ena ángeleana nacurujicayare namutu ena nuchanerana nunerejiruanahi, tiásihanayare te tamutu eta juca apaquehe te jácani návihahi.

²⁸ Tiuri puiti, nuvaraha nímicutichinahe eta jácani yucucui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemuhuirayarepa. ²⁹ Ene tacahehi, te ímahayarepa tacacherapa eta júcana ecutiarareana, ímahayarepa eta tánehirainapa eta nuchavira. ³⁰ Numetaca-

† Ema Jesús máechajisihahi eta ticasarahimuhu, tiqivamuhuhi-vare te jena mávasa Judea taicha ticajeraequenehi eta napáisirahi.

hevanecha: Vuíchaha títavanimahi ena achaneana náitarerunaichaha te táitecapapa eta júcana ecutiara-reanayare. ³¹ Títavainapa eta anuma étapa eta apaquehe. Tativayaresera títauchava tamutu eta numetaru-heanahi.

³² Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucaini néchahini. Macarichu ema Tata, éma téchahi.

³³ Eta tacahe, etsecavahi ecaunehivare éti, eyujarau-chavayareva. Taicha vahi echa eta tájamuhuyarepuca eta nitesirayarepa. ³⁴ Tamutu eta juca nímicutichinahe eta máichaquenehi ema mácani achane eta te tiyanayare tipairirica. Te tiyanayarépa, máijaracavaca namutu ena mamusurana eta náemataneana, matuparacavacapa eta najaneasirayarehi tamutu. Tacahe, matuparacavarepa ema tijanearecarahi eta tapaja, macuneyarehi eta jácani hora machavira ema máquenu, téhepuca timapicuhupa, téhepuca enumuhu yati, téhepuca tijarahiyarepa, téhepuca yáticarahi. Ene ecaheya éti. Ecauneya machu nijahúchava nítecapauchahe, machu nuchimaracahe ímacacaruhi. Taicha vahi échaimahi tájamuhupaca nítecapayare nuti Iáquenu. ³⁷ Eta juca numetaruheanahi puiti, nuvaraha emetacayarevare ena echamuriana, apaesa ecauneyare emutu —máichapa ema Jesús.

Napanerechaipahi ena tuparairucana eta nacaratasirayare ema Jesús

(Mt 26.1-5; Lc 22.1-2; Jn 11.45-53)

14 Tacahe, apinarinecha sache eta piesta ticaijare Pascua, eta náepanavaira eta semana eta nanisirahi étachucha pan mayehere levadura. Tacahe, ena tuparairucana énapa ena escribánoana navarahaipaicha náimicapaca ema Jesús. Tásiha natanucahi eta táicharacavaya eta nacaratasirayare. Váhisera navaraha eta nanecapahini ena achaneana. ² Ánipa nacahe:

—Vuíchaha vicucarataca éma achichu juca piéstairaya. Taicha camurianayarehi ena achaneana, machu tájahapuca náicharachavi taicha navaraha-yarehi nacatiucha éma. Vicuchapa nayananuma —nacahepa.

Esu esena tiámasichahi ema Jesús te táijyeamaquene perfume

(Mt 26.6-13; Jn 12.1-8)

³ Tacahe, ema Jesús tiyanapa tichava eta te avasarechicha Betania. Máichuhaquenehi eta mananisiraya mayehe ema achane ticaijare Simón ema leprosoinihi. Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Ticaijare nardo eta juca tíjyeama amairiama. Táetaviuchahi eta tasivachavahi. Supauchapa ema Jesús. Suvechujihapa eta bótechicha, tásiha, suépusasicapa eta táijyeamaquene perfume. ⁴ Natiarihisera ena váhiquene náuricahini eta suémepururesirahi eta tasivachaquene perfume, suámasichirahi ema Jesús. Ánipa nacahe:

⁵ —¿Tájaha tacayema suémepurureca eta juca tasivachaquenehi perfume? Tiúripanahini víjararecahini eta juca táijyeamaquenehi. Vivehahini eta camuriquene plata, tásiha, vímicatasihahini ena páureana. ¡Máechemarairahahi esu suca esena! —nacahepa.

⁶ Émasera ema Jesús máuricapa eta suíchaquenehi. Ánipa máicha:

—Ésamirica esu suca esena. ¿Tájaha tacayema ecaecahihi éti esu suca? Tétavicava eta táuriva eta suíchiranihi. ⁷ Ena páureanasami, támutuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe. ⁸ Esu suca suíchahi eta suímirataharuvahi. Eta juca suépusahasiranuhi eta juca perfume. Sucainapucahi ésu eta suíjyechirahi eta náquehe tayeheyarehi eta nucaecarasirayare. ⁹ Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

Eta máijararesirahi ema Júlasí ema Jesús

(Mt 26.14-16; Lc 22.3-6)

¹⁰ Tacahe, tiyanapa ema Júlasí, émarichuhi nachamuri ena dócequeneana apóstoleana. Mapauchapa ena tuparairucana, téchajiripanava eta máijararesirayare ema Jesús eta nayehe. ¹¹ Tacahe, tiúrisamureanarine ichape eta nasamirahi eta mavarairahi máijararecayare ema Jesús. Tásiha, nametacapa eta náijarasirayarehi eta plata. Tásiha, jéhevarepa ema Júlasí matanucaipa eta máicharacharehi eta máimicaratasirayarehi ema Jesús.

Ema Jesús máenimurihapa ena máimitureana

(Mt 26.17-29; Lc 22.7-13; Jn 13.21-30)

¹² Tacahe, títecapapa eta piesta Pascua, te tépanavahi eta semanahi nanicahi eta pan mayehere levadura. Étarichuhi eta sáche nacapasihahi eta uvesachicha naniruyarehi te yátipa. Ena máimitureana nayaserecapa ema Jesús:

—¿Táviha pivarahahi vácaijuhe eta vétupirisiava eta vinisirayare eta uvesachicha eta viyeherepi? —nacahepa.

¹³ Tacahe, mavanecapa ena apinana máimitureana. Máichavacapa:

—Eyana tayehe eta Jerusalén. Te ítecapayarepa tayehe, iácapajicayare ema émana achane tiámapahi eta une te yupi. Éhicayare éma. ¹⁴ Eta te peti masiapihayare, éti apana esiapayareva. Tásiha, emetacayare ema ticayehe eta peti, ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. ¹⁵ Tásiha, éma tímecháhenapa eta ichape cuarto te anuquehe piso. Táuriquenéipahi eta jácara téjasihacareana, tacaetupirihiqueneripa. Tásiha, étupiricapa eta viniruyare eta ánaqui —máichapa ema Jesús.

¹⁶ Tacahe, tiyananapa nacaijuhe te Jerusalén ena apinana vanairucana. Jéhesareinehi náimahapa éta-paichuhi eta macayemaqueneanahi ema Jesús. Tacahe, náetupiricapa eta naniruyare tayehe eta Pascua.

¹⁷ Tacahe, te yátipa titecapapa ema Jesús macachanepaipa ena apamuriana apóstoleana. ¹⁸ Eta náejasiraripahi tinicanaripa, máichamuripa éna ema Jesús:

—Jéhesareinehi, te etaracu éti, mararihi ema émana tíjararecanuyare, émarichu tinicahi nucachanehi —máichapa.

¹⁹ Tacahe, ichaperinehi eta máimipaneresiravacahi éna eta juca máichiravacahi. Nayaserecapa ena émanapachu, ánipa náicha:

—¿Nútichupuca jácani? —macahepa ema émana.

—¿Nútichupuca? —macahevarepa ema apana.

²⁰ Tacahe, majicapapa ema Jesús:

—Ema émana te etaracu eti dócequeneana. Mácani néniruyare eta pan néchipeajiruhi te juca nucuruja, émara ema tíjararecanuyare. ²¹ Nuti Manerejirunuhi ema Viya, étapaichuhi eta nacapasiranuyarehi, títauchavayarehi eta nuyehe eta táechajiruvahi eta Sagrada Escritura. ¡Páuresamisera ema tíjararecanuyare! ¡Muracayare eta máicuñayare! ¡Tiúripanaichuhini te vahi macuchuahini te sujuhe esu máena! —macahepa.

Ema Jesús máimereuchahi eta macaejasiraya eta arairu matratune ema Maiya

(Mt 26.26-29; Lc 22.14-20; 1 Co 11.23-26)

²² Tacahe, eta nanisirahi, mavehapa eta pan ema Jesús. Mahasulupayachapa ema Viya. Mayuvetucapa máijaracavacapa ena máimitureana. Tacahe, máichavacapa:

—Eta juca néche. Enica —macahepa.

²³ Tacahe, mavehavarepa eta vasu náerirare, mahasulupayachavarepa ema Viya. Tásiha, máijaracavarepa ena máimitureana. ²⁴ Te náerapaipahi, máichavacapa:

—Eta juca eta nítine. Éta táepusairuvayare étarichuvare táicutiarayare eta nufirmachiraheyare eta arairu matratune ema Vicaiyaquene, nucaejasirayareva eta matratune apaesa ejacapacare mayehe, ichapemurivayarepahi éti. ²⁵ Jéhesaréinehisera, numetacahe: Vaipa nápechaváimahi nérahivaréni eta juca tachi eta uva, tiámainucava te táitauchavapa eta nusiapiraya eta nucavacureiraya, nucajupahairaya ema Tata Nucaiyaquene. Te jena sache, níjaracaheya vérainapa eta aramaruama —máichapa.

Ema Jesús máimereucha ema Pedro tépiyacavayare vahi máimati ema Jesús

(Mt 26.30-35; Lc 22.31-34; Jn 13.36-38)

²⁶ Eta náitanesirapa, tijiranapa eta jirasare eta nahasulupayachirahi ema Viya. Te títapiricanapa, tiúchucanapa, nacaijuhepa eta te huerta Getsemaní tiávihihi eta táemiripaisinehi eta cerro ticaijare Olivoqui. ²⁷ Eta napaisirapahi, máichavacapa ema Jesús:

—Puiti juca yati ejunijicanuyare emutu éti, taicha epicayare eta náicharasiranuyarehi. Tásiha, títauchavayarehi eta máechajiruvahi ema Tata eta te Sagrada Escritura: “Nísapayare nacaratata ema Pastor, nacapasirayaresami. Tásiha, tijunaracanainapa eta uvesana macurujiruanainihi” macahepa. ²⁸ Téhesera te néchepucapa te nécari, nínapucainapa nuyanainapa te Galilea. Ánaqui nucuchapiaheyare éti —máichapa ema Jesús.

²⁹ Émasera ema Pedro máichapa:

—Tayanapane, Tata, najunijicavipuca ena apamuriana, nútisera vahi nujunijicavimahi —máichapa.

³⁰ Ema Jesús máichavarepa:

—Nutupiruva numetacavi pítisami Pedro: Puiti juca yati, te apíhénapa eta táechajisirayare eta varayu, mapaha eta pépiyasiravayare vahi pímatinu —máichapa.

³¹ Ema Pedro tíjaranurusi eta majicapirahi. Ánipa macahe:

—Tayanapanepuca pímicapacanu, váhiquenesera népiyacavaimahi vahi nímativi, váhivare nínjaiacavimahi —máichapa.

Étarichuvare tacahehi eta náechajiruvahi ena apamuriana máimitureana.

Ema Jesús tiyujaraca te Getsemaní

(Mt 26.36-46; Lc 22.39-46)

³² Tacahe, titecapanapa eta te quinta Getsemaní. Tacahe, máichamuripa ena máimitureana:

—Éjacaichaha eta ani te juca. Ecuchapanuchaha. Núti nuyujarapanayare —máichapa.

³³ Tacahe, mámapa ánaquipana ema Pedro, émapa ema Jacobo, émapa ema Juan. Tépanavapa téñamava eta masamure, taicha muraca eta máichavaquenévayarehi. ³⁴ Tacahe, máichavacapa éna:

—Tétavicava eta táeñamirava muraca eta nusamure. Tavaraha ticapacanu. Ánasichaha ani te juca. Váhisera ecueimaca. Ecuneuchanuhi —máichavacapa.

³⁵ Tacahe, tipaipanapa ánaquipanachichahi éma. Tiáquipaicavapa eta te apaquehe. Eta mayujarasirahi, ánipa macahe:

—Tátachicha Nucaiyaquene, píti pirataha tamutu. Picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti —macahepa.

³⁷ Tásiha, téchepucapa. Tichavapa eta te návihahi ena máimitureana. Máimaharinehi éna, tímacanarichucha. Máichapa ema Pedro:

—Piti Simón, ¿pímacarichucha? ¿Tájaha tacayema pímacahi? Váiparinehi pímicatacanuhini pijaneacanhini étanainahipucaini hora pácahehinehi. ³⁸ Éjamiuchava. Eyujarauchava apaesaina. Eyaseaca ema Viya eta etumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

³⁹ Tacahe, tiápechavavarepa tiyana tiyujaraca. Eta mayujarasirahi, étarichuva eta máechajiruvanahi.

⁴⁰ Tásiha, tichavavanepa eta te návihahi ena máimitureana. Máimahavarepa tímacanaripavare, taicha muracaripa eta náechapune. Tájnavare nacayemahini táichavenehi eta natsirirahi. Tacahe, tiyanavarepa tiyujarapana. ⁴¹ Te mapahequenepa eta mayujarasirahi, tichavapa. Máichavacapa:

—¿Iápechavaipava ímaca? ¿Vuíchahapuca enaraha-caquenénahini? ¡Taratapa! Jéhesare, puiti títecapapa eta nutuparahahi nacaratasiranuyare ena ticatianacuanahí. ⁴² Ávane ema tíjararecanuyare. Échepuca. Viyana viácapavaca —máichavacapa.

Nacaratacapa ema Jesús

(Mt 26.47-56; Lc 22.47-53; Jn 18.2-11)

⁴³ Téchajiricavaichaha ema Jesús, macahepainecha ema Júlasí. Mámamurihapaipahi ena camuriqueneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena ticatianacanahi ema Jesús. ⁴⁴ Ema Júlasí, tatiarihihi eta máicutiarayarehi eta náimatirayarehi ena suntaruana ema Jesús. Ani tacahehi eta máechajiriruvahi ema Júlasí:

—Ecunenuyare. Ema nétserareruyare, éma ecaratayaca. Machu ecaítica, muraca eta ecaratásiraina —máichavacapa.

⁴⁵ Te títecapanapa, mapauchapa ema Júlasí ema Jesús. Máichapa:

—Yátiheipa, tata Maestro —máichapa.

⁴⁶ Tásiha, máetserarecapa. Tacahe, ena suntaruana enevanepa nacaratacahi. ⁴⁷ Tacahe, ema émana apóstole, eta máimaira nacaratasirahi ema Jesús, mavehapa eta mayehe espada. Máquijica eta machaca ema mamusura ema aquenuca Caifás. ⁴⁸ Émasera ema Jesús máichavacapa ena suntaruana:

—¿Tájaha tacayema ecasiña eta espada, ecaepuchiriquipaipahivare eta ecaratásiranuyare, tímicutijiricavapa námerahihini nútí? ⁴⁹ Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacunuhini. Tacahehisera éta, títauchavayarehi tamutu eta téchajiriruvana eta Sagrada Escritura —máichavacapa.

⁵⁰ Tacahe, tijunaranapana namutu ena apóstoleana nanaquicapa ema Jesús. ⁵¹ Matiarhivare ema émana amaperu achane. Téhicapahi. Ticaepacuhapahi eta te sávana. Tacahe, nacaratacavarepa éma apana.

⁵² Tijunahisera manaquicapa eta máepacuhainihi sávana. Tiyanapa mamuriarepaipa.

Nacatupihapa ema Jesús te namirahu ena aquenu-carahana

(Mt 26.57-68; Lc 22.54-55, 63-71; Jn 18.12-14, 19-24)

⁵³ Tacahe, nacaitecapapa ema Jesús te mapena ema corregidor. Ema Pedro, máehiequenehapahi éna, mayererehipahisera. Títujicavapa tisiapa eta te canchón tayehe eta mapena ema corregidor. Tásiha, téjacapa macachanemuripa ena suntaruana, tiásacavahi eta te yucu. Váhisera náimatihini éma. Tacahe, tiúrujicavanapa namutuyaréni ena apamuriana tuparai-

rucana énapa ena aquenucarahana énapa ena escribánoana. Napanerechaipa, natanunuicaripa eta ticaviureyarehi ema Jesús. Náichuhapa ena tépiyaequenehanayarehi eta matapiravayarehi náicha, navarairahi náimicapayarehi éma. Váhisera náichimavahini eta maviurevainahini. ⁵⁶ Camuriana-hinéni ena tépiyaequenehanahi éma, váhisera tácuticacahini eta nacayemaqueneanahi. ⁵⁷ Titupihana-varepa ena apamuriana tépiyahirahianayarehi. Ánipa macahe ema émana eta máepiyahiraivahi:

⁵⁸ —Núti nusamahi ani macahehi ema maca: “Núti nuvetataicayare eta juca Templo náepiyaruhi ena achaneana. Tásiha, te mapánaqueneénapa sache, nímiclavayare nucatupiha eta apana Templo. Váipasera tácutimahi eta náepiyaruhi ena achaneana”. Eta juca nusamaquenehi eta máechajiriruvanahi ema Jesús —macahepa ema tépiyahirahi.

⁵⁹ Váhiquenesera tácuticacahini eta máechajiriruvanahi nayehe ena apamuriana.

⁶⁰ Tacahe, ema corregidor téchepucapa eta mayaserirayarehi ema Jesús. Ánipa maicha:

—¿Tájaha tacayema vahi pijicapavaca ena nani eta pimetauchacasivahi? ¿Yátupipuca eta nacayemaquenehi? Taicha vímahavi eta vahi picatiuchiravainahini —máichapa.

⁶¹ Émasera ema Jesús vahi majicapavacahini. Timatí-naichucha. Tásiha, mápechavare mayasereca ema corregidor:

—Nuvaraha pimetacanu. ¿Píti pímiyajavahijicacha pítihi Cristo ema vicuchapaquenehi, Machicha ema Viya? —máichapa.

⁶² Tacahe, ema Jesús majicapapa:

—Yátupi nuti Cristonu. Nuti Manerejirunuhi ema Viya. Tásiha, numetacaheyare eta apana. Járjapaya eta sácheyare ímahanuyare eta néjasirayare te mavau-re ema Viya máitupajijihaquenehi. Ímahanuyareva nútí eta núcupaisirayareva, násihayare te anuma, támiranuyarepahi eta úcaji —máichapa.

⁶³ Tacahe, ema corregidor eta masamirahi, tisemarinehi ichape. Tivetsayujicavapa eta mamuiríha eta masemanevahi. Tásiha, macahepa:

—¡Émaquenepa visama ema maca tépiyacavahi Machicha ema Viya! Tétavicavaipa eta maviureva taicha macaecaíhi ema Viya. Vaipa tácomesa vitanucahíni ena testigoanayare. Puiti esamaripa éti eta juca macayemaquenehi. ¿Tájaha vícharacayare puiti ema maca? —macahepa.

Tacahe, namutupa najicapa:

—¡Ticaviurevaipa! ¡Étáina táimicapaca! —nacahepa.

⁶⁵ Tacahe, nátutuáca éma. Náepacauquichavarepa, tásiha, náehamirahavarepa te mamira. Tásiha, náichapa:

—Te yátupihupuca pítihi Cristo, pímatinuyare nájahanupuca nuti néhavíhi. ¡Pimetacahavi! —náichapa.

Énapa ena suntaruana, te námapaipahi, náehavarepa. Ichape eta náichirahi.

Emá Pedro tépiyacavapa vahi máimati emá Jesús

(Mt 26.69-75; Lc 22.56-62; Jn 18.15-18, 25-29)

⁶⁶ Tiuri, emá Pedro, matiarichahahi eta te canchón. Tacahe, sucahepaipahi esu mavanara emá corregidor.

⁶⁷ Suímahapa emá Pedro, tiásacavahi. Suímararacapa eta mamira. Tásiha, suíchapa:

—Németeaca pítirichu ñichamuri eñi ñica Jesús, eñi nazareno —suíchapa.

⁶⁸ Émasera majicapapa:

—Vahi nímati emá péchajisihaquenehi. ¿Távihapuca pímatinenuhi píti? —máichapa.

Tacahe, tiyanapa éma eta te portón. Téchajicavanepa eta varayu. ⁶⁹ Suímahavarepa tiápechava esu esena.

Sumetacavacapa ena natiariqueneanahi, suíchapa:

—Éñi ñica eñi nachamuri ena téhicanahi eñi Jesús —suíchapa.

⁷⁰ Tiápechavavarepa emá Pedro tépiyacava vahi máimatihini emá Jesús. Tacahe, te tiyererehachichavare, ena natiariquenehi náichapa emá Pedro:

—Yátupiquene pítirichu machamuri emá maena Jesús, taicha eta péchajisira, tímaticarehi eta piáshairahi te Galilea —náichapa.

⁷¹ Tacahe, majicapapa:

—Máicuñacanuine emá Viya, te vahi nucucahe yátupina. Váhiquenesera nímati emá achane échajisihaquenehi —macahepa.

⁷² Enurujipa tiápechava téchajica eta varayu. Tíjahúchavapa téchava emá Pedro eta macayemaquenehi emá Jesús: “Te tamirahuinapaichaha eta apíhequenéna téchajica eta varayu, píti mapahenaripa eta pépiyacavayare vahi pímatinu”. Eta máechavairahi emá Pedro, tépanavapa tíyaha.

Námápa emá Jesús te mamirahu emá Pilato

(Mt 27.1-2, 11-14; Lc 23.1-5; Jn 18.28-38)

15 Te tijarahipa, tiápechavanavarepa tiúrujicavana namutuyaréni ena aquenucarohana, taicha náichuhaqueneanahi ena tuparairucana, éna escribánoana. Tiyaserejiricacanapa tájahapuca eta náicharacayarehi emá Jesús. Tacahe, nacuchucapa ticaitihapaipa eta námirapahi te mamirahu emá Prefecto Poncio Pilato. Eta máimairahi emá Pilato emá Jesús, mavarahapa máimatiyarehi éma. ² Tacahe, mayaserecapa:

—¿Yátupisareji réyvihí píti nayehe ena pijaneanana israelítana? —máichapa.

Emá Jesús majicapapa:

—Pétupicavahi eta juca piyaseresiranuhi. Yátupihí eta nurreyvahi —máichapa.

³ Tásiha, ena tuparairucana nametauchaipa emá Jesús, camuri eta maviurevahi náicha. ⁴ Tacahe, mápechavare mayasereca emá Pilato. Máichapa:

—¿Vahi péchajiuchova eta juca nametauchiravihí? Camuri eta piviuerevahi náicha —máichapa.

⁵ Émasera emá Jesús váhiquene majicapahini. Tásiha, máramipa emá Pilato.

Emá Pilato macavanairipipa eta náetatasiraya emá Jesús

(Mt 27.15-26; Lc 23.13-25; Jn 18.38-19.16)

⁶ Tiuri puiti, tatiarihi eta mayeherepihi emá Pilato te Páscuamuhuana. Macaiticayarehi emá émana preso mácani nayasearayarehi ena achaneana. ⁷ Tacahe, natiarihihi eta te cárcel ena ajairana ticaeratanahi. Ichape eta naviurevahi ena téhajiricacarahiana te revolución, nacapasirapahi ena achaneana. Te namuri, matiarihíhi emá achane ticaijare Barrabás. ⁸ Tásiha, ena achaneana nayaseacapa emá Pilato máichahini eta mayeherepi. Ánipa náicha:

—Vivaraha picha eta piyeherepi te Páscuamuhuana —náichapa.

⁹ Tacahe, mayaseremurihapa emá Pilato:

—¿Evarahapuca nucaítica emá eyehe Rey, iáquenu-muri eti israelítana? —macahepa emá Pilato. ¹⁰ (Taicha emá Pilato máimatiacaripahi eta nametauchirahi emá Jesús ena tuparairucana taicha nacapinaruhi éma.)

¹¹ Énasera ena tuparairucana náimitumuriharipa ena achaneana, eta nayaseasirayarehi émaina máuchucuha emá Barrabás.

¹² Tacahe, emá Pilato mayaseremurihavare. Máichapa:

—¿Tájahasica nícharacayare emá Jesús emá íjarechaquenehi Rey iáquenumuri eti israelítana? —máichamuripa.

¹³ Éna, tipiaracanapa eta najicapirahi:

—¿Pémetatareca te crusu! —nacahepa.

¹⁴ Tásiha, mápechavarepa mayaseremuríha, ánipa máicha:

—¿Tájaha tacayemahi eyaseacahi eta németataresiraya emá maca? ¿Tájahasica eta maviurevahi? —máichapa.

Énasera tipiaracanavare muracapanapa:

—¿Pémetatareca te crusu! —nacahepa.

¹⁵ Emá Pilato mavarahahi tiúriyarehi nayehe ena achaneana. Tacahe, mavanecapa ena suntaruana, ánipa máicha:

—Ecaiticaya emá Barrabás. Émasera emá maca Jesús, iámayare, éstacayare. Étatacayareva te crusu —máichavacapa.

Nacaecahijiricava emá Jesús ena suntaruana

(Mt 27.27-31; Jn 19.1-3)

¹⁶ Tacahe, ena suntaruana námápa emá Jesús tayehe eta náestasihayarehi te távirarehi eta guardia.

Náimichuhavarepa namutu ena apamuriana suntaruana númurivana. ¹⁷ Te náitauchapa eta náestasihíhi éma, namuriachapa eta muíriare mularume.

Náitsamemacapa eta itapepi eta majarapiyarehi.

Nanacapa te machuti. ¹⁸ Nacavayuemarajipa.

Náepuyumirauchavarepa, ánipa náicha:

—Tata, ípítitataji nayehevihíhi Rey ena israelítana! —nacahepa.

Náepuchisicapa eta te machuti tayehe eta curinaqui. Nátutuácavarepa. ²⁰ Tacahe, te títavanapa eta nacaete-

majirisirahi, navejamuhiacapa eta mularume. Nanacavarepa eta mamuirihachu. Tásiha, námapa tayehe eta macaetataiyayarehi te crusu. Náetatacapa ema Jesús te crusu

(Mt 27.32-44; Lc 23.26-43; Jn 19.17-27)

²¹ Eta napaisirapahi te calle, nácapajicapa ema achane ticaijare Simón. Éma, másihapahi te máesane. Napamicapa éma manaracuha eta macurusura ema Jesús. (Ema maca Simón, máuchusinehi te jena avasare Cirene. Éma, máiyahi ema Alejandro émapa ema Rufo.)

²² Tacahe, nacaitecapapa tayehe eta masihi nacaeta-tairare ticaijare Gólgota. ²³ Ánaquipa náesichinehi ema Jesús eta vino ticasiriquiama eta ipuruji tisucareama ticaijare mirra. Váhisera máerahini. ²⁴ Tacahe, náetatacapa éma te crusu. Ena suntaruana, nasuertehachapa eta mamuirihaini eta náijarajirisiracacayare.

²⁵ Te náetatacapa éma, las nuéveripa eta yáticarahi. ²⁶ Te tápusi eta macurusura, tatiarihivare eta ajureca táechajisihahi eta tiviuchahi eta máepenirayarehi. Ani tacahehi eta ajureca: “Ema Rey nayehe ena israelítana”. ²⁷ Natiarihivare ena apinana tiámerahiana. Ticaetatanahivare te machacaya, ema émana te mavaure, ema apana te sapa. ²⁸ Tacahe, tamutu títauchavahi eta táechajiruvana eta Sagrada Escritura, ani tacahe: “Náimijachahi ema nachamurihi ena namauriqueneana”.

²⁹ Tacahe, ena tiánucumirauchanapahi, tépiupiusicavanapaipa eta nacaecahirapaipahi ema Jesús. Ánipa nacahe:

—¡Pítitataji! Picahechajiruvahi eta piáquipaisirayarehíji eta Templo, piratahahivaréji pímicahava picatupíha eta arairu Templo te mapanayarericuhíji sache. Puiti vivaraha vímaha eta pítupajijiasiravahi. ³⁰ Piúcupaica te jara crusu. ¡Picatiuchava pítijivaina! —náichapa.

³¹ Énerichuvare ena tuparairucana nacaecahijiricavare, énapa ena escribánoana. Náichajiricácapa: —Ema mácacacha, macahehi eta máechajiriruvahi eta maratahairahíji macatiuchavaca ena apamuriana achaneana. Tásiha, puiti váhivare máratahahini émajivainahini macatiuchavahini eta te jara mávihahi. ³² Te yátupinahini Cristo, Reynahini viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini eta vímairainahini —nacahepa.

Ena tiámerahiana ticaetatanahivare te machacaya, énerichuvare nacaecahivare éna apanavare.

Eta máepenirahi ema Jesús

(Mt 27.45-56; Lc 23.44-49; Jn 19.28-30)

³³ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. ³⁴ Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

³⁵ Tacahe, ena natiarihiqueneanahi ena tisamanahi, ánivarepa nacahe:

—Esama. Ema maca achane mapiaracahi ema víyarahaini profeta Elías —nacahepa.

³⁶ Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca, machuchujicayarehi. Tacahe, máichapa:

—Ésamiricachucha. Vímahayare te títecapayarepuca macatiuchapana ema Elías —máichapa.

³⁷ Tacahe, tiápechavavarepa tipiaraca muraca ema Jesús. Tépenapa. ³⁸ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. ³⁹ Tásiha, ema nacapítara ena suntaruana romanoana, eta matupíhairahi máimarasirahi te mamirahu ema Jesús, masamirahi eta mapiarasirahi, ánipa macahehi:

—Yátupiquenerichuyapa Machicha ema Viya ema maca —macahepa.

⁴⁰ Tacahe, natiarihivare ena esenana. Náimarracahi, nayererehíhisera. Te nataracu, sutiaríhihi esu María Magdalena, esu Salomé, ésupa esu apana María. (Esu suca María, máenahi ema Jacobochicha émapa ema José.) ⁴¹ Ena nani esenana ena náumurivana ena téhicarairicanapahi téchapajiricanapahi ema Jesús eta mapaisirapahi te másihapa te Galilea. Natiarihivare ena camuriana apamuriana esenana náitecapaquenehi te Jerusalén, téhicanapahi éma.

Nacucupaicapa te crusu ema Jesús, náecarayarepa

(Mt 27.57-61; Lc 23.50-56; Jn 19.38-42)

⁴² Matiaríhivare ema achane ticaijare José †. Ticavasahi te Arimatea te Judea. Éma, tétavicavahi eta mapicauchacarevahi. Masuapahi ema Jesús eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarhana. Tacahe, te cáperehipa eta jena sáchequenehi, tétumechavapa ema José tiyanapa eta me Pilato, mayaseapanahi eta máquehe ema Jesús, mavarairahi máecarayare. Tacahe, tiyayauchavapa taicha téricayarepahi eta sache. Vahi táisapacarehíni náecararecáhini te yátimuhu, váhivare táisapacarehíni máejamiacáhini te jena sávarumuhu. ⁴⁴ Máraminehi ema Pilato eta máijahúchiravahi tépenavane ema Jesús. Tásiha, máimichuhapa ema nacapítara. Te títecapapa ema nacapítara, mayaserecapa te yátupíhipuca tépenaripa ema Jesús. ⁴⁵ Tásiha, eta mametasirahi ema nacapítara eta máepenirapahi ema Jesús, máisapapa ema Pilato eta máquehe ema Jesús. ⁴⁶ Tacahe, tiyanapa ema José. Mámapa eta tiúrina sávana mavachareruhi. Tásiha, macucupaicapa eta máquehe ema Jesús. Náyuruácapa tayehe eta sávana. Náiyaracuhapa tayehe eta máecari

† Ema maca José, vahi émaina ema maparape ema Jacobo ema táechajisiquenehi te versículo 40. Váhivare émaina ema José ema suima esu María, máenahi ema Viáquenu Jesucristo. Ema maca José, tatiaríhi eta mávacure tayehe eta Cabildo te Jerusalén. Émasera vahi máimicasiapavahini nayehe ena ticitianacanahi ema Jesús. (Pitanuca te libro Lucas 23.51.)

eta te mari nasecajueruhi. Tásiha, najihachapa te tapa-ja eta máecari eta ticheyame mari tajitacarequene.
⁴⁷ Sutiarihihivare esu María Magdalena ésupa esu apana María †. Náímararacahi, náimatipa eta nanasihahi eta máquehe ema Jesús.

Eta máechepusira ema Jesús eta te máecari
 (Mt 28.1-10; Lc 24.1-12; Jn 20.1-10)

16 Tacahe, te jena sache sávaruquenehi, téricaipa eta sache, tiyanapa esu María Magdalena, ésupa esu Salomé, ésupa esu apana María. Tivacharecanapa eta tǵiyequene perfume nayariasihayare eta máquehe ema Jesús. ² Tásiha, te apanapa sache, lumíncuquenehi, nayatirupa tiyanana eta te máecari. Te tiúchucapa eta sache, títécapanapaipa éna eta te máecari. ³ Eta napaisirapahi, tiyaserejiricanapaipa. Ánipa nacahe:

—¿Nájahapapucaini náequehepuichinahavini eta tajiha eta ñécari eñi Viáquenu eta mari tajitacarequene? —nacahepa.

⁴ Te títécapanapa, náimahapa eta márime tájinaripahi te tapajacura eta máecari. ⁵ Tásiha, tisiapanapa. Ánaqui náimahapa ema émana amaperu achane, mávihahi te vaure. Eta mamuiraha, tétavicava eta tajapuva. Tiáramecanarinehi ena esenana. ⁶ Ema amaperu achane máechajicavacapa:

—Vahi ecupica. Éti etanucapahi ema Jesús Nazareno, ema macaetataquenehihi. Májinaripahi, taicha ticaechepucasiripa. Yare, ímaha. Júcahi eta mávinehi. ⁷ Tiuri puiti, eyana emetaca ema Pedro, tásiha, namutu ena apamuriana echamuriana. Emetacavaca tiyanayare ema Jesús eta te Galilea. Ánaqui macuchapiaheyare emutu éti. Échavarichhipuca eta macayemaqueneanahi te achanerichaha —máichavacapa ema ángele.

⁸ Tacahe, tiúchucanapa eta te máecari. Tiyananapa tijunapanapaipa. Tiyayacareanapaipa taicha eta náramirahi. Eta nayanirahi, nájina nametaruihahini taicha eta napisirahi.

Tímerecavapa ema Jesús suyehe esu María Magdalena
 (Jn 20.11-18)

⁹ Tiuri, eta máechepusirahi ema Jesús te máecari te jena lumíncuquenehi te yáticarachichicha, sutivapa máimeresiavahi suyehe esu María Magdalena. (Esu suca María, esu máepachiaruhi ena siétequeneana éreanana te suáquehe.) ¹⁰ Tacahe, tiyanapa ésu, sumetapana ena suchamurianahi. Éna, tétavicavahi eta napanereresirahi, tǵyahanahi eta nacatisamurevairahi. ¹¹ Váhisera nasuapahini eta sumetarapihi esu María eta máechepusiraipa, machaviraipahi títareca, étapa eta máimeresiravahi eta suyehe.

Tímerecavapa ema Jesús nayehe ena apinana máimitureana
 (Lc 24.13-35)

¹² Te táequenepa eta juca, tímerecavavarepa ema Jesús nayehe ena apinana máimitureana eta napaisirapahi, nacaijuheirahi eta avasarechicha te tachacaya eta Jerusalén. Tiápamaichavahisera eta mamira. Vahi náimatívanehini éma. ¹³ Téhesera náimatipa éma, majunijiacavacapa. Tacahe, tichavavaneanapa nametapana ena apamuriana nachamuriana. Váhiquenevaresera nasuapahini ena apinana, eta nametasirahi.

Tímerecava ema Jesús nayehe ena mayeheana apóstoleana
 (Lc 24.36; Jn 20.19-21)

¹⁴ Tiuri, te táequenepa, tiúrujicavanahi eta nanisirahi ena óncequeneana apóstoleana. Tacahe, tǵjahúchavapa tímerecava ema Jesús eta nayehe. Macajachamurivarepa eta namasuapirahi eta nametarapianahi ena tímahanahi éma eta máechepusiraipahi.

Matuparaca ema Jesús ena apóstoleana
 (Mt 28.16-20; Lc 24.37-49; Jn 20.22-23)

¹⁵ Tacahe, máichavarepa:

—Eyana epaica te tamutu eta avasareana eta te juca apaquehe. Ecametarairuyare eta tiúrina echajirucava nayehe namutu ena achaneana. ¹⁶ Nucuchucuhavacayare namutu ena tisuapajirahianaya, ena ticaicachasianaya. Énaserá éna vahi tisuapanaya, ticaicuñanayare taicha tanasirichuhi eta napecaturana.

¹⁷ Ena tisuapajirahiana náimerecayare eta juca tiáramicareana: Náimijunijicayare ena éreanana nayehe ena achaneana, taicha námapicayare eta níjare. Náitucayare téchajicana tayehe eta apanana échajirucavana namaitucaqueneanainihi. ¹⁸ Te nacaratachhipuca eta quichareana, tájina táicharacaimahi. Te téranahipuca eta venéno, tájinavare náichavaimahi. Nanacayare eta navahuana nayehe ena nácani nacajumaqueneana, tásiha, tinaracanayare éna —macahepa.

Eta mayapirahi ema Jesús te anuma
 (Lc 24.50-53)

¹⁹ Tacahe, te títavapa tamutu eta mametarapianahi ema Viáquenu Jesús, tiyanapa tiyapa te anuma. Ema Viya macaejacapa ema Machicha te mavaure.

²⁰ Tacahe, tiyananapa eta te tamutu avasareana ena máimitureana. Ticametarairuanapaipa eta tiúrina echajirucavana. Ichape eta máimicatasiravacapahi ema Viáquenu. Tétavicavahi tajacapacarevahi máicha, eta náimiturapianapahi. Taicha máíjaracavacapahi eta náimeresirapahi eta tiáramicareana ticunachacareanahi.

Tamu tupa.

† Esu suca María, esu táechajisihaquenehi te versículo 40. (Te pivaraha pecha pitanuca Juan 19.25.)

San Lucas

1 Némunaruquene nuparape Teófilo, nucajurevi puiti apaesa pecha píti apanavare eta juca néchaqueneanahi núti. Ichapemurianahi ena vichamuriana tiájuequenehanahi tayehe eta máicharacavahi ema Viáquenu Jesucristo. Tásiha puiti, núti apanavare nájuequenehavare. Nucajarusinahi tamutu eta nájuequenehairahi, taicha tamutuhi nucayasesereru nayehe ena tinecapaequenehanahi, tímahanahi eta apaicape eta táepaniravahi eta máitairesirahi ema Viáquenu. ⁴Núti nuvaraha nímimatichavi apaesa yátupina pecha tamutu eta juca piáravahuanahi.

Em a ángele macametarapi eta máuchusirayare ema Juan Tícachasiricarahiyare

⁵Cape juca viásinequenehi te émarichaha ema Aluresi aquenucahi, réyhi tayehe eta jena provincia Judea, matiarihihivare ema émana achane, ticaijare Zacarías. Éma, náumurivanahi ena ticaijareana Abías. Eta náematanerepi éna, náechapajirica eta námava-huasana ena achaneana tayehe eta Templo. Esu mayena ema Zacarías ticaijaruhi Elisabet, mámariequenehihi ésu ema víyahaini Aarón. ⁶Ema maca Zacarías ésupa esu mayena, tájina náichiravainahini te mamirahu ema Viya. Tamutuhi náitaucha eta mavanairipiana ema Viáquenu. Tacahe, tájina náechajisiequenehihi nayehe ena achaneana. ⁷Nájinasera nachichainahini, macheruhi esu Elisabet eta suítare-sira. Váipavare ticachichanaimahi taicha ichavicana-ripahi.

⁸Te jena sache, náichuhapa ema Zacarías eta masiapirayare tayehe eta Templo te Jerusalén, taicha áñopahi eta masiapirayare. Tacahe, ticátuparácasipa éma. Émapa táetupiacahi eta máematanerepiyarehi máijuchayarehi eta incienso te táinahu eta mesa náijuchirarehi, taicha tacahehi eta nayeherepini ena israelítana. Tacahe, ema Zacarías tisiapapa te tajuhe eta cuarto tacapicahuquenehi, máijuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracanaripa éna. ¹¹Tiáamicarepa tímerecava ema émana ángele te mamirahu ema Zacarías. Mavaneruhi ema Viáquenu. Titupiharipa ema ángele te vaure tayehe eta mesa náijuchirarehi eta incienso. ¹²Tiáramecarine ema Zacarías eta máimairahi ema ángele. ¹³Émasera ema ángele máechajicapa:

—Vahi picupica, Zacarías —máichapa—. Ema Viya masamahi eta piyaseserepihi píti eta mayehe. Puiti esu piyena Elisabet ticachichayare. Juan eta máijare-

yare ema echichayare. ¹⁴Ichapeyare eta piúrisamurevayare te máuchucapa ema echichayare. Énaripa ena achaneana, ichapeyareva eta náurisamurévaya taicha eta máuchusirayare. ¹⁵Numetacavi: Ema pichichayare, ichapeyare eta macunachacarevayare mayehe ema Viya. Píti, vahi písapaimahi tera eta vino, étaripa eta apamuriana téracareana muracaqueneana. Taicha éma, eta máuchusirayare, mávaháruyarepahi ema Espíritu Santo. ¹⁶Éma pichichayare, éma tétupiricayare eta táurivayare eta napanereruana ena pijaneanana israelítana, tachavirayare eta nasuapirayare ema Viya. ¹⁷Ema maca pichichayare, éma títapumirauchayarepahi ema Viáquenu. Macutiyare eta máitupajijiasiravaini ema víyahaini profeta Elías. Ichapeyare eta máitusirayare eta macajimuyasirayare eta nasamureana ena achaneana apaesa tachava eta nasuapiraina ema Viya, tácuti eta nasuapajiraivainihi ena náchucanaveanainihi. Énaripa ena váinarajipanereruana, tisuapajirahanayareva máicha. Mametacavacayare ena achaneana natsecavaipa eta najacapirayare ema Viáquenu —máichapa ema ángele.

¹⁸Tásiha, ema Zacarías majicapapa. Ánipa macahehi: —Páurenusami, vaipa numaitacavaimahi nucachichahini, ésuripa esu nuyena. Ichavichavipa víti. Váhicha nusuapapajica eta juca vicachichairayarepuca —máichapa.

¹⁹Émasera ema ángele máichavarepa: —Núti nucaijare Gabriel. Núti mavanerunuhi ema Viya. Nutuparacasivaichuhi eta numetasiraviyare eta juca ecachichairayare. Piúriháine ichapenahini eta piúrisamurevainahini. ²⁰Púitiserá upaviyare. Eta ecutiarareyare piyehe taicha eta pimasuapiranuhi. Tiámáinucava te táitauchavapa eta juca numetaruvihí, péchajicainavarepa —máichapa ema ángele.

²¹Tacahe, ena achaneana nanasiqueneanahi te aneca nacuchaparairicaipaicha ema Zacarías, náramipa eta mayerevaipahicha te tajuhe. ²²Jéhesareinehi, te tiúchucapa ema Zacarías, vaipa máechajicahini. Náimaticapasera éna, eta máechajisirahi ema Viya te tajuhe. Tisuvererecapaipahi éma eta mavarairahi máimicutiarachavaca ena achaneana eta yátupirahi masamaquenehi. Úpapaipahi éma.

²³Tacahe, te títauchavapa tamutu eta jena sácheanahi eta matuparacasivahi, tianapa ema Zacarías tayehe eta mapena. Nueve caje eta mayerevayarehi eta mamaechajisirayarehi. ²⁴Tásiha, esu mayena Elisabet, ticajaripa ésu. Váipasera súchuchurecaini te supena. Váhivare sumetajiricahini. Tiámáinucavapa te títauchavayarepa eta cincoquenehi caje eta

sucajarirahi. ²⁵ Tétavicavahi eta súrisamurevahi eta susamiravahi ésu. Ánipa sucahe:

—Ichape eta ñijapanuiranuhi eñi Viya, tjaracanuhi eñi nuchichayare. Váipasare nayunacaimahi ena achaneana eta numacheruvahi —sucahepa.

Emá ángele macametarapi eta máachusirayare emá Jesús

²⁶ Tacahe, te sáisiquenepa caje, emá Viya mápechavare mavaneca emá ángele Gabriel tiúcupaica tayehe eta avasare Nazaret, tayehehi provincia eta Galilea. ²⁷ Máucupauchapa esu amaperu esena ticaijaru María. Ésu, tájina suímatiyahini emá ajaira. Matiarihipasera emá suímayarehi, emá ticaijare José. Téjocaripahi eta natratune. Ésu, mámariequenéinihi emá víyahaini rey David. ²⁸ Tacahe, emá ángele máucupauchapa ésu tayehe eta suávihihi. Máichapa ésu:

—Pícharacava, María. Piti manerejiruvihi emá Viya. Tétavicavahi eta piúricacarevayare taicha ichape eta majapanuiravihi éma Viya. Picachuricahi namutu ena apamuriana esenana —máichapa.

²⁹ Ésusera tiáramecainehi eta máechajisirahi emá ángele. Supanerequenhainehi tájahahipuca tacayemahi eta máechajisirahi emá ángele. ³⁰ Émasera emá ángele máichavarepa:

—Vahi picupica, María. Piti manerejiruvihi emá Viya. ³¹ Numetapanavihi puiti eta picajarirayare. Ajairayare emá pichichayare. Jesús eta máijareyare. ³² Tétavicavaya eta napicauchirayare ena achaneana taicha Machichayarehi emá Viya. Ichapequeneyare eta aquenucairayare éma taicha emá Viya manacayareva eta mávacureyare aquenucaire. Macutiyaehi eta aquenucairahi emá máchucaini David. ³³ Éma téchayarehi namutu ena pijaneanana israelítana. Máepencacayare eta aquenucairayare —máichapa emá ángele.

³⁴ Tásiha, esu María, sujicapapa:

—¿Tájahasica táicharacavayare eta juca? Taicha núti nájinaichaha nímainahini —suíchapa.

³⁵ Émasera emá ángele máichavarepa:

—Picachichayare taicha eta máitupajijiasiravahi emá Viya. Timicauchaviyare eta majaraiva, tásiha, tisiapahacavinapa emá Espíritu Santo. Eta tacahe, emá amuya pínaruyare, sántoyare éma, taicha machichayarehi emá Viya. Náimatiyare namutu eta machichairahi emá Viya. ³⁶ Picutiya esu pijaneana Elisabet, énerichuvare ticajaripahi ésu. Tayanapanehi ichavicachicharipahinéni ésu, macheruinihinéni. Sáisiripasera caje eta sucajarirahi puiti. ³⁷ Taicha emá Viya, tájinaquene máemáituca éma —máichapa emá ángele.

³⁸ Tacahe, esu María sujicapapa:

—Núti ñivanaranuichuhi eñi Viya. Nutiarihi puiti. Nímahanuinepa eñi, eta ñícharacanuypare te ñivanairipiana —suíchapa emá ángele.

Tacahe, eta masamirahi emá ángele, tiyanapa tichavahi.

Esu María suéjirapanapa esu sujaneana Elisabet

³⁹ Tacahe, te jena sácheana titátájipa esu María tiyana tayehe eta avasarechicha te tataracucujianahi eta márijuecu tayehe eta provincia Judea, suávasahi esu sujaneana Elisabet émapa emá Zacarías. ⁴⁰ Te títecapapa esu María tayehe eta napenahi, suéchajicapa esu Elisabet. ⁴¹ Te susamapa esu Elisabet eta suahu esu María suéchajisirahi, tiyamuricainehi eta amuya te sujuhe esu Elisabet, enevanepa mávahácahi ésu emá Espíritu Santo. ⁴² Tacahe, téchajicapa muraca esu Elisabet, suíchapa:

—Píti, tétavicavahi eta piúricacarevahi ñicha eñi Viya. Picachuricahavihi vimutu viti esenana. Éñiripa eñi pichichayare, tétavicavahivare eta ñicunachacarevaya. ⁴³ Nusapihasamipa núti péjirapananuhi piti ñénaviyarehi eñi Náquenu. ⁴⁴ Te nusamapa eta piahu eta péchajisiranuhi, tiyamuricainehi te nujuhe eñi nuchicha, taicha eta tiúrisamuréinehi éñi. ⁴⁵ Tétavicava eta piúricacarevaya píti taicha eta pisuapajiravahi ñe Viya. Títauchavainapa tamutu eta ñimetarapihi eñi Viáquenu eta piyehe —sucahepa esu Elisabet.

⁴⁶ Tacahe, esu María sujicapapa:

—Ichapemurihi te náchaneva eta nucunachirahi eñi Viáquenu. ⁴⁷ Taicha tétavicavapa eta táurisamureva eta nusamure ñicha eñi Viya Ticatiurahiquene eta nuyehé. ⁴⁸ Taicha éñi, vahi ñépurunuhini páurenuhinéni nútisami. Tétavicavahisera eta ñijapanuiranuhi nuti ñivanarahi. Nútipa ñinerejicanuhi, tásiha, ichapenapapuca eta nacapinarunuiraya namutu ena achaneana natiarihiquenehi puiti, énapa ena arajuruanayare. “Tétavicavapa eta súricacarevahi esu María” nacáhénapapuca. ⁴⁹ Tétavicavapa eta ñítupajijiasiravahi eñi Viya, tjaracanuhi eta núrivayarehi ñicha. Jéhevare éñi, Sántoquenehi eta ñijare. ⁵⁰ Eta tacaheyare eta ñijapanuirahaviyare puiti, énapa namutu ena arajuruanayare, nácani típicauchanayare éñi.

⁵¹ Eñi Viya, ñíjaracayare eñi nuchichaya eta ñítupajijiasiravaya ichape. Tásiha, ñicaerajicavacaya ena ticasíñavavairicana, énapa ena váinarajipanereruanahivare. ⁵² Nácani aquenucana nacatianacainapapuca, ñicapaquechavacayarehisera éñi. Nasapihapa ena páureana-samihi, ñinerejiruanaya éna, ñijupahanayare. ⁵³ Yá-tupiya eta ñíjarasiravacayare eta táetaviuchiraya eta náuricacarevaya namutu ena ticasíñavanayare ñiyehé. Énasera ena tímijachavanahi tájinahini nácamunuhini, ñicaerajicavacaya namutu.

⁵⁴ Eñi Viya acane tjaracavahi ñiyehé eñi viáchucaini Abraham énapa ena ñíamariéqueneana, eta ñíjarasiravacainapa eta táetaviuchiraya eta náuricacarevanaya. Vahi ñémitisicaimahi eñi Viya eta ñéchajiriruvahi ñíjararuvahi. Puiti, eñi nuchichaya tiámayarepahi tamutu eta viúricacarevanaya viti israelítana. Máitavacayarehi éta —sucahepa esu María.

⁵⁶ Tásiha, sunasipanapa esu María te supena esu Elisabet. Mapana caje eta suyerevahi. Te táequenepa, tichavavarepa te supena.

Eta máuchusira ema Juan

⁵⁷ Tacahe, títauchavapa eta sucajera esu Elisabet. Suínacapa ema suchicha. ⁵⁸ Tiyananapa ena sujaneanana énapa ena suchacayapenanahi, náejirapana ésu. Taícha eta nasamairirisirahi eta súrivahi maícha ema Viya eta majapanuirahi ésu. Tiúrisamureanarinehi namutu. ⁵⁹ Tacahe, te óchoquenepa sache eta máuchusirahi ema amuya, nayanauchapa ena najaneanana, namarcachapanayarehi ema amuya; taícha tacahehi eta nayeherepihi. Tásiha, navarahapa nanacayarehi eta máijareyarehi Zacarías, mámapicayarehi eta máijare ema máiya. ⁶⁰ Ésusera esu maena ema amuya vahi suvarahahini. Suíchavacapa:

—Juan eta ñíjareyare.

⁶¹ Tásiha, éna nacahepa:

—¿Tájaha tacayema? Namutu ena pijaneanana, nájina ticaijarena eta Juan —nacahepa.

⁶² Tásiha, éna náimicutiarachinapa eta nayaseresirahi ema Zacarías tájahapuca eta máijareyarehi maícha éma. ⁶³ Tacahe, ema Zacarías tiyaseserecapa eta táblamechicha, májuchihayarehi eta máijareyarehi ema machicha. Eta ajureca, ani tacahehi: “Juan eta máijareyare”. Tésenijiricacanarinehi éna taícha eta máijareyarehi ema amuya. ⁶⁴ Tásiha, tíjahúchavapa tichavapa eta máechajisira ema Zacarías. Macunachapa ema Viya eta máurisamurevahi. ⁶⁵ Ichape eta tiáramicarehi nayehe ena natiarhiqueneanahi. Nasamairircavanepa namutu ena távacuanahi eta avasarechichana tayehe eta provincia Judea. Náechajisihapa eta juca nasamairirivanahi. ⁶⁶ Namutupa napanerequenehahi. Nácani tisamairircanapahi, tiyaserejiricacanaripa. Ánipa nacahe:

—¿Cañarihi tacayemaquenehi eta juca máuchusirahi ema amuya? —nacahepa.

Tásiha, ema amuya, tétavicavahi eta majaneasirahi ema Viya eta majurusirapaipahi.

Eta majirarapi ema Zacarías

⁶⁷ Tacahe, eta jena sáchequenehi eta macamarcairahi ema amuya, étaripa eta nanasirahi eta máijareyarehi, téchajicapa ema Zacarías. Macunachaipa ema Viya, taícha mávahácaripa ema Espíritu Santo. Ánipa macahehi:

⁶⁸ —Tétavicavapa eta macunachacareva ema Tata Vicaiyaquene, ema véhiruhi vimutu viti israelítana. Taícha tíjapanuhavihi vimutu viti machaneranahi, ticuchucuhahaviyarehi. ⁶⁹ Tíjaracahaviyarehi puiti ema yátupiqueneyare eta macatiuraivaya, ema manerejiruhi te namuri ena mámariequeneanainihi ema David, ema mavanarainihivare ema Viya. ⁷⁰ Títauchavaipahi eta náechajirivanahi ena santo profetanaini acane, eta nametacasivanahi me Viya. ⁷¹ Taícha tacahehi eta matratunehi ema Viya mayehe ema viáchucaini Abraham. Ema Viya tíjaracahavi eta majapanuiravacayarehi ena viáchucanaveanaini, énapa ena ticachichahaviana, vítipa puiti. Énerichuvare tíjaracavahi eta

mamaemitisiraya eta macatiuchirahaviyare nayehe ena ticatianacahavianahi. ⁷⁴ Ema Cristo manerejiruhi ema Viya, ticatiuchahaviyarehi taícha mamavarairahi vipicahini, nacuijahivaréni ena nahapapicahavihini eta vicaemataneasirayarehi éma. ⁷⁵ Eta mavarahaquenehi tiúriyare eta vítaresirayarehi tamutu sácheana, tájina víchiravaimahi te mampirahu éma.

⁷⁶ Pítiripa, piti nuchicha, píchuarecasivaichuhi mayehaviyare profeta ema Tata Vicaiyaquene taícha píti pínapumirauchayarepahi ema Viáquenu Cristo. ⁷⁷ Pétupiricayarehi eta nasamureana ena achaneana, yátupinapa machaneranayarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivare eta napecaturana. ⁷⁸ Puítiripa, eta máemunasirahavihi ema Viya, macucupaisinahavihi te anuma ema Machicha. Éma, tímimatichahavinapa eta majaraiva ema Tata Vicaiyaquene éta-pa eta táuriquene achene ticaijuhe mayehe. Máetu-carávacayare eta nasamureana ena ticatisamureanahi, nácani tépenanayarehíni —macahepa ema Zacarías.

⁸⁰ Tacahe, ema amuya eta majurusirahi, tiámavapahi eta masuapajiraivahi mayehe ema Viya. Váhivare étainahini te tajuhe eta avasare eta majurusinehi. Vámahicuruhahi eta majurusirahi. Tiámainucava te ajairapa, tímerecavapa nayehe ena majaneanana israelítana, tépanavapasera ticametarairu.

Eta máuchusira ema Jesús

(Mt 1.18-25)

2 Tacahe, te jena áñoanahi cape juca viásinequenehi te émarichaha aquenucahi ema Emperador Augusto, matiarihivare ema apana achane ticaijare Cirenio, majupahahi ema Augusto. Prefectohi éma, tayehe eta avasareana. Ticaijare Siria eta mávihahi †. Tacahe, te jena sácheana, ema Augusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipi. Tánapuiruhi censo maícha ema Emperador Augusto.

⁴ Tacahe, tiyanapa ema José. Mámapa esu mayena María. Ticajaripaipa ésu. Tacahe, tíuchucanapa éna tayehe eta avasare ticaijare Nazaret te Galilea. Nacaijuhepa eta avasare ticaijare Belén te Judea, eta mávasainihi ema aquenucaini rey David. Étarichuvare mávasahi ema José, taícha ema José mámariequenehi ema David. Tiyananapa ticatupanayarehi.

⁶ Tacahe, títecanapa te Belén. Tájinaiipasera táviravainahini eta te pétiana eta náitecapihahini taícha camuriqueneanahi ena achaneana náitecapaque-neanahi. Tacahe, tisiapanapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, tínacapa jena yati. Suínacapa ema amuya ema suárachichahi. Tacahe,

† Te jena año, matiarihivare ema ichapequenehi aquenuca ticaijarehi Aluresi. Éma, reyhi tayehe eta departamento Judea.

suáyuruacapa eta te mámaratataji pañal. Sucaivecapa ema amuya alauchu.

Ena pástulérúana ticametacasianapa nayehe ena ángeleana

⁸ Te vámahi te tachacaya eta avasare Belén, natiarihihi ena pástulérúana. Éna, najaneacahi eta nayeheana uvesana te jena yátiquenehi. ⁹ Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástulérúana eta majaraivahi éma. Tiáramecanarine éna. ¹⁰ Tásihase, ema ángele máichavacapa:

—Vahi ecupica. Yare, jucarihi eta tímitecanuhi núti numetapanahere. Tétávicava táurismurécavaya nayehe namutu ena achaneana. ¹¹ Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticajare Cristo Viáquenu. ¹² Eta tacahe, nímicucutiarachinaheyare eta ímairaya: Echimapayare ema amuya ticayuruahahi te mámaratataji pañal. Tívecahi eta te tajuhe eta peti tapena eta sárareana —máichavacapa ema ángele.

¹³ Tásiha, tíjahúchavapa tímerecavana ena camuriqueneana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

¹⁴ ¡Tétávicavapa eta vicunachirahi ema Viya vimutu viti viávihanahi te anuma! ¡Jéhevare puiti, tiúricavanainapa ena achaneana te juca apaquehe, ena manerejiruanahi macatajiruanahi ema Viya! ¡Tájinainapa náichiravaimahi! —nacahepa.

¹⁵ Tacahe, tiyananapa ena ángeleana, tichavana te anuma. Tásiha, náichacacapa ena pástulérúana:

—Yare, viyana te Belén. Viyana vímahapana eta juca mametaruhavihi ema ángele mavaneruhi ema Viya Viáquenu —náichacacapa.

¹⁶ Tacahe, titátájianapaipahi tiyanana. Jéhesareinahi, te títecapanapa, nachimapainehi esu María émapa ema José. Matiarhiharéipahi ema amuya. Tívecahi éma eta te tajuhe eta peti tapena eta sárareana. ¹⁷ Te náimahapa tamutu, tépanavanapa náemechapa. Amairpahipa naecha eta mametarpianahi ema ángele eta máuchusiraipahi ema amuya. ¹⁸ Tacahe, náraminehi namutu ena achaneana eta nametarpianahi ena pástulérúana. ¹⁹ Tásihase, esu María supanerequenehainehi te susamure tamutu eta juca susamaqueneanahi. ²⁰ Tacahe, ena pástulérúana tichavanapa tayehe eta te najanearesihahi eta uvesana. Nacunachinehi ema Viya te anuma táichavene eta máechajiriruvahi ema ángele, táichavenevare eta náimairahivare ema amuya alauchu. Étaichuhi tachehi eta macayemaquenehi ema ángele.

Námapa ema amuya Jesús te Jerusalén, náimerepana tayehe eta Templo

²¹ Te óchoquenepa sache eta máuchusirahi ema amuya, namarcachapa éma taicha tacahehi eta

nayeherapi ena israelítana. Tacahe, nanacapa eta máijareyare Jesús. Eta máijare máimijarechaquenehi ema ángele te sucajariyarepa esu maena María.

²² Tacahe, te cuarentaquenepa sache eta suínasirahi esu María, tiyananapa te Jerusalén. Eta tímiyanavacahi éna, náimerepanayarehi ema amuya mayehe ema Viya Viáquenu. Taicha ema Viya macavanairipihi eta te Sagrada Escritura eta májurehi ema víyahaini Moiséini, ánipa tacahehi: “Te ajairapuca ema mácani suárachicha esu esena, ímerecayare nuyehe; íjaracanyuare taicha nícuchichuhi ema”. Énerichuvare náitauchayarehi eta juca apana vanairipi tayehe eta napachihairaina ena esenana eta te táequenerapa eta náinasira. Ánipa macahe: “Esu súcani esena arainacahi, suíjaracasichanupana eta apihina paluma símarune; te váhipuca, apina paluma suítatiqueneana, amairuhichichanasera”.

²⁵ Tiuri, matiarhihi te Jerusalén ema émana achane ticajare Simeón. Tétávicavahi eta máuriva. Tipicaurahi éma. Émarichu mávaháruhi ema Espíritu Santo. Ticuchapavaipahicha ticaimairuvaipaicha éma eta máimatiraya ema Cristo, éma ticaurisamurerahi nayehe ena achaneana majaneanana israelítana. ²⁶ Taicha ema Espíritu Santo mametacariipahi ema Simeón eta vuíchaha tépenavanemahi éma, táicha máimatinumayarehi ema Cristo mavaneruyarehi ema Viya.

²⁷ Tiuri, te jena sache, ema Espíritu mavanecapa ema achane Simeón mayana eta te Templo. Tacahe, títecapanapa ena ticachichana ema Jesús. Námapaipa ema amuya. Náitauchayarehi eta vanairipiana taicha eta máuchusirahi ema suárachichahi. ²⁸ Tacahe, te máimahapa ema Simeón ema amuya, mavehapa, majupacapa. Tásiha, macunacharinehi ema Viya te anuma. Macahepa ema Simeón:

²⁹ —Tiuri puiti, Tata Náquenu te anuma, nuvarahapa nunaraca te juca apaquehe, nuti pivanarahi. Taicha núsamurepa eta nímairaipa ema Cristo. Étaichuhi eta pimetarunuhi. Nímatipa ema Ticatiurahi quene-yarehi, ema pivaneruhi pitupararui. ³¹ Éma, tímaticareya picha nayehe ena achaneana ticavasanahi eta te tamutu avasareana. ³² Ticunachavanarinehi ena pinerejiruaana israelítana. Tíjarahinevare te nasamure eta nacunachirahi. Éma, timicauchavacaya ena apamuriana achaneana apavasanana apaesa náimatiyare ema Viya —macahepa ema Simeón.

³³ Náraminehi ena ticachichana eta máechajirivanahi ema Simeón mayehe ema amuya.

³⁴ Tacahe, ema Simeón mayaseacapa ema Viya eta náurivaina éna. Tacahe, máichapa esu María esu maena ema amuya Jesús:

—Pímaha. Ema maca amuya, matuparacasivaichuhi me Viya eta máimituresirayare eta máechajiriruvana ema Viya. Natiarihiyaresera camuriana ena vijaneanana israelítana énajivayare tichavanayare, taicha náepuruyare ema pichicha, nacatianacayareva. Tásiha, natiarihiyarevaresera ena apamuriana vijaneanana tinaracanayare tiúricavanayare taicha eta nacasiñairaya éma. ³⁵ Étainapa tacaecheraiyaya eta

napaneruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táíñehiqueneyare máíchararacavayare ema pichicha. Tímicutijiricavayare tayuvarachini eta pisamure eta tumare —máichapa ema Simeón.

³⁶ Tiuri, sutiarihivare esu ésuna esena ichavichachicha. Ticametarairurahi ésu. Ticaijaruhi Ana. Ema suíyaini ticaijaréni Fanuel. Ésu, mámariequenehi ema víyahaini Aser. Eta suámaperuvahi ésu, siete año eta sucachanerahi ema suímaini. ³⁷ Tásiha, ochenta y cuatro áñoripahi eta suépenaimavahi. Sunasiquenehi supapenahi ésu eta te Templo. Tamutuhi sácheana, yá-tiana, tiyujaracahi ésu. Suhayunachahivare. ³⁸ Tacahe, ema Simeón téchajiricavainirichaha, titecapanecha esu Ana. Eta suímairahi ema amuya Jesús, sucunacharinehivare ésu apanahivare, suhasulupayachapa ema Viya máichavene ema amuya. Tásiha, sucametarairupa mayehe ema amuya. Suéchajisihahi éma nayehe ena tisuapajirairahana ticuchapanahi eta máitecapirayare te Jerusalén ema Cristo.

Tichavanapa eta te návasa Nazaret

³⁹ Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tichavanapa eta te Nazaret te Galilea, te návasaichuhi éna. ⁴⁰ Tacahe, ema amuya Jesús tiúrijuruhi. Túmehi. Téchemarahihi, tamutu maecha, taicha mamunavahi me Viya.

Ema Jesús téchajiricava nayehe ena máestroana

⁴¹ Tiuri, tamutu áñoana te Páscuamuhuana, eta nayeherepi ena ticachichana ema amaperu Jesús, tiyananayarehi tayehe eta avasare Jerusalén. ⁴² Tacahe, ema Jesús, te macayehepa doce año, tatuparacaripahi ena ticachichana náimerepanayarehi éma, námayarehi tayehe eta Jerusalén, náimimatichayarehi eta piesta ticaijare Pascua.

⁴³ Tiuri, te jena táequenerapa eta piesta, tichavanapa te napena. Tíminasichavapasera ema amaperu Jesús eta te Jerusalén. Eta napaisirapahi te achene, vahi náejacavanehini ena ticachichana, ⁴⁴ taicha náimijachahi matiarhipahi éma te namuri ena achaneana nacachanequeneanapahi. Étanaripahi sache eta napaisirahi, napaenumavapa náejacahi éma. Te jena cáperehiquenepa, natanucapa te namuri ena najaneanana nacachanequeneanapahi. ⁴⁵ Májinasera náichimavahini. Tacahe, tichavanavarepa te Jerusalén, natanupanayarehi éma. ⁴⁶ Tacahe, te jena mapanquenepa sache eta natanusirahi, napaenumavapa náetupiacahi ema Jesús tayehe eta Templo. Macachanemurihi, téjacahi te namuri ena máestroana. Masamararacavacahi, mayaseremurihavacahivare éma apanavare. ⁴⁷ Ichaperinehi eta náraminehi namutu eta náimairahi eta máechemaraivahi, taicha táurivapahi eta majicapiravacapahi éna, taicha eta máechemaraivahi. ⁴⁸ Tacahe, tiáramivanarinehi ichape

ena ticachichana te náetupiacapa. Tásiha, suíchapa esu maena:

—Nuchicha, ¿tájaha tacayema píchahavihi? Ichape-muri eta vicañamarasiravahi pícha. Vitanujiriricavihi, núti éñipa eñi piya —suíchapa esu maena.

⁴⁹ Tacahe, ema Jesús majicapapa:

—¿Tájaha tacayema, meme, eta etanujiricanuhi? ¿Váhipuca échahini éti eta návihairahi eta ani? Níchayare eta máemataneana ema Tata —macahepa ema Jesús.

⁵⁰ Énasera vahi nacaicutiarahini eta macayemaqueneanahi ema nachicha Jesús. ⁵¹ Tacahe, tiyananapasera tichavana te návasahi Nazaret. Ema Jesús, tisuapajirahihi nayehe ena ticachichana. Esu maena María tamutuhi supanerequenehahi te susamure eta juca susamaqueneanahi.

⁵² Tacahe, ema Jesús tijurucapaipa, tijuruhacapapavare eta máquehe, tacachanepahisera eta máitupajijiasiravahi. Máimicatacachi ema Viya. Tétavicavahivare eta náemunasirahi éma, ena achaneana.

Ema Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruhana

(Mt 3.1-12; Mr 1.1-8; Jn 1.19-28)

3 Tacahe, eta máepeniraipahi ema aquenucaini Augusto, tisiapapa ema Tiberio máitsivaquenehi. Émapa Emperadorhi. Quince áñoripahi eta macatuparahairahi. Ema Poncio Pilato, émaripa prefectohi tayehe eta departamento Judea. Tásiha, ema Herodes Antipas, machicha ema Aluresini, prefectohivare tayehe eta departamento Galilea. Ema maparape Felipe, prefectohivare éma, tayehe eta departamento Iturea étapa eta Traconite. Ema Lisanías, prefectohivare tayehe eta departamento Abilina. ² Te Jerusalén, ema Caifás, corregidorhi. Énerichuvare típicauchacarehi ema Anás, pasado corregidor, máimachuca ema Caifás.

Tacahe, te jena sácheanahi, ema Juan machicha ema víyahaini Zacarías, ajairaripa. Manasirichahahisera tayehe eta mávapahi majurusinehi. Tásiha, ticametasipa ema Juan eta mayehe ema Viya eta macametarairuirayarepa eta máechajiriruvana.

³ Tacahe, tiyanapa tipaicahi ema Juan tayehe eta avasarechichana tiávihanahi te tachausti eta cajacure Jordán. Mametacavapaipa ena achaneana. Ánipa maicha:

—Ítsivacha eta epanereruana. Éneuchava mayehe ema Viya apaesa maperdonachahe eta epecaturana. Te éneuchavapuca, núti níchasicahénapa —máichapa.

⁴ Ema maca Juan, émaripa ema máechajisiquenehi ema Viya eta te Sagrada Escritura, taicha ánaquiapariipahi eta áñoana acane, ema Viya mametacapa ema víyahaini profeta Isaías eta mapaneruhi, eta mavanesisirayare ema Machicha te juca apaquehe. Eta tímitecachi ticatiurahiyarehi. Énerichuvare matiarihiyareva ema apana achane máichuhaqueneharyarehi ema

Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ema Machicha ema Viya. Tacamunuhivare yátupina eta nacasiñairavayarehi mayehe, náinajicayarehivare eta nacasiñavavaisirahi, étapa eta navayuaravahi. Nasapihahi tijapanurahianainapa éna. Tásiha, te máitecapapa ema ticatiurahiyarehi, éma máimimati-chainapa namutu eta najacapacarevaya me Viya namutu ena ticasíñavana mayehe.

⁷ Tacahe, ena achaneana tiyananapaipa napaucha-paipa ema Juan, navarahapa ticaicachasianayare eta mayehe. Tásiha, éma máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairirichahipuca eta járajapairayarepa eta táíñehiqueneyare ecuñaraqú. Evarahahipuca iúchucuhayare. ⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímerecava eta ínajisiraya eta epecaturana. Váhivare ecucajamurava eta mámariequeneárehehi ema viáchucaini Abraham. Taicha tayanapane mámariepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mavarahapuca, vahi májecarachaimahi máepiyaca achaneanaina eta juca mari, mavarairainahi yátupina ena mámariequeneanaina ema Abraham. ⁹ Ecauneuchava, taicha tiánehipa títecapauchaheyare eta ecuñaraqú nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijiricavaipa te máechucayarepa ema achane eta yucuqui máhireana; tásiha, máijuchainapa tamutu. Ene nacaheyare ena máeneuchavarahana —máichavacapa ema Juan.

¹⁰ Tásiha, ena achaneana nayaserecapa:

—¿Tájahasica eta vícharacavayare eta viúrivaina?

¹¹ Ema Juan majicapapa:

—Ecajirahiyare. Mácani tatiarihi apina eta macamisa, máijaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nanicaquene —máichavacapa.

¹² Te jena sácheana, náitecapauchavare ema Juan ena ticobrarerahiana eta impuesto. Navarahapa ticaicachasianayarehi. Nayaserecapa ema Juan, náichapa:

—Maestro, ¿tájahapuca vícharacavaini eta viúrivainaini víti apanavare? —náichapa.

¹³ Majicapapa ema Juan:

—Vaipa ecuapechava ecuvayuyujica eta ecobresira, tátupiruva jácani tavanairipihí eta ley —máichapa.

¹⁴ Énerichuvare náitecapaucha ena suntaruana. Nayaserecavare ema Juan, náichapa:

—Víti apanavare, ¿tájahapucaini vícharacavayare eta viúrivaya? —nacahepa.

Máichavacapa éma:

—Vaipa ecuverejica eta náimahaqueneana ena achaneana. Váipavare ecuipicarareca. Nacuijapa

ecuepiyequeneha. Tarataripa tacurisamurechahe eta evachasana —máichavacapa.

¹⁵ Ena achaneana ticunevanaripaicha eta mayehe ema Juan, náimijachaipahi émaripa ema Cristo nacuchapaquenehi, cátiurahiyarehi. Váhisera námutu-imahi. ¹⁶ Tásihasera ema Juan máichavacapa:

—Yátupi núti nícachasicahéhi te une. Ávanepaipahisera mácani yátupiquene Cristo. Éma, tiápajupanavahi nuyehe núti, eta mapicauchacarevahi. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, tícachasicahyareva; tíjaracahyareva ema Espiritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yucu. ¹⁷ Puiti éma márājapainapa tinerejiricainapaipa nácani yátupiqueneanahi téhicanayare. Máunacainapa éna. Ticutinapa mácani achane te tiácatayajiricahi eta arusu. Máunacainapa. Tásiha, máquijicapa eta tapiraquiji, máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta tamuruira —máichavacapa ema Juan.

¹⁸ Tacahehi eta juca máechajisiravacahi ema Juan. Ichape eta maconsejachiravacahi ena achaneana, máimitusiravacahi eta máechajiriruva ema Viya.

¹⁹ Émaripa ema Herodes Antipas ema aquenucahi, maconsejachahivare vahi macuimiyanava macuveha esu Herodías, mayenahi ema maparape Felipe. Váhivare macuimiyanava macuquicha eta apamuriana táíñemahiqueneana máichaqueneana. ²⁰ Émasera ema Herodes vahi masupahini. Masapiharichucha tisemahi, máimicaratacapa ema Juan, macasiapayarehi te cárcel.

Eta macaicachasirahi ema Jesús

(Mt 3.13-17; Mr 1.9-11)

²¹ Tiuri, te tamirahupaichaha eta macaeratairaya ema Juan, tímiyanavaichahahi máicachasicavacahi ena achaneana. Étana sache, máitecapauchapa ema Jesús, mavarairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tíjuhúchavapa téjiaca eta anuma. ²² Tiúcupaicapa ema Espiritu Santo, mavasimahipaipa eta paluma eta máimahi. Matupiruruchapa te mápusi ema Jesús. Tásiha, nasamapa eta mahu ema Viya te anuquehe. Ánipa macahehi:

—Pítira nuchicha némunaruquene. Núrisamurecha piyehe —macahepa.

Ena achaneana máchucaequeanaini ema Jesús eta acane

(Mt 1.1-17)

²³ Tiuri, ema Jesús, macayeheripahi treinta año te tinacuchavapa tímiturecahi nayehe ena achaneana. Éma, náimijachaquenehi machicha ema José.

Ema máiyainihi ema José, ema Elí.

²⁴ Ema máiyainihivare ema Elí, ema Matat.

Ema máiyainihivare ema Matat, ema Leví.

Ema máiyainihivare ema Leví, ema Melqui.
 Ema máiyainihivare ema Melqui, ema Jana.
 Ema máiyainihivare ema Jana, ema José.
²⁵ Ema máiyainihivare ema José, ema Matatías.
 Ema máiyainihivare ema Matatías, ema Amós.
 Ema máiyainihivare ema Amós, ema Nahum.
 Ema máiyainihivare ema Nahum, ema Esli.
 Ema máiyainihivare ema Esli, ema Nagai.
²⁶ Ema máiyainihivare ema Nagai, ema Maat.
 Ema máiyainihivare ema Maat, ema Matatías.
 Ema máiyainihivare ema Matatías, ema Semei.
 Ema máiyainihivare ema Semei, ema José.
 Ema máiyainihivare ema José, ema Judá.
²⁷ Ema máiyainihivare ema Judá, ema Joana.
 Ema máiyainihivare ema Joana, ema Resa.
 Ema máiyainihivare ema Resa, ema Zorobabel.
 Ema máiyainihivare ema Zorobabel, ema Salatiel.
 Ema máiyainihivare ema Salatiel, ema Neri.
²⁸ Ema máiyainihivare ema Neri, ema Melqui.
 Ema máiyainihivare ema Melqui, ema Adi.
 Ema máiyainihivare ema Adi, ema Cosam.
 Ema máiyainihivare ema Cosam, ema Elmodam.
 Ema máiyainihivare ema Elmodam, ema Er.
²⁹ Ema máiyainihivare ema Er, ema Josué.
 Ema máiyainihivare ema Josué, ema Eliezer.
 Ema máiyainihivare ema Eliezer, ema Jorim.
 Ema máiyainihivare ema Jorim, ema Matat.
³⁰ Ema máiyainihivare ema Matat, ema Leví.
 Ema máiyainihivare ema Leví, ema Simeón.
 Ema máiyainihivare ema Simeón, ema Judá.
 Ema máiyainihivare ema Judá, ema José.
 Ema máiyainihivare ema José, ema Jonán.
 Ema máiyainihivare ema Jonán, ema Eliaquim.
³¹ Ema máiyainihivare ema Eliaquim, ema Melea.
 Ema máiyainihivare ema Melea, ema Mainán.
 Ema máiyainihivare ema Mainán, ema Matata.
 Ema máiyainihivare ema Matata, ema Natán.
³² Ema máiyainihivare ema Natán, ema David.
 Ema máiyainihivare ema David, ema Isaí.
 Ema máiyainihivare ema Isaí, ema Obed.
 Ema máiyainihivare ema Obed, ema Booz.
 Ema máiyainihivare ema Booz, ema Salmón.
 Ema máiyainihivare ema Salmón, ema Naasón.
³³ Ema máiyainihivare ema Naasón, ema Aminadab.
 Ema máiyainihivare ema Aminadab, ema Aram.
 Ema máiyainihivare ema Aram, ema Esrom.
 Ema máiyainihivare ema Esrom, ema Fares.
 Ema máiyainihivare ema Fares, ema Judá.
³⁴ Ema máiyainihivare ema Judá, ema Jacob.
 Ema máiyainihivare ema Jacob, ema Isaac.
 Ema máiyainihivare ema Isaac, ema Abraham.
 Ema máiyainihivare ema Abraham, ema Taré.
 Ema máiyainihivare ema Taré, ema Nacor.
³⁵ Ema máiyainihivare ema Nacor, ema Serug.
 Ema máiyainihivare ema Serug, ema Ragau.
 Ema máiyainihivare ema Ragau, ema Peleg.
 Ema máiyainihivare ema Peleg, ema Heber.
 Ema máiyainihivare ema Heber, ema Sala.

³⁶ Ema máiyainihivare ema Sala, ema Cainán.
 Ema máiyainihivare ema Cainán, ema Arfaxad.
 Ema máiyainihivare ema Arfaxad, ema Sem.
 Ema máiyainihivare ema Sem, ema Noé.
 Ema máiyainihivare ema Noé, ema Lamec.
³⁷ Ema máiyainihivare ema Lamec, ema Matusalén.
 Ema máiyainihivare ema Matusalén, ema Enoc.
 Ema máiyainihivare ema Enoc, ema Jared.
 Ema máiyainihivare ema Jared, ema Mahalaleel.
 Ema máiyainihivare ema Mahalaleel, ema Cainán.
³⁸ Ema máiyainihivare ema Cainán, ema Enós.
 Ema máiyainihivare ema Enós, ema Set.
 Ema máiyainihivare ema Set, ema Adán.
 Ema Adán macaepiyaquenepa me Viya.

Ema Váinaraji Satanás mavaraha macaitsamaraji ema Jesús

(Mt 4.1-11; Mr 1.12-13)

4 Tacahe, ema Jesús, mávahácaripa ema Espiritu Santo. Tásiha, ema Espiritu Santo eta mávasamurechirahi, máimitucaipahi eta mayanirayarehi te mávapaihapa quehe. Majunijicayarehi eta cajacure Jordán. ² Cuarenta sache macahehi tayehe. Tájinavare manicahini eta jena sácheanahi. Técuhasamurepa. ³ Tacahe, ema Váinaraji témeñahavapa mayehe. Mavarahapa macaetemayarehi. Ánipa maicha:

—¿Pécuhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tácarichuimahi eta tinicacare ticaitarecayare ena achaneana. Tacachaneyarehi eta máechajiriruva ema Viya. Jéhevare, éta ticaitarecarahiyare” —macahepa.

⁵ Tacahe, ema Váinaraji má mavarepa te táinahu eta anuquehe mari. Tíjahúchavapa máimecha tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. ⁶ Tásiha, máichavarepa ema Váinaraji:

—Núti níjaracaviyare tamutu eta juca avasareana. Ichape eta napicauchiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaqueneyare níjaraca. ⁷ Pépuyucanumasera te numirahu pitsiucanu apaesa níjaracavisarepa tamutu —máichapa.

⁸ Émasera ema Jesús majicapapa:

—Pévuishatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumi-rauchaya. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

⁹ Tacahe, vahi máevuisihahini ema Váinaraji. Má mavare te avasare Jerusalén. Máimiapanapa te táinahu eta Templo. Tásiha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémiri-sirayare. ¹⁰ Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricavianayare, éneva-neyarehi tijaneacaviana. ¹¹ Tiámavianayare te navahuana, apaesa vahi picucayutetu eta máriana eta te pipaisirana” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

¹² Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya taicha éma Piáquenu” —máichapa.

¹³ Tacahe, tiyanapa ema Váinaraji. Majunijicapa ema Jesús taicha tímahavaipahi vahi máiturucahini macaetema. Mavarahahisera tichavayarehi tiápechavayarehi macaetemapana.

Éma Jesús tépanavapa ticametarairu

(Mt 4.12-17; Mr 1.14-15)

¹⁴ Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajijiasiravahi taicha mávahácapahi ema Espíritu Santo. Tímiturecapaipa tayehe eta náurujisirarevana te avasareana. Ichapemuri eta nacunachirahi namutu ena tisamararacanapahi. Nasamairicavarepa ena apamuriana achaneana ticavasanihi te tachacaya eta avasareana.

Tichavapa ema Jesús te mávasa Nazaret

(Mt 13.53-58; Mr 6.1-6)

¹⁶ Tásiha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta náurujisirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutiarahi eta mavarairahi téchajicureca eta Sagrada Escritura. ¹⁷ Náichuhasarepa eta máechajicuresiraya. Náijaracapa eta libro májurehi ema profetaini Isaías. Te mavejiacapa eta libro, matanucapa eta máechajicureyarehi. Ani tacahehi eta táechajiriruvanihi: ¹⁸ “Tiávahácanuhi ema Espíritu Santo. Taicha manerejirunuichuhi núti ema Viya Viáquenu eta numetasiravacayare ena páureana eta juca máemunasiravacahi éma, máimicatasirayareva. Eta tímitecanuhi nuncanaracayare ena ticatisamurevanahi. Nucaítitijicayareva ena máerataruanahi ema tivayuarahi Satanás. Nucaimairicayareva ena púchuquiana. Nucuchucahaya ena ticatajivanahi, níjaracaya eta náuricacarevaya. ¹⁹ Numetacayareva járajapainapa eta sáche-yare tamutuiraya máetupirica ema Viya, tamutuina tiúrisamurécapa máicha” tacahehi eta Sagrada Escritura eta máechajicurehi.

²⁰ Te tamutupa eta máechajicuresirahi ema Jesús, máeratacapa eta libro. Máimichavapa mayehe ema tijanearecarahi eta líbroana. Téjacavarepa ema Jesús. Náimarracaripa ena achaneana natiarihiqueneanahi.

²¹ Tacahe, tépanavapa téchajica ema Jesús:

—Nútiripa ema táechajisihaquenehi eta juca libro. Tímitecanuhi numetacahe eta máemunasirahehi ema Viya —macahepa.

²² Tacahe, náramipa namutu ena achaneana. Ánipa náichacaca:

—¡Tétavicavahi tapachinava eta máechajiriruvanihi ema maca! Émachuchasera ema machicha ema Joséini ema carpintéroini. ¿Tájahasica eta juca? —nacahepa.

²³ Émasera ema Jesús máichavacapa:

—Németeaca éti váhirichuhi esuapapajicanuhini. Tásiha, evaraharinepuca íchanuyare: “Te yátupina píturequeneha, pípuhavaca ena ticajumanahi te juca. Vímahaséji piápechavavare picuchuca te juca piávasaichu tacuti eta pímereruhi te avasare Capernaum” íchanuyare. ²⁴ Nutupiruvasepa numetacahe: Tatuparaca eta epicauchirahaviya vimutu viti mavaneruana ema Viya. Étiserá eti nujaneananahi ecavasanahi eta te juca viávása, vahi epicauchanuhini, váhivare ejacapanuini. Ecuti ena achaneana acane eta náepuruirahi ena apamuriana profetana mavaneruanahi ema Viya.

²⁵ Eta tacahe, eta máimairahi ema Viya eta náepuruiravacahi, tivanecavaca ena profetana nayana napauchayare ena apavasanana. Acane, te matiarhichaha ema profetaini Elías, mapana año y medio vahi taquivahini, tásiha, ichapevare eta ecuha. Németeaca núti camurianihi nácani ena tépenaimana israelítana. ²⁶ Váhisera étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahi eta avasare Sidón, étapa macavanahiyahi máitecapihayare suyehé esu ésunahi esena apavasana tépenaimahi. Ésupa máimicataruhi táichavenehi eta susuapajiraivahi me Viya. ²⁷ Énaripa ena israelítana nacajumaqueneana eta lepra te jena sácheanahi te matiarhichaha ema profetaini Eliseo. Váhivare éninahini macanaracahini ena majaneanana. Masapihapa macanaracahi ema apavasanquenehi ticajare Naamán, ticavasahi te Siria. Ema Naamán, tinaracaripa eta majuma, táichavenehi eta masuapajiraivahi —máichavacapa ema Jesús.

²⁸ Tacahe, eta juca máichiravacahi ema Jesús, tisemanapa ena natiarihiqueneanahi. ²⁹ Tásiha téchepumurihanapa éna. Nacuchucapa ema Jesús te tachachacu eta avasare, te tachausi eta táupenacquene, navaraha-pa nacamiricayarehi éma. ³⁰ Émasera tichavapa mánumurihapaipa éna. Tiyanapa, majunijicavacapa.

Éma Jesús máimijuna ema éreana tiávahácanihi ema achane

(Mr 1.21-28)

³¹ Tacahe, títecapapa ema Jesús tayehe eta avasare Capernaúm te Galilea. Tamutu sávaruana tiyanapa tayehe eta náurujisirareva ena achaneana, tímiturepanaya. ³² Ichape náramihi ena achaneana eta máimiturapianahi taicha tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

³³ Étana sávaru, matiarihihi te namuri ema émana achane mávaháruhi ema éreana. Tipiararecahi, ánipa macahe:

³⁴ —Núti nímativi. Pítira Sántoquenevihi. Machichaquenevihi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca picajanerepaicahaviyare —macahepa ema achane.

³⁵ Tacahe ema Jesús macajachapa ema éreana. Ánipa maicha:

—¡Pámatinal! ¡Piyana pijunijica ema maca achane! —máichapa.

Tásiha, tíjahúchava tíaquipaicavapa te apaquehe ema achane. Tásiha majunijiacapa ema éreana. Tájinasera máichavahini ema achane. ³⁶ Náraminehi ichape namutu ena achaneana eta náimairahi. Tiyase-rejiricacanapa:

—¿Tájahasica tacayema eta juca? Ema maca Jesús, tétavicava eta máitupajijiasiravahi, maratahahi máquijica nácani éreanana. Tásiha, ichape eta napisirahi éma. Vahi najicapaemachahini. Tamutupa arairu eta máimiturapianahi ema maca —nacahepa.

³⁷ Enevanavarepa naecha namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te provincia Galílea.

Éma Jesús macanaraca esu máimase ema Pedro

(Mt 8.14-15; Mr 1.29-31)

³⁸ Te tíuchucapa ema Jesús tayehe eta náurujisireva, tiyanapa te mapena ema Simón Pedro. Te tisia-papa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre.

³⁹ Tásiha, mapauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajiricapa éma, énapa ena máimitureana.

Camuriana ena macanararuanapahi ema Jesús

(Mt 8.16-17; Mr 1.32-34)

⁴⁰ Te jena cáperehiquenehi, te téricapa eta sache, ena achaneana námavacapaipa namutu ena nacajumaqueneana eta mayehe ema Jesús. Apanapaneneji eta najumanapahi éna. Manacapaipa eta mavahu te náinahuana, macanaracapaipahi. ⁴¹ Maveranavare ena éreanana máquijiruanapahi te náqueheana ena nacajumaqueneana. Tipiararecanapaipa eta náuchusirapahi. Ánipa nacahe:

—Pítira Machichaquenevi ema Viya.

Émasera ema Jesús vaipa máisapahini náimiyana-vahini napiaraca éma, taicha náimatihí éna eta émairahi ema Cristo.

Tamutu avasareana te Galílea mapaica ema Jesús

(Mr 1.35-39)

⁴² Te apanapa sache, te tijarahipa, tiyanapa ema Jesús te mávapahi. Natanucapasera ena achaneana. Náetupasirapa éma tayehe eta mávihahi. Navarahapa náiminasichayahinehi. Vaipa náisapahini mayanahini.

⁴³ Émasera ema Jesús máichavacapa:

—Nutuparacasivaichuhi eta nuyanirayare tayehe eta apana avasareana taicha nuvanahirichuhi eta níchuiravacaya ena achaneana náehisiraína ema Viya apaesa macuchucuhavaca —máichavacapa.

⁴⁴ Tacahe, tiyanapa tipaica ticametarairupaipa te náurujisirevana tayehe eta avasareana te Galílea.

Tiáramicarepa eta náitusiravahi eta jima

(Mt 4.18-22; Mr 1.16-20)

5 Te jena sácheanahi, ema Jesús mávinehi te tachausi eta cáquiure ticajare Galílea. Títecapanapa ena camuriqueneana achaneana. Váipanecha náratavahini, tipamihejiricacanapa eta navairahi nasama eta macametarairuahi ema Jesús eta máechajiriruvana ema Viya.

² Máimahapa ema Jesús eta apisi pacure te tachausi. Ena ticayeheana eta pacureana, tisipajiricanahi eta ichapequeneana nayutaheana. ³ Tacahe, ema Jesús tíavacuhapa tayehe eta mapacurehi ema Simón Pedro. Mavanecapa máevataeca apaesachicha eta pacure. Téjacapa ema Jesús eta te pacure, tépanavapa máimitucavacapa ena achaneana. ⁴ Te títapiricapa eta máimitusiravacahi, máichapa ema Pedro:

—Tata, iama eta juca epacure tayehe eta táupenamaiya. Iáquijieca eta jara eyutahe —máichapa.

⁵ Éma Pedro majicapapa:

—Maestro, tamutu yati vinajuiricahi, tájinasera vítucavahini. Tavetijipa puiti eta tajaraharipa. Nusuapavisera eta juca pivanesiranuhi, náquijiecaya eta nuyutahe —máichapa.

⁶ Jéhesaréinehi, te nachurucapa eta yutahe, tiyututucavaipahi eta jímana. Vaipa táratavahini ténarujicapa eta ichape yutahe taicha eta tajitacareva eta jima.

⁷ Natiarihihisera te apana pacure ena nachamuriana: ema Jacobo émapa ema Juan. Tacahe, návehauquichapa tímicatacanayarehi. Te títecapanapa, nánicachapa eta apisiquene pacure. Tiánehirichahavare vahi táratavayahinehi taicha eta tajitacarevahi, téricayarepaini eta pacure. Ichape eta náramesirahi namutu taicha eta náimairahi eta camuriquene jímana. Tásiha, ema Pedro máepuyumirauchapa ema Jesús. Máichapa:

—Tata, pítiyara yátupiquenévihi Viáquenuvi. Váhicha nímiuriacava nutupihamirauchavi núti. Nucapecaturahiquenehi —máichapa.

Matiarihihi ema Jacobo émapa ema Juan, machichanaveana ema Zebedeo. Machamurianahi ema Pedro. Énerichuvare tíramecanarinehi éna, énapa ena apamuriana natiarihiqueneanahi. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Núti níjaracaviya eta apana pématanerepiyare. Pitanucainapa ena achaneana nuchaneranya —máichapa.

¹¹ Tacahe, te nachurupaicapa eta napacureana te tiájipahi, étapa nanaquisinehi. Tiyananapa náehicapa ema Jesús.

Ena Jesús macanaraca ema émana achane leproso

(Mt 8.1-4; Mr 1.40-45)

¹² Tacahe, eta mánucuirapaipahi ema Jesús eta avasarechicha, mácapajicapa ema émana achane macajumaquenehi eta lepra, tamutu eta máquehe. Eta máimairahi ema Jesús, máitecapauchapa. Tépuycapa te mamirahu. Máichapa:

—Tata, nucasínavahi eta piyehe, picanaracanupaini.

¹³ Majicapapa ema Jesús:

—Nuvaraha nuncanaracavi. Tájinapa píchiravaina puiti —máichapa.

Manacapa eta mavahu. Énevanerinehi témitiacahi eta majumainihi. ¹⁴ Matuparacapasera ema Jesús. Áni-pa máicha:

—Pímaha, nacuija picumetaca eta nútirahi nuncanaracavihi. Pijanavaresera pímercava nayehe ena tuparairucana, apaesa náimamacavi. Énainapa timeta-jiricanainapa eta yátupirahi pinaraca, pipachihairapa. Pijanayareva me Viya. Picamavahuyarepahi eta pihapulupayachirayare taicha eta macanarasiravihi —máichapa ema Jesús.

¹⁵ Tásihasera, náechapa namutu ena achaneana te avasareana eta máitupajijiasiravahi ema Jesús. Nayanauchapaipa ena camuriqueneana achaneana, navarairahi nasamararacayarehi, macanarasiravacayarehiva tayehe eta najumana. ¹⁶ Émasera ema Jesús, majunijimuriahachucha. Tiyanapa tayehe eta mávapanahi apaquehe. Ánaqui mayujarasihayarehi.

Ena Jesús macanaraca ema émana achane macajumaquene eta muracaquiha

(Mt 9.1-8; Mr 2.1-12)

¹⁷ Étana sache ema Jesús tímiturecahi te tajuhe eta peti, camuriana ena achaneana. Natiaríhivare ena fariséoana tépiyacavana religiósoana, énapa ena escribánoana, tímatiana eta nayeherepiana ena israelítana. Éna, tísihanahi te Jerusalén, ena apamuriana tísihanahivare te avasarechichana tayehe eta Galilea, étapa te Judea. Ema Viya máimicatcahi ema Jesús eta macanarasiravacayarepahi ena nacajumaqueneana. ¹⁸ Títecapanavarepa ena apamuriana, námapahi te áchuji ema achane muracaha. Navarahainipa nacasiapa te tajuhe te mávihahi ema Jesús.

¹⁹ Étasera eta nayututusiravahi ena achaneana, vahi náitujicavahini nasiapahini. Tímipanerechavanapasera náimiapanapa te tamaequehe eta peti. Navetatamaequechapa eta peti te manapaicahi ema Jesús, nacajuchucupapa ema macajumaquene. ²⁰ Tacahe, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepahainavipa.

²¹ Ena escribánoana énapa ena fariséoana, eta napanerequenehairahi eta macayemaquenehi ema Jesús, tisevanerinehi. Áni-pa nacahe te nasamureana: “Ena maca tímijachavaipapuca Viya eta macaepahairayaréji eta pecatuana. ¡Tétavícava eta matapirava!

¡Taicha macarichu ema Viya marataha macaepaha eta pecatuana!” tacahehi eta napanereruana.

²² Émasera ema Jesús máimatíhi eta napanereruana. Máichavacapa:

—¿Tájaha tacayema téjecapavahi eta epanereruana?

²³ Tájina táejeravaina eta níchirahi ema maca:

“Nucaepahainavipa eta pipecaturanaini”. Máejerarepánapuca eta níchahini: “Pécheputa, piyana pipaica”.

²⁴ Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti nuchicha, nuvanecavi pécheputa. Piveha eta jara piyereruva. Piyana te pipena —máichapa ema Jesús.

²⁵ Enevanerinehi téchepuruca ema macajumaquenehi. Mavehapa eta mayereruva. Tipaicapa te namirahu ena achaneana. Tiyanapa te mapena. Ichaperinehi eta macunachirapahi ema Viya. ²⁶ Ichaperinehivare eta náramirahi namutu ena natiaríhiqueneana. Tétavícavarinehi eta nacunachirahi ema Viya, napicaucharinehivare. Áni-pa nacahe:

—Tétavícavapa táramicareva eta juca vímahaquenehi puiti —nacahepa.

Ena Jesús máichuha ema Mateo, mayeheyare apóstole

(Mt 9.9-13; Mr 2.13-17)

²⁷ Te táequenepa eta júcana, ema Jesús tíuchucapa. Eta mapaisirapahi, máimahapa ema achane ticaijare Mateo. (Ticaijarehivare Leví.) Téjacahi éma eta te macatuparahaiyahi eta macobresirahi eta impuesto. —Yare, péhicanu —máichapa ema Jesús.

²⁸ Enurujipa téchepucahi ema Mateo. Manaquicapa tamutu eta matuparahainihi. Tiyanapa máehicahi ema Jesús.

²⁹ Tacahe, te jena sácheana, tépiyarecapa eta piesta ema Mateo te mapena. Máichuhapa ema Jesús eta máenirisirayarehi, énapa ena camuriqueneana macutiqueneanahi ticobrarecarahiana impuesto, énapa ena apamuriana máemunacasareana ema Mateo.

³⁰ Natiaríhivare ena máimitureana ema Jesús. Tásiha títecapanavarepa ena fariséoana énapa ena escribánoana. Eta tímiyanavacahi, ticaecahirecanayarehi. Áni-pa náichavaca ena máimitureana:

—¿Tájaha tacayema ecachanemuri eta enisirahi ena nánitatajiana ticobrarecarahiana eta impuesto? ¡Tétavícavahi eta nacapecaturaravahi! —nacahepa.

³¹ Émasera ema Jesús, te masamairiricapa eta náechajiriruvanahi, máichavacapa:

—Ena majumareana vahi nácamunuimahi ema médico. ³² Núti, vahi étaina tímitecanu nutanupanavacayare nácani matapiravareana. Eta tímitecanuhi núti nutanupanavacayare ena tisepecaturanapanahi apaesa náitsivacha eta napanereruana, náeneuchavapa me Viya —máichapa ema Jesús.

Nayaserecapa ema Jesús tayehe eta ayuna

(Mt 9.14-17; Mr 2.18-22)

³³ Tiuri, nayaserecavare ena achaneana ema Jesús: —¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna eta nayujarasirana. Énaripa ena fariséoana, énerichuvare. Tásiha, ena pímitureana píti tinicanahi, téranahivare —náichapa.

³⁴ Majicapapa ema Jesús:

—Nímicutichinahe puiti. Vahi táuricaímahi ayúnanainahíni icha ena íchuhaqueneanahi tinicanayare nayehe ena araimana. Tiúrisamureanayarehi taicha matiaríhihi ema arayena. Tájina táuricahini ayúnanainahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaímahi ayúnanainahíni ena nímitureana. ³⁵ Járjapainapasera eta sáchezare, ticaverejicasianayare, taicha ticaratacuanainapa ena ticapacuanayare núti. Jéhevarepa ayunanainapa. ³⁶ Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tauriqueneanahi. ³⁹ Ticajerasera eta náinajisirahi ena achaneana eta nayeherepiana tauriqueneana. Apaesachicharichu eta navarairahi naicha eta juca arairu nayeherepianayare. Namutuyaréni navaraha náimiyana eta nayeherepiana tásihaqueneanahi eta napanereruana ena náchucanaveanaini —máichavacapa ema Jesús.

Ena fariséoana náimipicauchahi eta nayeherepiana tayehe eta sávarumuhuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare

(Mt 12.1-8; Mr 2.23-28)

6 Eta jena sache sávaruquenehi, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanítiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquihapaipa, tépurajacachavanapaipa. Tinicanapaipa. Tísapacareichucha eta nanisira, taicha técuhanahi. ² Tacahe, eta náimararasirapahi ena fariséoana, tiseமானapaipa. Ánipa naicha:

—¿Tájaha tacayema vahi epicaucha éti eta juca sache tacapicahuquenehi? Écharichuhi éti vahi tísapacarémahí eta vícaemataneahi puiti. Eta juca evepiraquihapahi eta trigo, ticaijare ecaematanehi —náichapa.

³ Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyahaini David eta mapaisirapahi técuhanapaipa, énerichuvare ena téhicanapahi. ⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapicahuquenehi nanacasarehi te namirahu ema Viya. Nanicasarehi ena

tiyujaracarahiana émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

⁵ Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

Ema Jesús macanaraca ema achane tépenavahu

(Mt 12.9-14; Mr 3.1-6)

⁶ Tiuri, te apanapa sávaru, tiyanavarepa ema Jesús tayehe eta náurujsirareva. Tímiturecavarepa. Tásiha, matiaríhihi ema émana achane, ticajumahi eta mavahu váure. Vaipa tayamuricahini, tépenavahuhi. ⁷ Natiaríhihivare ena escribánoana, énapa ena fariséoana. Náimaharipahi ema Jesús te macanaracayahipuca ema macajumaquene eta jena sache tacapicahuquenehi. Natanunuiricahi eta tivíuchayarehi éma. ⁸ Émasera ema Jesús máimatíhi eta napaneruana éna. Tacahe, máechajicapa ema achane ticajumavahuhi. Máichapa:

—Yare, pitupihayare ani te namirahu ena achaneana —máichapa.

Tásiha, titupihapa ema achane te namirahu. ⁹ Tásiha, máichavacapa ema Jesús:

—Nuvaraha epanerechaya. Puiti juca sache sávarumuhui, táuricahi víchaya eta táuriqueneana, ¿masí? Táuricahi vípuchayare ena nacajumaqueneanahi, ¿masí? ¿Ímijachapuca tiúriyare eta víchirayare eta tauriqueneana, vícaparecapuca ena achaneana? ¿Tájahasica eta epanerechahi? —máichavacapa.

¹⁰ Tacahe, ema Jesús máesenimurihapa ena achaneana. Tásiha, máichapa ema achane macajumaquene:

—Nímaha, picajaruvauchava pímereca eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. ¹¹ Tacahe, tiseமானrinehi ena fariséoana eta náimairahi. Tásiha, tiyaserejiricanapa:

—¿Tájahapuca vícharacaini ema mácatataji eta táimicavíuchaini? —nacahepa.

Ema Jesús manerejica ena dócequeneana após-toleanayarehi

(Mt 10.1-4; Mr 3.13-19)

¹² Te jena sácheanahi, tiyanapa ema Jesús tayehe eta tápusi eta máríjuecu. Tamutu eta jena yati tiyujaracahi me Viya. ¹³ Te tijarahipa, máichuhavacapa namutu ena máimitureana. Manerejicapa ena dócequeneana mayeaneanayarehi apósstole. ¹⁴ Ena nani ena manerejiruanahi: ema Pedro (éma ticaijarevare Simón), émapa ema maparapeichuhi ticaijare Andrés; émapa ema Jacobo † émapa ema maparape Juan; émapa ema Felipe;

† *Ema apana Jacobo machichahi ema Alfeo. Ema apana Simón, tímaticarehi éma, náumurivainihi ena revolucionárioana ticaijareanahi "cananístana". Navaraha náquijica ena extranjeroana romanoana, énaripa nacapaquerecavacahi ena israelítana. Eta májuchirahi ema Lucas, ani macahehi: "...ema Judas mayehe ema Jacobo..."*

émapa ema Bartolomé; émapa ema Mateo; émapa ema Tomás; émapa ema apana Jacobo; émapa ema apanavare Simón; émapa ema Judas; émapa ema Júlasí Iscariote (ema tíjararecahi ema Jesús).

Emá Jesús máimitucavaca ena camuriqueneana achaneana
(Mt 4.23-25)

¹⁷ Tacahe, tichavapa ema Jesús, énapa ena máimitureana. Te tachachacu eta mari táinunapahinepa, émapa nacainunainehi ena camuriqueneana achaneana. Ena nani tiásihanahi eta te avasare Jerusalén, eta te provincia Judea, émapa eta provincia Siria. Eta tímitecanahi éna, navarahahi nasama ema Jesús eta máimiturapiana, navarahavare macanaracavacahini tayehe eta najumana. ¹⁸ Ena ticatajivanahi návaháruanahi ena éreanana, macanaracavacapasera ema Jesús. ¹⁹ Namutu ena achaneana navarahahi náemamahaca ema Jesús taicha náechahi tinaracanyarehi eta najumana eta náemamahasirayare taicha títupajjiacavahi éma.

Emá Jesús máimitucahi nayehe ena ticunachacareanahi me Viya
(Mt 5.1-12)

²⁰ Tacahe, máesenimurihapa ema Jesús ena máimitureana. Máichavacapa:

—Éti ímatihi eta tacamunuqueneanahi eta iáchanevana, tétavicavahi eta iúricarevayarehi taicha máejerare eta ejacapirayare eta máechajiriruva ema Viya, machanerahérayarehi. ²¹ Eti ejamurachahi puiti eta itaresirahi eta matapiravarecare te mamirahu ema Viya, tétavicavahi eta iúricarevayarehi taicha tíjaracaheyare éma eta evarahaquenehi.

Eti íyauchavanahi puiti taicha eta epecaturana, tétavicavahi eta iúricarevayarehi. Títecapainapa eta evapinavairaya, écavainapa, taicha eperdonachacareya me Viya.

²² Eti nuchaneranahi, járajapainapa eta sache ticatianacaheanainapa ena achaneana, navarahainapa tiáquijicaheana. Tipanararachaheanainapa. Nacatianapicainapa eta íjareana. Eta juca náichiraheyarehi, táichavenehi eta éhisiranuhi nuti Manerejirunuhi ema Viya. Váhisera ecuarami eta juca. Ene nacahehi eta nacatajivairahi ena profetanaini. Te ticatianacaheanahi, ¡ecurisamurechavachucha, evapinavavare! ¡Tétavicava eta iúricarevayaya taicha ejacapainapa eta ícuchirichuhi te anuma!

Emá Jesús máimitucahi nayehe ena tavayuaruanahi eta tájiparacana

²⁴ Tacahe, ema Jesús máechajicapa ena apamuriana achaneana, tímicitijiricavahi natiarihihi te mamirahu, tiyerehianahisera éna. Ánipa máicha:

Váipasera vecha te machichahipuca ema Jacobo, téhevere maparapehipuca. Véchahisera eta mapapirahi eta máijare ema Judas. Tícaijarehi Lebeo émapa eta Tadeo. (Te pivaraha pécha, pitanuca te Mateo 10.3 émapa te Marcos 3.16-19.)

—Eti evapinavapa eta ecaimahaquenerahi, páurehesamiyare éti. Tíchecuhainapa eta evapinairavainihi.

²⁵ Páurehesami eti esatuheherecanahi, taicha ichape-napa eta écuhairaya.

Páurehesami eti ecasamureana eta piesta, écarairicavahi, taicha ichapeyare íyairaya, ecatisamurevainapa.

²⁶ Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavanaranahi ema Viya, tivayuarahianahisera.

Vémunacayare ena ticatianacahaviana
(Mt 5.38-48; 7.12)

²⁷ Puítiripa eti esamanuanahi, numetacahe: Émunacayare ena ticatianacaheana. Ímereca eta iúri-va nayehe ena ticaticahéanahi. ²⁸ Eyaseaca ema Viya eta nayujarahuina nácani téchajicanahi eyehe. Eyuja-raucha ena tiúmehaheanahi. ²⁹ Te máehahepuca mácani achane te emira, vahi ecujicapa. Íjaracaserá eta étachacaya eta emira. Te naverejicahepuca eta esacu, ísapayare. Te naverejicahevare eta ecámisa, énerichuvare ísapayare. ³⁰ Énaripa nácani tiyaseacaheanahi eta ecajirayare, íjaracaya. Te naverejicahepuca eta ímahaqueneana, vahi ecucamesa eta náimichaviraina. ³¹ Numetacahe eta apana: Te evaraha eta náuriraya ena achaneana eta eyehe, tituparacahe iúriyare éti eta nayehe.

³² Éti, tájina ecunachacarevaimahi eta me Viya, te nacarichuhi émunaca nácani témunacaheanahi éti. Apanasica témunarahiana ena máimatirahanahi ema Viya. ³³ Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tiúrianahi eyehe. Apanasica títsirijicavanahi ena máimatirahanahi ema Viya. Tituparacahe ecachuricavacayare eta iúri-va. ³⁴ Téhevere nacarichupuca íjaraca nácani títsirijicavanahi te ticapurecana. ³⁵ Étisera émunacayare ena ticatianacaheana. Íchayareva eta táuriqueneana nayehe namutu. Íjaracavare nácani ticapucaheana. Vahi ecucuchapa eta náitsirijirápiyare. Máimaharine ema Viya. Éma tíjaracaheyare eta táitsivayarehi eta iúri-va. Eta tacahehi eta ímereuchirava eta machichaheira ema Tata Vicaiyaquene. Taicha éma, tétavicavahi eta máuriva nayehe namutu ena váinarajiqueneana énaripa ena máechavarahanahi eta máemunasiravacahi éna. ³⁶ EJapanurahiyareva, ecuti-yare eta majapanuirahavihi ema Tata Vicaiyaquene.

Emá Jesús tímítucavahi eta vahi vicucune eta náejecapiravana ena apamuriana achaneana; vítinasera vicuneuchava
(Mt 7.1-5)

³⁷ Vahi ecunemahi eta náejecapiravana ena apamuriana achaneana, váhivare ecucaecahivaca, machu étina táimicuñacahe me Viya. Te máejecapavapuca mácani

achane, vahi ecuvaraha macaicuñavane, apaesa vahi macuicuñacahe éti ema Viya. Eperdonacha ena téjeca-pavana eyehe apaesa maperdonachahe ema Viya.

³⁸ Ecajirahiya nayehe ena achaneana. Ema Viya títsirijicavayare eyehe. Tímepanávainapa eta máijjararuehaye éma. Te iúrihi éti nayehe ena achaneana, ema Viya, tétavicavayarehi eta máurivaya eta eyehe éti.

³⁹ Tacahe ema Jesús, ánipa tacahe eta máimiturapi, máimicutichirahi:

—Váiparinehi tichurucacanaimahi ena apinana púchuquiána, taicha tiáquipaicavanayarehi te pusu.

⁴⁰ Émaripa mácani amaperu te escuelahipuca, váiparinehi macachuricaimahi mácani mayehe maestro. Tapaenumava te máitucapa, macutisarepa ema mayehe maestro.

⁴¹ Vahi táurica eta ecunerahi eta ánichichaqueneana nájecapiravana ena apamuriana achaneana. Tituparacahe ecuneuchava eta táichapeva eta éjecapirava étijiva. ⁴² Vahi tituparacahemahi étupirica eta jácani ánichichaquenehi májecapiravahi ema eparaepiya. Tájina eviyahini eta econsejarapinahini. Ichapesera eta tatuparasirahehi étupirica eta éjecapiravanahi éti. Tapaenumava eta étupirisirapa eta íchavaquenévanihi, táuricapaini econsejacha ema eparaepiya tayehe eta máichavaquenévahi.

Éma Jesús máimicuticha nayehe ena achaneana eta tacahirahi eta yucuquiána

(Mt 7.17-20; 12.34-35)

⁴³ Tacutiquene tímaticarehivare eta táhiana eta yucuquiána. Jararihi eta tinicacareana. Jararihivare eta vahi tánicacare. ⁴⁴ Énerichuvare eta yucuqui tímaticarehi eta táurinisiva eta táhi. Étaripa eta sitavere, váiparinehi tiúchucaimahi eta táhihini narasahinahi-pucaini. Tásiha, eta ijicaqui váiparinehivare tacahimahi eta tahi cachicheruhinahini. ⁴⁵ Ene nacahe nácani tiúriána achaneana tatupiruvahi eta náechajirisirava taicha tiúrihi eta nasamure. Nácanisera achaneana váinarajipanereruana, vahi tiúrimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

Éma Jesús máimicuticha ena tisuapajirahiana énapa ena masuapajirairahana

(Mt 7.24-27)

⁴⁶ ¿Tájaha tacayema eta échajicanu éti, “Tata náquenu” ecahepa; tásiha vahi esuapahini eta nuvanairipiana?

⁴⁷ Nácani tisuapanuanahi náitauchahivare eta nuvanairipianahi, téchemarahianahi táicha. Nuvaraha nímicutichinahe éna. ⁴⁸ Nacutiyarehi mácani tituca ticatupiareca peti, manacayarehi eta túmeana yucuqui emuruquiána. Tiúpenavacahi máicha eta masucueruana. Jéhesare te járajapapa eta muraca técatíca-va, tiámaquiha eta tiquiva, tisiama eta une, váipasera tacaeyayahini eta peti, taicha máetupiricahi eta máepiyasirahi. ⁴⁹ Nararihivare ena tépiyacavana tisuapanuana, váhisera náitauchahini eta nuvanai-

ripiana. Éna nacutihi ema máitucaraha tépiyareca peti. Vahi manacaimahi eta túmeana yucuqui, váhivare táusiapirahini máicha. Te járajapapa eta muraca técatíca-va, tisiavamarepa eta une, tacajimuyapaicapa eta apaquehe. Tíjahúchavapa tiáquipaicava eta peti, témitiequenepa tamutu —máichavacapa ema Jesús.

Éma Jesús macanaraca ema mamusura ema capitán romano

(Mt 8.5-13)

7 Tiuri, te títapiricapa ema Jesús eta máimitusiravacahi ena achaneana, tichavapa eta te avasare Capernaúm. ² Matiarihini ema achane apavasana. Comandante éma nayehe ena suntaruana romanoana. Capitán eta mávacure. Ticajumahi ema mamusura. Tiánehiripahi tépena. Ichaperinehi eta máeñamiravahi taicha máemunaruquenehi ema mamusurahi. ³ Tacahe, te masamairiricapa ema capitán eta matiarihirahi ema Jesús, máevatacavacapa ena náiyamurianahi ena israelítana náichuhapanayarehi ema Jesús, macanarasinapanahini ema mamusura. ⁴ Tacahe, te náitecapauchapa ema Jesús ena vanairucanahi, nayaseacapa, ánipa naicha:

—Mararihi ema capitán te viávasahi. Ichapemuri eta máimicatasirahavihi. Máemepiyarecavare eta ichape peti eta viúrujisirareva eta viyujarasirarehi. Tásiha puiti, tivanecahavihi víchuhapanávi picatajicahini picanarasinapanahini ema mamusura. Tatuparacahi pímicatacaini ema maena —náichapa.

⁶ Tacahe, ema Jesús tísapavapa tiyana, máehicavacapa éna. Étasera te tiánehanapa eta mapena, mavanecavacapa ema capitán ena máimaticasareana, nametapana ema Jesús. Ánipa naicha:

—Tata Jesús, eta juca máechajiriruvahi ema capitán: “Tata, vahi picucaeñamacava eta pítesiraina eta nuyehé, taicha vahi táuricahini pisiapachanusamihini te nupena. ⁷ Eta tacahe, vahi nupatsicavahini nútijacarávaihini níchuhapanávi. Németeaca tarataharichu picavanairipi eta picanarasiraya ema numusura. Taicha nútí nusuapahi te tivanecanuana ena anuquehepanahi eta nuyehé. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane” macahepa.

⁹ Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Numetacahe: Nájina nímaha émanaina vijaneana israelíta mácutini ema maca achane apavasana eta macasiñavairahi eta nuyehé —máichavacapa.

¹⁰ Tacahe, nacarinepa tichavanahi ena vanairucana. Te títecapanapa, náimaharinehi ema macajumaquenehini, tinaracaripa.

Emá Jesús macaecheputa emá amaperu máepenaquenehi, suchicha esu esena suépenaimaquene

¹¹ Te táequenepa eta juca, tiyanavarepa emá Jesús tayehe eta avasare ticaijare Naín. Náehicapahivare ena máimitureana, énapa ena camuriqueneana achaneana. ¹² Te títécapanayarepa te avasare nácapajicavacapa ena achaneana tiámanapahi emá máepenaquene, náecarayarehi. Camurianapahivare ena achaneana téhicanapahi. Éma máepenaquenehi, macarichuhi suchichahi esu esena suépenaimaquenehi. ¹³ Eta máimairahi emá Viáquenu, majapanurinehi esu esena. Tásiha, máichapa:

—Vahi picuiyaha —macahepa.

¹⁴ Tásiha, mapauchapa ena tiámanapahi emá máepenaquene. Titupihanapa éna. Máemamahicapa eta macajone. Tásiha, macahepa:

—Nuchicha, núti nuvanecavi, pécheputa —macahepa.

¹⁵ Enevanerinehi téchepucapa emá amaperu máepenaquenénihi. Téchajicapa emá amaperu. Tásiha, emá Jesús máijaracapa esu maena. ¹⁶ Tacahe, ichaperinehi tiáamicarehi eta juca nayehe ena camuriqueneana achaneana. Ánipa nacahe:

—Tétávicava eta macunachacareva emá Viya. Jéhevare emá maca achane yátupiquene profeta, mavaneruhi emá Viya. Tétávicavapa táurisamurecareva eta máuchusirahi te vimuri —nacahepa.

Ena apamuriana ánivare nacahe:

—Emá Viya tiúcupauchahavihi tímicatapanahávihi viti machaneranihi —nacahepa.

¹⁷ Eta juca máichaquenehi emá Jesús, téchacarevanepa tamutu avasareana te návasanahi ena israelítana. Títécavarepa te táyerehiqueneana avasareana.

Emá Juan Tícachasiricarahi mavanecavacapa ena máimitureana

(Mt 11.2-19)

¹⁸ Énerichuvare emá Juan, te mávihahi te cárcel, masamairiricapa eta juca taicha nametacapa ena máimitureana. ¹⁹ Tacahe, máevatacapa ena apinana, nayaserepanayarehi emá Jesús te yátupihipuca émari-pahi emá Cristo emá macuchapaquenehi. ²⁰ Tacahe, ena vanairucanahi me Juan náitecapauchapa emá Jesús. Nayaserecapa, ánipa náichahi:

—Emá viáquenu Juan tivanecahavihi viyaserepanaviyare te yátupihipuca pítiripahipuca Cristo emá vicuchapaquenehi. ¿Téheserapuca vímiyanavayarepuca vicuchapa? —náichapa.

²¹ Eta náitecapauchirahi emá Jesús, éma ticanararecaichahahi ena nacajumaqueneana, énapa ena nacajaraqueneana. Máquijicavare ena éreanana tiávahácanahi nácani achaneana. Macaimairiricavare ena maveraqueneana púchuquiána. ²² Tacahe, emá Jesús majicapavacapa ena vanairucanahi me Juan. Máichavacapa:

—Nuvaraha ímararacaya eta níchaqueneana puiti. Nucaimairiricavacapa ena púchuquiána. Nímipai-

siraipa ena masariana. Nucanaracavacaipa ena leprósoana, énapa ena túhuquiána. Nucaechepusiravacai-pavare ena náepenaqueneanaini. Énerichuvare níchuhahi ena páureana náeneuchava apaesa náuchucuha. Tásiha, eyana emetaca emá Juan tamutu eta níchaqueneanahi. ²³ Vaipa macueñamava emá Juan eta nuyehe. Tétávicavapa eta máuricacarevahi éma, te ticasíñavahi eta nuyehe —máichavacapa emá Jesús.

²⁴ Tacahe, tichavanapa ena vanairucanahi me Juan. Tásiha, tépanavavarepa téchajica emá Jesús, máechajisihapa emá Juan. Ánipa macahe eta mametasiravacahi ena achaneana:

—Nuvaraha epanereuchayare emá Juan. Te jácani vuíchaha nacaratacaini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametarairuirahi? Éti ímijachavaipapuca mamapachichijiririvaichucha eta máechajisirahi tacutihi te vímararaca eta taflurena eta acutena te tacayamuririjicahi eta técativava. ²⁵ Ímijachaipavarepuca tavayuaruhi emá tiúrinanácavayarehi eta macamuirihairahi. Écharichuhi éti mácani tiúrinanacavahi, pín-canillahi eta máitaresira, váiparinehi tiúchucaimahi te sache, váhivare tiyanaimahi te mávapahiana apaquehe. Manasiqueneyarehi te jácani tiúrina peti.

²⁶ Nuyaserecahe: ¿Nájahapuca ímijachahi éma? ¿Ímatihipuca eta profetairahi éma? Núti numetacahe:

Matupiruvahi eta macametarairuirahi emá Juan. Mavaneruhi emá Viya eta yátupiquenehi profetahi éma. Nájina mácutihini ena apamuriana profetana. ²⁷ Emá maca Juan émara máechajisiquenehi emá Viya eta te Sagrada Escritura, ánipa macahehi: “Nuvanecayare emá títapumirauchaviyarepahi emá ticametarairuyarepahi, apaesa natsecavapaipa ena achaneana eta najacampiraviyare” tacahepa eta Sagrada Escritura.

²⁸ Núti nutupiruva numetacahe: Emá maca Juan, nájina mácuti nayehe ena achaneana. Tétávicava eta macunachacarevahi. Iápajupanavahisera eta ecunachacarevahi eti nuchaneranihi, apaesachicharipa eta ecaicutiarairahi eta mapanereruanahi emá Tata. ²⁹ Ena achaneana, énaripa ena tisipecaturarahianaini, náimatiacahi emá Juan eta mavanecasivahi me Viya. Nasuapahivare eta mametarairuana emá Juan. Eta tacahe, ticaicachasianapa mayehe. ³⁰ Énasera ena fariséoana énapa ena máestroana, éna máisapavarahanihi nacaicachasihini mayehe emá Juan. Témeperurecavanaripa eta náurivayarehini maicha emá Viya.

³¹ Etiarihihi eti achaneana puiti juca sácheana, eta emasuapajiravahi, nímicutichinahesa ena amaperuana tiútseruanahi. Apapipijichucha eta nacayemaqueneanapahi. Emá apana macahepupuca: “Vépiyacapa eta piéstachicha”. Énasera ena apamuriana vahi náisapavahini. Tásiha, emá apana macaheputa: “Vépiyacapa eta ecari”. Váhivaresera náisapavahini.

³³ Emá Juan Tícachasiricarahi, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi emá éreana. ³⁴ Núti Manerejirunuhi emá

Viya, eta nítecapauchirahepa, nucachaneheripa eti achaneana eta enisirahi. Etiarihihivaresera eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena cóbrarecarahianatataji énapa ena apamuriana nasipeccaturarahique-neanahi”.³⁵ Éti épiyacavapa épururahi, ticutirinehi yátupinahini échemarahihini. Tétavicavahisera eta éjecipiravahi taicha eta emasuapajiraivahi. Te yátupihipucaini échemarahihini, ímatinuhini eta nucavana-hirahi eta me Tata †.

Éma Jesús ticaichuhacasihi te mapena ema fariseo ticaijarehivare Simón

³⁶ Matiarhihi ema achane ticaijarehi Simón, fariséohi éma. Macumpirachapa ema Jesús, manipana te mape-na. Masuapahisera ema Jesús. Tiyana. Te tiúripa eta tinicacare, téjacapa te mesa.³⁷ Susamairicapa esu ésuna esena tisipecaturarahinihi eta matiarhirahi ema Jesús te mapena ema fariseo. Tásiha, tiyanapa su-pauchahi ema Jesús. Suámapaipa eta bótechicha. Tínicapahi eta táijiyequene perfume tasivachaquenehi.

³⁸ Tépuycapa te máivapeana ema Jesús. Tíyaha-cavapa, táetsipapapevachapa eta sutsera. Suájahapa te suchutimaca. Tásiha, suépusapevachavare eta suámaquenepahi perfume, sutsiucapavachavare.

³⁹ Tacahe, eta máimairahi ema fariseo eta juca, mapanerequenehapa. Téchajicapa te masamure: “Te yátupinahini profetaihini ema maca, máimatiacari-pahini esu suca esena eta susipecaturaravatajijahi. Vahi táuricahini suémamacahini” macahesamurepa.

⁴⁰ Émasera ema Jesús masamahi eta mapanereruhi ema fariseo. Máichapa:

—Simón, jucarihi nuvaraha numetacaviya.

Éma fariseo majicapapa:

—Nímahaseji, pimetacanu, maestro —máichapa.

⁴¹ Tacahe, ema Jesús máimicutiarachinapa, máichapa:

—Natiarihi ena apinana ajairana ticanteveanahi mayehe ema rico. Éma émana ticantevehi quiniento; ema apana ticantevehi cincuenta.⁴² Tacahe, vahi náratahahini navachachahini eta nanteveana. Tásiha, maperdonachavacapa ema rico ena apinana. Tiuri puiti, nuyaserecaviyare. Éna nani apinana, ¿nájahapuca ema témunacapanahi ema rico? —máichapa.

⁴³ Majicapapa ema Simón:

—Ticutimahi ema tisintevapanahi.

Tacahe, máichapa ema Jesús:

—Pímahaipajira.

⁴⁴ Tacahe, ema Jesús máimararacaripahi esu esena. Tásiha, máichapa:

—Pipanereaca esu suca esena. Puítihí, te nusiapapa te pipena, vahi pímisipacahini eta nívape. Ésusera esu suca esena tisipecaturarahinihi te sutsera, tiájapevachanupa te suchutimaca.⁴⁵ Píti vahi pitsiucanuhini eta pijacapiranuhi. Ésusera, ichapemurihi eta sutsiucap-

vachiranuhi.⁴⁶ Váhivare piámasichanuhini eta aceite eta pijacapiranuhi. Ésusera esu suca esena tisipecaturarahinihi esu suca. Numetacaviyaresera, nuperdonacharipahi ésu tamutu eta supecaturanaini. Éta tacahe, ichape eta suímeresirahi eta yátupirahi eta suémun-siranuhi. Nácanisera apaesarichuhi eta napecaturanaini, apaesarichuhivare eta námunaraiva, taicha apaesarichuhivare eta najacapirahi eta nayehe perdón.

⁴⁸ Tacahe, ema Jesús máichapa esu esena:

—Vahi picueñamava, nuperdonacharipa tamutu eta pipecaturanainihi.

⁴⁹ Tacahe, ena natiarihiqueneanahi chimaracanahi náejaruanahi te mesa nacahepa te nasamureana: “¿Nájahapuca ema maca ticaemuñavahi marataha maperdonacha eta pecatuana?” —nacahepa.

⁵⁰ Émasera ema Jesús máichapa esu esena:

—Táuricapa piyana. Yátupi eta piúchucuhairaya táichavenehi eta picasiñairanuhi.

Natiarihihivare ena esenana títátianapahi ema Jesús te mapaisihapahi tayehe eta avasareana

8 Te táequenepa eta juca, tiyanavarepa ema Jesús, tipaichahi tayehe eta tasimutuqueneana avasarechichana. Ticametarairupahi eta máechajiriruva ema Viya eta náuchucuirayare ena ticasañavanahi mayehe, machaneranayarehi. Náehicapahivare ena dócequeneana apóstoleana.² Énerichuvare náehicapahi ena esenana máepachiaruanahi nayehe ena éreanana tiávahácanainihi. Sutiarihipahi esu María Magdalena, máepachiaruhi nayehe ena siétequeneana éreanana tiávahácanainihi ésu. Natiarihihivare ena apamuriana esenana macanararuanahi tayehe eta apanapaneneji-queneanahi najumanainihi.³ Sutiarihipahi esu Susana, ésupa esu Juana, mayena ema Chuza. (Éma Chuza, mayehehi empleado ema Herodes, téchahi tamutu eta máimahaqueneana ema Herodes.) Maveranahivare ena apamuriana esenana, tiámauchavanapahi eta nirure, náitátirapahi ema Jesús, énapa ena apóstoleana.

Éta máimicutiquenehi evaraqui tacaevaquenehi te apanapaneneji máteji te apaquehe

(Mt 13.1-9; Mr 4.1-3)

⁴ Te jena sácheanahi, camuriana ena achaneana tiyananapaipa napaucha ema Jesús. Tiásihanapahi te avasareana. Te máimahapa éma ena camuriqueneana, máechajicavacapa; máimicutiarachinapa eta máimitu-siravacahi. Ánipa máicha:

⁵ —Matiarihi ema émana achane. Tévapapanahi te máesane. Tásihasera, eta mapaisirapahi témiricapai-papuca eta evaraqui te achene. Éta nanucuiraparacahi ena achaneana, nácatayacapaipa eta evaraqui táemir-ruanapahi. Táimahapa eta cáyure, tanicapa.⁶ Tásiha, eta apana evaraqui témiricapa te máripahi apaquehe. Tímarucainipa, tásihasera tájjicapa eta sache taicha muracaphihi eta apaquehe.⁷ Éta apana evaraqui

† Éta juca mayeherepi proverbio ema Jesús te máechajiriruva, ani tacahe: “Éta téchemarahicare, éta nacunachihayare namutu ena tachichanaveana”. Tatiarihi eta tacayemaquenehi tayumurevahi.

témiricapa te taparereji eta itapequiji. Tiúrinainihi eta táimarusira, étasera eta itape tacachuricapa eta tajurusirahi, táemuriachapa. ⁸ Eta apana evaraqui témiricapa te tiúrina máteji. Tijurucarahihi eta táimarusira. Tiúrinahivare eta tahi. Tájaracahi ichape-muri eta tahi —macahepa.

Te títapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya —macahepa.

EMA JESÚS MÁITAMETACAVACA ENA MÁIMITUREANA ETA JUCA MÁIMITURAPIHI

(Mt 13.10-23; Mr 4.10-20)

⁹ Tacahe, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi. ¹⁰ Émasera máichavacapa:

—Ema Tata tituparacanu nítametacaheyare éti eta juca mapanereruana táequenereruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahi máejerarémahi eta nacaicutiarairaya eta nasamaquenehi. Tavaraha napanerechinavaya. Te vahi yátupina eta navaraira nasuapa, váhivare nacaicutiaraimahi eta nímiturapiana.

¹¹ Étara eta juca tacayemaquenehi: Eta evaraqui tímicutijiricavahi eta máechajiriruva ema Viya eta nímiturapiana. ¹² Natiarihi ena achaneana nasamari-pahinéni eta nímiturapiana, émasera ema Váinaraji vahi máisapahini tánasihini te nasamureana. Enevanehi macamitisicavaca eta nasamaquenehi, mamavarairahi nacasiñanuhini apaesa nucuchucuhavacayaréhini. Éna, nacutihí eta máteji muracapahi te achene. ¹³ Natiarihivare ena apamuriana achaneana, nacutihí eta máteji máripahi. Te nasamararaca eta nímiturapiana, nasuapa, tíurisamureanarinehi. Váhisera naratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi. Tínejicavanávane taicha eta náimairavahi eta nacatajivairahi. ¹⁴ Natiarihivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani táicharacavayare eta náitaresira. Váhivare náinajicahíni eta tacaéñamarasiravaca eta tájiparacana, étapa eta navarairahi tirricochavana. Váhivare náinajicahini eta náichirahi eta tauriqueneana. Tamutu eta juca táemetavicahi eta navarairahi téhicanuana. Tamapurujihí eta najacpirahi eta nímiturapiana. Tájina vahi nacaemataneacahini ema Viya. ¹⁵ Natiarihisera ena apamuriana achaneana nacutihí eta tiúrina máteji. Éna, nasamararacahi eta nímiturapiana, náunacahi yátupi te nasamureana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Vahi nayacujimahi.

EMA JESÚS MÁIMICUTIARACHAVA ETA LÁMPARA ETA MÁIMITURESIRA

(Mr 4.21-25)

¹⁶ Ánivare macahe:

—Súnsuanahi nácani tiyustacanahi eta lámpara namicahuyarehi, tásihasera, najihapaicapapucaini, nanacavarepucaini te tápecu eta náetsatsame náimasirare. Vahi tamicauchaimahi. Tacamunuhi nanacayarehi te anuquehe. Jéhesare ticaecherasareyarepa tamutu apaesa nácani tisiapanapahi, tímairircanayarepahi. ¹⁷ Tayanapanepuca ticayumuruquianahi, tamutuyarehisera ticaechera jácani tayumurevanahi. Tájina tépacuchaimahi jácani najajairairuvanahi. Tamutuyarehi téchacareya.

¹⁸ Eta tacahe, ecaquiñaicha yátupina eta juca. Taicha mácani máitururuequenehahi yátupi, tiápajucavayarehi eta máitupajjiasiravayarehi. Mácanisera apaesarichuhi eta máitucaquene, te váipa mapanerequenehahini, máemitisicayarehi eta máitucaquenehihi.

SUÍTECAPAUCHAPA ESU MAENA EMA JESÚS ÉNAPA ENA MAPARAPENAVEANA

(Mt 12.46-50; Mr 3.31-35)

¹⁹ Tacahe, esu maena ema Jesús énapa ena maparapenaveana títecapanapa te peti te máimituresihahi ema Jesús. Váhisera náitujicavahini nasiapahini taicha tiyututucavanahi ena achaneana. ²⁰ Nametacapasera ena apamuriana achaneana ema Jesús:

—Esu pémunaruquenehi pena énapa ena piparapenaveana nararihi ani te aneca, navarahahi téchajicaviana —náichapa.

²¹ Émasera majicapavacapa:

—Yátupi némunacavacahi esu meme énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi. Taicha tisuapajirahianahi éna tayehe eta máechajiriruvana ema Viya, ticaemataneacanhivare éma —máichavacapa.

EMA JESÚS MACAESAMIRICA ETA TÁEPACUSIRAHÍ ETA UNE ÉTAPA ETA TÉCATICAVA

(Mt 8.23-27; Mr 4.35-41)

²² Étana sache, ema Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa.

Tacahe, tiyananapa tiánuecanayarehi. ²³ Eta napaisirapahi, ema Jesús tívecapa tímacapaipahi. Tacahe, járajapainapa eta muraca técaticava. Tépacucapa muraca eta cáquiure. Tasiapauchapaipa eta une te pacure. Tipicanapa ena máimitureana, taicha tímatiacavanapa eta náecharisiravayarehi. ²⁴ Tacahe nacajamicapa ema Jesús, náichapa:

—¡Maestro! ¡Maestro! ¡Péjamica! ¡Pímaha vécharicavainapa taicha eta tépacuca!

Enevanepa téchepucapa ema Jesús. Macamatinacapa eta técaticava étapa eta táepacusirahi eta une.

Tésamiriecavapa tamutu. ²⁵ Tacahe, máichavacapa ena máimitureana:

—¿Tájaha tacayema vahi ácasiañavahini eta nutiarihipahi eta eyehe? —máichavacapa.

Énaserá tiáramecanapa. Tésenijiricanapa, tásiha nacahepa:

—¡Tétavacavapa eta máitupajjiasirava! ¡Jéhesare, yá-tupiquene eta émairahi machichahi ema Viya! Taicha eta mavanairipi, tamutu tasuapahi eta técatícava éta-pa eta une —nacahepa.

Emá achane návaháruanahi ena ichapemuriqueneana éreanana

(Mt 8.28-34; Mr 5.1-20)

²⁶ Tacahe, títecapanapa te apachara tayehehi apaquehe eta provincia Gadara. Te apachara tacanaraipahi eta provincia Galilea. ²⁷ Te tiúcupaicapa ema Jesús, énapa ena máimitureanahi, máuchujiuchavacapa ema émana achane. Ema maca achane mávasaichuhi tayehe eta juca avasare Gadara. Tájínasera máimatiyahini mayanahini te peti taicha namaurishichaipahi ena camuriqueneana éreanana tiávahácanahi. Ánaquiaparipa eta návahásirahi. Nametapanéni ena achaneana nacaratata. Náitiaca te ichapepi carena éta-pa te enure, te náimahavarepa tacananesica naicha ena tiávahácanahi. Émasera, tétavacavaipahi eta matumevahi. Mavechuquimurivare eta carena máitihanahi. Tijnavare, tiyanavarehi te mávapahiana naicha ena éreanana. Macapenajuechavahi eta ecariana. Mamuriarehi eta máitaresirahi.

Tacahe, te máimahapa eta matiarihirahi ema Jesús, mapauchapa. Tépuycapa te mamirahu. Ema Jesús mavanecavacapa ena éreanana náinajica ema achane. Ema achane típiaracapa. Ánipa macahe:

—¿Tájaha picha píteca pipauchanu, piti Jesús, Machichaquenevahi ema Viya? ¡Pájapanunu vuíchaha picuvanecanu ánaqui te nucaicuñaiyayare! —máichapa.

³⁰ Tacahe, ema Jesús mayaserecapa:

—¿Tájaha píjare píti?

Emá achane majicapapa:

—Núti nucaijare “Nacapenaharu ena ichapemuriqueneana éreanana”.

Éma, tacahehi eta majicapirahi ema Jesús taicha camurianahi ena tiávahácanahi. ³¹ Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihi návihayare éna. ³² Tatiarivare eta camuriqueneana cúchiana. Tinihicanahi te táemiripaisine eta masihi. Ena éreanana nayaseacapa ema Jesús máisapahini nasiapahacavaca eta cúchiana.

³³ Tacahe, ema Jesús macuchuchujicavacapa te máquehe ema achane, máisapahivare nasiapahacavaca eta cúchiana. Te tasamapa eta cúchiana eta nasiapahasi-ravacahi ena éreanana, tijnaparacanapa témiririjicanapa te tachaui eta cáquiure. Téririjicanapa tamutu.

³⁴ Natiarivare ena tijaneacanainihi eta cúchiana. Te náimahapa, tiáramecanarinehi. Tiyananapa tijnapa-

napaipa timetajiricanapaipa nácani nácapajiruvanapahi, éta-pa te avasare namutuvare nametaca.

³⁵ Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana. Te títecapanapa, náimahapa ema achane návaháruinihi ena éreanana. Tétacaripahi te máivapechacaya ema Jesús. Tájinaripahi máichiravainahini. Ticamuirihapahivare. Tásihasera, tipicanarinehi ena achaneana. ³⁶ Tavetijipa te náitametacapa ena tímahanahi eta macuchuchujisirahi ena éreanana te máquehe ema achane. ³⁷ Tacahe, te nasamairiricapa, namutu ena achaneana ticavasanahi te Gadara, vaipa napatsicavahini máitecapauchavacahini ema Jesús taicha náeñamaipahi tácahémahivaréni eta apamuriana náitátiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa. ³⁸ Tacahe, ema achane mayaseacainipa ema Jesús máisapahini máehica. Émasera máevatacaichucha machava te mapena. Ánipa maicha:

³⁹ —Piyanchucha pichava te pipena. Pimetajiricaya eta majapanuiravihi ema Viya eta macanarasiravihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

Emá Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Mr 5.21-43)

⁴⁰ Te títecapavarepa ema Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisamureanarinehi eta náimairahi éma. ⁴¹ Títecapavarepa ema émana achane ticaijare Jairo. Ema maca achane, tupararucahi tayehe eta náurujisirareva tayehe eta jena avasare. Tacahe, ema maca achane tépuycapa te mamirahu ema Jesús. Mayaseacapa macatajicahini mayanahini te mapena, macanarasinapanahini esu machicha. ⁴² Taicha ésunaracavahi esu machichahi. Doce áñoripahi eta suhañorahi. Téñamajiricavaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha náratavapahini eta napaisirapahi.

⁴³ Sutiarihipavare esu apana esena, sucajumaquenehivare. Doce áñoripahi tayerevahi eta suhitiarevahi. Ichapemuripa eta sutanusirahi ena médicoana, váhisera sucanarahini ésu. ⁴⁴ Tépiyacavapa témeñahava te maquecu ema Jesús. Suémamajiacapa te tacheyarapi eta mamuiraha. Enevanerinehi tinaraca ésu. Tícheapa eta suítine.

⁴⁵ Émasera ema Jesús masamarichucha eta suémamajiasirahi. Macahepa:

—¿Nájaha témamajiacanuanahi? —macahepa.

Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyutucavanahi te pichacaya. Váiparinehi

tímaticarémahi nájahapuca nácani témamajiacavianahi —náichapa.

⁴⁶ Émasera ema Jesús macahevarepa:

—Nacañárihi témamajiacanuanahi taicha nusamavahi núti eta nucanarasirahi eta jumare táichavenehi eta nítupajijiasiravahi —macahepa.

⁴⁷ Ésusera esu esena, tímaticavapa eta máimatirahi ema Jesús eta suémamajiasirahi, tiyanapa supauchahi. Tépuycapa te máivapechacaya. Tiyayacareripa eta supisirahi. Sutupiruvapasera timetaurecavahi eta ésuirahi témamajiacahi. Ánipa sucahehi:

—Tata, nútira némamajiacavihi, nuvarairahi nunaraca tayehe eta nujumahi. Nusamavaipasera eta nunarasirahi —suíchapa.

⁴⁸ Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pipena —máichapa.

⁴⁹ Téchajiricavaichahahi ema Jesús eta suyehe esu esena, títecapanecha ema émana achane tiásihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

⁵⁰ Émasera ema Jesús, te masamapa, máichapa:

—Vahi picuarameca, váhivare picueñamava. Pá-casiñava eta nuyehe. Tinaracayareichu esu pichicha —máichapa.

⁵¹ Tacahe, tiyanavanepa ema Jesús. Te títecapanapa, vaipa máisapahini ema Jesús nasiapahini ena achaneana. Nacarichu tisiapanahi ema Pedro, ema Jacobo, ema Juan, émapa ema suiya esu amaperu, ésupa esu suena. ⁵² Natarihihisera ena achaneana te tajuhe. Tíyahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha —máichavacapa.

⁵³ Técanarichuchasera eta mayehe éma, taicha náimahahi eta suépeniraipahi. ⁵⁴ Tacahe, ema Jesús macaratacapa eta suvahuana. Tásiha, máichapa:

—Nuchicha, nuvanecavi: Péjamica, péchepuca —máichapa.

⁵⁵ Tacahe, esu amaperu tichavapa títareca. Tásiha, téchepucavanepa. Ema Jesús mavanecavacapa ena ticachichana náijaraca eta sunica. ⁵⁶ Ichaperinehi eta náramirahi ena ticachichana. Émasera ema Jesús matuparacavacapa vahi nacuechajisiha eta náimahaquenehi.

Ema Jesús mavanecavacapa ena dócequeneana apóstoleana, napaicayare tamutu avasareana
(Mt 10.5-15; Mr 6.7-13)

9 Ema Jesús macurujimurihapa ena dócequeneana mayeheana apóstoleana. Tacahe, máijaracavacapa eta náitupajijiasiravanayare naratahairayare náquijica ena éreanana, naratahairayareva nacanaraca nácani nacajumaqueneanahi. ² Tásiha, ticavanhianapa ticametarairuanayare eta tacamunucarevayarehi náeneuchiravayarehi ena achaneana, náinaji-

siraina eta napecaturana, náehica ema Cristo. Ticanararecanayarepahivare nácani nacajumaqueneanahi.

³ Eta mavanisirayacahi, máichavacapa:

—Tájina iáimahi eta eyereruva. Váhivare ecucayupairiquipahi. Tacuijavare ecanirurucuhaina te alforja. Étaripa eta plata, tacuijavare iama. Étanainarichu eta emuiriha iámayare. ⁴ Enasinumayarepahisera te jácani peti nayehe ena tiúrihi eta najacapiraheya. Tiámainucava te táitecapa eta eyanirayareva. ⁵ Téhesera nacuijapuca nacucaraha najacapahe tayehe te jácani avasare, váhivarepuca nacucaraha nasama eta emetarairuya, iúchucavanepa. Étatapevachavanumayaresera eta máteji te ívapeana. Táicutiarayare eta máicuñasi-rayare ema Viya taicha eta namavarairahi najacapahehinehi —máichavacapa.

⁶ Tacahe, tiyananapa ena apóstoleana. Tamutu napaica eta avasarechichana. Ticametarairuanapaipahi eta máechajiriruva ema Viya, eta viúchucuiraya majacapirahiviyare éma. Ticanararecanapaipavare ena nacajumaqueneana nácani náetupiaruanapahi.

Ema Herodes masamairicavare tamutu eta juca máichaqueneanapahi ema Jesús
(Mt 14.1-12; Mr 6.14-29)

⁷ Tacahe, ema aquenucachi Herodes masamairicavare tamutu eta tíamicareana máichaqueneanahi ema Jesús. Váipasera máitucacarehinehi. Taicha masamairicahi náimijachahiji émahi ema Juan téchepucachi te máecari. ⁸ Ena apamuriana náimijachahivare téchepuca ema antiviini profeta. Ena apamuriana náimijachahivare ema Elías. ⁹ Émasera ema Herodes macahepa:

—Nútijacaruvahisera nucavanairipi náechatinuca ema Juan, eta máepenirahi. Puiti, ¿nájahapuca ema maca nusamaiririuasaparacahi eta máichira eta tíamicareana? Nuvarahasa nímatini ema mácara —macahepa.

Ema Jesús máitaparaha máenicavaca ena camurique-neana achaneana
(Mt 14.13-21; Mr 6.30-44; Jn 6.1-14)

¹⁰ Tacahe, tichavanapa ena apóstoleana eta napaisirahi. Nametacapa ema Jesús tamutu eta náichaqueneanapahi. Tásiha, éma mámamurihavacapa te mávapahi, tinapaicahi eta avasare Betsaida. ¹¹ Téhesera náechavarepa ena achaneana eta macaijuhehi ema Jesús, tiyananavarepa nacapayacahi. Émasera majacapavacaichucha, máimitumuriharipavare tayehe eta náitaresira ena machaneranahi ema Viya. Macanaracavare ena nacajumaqueneanahi.

¹² Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásiha, náichapa:

—Táuricapa pivancavaca ena achaneana nayanapa natanuca eta nanisiha etapa eta náimasihaya te avasarechichana tachacayarahanahi eta juca viávihihi, taicha ani, tajina náviyavaimahi eta te juca —náichapa.

¹³ Tásiha, ema Jesús majicapapa:

—Étina, íjaraca eta nanica.

Énaserá náichavarepa:

—Tájina viviyaimahi eta nanicahini ena nani achaneana. Jucárihinéni cinco eta pan, apiquipa jima jitaruca. Váiparinehisera nárataimahi. Tayanapane tatiarihinapucaini eta vivacharesihahini eta tinicacare, váiparinehivaresera nárataimahi ena nani camuri-queneana achaneana —náichapa.

¹⁴ Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásiha, ema Jesús máichavacapa:

—Evaneca náejahapaicavaca ena achaneana. Cincuentavacainapahi eta náiputsitsisiravaina —máichavacapa.

¹⁵ Énepasera tacahehi naicha ena apóstoleana. Tásiha, ticaejarecanapa namutu. ¹⁶ Tacahe, ema Jesús mavehapa eta cíncoquene pan étapa eta apiqui jima. Máesenicapa te anuma. Mahasulupayachaipa ema Maiya eta máenisiravacayarehi ena camuriqueneana achaneana. Mayuvetutuhecavacapa, máijaracapa ena apóstoleana. Náijaracapasera namutu ena achaneana. ¹⁷ Namutupa tinicana, tísatuhevacapa. Váhicaruvare náitahini eta tinicacare. Dóchehi saye ichapehiana tinicahi eta náemacharájiana.

Ena Pedro máimereucha ema Jesús eta émairahi Cristo

(Mt 16.13-19; Mr 8.27-29)

¹⁸ Étana sache, ema Jesús énapa ena máimitureana tiápechavare típutsiacavana, tiyananapa tayehe eta nayujarasihayarehi. Te títavanapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehé? ¿Nájahapuca náimijachanuhi éna? —macahepa.

¹⁹ Éna najicapapa, ánipa naicha:

—Ena apamuriana náimijachavihiji técheputa ema Juan Tícachasiricarahini. Ena apamuriana tímijachavianahi ema víyahaini profeta Elías, téchepucahi éma. Ena apamuriana tímijachavianahivare ema mácani apana profetaini antiviini, téchepucahi —náichapa.

²⁰ Ema Jesús mápechavare mayaserecavaca éna:

—Étiyapa, ¿nájaha ímijachanuhi nútí?

Ena Pedro májicapapa:

—Pítira yátupiquenevi Cristo, piásihaquenehi me Viya —macahepa.

Ena Jesús tímereuchava eta máepenirayarehi

(Mt 16.20-28; Mr 8.30-9.1)

²¹ Tásiha, matuparacavacapasera ema Jesús nacuija nacumetaca eta émairahi ema Cristo. ²² Tásiha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunuanayare ena tupairucana énapa ena aquenucarohana énapa ena escribánoana. Éna, tímicapacanuanyareva. Mapanayareichuhisera sache eta nucaheyare

eta népenirayare. Tásiha, nuchavayarehi nécheputa —máichavacapa.

²³ Tásiha, máimitucavacahi namutu ena achaneana, ánipa máichavaca:

—Nácani navaraha náehicanu, tacamunu náinajica tamutu eta tihapapiricana eta náehisiránuhi. Nacara-vahuyareva eta nímiturapiana. Náijaracavavare eta táimicapasiraina eta náehisiránuhi. ²⁴ Nácanisera téña-manahi eta náitaresira, tiávamirahuanaya eta náehisiránuya, énajivayare ticamitieuquenehavanaya eta náitaresira. Énaserá nácani yátupihí tíjaracavana téhicanuana, tayanapane táimicapacavacapuca eta náehisiránuhi, éna títujicavanayare tíuchucuhanayare eta náitaresiranaya. ²⁵ Énerichuvare nácani tacáeñamararuanahi eta nacaimahaqueneirayare te juca apaquehe, tájina náimaequenehaimahi, taicha eta tacaéñamarasiravacahi tahapapiricavacahi tayehe eta náuchucuirayare. ²⁶ Énaripa nácani titsirihanapuca téhichanuana, náimitsirihapuca eta nímiturapiana, nútí apanava nutsirihayarevare nayehe ena nani. Nucaerajicainapa ena nani, nútí Manerejirunuhi ema Viya, te táitecapapa eta sáchevare nuchavirayare aquenucainapapa. Te jena sáchevare, námáinapapa nútí eta nujaraiva, étaripa eta majaraiva ema Tata. Nucachanénapaipa ena sántoqueneana ángeleana. ²⁷ Nutupiruva numetacahe: Púitiripa te etaracu éti, etiarihi éti vahi épenavanéimahi, ímahanumayare eta nucatuparahairahi aquenucanuya nuti Manerejirunuhi ema Viya —tacahepa eta máimituresirahi ema Jesús.

Ena Jesús, tihapamaichava eta máimahi

(Mt 17.1-8; Mr 9.2-8)

²⁸ Tiuri, te táequenepa eta óchoquenehi sache, tiyanapa ema Jesús, tiápanahi te anuquehe mari. Tiyujaracayarehi. Mapananarichusera ena mámaqueneanahi: ema Pedro, ema Jacobo, émapa ema Juan. ²⁹ Tacahe, eta mayujarasirahi ema Jesús énapa ena mámaqueneanahi, tíjahúchavapa tísvachavahi eta máimahi ema Jesús. Apaimahipa eta mamira étapa eta mamuiraha. Tétavacavapa eta tajapuvahi tajararasirahi tamutu eta máquehe. ³⁰ Tásiha, tíaramicareanavarepa tímerecavana ena apinana ajairana. Téchajiricavanaripa mayehé ema Jesús. Ema émana, émahí ema víyahaini Moisés. Ema apana, ema víyahaini profeta Elías. ³¹ Tétavacavaipahivare tajararasirahi eta te natupihaiyahi. Náechajisihapahi eta macatajivairayarehi máepenirayarehi ema Jesús tayehe eta avasare Jerusalén. ³² Tavarahaipaichanéni tímaca ema Pedro énapa ena apinana machamurianahi. Téhesera te náimahapa eta tijararacahi te nachacaya, témitiacarinehi eta náechapuneana. Náimarracaripahi eta majaravahi ema Jesús, énapa ena apinana ajairana tíucupauchanahi. ³³ Tacahe, te máimahapa ema Pedro eta nachavirayarepa ena nani apinana, témeñahavapa. Tásiha, macahepa:

—Tata Maestro, tétavacavapa táuricacareva eta vívairahairahi eta ani. Tiúripanahipucaini vépiyacahini eta epenahuinapachuhini. Pipenahuinarichuhini píti,

mapenainarichuhivaréni ema Moisés, émapaini ema Elías —máichapa.

Váhinéni máimatiequenehahini ema Pedro tájahahipuca eta mavarahaquenehi macayema. ³⁴ Tacahe, eta máechajirisiravaichahahi, tájahúchavapa tiúcupaicahi eta úcaji, tamuichavacapa ema Jesús énapa ena apinana ajairana. ³⁵ Tásiha, nasamarinehi eta mahu ema Viya, tayehe eta úcaji. Ánipa macahe:

—Ema maca ema yátupiquenehi nuchicha némunaruquenehi. Éma esuapayare —macahepa.

³⁶ Te tímatinapa eta mahu ema Viya nasamaquenehi, náimahapa ema Jesús, macarineipahi. Nájinaripe ena tiúcupauchanahi.

Tacahe, ena mapanana apóstoleana, tiyerehi eta namametasirahi ena apamuriana nachamuriana eta náimahaquenehi.

Éma Jesús macanaraca ema amaperu mávaháruhi ema éreana

(Mt 17.14-21; Mr 9.14-29)

³⁷ Te apanaquenepa sache, tiúcupaicanavarepa tayehe eta anuquehe mari návinehi. Natiarihipavare ena camuriqueneana achaneana. Te náimahapa ema Jesús, tiyananapa nácapahi. ³⁸ Matiarihini ema émana achane te namuri ena camuriqueneana achaneana. Tipiaracapa muraca éma, ánipa macahe:

—Tata maestro, picatajicanupaini pípuchinanuini ema maca nuchicha. Émanaracavahi te numirahu.

³⁹ Mávaháruhi ema éreana. Macapiararerecachi técharipaicavavare ticarisasajacavare. Ichapemuri eta macatajivaira máicha. Vahi mávaraha máinajia.

⁴⁰ Néchajiacaripahinéni ena pímitureana. Váhisera náratamahini nacuchuca ema éreana tiávahácahi ema nuchichasami —máichapa ema achane.

⁴¹ Tásiha ema Jesús majicapapa:

—¡Téjavicava emasuapajiraivavaca eti achaneana! ¡Cúverarecaichapucaini eta nucamichirahenahini! Píama ani ema pichicha.

⁴² Témeñahavainipa ema amaperu, tápechavarepa tacañamacahi tiáquipaicavapa, téchariripaicavai-pavare. Émasera ema Jesús, máquijicapa ema éreana, muracapavare eta macajachirahi. Tásiha, máijaracapa ema maiya, tinaracaipahi. ⁴³ Náramirinehi ena achaneana taicha eta tamutuirahi marataha ema Viya, máitupajijiasiravahi.

Tiápechavavare ema Jesús tímereuchava máepenirayarehi

(Mt 17.22-23; Mr 9.30-32)

Nanasirichahahi napanerequenehahi ena achaneana eta juca náimahaquenehi. Éma Jesús mápechavare mametacavaca ena máimitureana. Ánipa macahehi:

⁴⁴ —Ecaquiña yátupina eta juca numetaruheya. Váhivare ecuemitísica. Núti Manerejirunuhi ema Viya, járajapainapa eta sáchevare tíjararecanuyare mácani achane nayehe ena ticatianacuanahi. Ticaratacuanayareva —máichavacapa.

⁴⁵ Énaserá ena máimitureana váhiquene nácaicutiarahini eta macayemaqueneanahi. Taicha émarichuhi ema Viya tíjaracahi eta vuíchaha nácaicutiaraimahi. Váhivare napatsicavahini nayaserecaini tájahapuca tacayemahi eta máichiravacahi.

¿Nájahapuca ema apóstole ticapichupana?

(Mt 18.1-5; Mr 9.33-37)

⁴⁶ Te táequenepa eta juca, ena apóstoleana ticapinarujiricacanapa nájahahipuca ema ticapichupanahi.

⁴⁷ Émasera ema Jesús máimatiacavacapa eta náechajiriruvanahi. Máichuhapa ema émana amaperuchicha, macatupihapa te namirahu. ⁴⁸ Tásiha, máichavacapa ena apóstoleana:

—Nácani tijacapanayare ena amaperuana níchavenéinahi núti, ena nani yátupi náimerecayare eta náemunasiranuhi núti taicha tímicutijiricavahi nútinahini najacapa. Taicha nácani tijacapanuanahi núti, énerichuvare tacahehi eta najacapirahi ema Ticachichanu, ema tivanecanuhi. Nácani náechapajiricayare namutu ena nachamuriana, náemunasiravachivare, énahi ena ticapichupananayare te etaracu —macahepa.

Nácani vahi ticatianacahaviana, éna tímicitacahaviana

(Mr 9.38-40)

⁴⁹ Tacahe ema Juan mametacapa, máichapa:

—Tata Maestro, vímahahi ema émana achane máquijicavacahi ena éreanana te píjare ticutirinehi pítinahini píjaracahini eta máitupajijiasiravahi. Tásihasera, vicavacahi éma, taicha vahi víumurvainahini —máichapa.

⁵⁰ Émasera ema Jesús máichapa:

—Vahi ecucavaca éma. Taicha nácani vahi ticatianacahavianahi, éna tímicitacahaviana —macahepa.

Éma Jesús macajachavaca ema Jacobo émapa ema Juan

⁵¹ Te jena sácheanahi tiánenehipaipa títecapa eta mayanirayarehi ema Jesús te anuma. Tásiha, tíjaracavaichaha eta mayaniranumayare te Jerusalén.

⁵² Macavanairipipa tiyanana ena tínapumirauchanayarepahi. Titanucanayarehi eta máitecapihayare tayehe eta jácani avasare. ⁵³ Énaserá ena samaritanoana vahi návarahahini najacapa taicha náimahahi éna eta matupiruirapahi te Jerusalén. ⁵⁴ Tacahe, ena apinana apóstoleana, ema Jacobo émapa ema Juan, tisemamajuheanapa eta namajacapirahi ema Jesús. Tacahe, náichapa éma:

—Tata Viáquenu, ¿pivarahapuca viyasesereca táemirica eta yucu tísiha te anuma? Étaina táitapaimuriha ena náenatajiana, tácuti eta máichaquenehi ema profetaini Elías —náichapa.

⁵⁵ Tacahe, ema Jesús máimararacapa éna. Tásiha, macajachavacapa, máichapa:

—¿Tájaha tacayema vahi tétupicava eta epanerueruana? Ticutipa vahi mávaháruhénahi ema Espíritu

Santo. ⁵⁶ Vahi étaina tímitecanu nícuñacavacayare ena achaneana, nuti Manerejirunuhi ema Viya. Tímitecanuhi nucuchucuhavacayare éna —máichavacapa.

Tásiha, tiánucuhanapa te apachacaya te apanahivare avasare.

Vínajicayare tamutu, te vivaraha véhica ema Jesús

(Mt 8.19-22)

⁵⁷ Eta napaisirapahi te achene ema Jesús énapa ena máimitureana, nacainunapa ema émana achane, mavarahapa máehica. Ánipa macahehi:

—Tata, núti apanavare nuvaraha néhicavi te jácani pivarahaqueneyare piámianu.

⁵⁸ Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera núti Manerejirunuhi ema Viya, tájina nuviya nusiapihahini —máichapa.

⁵⁹ Te apanavarepa sache, máichuhapa ema Jesús ema apana máimiture apóstoleyare. Tásiha, ema majicapapa:

—Tata, nuyaseacavi písapanuhipucaini nuchava te nupena. Nucuchapanumayahini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

⁶⁰ Ema Jesús majicapapa:

—Pésamirica náecaracacaichaha ena máecharaireana. Tájina tájjaracavimahi eta juca tihapasamurerecavihi. Yare, péhicanu. Níjaracaviyare eta pémataneyare. Picametarairuyare eta máechajiriruvana ema Viya —máichapa.

⁶¹ Matiarihivare ema apana énerichuvare macahehi:

—Tata náquenu, núti nuvaraha néhicavi. Písapanusera nucametavapananumaya te nupena —macahepa.

⁶² Ema Jesús majicapavare:

—Mácani achane tipaicapahi téyarecapahi vahi tichavaequenehavaimahi mámarairicahini eta mámaquene. Ene picaheyare piti, vahi pichavaequenehavaimahi tayehe eta tájiparacana. Taicha vahi nuvaraha mácani tinajicavahi eta macametarairuira eta máechajiriruvana ema Viya —máichapa.

Ema Jesús mavanecavaca ena setentaqueneana, tímiturecanayare

10 Te táequenepa eta júcana, ema Viáquenu Jesucristo manerejicavarepa ena setentaqueneana apamuriana máimitureanahivare. Tiyananapa ticametarairuanayarehi te avasareana mapaisineanapahi éma. Apinanavacapahi eta napaisirayare éna.

² Máichapa eta matuparasiravacahi:

—Tétavicavapa eta vicamunuirava ena tímicatacavianaya tayehe eta juca vématanerepihi. Eyaseacayarera ema Tata Vicaiyaquene májjaracahavi ena náimicatacavahi. Eta juca tímicutijiricavahi mácani achane eta macamunuiravahi ena tímicatacana eta máechatijisiraya eta maharusura.

³ Puiti, névatacaheyare eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táíñehiqueneanahi. Étisera ecutiyahehi eta uvesachicha eta tamansuvahi. ⁴ Eta epaisirayare, tájina íamaimahi eta tarera, váhivare íamaimahi eta billetera. Váhivare íamaimahi eta eparupeva. Eyaiyauchavayarepahisera eta epaisirayarepahi te achene. ⁵ Te jácani peti ítecapihayarepahi, ani tacaheyare eta échajisirayare ena achaneana: “Ema Viya, tíúrichaheyare éti te juca peti”. ⁶ Nararihiyare ena achaneana navarahaya eta náurivaya mayehe ema Viya. Eta échajisiravacayare, tatupiruvaya me Viya májaraca eta náurivaya. Téhesera vahi nacuvahara najacapahe, vahi eucuaeñamacava nayehe, taicha énapa téchinavana. ⁷ Te jácani avasare, jácani peti eta najacapiahepuca, enasipanayare tayehe eta peti ítecapihahi. Vahi ecuepuru jácani tinicacareana náeniruheanayare. Étaripa jácani náesiruheanayare. Éti, táitsivayare eta ecaemataneasiranuyarepahi. Váhivare ecupamirahapahi ímacacuhapahi eta pétiana. ⁹ Ecanaracayarapahi ena nacajumaqueneana natiarihiqueneanahi. Tásiha, emetacavacapaipa námutu ena achaneana eta núcupaisiraripa nuti Cristo, nútirichuhi ema nacuchapaquenehi. Nucuchucuhavacayare namutu ena téneuchavana, ticasíñavanavare eta nuyehe nuti Mavanerunuhi ema Viya. ¹⁰ Téhesera nacuija nacujachapahe te jácani avasare ítecapihayarepahi, íúchucavanepa te calle. ¹¹ Ánipa ácahe: “Vétatapevachavahi eta juca tavaparu támaquenehi eta vívape. Eta juca táicuttarahi eta máicuñasiraheyare ema Viya taicha eta emavarairahi ejacapahavahini. Vivarahasera vimetache eta máucupaisiraripa ema Cristo, émarichuhi ema vicuchapaquenehi, ema Mavaneruhi ema Viya. Macuchucuhahini éti, te éneuchavahini, ácasiñavahini mayehe” íchavacayare éna. ¹² Jéhesare, te táitecapapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te avasaréni Sodoma —máichavacapa ema Jesús.

Eta táicuñayare eta návasana ena achaneana masuapajirairahana

(Mt 11.20-24)

¹³ Tacahe, ema Jesús máechajicahi ena apamuriana achaneana, tímicutijiricavahi natiarihinahini te mami- rahu. Ánipa macahe:

—¡Páurehesami eti nujaneanana ecavasanahi te avasare Corazín étipa eti ecavasanahi te avasare Bet- saida! Ichape eta ícuñayare taicha eti ímaharipa tamutu eta tíamicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasanánahinéni, tétavicavahinéni eta namaurivahi, németeacasera núti téneuchavanavanehini eta náimairahi eta níchaqueneanapahi. Enévanénahíni náimerecavahíni yátupi eta náeneuchiravainahíni. ¹⁴ Tásiha puiti, muracapanayare eta ícuñayare éti, taicha eta emavarairahi éneuchava.

Tacachuricayare eta nacaicuñairaya ena achaneana apavasanana ticavasanahi te Siria.

¹⁵ Étiripa eti ecavasanahi te avasare Capernaúm, tamapuruji eta nímitusirahehi étapa eta ímairahi eta tiáramicareana níchaqueneanapahi. Eti ecasiñava-vaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti —macahepa.

¹⁶ Tacahe, tíapechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva núti. Énasera nácani tépuruheanayarepahi, ticaecheranayareva eta náepuruiranuhi núti. Ene tacahehi eta náepuruiravare ema Tata tivane-canuhi —máichavacapa ena máimitureanahi eta napaisirayare.

Tichavanapa ena setentaqueneana vanairucanahi

¹⁷ Tacahe, tichavanapa ena setentaqueneana. Tiúrisamurereacavanapaipa eta náitecapirahi. Ánipa nacahe:

—Tata Viáquenu. Vítauchaipa eta pivanairipi. Viratahahivare viáquijicavaca ena éreanana taicha eta vipiarasirahi eta píjare —nacahepa.

¹⁸ Ema Jesús majicapavacapa:

—Tájinarinehi matumevaimahini ema Satanás eta viáquiquijisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahi ema Satanás, tacutihi eta térameca eta tájjahúchiravahi eta macaquijirahi te anuma.

¹⁹ Táitaurevaquene núti, ichape eta nujaneasirahehi. Tayanapanepuca iácatayaca eta quichare, alacránpuca, tájinasera táicharachémahi. Eta juca ítupajjiasiravaya níjararuhehi, tacachuriaca eta máitupajjiasiravahi ema Váinaraji Satanás, énapa ena majupahanahi. ²⁰ Váhis-era ecucasiñavavaica eta eratahairahi iáquijica ena éreanana. Iúrisamurereacavasera eta táejasiraipa te anuma eta elistana.

Ema Jesús tiúrisamuréinehi mayehe ema Maiya

(Mt 11.25-27; 13.16-17)

²¹ Tacahe, enévanehinehi táitecapauchahi ema Jesús eta máurisamurevahi maicha ema Espíritu Santo. Tásiha, macahepa:

—Tata Nucaiyaquene, tétavicava eta nucunachiravi. Jéhevare píti táquenuvivihi eta anuma étapa te juca apaquehe. Títauchavaipa eta pipanereruhi. Vahi pís-apahini náitucahíni eta júcana ena achaneana tímijachavanahi téchemarahiana. Énapasera píjaracahi ena nani téhicanuanahi, tájnahinéni náechemaraivainahíni. Puiti nasapiharipahi nacachuricahi ena títupajjiacavanahi. Tétavicavahi eta táurivahi eta pipanereruhi, piti Tata Nucaiyaquene.

²² Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nútiraya néchaya tamutu. Nájjina náratahaimahi énajivainahini náimatihini ema Tata. Nucarichu nuti néchi-

navahi ena nímitatiruanayare éma. Taicha núti yá-tupihí eta nímatirahi ema Tata Nucaiyaquene; tacuti-quenehi eta yátupirahivare eta máimatiranuhi éma —macahepa.

²³ Tacahe, mañajichamuripa ena máimitureana, máichavacapa:

—Tétavicavahi eta iúricacareva éti taicha tíjaracahéhi ema Viya eta juca ímairahi puiti eta níchaqueneanahi.

²⁴ Jéhesare, numetacahe: Acane ichapemuriana ena víyarahaini profetana énapa ena réyeaini, tétavicavahi eta navairahi tímatinuana, navairahivare náimaha eta juca níchaqueneanahi ímahaqueneanahi. Navarahahivare nasama eta nímituresirahi. Váipasera nacapayacahini —máichavacapa.

Ema Jesús máimicuticha, máechajisihahi ema achane máuriquenehi, samarítánohi. Tijapanurahi mayehe ema émana achane macajaraquenehi, tayanapane vahi émainahini majaneanainahini.

²⁵ Matiaríhihi ema achane, maestro tayehe eta mavanairipiana ema víyarahaini Moisés. Tíyanapa matanucahi ema Jesús, téchajiricavayarehi eta mayehe. Mavarahahi macaicutiarayare. Máichapa:

—Tata maestro, ¿tájahapucaini nícharacavaini eta níturusirayare eta núchucuirayare te apana vítaesira? —macahepa.

²⁶ Ema Jesús majicapapa:

—¿Tájahasica tacayemahi eta táechajiriruvahi eta Sagrada Escritura? ¿Tájaha tacayemahi eta pisamirahi eta péchajicuirahi? —macahepa.

²⁷ Tásiha, ema maestro majicapapa:

—Ani tacahehi eta néchejicuirahi: “Macarichu ema Viya pémunacayare te pisamure. Macarichuvare éma piáchanevaqueneya. Píjaracayare tamutu eta pitumeva eta picaemataneasirayare. Éma pipanerechayare tamutu sácheana. Pémunacayareva ema piparaepiyahi tácuti eta pémunasiravahi píti”.

²⁸ Ema Jesús majicapapa:

—Tétupicava eta juca píjicapiranuhi. Te pítaucha eta juca, piúchuchayare.

²⁹ Émasera ema maestro vahi mavarahaini apaquehereruinahini. Máichapa:

—¿Nájahasica ema nuparaepiyahi? —macahepa.

³⁰ Ema Jesús máichavarepa:

—Nímicutichinaviyare eta juca. Matiaríhi ema émana achane. Típaicahi te achene, másiha te Jerusalén.

Tíyanayarehi te Jericó. Eta mapaisirapahi te achene, náuchujiuchapa ena tiámerahiana. Náepuchiricanumapa. Tiánehi nacapacayaréni. Námeychapa eta mámaqueneanapahi étapa eta mamuiríha. ³¹ Tásiha, macahepaipa ema émana tiyujaracarahi. Máimahapa ema achane te apaquehe te achenechacaya. Váhisera májapanuhini máichejiuchahini. Máetávicaichucha.

³² Tásiha, macahepaipavare ema apana achane. Éma, téchapajiricahi eta Templo. Énerichuvare te máimahapa, máetávicaichuchavare. ³³ Tacahe, macahepai-pavare ema apana achane. Éma, indigenahi samaritano. Éma, te máimahapa ema macajaraquenehi,

majapanurinehi. ³⁴ Tíhecanumapa éma, témeñahavapa. Máipuchapa te aceite étapa eta alcohol eta majarana. Máepacuchavacapa te amaratajaji. Tásiha, manaracuhapa manaquechapa eta te maperapahi cavayu. Mámapa eta te máitecapihayarehi. Máipupuaracai-pahi. ³⁵ Te apanapa sache, tiyanayarepa ema samaritano. Tivecuacavapa aPIPE eta maplatane. Mavachachapa ema ticapenahi eta peti. Tásiha, máichapa: “Picatajicanu. Péchapajirisinánu ema maca achane. Te tatiarihinapuca eta macamunuirava, píjarasinánuya. Nímahavirine nuvachachavi te nuchava” máichapa. ³⁶ Tiuri puiti, nuyaserecaviyare píti. ¿Nájahapuca ena nani mapanaqueneana ema témunacahi ema maparaepiya najararuquenehi ena tiámerahiana? —máichapa ema Jesús.

³⁷ Ema maestro majicapapa:

—Ema témunacahi ema maparaepiya, ema ti-japanuhi —macahepa.

Ema Jesús máichapa:

—Pímahaipajira, ene picaheyare piti apanava. Pijapanurahiyare —máichapa.

Ema Jesús máejirapanavaca te napena esu Marta ésu-pa esu María

³⁸ Tímiyanavavarepa eta mapaisirahi ema Jesús. Máitecapauchapa eta avasarechicha suávasa esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétávicavahisera eta táurivahi eta najacapirahi éna. Tacahe, esu María téjacapa te máivapechacaya ema Jesús. Susamararacaripa eta máimiturapiana éma. ⁴⁰ Ésusera esu Marta tahapapiricaichucha eta sucaparujirahi, taicha eta suénisirayare ema Jesús. Tacahe, esu Marta tisemamajuhiripa eta suímairahi esu suparape suéjarasirahi. Tacahe, suíchapa ema Jesús:

—Tata Náquenu, picatajicanupa. Pivanesinanu esu suca nuparape súmicatacanuichu apaesaina tayehe eta ematanecana —suíchapa.

⁴¹ Tásiha, ema Jesús majicapapa:

—Páurevisami piti Marta, tétavicavapa tahapapiriravi eta pématanerepiana. ⁴² Tituparacavi pínajica eta tihapapiricavihi. Picaravahu eta máechajiriruva ema Viya. Esu suca piparape María tétupicavahi eta supanereru. Suvarahahi suítucayare. Eta tacahe, tisamararacanuhi. Nájina tiverejicaimahi eta suvarahaquenehi suítuca —máichapa.

Ema Jesús tímitucahavi eta viyujarasiraya

(Mt 6.9-15; 7.7-11)

11 Tacahe, te jácani apanapa sache, ema Jesús mávihahi eta te mayujarasirarehi. Te títayujarápa, témeñahavapa ema émana máimiture, máichapa:

—Tata Viáquenu, pímitucahavi eta viyujarasirayare víti apanavare, tácuti eta máimitusiravacahi ema Juan ena máimitureanahi —macahepa.

² Tásiha, ema Jesús máimitucavacapa:

—Ani tacaheyare eta eyujarauchiravaina: Tata Vi-caiyaquene, piti piávihahi te anuma, vipicauchahi yá-tupi eta píjare. Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. ³ Pájapanuhavi píjaracahavi puiti juca sache eta vicamunuqueneana vinicaquene-repiana. ⁴ Pájapanuhavivare piperdonachahavi eta vivi-urevana piyehe. Víti apanava viperdonachavacaripa namutu ena ticaviurevanahi viyehe. Vahi picuisapahavi vícha eta tamauriquene. Picatiuchahavi mayehe ema Váinaraji. Tacaheya eta eyujarauchiravaina.

⁵ Máichavare ema Jesús:

—Tiuri, nímicutichinaheya puiti. Matiarahi ema émana achane. Tacahe, máitecapauchahi ema apana achane máitunacasarehi te enumuhu yati. Viajéropahi éma. Émasera ema avasarecuruhahi, tájina maviya eta máenicahini. Tásiha, mayana mayehe ema apana máitunacasarehivare. Máichainapapuca: “Picatajicanu, nucapucavi mapanaina pan. ⁶ Taicha títecapauchanuhi ema nítunacasare viajéropahi. Tájinasera nuviya nucumpirachahini”. ⁷ Tacahe, ema macaijuhequenehi váhipuca macujapanuhi, macahénapapuca: “Vahi picujarareca eta néchapune. Pésamirisinanuvare eta tapaja tacaerataquenehi. Tímacanahivare ena nuchichanaveana. Vahi nítujicava néchepuca níjaracavihini eta pivarahaquenehi” macahenapapuca.

⁸ Máitunacasarequenénihipuca éma, váhisera máipurajihini máechepuchahini máijaracahini eta mayasesereruhi. Téhesera te tímiyanavapuca mapi-araraca ema ticamunuvahi, németeaca tipamicavayarehi téchepuca, máijaracayarehi eta macamunuquene-pahi.

⁹ Eta tacahe, numetacahe: Échajica ema Tata Vi-caiyaquene. Eyaseacayare eta ecamunuqueneana. Éma, tijapanurahi. Tisamaheyare, tíjaracaheyareva. Vahi ecuyacuji eta eyaseasiraina. Téhevere tatiarihinapapuca eta jácani íchiraya ichapehi eta tacajeravaya, eyaseacayare máijaracahehinehi eta ítupaijijiasiravaya. Éma, tíjaracaheyare. Te jararihipuca eta táichejimiráuchahe, éma macaevuisihainaheyare. ¹¹ Eta juca tímicutijiricavahi te natiarihipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahini éti eta mári-jahi, tímicutijiricavaipa ecavijaruhini ena echichanaveana. Étaripa te tiyaseacaheanapuca eta jima, váhivare táuricaimahi íjaracahini eta quichare. ¹² Étaripa te tiyaseacaheanapuca eta varayuha, váhivare táuricaimahi íjaracahini eta sáse. ¹³ Étiarihi éti vahi ecajirahihini nayehe ena achaneana. Iúrihisera nayehe ena echichanaveana. Ítucahi íjaracavaca jácani nayasearuheanahi táuriqueneana. Mavetiji ema Tata Ecaiyaquene tiávihahi te anuma. Éma, vahi ticavijaruehimahi eta te eyaseserepiana. Tíjaracaheyarehi tamutu eta eyasearuana, émaripa ema Espíritu Santo tiávahácaheyarehi —macahepa ema Jesús.

Ena achaneana téjecapavanahi eta náimijachirahi ema Jesús mávaháruhi ema Váinaraji Satanás
(Mt 12.22-30; Mr 3.19-27)

¹⁴ Te apanaquenepa sache, ema Jesús macanaracahi ema achane, úpainihi eta máitaresira taicha eta mávahásirahi ema éreana. Tacahe, eta máuchusirapa ema éreana te máquehe ema úpainihi, tiúripa téchajica. Ichaperinehi nárami ena achaneana. ¹⁵ Natiarihihisera ena apamuriana achaneana, ánipa nacahehi: —Ema maca Jesús, vémeteaca majupahahi ema Satanás, ema náquenumurihi ena éreanana. Máijararuhi jácani eta máitupajjiasiravahi eta macuchusiravacahi éna —nacahepa.

¹⁶ Nararihihivare ena apamuriana achaneana váhivare nasuapapajicahini ema Jesús. Eta tacahe, navarahapa nacaicutiarayarehi, nayaseacapa macuchucahini eta tiáramicare, máimereuchayare eta émarahi Cristo mavaneruhi ema Viya. Váhisera nasuapayarehini. ¹⁷ Émasera máimatihini eta napaneruana eta namasuapirahi. Máichavacapa:

—Nímicutichinahe puiti ena machanerana ema gobierno. Éna, vahi típutsimuriahacacanaímahi apinainhipucaini partido. Te típutsimuriacacanapa, énajicacai-pucaini tiáquipaicacana. Émaripa mácani achane te camurianahi ena machichanaveana, váiparinehivare típutsimuriavanaimahi náehajiricacahini, énajicacahini náquipaicacahini. ¹⁸ Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímijachaipa nútirichuhi machamuri ema Satanás, táichavenehi eta nuratahairahi nucuchucavaca ena éreanana. ¹⁹ Tájina vahi étupicavahini éti eta juca epanereruana. Te émahipuca tímicitacanuhi ema Satanás, énerichuvare éti máimicataruanahivare jácani éma, eta ecuchusiravaca ena éreanana. Epanerechinávanuma. ²⁰ Émaquenehisera ema Viya, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútiripara nuti ecuchapaquenehi.

²¹ Tacutiquene mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. ²² Téhesera macahepaipa mácani achane túmepanahi mayehe, maverejicayare eta mataquiriquini macasiñaquenehi. Máitiacavane. Tásiha, émapa técha tamutu eta majanearuinihi ema achane. Ene nucahehi nútí, túmepananuhi mayehe ema maca Satanás.

²³ Te vahi ecuehicanu, ecucaemataneacanu, éta tímereuchaheya machamurihehi éti ema ticatiana-canuhi. Masapiha ímicatacahi éma eta macaetemajirisiranuhi.

Ena Jesús máimicutichinahi ena masuapajirairahanahi mayehe
(Mt 12.43-45)

²⁴ Tímiyanava eta máechajirisiravahi ema Jesús, ánipa macahe:

—Énerichuvare éti ecuti mácani achane máinajiruhi ema émana éreana. Ema éreana tiyanainapa matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tichava. Macahénapapuca: “Nuyanayare nuchava, nusiapahacayareva ema návaháruinihi”. ²⁵ Te títecapapa ema éreana mayehe ema achane mávaháruinihi, máimaha-pa ema achane máinajicaripa tamutu eta mapecaturana, vuíchahasera máehicahini ema Viya. ²⁶ Tásiha, tiúrisamurepa ema éreana. Tásiha, tíchuarecapa ena siétequeneana machamuriana. Váinarajipanána éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane —máichavacapa ema Jesús.

Viúriyare te visuapa eta máechajiriruva ema Viya

²⁷ Mapaenumavahi títapirica ema Jesús eta juca máechajiriruvanahi, tipiaracapa esu ésuna esena te namuri ena achaneana. Ánipa sucahehi:

—¡Tétavicavapa eta sucunachacarevahi esu pena, táichavenehi eta suínasiravihi, suájisiravihi eta sucajurusiravihi! —sucahepa.

²⁸ Ema Jesús majicapapa:

—¡Tiápajucavayaresera eta nacunachacarevayarehi namutu ena tisamanayare eta máechajiriruvanahi ema Viya, yátupiyarehi eta nasuapirayareva! —máichapa.

Ena Jesús macajachavaca eta namasuapajiravahi ena achaneana

(Mt 12.38-42; Mr 8.12)

²⁹ Tacahe, títecaparacana paichucha te machacaya ema Jesús ena camuriqueneana achaneana. Tásiha, eta máimitusiravacahi, máichavacapa:

—Nararihi ena achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi ema Viya. Tiyaseacananahi nímechayarehi eta tiáramicare táicutiarahi eta mavanesianuhi ema Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi ema profetaíni Jonás. ³⁰ Ema profetaíni Jonás yátupihini ecutiararehi éma eta mavanesianuhi ema Viya nayehe ena achaneana ticavasanahi te avasare Nínive. Ene nucahehi nuti Manerejirunuhi ema Viya, ecutiararenuhi puiti eyehe eti achaneana. ³¹ Tacutiquene, esu reina Seba eta acane, te susamairiricapa eta máitupajjiasiravahi yátupi ema Salomón. Ésu, tayerehiquenehinenehi eta suávasa, tiyanahisera sucapayaca ema Salomón taicha suvarahahi susamayarehi éma. Tacahe, te táitecapapa eta sácheyare téchepucanaya namutu, suyaseacainapa ésu eta nacaicuñahini

ena nani máetupicushmanahi puiti. Sucáhénapapuca: “Táuricapa nacaicũñahini ena nani máetupicushmanahi, tájinapa náetseraruina nasamaripa ema Cristo, ema títupajijíápanavahi mayehe ema Salomón, tásiha vuíchahacaruva nasuapa” sucahénapa jácani. ³² Tacu-tiquene ena achaneana ticavasanahi acane te Nínive. Tisipecurarahiana éna. Natupiruvahisera nasuapa eta mametarairu ema Jonás. Téneuchavavaneanahi. Tásiha, nacaheñapapuca te jena sáchezare: “Táuricapa nacaicũñahini ena nani maparajuruana ema Cristo, tavi-uchahi eta namasuapirahi éma. Taicha éma máurique-nepanahi mayehe ema Jonás” nacaheñapa. Eta máimiturapiana ema Jesús, tamícahu eta vítaresira

(Mt 5.15; 6.22-23)

³³ Tímiyanava eta máechajirisirava ema Jesús, ánipa macahe:

—Súnsuanahi nácani tiyustacanahi eta lámpara namichahuyarehi, tásihasera nanacapurucaini te jácani tayumururevahi cuarto, najihapaicapucaini te cajune. Tacamunuhi nanacayaherehi te anuquehe. Jéhesare, tamicauchasarepa tamutu apaesa tímairiricanapaipa nácani tisiapanapahi. ³⁴ Ene ecahehi éti, eta esuapirahi eta nímiturapiana, tétavícahahi eta tamicauchiraya eta iáchanevana. Tímijunijicayare eta emaurivahi. Téhesera vahi esuapahini, tétavícahahi eta tamapicuvahi eta iáchanevana. Tanasipa tamutu eta taurivahi. ³⁵ Eta tacahe, machu ecainajiruvahi tayehe eta juca esamaqueneanahi ímahaqueneanahivare, machu tayanariana te timapicu eta iáchanevana. ³⁶ Téhesera yátupina esuapa eta nímiturapiana, tétavícahahi eta tamicauchirahere tayehe eta ítaresiranahi. Tásiha, vahi eyasecanuimahi nímechahe eta tíaramicareana —macahepa.

Ema Jesús máimereuchavaca eta náejecapiravana ena fariséoana énapa ena escribánoana

(Mt 23.1-36; Mr 12.38-40; Lc 20.45-47)

³⁷ Tacahe, te títapiricapa ema Jesús eta máechajirisirahi, témeñahavapa ema émana fariseo. Macumpirachapa tinipanayaherehi te mapena. Masuapahisera ema Jesús. Tiyanapa te mapena ema fariseo. Te tíuripa eta tinicacare, téjacapa ema Jesús te mesa. ³⁸ (Tiuri, ena fariséoana, jucarihi eta nayeherepi te tinicanayare, tayanapanehipuca tipachivahuanahi, ticasipavahunumanayaherehi. Eta juca nasipavaurusiravahi, namavarairahi náechipejicahini eta náchanevana.) Émasera Jesús, vahi masipavaurucavanumahini. Tacahe, máraminehi ichape ema maca fariséo eta mamaitauchirahi eta nayeherepi éna. ³⁹ Émasera ema Víaquenu Jesús máichapa:

—Eti fariséoana, eta eyeherepihana, ecañamarcavahi esipacanuma eta enisireareana étape eta érirareana, emavarairahi táetseraruinahini tasiapahini eta pecatu te iáquehe. Étisera íapajupanavahi eta tachipejivahi eta iáchanevana táichavene eta evainarajivana, étape eta tavayuasiraherehi eta ejamurachirahi tamutu. ⁴⁰ ¡Tétavícahahi eta tamuracavahi eta esamureana! Ema Viya vahi tácarichu máimaha eta te

iáquehe eta tíavíhahi te ínahu. Énerichuvare máimaha-hahi eta tíavíhanahi te amahe esamureana. Éma yátupihahi eta máimatiraherehi. ⁴¹ Tatuparacahi eapanurahi nayehe ena ticamunuvanahi. Tátupiruvahi te esamureana te échajiricava apaesa tacuijasarepa tachipejivahi eta iáchanevana.

⁴² ¡Páurehesami eti fariséoana! ¡Tétavícahahi eta tamuracavahi eta ícuñayare! Éti ímijachavahi yátupiquenehi eta religiósohériahi eta epamisirava eta ecamavahirahi me Viya eta dísmuri tayehe tamutu eta évaraquí. Ecunachacarehi taicha éta. Váhisera ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacaherehi eta ecamavahu eta dísmuri íamavahuana. Énerichuvare tituparacaherehi eta eapanuravahi, yátupinavare eta émunasiraina ema Viya.

⁴³ ¡Jucarihivare eta apana tivíuchahehi eti fariséoana! ¡Tétavícahahi eta esíñavavahirahi! Emetapa evaraha típicaucaheana, tícaejacaheana te táurinaquene siya eta te íurujisirarevana. Evarahavare típicaucaheanayaherehi eta náechajisirahereana te cálleana.

⁴⁴ ¡Jucarihivare eta apana tivíuchahehi eti escribánoana, étipa eti fariséoana, táichavenehi eta apimirahirahi! Ímijachavahi epicauchacarehiji. Étisera eta eyeherepihana, émejecapavacha ena achaneana eta náehisirahi ema Viya. Páureanasami éna. Váhi náimatiequenehahini eta náejecapiravahi táichavene eta evayuasirahi eta ecaetemairavacahi —máichavacapa ema Jesús.

⁴⁵ Matiarivare ema émana maestro eta mavanairipiana ema Moisés. Máichavarepa:

—Tata maestro Jesús, eta píyunasiravaca ena fariséoana, tétavícahahi tayunasirahivahi víti apanavare víti máestroana. ¿Pivarahapuca vícaviurevahivareni víti? —máichapa.

⁴⁶ Tacahe, ema Jesús majicapapa:

—¡Eti apanavare eti máestroana, tétavícahivare eta eviurevahi! ¿Tájaha tacayema epamicavacahi ena apamuriana achaneana eta júcana eyeherepihana tacajeraqueneana? Nájinapa tiratahaimahi títaucha. Apanasica éti váhivare ítauchahini.

⁴⁷ ¡Jucarihivare eta apana tivíuchahehi eta tamuracavahi eta ícuñayare! Éti ecáicare apimirana, taicha ímijachavahi machanerahe ema Viya eta eyeherepihanahirahi eta náecariana ena profetanahini nacaparuanahi ena iáchucanaveanahini. Puiti étarichuhi tacahehi eta epanerervanahi eta evarairahi ecapacahavi víti mavanaranahi ema Viya taicha eta épuruirahi eta vímiturapianahi táuriqueneanahi. ⁴⁹ Ema Viya, acane tímatihahi eta ecutirayaherehi eta napanerere ena iáchucanaveanahini ticapacahani ena profetanahini. Eta tacahehi eta máechajiririvanahi: “Nuvanecayare ena profetana; tásiha, nuvanecayareva ena apóstoleana. Váhiquenesera nasuapaimahi ena tisamanayaherehi eta náimiturapianaya ena nuvanarana. Napanajiricavacayaherechucha ena nuvanaralahini. Natarihiyareva ena nacapacayaherepahi” macahehi ema Viya. ⁵⁰ Eta tacahe, numetacahe núti: Eti nujaneanana israelítana etiarihi-

queneanahi puiti, ecaicuñayare, taicha timuriacahehi eta naviurevahi ena iáchucanaveanaini taicha eta nacapapajisiravacahi ena profetanaini. Acane te tépanavainapa eta apaquehe, ema Abel máinapuiruhi nacaparuihi. Máequeneruhi nacaparuihi ema maca Zacarías, ema nacaparuihi te tamirahu eta Templo. Camurianahisera ena náumurivanaini. Puiti étipa tamuriacahi eta ícuñayare naicha ena iáchucanaveanaini.

⁵² ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihi eta yátupiqueneana títucacáreana, taicha vahi esuapaimahi, váhivare éhicaimahi. Éti tásihahi íchejimiráurucavacahi ena tivarahanahi tisuapanya, náehicaya ema Viya —máichavacapa ema Jesús.

⁵³ Tacahe, eta nasamirahi ema Jesús ena fariséoana énapa ena máestroana, tiseanmarinehi eta mayehe. Tépanavanavarepa náitsamarareca eta nayaseresirapahi, navarairahi nasama te máejecapavahipucaini eta macayemaqueneanapahi, navarairahi eta tiviuchayarehi éma.

Éma Jesús vahi mávaraha apimirahávina

(Mt 10.26-31)

12 Tacahe, te jena sácheanahi, títecaparacana-paichucha ena camuriqueneana achaneana. Tiyututucavanapa. Énaserá ena máimitureana ema Jesús návihahi te machacaya. Tásiha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu eta tapareasirahi eta apimirairanahi ena fariséoana. Échapavaicha éti, machu napareacahe éna. ² Ema Viya tímararacahehi tamutu eta íchaqueneanahi, tayanapanenénipuca eyumurucavaquenénapuca te timapicu. Tisamahevare tamutu eta échajiriruvanahi. Tímatihivare tamutu eta epanereruana. Te jácani sácheyare ticaecherayare tamutu, tétavicavaya eta etsirihairaya taicha eta emaurivanahi —macahepa.

⁴ Étiripa eti némunacasareana, numetacahe: Vahi ecupica nácani nacapacapuca eta iáquehe, tacarichusera náituruequenehayare. ⁵ Numetacaheva, macarichu ema Viya epicayare, taicha macarichu éma téchahi eta ítaresirana. Jéhevare, éma maratahahi macamitiequeneha eta iáchanevana tayehe eta táíñehiquene yucu infierno, te ecainajiruva táichavenehi eta episirapuca eta nacapasiráhena. Jéhevare, éma epicayare.

⁶ Nímicutichinahe eta cáyurechicha. Éti ímijachapuca vahi tasivachahini éta. Téñamacareanahisera me Viya. Éma, téchavacahi eta táitaresiranahi. ⁷ Evetijipa éti, éñamacarepanahi me Viya. Éma téchahevare tamutu eta ítaresirana. Váiparinehi témitisicahémahi. Eta tacahe, vahi ecueñamava éti tayehe eta ítaresirana, taicha tétavicavahi eta emunavahi éti mayehe.

Éma, máimatihí eta tatupa eta echutimacana.

Vímereuchavayarehi eta véhisira ema Jesús

(Mt 10.32-33; 12.32; 10.19-20)

⁸ Numetacahe puiti, nuti Manerejirunuhi ema Viya: Namutu ena tímereuchavanahi eta náehisiranuhi te namirahu ena achaneana, núti apanavare nímereuchaya eta nuchanerairavacahi éna te namirahu ena ángeleana mayeheanahi ema Tata. ⁹ Nácániserá vahi návarahahini náimereuchavahini eta náehisiranuhi, núti apanava nímereuchaya eta vahi nuchanerainahini éna te namirahu ena ángeleana mayeheanahi ema Viya.

¹⁰ Namutu nácani ticaecahinuanahipuca nuti Manerejirunuhi ema Viya, tiperdonachacareana. Nácániserá nacaecahipuca ema Espíritu Santo, vahi tiperdonachacareanaimahi éna.

¹¹ Jararihiyare eta sácheanayare tíamaheanaya te namirahu ena nacapitarana eta te náurujisirarevana, énapapuca ena tuparairucana, énapapuca ena juéseana te jácani avasareana eta nayaseseresiraya. Váhisera ecueñamava tayehe eta jácani ecatiuchiravayare. ¹² Ema Espíritu Santo tímitucaheyare eta táurivayare eta ecayemayare te jena sache ecayaseserehinapa —macahepa.

Vahi táurica tahapasamurechahavi eta vímahaqueneanayare

¹³ Matiaríhi ema achane te namuri ena camuriqueneana achaneana. Máechajicapa ema Jesús. Máichapa:

—Tata maestro, pímicatacanu, pimetaca ema nuparape máijaracanu eta nuyehe parte eta nímaequeneruyare eta máimahaquenéni ema ticachichanuini —macahepa.

¹⁴ Ema Jesús majicapapa:

—Nuchicha, ¿tájaha tacayema pivaraha pinacanu juésnuyare eta eyehe? Vahi nútina néchaheyare tayehe eta máimahaqueneanaini ema ticachichahéni —máichapa.

¹⁵ Énerichu máichavacavare ena apamuriana achaneana:

—Échapavavare éti apanavare, machu émunahiricava, ejamurarahi tayehe eta tímahacareana. Taicha eta tímahacareana te juca apaquehe, vahi étaina ticaitarecaheyare. Vahi táéñamacarehini.

¹⁶ Tacahe, máimicutiarachinavare:

—Matiaríhi ema achane ricu. Ichape eta máesane. Tiúrina eta máevaru. ¹⁷ Tacahe, ema ricu mapanerechapa, ánipa tacahe eta mapanereru: “Áníquehepa eta juca névaru, tájinapa núnasiha. ¿Tájahapuca nícharacaya? ¹⁸ Tiúripanapuca nuvetataha eta núnavarahi nujanejuecha. Ichapepanainapa nicha eta táitsivaya. Tiúripanainapa, apaesa táirijica tamutu eta néchatijiru étapa eta apamuriana nucayehequeneana. ¹⁹ Tásiha, nucahénapa: Jéhevare puiti tétavicavapa eta núrivayare. Tájinapa níchiravaimahi. Ichapemurihi eta núnaru. Taratahaquene juca áñoanayare. Nucanaracavaya núti. Tamutu sache tíuriya eta nunisira, néraya.

Ichape eta núrismurevaya” macahepa ema ricu.

²⁰ Tásihasea ema Viya máichapa ema achane: “Tétavica va eta pisunsuva, piti achane. Puiti jena yati pépenaya. Tájina vahi pítapanaímahi eta juca piúnaruhi”.

²¹ Ene nacahe ena achaneana ticurujiricana eta náimahaqueneana nayehechiravarichu. Vahi nápane-rechahini naicha eta táuriqueneana tacunachacarehini me Viya taicha tétavica vahi tahapasamurechirahi eta nacaimahaquenéraya.

Emá Jesús tímitucahavi eta majaneasirahavihi ema

Viya
(Mt 6.25-34)

²² Te apahequenepa, ema Jesús máichavacapa ena máimitureana:

—Étiserá, nuvaraha ácasíñava yátupina mayehe ema Viya. Vahi ecuañamaracavavaicha tayehe eta enica-querenepi étapa eta emuiriharapi puiti juca ítaresi-raichaha. Eta enicaquerenepi étapa eta emuiriharapi, tájina táeñamavacarevaina. Ímararacarichuhi eta cáyureana. Vahi tacañamaracavahini tayehe eta tanicaquerenepi. Vahi táevacahini, váhivare táechatijiricahini, táunacahipucaini eta tanicaqueneyare.

Émasera ema Viya máechapajiricahi máijarasirahi tamutu eta tanicaquerenepiana. Evetijipa éti, íápajupanavahi eta éñamacarévahi me Viya tayehe eta cáyureana. ²⁵ Vahi táuricahini eta ecañamaracavahini eta júcana. Eyehe éti, nájina naratahahini étijivainahini ecaturucavahini, tayanapane te tihapasamurechahehipuca. ²⁶ Vahi étijivaimahi íturucava ecaturucavahini, váhivare táuricahini ecañamaracavahini tayehe eta júcana.

²⁷ Ímararacarichuhi eta tajurusirahi eta flúreana, vahi tacañamaracavahini tacaematanehini, táijururecahipucaini. Táitsivahisera, te tépunehapa, tétavica vahi táurinavahi eta taflurene. Nájina nácuti eta nacamuirihairahi eta táurinava, émaripa ema víyahaini rey Salomón eta tajanunusira eta macamuirihairahinihi.

²⁸ Apanasica ema Viya máijaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahahi, máijarasirahayehi eta emuiriharapi eti achaneana. ¿Tájaha tacayema vahi ácasíñavahini eta mayehe? ²⁹ Eta tacahe, vahi ecuañamaracavaicha tayehe eta enicaquerenepiana étaripa te échuririacapuca eta une érayare. ³⁰ Ena apamuriana achaneana te juca apaquehe, ichapemurihi eta tacañamarasiravacahi eta júcana. Vahi nácasíñavahini mayehe ema Viya, nacuchapahipucaini eta máijararuyarehi éma. Étiserá, ecañavayarehi eta matiarahirahi ema Ecaiyaquene. Máimatihí éma tamutu eta ecamunuiravanahi. ³¹ Eta tacahe, tativayare íjaracava ecaemataneacaya ema Viya, ecamureraya eta ítauchirayare tamutu eta mavarahaqueneanahi. Máimaharinépa éma. Tíjaracaheyare tamutu eta ecamunuqueneana.

Te vicajirica eta vímahaqueneana, vijacapayare eta táitsivayare ánaqui te anuma

(Mt 6.19-21)

³² Vahi ecupica, eti nuchichanaveana. Tayanapane vahi camurihénahini, eti máichuhaqueneanahi ema Ecaiyaquenehi. Éma téchahehi. Eta tacahe, tétavica vahi eta mavapinairavahi eta majacapirahehi, machaneraheya. ³³ Tacahe, te ecaimahaquenepuca, íjararecayare eta ímahaqueneana. Íjaracayare nácani ticamunuvanahi. Tásiha, ema Viya máimahainépa, éma tíjaracaheyare eta táitsivayare ánaqui te anuma. Máitavacainapa eta ecaimahaquenéraya. Tájina-varepa tévajaicavaimahi. Váhivare táeñamavacare ánaqui taicha nájinapa tíameyechahemahi, váipavare cachusirimahi eta ímahaqueneanayare. ³⁴ Éti, te ecamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecamurehichapuca eta ícuchiana te anuma, ánaqui evarahayare eyanavaneyare.

Yátupina eta vicuneuchiravaina

³⁵ Éti, yátupina eta ecuchapiranuya eta nuchaviraya. Etsecavaya tamutu sácheana. ³⁶ Ácutihí nácani achaneana músuana titsecavanahi te tapaja navejiquenéraya ema náquenu eta machaviraipahi másihairahi mayehe ema arayenahi. Te máehahamecapa eta tapaja, enevaneyarepa éna navejiquenehayare. ³⁷ Tayanapane enumuhupuca yati, tíjararhipuca eta machavirayarehi ema náquenu. Tétavicasera eta náuricacarevahi ena músuana eta machimapirahi ema náquenu eta nacuchapirahi, te vahi náimacaequenehahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajacaru-vainapa máechapajiricavacayare. ³⁹ Nuvaraha ácaicutiaraqenéna. Machu ácutiriana mácani achane námeyeruhi ena tímerahiana. Tájina máechapiavahini tájahapuca hórayarehi eta náitecapauchiraya te mape-na. Te máechahipucaini, ticuneuchavaipahini éma, váipasare nacuameyechahini. ⁴⁰ Eta tacahe, éti écaunchavayare tamutu sácheana, taicha vahi échaimahi tájamuhuyarepuca eta nuchavirayare nuti Manerejirunhi ema Viya, machu íárameca —macahepa.

Nararihi ena músuana tíuriana. Nararihivare ena músuana máurirahana

(Mt 24.45-51)

⁴¹ Tacahe, ema Pedro mayaserecapa. Ánipa maicha: —Tata Náquenu, eta juca pímicutiarachaquenehavihi, ¿viiyehayarechuchapuca viti dócequeneana, téhesera vimutupuca viti véhicavianahi? —macahepa.

⁴² Tacahe, ema Viáquenu majicapapa:

—Nímicutichinahepa eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te

apana avasare. Taitusiava matuparacahi ema empleado eta máijarasiraya eta tinicacare ena apamuriana machamusuvanahi. ⁴³ Tétavicava eta máuricacarevaya ema maca ticatuparahahi, te tamutuhi máitauca jácani machimapirana ema máquenu. ⁴⁴ Németeaca, eta tamutuirahi tiuri eta machimapirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíurihi eta máitauraiva. ⁴⁵ Téhesera, váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu. Tásiha, macaetemajiricavacapapuca ena machamusuvanahi, énapa ena vanaracanahi. Máichapapuca eta piesta, téniricapa térapa, ticavahapa. ⁴⁶ Tásiha, vaipa manecapauchavahini te títecapapa ema máquenu. Tásiha, machimaracapa ema empleado eta mamapachichijisiraipa eta máimahaqueneana. Eta tacahe, ema máquenu macavanairipinapa náestacayare murara, taicha eta mamasuapajirairavahi. ⁴⁷ Tacutiquene mácani musu, te máechahi eta mavarahaqueneanahi ema máquenu, tásiha vahi máitauchahi eta mavanahianahi éma, muracayarehi eta macaicuñairayare. Ticaestayarehi éma. ⁴⁸ Mácanisera musu, te vahi máechahi eta tacayemaqueneana, tásiha téjecapavapa, éma apaesayaréchu eta máicuñayare. Étipa eti ecaimitucasianahi eta yátupiqueanahi, tatuparacahi ímitucavacayare ena apamuriana achaneana. Núti, ánaquiaparipa eta nímitusiráhehi; tásiha puiti, étipa táehanacahi eta juca ímituresirayare.

Ena achaneana nacatianacainapa ena téhicanaya ema Jesús

(Mt 10.34-36)

⁴⁹ Núti, eta nítésirahi te juca apaquehe, tímitecanuhi eta népeniraya. Yátupiyare eta nucatajivairayare, naicha ena ticatianacanuana. Éti apanava, ticatianacahanayare táichaveneyarehi eta éhisiranuhi núti. Tímicutijiricavayarehi te tipaica eta yucu, eta tamuruira eta muiji. Eta juca, nuvarahaquenehi táitauhavavanehini. ⁵¹ Éti ímijachapapuca eta nítésirahi te juca apaquehe, tájina tácyemacarémahí, ímijachapavarepuca tíuricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe. ⁵² Taicha puiti juca vicaijuheyare, te natarihinapapuca te étanahi peti mácani achane, esu mayena, esu machicha, ema machicha, ésupa esu chinenaca. Te mapananahipuca ena téhicanuanahi, tásiha apinanahipuca ena ticatianacanuana. Téhesera apinanahipuca ena téhicanuanahi, mapananahivarepuca ena ticatianacanuana. ⁵³ Mácani achane, súcani esena, te natarihi ena nachichanaveana, nacatichayarehi ena ticachichanahi táichaveneyarehi eta náehisiranuhi éna. Mácani apana achane masuapajirairahahi, súcani esena, nacatichayarehi ena nachichanaveana táichavenehi eta náehisiranuhi, énapa ena nachinenanaveana.

Ena achaneana timasuapanahi eta máimeruana ema Viya

(Mt 16.1-4; Mr 8.11-13; Mt 5.25-26)

⁵⁴ Tacahe, ema Jesús máechajicapa ena achaneana: —Te ímaha timapicurume, émetecaripa tiquivayare. Ene tacahehi. ⁵⁵ Técaticavapuca te vana, émetecaripa váipavare tiquivaimahi †. Énevare tacahehi. ⁵⁶ ¡Eti masuapajirairahana! ¡Yátupihinéni ímatiequenehahi te tiquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi! ⁵⁷ ¿Tájaha tacayema vahi ávarahahini éhica eta juca yátupiqueneana? ⁵⁸ Járarapainapa eta sache ticaicuñanainapa namutu ena achaneana. Tacamunurichu etanucayare puiti ema Viya, ecasiñayare ecuchucuyavaina. Eta juca tímicutijiricavahi mácani achane te ticametauchacasiya. Tatuparacahi tativaya máetupiricanumaya eta mayaseasirayare perdón ema timetauchahi, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina. Numetacahehi puiti: Te jácani esiapa eta yucu infierno, váhiquene iúchucaimahi éti —máichavacapa ema Jesús.

Tavaraha náeneuchava ena achaneana

13 Étarichu te jena sache, títecapanavarepa ena apamuriana achaneana. Nametacaipa ema Jesús eta táíñehiquene máichaquenehi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahe: —Ena nani, galiléoanahi éna. Tépenanapa te tachacayanahi eta sárareana nacaparuanahi námavahuásanahi. ¿Étapuca eta nasipeaturaivahipuca tímicapavacahi? —nacahepa. ² Tacahe, ema Jesús máichavacapa: —Éti ímijachaipa táimicaparuhi eta nasipeaturaiivanahi ena nani nayehe ena apamuriana najaneanahi te Galilea. ³ Nútisera numetacahe: Váhira étainahi táimicapacahini eta nasipeaturaivanahi. Vahi étaparacaina. Tacamunusera éneuchavavane éti, machu táijahúchava eta épenira, machu ácuti éna. ⁴ Némechahe ena nani diéciochoqueneana tacaparuana ena táevajaisiravahi eta torre tayuchamarainihi te calle Siloé. Ímijachapapuca táimicapacavacahi eta táichapevahi eta naviureva, navetijipapuca nayehe ena apamuriana ticavasanahi te Jerusalén. ⁵ Nútisera numetacahe: Váhira ichapena eta naviureva ena apamuriana. Étiripa, te vahi ecueneuchava, énerichuvare tójahúchavaya eta épenira —macahepa.

Ena Jesús máimicuticha eta yucuqui máhiriquire

⁶ Eta máechajirisirahi ema Jesús, máimicutijirichinapa. Ánipa macahehi:

† Te jena avasare Judea, te táerisine eta sache eta tásirareasa eta tiquiva. Étasera eta táuchusiha eta técativava te vana, tájijicahi tamutu, taicha tijuruhimuhivare.

—Matiarihihi ema achane. Tatiarihihi eta masucure higo. Máhiriquirehisera. ⁷ Tacahe, máichapa ema mamusura: “Mapanapa año vahi ticahi eta juca nusucure. Péchupaicayare puiti taicha tiápitaváiricaipa eta te juca isaniti” macahepa. ⁸ Émasera ema musu majicapapa: “Tiúripanapucaini, tata, vicuchapaichahaini étanainavaréni año. Nuvaraha némurinahechayare eta máteji apaesa tacahipapucaini. ⁹ Téhesera váhiquenénai-chapuca tacucahi, néchupaicasarepa” macahepa ema musu.

Emá Jesús macanaraca esu esena tépiñumaiquehe

¹⁰ Te apanapa sávaru, ema Jesús tímiturecavarepa tayehe eta náurujisirareva. ¹¹ Sutiarihihi esu esena mávaháruhi ema éreana, tépiñumaiquehehi eta suítare-sira. Vahi táurihini sutupinahahini. Diéciocho áñoripa eta sucajumairahi. ¹² Te máimahapa ema Jesús, máichuhapa. Tacahe, supauchapa. Máichapa ésu: —Páurevi piti esena, picajumahi. Puítisera pinaracainapa —máichapa.

¹³ Tacahe, ema Jesús manacapa eta mavahuana te suápusi. Enevanepe titupinahahi ésu, tinaracapa eta sujumainihi. Ichaperinehi eta sucunachirahi ema Viya. ¹⁴ Matiarihihivare ema táquenuruhahi eta náurujisirareva. Eta máimarahi eta juca, tisemarinehi taicha eta macanarasirahi ema Jesús esu sucajumaquene te jena sache sávaru tacapicahuquenehi. Tásiha, máichavacapa ena achaneana:

—Saisi sache tatuparaha eta vicaemataneraya, énerichuvare eta nacaipuirayareva ena nacajumaqueneana. Puítisera juca sache, vahi táuricahini nacaipuhini taicha tacapicahuquenehi —macahepa.

¹⁵ Tásiha, ema Viáquenu Jesús, majicapapa:

—¡Tétavicavahi eta tamuracava eta esamureana! Te ticaitiquihi eta epera te jácani sache sávaru, evejapucayarehi eta ésichirayare eta une, tayanapane tacapicahuquenehinéni eta sache. ¹⁶ Suvetijicha esu suca esena vicutiquenehi achane, mámariequenehi ema viáchucaini Abraham, ticatajicacarehi eta nucanarasirayarehi tayehe eta máítiarapi ema Satanás. Taicha dieciocho áñoripahi eta máecájumachirahi ésu. ¡Táuricahi nucanaracayarehi puiti juca sache tacapicahuquenehi! —máichapa ema Jesús.

¹⁷ Eta nasamirahi ema Jesús, namutu ena ticatiana-canahi titsirihanarinehi. Énasera ena apamuriana achaneana tiúrisamureanarinehi, taicha eta náimairahi eta táuricacarequeneana máichaqueneanahi ema Jesús.

Emá Jesús máimicuticha eta taqui eta mostaza

(Mt 13.31-32; Mr 4.30-32)

¹⁸ Ánivare macahe ema Jesús:

—Puiti nuvaraha nímicutichinahe eta nímiturapiana nuti Manerejirunuhi ema Viya. ¹⁹ Tacutihu eta ánichichaquene taqui eta mostaza. Te máevacapa ema achane te máesane, tiúnarahiyarehi eta tajurusira. Tásiha, járajapainapa eta cáyureana, ticamacajiyarehi te tatavana eta sucureca.

Emá Jesús máimicutichavare eta lévadura

(Mt 13.33)

²⁰ Ánivare macahe ema Jesús:

—Nímicutichinaheyaeva eta apana. ²¹ Eta nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri —macahepa.

Vicamesavayare visiapa te tapaja ánicurichu

(Mt 7.13-14, 21-23)

²² Emá Jesús tiyanavare tipaica. Máimitucavacahi ena achaneana te jácani avasare máitecapihapahi. Macaijuhehi eta Jerusalén, váhisera máitecapavanehini.

²³ Matiarihihi ema tiyaseserecachi éma, ánipa maicha: —Tata Viáquenu, ¿váchipuca camuriahavianainaya viti viúchucuhanaya? —máichapa.

Tásiha, éma majicapapa:

²⁴ —Vahi táechacare te ánimuriheanayareichupuca eti esiapana eta mávasa ema Viya. Étisera tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navairahi tisiapanaya, váhisera títujicavanaimahi. ²⁵ Taicha járajapainapa eta sácheyare, nératacainapa eta tapaja. Tásiha, ítecapapapuca éti, éhahamecapa eta tapaja, epiaracanupa: “Tátachicha, pivejjequenehahavi”. Tásiha, nujicapahénapa núti: “¿Nájajahesica éti? Vahi nímatihe. Váhivare nuchanerahénahi éti”. ²⁶ Tásiha, ejicapauinapapuca: “Vítirichu picachanequeneanahi te mesa eta vinisirahi. Pímitucavahivare te plaza te jena viávasa”. ²⁷ Tásiha, nujicapahénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahi eta tamauriqueneana” níchahénapa.

²⁸ Járajapainapa eta sache ímahainapa te tajuhe eta mávasa ema Viya te návihahi ena viáchucanaveanainihi: émaripa ema Abraham, ema Isaac, ema Jacobo, énapa namutu ena profetana. Étisera enasinapa te aneca. Tétavicavaya eta íyauchiravaya, ecapitiquiahechiravaya taicha eta ecatisamuréravaya étapa eta etsiriraya eta emasiapirahi. ²⁹ Nasapiha tisiapanaya ena camuriqueneana achaneana tiásihanayare te tamutu avasareana te juca apaquehe. Tétavicavainapa eta náurisamurevaya. ³⁰ Tásiha, te jena sácheyare, nácani téquenehanahi puiti, nasapihainapa tisiapanayare. Étisera eti ínapureanahi puiti, étinavarepa vahi ítujicavaimahi esiapá —máichapa ema Jesús.

Emá Jesús ticatisamureva náichavene ena achaneana ticavasanahi te Jerusalén

(Mt 23.37-39)

³¹ Tacahe, te jena sáche, títecanapana ena fariséoana te mávihahi ema Jesús. Náichapa:

—Piyana. Pitátájiva piúchuca eta te juca. Taicha ema Herodes mavaraha ticapacaviyare —nacahepa.

³² Émasera ema Jesús majicapapa:

—Eyana emetaca ema mácara ticaetemarahuene. Vahi típicararecanuimahi núti eta juca mametarapihi. Nunasiyarechaha puiti, nucanararecanumayare ena nacajumaqueneana énapa ena návaháruanahi ena éreanana. Núti jucarihi eta nématanerepipahi eta tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi ena ticapahianahi ena profetanaini.

³⁴ Tétavicavahi eta táimicatisamurechiranu eta víava Jerusalén. Namapuruji ena tachichanaveanasami. Éna, ticapapajicanahi ena profetanaini mavanaranahi ema Tata. Puiti navarahainapa nútipavaya ticapacanuana. Ichapemurinehi eta níchuiravacahi éna, náurujiacanuhini tacutihini eta varayu te tacuruji-muriha eta tachichanaveana te tapava. Váhiquenesera návarahahíni. ³⁵ Náimainapasera eta náicharacavayare. Ticaquipaicasiyare tamutu eta napenana. Táimijunavacainapa éna eta napisiraya. Numetacahavane puiti: Eta nínajiasiravacainapa, vaipa tímahanuaimahi. Tiámainucavainapa te náitsivacha eta napanereruana, navarahainapa tijacapanuana. Nacahénapa: “Ichape eta vicunachiravi píti vanairucaque-névihí me Viya” nacahénapa.

Emá Jesús macanaraca ema achane tíamaquiape

14 Tacahe, te jena sache sávaruhi, ema Jesús ticaichuhacasihi tinipanaya te mapena ema émana náiyamuri ena fariséoana. Ticaichuhacasiánahivare ena apamuriana fariséoana, énapa ena máestroana tayehe máimiturapiana ema Moiséni. Navarahahi nacaicutiarayarehi ema Jesús. ² Tíjahúchavapa tímercava te nataracu ema émana achane macajumaquene. Tiámaquiapevacahi éma. ³ Ema Jesús, eta máimairahi ema macajumaquene, mayaserecavacapa ena natiarihiqueneanahi:

—¿Táuricapuca vicanaracavaca ena nacajumaqueneana puiti juca sávarumuhirahi tacapichuquenehi? —máichapa.

⁴ Énaserá vahi najicapahini, timatinanarichucha. Tásiha, ema Jesús macaratavauchapa ema macajumaquene. Eta macaratavauchirahi, enévanepa tinaraca. Tacahe, máevatacapa mayana te mapena. ⁵ Tásiha, máichavacapa ema Jesús:

—Nímicutichinahe puiti. Éti, németeaca májina émanaina achane vahi macujapanuhini eta mapera burro, mavuiyerapuca, te tiáquipaicavahi te pusu te jena sache tacapichuquenehi. Eta máeñamirahi, tipatsicavayarehi macaechepupana eta paure sárare, tayapanehinéní eta sache tacapichuquenehi —máichavacapa.

⁶ Énaserá vahi napatsicavahini najicapahini. Timatinanarichucha.

Emá maconsejarapianahi ema Jesús

⁷ Eta máimararasiravacahi ema Jesús ena macumpirachaqueneanahi ema fariseo, énajivahi tinerejiu-

chavana eta náejasihayarehi tíurinapanana. Tacahe, ema Jesús maconsejachavacapa, ánipa máichavacahi:

⁸ —Te natiarihinapuca nacumpirachahe, vahi ecainapupuicavaimahi ecaejacava tayehe eta téjasihacareana taicha tijuricati eta máejasihayarehi mácani ticapichupanahi eyehe éti. ⁹ Taicha ema téniricahi, éma ticaejarecayarehi, tijuricati macaechepucavi te péjasi-hahi macaejasihayarehi mácani apana. Títisirihacarepahi eta macaejacavahini te náequenemuri.

¹⁰ Te ecaichuhacasipuca, ecaejacavaya te náequenemuri, apaesa ema téchahi tíchuhahénapa ticaejacahere te návihahi ena típicauchacareanapanahi. Tásiha, ecunachacarénasarepa nayehe ena natiarihi-queneana. ¹¹ Taicha nácani ticasíñavavaicanahi tímijachavanahi ticapichuana, ema Viya máimicatsiriacavayarehi. Nácanisera mánsuanahi eta náitaresira, ichapeyare eta nacunachacarevayare me Viya.

¹² Ema Jesús maconsejachavare ema fariseo, ema ticumpirarecahi:

—Píti apanavare, te pénicarayare, vahi nacucarichu píchuhavaca ena pémunacasareanahicha, ena piparapenaveanapuca énaripa ena rícoana, táichavenénahi eta pivairairainahi títsirijicavanaya eta piyehe.

¹³ Píchuhavacayareva ena páureana, nácani nacahe-mahianahi: túpúpavaquiana, masariana, púchuquiana.

¹⁴ Taicha ena nani, vahi títsirijicavaimahi eta piyehe. Táitsivasera tétávicavayare eta piúricarevayare píti eta pijacpirayare eta pícuhihi te jena sáchezare picachanevacayare ena náuriqueneanahi macaechepureana ema Viya —macahepa.

Emá Jesús máimicutichinavare ema achane tíchuhavacahi ena achaneana, máeniruanayare

¹⁵ Tacahe, eta nasamirahi ema Jesús ena natiarihi-queneanahi te mesa, téchajicapa ema émana. Ánipa macahehi eta mayehe ema Jesús:

—Tétávicavayare eta víuricacarevaya te visiapapuca eta mávasa ema Viya, vinicayare te mamesara —macahepa.

¹⁶ Tásiha, ema Jesús majicapapa, máichapa:

—¡Jéhesare, te esiapapapucaya! Nímicutichinahe puiti. Matiarihíhi ema émana achane téniricahi eta ichapemuriquene tinicacare. Camuriana ena máichuhaqueneanahi. ¹⁷ Te máimahapa tíuripa eta tinicacare, mavanecapa ema mamusura mametacavaca náitecapa ena nacaichuhacasiqueneanahi taicha tíuriripahi eta tinicacare. ¹⁸ Namutusera natanucapa eta náetseraruyarehi. Ema apana ánipa macahehi: “Vuíchaha nítujicavaimahi níteca. Nuyananumayare nímahapanayare eta nuvachareruhi apaquehe”. ¹⁹ Ema apana énerichuvare, ánvare macahe: “Picatajicannuchaha. Vuíchaha nítujicavaimahi níteca, taicha nuyananumayare nímahapanayare eta cinco yúntaquene vuyie nuvachareruanahi”. ²⁰ Ema apana ánvare macahe: “Nupaenumava nítauchavahi eta nuvehacacairahi. Eta tacahe, vahi nítujicavaimahi níteca”. ²¹ Te tichavapa ema musu vanairucahi, mametacapa ema máquenu eta namaitujisiravavacahi títecana

ena máichuhaqueneanahi. Tásiha, tise mapa ema máquenu. Máichavarepa ema musu: “Tiuri, piyana puítirichu te plaza étapa te cálleana. Píchuhavaca ena páureana, ena masariana, ena púchuquiana, nácani pétupiaruanayare nacahemahiqueneanahi”.²² Tacahe, te tichavavarepa ema musu, mametacapa ema máquenu, máichapa: “Tata, nítaucharipa eta juca pivanairipihí. Jucarihichahasera eta juca téjasihacareana”.²³ Tacahe, ema máquenu máichavarepa: “Piyavare puítirichu te isanitiana. Píchuhavaca ena achaneana, nácánipa piácapajiruanayarepahi te achene. Picamesavaca náiteca, apaesa nayuriticava eta juca téjasihacareana mávacuanaichahahi. ²⁴ Nusemácarupa puiti. Nájinava néniruimahi ena náinapuréanahi níchuhaqueneanahi” macahepa ema téniricahi —máichapa ema Jesús.

Vahi máejeraréna eta véhisiraya ema Cristo

²⁵ Te jena sácheana, camuriana ena achaneana téhicanihi ema Jesús. Tásihasesera, éma máesenimurihapa. Máichavacapa:

²⁶ —Te etiarihipuca éti evarahanayare éhicanu, tacomunu epamicavaya yátupina eta éhisiranuya. Nútina-pa émunacapanayare, németavicainapa eta émunasiravacaini ena ticachichaheana. Mácani achane németavicayareva eta máemunasiraini esu mayena, machichanaveanapuca, maparapenaveanapuca. Váipavare éñamaimahi eta ítaresira. Téhesera apaesari-chupuca eta émunasiranuyare, vahi táuricaímahi éhicanuhini. ²⁷ Ecatajivayare taicha eta éhisiranuyare. Te epicahipuca íjaracava muraca, táimicapacahepuca eta éhisiranuhi, tiúripánaichu vahi ecuehicanu. ²⁸ Tacu-tiquene te epanerechahipuca éti épiyarecayare eta anuquehe peti apinapuca piso, vahi táuricahini émunanasicavahini enahahajisiravainarichuini ecae-matane, epanerechanumayarehi áyanayarehipuca egastaruya ítauchirainahi eta evarahaquenehi épiyaca. ²⁹ Vahi ácaemuñavaimahi épiyareca eta tiúrina peti, te vahi áratahaimahi ítaucha. ³⁰ Tásiha, nacahénapapuca ena ticaecahiheanayare: “Ímahapa, váhira máratahahini máítauchahini eta jena peti, táurinaquene-yarehíji. Tíjaracavasamipa. Ichape eta mamelaya” nacahenapapuca. ³¹ Émaripa mácani rey, te tise-mahipuca, mavarairahi máichayare eta guerra, macanayarehi mácani apana rey camuripananahi ena machanerana, mapanerechanumayarehi te maratahayarepuca macanara taicha éma vahi camurianainahini ena machanerana. ³² Eta máimairahi vahi máratahayarehi, váhivare tíjaracavaimahi máehacacahini. Tásiha, máimivanerecainapa mayehe ema mánarayarehini táitavapa eta semanerehi, vaipa nacupanerechahini. ³³ Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi eratahayare, vahi ecucaemuñava éhicanuhini.

³⁴ Eta icheve, tétavicavahi eta táurivahi taicha eta tacamunucarevahi. Étasera eta tajachira eta icheve, tépurucarepahi. ³⁵ Tájina-pa tacamunucarevaihini.

Ticaquijiyarepa. Ene nacahehi ena tínajicavana eta náehisiranuhi. Nacutihi eta tajachira eta icheve. Te evarahapuca ecaicutiara, tavaraha eta epanerechivanava —macahepa.

Éma Jesús máimicutichinahi te témitiaca étana uvesa (Mt 18.10-14)

15 Tiuri, te jácani sácheana, títecaparacanavarepa ena achaneana te mávihahi ema Jesús. Camuriana-pahi éna. Natiarihipahi ena cóbrarécarahiana eta impuestoa. Namutu éna, ichape eta náepurucarevahi nayehe ena fariséoana. Émasera ema Jesús, vahi máepuruvacahini. Tásiha, témeñahavanapa éna te machacaya, taicha navarahapa nasamararacayarehi éma. ² Natiarihipahivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánipa nacahe:

—¡Vahi tiuri eta máichaquenehi ema maca! ¡Namu-tuchucha majacavapuca ena nacahequenetéatájiana ticajachahacareanahi! ¡Nasapihapa macachanevacahi eta nanisirahi ena nánitatajiana! —nacahepa.

³ Tacahe, te masamapa ema Jesús eta juca, máimicutichinavacapa eta máimitusiravacahi. Ánipa máichavaca:

⁴ —Esamanuchaha. Nímicutichinaheya puiti. Matiarhi ema émana achane. Ticayehehi eta cien uvesa. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, majunijicayarehi eta apamuri noventa y nueve uvesa te majaneasihahi. ⁵ Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepa. ⁶ Te títecapapa te mapena, máichuhapa ena machacayapenana májiriareana. Tacahe, máichapa éna: “Yare, éti apana iúrisamurevare nuyehe núti. Taicha níchimavaipahi eta uvesa táemitiaruhi” máichapa ena májiriareana.

⁷ Tiuri, núti numetacahe eta juca: Énerichu ema Viya te anuma tiúrisamurevare nayehe ena achaneana tiúritaresiranahi, taicha tájina náejecapiravainahini. Tétavicavainehisera eta máurisamurevahi ema Viya nayehe nácani achaneana tímationahi eta nacapecaturairahi, tásiha téneuchavanapa, náinajicapa eta napecaturaini —macahepa ema Jesús.

Éma Jesús máimicutichinahi eta táemitiaru étana reale

⁸ Tímiyanava eta máechajirisirava ema Jesús, ánipa macahe:

—Nímicutichinaheya eta apana. Sutiarihi esu ésuna esena. Ticayehehi eta dies reale eta tijapu plata. Te témitiyechapuca eta étape, tinanesiyarehi sutanucayarehi eta táemitiaruhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena. ⁹ Te suíchimavapa, tiúrisamurénapa. Suíchuhavacainapa ena suchacayapenana suájiriareana. Tacahe, suíchavacainapa éna: “Yare, éti apana iúrisamurevare nuyehe núti, taicha níchimavaipa eta reale nucamitiaruhi” suíchavacainapa esu

esena ena suájiriareana. ¹⁰ Tiuri puiti, núti numetacahe eta juca: Ene macahehi ema Viya. Tétavicavainehi eta máurisamurevaya te namuri ena ángeleana eta máeneuchiravapa mácani achane cápecaturarahini, máinajisiraipahi eta mapecaturanaini —macahepa ema Jesús.

Ema Jesús máimicutichinahi ema émana achane amaperu tacamitiriaru eta matuhusiva

¹¹ Tímiyanava eta máechajirisirava ema Jesús, ániapa macahe:

—Matirihahi ema émana achane. Apinanahi ena machichanaveana. Ajairana. ¹² Étana sache, máichapa ema maiya ema émana machicha amuyapana: “Tata, picatajicanupa, píjaracanu puiti eta nuyehyare tatuca chaquenenuyare eta picayehequeneana” máichapa. Tacahe, tísapavapa ema naiya. Máijaracavacapa eta máimahaqueneana ena apinana machichanaveana.

¹³ Tacahe, étarichuhi te jena sácheanahi, tétupiricavapa ema amaperu, tiyanavanepa. Mámapa tamutu eta mayehechiravaripahi máijararuhi ema maiya. Tiyanapa te apana avasare tayerehiquene. Eta ánaqui, máitaiyahi tamutu eta máimahaqueneanaini. Tamutupa mamapachichijica. ¹⁴ Tacahe, eta jena sácheana, táitecapauchapa eta ecuha eta avasare mávihahi ema amaperu. Tacahe, namutu ena achaneana tayehe eta te avasare téchurihanapa eta tinicacare. Tivayuchavapa eta ecuha. Ema amaperu títarahaipahi eta máimahaqueneanaini. Tásiha, tájinapa maviyahini eta manica. ¹⁵ Tásiha, ticaquenurecapa mayehe ema émana achane. Tacahe, ema máquenuhi mavanecapa ema amaperu eta majaneasinaya eta cúchiana eta te máesane. ¹⁶ Ichapesera eta máecuavahi. Majamura-chainehi manicahini eta taniru eta cúchiana, taicha nájina náitátihini éma. ¹⁷ Tacahe, téquecavapa eta mapanereruanahi. Tipanerequenehavapa émajiva. Ániapa tacahehi eta mapanereruhi: “Namutu ena mavanarana ema tata, tiúrihi eta nanisira. Nútisera ani ticapacanuina eta nécuava. ¹⁸ Níjaracava, nuyana nuchava eta me tata ticachichanu. Tásiha, níchayare éma: Tátachicha, nucapecaturapa mayehe ema Viya étapa eta piyehe piti tata. ¹⁹ Tayanarinepuca táimicutijiricavainepuca vahi pichichanuina. Picatajicanusera. Pijacapanu, nímiáquenuchavarine piyehe piti tata. Nácutirine ena pivanarana. Níchayare ema tata”. Tacahepa eta mapanereruhi ema amaperu achane.

²⁰ Tásiha, tiyanapa tichava eta me maiya. Te tiánehipa títecapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijunapa mácapa. Majupahacapa ema machicha. Máetserarecapa eta máurisamurevahi. ²¹ Émasera ema amaperu, téchajicapa. Ániapa maicha: “Tátachicha, nucapecaturapa mayehe ema Viya étapa eta piyehe piti tata. Tásihasera, tayanarinepuca táimicutijiricavainepuca vahi pichichanuina” máichapa. ²² Émasera ema maiya, mavaraha máimerecaya eta yátupirahi eta majacpirahi ema machicha. Vahi máicuñacahini. Tásiha, mavanecapa ena mava-

narana. Máichapa: “Etátájrira, iama eta muíriare tiúri-napana. Emuiriacha ema maca nuchicha. Iama eta tiúrinapana surtija; masurutijaina. Iámavare eta tiúrinapana eparupeva, máeparupevaina. ²³ Énerichuvare épana eta jena mamona tiújepana. Ecapaca, vinica. ¡Víchayare eta piesta! Viúrisamurevaina eta máitecapirahi ema maca nuchicha. ²⁴ Taicha éma, tímicutijiricavahi eta máepenaquenénahini ema maca, puítisera tiúchujicapa tichavapa ani nuyehe. Máemitiaruhi te numirahu, puítisera nímahapa éma” macahepa ema maiya. Tacahe, ichape eta náurisamurevahi namutu. ²⁵ Tiuri, ema émana machicha máechavihi tiyanahi te isaniti. Te tichavapa, te tiánehipa eta napena, masamapa eta piesta te tajuhe. ²⁶ Tásiha, máichuhapa ema émana nacajurure. Mayaserecapa: “¿Tájaha tacayema eta juca piesta?” macahepa. ²⁷ Tacahe, máichapa ema macajurure: “Ema piparape títecapahi. Tásiha, ema piya máimicapacapa eta étana mamona tiújepana. Ichape eta piesta, taicha eta máurisamurevahi ema piya ema máitecapirahi ema piparape” máichapa ema macajurure. ²⁸ Tacahe, tisemarinehi ema maparape. Vaipa mávarahahini masiapahini. Tacahe, te máechapa ema naiya, tiúchucapa. Macamesapa macasiapa. ²⁹ Majicapapasera ema machicha, ániapa maicha: “Pímaha, tata. Ánaquiapapa eta nítatíravihi núti. Tájina nímatiyahini nácapaemachavahini te pivanairipiana. Tásihasera, tájina píjaracanuina eta étanainahini chívachichainapucaini eta nunicahini nucapiestarahipucaini núti, nácachanehini ena nájiriareana némunacasareana. ³⁰ Tásiha, puiti pímicapacainehi eta mamona tiújepana, taicha eta máitecapirahi ema émana pichichatataji. Ema mácatataji títahacavahi eta píjararuinihi picayehequeneanainihi náichavenehi ena esenana túhusiana” máichapa ema machicha. ³¹ Tacahe, ema maiya máichapa: “Pímaha, nuchichachicha, píti ánaquiaparipa eta péjahasiranuhi. Tásiha, tamutu eta nucayehequeneanahi, piyeheanahivare píti. ³² Puítisera, táuricaichucha vicha eta piesta eta viúrisamurevainahi, taicha tímicutijiricavahi eta máepenaquenénahini ema maca piparape, puítisera tiúchujicaipa, tichavapa éma. Ema máemitiaruhi te vimirahu, puítisera viápechavavarepa vímaha éma” máichapa.

Tacahehi eta máechajiririvanahi ema Jesús nayehe ena achaneana.

Eta máimituresirahi ema Jesús, máimicutichina ema capataz timapachichijicahi eta máimahaquene ema máquenu

16 Ema Jesús ánivare macahehi eta máimitusiravacahi ena máimitureana:

—Nímicutichinahe eta apana. Ema achane rico, matirihahi ema mayehe capataz, téchahi tamutu eta máimahaqueneana ema máquenu. Tásiha, masamairiricapa ema máquenu eta mamapachichijisiraipahi eta máimahaqueneana. ² Tacahe, ema máquenu máichuhapa. Mayaserecapa: “¿Tájaha tacayema eta juca? Nusamauchavihi eta pimapachichijisirahi eta

nímahaqueneana". Émasera ema capataz tájina maviyavahini macatiuchiavahini taicha yátupihi eta májecapiravahi. Tacahe, ema máquenu máichapa: "Tiuri, vitupaequenehayare tamutu taicha vaipa nuvaraha pímiyanava eta nuyehe".³ Tacahe, ema capataz ichaperinehi eta mapanereresirahi taicha eta máchusiraya. Tásiha, macahepa te mapanereruana: "¿Tájahainapapuca nícharacavayare puiti? Ema náquenu ticuchucanuina tayehe eta juca nématanerepihi. Ichape eta nutsirihacarevayare taicha vahi núrihahini nucaematanehini eta isaniti, váhivare nuratahaimahi eta tamuracava eta emataneca. Titsirihacarehivare nuyaseserecahini eta nunicaquene.⁴ Tiuri, áni nucaheyare. Némeñahavayare nayehe ena ticanteveanahi mayehe ema náquenu, tiámainucava te nitucavapapucaini eta nítatijiyavayare" macahepa te mapanereruana.

⁵ Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: "¿Péchapuca áyana eta pintevehi mayehe ema náquenu?"⁶ Tacahe, ema ticantevehi majicapapa: "200 lata eta aceite comer eta nuntevehi mayehe". Tacahe, ema capataz máichapa: "Júchahi eta piyehe vale pifirmarui. Puítinrichu vítsivachaya eta apana vale. Vaipa pivachachaimahi tamutu. Cien latainarine eta pinteveyare" macahepa.⁷ Tacahe, mayaserecavare ema apana: "¿Pítiyapa péchapuca áyana eta pintevehi?" Ema ticantevehi majicapapa: "Séisicientohi tarera eta trigo eta nuntevehi mayehe". Tacahe, ema capataz máichavarepa: "Júchahi eta piyehe vale pifirmarui. Vítsivachaya eta piyehe vale. Vaipa pivachachaimahi tamutu. Quinientorine tarera eta pinteveyare". Ene tacahehi eta máichirahi nayehe ena apamuriana ticanteveanahi, máitsivachirapaipahi eta nayeheana váleana.⁸ Tacahe, te máechapa ema máquenuini eta máichaqueneanahi ema mayeheni capataz eta macatiuchiravahi, ánipa macahe: "Tétavacava eta máitusirahi masámápuha ema maena nuyeheni capataz" macahepa ema máquenuini. Ene nacahehi ena achaneana máimatirahanahi ema Viya. Éna tiápajupanavanahivare eta náitusirahi eta tayanirava. Nacachuricahi ena téhicanahi ema Viya, taicha tavayuacavacahi eta tájiparacana.

⁹ Puiti numetacaheyare eti nímitureanahi: Eta itaresirahi te juca apaquehe tauriquenehi, te ecaimahaquenehipuca, ecayare te napauchahepuca ena ticamunuvanahi. Tacahe, te ítecapapa te mávasa ema Viya, tiúriyare eta ítecapiraya, ánaqui ejacapainapa eta táitsivayare.

¹⁰ Taicha nácani tiúrihi eta náechapajirisirahi jácani ánichichaquenehi, ene tacaheyarehi eta táurivayare eta náechapajirisirayare eta camuriquenehi. Nácanisera vahi tiúrihi eta náechapajirisirahi jácani ánichichaquenehi, éneyareichuhivare vahi tiúrimahi eta náechapajirisirayare eta camuriquenehi.¹¹ Taicha te vahi tiúrihi eta itauchirahi eta ecatuparahairahi échapajiricaya eta tímahacareanahi eta te juca apaquehe, ema Viya vahi tituparacahémahi eta

tímahacareana yátupiqueneana te anuma.¹² Eta tacahe, itaurahiyare tayehe jácani apayeheana apaesa máijaracahe ema Viya eta ícuchihi, taicha eta máimairahi éma eta itauravahi éti.

¹³ Éti, eta itaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare. Tásiha, ema apana, apaesarineya eta émunasiraina, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurerecahehini eta plata, machu tahapapiricaheriana eta émunasirahi ema Viya, étapa eta ecaemataneasirahi éma —máichavacapa ema Jesús ena máimitureana.

Éma Jesús maconsejachapa ena fariséoana

(Mt 19.1-12; Mr 10.1-12)

¹⁴ Natiarihihivaresera ena fariséoana. Nasamaracachi eta juca máimiturapianahi ema Jesús. Tásiha, nacaecahirichuchasera eta nasamirahi éma. Taicha tétavacavahi eta tavayuasiravacahi éna eta tímahacareana.¹⁵ Tacahe, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihí eta esamureana. Macatianacahi ichape éma eta apimirahérahí.

¹⁶ Numetacahevare eta apana: Ema víyarahaini Moisés, énapa ena víyarahaini profetana títapucanahi eta náechajisihahi tayehe eta nítésirayarehi nunti Cristo ecuchapaquenehi. Puiti ichape eta navapiniravahi ena camuriqueneana téhicanuanapaipa. Éti apana, tituparacahe éhicanuyareva.

¹⁷ Numetacahe puiti: Váhiquene títavaimahi eta tasuapacarevahi eta máechajiriruvana ema Tata. Máichecuaraquire éta, tayanapanehipuca táitava eta anuma étapa eta juca apaquehe.¹⁸ Éti, eta ímiturapi, ísapahi mácani achane máquijica esu mayena, tásiha, ísapahivare maveha esu apana esena. Nútisera numetacahe: Mácani achane, te máinajicapuca esu mayena, tásiha maveha esu apana esena, éma ticapecaturaipahi me Viya. Tacutiquene mácani apanavare achane mavehapa esu esena máinajiruhi ema suima, énerichuvare ticapecaturahivare me Viya taicha ésu, matiaríhichahi ema suímaquenehi —máichavacapa.

Éta macatajivairahi ema rico étapa eta máuricacarevahi ema paure ticajare Lázaro

¹⁹ Tacahe, ema Jesús máimitucavacavare ena achaneana. Ánipa macahe:

—Nímicutichinahe eta apana. Matiaríhihi ema émana achane. Mavayuchahi eta marricuva. Tétavacavahi táurinavahi eta macamuirihaira. Tijanunuha-canecha. Tamutuhi sácheana máicha eta táurinaquene piesta.²⁰ Tásiha, matiaríhivare ema apana achane paure ticajare Lázaro. Ticajumahi. Amairihahi carachachaha eta majuma. Téjahapairicahi éma tamutu sácheana te mapajacura ema rico.²¹ Ema maca paure tiyaseserecachi manicayare eta máemacharajiana ema rico. Tájinasera náijaracaimahi. Tavetijipa, vahi túmenahini ema paure. Vaipa maratahahini macatiucha-

vahini eta táeverasirahi eta tamucuana eta macarachana. ²² Éтана sache títecapapa eta máepeni-rahi ema paure. Nárajapapa ena ángeleana; náepanapa eta máchaneva ema Lázaro, námapa tayehe eta paraíso mávihahi ema viáchucaini Abraham. Tacahe, te táequenepa, tépenavarepa ema rico. Tiúrinavare eta náecarirahi. ²³ Eta máepeni-rahi éma, tiyanapa tayehe eta macatajivaiyarehi. Tásiha, te téjamiháuquichapa, máimahapa eta mávihahi ema Abraham, émapa ema Lázaro te machacaya. Mayerehivacahisera eta máimairahi. ²⁴ Tacahe, tipiaracapa ema rícoini: “Tata Abraham, pájapanunu. Picatajicanu, pivanesinanuini ema Lázaro máechipaicaini apaesachichaini eta mavauqui te une. Máecasarechapanaini eta nunene. Taicha tétavicavahi eta numaunevahi eta te juca nucatajivaiyahi tayehe eta juca návihahi táijurequene yucu” máichapa. ²⁵ Émasera ema Abraham majicapapa: “Vahinuvanecaimahi. Péchavachucha, nuchicha, te achanevichaha, tétavicavahi eta piúricacarevahi. Tájina pácamunuhini eta pítaresirahi. Ánipasera picatajivaiyahi. Émasera ema maca Lázaro, ichapemurihi eta macatajivairahi te achanerichaha. Puítisera vaipa macatajivahini. Puiti éma, majacaparipahi eta máuricacarevahi. ²⁶ Tacutiquene máitujihí eta mánuoirainahini eta ára piyehe. Pítiripa váhivare pítujuicavaimahi pítecapauchahavi ani te juca viávihahi víti, taicha jucarihi eta tíchejimirauchahavihi eta viánucuirainahini tacutihi eta tiúchausi cajacure. Máitujihí eta mayanahini” macahepa ema Abraham. ²⁷ Tacahe, ema rícoini máichavarepa: “Tiuri, te váhipuca títujuicacarehi, picatajicanusera. Pivanesinanuini mayana ema Lázaro te nupena. ²⁸ Mametapaninanuini ena cíncoqueneana nuparapenaveana. Maconsejachapanavacaini eta náeneuchiravainaini éna, apaesa váhini nacuitechahini tayehe eta juca návihahi núti nucatajivaiyahi”. ²⁹ Émasera ema Abraham máichavarepa: “Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanairipianahi, vahi tisiapanaimahi eta te jara ecuñaraqui piávihahi píti”. ³⁰ Ema rícoini majicapavarepa: “Táitaurevaquene ene tacahehi, tata Abraham. Tiúripanahiserahipucaini mayanahini ema émana máepenaquenehi eta nayehe ena nuparapenaveana, mametapanavacahini. Németeaca téneuchavavaneanapaini”. ³¹ Ema Abraham máichavarepa: “Te váhipuca nacusuapahini eta Sagrada Escritura, tacaheyarehi eta namasuapirayare mácani máechepurehi máepenaquenehi” macahepa ema Abraham.

Ichape eta máicuñayare mácani tímiaquipaica te pecatu ena amaperuana

(Mt 18.6-7; Mr 9.42)

17 Te táequenepa, ema Jesús mametamurihavarepa ena máimitureana. Ánipa macahe: —Yátupi eta vahi téjiacavaimahi eta tímiaquipaicayare tayehe eta pecatu ena achaneana. Ichapesera eta náicuñayare nácani táemesiavanayare námiaquipaisiraya nácani apamuriana tayehe eta pecatuana.

² Mácani tímiaquipaicaya ema émana amaperu, tiúripanahipucaini máepenhini mativainahini éma. Váhirichupucaini macucaicuñahini; taicha vahi macuimiaquipaichahini ema amaperu tayehe eta pecatu. ³ Eta tacahe, échapavaya éti machu ímiaquipaica ena amaperuana.

Tatuparaca viperdonacha ena téjicapavana viyehe
(Mt 18.21-22)

Numetacahe eta apana: Te máejecapavapuca ema piparape eta piyehe, piconsejachaya. Téhesera máeneuchava eta piyehe, piperdonachaya éma.

⁴ Tayanapane siétehénapuca máejecapava te étana sache, máeneuchavaserá eta piyehe, tituparacavi piperdonachayare —macahepa ema Jesús.

Tamutuyare virataha te yátupihí visuapa ema Viya

⁵ Tiuri, ena apóstoleana nayaserecapa ema Jesús: —Tata Viáquenu, picatajicahavi. Pímitucahavi apaesa tajurucapaipaini eta vicasifñairavahi mayehe ema Viya. Vívaraha ichapenaini eta vicasifñairavaya eta mayehe —nacahepa.

⁶ Tacahe, ema Jesús majicapavacapa: —Vahi tácomesa ichapenahini eta ecasifñairavahi mayehe ema Viya. Tayanapanepuca ánichichainarichu eta ecasifñairavahi, tácutipuca eta táquichicha eta mostaza, tamutuyare erataha. Étaripa eta jácani yucuqui, te evarahapuca ecayejeca, eratahayarehi. Te íchapuca: “Piyejecava eta te juca, piyana pisucuchava te cáquiure”; tásiha, eta yucuqui tisuapaheyarehi. Tíyjecavainapa tayehe eta cáquiure.

Tatuparaca vítauchayare eta vicaemataneasirayare ema Viya

⁷ Étaripa ema mácani achane te ticamusurahi, te másihapaipapuca ema musu te vámahí eta majaneasirahi eta vaca, te tíсахahipuca, te títecapapa te peti, ema máquenu váiparinehi matátáuchaimahi máepiyaca eta tinicayare eta máenisiraya ema musu.

⁸ Matátáuchayarechucha mavaneca ema musu émaina máepiyaca eta tinicacare, máenicayare ema máquenu. Tásiha, máichainapuca: “Tiuri, nítanesipa. Pítipavapa pinica”. ⁹ Váiparinehivare mahasulupayachaimahi ema mamusura eta máitauchirahi eta mavanahianahi.

¹⁰ Ene ecahehi éti, ecuti ema musu. Te ítauchapa tamutu eta evanahiana me Viya, ecahenapa: “Viti músuanahi vahi vicunachacarémahi. Tacarichuhi vicha eta vivanahianahi” ecahenapa —máichavacapa ema Jesús.

Ema Jesús macanaracahi ena diésqueneana lep-rosoana

¹¹ Tímiyanavavare tipaica ema Jesús, macaijuhepa eta Jerusalén. Máetavicavacapaipa eta avasareana te provincia Galilea étapa eta Samaria. ¹² Te máitecapauchapa eta apana avasarechicha, tiúchujicanapa ena diésqueneana ajairana ticajumana eta lepra.

Nacapayacapa éma. Váhisera náemeñahavahini éna, nayerehichucha. ¹³ Tacahe, napiaracapa ema Jesús:

—Tata Jesús Nazareno, pájapanuhavi. Picatajicahavi, picanaracahavi eta vijuma —náichapa.

¹⁴ Tacahe, ema Jesús máesenicavacapa. Tásiha, máichavacapa:

—Eyana, ímerezava te namirahu ena tupairucana apaesa náimamaracahe. Énainapa nametajirica eta iúriipa, enarasiraipahi eta ejumanainihi —máichavacapa.

Nasuapavanehi éna. Tásiha, eta nayanirahi, tinaracanaipa. ¹⁵ Tacahe, ema émana, eta máimairavahi eta manarasiraipahi, tichavapa te mávihahi ema Jesús.

Tipiaracapaipahi muraca eta macunachirahi ema Viya. ¹⁶ Matupirupa tépuyucahi te mamirahu ema Jesús.

Tétipaicapa macaitecapa eta mamira te apaquehe, mamaverarasiravahi eta mahsulupayachirahi ema Jesús. Ema maca achane, indigenahi samaritano.

¹⁷ Tacahe, ema Jesús máichapa:

—Ticutimahi diésnahi ena nuncanaruanahi. ¿Tájahapuca tacayemahi vahi nachavahini ena apamuriana nuévequeneana? ¹⁸ Macarichuhi tichava ema maca apavasaquenesamihi, macunachapaipa ema Viya.

¹⁹ Tacahe, ema Jesús máichapa ema achane:

—Pécheputa, piyana pichava. Pinaracaipasera táichavenehi eta picasiñairanuhi —macahepa.

Eta ecutiarareanaya eta máitesiraya ema Cristo

(Mt 24.23-28, 36-41)

²⁰ Tiuri, ena fariséoana nayaserecavare ema Jesús tájamuhuyarepuca eta máitecapiraya ema Cristo nacuchapaquenehi. Éma, majicapavacapa:

—Eta máitecapiraya ema ecuchapaquenehi, tájina metárapimahi eta máimeresiravaya éma. Vahi tácajerahini eta ímairaya. ²¹ Nájinavare timetajiricaimahi eta máitecapiraya taicha matiariripahi éma puiti ani. Nútiripa —máichavacapa.

²² Tacahe, máichavacapa ena máimitureana:

—Tatiarihiyare eta táchevayare ichapeyare eta ecaimairunuiraya. Tétavacavaya eta evarairaya íjahúchavayare ímahanu nuti Manerejirunuhi ema Viya eta nuchaviraya. ²³ Te navayuaracahepuca nacahenapuca: “Émaripa ema vímahaquenehi ánaqui”. Ena apamuriana nacahénavarepuca: “Émaripa ema maca vímahaquenehi puiti eta ani”. Váhisera ecusuapavaca éna.

Váhivare ecuehicavaca. ²⁴ Taicha te táitachavapa eta nítecapiraya núti, nucutiyare eta táijahúchirava títecapa eta térameca. Namutuyare ena achaneana te juca apaquehe tinecapuanayare. Tacaheyare eta nuchavirayare nuti Manerejirunuhi ema Viya.

Ticaecherayaresera, tájina vahi máchasimahi. ²⁵ Tativayaresera nucatajivanumayare ichape. Tépurunuanayare ena achaneana natiarihiqueneanahi puiti. ²⁶ Tacutiyare eta acane ena achaneana machamurrianaini ema Noé. Ena nani tinicairihianarinecha, náematanerinecha, térana, tímarerecanahi ena nachichanaveana. Vahi téñamavanaimahi eta náimairahi ema Noé eta masiapirahi tayehe eta ichape

pacure. Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare.

Vahi titsecavanaimahi tayehe eta nuchaviraya. ²⁸ Tacutiquene ene nacahehivare acane ena achaneana ena machamuriana ema Lot. Tinicairihianahivare éna, téraracavanahivare. Étanecha napanerechahi náijarareca eta náevavareruana. Ena apamuriana natanujiricarinecha eta nacamunuqueneanahi. Tépiyarerecanarichucha pétiana. Vahi naéñamavahini tayehe jácani ecuñaquiyu. ²⁹ Téhesera te majunijicapa ema víyarahaini Lot eta avasare Sodoma, tíjahúchavapa tiquivapa eta yucu ticasiriqui azufre tiásihahi te anuma. Tacapapajicavacapa. ³⁰ Ene tacaheyare eta nusacherayare nuti Manerejirunuhi ema Viya eta nuchaviraya.

³¹ Te jena sácheyare, nácani tachimararuanayare te aneca, vahi táuricaimahi nasiapahini te napena navehanumahini jácani náeñamaqueneanahi náimahaqueneana. Énaripa ena napairiruanahi te vámahi, váhivare tichavaequenehavanaimahi náepanahini eta náeñamaqueneanahi. ³² Écharichuhi eta acane eta suíchararacavahi esu mayenaini ema Lot. Ésu, tétavacavahi eta suéñamaequenehairahi eta suímahaqueneana sujuniruanahi. Táichavenehi eta suvarairahi tichava, ésujivapa ticamtiequenehava †.

³³ Nácani téñamanahi eta náitaresira, tahapapiricarinecha eta tájiparacana te juca apaquehe, éna témitiequenehanaya eta náitaresira. Énaserá nácani tahapapiriruanahi eta náehisiranuhi, tayanapanepuca táimicapavacava, éna títujicavanayare tíuchucuhayare eta náitaresiranaya.

³⁴ Numetacahevanecha: Te jena yátiyare, te apinanahipuca nácani natiarihiqueneanahi te tajuhe peti, émanayare ema níchuhaqueneayare, ema apana manasiyare. ³⁵ Tacutiquene, apinanahipuca ena esenana tiyuvarecanahipuca. Énerichuvare ésuna esu níchuhaqueneayare. Esu apana sunasiyare. ³⁶ Te apinanahipuca ena ajairana te vámahi, éneyareichuvare émana ema níchuhaqueneayare. Ema apana manasiyareva —máichapa ema Jesús.

³⁷ Eta nasamirahi ena máimitureana, nayaserecapa:

—Tata Viáquenu, ¿távihapuca táitachavayare eta juca pimetarapianahi? —nacahepa.

Majicapapa éma:

—Vahi ecueñamava eta távihapuca nítecapihayare. Núti nítecapauchahéya te jácani iávihahi éti †† —máichavacapa.

† Ema Viya mavanecahi ena apinana ángeleana, nametapana ema Lot eta máicuñasirayarehi eta avasare Sodoma. Ésusera esu mayena ema Lot, ticametacasihineni eta sujunairayare sucachanayarehi ema suima, sucatiequeneharichucha eta suímahaqueneanainihi. Étapa tivichahi sunasipa te achene, tépiyavapa icheve máripuhi. †† Te máechajiriruvahi ema Jesús, ani macahehi: “Te jácani mávihahi ema máepaquene, éta távihayare eta sipuquiana”. Eta juca mayehi proverbio, tatiarihi eta tacayemaquenehi tayumurevahi.

Ema Jesús máimicutichinavare ema juez ésupa esu tépenaima

18 Ema Jesús máimitucavacavare ena máimitureana vahi nacucainajiruva eta nayujarasirana. Tímiyanavanaya, tayanapane vuíchaha najacapanahini eta nayasearuanahi. ² Eta máimicutichinahi, áni-pa máichavacahi:

—Matiarahi ema achane. Juézhi tayehe eta avasare. Éma, tájina vahi mapicauchahini ema Viya. Nájinavare mapicauréna ena achaneana. ³ Sutiarihivare tayehe eta avasare esu ésuna esena suépenaimaquenehi. Suchavauruiricahi ema juez taicha eta sumetauchirahi ema sucatianaruhi. ⁴ Émasera ema juez vahi masuapahini eta sumetauresirahi ésu. Váhisera sucainajiruvahini. Tásiha, mapanerequenehapa macahepa: “Núti néchinava. Nájina nárataha napamicanuhini. Váhivare tipamicanuimahi ema Viya. ⁵ Ésusera esu suca esena, nuyacujipa eta suchavauruirisiranuhi. Nícharinepuca eta suvarahaquenehi, apaesa vaipa sucuápechava suíteca” macahepa ema juez.

⁶ Puiti, nuvaraha eacutiaraquenehaicha eta juca nímiturapihi mayehe ema juez mapicauruiraha eta macatiuchirahi esu suca esena táichavenehi eta suchavauruirisirahi éma. ⁷ Ene macahehi ema Viya. Vahi máyererejimahi eta macatiuchirahevaneya eti manerejiruanahi, esamacareyarehi taicha eta emacainajiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi ema Viya, németeacahi natiarihiyareichaha nuchimapaqueneanaya ena vahi ticainajiruvanahi eta nayujarasira, nacutihí esu suépenaimaquene eta sumacainajiruvairahi —máichavacapa ema Jesús.

Ema Jesús tímitucahavi vahi vicasiñavavaicaimahi, váhivare vépururahimahi

⁹ Ema Jesús apanavare eta máimicutichinahi eta máimituresirahi, nayehe ena tímijachavanahi tiúriana, tájina náichiravainahi; náepuruvachisera ena apamuriana achaneana. Tacahe, máichavacapa:

¹⁰ —Nímicutichinahe eta apana: Natiarihi ena apinana ajairana te Templo. Téneuchavanahi. Ema émana achane, fariséohi éma. Ema apana, tisipecaturarahi éma. ¹¹ Ema fariseo, eta macasiñavavaisirahi, témeñahavapa tayehe eta cuarto tacapicahuquenehi te Templo. Áni-pa macahehi eta mayujarasirahi: “Nuhasulupayachavi, Tata Dios, eta núrivahi te pimirahu. Vahi nácutihini ena apamuriana achaneana tíamerahianahi, tisipecaturanahi, esenamareanhivare. Váhivare nácutihini ema mácatataji te juca nuchacaya. ¹² Píti pímatinuhi eta apiheirahi áyunanu te semanana. Níjaracavivare eta plata nunganareruasa. Te nunganachhipuca eta dies peso, étanahi peso eta níjaracaviparaca. Téhesera cien pésohipuca eta nunganareruhi, dies pésohivare eta níjaracavi. Vahi

nuyavanahini eta námavahuásana eta piyehe” macahepa.

¹³ Émasera ema apana achane vahi máemeñahavahini. Tiyerehichucha eta máeneuchiravahi. Váhivare mapatsicavahini máesenicahini te anuma. Téhatupachavahisera eta máeneuchiravahi. Áni-pa macahehi: “Tata Dios, nucatisamureva ichape eta nucapecaturairahi piyehe. Pájapanunusera piperdonachanu eta nupecaturana” macahepa ena achane.

¹⁴ Tiuri, nutupiru numetacahe: Ema maca achane, eta machaviraipahi te mapena, tijacaparéinehi me Viya taicha yátupihí eta máeneuchiravahi. Émasera ema fariseo vahi majacapacarehini. Taicha nácani ticasíñavavaicanahi, tímijachavanahi ticunachacarehi, éna tépurucareanayarehi me Viya. Nácanisera ena tiyaseacanahi ema Viya eta májapanuiravacaina, yátupihí tijacapacareanayarehi mayehe —macahepa ema Jesús.

Ema Jesús mayujaraucha ena amuyana
(Mt 19.13-15; Mr 10.13-16)

¹⁵ Tacahe, ena achaneana námavacapaipahi ena amuyana eta mayehe ema Jesús, navarairahi máemamahacavacayarehi éma. Énaserá ena máimitureana vahi náisapahini, nacaichepaipa ena tíamanapahi ena amuyana. ¹⁶ Émasera ema Jesús máichuhavacaichucha ena amuyana. Tásiha, ena máimitureana máichavacapa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiharehi ena nani amuyana eta nasuapajiraiva éna. ¹⁷ Nutupiruva numetacahe: Nácani vahi nácutihí ena amuyana eta nasuapajiraiva, vahi nuchaneranimahi éna —macahepa ema Jesús.

Ema achane rico téchajiricava mayehe ema Jesús
(Mt 19.16-30; Mr 10.17-31)

¹⁸ Matiarahi ema achane. Náiyacararipahi ena achaneana. Témeñahavapa mayehe ema Jesús, mayaserecapa:

—Tata maestro, piti piúriquene. ¿Tájahapucaini eta nícharacavaini eta nítujuisravaina me Viya máichecuarquirénahini eta nítaresira? —máichapa.

¹⁹ Ema Jesús majicapapa:

—¿Tájaha tacayema pímiijarechanu “Piti piúriquene”? Mararihi ema Viya. Jéhevare éma, tétavicavahi eta máurivahi. ²⁰ Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Píti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaequeneruina. Pémunacaya ena ticachichavianahi” —máichapa.

²¹ Tacahe, ema achane majicapapa:

—Tamutu nusuapahi eta juca vanairipiana eta námaperuvahi, puíticha juca ajairanuirapa —macahepa.

²² Tásiha, ema Jesús máichavarepa:

—Jucarihichahasera eta pítauchaqueneyare. Píjararecaya tamutu eta pímahaqueneana. Tásiha, píjaracavacaya ena páureana. Jéhevare éta, pijacapayare eta pímahaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

²³ Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta marricovahi. Macatiequeneharinehi tamutu. Tiyanapa tipanererecapaipa. ²⁴ Eta máimairahi ema Jesús eta mapanereresirahi, máichavarepa:

—Yátupiquenehi máitujihí eta náijarasiravainahini eta náehisiranuinahini ena rícoana eta nasiapirainahini te anuma. ²⁵ Esamanuchaha. Eta juca tímicutijiricavahi eta vipera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

²⁶ Tacahe, ena tisamararacanahi, ánipa tacahehi eta nayaseresirahi:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

²⁷ Ema Jesús majicapavacapa:

—Nájina émanaina achane émajivaimahi ticuchucuhava. Macarichu ema Viya marataha ticuchucuhave —macahepa.

²⁸ Émaripa ema Pedro máichavarepa:

—Vítisera, Tata, vinaquicahi tamutu eta vicayehequeneana, vivarairahi véhicavihi.

²⁹ Ema Jesús majicapavarepa:

—Nutupiru numetacahe: Namutu nácani nanaquicahi eta napena, najunijicahivare ena ticachichana, ena naparapenaveana, nayanapupuca, nachichanaveanapupuca, táichaveneyarehi eta náehisiranuyare;

³⁰ jararihiyare eta táitsivayare te juca apaquehe eta náimahaqueneyare. Nararihiyarevare ena achaneana téchapajiricanayareva. Tásiha, tavetijinapa te náitecapapa te apana náitaresiraya, máichecuaraquirenapa eta náuricacarevaya —macahepa ema Jesús.

Ema Jesús tíapechavavare máechajisiha eta máepeni-rayare

(Mt 20.17-19; Mr 10.32-34)

³¹ Ema Jesús máiputsiamurihapa mámamurihapa ena dócequeneana máimitureana. Tásiha, máichavacapa:

—Ímaha puiti, viyanainapa vicaijuhénapaipa te Jerusalén. Ánaqui táitauchiavayare tamutu eta nájucunachaqueneanahi ena profetanaini eta níchararacavayarehi núti Manerejirunuhi ema Viya. ³² Ánaqui nucaijararecasiyare núti nayehe ena apavasaqueneana romanoana. Énainapa ticaecahijiricanuanayare, ticaetemajiricanuanaya, tiátutuquichanuanayareva. ³³ Téstacuanayareva. Tásiha, ticapacuanainapa. Tásihasera te mapanaquenénapa sache, néchepucainapa te nécari —máichavacapa.

³⁴ Énaserá ena máimitureana vahi nacaicutiarahini eta juca mametasiravacahi. Váhivare náimatiequene-

hahini tájahapuca eta máechajisihahi taicha vahi náemetecahini énemahinahíni náichahini ema Jesús.

Ema Jesús macaimairica ema achane púchuqui ticavasa te Jericó

(Mt 20.29-34; Mr 10.46-52)

³⁵ Tacahe, te tiánehipa títecapa ema Jesús tayehe eta avasare Jericó. Matiaríhi ema achane púchuqui, téjacahi te achenechacaya tasiaparacuhi eta avasare.

Tiyaseserecachi eta limosna. ³⁶ Te masamavacapa ena camuriqueneana achaneana tiánucuhanapaipa, macayasesererupa ema púchuqui tájahahipuca eta téchacarehi. ³⁷ Nametacapasera eta émairahi tiánucuhayarehi ema Jesús Nazareno. ³⁸ Tacahe, tipiaracapa ema achane púchuqui:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunu! —macahepa.

³⁹ Ena achaneana tínapumiráuchanapahi ema Jesús navarahapa nacamatinaçayarehini. Émasera tipiararecaichucha:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunuini! —macahepa.

⁴⁰ Tacahe, ema Jesús te macanarapa, tíchecanumapa. Macavanairipipa náepana ema púchuqui. Te nacaitecapa, mayaserecapa:

⁴¹ —¿Tájaha picamunu nuyehe?

Ema púchuqui majicapavarepa:

—Tátachicha, nuvaraha picaimairicanupaini —macahepa.

⁴² Ema Jesús máichapa:

—Tiuri, nuchicha. Táichavenehi eta picasiñairanuhi, pinaracapa puiti —máichapa.

⁴³ Jéhesareinehi, tíjahúchavapa timairirica ema púchuqui. Tásiha, tiyanapa máehica ema Jesús tíurisamurepaipa. Macunachapaipavare ema Viya. Énapa ena achaneana tímararacanahi eta manarasirahi, ichaperinehi eta nacunachirahi ema Viya.

Ema Zaqueo mavarahahi máimati ema Jesús

19 Tacahe, eta máitecapiraipa ema Jesús te tajuhe eta avasare Jericó, matiaríhi ema achane rico, ticaicare Zaqueo. Nacapitarahi ena cóbrarecarahiana eta impuesto. ³ Te masamairiricapa eta émairahi ema Jesús títecapapahi, mavarahapa máimatiyarehi. Étasera eta máichipichuvahi éma, vahi máratahahini máimahahini ema Jesús te namuri ena camuriqueneana achaneana. ⁴ Tásiha, tijunapapa eta te mayanihayarepahi ema Jesús. Tiápanapa te yucuqui, máimamaracasaréipahi ema mavarahaquenehi máimati. ⁵ Tacahe, te macapecupa ema Jesús eta yucuqui mávihahi ema Zaqueo, máesenicapa ema Jesús te anuquehe. Tásiha, máichapa:

—Zaqueo. Yare, piúcupaica, taicha puiti nuvarahahi nunasinumayare te pipena —máichapa.

⁶ Tacahe, ema Zaqueo titátájipa tiúcupaicapa. Tiúrisamuréinehi eta majacapirahi ema Jesús. ⁷ Eta ná-

mairahi ena achaneana eta juca, téchajicanapa mayehe ema Jesús. Náichapa:

—Émamesapa máitecapauchayarehi ema maca ticapecaturahitátáji —nacahepa.

⁸ Te téjacanapa te tajuhe, témeñahavapa ema Zaqueo te mamirahu ema Jesús. Tásiha, macahepa:

—Pímaha, Tata Náquenu. Núti néneuchavapa me Viya. Puiti níjaracayare ena páureana ticitimuriacaca eta nímahaqueneana. Nímichavayareva te natiarihipuca ena nucaetemaqueneanahi, cuátrohénasera eta táitsivayare eta nímichavaqueneña —máichapa.

⁹ Tásiha, ema Jesús majicapapa:

—Nímahapa puiti eta yátupirahi eta péneuchiravahi eta pipecaturana, taicha pivarahahi píimichavayare eta plata picaetemareruanahi. Tásiha puiti, pijacapacarepa me Viya. Vaipa pémitiequenémahi. Taicha píti picutipa ema viáchucaini Abraham eta macasiñavairahi mayehe ema Viya. Píti nuchaneravipa, picutipa ena apamuriana nucurujiruanahi. Taicha éta tímitecanuhi nuti Manerejirunuhi ema Viya —macahepa ema Jesús.

Ema Jesús máimicutichinava ema príncipe eta máijarasirahi ena machanerana eta maplatane, apaesa nacajurucayarehi

¹¹ Tacahe, ena achaneana, eta náimairahi eta mánehiraripa eta Jerusalén, náimijachaipahi étapa tímiyanayare éma, eta máimeresiravayare eta marreyvayarehi. Tacahe, ema Jesús máimatiacaripa eta napanereruanahi. Tásiha, máimitucavacapa eta apamuri máimicutichinapa apaesa nácaicutiara eta tayerevaichaha eta marreyvayarehi. ¹² Máichavacapa:

—Matiarihahi ema achane. Ichape eta mapicacarevahi. Tiyanyarehi te apana avasare tayerehiquene. Eta tímiyanayarehi ánaqui máepanihayarehi eta mávacureyarehi eta marreyvayarehi tayehe eta mávasa. Eta machavirayarepa, téjacayarepa éma. ¹³ Te tiyanayarépa éma, máichuhanumapa ena diésqueneana machanerana. Máijaracavacapa étapevaca eta maplatane tasivachaquenehi. Tásiha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”. ¹⁴ Tacahe, tiyanapa ema rey-yarehi tayehe eta macaijuheyarehi. Te máequene-pasera, tisemamurianapa ena majaneanana. Ánipa nacahe: “Vahi vávaraha émaina viyehéna rey ema maca” nacahepa. Náimivanerecapa eta comisión, nayasesererecayare vahi nacuijaraca eta mávacuréna.

¹⁵ Ticamesavauchuchasera majacapaichucha eta mávacurehi. Te tichavapa te mávasa, téjacapa émapa reyhahi. Tásiha, máichuhavacapa ena machanerana máijararuanahi eta maplatane. Mayaserecapa te tímecavaipahipuca eta tachichanahi. ¹⁶ Tiyana ema émana tímerecavapa. Máichapa: “Tata náquenu, eta piplatane píjararunuhi tímecavaipa eta tachichanahi. Diésripa eta tajurusirahi”. ¹⁷ Ema rey majicapapa: “Tiuri, nuchicha. Tájina táichava. Tétavicava eta piúri. Puiti vahi támapurujimahi eta piúrivahi tayehe eta juca ánichichaquenehi níjararuvahi. Puiti níjaracaviyare pituparahaya nujupahaviya. Píti táquenuya eta

diésquene avasareana”. ¹⁸ Tímerecavavarepa ema apana mamusura. Máichapa: “Tata náquenu, eta píjararunuhi piplatane, tímecavaipahi cinco eta tajurusirahi”. ¹⁹ Majicapavarepa: “Tiuri, nuchicha. Tájina táichava. Tétavicava eta piúri. Puiti nunacaviyare aquenucaviya tayehe eta cincoqueneana avasareana”.

²⁰ Tímerecavavare ema apana mamusura. Máichapa: “Tata náquenu, júcahi eta piplatane. Vahi nucajurucahini. Núnacaichucha, nítipuichahi te pañuelo.

²¹ Taicha nupicahi nácaetehahini, machu pícuñacanu. Pétáviuchahi píti eta pivainarajiva, taicha píti pivehahi eta nématanevachayaréni”. ²² Tacahe, ema rey máichapa ema machanera: “Eta juca péchajiriruvahi, éta tímicaecherachavihi eta pépiyahiraivahi. Piplujuvahi eta tichavihi. ²³ Te pímatinuhipuca eta nuvainarajivahi, eta nuvehairaya eta pématanevacha, étapa eta nícuñasiraviyare te picamitiacapuca, váhiyapa pinacapaihi te banco eta nuplatane. Étainahini tajurusihahini apaesainahini nímaequenéahini puiti”. ²⁴ Tásiha, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”. ²⁵ Éna nacahevarepa: “Tata viáquenu, tímecavaipahinéni diéspepahi eta tajurusirahi”. ²⁶ Ema rey majicapavarepa: “Tiuri numetacaheya: Nácani ticajurucanahi camuri, nujanechinayare eta apana. Nácanisera tájinaquenehi nacajururénahini, nuverejicayare eta náijaracasinihi. ²⁷ Énasera ena ticatianacuanahi éna vahi najacapanuhini eta nurreyvahi, iáminanuyare ani te numirahu. Ecapapajicavaca éna”.

²⁸ Tacahe, te tamutupa eta juca máimituresirahi, ema Jesús tímiyanavavarepa tipaica. Macaijuhepa eta te Jerusalén. Tínapucapa ena máimitureana.

Títecapapa ema Jesús eta te Jerusalén

(Mt 21.1-11; Mr 11.1-11; Jn 12.12-19)

²⁹ Te apanapa semana, tiyanavarepa. Te tiánehipa eta avasarechichana Betfagé étapa eta Betania, tacanaraipahivare eta masihi ticaijare Olivoquiji, tichecanumanapa. Mavanecapa ema Jesús ena apinana máimitureana. ³⁰ Máichavacapa:

—Eyanayare eta te jena avasarechicha Betfagé. Te ítecapayarepa, ímahayare eta burrico ticaitihahi. Eta jena sárare mávuéquehéchaha, nájinaichaha ticaperainahi. Evejapuacayare, iáminanuyare eta ani. ³¹ Te natiarihinapuca náeñama, emetacayare eta nucamunuirahi núti —máichapa.

³² Tacahe, tiyanapa ena vanairucanahi. Jéhesaréinehi étapaichuhi eta mametarapihi éma. ³³ Te navejapuacaripa eta burrico, ena ticayeheana nayaserecapa:

—¿Táviha iámihayare eta viyehe burrico?

³⁴ Éna najicapapa:

—Ema maena Viáquenu macamunuhi —nacahepa.

³⁵ Tacahe, náisapapa eta námiraya eta burrico. Te náitecapauchapa ema Jesús, náepacamaequechapa eta náepacuhana. Tásiha, ticaperapa ema Jesús. ³⁶ Te náimahapa ena achaneana tíuchujicapaipahi ema Jesús, náimativanepa. Tiyananapa nácapahi éma.

Tépacapairicanapaipa te mamirahu eta náepacuhana te mayanihayarepahi. ³⁷ Eta napaisirahi, témiricanapaipa te tachausi eta cerro ticaijare Olivoquiji. Namutu ena máimitureana téhicanahi ema Jesús tipiarcapairicanapaipa eta náurisamurevahi taicha eta náimahueneanahi tiáramicareana máichaqueneanahi éma. Ichape eta nacunachirahi ema Viya. ³⁸ Ánipa nacahehi eta napiarasirapahi:

—Yare, Tata, ¡Piti réyquene, vanairucaquenévihí me Viya! ¡Asulupaya! ¡Puiti, te anuma vicuticacahi eta viúrisamurevahi víti te eta juca apaquehe! Tétávícava eta vicunachira ema Viya eta macatajisirahavihi —nacahepa.

³⁹ Tacahe, eta nasamirapahi ena fariséoana natiarihi-queneanahi eta napiarasirapahi ena achaneana, náechajicapa ema Jesús:

—Tata maestro, picamatinacavacaichu ena nani pímitureana —náichapa.

⁴⁰ Ema Jesús majicapavacapa:

—Tiuri, numetacahe puiti. Te namatinapuca ena nani, táitsivasera étainapa tipiaracaya eta máriana —macahepa.

⁴¹ Tacahe, títecapanapa te tápusi eta cerro Olivoquiji. Ticaeherapa eta Jerusalén. Eta máimairahi ema Jesús eta avasare, tíyahapa táicha. ⁴² Macahepa eta máiyairahi:

—Páurevisami piti návasasami Jerusalén. Te nácaicutiaraini apaesachichainaini ena pichichanaveanahi eta nuvarairahi nucuchucuhavaca núti. Puiti juca sache nutiarahiraripa ani piyehe, náurihainehi nácamapuravahini eta náuricacarevahini. ⁴³ Taicha járajapayare eta sáchezare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahi picatiuchiavaimahi. ⁴⁴ Témetapaicavianainapa te apaquehe. Nacapapajicavacainapa ena pichichanaveana. Tájina nacaemachaquenémahi eta peti. Tamutuyare náquipapaica. Eta pivirevaya, eta juca pimajacapiranuhi eta néjirairavihi nuti mavanerunuhi ema Viya —macahepa.

Ema Jesús macuchuchujicavaca ena tíjararecanahi eta sárareana, cáyureana te tajuhe eta Templo

(Mt 21.12-17; Mr 11.15-19; Jn 2.13-22)

⁴⁵ Tacahe, te apanapa sache, tiyanapa ema Jesús. Tisiapahi te Templo. Máimaharinehi ena achaneana tíjararecanahi eta sárareana, cáyureana. Tásiha, tise mapa. Eta macuchuchujisiravacahi, máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatajiti! —máichavacapa.

⁴⁷ Eta manasiquenerahi ema Jesús, tamutuhi sácheana tímitureca tayehe eta Templo. Énasera ena tuparairucana énapa ena escribánoana, napanerechahipahi eta navarairahi nacapaca ema Jesús. ⁴⁸ Váhis-

era napatsicavahini taicha natiarihi ena camuri-queneana achaneana tisamararacanahi eta máimiturapiana éma. Váhivare náisapaimahi náichahini ena ticatianacanahi.

Nayasereca ema Jesús te vanairucahipuca me Viya

(Mt 21.23-27; Mr 11.27-33)

20 Étana sache tímiturecaichaha ema Jesús tayehe eta Templo eta máechajiriruva ema Viya. Títecaparacanapa ena tuparairucana, énapa ena aquenucarahana, énapa ena escribánoana. ² Nayasereca ema Jesús:

—Píti, vahi vitupararuvinahini víti eta píchirahi eta júcana. ¿Nájahasica tivanecavihi? ¿Nájaha tituparacavihi picha eta juca píchaqueneana? —náichapa.

³ Ema Jesús majicapavacapa:

—Núti apanavare nuvaraha nuyaserecahe. Ejicapanyuresera. ⁴ ¿Nájahapuca tivanecahi ema Juan eta máitesirahi eta máicachasirisirahi? ¿Émapuca ema Viya tivanecahi, émajivahipuca eta máitesirahi? —máichavacapa.

⁵ Váhisera náituruequenehahini eta najicapirayarehi. Tiácapaemajiricacanapa. Ánipa nacahe eta náechajirivanahi:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” ⁶ Téhesera vácahepuca: “Émajivaichucha eta máitesirahi”, ticauyayacareipa nacapacahavi ena achaneana te máriahiana, taicha náechahi éna émairahi ema Viya tivanecahi ema Juan —náechajiricacapa.

⁷ Tacahe, ánipa nacahehi eta najicapirahi ema Jesús:

—Vahi vecha víti —nacahepa.

⁸ Ema Jesús máichavarepa:

—Énerichuvare núti, vahi numetacahémahi nájahapuca ema tituparacanuhi —máichapa.

Ema Jesús máimicutichina ena pártirárioana máurirahana

(Mt 21.33-44; Mr 12.1-11)

⁹ Tacahe, ema Jesús tépanavavarepa máimitucavaca ena achaneana. Ánipa tacahehi eta máimiturapiana:

—Nuvaraha nímicutichinaheya, tatiarihi eta isaniti amairiha úvaquiji, masucurehi ema émana achane. Tiyanayarehisera ema ticayehe, tipairiricayarehi te apana avasare. Tacahe, matuparacavacapa ena tírehanayarehi te áñoana eta mayehe uva. Partidoyarepa eta majunijisirayarehi. ¹⁰ Tacahe, te títecapapa eta caje tayairahi eta uva, máimivanerereca ema mamusura mayaseapanavacayarehi ena pártirárioanahi eta tatucachaquenyarehi éma. Énasera ena pártirárioanahi, tájina náijarachahini. Tisemauchavarichucha, náehapa ema vanairucainihi. ¹¹ Tásiha, ema ticayehe máevatacavarepa ema apanavare mamusura, mayaseapanavacayarehi éna. Énerichuvaresera náumehavarepa ema vanairucainihi, náehavarepa. Tájina náijarachahini. ¹² Tásiha, ema ticayehe vahi

macainajiruvahini. Máevatacavarepa ema apanavare mamusura. Énerichuvare náehavarepa ema vanairucainihi. Najarachapa, náquijicapa.

¹³ Tacahe, ema ticayehe tipanererecaripa: “¿Tájahasi-ca nícharacavayare?” macahepa. “Nuvanecapuca mayana émajacaruvaina ema nuchicha némunaruquenehi. Tatiarihi te émainapapuca napicaucha te náimahapa”. ¹⁴ Tacahe, te náimahapa ema machicha, navetijichucha eta nasemirahi. Tímitujiricacanaripa. Ánipa nacahe: “Émainapapuca ticayeheyare ema maca. Yare, vicapaca, apaesa tánasipa tamutu vítinapa vicayehe”. ¹⁵ Tacahe, nacaratapaca éma, nacuchucapa eta tayehe eta isaniti, nacapacapa.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayehhini paciencia. ¹⁶ Títecavanénapa macapapanavacayarepa ena pártirárioanahi máurirahanahi. Tásiha, máijaracainavarepa eta úvaquiji ena apamuriana pártirárioanayareva —macahepa ema Jesús.

Tacahe, ena tisamararacanahi, ánipa nacahehi: —Viti vicatajicacare, vahi vácutihini ena nani máurirahana —nacahepa.

¹⁷ Ema Jesús máesenimurihavacapa. Tásiha, máichavacapa:

—Jéhepuca, németeacaserá vuíchaha ácaicutiarahini eta tacayemaquenehi eta Sagrada Escritura. Éta, áni tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapapa eta táicuchihi eta tatuparahahi. Tacapicahuquenehi puiti” tacahehi eta Sagrada Escritura. ¹⁸ Puiti, núti nucutihi eta ichape mari náepuruquenehi. Eti epurunuanahi, íaquipaicavayare évetutujicayare. Tichimaracaheyare eta muraca ecuñaraqui taicha eta emavarahairahi éhicanu —máichavacapa.

¹⁹ Ena tuparairucana navarahapa náijahúchayarehini nacaratata ema Jesús, taicha tímaticavanapa éna eta éna irahi tayunacavaca eta máechajiriruvana ema Jesús. Váhisera napatsicavahini taicha návamirahuhi ena camuriqueneana achaneana.

Navarahahi náemejecapavacha ema Jesús tayehe eta impuesto

(Mt 21.45-46; 22.15-22; Mr 12.12-17)

²⁰ Tacahe, náimivanerecapa ena apamuriana ajairana tépiyacavanayarepahi tíuriana te mamirahu, navarairahi natanucayare eta tímicaviuchayarehi. Énayarepa timetauchanavarehi mayehe ema aquenucahi prefecto Poncio Pilato. ²¹ Tacahe, nayaserecapa éma, ánipa nacahe:

—Tata maestro, vímatihí eta tatupiruvairahi tiuri eta juca pímiturapianahi. Nájinavare pinerejiruinahini ena achaneana, taicha pivarahahi náehicahini namutu eta táurinaquene achene ticaijuhe me Viya. ²² Vivarahahisera viyaserecaviyare: ¿Táuricahipuca vivachacha eta viyasehana impuesto mayehe ema Presidente Emper-

ador romano? Taicha víti, machanerahavihi ema Viya, ¿masi? —náichapa.

²³ Ema Jesús máimaticavacapa eta taurivapahi eta napanereruana. Tacahe, máichavacapa:

—¿Tájaha tacayema evaraha ímiaquipaicanu?

²⁴ Nímahaseji, íáminanu étapena eta reale.

Éna náijaracapa. Tásiha, ema máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador.

²⁵ Tacahe, éma máichavacapa:

—Tiuri. Táuricahi íjaraca ema Presidente Emperador eta juca mayehericuhi éma. Tásiha, íjaracavare ema Viya eta mayehericuhivare éma —máichavacapa.

²⁶ Váhiquenesera náratahahini náimíaquipaicahini eta nayaseresirahi te namirahu ena achaneana. Táitsivahi ichape eta náramirahi eta táurivahi eta majicapiravacahi. Timatinanapa tésamiricavanapa.

Nayasereca ema Jesús náicharacavayarepuca ena náepenaqueneana eta náechepusirayare

(Mt 22.23-33; Mr 12.18-27)

²⁷ Nacahepaipavare ena apamuriana achaneana. Sadicéoaana. Ena nani saducéoaana, apana eta náimiturapiana; váhi nasuapa eta náechepusirayare ena náepenaqueneana. Éna natanucahi eta táetseraruvayahi. Tacahe, nayaserecapa ema Jesús:

²⁸ —Tata maestro, ema víyarahaini Moisés manaquicahi eta ajureca máechajiriruvahi eta viyehe: “Te máepenaquenehahipuca ema achane esu mayena, tásiha, nájinahipuca manaquiqueeneruvainahini machichainahini; te matiarihihipuca mácani maparapehi, mavehayare esu machinenaquene, apaesa émainapuca macachicha eta suyehe, máitsivainahi ema maparapeni”. ²⁹ Tacutiquene te natiarihipuca ena siétequeneana ticaparapejiricacana, te títauchavapa ema náechavimuri, máepenaquenehapasera esu mayena. Nájinahi machichainahini. ³⁰ Tacahe, ema maparape máitauchavare esu machinena. Énerichuvaresera máepenaquenehavare, nájinavare machichainahini. ³¹ Ema émana maparape máitauchavare ésu. Énerichuvare máepenaquenehavare. Namutu ena siétequeneana navehahi ésu, tásihase náepenaquenehapahi, nájina émanainahini mácachichahini eta suyehe. ³² Te táequenepa, tépenapa esu esenaini.

³³ Tacahe puiti, te jéhesarepuca tichavanayare títarecana te táequenénapa eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi —náichapa.

³⁴ Tacahe, ema Jesús majicapavacapa:

—Ena ajairana te juca apaquehe natuparacasi-vaichuhi títauchavanayare suyehe esu esena.

³⁵ Ánaquisera te apana náítaresira, nácani ticatuparahanyare eta nasiapirayare te anuma te náechepucapa, vaipa nácamunuimahi esu esena. Énaripa ena ese-

nana, vaipa nácamunuimahi ema ajaira. ³⁶ Taicha vaipa tiápechavaimahi tépenana. Nacutinapa ena ángeleana eta namaepenacacairahi. Yátupinapa machichanavea-nainapa ema Viya, taicha éma ticaecheputacavacahi.

³⁷ Émaripa ema víyahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaqueneana. Te máimahapa ema Moisés eta yucuqui timurujihí, eta macametacasiyahí mayehe ema Viya eta émarichuhi ema macasiñaqueñehi ema Abraham, ema Isaac, émapa ema Jacobo. ³⁸ Taicha ema Viya, ema téchahi eta náitare-sirana ena téhicanahi, tayanapane tépenanaripa. Namutu ena, tímiyanavarichucha títareca eta náchanevana te mamiarahi éma —macahepa ema Jesús.

³⁹ Tacahe, ena escribánoana, ena natiarihique-neanahi náichapa ema Jesús:

—Tétupicava eta juca péchajiriruva, tata maestro —nacahepa.

⁴⁰ Váipasera nacaemuñavahini nápechavahini nayasereca.

Éma Cristo, yátupiquenehi Viya. Mámariéquenenihi-era ema rey David

(Mt 22.41-46; Mr 12.35-37)

⁴¹ Éma Jesús máichavacavarepa:

—Éti ecahehi eta échajiriruvahi: “Tiúchucayare ema Cristo, mámariequenehare ema víyahaini rey David” ecahehi. ⁴² Yátupihí ema Cristo achanequenehi eta máimahi taicha mámariequenehi ema víyahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: ⁴³ “Éma Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. ⁴⁴ Éma David, eta máimijarechirahi ema Cristo: “Tata Náquenu”, ¿tájahapuca eta macayemaquenehi? Nutupiruva numetacahe: ema Cristo yátupiquenehi Viya éma. ¿Tájaha íchahi éti? —máichavacapa.

Éma Jesús máimereuchavaca eta náejecapiravana ena escribánoana

(Mt 23.1-36; Mr 12.38-40; Lc 11.37-54)

⁴⁵ Namutu ena achaneana nasamararacahi ema Jesús eta máechajisiravacahi ena máimitureana. ⁴⁶ Áni-pa macahehi eta nayehe:

—Échapavayare éti, machu éhica eta nayeherepiana ena escribánoana. Navarahavare ticapichuanayarehi eta náechajisiraya ena achaneana te jácani nácapajisihapahi éna. Tacutiquene tinerejiurucavana eta táurinaqueneana téjasihacareana te tianana te viúruijisirarevana. Étaripa te nanisirana, ticaejacavanavare te jácani távihahi eta tiúrinisipana tinicacare. ⁴⁷ Tacutiquene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósoanahi, tiúpiemana eta nayujarasira, namavarairahi tácaecherahini eta náichira eta

tamauriqueneana. Énasera tiápajucavanahi eta nacaicuñairaya muraca.

Éta sunaquiruva esu máimaru tacachuricahi eta nanaquiruvana ena rícoana

(Mr 12.41-44)

21 Éma Jesús máimarraracahi ena rícoana eta nanaquisirava eta plata tayehe eta chapama nanaquisirareva eta námavahuana mayehe ema Viya. ² Énerichuvare máimahavare tinaquicava esu ésuna esena suépenaimaquene. Páurequenehi ésu. Sunaquicahisera eta apipechichahi eta suplatane. ³ Tacahe, ema Jesús macahepa:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepanávahi eta sunaquiruva, sucachuricavacahi namutu ena apamuriana achaneana. ⁴ Taicha namutu éna tacarichu nanaquicahi eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunicavachayarehini —macahepa.

Éma Jesús máimereucharipa eta táquipaisiravaya eta Templo

(Mt 24.1-2; Mr 13.1-2)

⁵ Natiarihihi ena téchajisihanahi eta Templo. Náechajisihavare eta táurinaqueneana tayereruvana nanaquiruanahi ena achaneana, etapa eta táurinavavacahi eta máriana tayeheanahi. Ichapemurihi eta táerjavahi te nacaematánepa. Tacahe, ema Jesús máichavacapa:

⁶ —Járajapayare eta sáchevayare ticaquipaicasinapa tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneana puiti —macahepa.

Tatiarihiyare eta ecutiarareanaya te tánehipaicha eta táichecuraya

(Mt 24.3-8; Mr 13.3-8)

⁷ Tacahe, nayaserecapa ema Jesús. Náichapa: —Tata Maestro, ¿tájamuhuyarehipuca eta náimiaquipaisirayare eta Témplosami? ¿Jararihiyarepuca eta ecutiarareyare eta apana péchajisihaqueneana? —náichapa.

⁸ Éma Jesús máichavacapa: —Écuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayarepahi nuyehe. “Nútiripa Cristo” nacahénapa. Éna apamuriana nacahénapa: “Táitecapaquenepe puiti eta sache”. Váhisera ecusuapavaca, váhivare ecuehicavaca. ⁹ Étaripa te esamairicapuca eta guerra, revoluciónpuca, váhivare ecuarameca. Taicha eta táinapuarauquianayarehi eta júcana ecutiareanayare, vuíchahasera étaimahi eta táichecuraya.

¹⁰ Ánivare macahe: —Téhacacayareva eta ichapequeneana avasareana. Ticanarajiricacanainapa eta apamuriana. ¹¹ Tatiarihiyareva eta ichapeyare tayamurisirana eta apaquehe.

Te avasareana tatiarihiyare eta ecuhamuhuyareva, jumaremuhuyareva. Te anuma tímerecavainavarepa eta ichape ecutiarareya, tiámayare eta ecuñaraqiyare.

Ena achaneana napanajiricainapa ena téhicanahi ema Viáquenu

(Mt 24.9-28; Mr 13.9-23)

¹² Tativanumayaresera tipanajiricaheanayare éti, táichavenénahi eta éhisiranuhi núti. Ticaratacaheanayare, tiámaheanayare te náurujsirarevana, ecayase-rehinapa nayehe ena juéseana. Ecaevatainapa te cárcel. Tásiha, etiarhiyare eti tiámaheanaya te namirahu ena aquenucana, téhevare te namirahu ena Presidenteana gobiernonahi, ecaviurevayare táichavenehi eta éhisiranuhi. ¹³ Étumechavasera. Te námahepa te ecayaserehiyaya, ecamapuravainapa échajisianuyare. Váhi ecueñamava eta ecayemayare ecatiuchiravaya.

¹⁵ Nímahahéinepa núti, níjaracaheyare eta ítusirayare ecatiuchava. Nájina ácutimahi eta ítupajijiasiravaya. Ichape eachuriacayare ena iánaranaya. ¹⁶ Etiarhiyare éti énajacaruvinapa ena ticachichaheana tíjararecaheanaya énaripa nácani eparapeanapuca, énajacaru-vayareva tíjararecaheana, énayarepaichupuca ena ejaneanana, ítunacasareana. Enerejicavainapa eti nacaparuanaya. ¹⁷ Namutu ena acha neana ticatiana-caheanayare táichavenénahi eta éhisiranuhi.

¹⁸ Tayanapanesera nacapacahepuca, nímahahéine-pasera núti. Vahi émitiequenémahi. Étaripa eta echuti-macana, tájinavare témitiequenémahi. ¹⁹ Téhesera ecamichahi tamutu, ímiyanavahi eta éhisiranuhi, núti níjaracaheyare eta itaresiraya.

²⁰ Te ímahapa ena suntaruana nachayacapa eta Jerusalén, étanaqueneyarehi ejercito eta náichapemurivaya, étainapa ícutiaraya eta táitavirayare eta avasare. ²¹ Tásiha, te ímahapa eta juca, táuricapa étátájinapa ejuna, eti etiarhihiqueneanahi te Judea. Ecaijuheyare eta te céroana, étaina eyumurusivaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa távarahahini nachavahini tayehe eta avasare. ²² Taicha táitecapauchainapa eta tasacherayarehi eta tacaicuñairaya, títauchavainapa eta tametarapi eta Sagrada Escritura. ²³ ¡Páureanasami nácani esenana tachimararuanayare, nácani ticajarianahipuca, nácani esenana ticachichanahi eta amuya tiájicachaha! Támairijicainapa eta nacatajivairayare namutu ena achaneana tiávihanahi te Jerusalén taicha eta náicuñayare. ²⁴ Natiarihi ena tépenanaya te guerra, ena apamuriana nacaratatajicainapa prisionéorainapa. Námvacainapa te apanaqueneana avasareana. Ema Viya máisapainapa tisiapanaya te Jerusalén ena apavasaqueneana. Énapa téchanayare eta Jerusalén. Tiámainucava te máicutichapa ema Viya, macuchucavainavarepa.

Eta máitesiraya ema Manerejiruhi ema Viya

(Mt 24.29-35, 42-44; Mr 13.24-37)

²⁵ Tacahe, tímerecavanainapa eta ecutiarareyare te sache, te caje, etapa te jarairiquiana. Tipicanainapa ena achaneana te juca apaquehe. Tiáramecanainavarepa taicha eta nasamirayare eta muracaquene táepacuruha eta ichapequene une. ²⁶ Ena achaneana tiáquipaicavanainapa eta napisiraya, taicha eta náimairayare eta ecutiarareanayare, váhisera náimatiequenehaimahi tájahapuca eta náicharacavayarehi. Énerichuvare tiyjecavavacainapa eta tiávihanahi te anuquehe anuma. ²⁷ Nupaenumava nítecainapa nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Níñehinapaipa eta táetaviuchirayare eta nujaravayarepahi. ²⁸ Te ímahapa tanacuchavapa eta juca ecutiarareanayare, evapinavainapa éti taicha tiánehiripa eta nítecapiraya nucatiuchiráheyare.

²⁹ Máimicutirachinavare eta máimituresirahi. Ánipa macahe:

—Ecauneyare eta jácani yucuqui. ³⁰ Te ímahapa títsivachavavacapa eta tapacajiana, tiánehiripa eta únemuhuyareipa. ³¹ Ene tacahehi, te ímahayarepa, ímatiacainapa eta tánehiriripa eta nítesirayare.

³² Numetacahevanecha: Vuíchaha títavanimahi ena achaneana náitareruaichaha te táitecapapa eta juca ecutiarareanaya. ³³ Títavayarepa eta anuma etapa eta apaquehe. Tativayaresera títauchava tamutu eta numetaruhehi.

³⁴ Échapavaicha, machu tachimaracahe eta jena sache, vahi ecucuti ena tavayuaruana eta téracare, machu muracachutihéna táicha. Vahi ecueñamava eta itaresira, machu tahapapicahe eta éhisiranuhi. ³⁵ Eta táitecapauchirayare eta sache nuhavirayare tímicutijiricavahi eta táijahúchirava eta táeratasirava eta tram-pa. Ene nacaheyare ena achaneana te tamutu avasareana eta namanecapauchiravaya. ³⁶ Eta tacahe, etsecavaicha yátupina. Eyujaravahahi támutu sácheana, apaesa túmehénapa eta ecamichiraina tamutu eta juca táicharacavayare, apaesa tacuija ecuichiravaina eta ítecapauchiranuya te numirahu nuti Manerejirunuhi ema Viya —macahepa ema Jesús.

³⁷ Tiuri, tamutu sácheana tiyana eta te Templo ema Jesús. Tímiturecachi. Te yátivare tiyanavare te avasarechicha Betania te táequenehi eta cerro Olivoquiji.

³⁸ Ena achaneana, tamutu yáticarrahiana, tiyanana te Templo, titsecavanaripa eta nasamararasirayare éma.

Napanerechapa eta nacaratasiraya ema Jesús

(Mt 26.1-5, 14-16; Mr 14.1-2, 10-11; Jn 11.45-53)

22 Tamirahupaipaicha eta piesta ticajare Pascua, eta náepanavaira eta semana eta nanisirahi étachucha pan mayehere levadura. ² Tacahe, ena tuparairucana énapa ena escribánoana, navarahaichaha náimicapaca ema Jesús. Tásiha, natanucahi eta náicharacayare eta nacaratasirayare. Návmirahu-hisera ena achaneana.

³ Tacahe, ema Satanás mávahácapa ema émana máimiture ticaijare Júlasí. Émarichuhi nachamurihi ena dócequeneana apóstoleana. ⁴ Tacahe, ema maca Júlasí tiyanapa matanupanavacahi ena tuparairucana, énapa ena nacápitárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijarasesirayarehi ema Jesús eta nayehe. ⁵ Tiúrisamureanarinehi eta mametasiravacahi éma. Nametacapa eta náijarasirayarehi eta plata. ⁶ Tacahe, éma majacapavacapa eta naplatane. Tásiha, máichavacapa:

—Tiuri, núti népanaheyare te nímahapa nacuijapa ena achaneana te machacaya. Námahénapa tayehe eta mávihahi éma —máichavacapa.

Emá Jesús mavanecahi ena apinana máimitureana, natsecayare eta naniruyare tayehe eta Pascua

(Mt 26.17-25; Mr 14.12-21; Jn 13.21-30)

⁷ Títecapapa eta sache táepaniravahi eta semana tapiestara eta nanisiraya eta pan mayehere levadura. Étarichuvere eta jena sache ticaijare Pascua, nacapsiraya eta uvesa ticaijare cordero pascual, nanisirayare te jena yati. ⁸ Emá Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

⁹ Éna nayaserecapa:

—¿Táviha pivaraha vétupirisihaya?

¹⁰ Emá Jesús majicapavarepa:

—Eyanayare tayehe eta avasare. Te ítecapayarepa tayehe, ícapajicayare ema émana achane tiámapahi eta une te yupí. Éhicayare éma te peti masiapihayare. Éti apana esiapayareva. ¹¹ Emetacayare ema ticayehe eta peti. Ani íchayare: “Emá viyehé Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. ¹² Éma, tímechahénapa eta ichape cuarto te anuquehe piso. Táuriquenéipahi eta jácara téjasihareana. Tásiha, étupiricapa eta viniruyare —máichavacapa ema Jesús.

¹³ Tiyananapa ena vanairucanahi. Jéhesaréinehi, náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayeheyarehi eta Pascua.

Emá Jesús máenimurihapa ena máimitureana

(Mt 26.26-29; Mr 14.22-25; 1 Co 11.23-26)

¹⁴ Tacahe, te hórapa eta nanisirayarehi, téjacanapa te mesa ema Jesús énapa ena apóstoleana. ¹⁵ Eta máenisiravacapa, máichavacahi éna:

—Ichapemuri eta nuvarairahi nuchanehe eta nunisirayarehi eta juca téqueneha nénisirahehi puiti eta juca yati páscuairahi, mapurare vuíchaha táitecapahini eta népenirayare. ¹⁶ Tásiha, numetacahevaneya puiti, vaipa nápechavaimahi nunica eta Pascua, tiámainucava te táitauchavapa eta nusiapiraya eta

nucavacureraya, nucajupahairaya ema Tata —macahepa.

¹⁷ Tacahe, mavehapa eta vasu náerirare, mahasulupayachapa ema Viya. Tásiha, macahepa:

—Era eta juca. Ecájijiricaca. ¹⁸ Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁹ Tacahe, mavehavarepa eta pan, mahasulupayachavarepa ema Viya. Mayuvetuhecapa, máijaracavacapa ena máimitureana. Tásiha, máichavacapa:

—Eta juca neche. Enica. Étivenehi níjararecavahi eta népenirayare. Eta juca apajarahiyare te apaquehe, te étipava énicaca, éta témechaheyare nuyehe —máichavacapa.

²⁰ Énerichuvere, te tínesianapa, mavehavarepa eta náerirare vasu. Máichavacapa:

—Eta juca vino, táicutiarahi eta nítine táepusairuvaya íchavene éti, nufirmachirayare eta arairu matratune ema Vicaiyaquene, nucaejasirayareva eta matratune apaesa ejacapacareya mayehe.

²¹ Puítisera, ani te etaracu, mararihi ema tíjararecanuyare. ²² Yátupiquenehi eta nacapsiranuyarehi, taicha tacahehi eta mapanereruhi ema Tata eta nuyehenui Manerejirunuhi éma. Páuresamisera ema tíjararecanuya —macahepa.

²³ Tacahe, ena máimitureana tiyaserejiricacanapa:

—¿Nájhapuca mácani te vitaracu ema tíjararecaya ema Viáquenu? —nacahepa.

Emá Jesús máimitucavaca eta nacapichuirayare ena téchapajiricanahi ena nachamuriana

²⁴ Te táequenepa, tiácapaemajiricanapa ena máimitureana tayehe eta nájahayarepuca ema ichapequeneapanaya aquenuca te nataracu te náejasiraya te návacureanayare. ²⁵ Te máechapa ema Jesús, ánipa máichavaca:

—Ena réyeana énapa ena aquenucana te ichapequeneana avasareana nacaetemajiricavacahi ena achaneana, navarairahi ticapichuanayarehi. ²⁶ Étisera vahi táuricaimahi ene ácahehini. Téhesera evarahhipuca ecapichahu, vahi ecasiñavaimahi. Ecutiyare ema amaperu eta mamansuvahi. Tacutiquene nácani tivanecanahi, tatuparacavacahi téñamavanayare eta náechapajirisiravacayare ena nachamuriana. ²⁷ Eta nayeherapi ena achaneana, ichape eta napicauchirahi ema ténicahi eta tinicacare. Énasera ena vanairucana téchapajiricanahi eta mesa, vahi nacapichuhini. Puítisera, nímitucaheyare eta juca arairu nuvanairipi. Puiti ímanuipa eta nítátirahehi. Nuvaraha ecutinuya. Ítaticayare éti.

²⁸ Éti, ímararacanuhi eta náichiranuhi ena ticatianacanuani. Váhisera ejunijicanuhini. ²⁹ Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata. ³⁰ Éjacainapa tayehe eta ecatuparahairaya. Étinapa evanerecayá nayehe ena dócemuriqueneana ena vi-

janeanana israelítana. Ecachanenuinavarepa te mesa eta enisiraya ánaqui te nucatuparahairayare —máichapa.

Emá Jesús máimereucha emá Pedro eta máepiyasiraya vahi máimati emá Jesús
(Mt 26.31-35; Mr 14.27-31; Jn 13.36-38)

³¹ Emá Viáquenu máichapa emá Pedro:
—Nuchicha Simón, péchapavayare. Emá Satanás, ichape eta mavarairahi ticaicutiaraheyare tíáqui paicheyare emutu éti. ³² Nútisera nuyaseuchahehi me Tata, pítiripa, apaesa vahi tacuemitiaca eta péhisiranuhi. Piáqui paicasamiyaresera. Tichavayaresera eta picasiñairanuya, tásiha péturechavacainavarepa ena apamuriana pichamuriana —máichapa.

³³ Emá Pedro majicapapa, máichapa:
—Tata Náquenu, tájina vahi nujunijicavímahi. Níjaracava néhicavi tayehe eta cárcel. Te nacapacavipuca, nútí apanavare níjaracavavare nacapacanu apaesa nácachanevi —macahepa.

³⁴ Emá Jesús majicapapa:
—Numetacavivaneya, Pedro. Puiti jena yati, te tamirahuinarichaha eta táechajisiraya eta varayu, piti mapaheyare pépiyacavayare vahi pímatinu, eta picatiuchiravayare pítijiva —máichapa.

Puiti etsereacavainapa

³⁵ Tacahe, emá Jesús mayaserecavacavarepa ena máimitureana. Máichavacapa:
—Te nuvanecahénapa epaica, nutuparacahehi vahi ecuama eta tarera, eta billetera, eta eparupevana, ¿yá tupihi, masi, vahi ecamunuvapahini?

Ena najicapapa:
—Tájina vácamunui pahini.
³⁶ Tásiha, máichavacavarepa:
—Puítisera mácani ticatarerahi, tiúripanahi mámayare eta matarera, étapa eta mayehe billetera. Émaripa mácani tájinahi mayehénahi espada, tiúripanahi máijarareca eta masacu, mavacharesihaya eta mayeheyare espada. ³⁷ Tacahe numetacahévanécha. Ena achaneana nacatianacahaviya muraca. Títauchavainapa eta táechajirivanahi eta Sagrada Escritura eta nícharacavayarehi: “Timicutijiricavahi námerahihini náicha”. Tamutu títauchavayarehi eta tacayemaqueneanahi eta Sagrada Escritura eta nuyehe —macahepa.

³⁸ Tacahe, ena máimitureana náichapa:
—Tata Viáquenu, jucarihi apinahi eta espada.
Éma majicapavacapa:
—Tiuri, tarataquene.

Emá Jesús tiyujaraca te Getsemaní
(Mt 26.36-46; Mr 14.32-42)

³⁹ Tacahe, tiúchucapa emá Jesús, énapa ena máimitureana, tiyananapa tayehe eta huerta Getsemaní tíavihahi te táemiripaisinehi eta cerro ticaijarehi Olivo-

quiji, eta mayujarasirarehi éma. ⁴⁰ Te títecapanapa tayehe eta Getsemaní, máichavacapa:
—Eyujarachava. Eyaseaca emá Viya eta étumevaina apaesa vahi macuiturucahe emá Satanás —máichapa.

⁴¹ Téracijpanavapa apaesa emá Jesús eta tayehe. Cincuenta metro eta mayerehinévacahi. Tépuycapa.

⁴² Eta mayujarauchiravahi, ánipa macahe:
—Tátachicha Nucaiyaquene, picatajicanupaini. Nuyaseacavi vahi tacuitauchavaini eta níchavaquenevayare. Váhini picuisapaini eta nucatajivairaya. Níjaracavaserá nútí eta nítauchiraya eta pivarahaquenehi píti eta nuyehe —macahepa.

⁴³ Tacahe, tíaramicarepa máucupaucha emá émana ángele tísihahi te anuma. Máetumechapanayarehi. ⁴⁴ Ichape eta máeñamiravahi eta mayujarasirahi. Témiricapa eta máepatsure tacasiriquiamapahi eta máitine. Cuájuamapaipa eta táemirisirahi te apaquehe.

⁴⁵ Te títapiricapa eta mayujarasirahi, téchepucapa. Tiyanapa te návihahi ena máimitureana. Máimahainehi éna, tímacanaripahi táichavenehi eta nacatisamurevairahi. ⁴⁶ Tásiha, máichavacapa:

—¿Tájaha tacayema ímacaichucha éti? Échepuca. Eyujarachava apaesaina. Eyaseaca emá Viya eta étumevaina apaesa vahi macuiturucahe emá Satanás —máichavacapa.

Nacaratacapa emá Jesús

(Mt 26.47-56; Mr 14.43-50; Jn 18.2-11)

⁴⁷ Tacahe, téchejiricavainirichaha emá Jesús, títecapananecha ena camuriqueneana suntaruana. Máinapumirauchavacapaipahi emá Júlasí. Témeñahavapa eta mayehe emá Jesús. Máetserarecapa. ⁴⁸ Tásiha, emá Jesús máichapa:

—Júlasí, ¿tájaha tacayema pétserecanu eta píjararesiranuhi nuti Manerejirunuhi emá Viya? —máichapa.

⁴⁹ Tacahe, ena máimitureana natiarihiqueneanahi, eta náimairahi ena camuriqueneana suntaruana, nayaserecapa emá Jesús. Ánipa nacahe:

—Tata Viáquenu, ¿vicatiuchava te espada?
⁵⁰ Tásiha, emá émana mavehapa eta mayehe espada. Mayuchatipaisinapa eta machaca tinapa te vaure emá mamusura emá aquenuca Caifás. ⁵¹ Emá Jesús máicha nuti Manerejirunuhi emá vacapa:

—Ésamiricavachucha —macahepa.
Tásiha, emá Jesús mavehapa eta machacaini emá achane, máimichavapa máipistaca, tinaracavanepa. ⁵² Tásiha, máichavacapa emá Jesús ena tuparairucana natiarihiqueneanapahi eta nacaratasirahi éma, énapa ena aquenucarahana, énapa ena oficiáleana tayehe eta Templo. Macajachavacapa:

—¿Tájaha tacayema ecasiña eta espada, ecaepuchiriquipahivare eta etanusiranupahi, tímicutijiricavapa námerahihini nútí? ⁵³ Étayapasica cape juca tamutuhi sácheana nucachanehehi tayehe eta Templo. Váhivare epatsicavahini ecaratacanuhini. Étisera iúricapuca eta tamapicuvahi eta yátimuhuhi eta íchirahi eta tamauriqueneanahi taicha mávaháruhehi emá Satanás.

Máisapaquenéhevarepa ema Tata eta ecaratásiranu-yarehi —máichavacapa.

Emá Pedro tépiyacavapa vahi máimati ema Jesús
(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tacahe, nacaratacapa ema Jesús. Námápa te mapena ema corregidor Caifás. Émasera ema Pedro máehiequenehavacapaipa. ⁵⁵ Ánaqui te tajuhe te canchón, ticamururecanapa eta yucu násasiavayarehi. Téjamurihanapa te tachacaya eta yucu. Téjacavarepa ema Pedro te namuri. ⁵⁶ Sucahepaipahi esu sirvienta, suímahapa ema Pedro eta máejasirahi te tachacaya eta yucu. Suímararacarpahi. Tásiha, suíchapa:

—Eñi ñica achane éñirichu ñichamuri eñi Jesús.

⁵⁷ Émasera ema Pedro tépiyacavapa vahi máimati. Máichapa:

—Pímaha, esena, vahi nímati núti ema píchaquenehi.

⁵⁸ Te tiyereréhachichavare, máimarácaripavare ema apana. Máichapa:

—Piti pítirichu machamurivi ema maca.

Emá Pedro majicapavarepa:

—Vahi, tata. Vahi machamurinuina —máichapa.

⁵⁹ Te hórapapuca eta táetavisiravahi, máimahavarepa ema apana, máimatipa eta máechajirisirava ema Pedro. Máichapa:

—Yátupiquene pítirichu machamuri ema maena Jesús, taicha eti ecavasana te Galilea, tímaticarehi eta échajisira —máichapa.

⁶⁰ Emá Pedro majicapapa:

—Vahi nímati, tata, nájahapuca ema maena píchaquenehi —macahepa.

Tacahe, téchajiricavainirichaha ema Pedro, énevanepa téchajicanecha eta varayu. ⁶¹ Emá Viáquenu máesenicapa ema Pedro. Enévanerinehi téchava ema Pedro eta mametarapianahi ema Viáquenu eta máichirahi: “Te tamirahuinarichaha eta táechajisirayare eta varayu, píti mapaheyare pépiyacavayare vahi pímatinu”. ⁶² Tásiha, tiúchucavanepa ema Pedro. Tíyahapa taicha máimativanepa eta táichapevahi eta máejecapiravahi.

Nacaecahijiricapa ema Jesús

(Mt 26.67-68; Mr 14.65)

⁶³ Ena suntaruana tijaneacanahi ema Jesús, nacaecahijiricapa éma. Náehararacapa. ⁶⁴ Náitíuquichavare. Náehamirahavare. Tásiha, náichapa:

—Vímahasejicacha, te pijarauquipuca, pímatihaviyare nájahapuca ema téhamirahavíhi —nacahepa.

⁶⁵ Ichapemurivare eta napanararachirahi éma.

Nacatupihapa ema Jesús te namirahu ena aquenucana
(Mt 26.59-66; Mr 14.55-64; Jn 18.19-24)

⁶⁶ Te tijarahipa, ticurujicacanapa ena tuparairucana, énapa ena aquenucarahana, énapa ena escribánoana. Námápa ema Jesús, nacatupihapa te namirahu. Nayaserecapa:

⁶⁷ —Viyaserecaviyare. ¿Pítisaréji Cristo, ema vicuchapaquenehi? —náichapa.

Majicapapa ema Jesús:

—Tiuri, te numetacahe eta nútirahi, éti vahi esuapanuimahi. ⁶⁸ Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaitanuimahi. ⁶⁹ Étainapasera nucaijuehaye te anuma nuti Manerejirunuhi ema Viya eta néjasirainapa te mavaure ema Tata, máitupajijihaquenehi éma —máichapa éma Jesús.

⁷⁰ Nayaserecavare namutu, náichapa:

—Tacahe piti, ¿pímijachavapuca machichavi ema Viya?

Emá majicapavacapa:

—Yátupi machichanu —máichapa.

⁷¹ Tacahe, éna nacahepa:

—Vaipa tácomesa vicayaseseruruhini ena testígoana. Émaquenepa visamahi puiti eta juca máechajiriruvahi, étapa ticaviureya —nacahepa.

Námápa ema Jesús te mamirahu ema Pilato

(Mt 27.1-2, 11-14; Mr 15.1-5; Jn 18.28-38)

23 Tacahe, téchepumurihanapa namutu. Námápa ema Jesús te mamirahu ema Pilato. ² Te nacaitecapa, náepiyaequenehapa éma. Ánipa nacahe:

—Viámápaahi ema maca achane ani te pímirahu.

Mavarahahi mahapapisinahaviyare ena vichaneranahi. Énerichuvare macahehi váhiji táurica vivachachahini eta impuesto mayehe ema vyehe Presidente Emperador. Énerichuvare, macahehivare eta émairahíji Cristo, ema réy-yarehíji —náichapa.

³ Tásiha, ema Pilato mayaserecapa ema Jesús:

—¿Yátupisareji réyvíhi píti nayehe ena pijaneanana israelítana? —máichapa.

Emá Jesús majicapapa:

—Pítupiruvahi eta juca piyaseseriranuhi. Yátupíhi eta nurreyvahi —máichapa ema Jesús.

⁴ Tacahe, ema Pilato máichavacapa ena tuparairucana énapa ena achaneana natiaríhiqueneanahi:

—Tájina maviurevaina eta nímairahi ema maca achane —máichavacapa.

⁵ Énasera nayurucapa muraca ema Pilato. Ánipa naicha:

—Ema maca, ichape eta mahapapisirahi eta napaneruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

Emá Jesús námavare te mamirahu ema Herodes

⁶ Eta masamiravacahi ema Pilato, macayasesererupa te étahipuca te Galilea macavasahi ema Jesús. ⁷ Te nametacapa eta étairahi macavasa ema Jesús, macavanairipipa ema Pilato nama mayehe ema Herodes, aquenucahi tayehe eta Galilea, taicha ema Herodes matiaríhihi tayehe eta Jerusalén eta jena sácheana páscuirahi. ⁸ Tacahe, tiúrisamuréinehi ema Herodes eta máimairahi ema Jesús. Ichapemuríhi eta mavarairahi máimati taicha masamairiricahi tamutu

eta tiáramicareana máichaqueneanapahi ema Jesús. Mavarahainehi tǎjahúchava máimahahini eta jácani tiáramicare. ⁹ Ichapemurihi eta mayaseseresirahi. Émasera ema Jesús, tǎjina vahi majicapahini. ¹⁰ Natiarihipahivare ena tuparairucana. Tétavicavahi eta nasemanevahi eta náepiyaequenehairapahi. ¹¹ Tásiha, ema Herodes énapa ena masuntarurana, ichaperinehi eta náepuruirahi. Tacahe, ema Herodes mavehapa eta mamuirihaini manaquiriaruvaipahi, táepahamequene-ripahi eta tajanunumesirainihi. Mamuriachapa ema Jesús. Táicutiarahi eta nacaecahirahi éma. Tásiha, macavanairipivarepa ema Herodes náimichava te mamirahu ema Pilato. ¹² Ema Herodes émapa ema Pilato ticatianacacanainihi eta náítaresirahi. Étasera te jena sáchequenehi tichavapa eta náemunasiracacahi.

Emá Pilato macavanairipipa eta náetatasiraya ema Jesús

(Mt 27.15-26; Mr 15.6-15; Jn 18.39-19.16)

¹³ Tacahe, ema Pilato eta máimairahi náimichavirahi eta mayehe, macurujimurihapa ena tuparairucanahi énapa ena achaneana. ¹⁴ Tacahe, máichavacapa: —Eta iámirapahi ema maca achane te numirahu, ímijachahi mahapapicavaca ena achaneana. Nútisera nímahahi tǎjina maviurevainahi eta nuyaseseresirahi te emirahu eta ímijachaquenehi eta máejecapiravanahi. ¹⁵ Émaripa ema Herodes máimichavavare eta ani nuyehe taicha tǎjinavare máimahahini eta máejecapiravainahini. Étainahipucaini taviuchahini táimicapacahini. ¹⁶ Tiúriserapuca nímivanereca macaemecharahi, tásiha, nucaiticapa —máichavacapa.

¹⁷ Eta mayeherepi ema Pilato te Páscuamuhuana te áñoana macaiticayarehi ema émana preso te jena sáchequenehi. ¹⁸ Tacahe, ena achaneana vahi návarahahini máuchucuhahini ema Jesús. Tipiaracanapa muraca. Ánipa nacahe:

—Vahi vávaraha máuchucuha ema maca. Émaina máuchucuha ema Barrabás —nacahepa.

¹⁹ Ema Barrabás te cárcel mávihahi. Táimicuñaruhi eta máichirahi eta revolución émapa eta macapahivahi. ²⁰ Émasera ema Pilato mavarahaichucha macaiticayarehi ema Jesús. Mayaseremurivarepa. ²¹ Énasera muracapanapaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

²² Mapahequenepa eta mayaseresiravacahi éma: —¿Tǎjasica eta maviurevahi ema maca? Núti tǎjina nímaha maviurevainahi táimicapacahini. Tiúriserapuca nímivanereca macaemecharahi, tásiha, nucaiticapa —máichavacapa.

²³ Énasera tímitujiricacanapa eta napiarasiraina nayaseasiraina eta macaetatairaya te crusu. ²⁴ Jéhesaréinehi, ema Pilato masuapavacapa eta nayasearapihi ena tuparairucana. ²⁵ Émapa tiúchucuhahi ema Barrabás ema nayasesereruhi, táimicuñaruhi eta máichirahi eta revolución émapa eta macapahivahi. Macavanairipipa táitachava eta navarahaquenehi éna, eta nacapasiraya ema Jesús te crusu.

Náetatacapa ema Jesús te crusu

(Mt 27.32-44; Mr 15.21-32; Jn 19.17-27)

²⁶ Tacahe, námapa ema Jesús tayehe eta macaetatairayarehi. Eta napaisirapahi te calle, nácapajicapa ema achane ticaijare Simón ticavasahi te Cirene. Éma, másihapahi te máesane. Napamicapa máevachacaya manaracuhayarehi eta macurusura ema Jesús, máehicapaipahi te máequene ema Jesús.

²⁷ Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahi, náimarasirahi eta máejapanuravapahi éma. ²⁸ Máesenimurihapa éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenénahi ena echichanaveana. ²⁹ Taicha tatiarihiyare eta sáchevayare nacapacayarevare ena. Ichape eta nacajapanuravairaya eta nacapasiraya. Tásiha ecachénapa: “Tétavicavapa náuriva ena esenana macheruana. Nájina náimipanererecaini”. ³⁰ Tásiha, ena achaneana, eta napisirayare, tijunanainapa te céroana, tásiha, nacachénapa: “Tiúripanapucaini viyumurucavahini eta te juca cerro.” Ena apamuriana nacahenavarepapa: “Étapucaini te juca simena viyumurusiavahini”.

³¹ Apanasica núti ichapemuri eta nucatajivairahi, tǎjinahinéni taviuchanuhini. Navetijiyarecha éta nátajivayare ena echichanaveana † —máichavacapa.

³² Énerichuvare natiarihipahivare ena apinana tiámerahiana macutiqueneanayarehi ema Jesús eta macaetatairayare. ³³ Tacahe, nacaitecapapa tayehe eta masihi nacaetatairare ticaijarehi Calavera. Náetatacapa te crusu ema Jesús, énapa ena apinana tiámerahiana. Ema émana nanacapa te mavaure, ema apana te sapa. ³⁴ Te náetatacapa ema Jesús, macahepa eta máechajiriruvahi:

—Tata, piperdonachavaca ena nani, taicha vahi nácaicutiarahini eta juca náichiranuhi —macahepa.

Tacahe, ena suntaruana nasuertehachapa eta mamuirihaini eta náijarajirisiracacahi. ³⁵ Natiarihihi ena achaneana tímararacanahi tamutu. Énaripa ena tuparairucana natiarihihivare. Nacaecahijiricaripa éma. Ánipa nacahe:

—Ema mácacacha, macahehi eta máechajiriruvahi eta maratahairahíji macuchucuhavaca ena apamuriana achaneana. Tásiha puiti, vivaraha vímaha máimereuchava eta máitupajijasiravahíji, te yátuphipuca Cristo éma, Manerejiruhíji ema Viya —nacahepa.

³⁶ Énerichuvare ena suntaruana nacaecahijiricahivare éma. Navarahapa náesichayarehi eta tasisiru vino.

³⁷ Náichapa éma:

—Te yátupinapuca piti reyvihi nayehe ena israelíta, pítijivaina picuchucuhava —náichapa.

† *Eta juca mayeherepi proverbio ema Jesús te máechajiriruva, ani tacahe: “Te náichahi eta juca eta náimairahi eta yucuqui vérepacavacaichahahi, tétavicavahi eta navarairahi náiquipaica te tǎjiquipa”. Tatiarihi eta tacayemaquenehi tayumurevahi.*

³⁸ Tatiarihihivare eta ajureca nanacaquenehi te tachutisi eta macurusura. Eta juca ajureca tacajuquenehi te náechajiriruva te griego, te latín, téhapa hebreo. Ani tacahehi eta táechajiriruvahi: “Ema maca ema Rey nayehe ena israelítana”.

³⁹ Ema émana tíamerahi macaetataquenehi te machacaya, énerichuvare éma macaecahihi. Ani macahehi:

—Te yátupinapuca píti quenehi Cristo, picuchucuhava píti jivaina. Tásiha, picuchucuhavivare víti apana —máichapa.

⁴⁰ Émasera ema apana macaetataquenehi macahepa:

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi.

⁴¹ Víti, vivachachahi eta juca vitapiravahi taicha ichapequenehi eta véjecapiravanahi. Émasera ema maca Jesús, ticatajivahi tájinahinéni taviuchahini.

⁴² Tacahe, máichapa:

—Tata Jesús, péchanupaini te péjacapa tayehe eta piávacureya —máichapa.

⁴³ Ema Jesús máicapapa:

—Numetacavivane, puiti píti nucachaneviyare te paraíso —máichapa.

Eta máepenirahi ema Jesús

(Mt 27.45-56; Mr 15.33-41; Jn 19.28-30)

⁴⁴ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. Étarichuhi eta jena máepenirahi éma, tójahúchavapa tétsayumeca eta tayehe cortina eta Templo. Ticutimecaca eta taetsayumesirahi. ⁴⁶ Ema Jesús tipiaracapa:

—Tata, pijacapanu eta náchaneva —macahepa. Te títapiricapa, tépenapa.

⁴⁷ Tacahe, ema nacapitara ena suntaruana romanoana, tipicarinehi eta máimairahi eta júca. Étapa macaicutiarapa, macunachapa ema Jesús, ánipa macahe:

—Yátupiquenéichuyapa ema maca achane matapiravarehi —macahepa.

⁴⁸ Namutu ena achaneana natiarihiqueneanahi, eta náimairahi eta júcana, ichaperinehi eta napisirahi. Téhatupachávanapáipa eta nacatisamurévairahi.

⁴⁹ Énasera ena téhicanapahi ema Jesús te másihainapa te Galilea, énapa ena esenana, namutuhi nanecapararecahi eta juca táichavaquenevanahi. Nayererehihisera eta náimararasirahi.

Nacucupaicapa te crusu ema Jesús, náecarapa

(Mt 27.57-61; Mr 15.42-47; Jn 19.38-42)

⁵⁰ Matarihihivare ema achane ticaijare José. Ticavasahi te Arimatea te Judea. Tipicaurahihi éma. Téta vicavahivare eta máuriva. Masuapahi ema Jesús, eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahana, váhisera mapauchavacahini ena machamurianahi

tayehe eta juca náichaqueneanahi tamaurique-
neanahi. ⁵² Te cáperehichichapa, eta máimairahi máepenirapahi ema Jesús, tiyanapa mayehe ema Pilato, mayaseapanahi eta máquehe ema Jesús, mavarairahi máecarayare. ⁵³ Te tichavapa, macucupaicapa eta máquehe tayehe eta crusu. Máyuruacapa eta te sávana tijapu. Náiyaracuhapa tayehe eta máecari eta te mari nasecajueruhi. Nájinachaha nacaecarasihini tayehe. ⁵⁴ Titatajianapa taicha cáperehichichaipahi. Taicha vahi táisapacarehini náecararecahini te yati, váhivare te tijarahiacaimahi taicha sávarumuhuyarepa.

⁵⁵ Ena esenana téhicanapahi ema Jesús te másihainapa te Galilea, tiyananapa tayehe eta máecari, náimatiyarehi eta mávihahi. ⁵⁶ Te náimatipa, tichavanapa te napena. Natsecapa eta perfume mayajihayarehi. Tinaracanapasera te jena sáchequenehi, napicauchahi eta tapicauchacarevahi.

Eta máechepusirahi ema Jesús te máecari

(Mt 28.1-10; Mr 16.1-8; Jn 20.1-10)

24 Te apanapa sache, te tijarahichichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahi, nacachanevacapaipa ena apamuriana esenana. ² Te títecapanapa tayehe eta ecari, náimahrinehi eta ticheyarama mari tajihainihi eta ecari, téquehepuichavaipa. ³ Tisiapanapa éna, náejicainehi eta máquehe ema Viáquenu Jesús. Májinaripahi. ⁴ Tiáramecanarinehi eta náejiasirahi. Váipa náimatiquenehahini tájahahipuca eta máichararacavahi. Tásiha, tiáramicarepa náimahahi ena apinana ajairana titupihanahi te nachacaya. Tijanunucavacahi eta namuirihana. ⁵ Eta náramesirahi éna, tétipaimurihanapa. Énasera ena ajairana náimahaqueneanahi náichapa:

⁶ —Éti ímijachaipapuca manasihí tépenahi ema Jesucristo, Manerejiruhi ema Viya. Májinaripa, tichavaripahi títareca. Échavarichuhipuca eta macayemaqueneanahi te achanerichaha te masiquenerichaha te Galilea. Macahehi eta máechajiriruvahi eta nacaratasi-rayarehi ena ticatianacanahi éma, náetatasirayarehiva te crusu. Téchepucayarehisera te mapanaquenénapa sache —nacahepa ena ajairana.

⁸ Tacahe éna, enurujirinehi náechavane eta máechajiriruvanahi ema Jesús. ⁹ Te tichavanapa te napena, nametacapa ena óncequeneana apóstoleana, énapa ena apamuriana nachamurianahi. Te nataracu ena esenana tímahanahi ena ángeleana, sutiarhipahi esu María Magdalena, esu Juana, ésupa esu apanavare María, máenahi ema Jacobo. ¹¹ Énasera ena apóstoleana vahi nasuapahini, náimijachaichucha náepiyahiraivahi namaurishivahi ena esenana.

¹² Tiyanavanepasera ema Pedro tayehe eta ecari. Tijunapapaipahi. Te títecapanapa, máimahapa tacarinehi eta sávana. Mapanerequenehainehi eta juca táichararacavahi. Tacahe, tichavavarepa.

Tímerecavapa ema Jesús nayehe ena apinana máimitureana te táchehu ticaijuhe eta avasarechicha Emaús
(Mr 16.12-13)

¹³ Étarichu te jena sáchequenehi, tipaicanapahi te achene ena apinana máimitureana ema Jesús. Násihahi éna te Jerusalén nacaijuheyarehi eta avasarechicha Emaús. Once kilometro eta tayerehivahi.
¹⁴ Eta napaisirapahi nacasamurepaipahi eta nasamairirihu. Téchajiricavanapaipa. ¹⁵ Eta náechajisihairapahi eta juca táchararacavanahi, tiáramicarepa macapayamurihapa ema Jesús, macachanevacapaipa. ¹⁶ Énasera vahi náimatihini, taicha éma vahi máisapahini náimati.
¹⁷ Tacahe, ema Jesús mayaserecavacapa:
—¿Tájahasica eta juca échajisihapahi eta epaisirapahi? ¿Tájaha eta tímipanererecahepahi?
—máichavacapa.
¹⁸ Ema émana ticaijarehi Cleofas majicapapa:
—Namutu ena achaneana náechahi eta juca táchararacavahi te Jerusalén puiti juca sácheanahi. ¿Picarichuhipuca píti vahi péchahini eta juca, eta piáivhairahi te Jerusalén?
¹⁹ Éma máichavarepa:
—¿Tájahasica eta téchacarehi?
Éna náichapa:
—Émara véchajisihapahi eta máichavaquenévahi ema Jesús Nazareno, ema profeta máuriquenehini nayehe ena achaneana. Tamutuinihi tiuri eta máimiturapiana, tétávicavahivare eta máitupajijiasiravahi taicha ema Viya, éma tíjaracahi tamutu. ²⁰ Énasera ena tupairucana te viávasa, éna tíjararecanahi nayehe ena apavasanana taicha navarahahi náimicapaca. Tásiha, náetatacapa te crusu. ²¹ Víti ichapemuri eta vicasiñavairainihi eta mayehe. Vicuchapavainihi eta macatiuchirahaviyarehi vimutu víti israelítana. Tamapurujipasera puiti, taicha tépenapa éma. Puiti mapanaripa sache eta táetávisiravahi eta juca.
²² Icháquenesera te yáticarahichichapa, ticaramecahavianapa ena esenana vichamurianahi eta nayatiruirahi tiyanana tayehe eta máecari. ²³ Vaipa nachimaphini eta máquehe. Májinaipahi. Te tichavanapa, timetacahavianaipa eta náimairahi ena apinana ángeleana. Nametacavacapaji eta machaviraipahi títareca ema Jesús.
²⁴ Tásiha, tiyanavaneanapa ena apamuriana vichamuriana tayehe eta ecari. Jéhesaréinehi májinaipa ema Jesús, étarichuhi eta nacayemaqueneanapahi ena esenana —náichapa.
²⁵ Ema Jesús máichavacapa:
—Tétávicavapa tájinaira ácaicutiaraquenéna eti páureana. Váhivarepuca ácaicutiarahini eta náechajirivanahi ena profetanaini tayehe eta tacaheyarehi eta macatajivairayarehi ema Cristo eta máepeniranumaya, tásiha tichavayarehi títareca. Váhivarepuca ácaicutiarahini eta tacaheyarehi eta mápanirayarehi tichava éma te mávasa anuma —máichavacapa.
²⁷ Tásiha, mametacavacapasera tamutu eta táechajirivanahi eta Sagrada Escritura, eta táechajisihairahi

éma. Tépanavapa tayehe eta májureanahi ema víyarahaini Moisés; étape eta apamuriana nájureanahi ena profetanaini.

²⁸ Títécapananecha tayehe eta avasarechicha nacaijuhequenepahi. Mavarahapa ema Jesús majunjicavacayarehini. ²⁹ Énasera nacumpirachapa máehicavacahini te napena. Náichapa:
—Pácaherine eta ani viyehe, taicha yátinapa eta jena —náichapa.
Tásiha, ema Jesús manasipa tisiapapa eta nayehe.
³⁰ Te tíuripa eta tinicacare, mavehapa eta pan, mahasulupayachapa ema Viya, mayuvetucapa, máijaracavacapa éna. ³¹ Enévanerinehi náimativanepa éma. Émasera tíjahúchavapa témitiacahi te namirahu.
³² Tésenijiricacanapa éna. Tásiha, nacahepa:
—¿Tájaha tacayema eta vahi vímativanehini ichaque-ne te achene te ticapayacahivapa éma? Étape eta vichanerapahi, váhivare vímatiacavanehini, véjapusamurechapaipahinéni eta visamiravahi eta máimitusirahavipahi tayehe eta Sagrada Escritura —nacahepa.
³³ Tacahe, enévanepa téquequecavanahi tichavana te Jerusalén. Te títécapanapa, tisiapanapa tayehe eta návihahi ena óncequeneana apóstoleana énapa ena apamuriana nachamuriana. ³⁴ Ánaqui ticametacasiaripavare éna. Nacahevarepa ena apóstoleana:
—Yátupi eta máechepusiraipa ema Viáquenu. Máimaharipa ema Pedro —nacahepa.
³⁵ Éna apinana najicapavarepa:
—Énerichuvare víti vímahaipavare éma, te achene eta vipaisirapahi. Váhisera vímativanehini. Tapaenu-mava te mayuvetucapa eta pan, vímatipa éma —náichapa.
Tiápechavavare tímerecava ema Jesús nayehe ena máimitureana
(Mt 28.16-20; Mr 16.14-18; Jn 20.19-23)
³⁶ Tacahe, téchajiricavanarichaha éna, tíjahúchavavarepa tímerecava ema Jesús te namuri. Máechajicavacapa, ánipa macahe:
—Íchararacava, nuchichanaveana.
³⁷ Énasera tipicanarichucha, náimijachaichucha cunarehi éma. ³⁸ Émasera ema Jesús máichavacapa:
—Vahi ecupicanu. Étumecha eta esamureana. ³⁹ Ímaha eta juca nuvahuana étape eta nívapeana. Émama-hacanu apaesa écha eta nútiquenérahahi. Eta cunare, tájina táechena, tájinavare táperaina. Vahi tácutihini eta nucaqueherahi nútí —máichavacapa.
⁴⁰ Tacahe, eta máichiravacahi, ticajaruvauchavaipa eta mavahuana, étape eta máivapeana. ⁴¹ Vuíchahasera nasuapahini éna, tíurisamureanaripahinéni eta náimairahi, tacachanehisera eta napisirahi. Eta tacahe, máichavarepa:
—¿Jararihi nunica?
⁴² Éna náijaracapa eta nájimarú jima, étasipa vasu eta mápama. ⁴³ Majacavacapa éma, tinicapa te namirahu éna. ⁴⁴ Tásiha, máechajiricavacapa:
—Eta juca níchavaquenevahi, étara eta numetaruhahi cape juca nucachanejiricahéichahahi. Eta

tacaheyarehi eta táitachiravayarehi eta májuchaqueneanahi ema víyarahaini Moisés núti táechajisihaquenehi. Éta pa eta nájuchaqueneanahivare ena profetanaini, éta pa eta Salmo.

⁴⁵ Máemechavacaipahi eta táechajiriruvana eta Sagrada Escritura. ⁴⁶ Tásiha, máichavarepa:

—Étara eta juca tacajuqueneanahi eta népenirayarehi nuti Cristo. Néchepucayarehisera tayehe eta nécari te mapanaquenepa sache. ⁴⁷ Étayaréichuhivare iámapicayare eta níjare eta ímituresiraya ena achaneana ticavasanahi te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apaesa macaepaha ema Viya eta napecaturana. ⁴⁸ Éti, nutupararuheya eta ímituresiraya eta júcana. ⁴⁹ Enasiyarechahasera ani te juca Jerusalén. Tiámainucava te máitecapauchahevacapa ema Espíritu Santo nuvaneryare, máijararunuyarehi ema Tata. Éma, tíjaracaheyare eta ítupajjiasiravanayare —máichapa.

Eta mayapirahi ema Jesús te anuma

(Mr 16.19-20)

⁵⁰ Te títapiricapa eta máimitusiravacahi, mámamurihapa te tachachacu eta avasare Jerusalén, te tachacayahi eta avasarechicha Betania. Macanuquechapa eta mavahuana, mayujarauchavacapa éna. ⁵¹ Te títapiricapa eta mayujarauchiravacahi, timutserahavapaipa ticanuquechavapaipa eta mayapirahi te anuma. ⁵² Eta náimairahi éna eta macanuquechiravapaipahi, tépuyumurihanapa eta nanecapararesirahi eta mayanirahi. Tásiha, tichavanapa tayehe eta Jerusalén. Tiúrisamureanapaipa. ⁵³ Tájina vahi náejicavahini tayehe eta Templo. Tiyujarauchavanaparacahi eta nacunachirahi ema Viya.

Tamutupa eta juca numetasiravihi puiti.

San Juan

1 Eta acane, te táepaniravahi tamutu, matiarihiquenépahi ema Jesucristo, ema Tímimatirahi me Viya †. Éma, macachanehi ema Maiya eta máitaresirahi, Viyahivare éma apanavare. ² Ena apinana, nacuticacahi eta napanereruana. ³ Eta táepaniravahi eta acane, émarahi ema Cristo ticaemataneacahi tamutu eta tatiarihiqueneanahi puiti, máitauahirahi eta mapaneruanahi ema Maiya. Tájina máejequeruinahini, nájinavare apanainahini náepiyacahini eta tatiarihiqueneana. ⁴ Émarichuvare ticaitarecavahi viti achaneana. Émarichuvare tinacapa te viáchanevana eta tamicahu eta vítaresirahi. ⁵ Éma tímiyanava tímicauchahavi taicha mavaraha máimijunijisinhaviyare eta tamapicu te viáchanevana. Nararihisera ena vahi náuricahini eta mamicauchinavaca. Navaraha nacaemaha eta mamicauchiravacahi.

⁶ Tacahe, te máimahapa tiuri, ema Jesucristo tiúcupaicapa te juca apaquehe. Tiáchanechavapa. Yátupiquenehi achane, macaechehi eta veche viti achaneana. Ticasiriquihavihi te jena áñoanahi majurusirahi. Matiarihivare ema apana achane ticajarehi Juan Tícachasiricarahi. Tacahe, ema Viya, te máimahapa tiuri, ticavanahipa ema Juan. ⁷ Máinapumirauchayarehi eta macametairuyare eta máimeresiravaya ema Cristo, ema namicahuyare nácani ticasifávanayare mayehe. Ehanachavapa. Yátupiquenehi achane, macaechehi eta veche viti achaneana. Ticama Juan mametacayarehi ena achaneana natsecava eta najacampiraya ema Cristo. ⁸ Ema Juan, vahi émainahini tímicauchamurimahi ena achaneana. Émahisera ticametairurahiyarehi eta máucupaisirapa ema tiámahavihi eta yátupiqueneana mapanereruanahi ema Viya. ⁹ Ema maca máechajisihaquene ema Juan, éma yátupiquenehi eta mamicauchirahaviyarehi vimutu viti achaneana, taicha tímieche viti achaneana. Ticatucavahi eta mapanereruana ema Viya.

¹⁰ Ema Jesucristo, émahí acane tépiyacahí tamutu eta apaquehe, énapa ena viáchucanaveanaini. Puíticha éma téchahavi vimutu. Téhesera te tiúcupaicapa éma, namaimatiquenehi ena achaneana Viáquenuirahi éma, váhivare navarahahini najacpahini éma.

¹² Natiarhisera ena tinerejicavanahi tijacapanahi, téhicahí éma. Ena nani, ichaperinehi eta macunachira-

† Ema Apóstole Juan, te májuchapa eta juca libro, manacahi amairiha te letra griega λογος (eta táechajicuirava: “logos”). Eta tacayemaquene te véchajirirupa: “Tímimatirahi me Viya”. Étarichueche viti achaneana. Ticavare tacahe eta táechajisihaquene eta apamuriana líbroana te castellanorupi, ani tacahehi: “la Palabra” éta “el Verbo”.

vacahi táichavene eta nacasiñairavahi mayehe. Éna, yátupiqueneripa machichanaveanahi ema Viya. ¹³ Eta macachichairahavihi ema Viya víti, émahí ema Viya tinerejicahavi táichavene eta vicasiñairavahi mayehe. Vahi étaparacainahipucaini eta náehisrainahipucaini ena ticachichahaviana. Váhivare étaparacainahipucaini vivarahahipucaini ichape víti. Váhivare étaparacainahipucaini ichapenahipucaini eta mavarairahini mácani apana achane.

¹⁴ Viti véhicanahi ema Jesús eta matiarahirahi te juca apaquehe, yátupi eta vímatirahi éma. Vímahahi te viúquihana. Vímativarepa eta másihairahi te anuma, eta émahí ema macarichuquenehi Machicha ema Viya. Yátupihivare eta víyairahi éma, macutihi ema Maiya. Éma, tímimatirahi me Viya, taicha éma máimerecachi eta máetaviuchirahi eta máemunasirahavihi, máimechirahavivare eta yátupiqueneana mapanereruana ema Maiya. Ema víyahaini Moisés ticatuparahahi me Viya eta máimitusirahavihi viti achaneana eta vanairipiana. Émasera ema Jesucristo ticatuparahahi me Maiya eta máimitusirahavihi eta máemunasirahavihi, éta pa eta máechajiriruvana yátupiqueneana ema Viya. Ema Cristo, tétavicavahi eta máuriva eta veyehe vimutu. Eta majaneasirahavipahi, tíjaracahavihi eta vitumevahi te tamutu sácheana. Émaripa ema Juan, ani macahehi eta máechajisihairahi ema Jesús: “Émara ema maca ema néchajisihaquenehi eta eyehe cape juca. Yátupi núti nínapucahi eta núchusirahi, émasera matiarihiqueneipahi eta acane, májinanuichahahi núti. Eta tacahe, tícauchacapanahi eta nuyehe” macahepa.

¹⁸ Yátupiquene nájina náimatihini eta máimahí ema Viya. Émasera ema macarichuquene Machicha, tímimatichahavihi eta máuriva ema Maiya taicha étaquenehi másiha te masamure ema Maiya.

Éma Juan Tícachasiricarahi timetacavacahi ena achaneana tayehe eta máimeresiravayarehi ema Jesucristo

(Mt 3.11-12; Mr 1.7-8; Lc 3.15-17)

¹⁹ Tacahe, te jena sácheana, ena tuparairucanahi ticavasanahi te Jerusalén navanecapa ena náevanachana ††, nayanaucha ema Juan Tícachasiricarahi. Éna, nayaserecapa, ánipa nacahe:

—Tamutu arairuhi eta pímiturapiana. ¿Pítinaripa ema Cristo vicuchapaquenehi? —nacahepa.

†† Éna nani vanairucana, nararihihi ena tiyujarahiana te Templo, énapa ena téchapajirahiana eta tayereruvana eta Templo te Jerusalén.

²⁰ Matupiruvapa eta majicapiravacahi. Ánipa macahe: —Núti mavanerunuhi ema Viya. Váhisera nútina ema ecuchapaquenehi ema ticaijare Cristo —macahepa.

²¹ Tacahe, nápechavarepa nayasereca: —¿Nájahavisica píti? ¿Pítipuca picaijare Profeta Elías? ¿Pichavahi eta te juca apaquehe? —náichapa.

Émasera majicapavarepa:

—Vahi nútina.

Tásiha, nápechavarepa nayasereca:

—¿Nájahavisica píti? ¿Pítipapuca ema apana profeta vicuchapaquenehi? —náichapa.

Émasera majicapavarepa:

—Vahi nútina.

²² Tacahe, náichavarepa:

—¿Nájahaviquenesica píti? Pimetacahavichucha te nájahavipuca píti. Vivaraha véchayare, apaesa vimetacavaca ena tivanecahavianahi —náichapa.

²³ Tacahe, ema Juan majicapavarepa:

—Nútichucha máechajisiquenehi te ajureca ema víyarahaini profeta Isaías. Núti nucametarairuhi nayehe ena achaneana vámahicurúhana. Níchuha-vacahi éna apaesa natsecava eta jácani máitecapiraya ema Viáquenu —macahepa.

²⁴ Natiarihihivare ena navaneruanahi ena fariséoana.

²⁵ Nayaserecavarepa éna apanava:

—¿Tájahasica tacayemahi eta pícachasirisirahi ena vijaneanana, te váhipuca pítinahíni ema Cristo, váhivare pítinahíni ema profeta Elías, váhivare pítinahíni ema apana profeta vicuchapaquenehi? Ena vijaneanana vahi tácamunuhini nacaicachasihini. Énaserá ena apavasanana, jéhesare tacamunu eta nácaicachasivaca —nacahepa.

²⁶ Tacahe, éma majicapavacapa:

—Tiuri, núti yátupi nícachasicavacahi te une ena achaneana, apaesa natsecava eta jácani máitecapiraya ema vicuchapaquenehi. Matiarhipasera puiti te vitaracu. Étisera vahi ímatihini éma. ²⁷ Tímerecavavanéna. Ticunachacarepanayaresera eta nuyehe. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami —máichavacapa éna ema Juan.

²⁸ Eta mávihahi ema Juan máicachasirisinehi ticaijare Betábara, te apachara eta cajacure ticaijare Jordán, tinapaicahi te táuchusine eta sache. Eta nayaseresinepanahi ena vanairucanahi.

Ema Juan máimicaecheracha ema Jesús eta émairahi ema Cordero, vanairucahi me Viya

²⁹ Te apanapa sache, máimahapa ema Juan eta mapachirapaipahi ema Jesús. Tacahe, máichavacapa ena achaneana:

—Ímaha, márájapa ema Cordero, matapiravarequene éma, vanairucahi me Viya. Éma, táimicaparyare eta macaepahairayare eta vipeaturana viti achaneana te juca apaquehe. ³⁰ Émara ema maca ema néchajisiquenehi eta eyehe cape juca. Núti nínapucahi mayehe éma, émasera matiarihiquenéipahi eta acane, májinanuichahahi núti. Eta tacahe, tipicaucha-

carepanahi eta nuyehe. ³¹ Nútiripa néchajisihahi éma, vuíchahasera nímatihini. Numetacahehisera eti nu-janeanana israelítana eta ecaicachasiraina apaesa etsecavahi eta ejacapiraina éma te jácani máimerecavapa. ³² Tacahe, cape sache, titecapauchanupa ema Jesús, mavarairahi nícachasicayare éma. Tásiha, te viúcupaicapa te une, nímahapa ema Espíritu Santo eta máucupaisirahi te anuma, ticutiparine eta paloma. Masiapahacapa ema Jesús. ³³ Tacahe, te nímahapa, nupaenumavapa nímati éma eta émairahi ema vicuchapaquenehi Cristo, taicha ema Viya tímítucanupa eta máicutiarayare. Ani macahehi: “Te pímhaha ema Espíritu Santo máucupaucha te mápusi mácani achane, pímatiya eta émairahi ema Nuchicha nuvaneruhi. Éma, tíjaracahevacyare ema Espíritu Santo, tisiapahacahevacyainapa éti achaneana. Nuchaneraheinapa éti” máichanupa ema Viya. ³⁴ Tásiha puiti, nímatipa éma. Táitusiava numetacahe puiti eta émairahi ema Cristo, Machicha ema Viya —máichavacapa ema Juan.

Ema náinapuiruana máichuhaqueneana ema Jesús ena máimitureanaya

³⁵ Tacahe, te apanavarepa sache, ema Juan matiarihihitayehe eta mávirareasahi, vítipa viti apinahavi máimitureanahi. ³⁶ Tásiha, máimahapa ema Jesús tiánucuhapaipahi. Tacahe, ema Juan máichahavipa:

—Ímaha. Ema maena Jesús, émahi ema Cordero matapiravarequene, vanairucahi me Viya —macahepa.

³⁷ Tacahe, eta vímairahi viti apinahavi máimitureana ema Juan, viyanapa véhicahi ema Jesús. ³⁸ Tásiha, ema Jesús téseniequenehavapa. Máimahapa eta véhisirapahi. Tiyaserecavavipa:

—¿Tájaha ecamunu nuyehe? —máichahavipa.

Víti vijicapapa:

—Tata maestro, ¿távihapuca eta pítecapirare?

³⁹ Ema Jesús tijicapahavipa:

—Yare, ímaha apaesa ímativa.

Tacahe, viyaninapa vímatipa eta mávirarehi. Vítaipahi eta jena sache eta víávihairahi eta mayehe, taicha las cuátroripahi sache te vítecapapa ánaqui.

⁴⁰ Andrés máijare éma nuchamuri téhicapahi ema Jesús. Tacahe, eta máurisamurevahi ema Andrés, tiyanavanepa matanucahi ema maparape Simón Pedro. Te máichimavapa, máichapa:

—Vímaharipa ema vicuchapaquene Mesías ema Cristo —macahepa.

⁴² Tacahe, ema Andrés tichavapa mámapa ema maparape Simón eta te mávihahi ema Jesús. Te náitecapauchapa, ema Jesús máesenicapa ema Simón. Tásiha, máichapa:

—Piti Simón, machichavihi ema Jonás. Nútisera nísvachaya eta píjare. Núti níjarechaviya Pedro, táichavenehi eta pétaviuchirayare eta pitumeva —máichapa ema Jesús.

Emá Jesús máichuhapa emá Felipe émapa emá Natanael

⁴³ Te apanapa sache, emá Jesús mavarahapa tiyanarehi te tinapaica eta Galilea. Tásiha, macainunapa emá Felipe. Tásiha, máichapa:

—Yare, péhicanu.

⁴⁴ Eta mávasahi emá Felipe eta te avasare ticaijare Betsaida, étarichuvare mávasahi emá Andrés émapa emá Pedro. ⁴⁵ Tacahe, emá Felipe tiyanavarepa, matanucahi emá Natanael. Te máetupiacapa, máichapa:

—Vímaharipa emá achane máechajisiquenehi te libro májuchaquenehi emá víyahaini Moisés, émarichuvare éma táechajisiquenehi eta libro nájureanahi ena profetanaini. Emá ticaijarehi Jesús, machicha emá José. Ticavasahi te Nazaret —macahepa.

⁴⁶ Tásiha, emá Natanael majicapapa:

—Váiparinehi étainahini máuchusinehinehi emá achane tiuri tayehe eta avasare Nazaret —macahepa.

Tásiha, emá Felipe máichavarepa:

—Viyana, apaesa pímati —máichapa.

⁴⁷ Tacahe, te náitecapauchapa, emá Jesús máimara-racaripa emá Natanael. Tásiha, macahepa:

—Nímativi eta pipanereru. Píti yátupiquenevi israelítana. Tétavicavahi táurivahi eta pítaresirahi. Vahi pítuca pivayureca —máichapa. ⁴⁸ Tásiha, emá Natanael majicapapa:

—¿Táviha pímatinenuhi?

Emá Jesús máichapa:

—Núti nímativipahi te vuíchaha máetupiacavahinehi emá Felipe eta máichuiraviyarehi, te piáviharipa te tápecu eta yucuqui higo.

⁴⁹ Tacahe, emá Natanael masuapavanepa emá Jesús. Máichapa:

—Tata Maestro, pítipa piti yátupiquene Machicha emá Viya. Píti yátupiquenévivare Reyvihi viyehe viti israelítana. Núti níjaracavapa néhicaviya —máichapa.

⁵⁰ Emá Jesús majicapapa:

—Étachucha eta juca níchiravihi eta nímairavihi te tápecu eta yucuqui, pipatsicavapa píjaracava péhicanuya. Vahi tácarichu eta juca. Pímahayareva eta apana tíamicareanapana tayehe eta juca.

⁵¹ Tásiha, emá Jesús máichahavipa vimutu:

—Éti ímahayare eta anuma téjiacayare, énapa ena ángleana tiúcupauchanuanayare núti Manerejirunuhi emá Viya —máichahavipa.

Natiarihi ena araimanayarehi eta te avasare Caná

2 Te mapanaquenepa sache eta táetavisiravahi, natiarihi ena araimanahi eta te avasare Caná te tinapaica eta Galilea. ² Tásiha, esu maena emá Jesús, ánaqui suávinehi taicha suáichuhasiquenehi ésu. Énerichuvare ticaichuhasihivare emá Jesús, vítipa viti máimitureana.

³ Tacahe, emá arayenahi tacaimamarapa téchuriacapa eta máeresahi vino. Esu maena emá Jesús suíchapa emá suchicha:

—Téchuriacanapa eta náeresahi.

⁴ Tásiha, emá Jesús majicapapa:

—Picatajicanu, mémechicha. Vuíchaha picuamesanu. Nímahaine núti te táuripa. Nútipa néchinava —máichapa.

⁵ Tásiha, suíchavacapa ena tésiricanahi:

—Tiuri, nímaháinepa éñi. Esuapayare éti eta ñivanairipiana —suíchapa.

⁶ Tacahe, tatiarihihi eta sáisihi ichapehiana tinajana, márihiana. Nayupisareana ena israelítana tayehe eta nayeherepiana. Eta táichapehivavacahi eta tinajana, cíncuhi lata eta tacavacu. ⁷ Tacahe, emá Jesús mavanecavacapa ena tésiricanahi:

—Eyana eyereca eta une. Ínicachayare eta juca tinajana —máichapa.

Tacahe, náinicajicavacapa éna eta tinajana.

⁸ Tásiha, emá Jesús mavanecavacapa:

—Tiuri puiti, eveha ániamaina, eyana íjaraca emá téchapajirica eta juca piesta —máichavacapa.

Tacahe, tiyananapa éna, níjarapanahi. ⁹ Mavehapa masamaecapa eta une, vínoripahi éta. Váhiserá máechahinehi éma távihahipuca tásihahi éta. Nacarichu ena tésiricanahi náechahi eta únerahi.

¹⁰ Tacahe, emá téchapajiricahi eta piesta máichuhapa emá arayenahi. Máichapa:

—Namutu ena achaneana te térana, tativa naera eta tíuriamapana vino. Tapaenumava te ticavahahasianapa, náerapa eta vino váhipanaichu táuriamahinehi. Pítisera, apana eta pipanereruhi. Tíúrihi eta vino píjararuhavihi tativa. Puítisera eta juca vino, tétavicavahi eta táuriamavahi. Tacachuricarinehi tamutu —máichapa.

¹¹ Eta juca táinapuiruhi tíamicare máimerecahi emá Jesús, tayehe eta avasare Caná. Ichaperinehi eta víaramirahi viti vinecapanahi eta juca máimeresirahi eta máitupajijiasiravahi. Tacahe, ichaperinehi eta visuapirahi viti máimitureanahi.

¹² Te táequenepa eta juca, viyanavarepa te apana avasare ticaijare Capernaum. Vimutupaipa, esu maena, ena maparapenaveana, vítipa viti máimitureana. Vinasipa jácani sácheana eta ánaqui. Vipaenumava viyanaya te Jerusalén.

Emá Jesús macuchuchujicavacapa ena tíjararecanahi eta sárareana, cáyureana te tajuhe eta Templo

(Mt 21.12-13; Mr 11.15-18; Lc 19.45-46)

¹³ Tacahe, eta jena sácheanahi, tiánehiripa eta Pasqua, vipestarahi viti israelítana. Emá Jesús tiyanapa tayehe eta avasare Jerusalén, vítipa viti máimitureana.

¹⁴ Te vítecapapa, viyanapa visiapahi tayehe eta Templo. Máimahainehi emá Jesús ena tísiriperecarahiana eta plata, énapa ena tíjararecanahi eta vuíyeana, eta uvesana, étapa eta palómána. ¹⁵ Eta máimairahi éna, máepiyacapa eta machicute. Máquijimuríhapa eta naplataneana te apaquehe. Máequehepuichavacapa

eta namesarana. Macuchuchujicavacapa namutu, éta-pa eta sárareana náijarareruanahi. ¹⁶ Tásiha, máichavacapa ena tíjararecanahi eta paloma:

—¡Ecuchuca eta júcana eta te juca mapenahi ema Tata! ¡Vahi étaina ícuchina éti íjararecana eta tájiparacana! —máichavacapa.

¹⁷ Tacahe, viti máimitureana, eta vímairahi eta juca, enevanerine véchava eta táechajiriruva eta Salmo tayehe eta tamuracavahi eta máichararacavahi ema ví-yarahaini David táichavenehi eta máetaviuchirahi eta máimipicauchirahi eta, mapena ema Viya.

¹⁸ Jéhesare, enurujipa titecapanapa ena tuparairucana. Nayaserecapa éma:

—¿Tájaha tacayema eta picuchusiravaca ena vichamuriana? Pímijachavahipuca vanairucavi me Viya. ¡Pímechahavi eta tíamicare te yátupihipuca pivanahi eta juca! —náichapa.

¹⁹ Ema Jesús majicapavacapa:

—Te iáqui paicayarepuca éti eta juca templo, nútisera nucaecheuca te mapanaquenéna sache —máichapa.

²⁰ Ena tuparairucana najicapavarepa:

—Cuarenta y seis año eta tayerevahi eta náepiyarirahi eta Templo. ¡Tétavacavahi eta pisiñavavaisirahi picaemuñavayarehi picaecheucayare te mapanaquenéna sache! —nacahepa.

²¹ Eta máichiravacahi ema Jesús, máechajisihahi éma eta táechepusirayare eta máquehe. ²² Eta tacahe, te tiyerehi, te táequenepa eta máechepusirapa ema Jesús te máecari, véchavahi viti máimitureana eta juca mametarapihi tayehe eta máechepusirayarehi. Eta tacahe, visuaparinehi eta táechajisihairahi eta Sagrada Escritura eta mayehe.

Ema Jesús máimati eta napanereruana ena achaneana

²³ Eta manasiraichahahi ema Jesús te Jerusalén, te Páscuamuhu, camurihi eta tíamicareana máichaqueneanahi. Camurianahivare ena achaneana tímahanahi. Tásiha, nasuapahi eta émairahi ema Cristo nacuchapaquenehi.

²⁴ Émasera vahi macasiñavahini eta nayehe taicha máimatavacahi éna, vuíchaha yátupinahini eta náehisirahi éna. ²⁵ Taicha éma, tétavacavahi eta máitupajijiasiravahi, máimatirahi tamutu eta napanereruana ena achaneana te amahe eta nasamureana.

Ema Nicodemo máejirapana ema Jesús

3 Matiarahi ema achane téhicarairicahi ena fariséoana. Ticaijare Nicodemo. Ema maca achane, tétavacavahi eta macunachacarevahi taicha máestrohi éma. ² Tacahe, eta jena yátiquenehi, ema Nicodemo tiyanapa mapaipiuchapanapahi ema Jesús. Tacahe, eta náechajirisiravahi, macahepa ema Nicodemo:

—Tata maestro, véchahi eta vanairucavihi me Viya eta juca pítesirahi pímitusirahavipanahi. Taicha nájina apanaina achane títuruequenehaimahi eta juca tíamicareana píchaqueneanahi píti —macahepa.

³ Ema Jesús majicapapa:

—Puiti numetacavi eta juca yátupiqueneana: Nácani navarahaya títujicavana tisiapana tayehe eta mávasa ema Viya, tacamunuhi náitsivachayare eta náitaresira. Te vahi yátupina eta náijarasiravaina eta máitsivachiravaca ema Espíritu Santo, vahi títujicavanaimahi tisiapana eta te mávasa ema Viya. Tímicutijiricavayarehi tíápechavanayarehi tíuchucana —máichapa.

⁴ Tacahe, ema Nicodemo vahi mácaicutiarahini eta máichirahi ema Jesús. Váhisera macuchapaimahi eta máítametasirahi ema Jesús. Ánipa macahe:

—Váiparinehi vichavaimahi eta amúyahavinahíni viti ichasiana, vichavahivarepucaini visiapahini te sujuhe esu ticachichahavi —macahepa.

⁵ Majicapavare ema Jesús:

—Pisamanuchaha. Te tíuchuca eta amuya te sujuhe esu taena, tímaticarehi eta machichairahi ema suima. Tacutiquenehi, nácani mávaháruana ema Espíritu Santo, tíápechavanayare tépanava eta náitaresiranayare, taicha machicharipahi. Nutupiruva numetacavi:

Nacarichu ena machichanaveana ema Espíritu Santo tisiapana eta mávasa ema Viya. Te tacuija eta machichairahéna éti, tájina vahi ítujicavaimahi esiapá. ⁷ Vahi picuarami eta juca níchiravihi: Táitaurevaquene ticachichaheyahehi ema Espíritu Santo.

⁸ Eta juca tímicutijiricavahi eta técatícava, tacarichu visama eta tacaemaira. Váhisera tácaecherahini. Ene nacahehi ena mávaháruanaipa ema Espíritu Santo. Nanasirichu eta náimahi. Ticaitsivaipasera eta náitaresira —máichapa ema Jesús.

⁹ Tásiha, ema Nicodemo mápechavarepa mayasereca:

—¿Tájahasica tacayema eta juca?

¹⁰ Ema Jesús máichavarepa:

—Tétavacavahi eta picunachacareva píti, taicha tíurihi eta pímitusiravacahi ena vijaneanana. Tasapihaseva vahi pímatiequenehahini eta júcana. ¹¹ Pisamanuchaha. Yátupiquene eta numétasirávihi. Tatupiruvahi eta néchajisihahi eta táichararacavanahi te anuma taicha nímahaipa. Étisera vahi esuapanuimahi eta numetasirahehi eta nímahaqueneanahi. ¹² Te cape juca sácheana, nímicutichinahehi eta táichararacavanahi te juca apaquehe tayehe eta táichararacavanahi te anuma. Étisera vahi esuapanuhini. Tavetijipa eta emasuapiranuya te nutupiruvahi numetacahe eta táichararacavanahi te anuma. ¹³ Nuti Manerejirunuhi ema Viya, nucavasahi nútí te anuma. Tásiha, núcupaicahi eta numetasiraheya. Nájina apanainahini mácani mametacahehinehi eta táichararacavanahi te anuquehe, taicha nájina nayanahini nápanahini te anuma, eta jácani náimatihini.

¹⁴ Acane, eta napaisira ena viáchucanaveanaini eta te mávapahi apaquehe, táechucapahi eta quichareana ena masuapajirairahanapahi mayehe ema Viya. Tacahe, ema víyarahaini Moisés máepiyacahi eta metal eta táimahi eta quichare. Manacahi te anuquehe eta te yucucui. Tásiha, ena achaneana táechureana eta quichare, te náesenica eta quichare máepiyaru ema

Moisés, tinaracanapahi, vahi náepenapahíni. ¹⁵ Ene nucaheyare núti apana, tinacuanayareva te anuquehe. Eta níchararacavayare apaesa nucuchucuhapahi namutu ena nácani ticasifñanuanayarepahi. Tásiha, máichecuaraquirenapa eta náitaresirayare. Tájina ticamitiequenehavacaimahi.

Emá Viya, tétavícavahi eta máemunásirahavihi

¹⁶ Taicha emá Viya, tétavícavahi eta máemunásirahavi viti achaneana te juca apaquehe. Eta máemunásirahavi, máijaracahi emá macarichuquenehi Machicha eta máucupaisirahi eta ani viyehe. Mavarahapa tíjaracahaviya máichecuaraquirénapa eta vítaresiraya vímutu viti vicasifñanahi éma. Tájina ticamitiequenehavimahi. ¹⁷ Taicha emá Viya, vahi tácahehíni eta mapanereruhi eta máucupaisirahi emá Machicha máicuñacahavíhíni viti achaneana. Étasera eta tímítecahi éma, ticuchucuhaviyare vímutu. ¹⁸ Taicha nácani ticasifñanayare emá Machicha emá Viya, vahi ticaicuñanaimahi. Nácanisera vahi nácasifñahíni éma táimicuñacavacayarehi eta naviurevanahi éna. Taicha vahi náuricahíni eta tamicauchiravacahi eta majaraiva emá Cristo táucupairuhi te juca apaquehe. Étachucha náurica eta timapicu taicha vahi návarahahíni tácaecherahíni eta náichirahi eta tauriqueneana. ²⁰ Taicha nácani tíchanahi eta tauriqueneana, nacaticha eta majaraiva emá Viya. Váiparinehi napauchaimahi, namavarairahi tacaecherahíni eta náichirahi eta tauriqueneana. ²¹ Énasera ena tisuapanahi yátupi eta máechajiriruva emá Viya, náuricayarehi napaucha eta majaraiva. Jéhesare tacaecheranasarepa eta machaneranaripahi emá Viya.

Emá Juan Tícachasiricarahi típechavavare máechajisihahi emá Jesús

²² Te táequenepa eta juca, tiyanavarepa emá Jesús, tayehe eta avasarechichana te táunava eta provincia Judea. Véhicahi viti máimitureana. Vinasipa jácani sácheana eta ánaqui. Viti máimitureana vícachasiricaripa ena achaneana tivarahanahi náehicaya emá Jesús. ²³ Tásiha, emá Juan tícachasiricahivare te jena Enón tachacayahíni eta Salim, taicha ánaqui tatiarihihi eta une. Ena achaneana napauchahi éma. Jéhesare máicachasicavacapaipahi ena tivarahanahi náinajicayare eta napecaturana. ²⁴ (Eta juca máichahi emá Juan tamirahupaichaha eta jena sache eta náeratasirayarehi éma.)

²⁵ Tacahe, te jena sácheana, ena religiósoana tiyananapa náimiyusemacavacapa ena máimitureana emá Juan, nametacahi eta vícachurisiravacahi viti máimitureana emá Jesús taicha típajumuriavapanahi ena vícachasiruanahi. ²⁶ Tacahe, eta nasemirahi ena máimitureana emá Juan, tiyananapa nametapanahi éma. Náichapa éma:

—Tata maestro, pímahaini emá maena péchajiriruhi cape te tachausi eta juca cajacure Jordán. Emá Jesús

pímijarecha Cristo, tícachasiricahi puiti éma. Jéhesare, namutuyarehíni náehica éma —náichapa.

²⁷ Tásiha, emá Juan majicapavacapa:

—Vahi ecueñamava. Emá Viya, éma téchahi eta máijaracirahi eta máitucaquenehi nácani manerejiruana. Németeaca tíjaracahi emá Viya eta máitupajiasirava emá maca Jesús. ²⁸ Éti échavahi eta numetasirahahi eta vahi nútinahíni emá Cristo. Yátupisera nucavanahíni eta nínapumirauchirayarepahi éma, numetacavaca ena achaneana natsecavahi. ²⁹ Núti nímicutijirisinahe: Te natiarihi ena araimanahi, namutu ena nacaichuhasiqueneana tíurisamureanahi eta náimairahi ena araimana. Nacunachahi emá arayena. Ene nucaherihi núti eta núrisamurevahi eta nímairahi puiti eta nacunachirahi emá Jesús. ³⁰ Éma, te jácani mapaisihayarepahi, típajucavayarepaipa eta macunachacarevaya. Éma, mapaenumavapa tépanava eta macaemataneasira emá Viya. Núti núrisamurehi tayehe éta. Núti, tiánehipa eta nítauchirainapa eta nématane. Tásiha, váhirichu nucunachacare núti —macahepa emá Juan.

Emá Jesús másihaquenehi te anuma

³¹ Emá Jesús, máimatirinehi tamutu eta táichararacavanahi te anuma taicha másihaquenehi éma te anuma. Víti achaneana víavíhahi vícavasanahe te juca apaquehe, vímatíhi étachucha eta táichararacavanahi te juca apaquehe. Émasera emá Jesús, eta másihairahi te anuma, tímatíhi tamutu, típajupanavahi eta máitupajiasiravahi. Ticachuricahavihi. ³² Éma, tímítecahi eta mametasirahavi tamutu eta máimahaqueneanahi étapa eta masamaqueneana te anuma. Nájinayarénisera nasuapahíni eta macayemaqueneanahi. ³³ Vítisera viti visuapanahi eta mametarapiana, vímatíhi eta yátupíhi eta máechajiriruvana emá Viya mámaqueneanahi emá maca Jesús. ³⁴ Taicha éma, vanairucahi me Viya, máechajisihayarehi eta máechajiriruvana emá Viya. Énerichuvare tétavícavahi eta máimicatasirahi emá Espíritu Santo taicha mávahácahi éma. ³⁵ Emá Vícaiyaquene máemunacahi emá Machicha. Eta tacahe, matuparacahi eta émairayarehi téchayare tamutu. ³⁶ Eta tacahe, nácani ticasifñanayare emá Machicha, máichecuaraquireyare eta náitaresiraya. Namutusera ena macasifñarahanahi emá Machicha emá Viya, vahi títarecanaimahi, taicha tanasíhi eta naviurevana táichavenehi eta napecaturanahi. Ticaicuñanayarehi máitavacac ayare.

Emá Jesús tíanucuha eta provincia Samaria. Ánaqui máechajicahi esu ésuna esena.

4 Tacahe, camurianahi ena tivarahanahi tíjaracavanaya náehicaya emá Víaquenu. Tásiha, viti máimitureana vícachasicavacahi éna. Émasera emá Jesús vahi máicachasiricahíni. Camuripanana ena vícachasiruana nayehe ena máicachasiruana emá Juan. Tacahe, ena fariséoana nasamairiricapa. Náramipa. Navanecapa ena tiyaserecanaya. Tacahe, te

tisamauchavapa ema Jesús eta napanereuchirahi, majunijicapa eta Judea. Tiyanapa tichavahi tayehe eta Galilea, vítipa víti.

⁴ Eta vipaisirapahi te achene, viánucuhapaipa eta te provincia Samaria. ⁵ Te la dócepa te sache eta vítecapirahi te távihahi eta nória máepiyaruihí ema víyarahaini Jacob. Máijaracasicharipahi ema machicha José eta juca mayeheni apaquehe. Eta nória, tachacayahi eta avasarechicha ticaijare Sicar. Tacahe, eta mavitairapaipahi ema Jesús, tíchecanumapa te tachausi eta nória. ⁷ Eta víchesirahi, viyanapa viti máimitureana vivacharepanayarehi eta tinicacare te avasare. Macarichuipahi ema Jesús. Sucahepainecha esu ésuna esena indigenahi samaritana tícapanayarehi. Tacahe, máechajicapa ema Jesús:

—Nuchicha, picatajicanu picajinu une —máichapa.

⁹ Tásiha, esu esena sujicapapa:

—Píti israelítavíhi. ¿Tájaha tacayema piyaseacanu eta une, nuti samarítananihi, vahi pijaneanuanahini? —suíchapa. (Ani tacahehi eta suéchajirisirahi, taicha ena israelítana énapa ena samarítanoana vahi náurianacacahini.) ¹⁰ Tásiha, ema Jesús majicapapa:

—Te pímatihini eta mavarahaqueneanahi tíjaracavi ema Viya, téhevare pímatinuhivaréni núti nuyaseacavihi eta une, németeaca piyaseacanuipahíni eta une ticaitarecarahi. Tásiha, núti níjaracavíhíni —máichapa.

¹¹ Tásiha, esu esena suíchapa:

—Tata, tíupenahi eta juca nória. Píti, tájina enurena piviyahini eta une. ¿Távihasica tásihayare eta une ticaitarecarahi eta pivarahaquenehi píjaracanu? ¹² Eñi víachucaquenéni Jacob, vímaequenéhahi eta juca nória ñépiyaruihí. Nérirarénihi eñi énapa ena ñichichanaveana. Énerichuhi táerihahi eta ñiyeheana sárareana. ¿Píti pímiyachavapuca picuchuahini eta tíúriamapana une? —suíchapa.

¹³ Ema Jesús majicapavarepa:

—Namutu nácani térana eta juca une tíápechavanyarehi timauneanaya. ¹⁴ Nácanisera téranayare eta une níjararuyarehi núti, vaipa tíápechavanaimahi timauneana. Taicha tacajurucayarehi eta náuricacareva. Tiúrinainavarepa eta náitaresira. Ticaitarecavayare máepenacacayare —máichapa.

¹⁵ Tacahe, esu esena, eta susamirahi eta máechajirivanahi, suíchapa:

—Tata, píjaracanupaini eta une ticaitarecarahi, apaesavaipa nucapechavaini numaune. Váipavare nuquitecahíni eta te juca nória népanahini une —suíchapa.

¹⁶ Ema Jesús majicapavarepa:

—Piyana, píchuhapana ema pima. Piáma eta ani.

¹⁷ Ésusera sujicapapa:

—Nájina nímaina.

Tásiha, ema Jesús máichapa:

—Pitupiruva eta juca pímetasiranuhi eta nájinairahi pímainahini. ¹⁸ Cíncoanapaipahi ena pímanaveanainihí. Tásiha puiti, ema picachanequenehi váhivare pímainahini. Pitupiruvahi eta péchajiriruvahi —máichapa.

¹⁹ Tacahe, tíramecarinehi esu esena eta susamirahi éma eta máichirahi. Tásiha, suíchapa:

—Tátachicha, németeacavihi eta pítiquenévavihi profeta. Nuvaraha pímetacanuya puiti, ¿távihapuca eta yátupiquene viyujarasirareyarehi? ²⁰ Taicha ena víachucanaveanaini samarítanoanaini eta nayujarasiraréni eta te juca táinahu eta cerro. Puíticha tanasirichuhi eta viyujarasirarehi. Étisera eti israelítana, eta emetarapí eta viyujarasirareyare ñe Viya téhenapa te Jerusalén —suíchapa.

²¹ Ema Jesús mametacapa:

—Nutupiruva numetacavi, nuchicha, ánipa táenasihayare puiti váipa tácomesaimahi íteca eyujaraca me Tata te juca táinahu eta cerro étaripa eyanahipucaini te Jerusalén. Tamutuina eta táurivayare eta eyujarasihayare. ²² Eti samarítanoana, apaesachicharichu eta ímatirahi ema Tata eyujaraurehi. Vítisera vímatihíni ema viyujaraurehi, taicha viti israelítana viti vicituparahahi víamayare eta máechajiriruvana ema Tata eta macuchucuirayare namutu ena achaneana ticasíñavanahi mayehe. ²³ Numetacaviya eta apana: Ema Tata, távihahi te anuma, jéhevare éma, yátupiquenehi Viya. Vahi mátejinahini eta maeché macutihini viti achaneana. Eta tacahe, nácani tiyujaracana mayehe, tatupiruvayarehi eta nasamure, tisuapajirahianahivare tayehe eta máechajiruvana. Vahi tácomesaimahi ticasíñarajiana. Eta juca tacaheyarehi eta mavarahaqueneanahi ema Tata eta eyujarasirayarehi —máichapa.

²⁵ Tásiha, esu esena suíchapa ema Jesús:

—Téchacarehi eta ñítecapirayare te juca apaquehe eñi Cristo, ñivaneruya eñi Viya. Téchacarehivare eta ñimetasirahavivare tamutu eta yátupiqueneanahi. ¿Píti, péchapuca tájamuhuyarepuca eta ñítecapihayare?

²⁶ Ema Jesús majicapapa:

—Nútira nuti mavanerunuhi ema Viya. Nútira ecuchapaquenenuhi —máichapa.

²⁷ Tásiha, vítecapanecha viti máimitureana. Tacahe, víaraminehi eta máechajirisiravahi eta suyehe esu esena indigenahi. Vivarahahi viyasereca esu esena tájhapuca suvaraha eta mayehe. Vivarahahivare viyasereca ema Jesús tájaha tacayema eta máechajisirahi esu esena. Váhisera vipatsicava viyaserecaini. ²⁸ Tásiha, esu esena sunaquicapa eta suyupi. Tijunapapa tiyana te avasare, sumetapanavacapa ena achaneana. Te títecapapa, suíchavacapa:

²⁹ —Yare, ímahaya eñi achane profeta. Nímatihíni tamutu eta níchaqueneanahi néjecapiravanahi. Tamutuhí ñicuchuchujisinánuhi. Núti németeaca éñiripa eñi Ñivaneruhi eñi Viya, éñiripavare eñi vicuchapaquenehi ticaijare Cristo —suíchapa.

³⁰ Éna achaneana sumetaruanahi tiyananapa náehica esu eta te mávihahi ema Jesús, náimahapanayarehi.

³¹ Eta nayerevapaichaha ena achaneana suíchuhaqueneanahi esu esena, viti máimitureana víchuhapa ema Jesús tinicanumayarehi. Víchapa:

—Tata maestro, yare pinicanuma, apaesaina piávamina.

³² Tásiha, éma tijicapahavipa:

—Núti, jucarihi eta tinicacare tanicasarehi eta náchaneva emáimatiéquenéruhi éti —máichahavipa.

³³ Tásiha, véjecapavasamurepa víti. Víchacacapa:

—¿Náenicaipapuca jácani?

³⁴ Ema Jesús máimatihí eta vipanereruanahi. Máichahavipa:

—Eta ticaitarecanuhi núti, eta nítauchirahi eta mavanairipiana ema Nucaiyaquene, taicha nuvaraha nítauchaya tamutu eta nucaemataneasira éma. ³⁵ Eta viyeherepi te véchajiriruva: “Puiti vítapa eta vévasirapa eta trigo, cuátroyare caje eta vicuchapira eta vicurujisiraya” vicahehi. Puítisera numetacahe núti: Vaipa táy-eremahi eta vicurujisirainapa. ¡Ésenica puiti te achene! Nárájapa ena achaneana ena névaraquianahi. ³⁶ Ema Tata tíjaracaheya eta ícuchiyare te ímicatacanuyare eta vicurujisira ena nani achaneana apaesa náuchucuhayare, máichecuaraquireyare eta náitaresira. Tásiha, tétavicavaya eta viúrisamureva vimutu: éti, nútipa.

³⁷ Ena achaneana, ticatisamurevanahi eta náechajirisira: “Vítira vévacahi eta vésane; apanapasera ema ticurujica” nacahehi. ³⁸ Vítisera te juca vivapinavayare. Núti níchuhahehi eta ecurujisiraya eta névaruhi. Énerichuvare nararihihi ena títapucanahi viyehe eta nacaemataneerahi eta juca. Puiti vivapinavaya eta vícuchiyare taicha vicuticacahi eta vicaemataneasirahi ema Viya —máichahavipa ema Jesús.

³⁹ Ena ticavasanihi te jena avasare, camurique-
neanahi ena tisuapanahi eta émairahi Mavaneruhi
ema Viya táichavenehi eta suíchirahi eta macuchuchujisinaquenehi tamutu eta suíchaqueneanahi. ⁴⁰ Tásiha, tiyananapa tícapahaviana. Te títecapanapa, émaquenepa nasamahi. Tásiha, náechajicapa mánasipanahini nayehe. Masuapahisera ema Jesús. Apina sache eta mayerevahi, vítipa. ⁴¹ Tacahe, eta manasipanairahi tayehe eta avasare, namutupa nasamahi eta máimiturapiana. Tacahe, camurianainehi ena tisuapanahi, téhicanahivare éma. ⁴² Tásiha, náichavarepa esu esena:

—Puiti émaquenepa visamahi. Vaipa tácarichuhini visuapahini eta pimetarapihi. Véchapa viti apanava eta émaquenérahí ema Cristo, ema vicuchapaquenehi, ema ticuchucuhahiviyare vimutu viti achaneana —náichapa.

Ema Jesús macanaraca ema machicha ema aquenuca majupahahi ema rey

⁴³ Te táequenepa eta apinaquenehi sache, tiyanavarepa ema Jesús; macaijuhe eta te provincia Galilea. Véhicapaichuhivare víti apanava. ⁴⁴ Eta mayanirayarehi eta Galilea, vahi mácasíñavahichaini eta masuapacarevainahini nayehe ena achaneana. Émarichuhi, ani macahehi eta máechajiriruvahi: “Mácani profeta, vahi tivapinavanahi eta najacpirahi ena achaneana te mávasa”. ⁴⁵ Téhesera te máitecapauchapaipa ema Jesús eta avasarechichana tinapaicanahi te Galilea, namutu

najacpahi. Taicha náimatipa éma taicha náimahapa eta tíaramicareana máichaqueneana te mávihaipa te Jerusalén te jena piéstairahi eta Pascua.

⁴⁶ Tásiha, tíapechavavarepa mayanaucha ema Jesús eta avasare Caná, te máepiyasinehi vino eta une. Te apanahivare avasare ticajare Capernaúm, matiarhihi ema majupaha ema rey. Macajumaquenehi ema machicha. ⁴⁷ Te masamairiricapa ema achane eta máitecapiraipahi ema Jesús te Caná, tiyanapa matanupanahi. Eta máichimavapa, mayaseacapa eta macatajicahini máehicavanehini te mapena, macanarapanahini ema machicha taicha ema macajumaquene tíánehiripa tépenayarehini. ⁴⁸ Émasera ema Jesús máimatipa eta masamure ema achane, tásiha, máichapa:

—Éti vahi esuapanuimahi, te vahi nímechahehi eta tíaramicareana —máichapa.

⁴⁹ Émasera ema achane máichapa:

—Picatajicanuchucha, tátachicha. Péhicanu, machu máepenacaru ema nuchichasami —máichapa.

⁵⁰ Ema Jesús majicapapa:

—Tiuri, piyana. Vahi picueñamava, ema pichicha vahi tépenaimahi. Máenahi tinaracaipahi nícha —macahepa.

Tacahe, ema achane masuapapa eta máichirahi ema Jesús. Tiyanapa tichavahi te mapena. ⁵¹ Te tíánehipaipahi títecapa te mapena, nácapapa ena macajureana. Náichapa:

—Tata, ema pichicha tinaracaipahi.

⁵² Tacahe, ema mayaserecavacapa:

—¿Tájaha hora te tinaracapa ema nuchicha?

Éna náichapa:

—Cape te la una te cáperehi, táetaviacapa eta fiebre —nacahepa.

⁵³ Tásiha, ema achane máechapa étairaichuhi eta hora eta mametasirahi ema Jesús eta manarasiraipa ema machicha. Tacahe, ichaperinehi eta masuapirahi éma, énapa éna machichanaveanahi te peti, eta émairahi ema Cristo, Mavaneruhi ema Viya.

⁵⁴ Eta juca eta tápinanehi eta tíaramicarehi máichaquenehi te Galilea, te táequenepa eta machavirahi eta te Judea.

Ema Jesús macanaraca ema achane macajumaquene eta muracaquiha, ema tíávihaí te tachacaya eta noque ticajare Betesda

5 Te táequenepa eta juca, tatiarihihi eta apanapiesta eta viúrujisirávana te Jerusalén. Tiyanavarepa ema Jesús. ² Te jena viávava, tatiarihihi eta ichape tapaja náimisiapirare eta uvesana nacaparusana. Tatiarihihivare eta ichape noque vímijarechahi Betesda. Ticayehehi cinco eta cúlerureana. ³ Eta návihahi ena nacajumaqueneana púchuquiana, masariana, énapa ena muracaquihana. Namutu éna, ticuchapanahi eta macayamurisira eta une ema ángele. Tásiha, namutu tiyanana téchipapaicavana te une, taicha tímijachavana mácani títapuca téchipaica, tacanaracayarehi eta jácani majuma. ⁵ Tacahe, matiarhihi ema achane macajumaquene. Tréintayocho

añoripahi eta macatajivairahi. ⁶ Tacahe, te tisiapa-paipahi ema Jesús, máimahapa ema achane macaju-maquene tívecahi. Máimatívare eta tayerevaipahi eta macajumairahi. Mayaserecapa:

—¿Pivaraha pinaraca, nuchicha? —máichapa.

⁷ Tásiha, ema achane majicapapa:

—Nuvaraha, tata. Nájinasera ticasianuimahi tayehe eta noque, te tiyamurica eta une. Ticachuricanuaparaca ena apamuriana nucutiqueneana nacajumaqueneana —máichapa.

⁸ Tacahe, ema Jesús máichapa:

—Pécheputa, piveha eta pímacaraji. Piyana pipaica —máichapa.

⁹ Tásiha, eta máichirahi ema Jesús, enevanerinehi tinaraca ema achane. Mavehapa eta máimacaraji.

Tiyanapa tipaica. ¹⁰ Eta sache manarasirahi ema achane, sávarumuhuhi. Ticapicahuhi eta jena sache nayehe ena israelítana. Tacahepa, te náimahapa ena tuparairucana, nacajachapa éma. Ánipa ná icha:

—¿Tájaha tacayema vahi pipicaucha puiti juca sache tacapicahuquenehi? Vahi vísapa piámahini eta pímacaraji puiti juca —náichapa.

¹¹ Ema achane majicapavacapa:

—Vahi nútina tásiha. Ema maca achane ticanaracahuhi, tivanecanuhi. Máichanuhi: “Piveha eta pímacaraji. Piyana pipaica” —máichavacapa.

¹² Tásiha, éna nayaserecapa:

—¿Nájahasica ema tivanecavihi pipaica eta piámirapahi eta pímacaraji? —náichapa.

¹³ Émasera ema achane vaipa máimatihini eta máijare ema ticanaracahi. Váipavare náetupiacacarehini ema Jesús te namuri ena camuriqueneana achaneana taicha tiyanaripahi. ¹⁴ Téhesera te táequenepa, tiyanapa ema achane eta te Templo. Ánaqui títecapavarepa ema Jesús. Te máimahapa ema Jesús ema achane macanararuhi, máichapa:

—Pímaha, vaipa picuapechava picucapecatura, machu tachavauchavi eta pijuma, máchuvare pávetiji —máichapa ema Jesús.

¹⁵ Tacahe, eta máimatirapa, ema achane tiyanapa mametapanavaca ena tuparairucana eta émairahi ema Jesús ema ticanaracahi. ¹⁶ Eta tacahe, ena tuparairucana tise-manapa. Ichaperinehi eta nacatiasirahi ema Jesús táichavenehi eta macanarasirahi te jena sache sávarumuhuhi tacapicahuquenehi. Tásiha, títecanapa, éna ticaratacanayarehini ema Jesús. Émasera máimatihini eta napanereruana. Tacahe, máichavacapa:

—Ema Tata tamutuchucha sache ticaematane. Ene nucaheyarehi nuti apana. Nítauchayare eta mavanairipiana —macahepa.

Eta nasamirahi ena tuparairucana eta máichiravacahi, navetijipaicha eta nasemirahi. Navarahapa nacapacavaneyarehi éma. Eta tiviuchahi eta macanarasesirahi te sávarumuhua, náimijachirahi máepuruhi eta nayeherepi. Tavetijipaicha eta máimicaecherachiravahi Machichairahi ema Viya, Víyairahi ema apana.

EMA JESÚS MACATUPARAHQUENEHI ME MAIYA

¹⁹ Énerichuvare ema Jesús máichavacapa:

—Nutupiruva numetacahe: Nuti Machicha ema Viya, eta nutuparahanahi mayehe, váiparinehi nútijiricavaimahi nícha jácani nuvarahaqueneanahi. Núti nímatiequenehahi tamutu eta máematanerepihi ema Ticachichanu. Étayareichuhi níchayarehi nútí. ²⁰ Taicha yátupihí eta máemunasiranuhi ema Ticachichanu. Eta tacahe, tímechanuhi tamutu eta máematanerepiana. Énerichuvare tíjaracanuyareva eta nímechiraheya eta apamuri tíaramicareana. Tiápajucavayare eta táramicarevayare, apaesa íaramirineyare, epicayareva. ²¹ Ema Tata marataha macaechepuca ena náepenaqueneana, máimichavayarehi macaitarecavacaya. Énerichuva nuti Machicha, nuratahavare nucaitareca nácani nuvarahaqueneanaya, níjaraca eta náítaresiraya. ²² Nucatuparahivare mayehe ema Tata eta nímairaya eta nacaicuñairayare namutu ena náejecapavaqueneanahi. Vaipa émainahi tícuñareca éma. ²³ Taicha mavarahahi epicauchanu nuti Machicha, tácutirichu eta epicauahirahi ema Tata. Nácanisera vahi tipicauchanuanahi nútí, váhivare napicauchaimahi ema Tata.

²⁴ Yátupiquenevare numetacahe eta juca apana. Nácani ticaquiñanayare tisuapanayare eta néchajiriruvana, nasuapavare eta nucavanahirahi mayehe ema Tata, éna títarecanayare, vaipa ticaicuñanaimahi. Taicha éna, tíuchucuhanaripa tayehe eta náicuñayaréni te yucu. Náicuchihi eta náítaresiraya. ²⁵ Tacutiquene nutupiruva numetacahe nuti Machicha ema Viya. Táitecapaquenepa puiti juca sácheana, tisamanuanayare ena achaneana, tayanapane tépenahi eta náchanevana. Te nasuapajirahipuca, nucaitarecavayare eta náchanevana. ²⁶ Taicha ema Tata namutuhi marataha macaitareca. Ene tacahe eta máijarasiranuhi nútí Machicha eta namutuyareva nurataha nucaitarecavaca. ²⁷ Énerichuvare tituparacanuhi eta nícuñasiravacayarehivare taicha yátupiquenenuhi manerejirunuhi. ²⁸ Vahi ecuarami eta juca numetasirahéhi. Járajapa eta sácheyare eta nasamirayare namutu ena náepenaqueneana eta nahu nútí. ²⁹ Téchepecanainapa namutu te náecariana. Nácani tíchanahi eta táuriqueneana, títarecanainapa. Énasera ena tíchanahi eta tauriqueneana, ticaicuñanainapa.

EMA JESÚS MÁIMERECALTA MAIVANAHIRAHÍ ME VIYA

³⁰ Nútí vahi nútijiricaváimahi nícuñareca. Nucuchapayarehi eta mavanairipi ema Tata, ema tivanecanuhi. Tacahe, te nícuñareca, vahi numapachichijicaimahi, tatupiruvayarehi nícha. Taicha tacahehi eta mavarahaquenehi ema Tata. ³¹ Te nácarichu nútí nútijiruvainachuchaini eta nímereruanahi, vahi tácomesahini esuapanuhini. ³² Váhisera nucarichuimahi, taicha matiaríhihi ema apana títametasinanuhi, émaripa ema Juan Tícachasiricarahi. Nímatihini nútí eta matupiruvahi eta máichaqueneanahi eta tímereuchanuhi. ³³ Éti ecavanairipia nayasereca ema Juan te nájahanu-

hipuca núti. Matupiruvahisera éma eta majicapiravacahi eta nútiqueneipahi éma ecuchapaquenehi. ³⁴ Váhisera étaparacaimahi eta juca eta matiarahirahi eta tímereuchanuhi. Eta ticamunucarepanahi eta esuapiranuina apaesa iúchucuhaiya éti nicha núti. ³⁵ Ema Juan tímicitijiricavahi timícauchahehi tayehe eta mametarapihi eta eyehe, te jena sácheanahi esamararasirahi éma. Iúrisamureinehi ichape, taicha eta tamicauchirahehi eta máechajiriruva. ³⁶ Váhisera mácarichu eta máimicaecherachiranuhi eta Juan. Jararihi eta apana táimicaecherachiranuhi, tiápajupanavahi eta táramicareva. Taicha núti nicha eta némata-nerepiana máijjarunuhi eta Tata. ³⁷ Émaripa eta Tata tivanecanuhi. Éma, vahi macutihémahi éti achaneana. Vahi esamahini eta mahu, váhivare ímahaimahi eta máquehe. Téhesera te jena Sagrada Escritura, timetacahéhi eta nítecapiraya. ³⁸ Éti vahi evarahahini esuapanuhini nuti mavaneruhi éma. Éta tímereuchahehi eta váhivare iúnacahini eta máechajiriruvana te esamureana. ³⁹ Éti, tamapuruji eta ecaravahuirahi eta Sagrada Escritura. Ímijacharipapuca eta ticaitarecaheyarehi. Váhisera ímatiequenehahini, váhivare ácaicutiarahini eta nútirahi táechajisihahi núti nucaitarecayarehi. ⁴⁰ Tacutiquene vahi ávarahahini epauchanuhi éti, níjaracahehini eta ítaresiraya máitavacacainahini.

⁴¹ Núti vahi nácomesa nacunachanuhi ena achaneana. ⁴² Títecapa, nímatihvacahi emutu éti eta emaemunasirahi eta Viya. ⁴³ Núti nuvanecasivarichuhi me Tata eta nítesirahi. Étisera vahi esuapanuhini, váhivare ejacapanuhini. Téhesera te máitecahíni mácani apana achane, tímijachavapuca Cristo eta ecuchapaquenehi, masapihapucaini eta tisuapacarehini eta eyehe. ⁴⁴ Éti, vahi esuapanuhini taicha eta evarairahi ecunachacareva ena achaneana. Esapihachucha éti vahi ávarahahini ecunachacare me Viya. ⁴⁵ Váhisera nútinayare numetauchahe eta me Tata. Máimahaherinepa eta Moisés. Éma timetauchaheyare. Éti ímijachavahi ticuchucaheyare eta evarairahi ítaucha eta mavanairipiana éma. Tamapurujihisamisera. ⁴⁶ Te yátupinahini esuapahini eta mametarapiana eta Moiséini, esuapanuhivarepucaini nútí táechajisihaquenehi eta májureanahi eta Moiséini. ⁴⁷ Váhisera esuapahini eta májuchaqueneanahi éma. Tavetijipa eta emasuapiranuhi eta juca numetarapiana eyehe —macahepa eta Jesús.

Ema Jesús máitaparajahi máenicavaca ena camuriqueneana achaneana

(Mt 14.13-21; Mr 6.30-44; Lc 9.10-17)

6 Te táequenepa, te jena sácheana tiánehípa eta Pascua, pipiestarasahi viti israelítana. Émasera eta Jesús, tianavarepa tiámahavivare eta viánuecahi eta cáquiure Galilea (ticaijarehivare Tiberias). Camuriasera ena achaneana tipaicanapahi téhicanapahi éma, taicha eta náimairahi eta tiáramicareana máichaqueneanahi eta macanarasiravacahi ena nacajumaqueneana. Te vítecapapa te apachara,

viyanapa te jácani anuquerehi mávapahi. Tacahe, véjaca vinaracayarehi. ⁵ Téhesera te máimahapa eta Jesús ena camuriana achaneana eta náitecapauchirahi, máichapa eta vichamuri Felipe:

—¿Távihapucaini vivacharesihaini eta tinicacare vénisihahini namutu ena nani achaneana? —máichapa.

⁶ Eta juca mayaseresirahi étachuchanéni eta mavarairahi éma macaicutiarayarehi te tájahapuca macayemayarehi eta Felipe. Taicha eta Jesús máechahi eta máichaqueneayarehi. ⁷ Tásiha eta Felipe majicapapa:

—Tacamunuhi vácayehéhini eta camuri plata apaesa namutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —macahepa.

⁸ Tásiha, téchajicapa eta nuchamuri Andrés, maparapehi eta Pedro. Máichapa:

⁹ —Mararihi ani eta émana amaperu tiámapahi eta cínochichapahi eta pan, apinapa eta jima. ¡Váiparinehisera nárataimahi ena nani camuriqueneana achaneana! —macahepa.

¹⁰ Émasera eta Jesús máichahavipa:

—Evaneca náejahapaica námutu ena achaneana —macahepa.

Taicha tiúrinapahichíchahi eta apaquehe, muíjipahivare. Cinco mil eta náichapemurivahi ena ajairana. Vahi náimitupachahini ena esenana énapa ena amaperuana. ¹¹ Tacahe, eta Jesús mavehapa eta páneana. Te tamutupa eta mahasulupayachirahi eta Viya, tíjaracahavipa. Véniricapa víti, víjaracavacapaipa eta pan étapa eta jima. Tisimurivacapaipahi eta víjara-ca. ¹² Tinicanapa namutu. Tisatuheanapa, nacaemacharichahavare. Tásiha, eta Jesús máichahavivarepa: —Ecurujica eta náemacharajianahi, machu támapurují —macahepa.

¹³ Tásiha, víti vicurujicapa eta pan náemacharajianahi. Táinicachaichahavare eta dócehiquene ichapehiana saye. ¹⁴ Tacahe, eta náimairahi ena achaneana eta juca máichaqueneanahi eta Jesús, ichaperinehi nárami. Tásiha, nacahepa:

—Émaripa eta maca profeta eta vicuchapaquenehi máiteruyarehi te juca apaquehe —nacahepa.

¹⁵ Eta tacahe, navarahapa námayarehini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tyanapa macarichuhi te tápusi eta cerro.

Ema Jesús mapaicaeca eta une

(Mt 14.22-27; Mr 6.45-52)

¹⁶ Tacahe, te jena cáperehichichapa, viyanapa viti máimitureana tayehe eta cáquiure. ¹⁷ Te vítecapapa, viávacuhapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Ema Jesús májinahi macachanehavipahini. ¹⁸ Eta vipaisirapahi, tachimaracapa eta muraca técaticava. Tépacucapa muraca eta cáquiure. ¹⁹ Cinco kilómetroipahi eta viyerehivahi, vétupieca-

paipahi, te vímahapa ema Jesús. Mapaicaecapaipahi eta une, tipauchahavipaipa. Víti vipicapa eta vímairahi.
²⁰ Émasera máichahavipa:

—Vahi ecupicanu. Nútichucha.

²¹ Tacahe, vímatipa éma. Viúrisamuréinehi eta vijacapi-
 pirahi eta mávacuirapa eta te vipacure. Tásiha, víteca-
 panecha eta te vicaijuheharehi.

Ena achaneana natanujiricaipahi ema Jesús

²² Te apanapa sache, ena achaneana manaqui-
 ruanahi ema Jesús, natanujiricaipahi éma. Náimatiaca-
 pa eta vicarichuirahi viánueca viti máimitureana.
 Tájinahivare apanainahini pacure. ²³ Tásiha, tacahe-
 painecha eta apana pacureana, nayehahi ena tíasi-
 hanahi te avasare Tiberias. Títecanapa te tachacaya
 eta nanisinehi eta pan ena camuriqueneana
 achaneana. ²⁴ Tacahe, ena achaneana eta na-
 maimairahi ema Jesús vítipa viti máimitureana,
 tiávacuhanapa te pacureana. Tiyananapa ticapayaca-
 havianayarehi te Capernaum, natanusirapahi ema
 Jesús.

Ena Jesús ticaitarecarahi

²⁵ Te títecanapa ena achaneana te apachara, náe-
 tupiacapa ema Jesús. Tásiha, nayaserecapa:

—Tata maestro, ¿tájamuhu pítecapahi eta ani?
 —náichapa.

²⁶ Ema Jesús majicapavacapa:

—Nutupiruva numetacahe: Eti etanucanupahi
 táichavenehi eta nénisirahehi nésatuhechirahehi.
 Váhisera ácaicutiarahini eta nímechirahehi eta tíarami-
 careana. ²⁷ Eti tamapurujipa eta ecañamarasiravahi
 etanuca eta enicaquenerepi taicha títavayarehi.
 Tatuparacahisera etanucayare eta tinicacare ticaitare-
 caheyarehi, máitavacacahi éta. Étara eta juca níjararu-
 heyarehi nuti Manerejirunuhi ema Viya. Éta tímereu-
 chanuhi eta yátupirahi nuanecasivahi eta mayehe
 ema Tata —máichavacapa.

²⁸ Tacahe, éna nayaserecapa:

—¿Tájahapucaini eta mavarahaqueneanahi ema Viya
 eta vicaemataneasirahi éma? —nacahepa.

²⁹ Ema Jesús majicapavacapa:

—Eta mavarahaqueneanahi ema Viya íchaque-
 neyare, esuapanuyare nuti mavanerunuhi —maca-
 hepa.

³⁰ Tásiha, ena nayaserecavarepa:

—¿Tájahasica eta tíaramicare pímechahaviyare apae-
 sa visuapavipa? Vivaraha vímaha. ³¹ Eta acane ema ví-
 yarahaini Moisés tíjaracavacahi ena viáchucaque-
 neanaini tinicanahi eta ticaijare maná, ánaqui te
 apaquehe mávapahi. Taicha tacahehi eta táechajiri-
 ruvahi eta Sagrada Escritura ani tacahehi: “Máenica-
 vacahi eta tinicacare tíasiha te anuma”. Piti, ¿pímija-
 chavapa pirataha picachurica ema víyarahaini Moisés?
 —nacahepa.

³² Ema Jesús majicapavacapa:

—Nutupiruvavare numetacahe. Éti, ichape eta éjeca-
 pirava. Ema víyarahaini Moisés, vahi émainahini
 macucupaicahini eta maná. Ema Tata, émahí ticucu-
 paicahi eta maná. ³³ Jararihi eta apana numetarapi
 eyehe: Puiti ema Tata mavaraha máijaracaheya eta
 yátupiquenehi tinicacarehi. Étaripa tinicacarehi tíasi-
 hahi te anuma ticaitarecavacayarehi namutu nácani
 tijacapanaya. Étara eta tímitecanuhi —macahepa.

³⁴ Tásiha, najicapapa éna:

—Tata maestro, piyaseasinahavi ema Viya máijaraca-
 havipaini máejehainahini eta tinicacare péchajisiha-
 quenehi —náichapa.

³⁵ Tásiha, éma máichavarepa:

—Nútira eta yátupiquene tinicacare nucaitarecahe-
 yarehi. Eta tacahe, nácani tisuapanuanayare, vaipa
 tíapechavanaimahi técuhana. Váipavare timaunea-
 naimahi. ³⁶ Étatera eta níchaquene, ímahanuipani
 éti, váhisera esuapanuhini. ³⁷ Nuvaraha ácaicutiara-
 quenéna yátupina. Namutu nácani tipauchanua-
 nayare, núti vahi névatajicavacáimahi taicha tásiha-
 quenéichuhi me Tata eta máijarasiranuhi éna. ³⁸ Taicha
 núti, eta núcupaisirahi te anuma, tímitecanuhi
 nítauchayarehi eta mavanairipiana ema Tata. Vahi
 nútijiruvainahini eta nítesirahi níhayarehi eta
 nuvarahaquenenahini núti. ³⁹ Eta mavarahaquenehi
 ema Tata eta mavanésiranuhi, nucaitarecayarehi ná-
 cani máijararunuanayarehi éma. Nácani tésenicanua-
 nayare nuti Machicha, tisuapanuanayarevare,
 máichecuaraquireyare eta náitaresiraya te nucaeche-
 pucapa éna te náecariana te jena sache táitecapapa
 eta népaníravacayare. Váhiquene nucamitiacaimahi
 ema émanaimahi —máichavacapa.

⁴¹ Tásiha, nararihi ena ticaecahirahiana eta máichira-
 vacahi ema Jesús eta émairahi eta yátupiquene tini-
 cacare, máucupairuhi te anuma, ticaitarecarahiyare.

⁴² Ánipa náichacacahi:

—Tépiyahirahipa ema maca. Víti, vímatihi ema
 maiya, ticaijare José. Énerichuvare vímatihivare esu
 máena. ¿Tájaha tacayema eta macahechajiruvahi eta
 másihairahi te anuma? —nacahepa.

⁴³ Ema Jesús máichavacapa:

—Ámatina. ¿Tájaha tacayema épururahi?

⁴⁴ Nacarichu témunahiricavanaya tipauchanuana ná-
 cani máichuhaqueneanahi ema Tata. Eta tacahe, ena
 máichuhaqueneanayarehi éma, nucaechepucava-
 cayare núti te táitecapapa eta sache népaníravacayare
 núti. ⁴⁵ Taicha tacahehi eta májurehi ema profeta ví-
 yarahaini Isaías, ani tacahehi: “Náimitucasivaya-
 reichuhi me Viya namutu ena achaneana”. Tacahe, na-
 mutu ena máimitureana ema Tata, énarapa tipauchanua-
 nayare puiti. ⁴⁶ Tayanapane váhihinéni náimahaimahi
 eta mamira ema Tata. Nucarichu núti nímahapa éma
 taicha étaquenehi eta násinehi eta mayehe. ⁴⁷ Nutupi-
 ruvahi numetacahe: Nácani tisuapanuanayare, níjara-
 cayare eta náitaresirayare máitavacacayare. ⁴⁸ Núti,
 yátupiquenehi eta nucaitaresiravacahi ena ticasaña-
 vanahi eta nuyehe tacuti eta tinicacare tacaitarecahi
 eta viáqueheana. ⁴⁹ Éti, ena íachucanaveanaini tini-

canahi eta maná te mávapai apaquehe. Váhisera náitarecahini. Namutuhi tépenaracá nahí. ⁵⁰ Nácanisera tinicanahi eta néche, vahi tépenanaimahi. Taicha núti núcupaicaripa te anuma. Eta neche, yátupiquenehi tinicacarehi ticaitarecarahi. Nácani tinicanayare eta neche, máichecuaraquireyare eta náitaresiraya. Núti níjaracayare eta neche taicha nuvaraha tacaitarecavacahini namutu ena achaneana —máichavacapa.

⁵² Tásiha, ena natiarihiqueneana tiácapaemajiricácanapa. Ena apamuriana, ánipa nacahe:

—¿Tájahapuca macayemahi eta máijarasirahavi eta maeché viniruyarehi?

Ena apamuriana, ánipa nacahe:

—Vaipa tétupicava eta juca mapanereruhi. Mavaraha vinicayarecacha eta máechenaváji —nacahepa.

⁵³ Émasera ema Jesús máichavarepa:

—Nutupiruva numetacahe: Te épuruhipuca enica eta neche, nuti Manerejirunuhi ema Viya, te épuruhivarepuca éra eta nítine, vahi ítarecaimahi. ⁵⁴ Taicha nácani tinicanayare eta neche, téranayareva eta nítine, éna máichecuaraquireyare eta náitaresira. Tásiha, núti nucaechepucavacayare te náecariana te jena sache népaniravacayare. ⁵⁵ Taicha eta neche yátupiquenehi tinicacare tacaitarecarahi. Énerichuhi eta nítine, yátupiquenehivare téracare ticaitarecarahi. ⁵⁶ Esamanuchaha. Nácani tinicanayare eta neche, téranayareva eta nítine, éna tiávahácanuanayarehi núti. Tásiha, núti návahácvacayareva éna. ⁵⁷ Taicha ene nucahehi núti, tiávahácanuhi ema Tata. Tásiha, núti návahácvahivare éma. Máitavacacahi eta máitaresira. Éma ticaitarecanuhi. Tivanecanuhivare nucaitarecaheyarehi. Tásiha, nácani tinicanayare eta neche, máitavacacayare eta náitaresira nícha. ⁵⁸ Núti núcupaicahi te anuma eta níjarasiraheyarehi eta juca yátupiquenehi tinicacare. Vahi tácutihi eta maná nanicaquenehi ena iáchucanaveanaini éti. Tépenaracanárichuchaséra. Énasera ena tinicanayare eta neche, máichecuaraquireyare eta náitaresiraya —máichavacapa.

⁵⁹ Tamutu eta juca máimiturapiana ema Jesús te mávihaipahi te náurujisirareva ticaijare sínagoga tayehe eta jena avasare Capernaum.

Tacarichu eta máimiturapiana ema Jesús ticaitarerahi te visuapa

⁶⁰ Tacahe, ena téhicanahi ema Jesús, eta nasamirahi eta juca máimiturapianahi, camuriana ena vaipa návarahahini náehica. Ánipa nacahe:

—Ticajerapicha eta vicaicutiarirainahini eta juca máimiturapiana. Nájinavare tisuapanaimahi —nacahepa.

⁶¹ Émasera ema Jesús máimatihí eta napaneruanahi eta namavarairaripa náimiyannahini náehicahini. Tacahe, máichavacapa:

—Páurehehi éti eta evaraha ínajica eta éhisiranu taicha eta emacicutiarairahi eta nímiturapianahi. ⁶² Németeaca ímianavaichucha eta emasuapajiraivahi, tayanapanepuca ímahanupuca eta nárairaya nuchavirayarehi te anuma, te návinehi acane, taicha

núti Manerejirunuhi ema Viya. ⁶³ Ácaicutiara eta nucayemaquenehi. Vahi étaparacaini eta néchaquene. Eta juca nímiturapiana, te esuapapa, étara ticaitarecaheya taicha yátupiquenerihi. ⁶⁴ ¡Páurehehi eti váhiquenehi evarahahini esuapanu! —máichavacapa.

—Puiti, evaraha ínajicanu. Eta tacahehi eta níchirahehi: “Nacarichu témunahiricavanaya tipauchanuana nácani máichuhaqueneanahi ema Tata” —máichavacapa.

⁶⁶ Eta nasamirahi eta nacayemaqueneanahi, tínajicavanapa ena camuriqueneanainihi. Vaipa náimiyannahini náehicahini ema Jesús. ⁶⁷ Tacahe, tiyaserecavahipa viti dócequeneana máimitureanahi. Máichahavipa:

—¿Evarahainapapuca ejunijicanuyare éti apanavare? ⁶⁸ Tacahe, ema Simón Pedro majicapapa: —Tata maestro, vahi vijunijicavimahi, taicha nájina pácuti eta péchajiruvana. Tétavicavahi eta tacaitarecaravahi. ⁶⁹ Viti vitupiruvahi eta visuapiravihi. Véchahivare eta yátupiquenévavihi Cristo, Machichaquenévavihi ema yátupiquenehi Viya —máichapa.

⁷⁰ Ema Jesús majicapapa: —Dócehehinéni eti nunerejiruanahi. Mararihsera ema émana te etaracu, ema mávaháruhi ema Váinaraji —máichahavipa.

⁷¹ Ema Jesús, máechajisihahi ema Júlasí. Taicha ema Jesús máimatihí eta émairayarehi tíjarareca, tayanapanéna éma vidocenénihí viti apóstoleana.

Ena maparapenaveana ema Jesús váhivare nasuapa

7 Tacahe, ema Jesús tímiyanapaipahi tipaicapaipahi eta avasareana te tinapaica eta Galilea. Vahi mavarahahini machavahini tayehe eta avasareana tinapaica eta Judea, taicha ena tuparairucanahi te Jerusalén napanerechaipahi nacapacayarehi éma.

² Tacahe, te jena sácheanahi, tiánehipa eta vapiestara viti israelítana eta vicapenahuyavacahi eta viyusujiana. Étahi eta vítecapihavacahi te Jerusalén, vihasulupayacha me Viya eta macajurusinahavihi eta visucureana te véसानeana. ³ Tiuri puiti, natiarihíhi ena maparapenaveana ema Jesús. Tacahe, náichapa éma:

—Te pímiyachava pítira máestrovi, vahi pánasi eta te ani. Piyana te Judea, apaesa ena pímitureana tiávihanahi ánaqui náimaha eta píchaqueneanayare.

⁴ Taicha te pivarahahipuca náimativi ena achaneana, tacamunuhi pímerrecava yátupina te namirahu namutu. Vahi picuyumuruca eta pítucaqueneana —náichapa.

⁵ Taicha ena maparapenaveana váhiquenevare nasuapahini éma. ⁶ Tacahe, ema Jesús máichavacapa:

—Vuíchaha táitecapauchanuhini eta nuyanirayare te Jerusalén. Étiserá tamutuchucha tiuri eta eyaniraina.

⁷ Nútisera ticatichanuanahi ena achaneana táichavenehi eta nímereuchiravacahi eta náichaqueaneana tamauriqueneana. Étiserá vahi ticatichahea-

naimahi taicha tájina taviuchahehini. ⁸ Te evarahapuca, eyana éti te piesta. Nútisera vuíchaha nuyanaimahi taicha vuíchaha táitecapauchanuhini eta nuyanirayare —máichavacapa.

⁹ Máevatacahi ema Jesús ena maparapenaveana, émasera ticaequenehavapa. Manasipanaichaha te Galilea.

Ena Jesús tiyanarichuchanéni tayehe eta piesta

¹⁰ Te tiyananapa te piesta ena maparapenaveana ema Jesús, énerichuvaréni éma tiyanavarepa. Váhisera máimerecavahichaini. ¹¹ Énasera ena tuparairucana natanucaipa éma, te jena piéstaquenehi. Tásiha, nacahepa:

—¿Macáñárihipucacacha ema mácani achane? —nacahepa.

¹² Énerichuvare ena achaneana natiarihiqueneanahi te piesta, náechajisihahi éma. Ánipa nacahehi: “Vahi tiuri ema maena achane. Macaetemavaca ena achaneana”. Ena apamuriana ánivare nacahe: “Tiúrihi ema maca. Vémeteaca tétavicava eta máurivahi”.

¹³ Váhisera nacuchujipicahini eta nacayemaqueneanahi taicha tipicacaracavanarichucha nayehe ena tuparairucana.

¹⁴ Te enumuhuquenepa eta piesta, mapaenumavapa tímerecava ema Jesús. Tiyanapa tisiapahi tayehe eta Templo. Tinahacavapa tímiturecachi. ¹⁵ Ichape eta náramirahi ena tuparairucana, eta náimairahi eta máitusirahi yátupi. Tásiha, ánipa nacahehi:

—Ema maca vahi vímiturenahini. ¿Táviha maviyahi eta máitucaquenehi ema maca? Vahi mávamirahuini eta máimitusiravacahi ena achaneana —nacahepa.

¹⁶ Émasera ema Jesús máimatihini eta napaneruranahi. Tacahe, máichavacapa:

—Vahi nútijiriruvaina nuvehahini te nuchuti eta juca nímiturapianahi. Ema Tata tivanecanuhi, émahini tituparacanuhi eta nímitusiraya eta máimiturapiana. ¹⁷ Te etiarihinapuca eti evarahahi ítaucha eta mavanairipiana ema Viya, ímatiacavaneyare eta juca nímiturapianahi étairahi tiásihahi eta me Viya. Vahi nútijiricávainahini eta nímitusirahi. ¹⁸ Mácani achane émajiricavahi téchajisihava, mavarairahi ticunachacareyarehi. Nútisera, eta nuvarairahi ecunachayare ema Tata tivanecanuhi, vahi népiyahirahimahi. Nutupiruvahi néchajisiha eta yátupiqueneana tisuapacareana.

¹⁹ Échavarichu éti eta máijarasirahehi ema víyarahaini Moisés eta mavanairipiana éhiruyarehi. Váhisera ítauchahini éti émanainahini. ¿Tájahasica eta nuviureva eta evarairahi ecapacanu? —máichavacapa ena tuparairucana.

²⁰ Ena achaneana najicapapa:

—¡Péjecapava píti eta pipanereru! ¡Máurishivipapuca píti! ¿Nájaha ticahehi eta vivarairahi vicapacavi? —náichapa.

²¹ Ema Jesús tímiyanava téchajiricava nayehe ena tuparairucana, ánipa máicha:

—Táichavenehi eta nípuresirahi te jena sache tacapihahuquenehi sávarumuhuquenehi, éta tivichuanuhi

ichape eta eyehe. ²² Étiyapa epamicavahi eta emar-chiraya mácani amuya ajaira te óchopa eta masacherahi, tayanapane sávarumuhupuca. Taicha ichape evaraha ítauchayare eta mayeherepini ema víyarahaini Moisés. (Váhisera émainahini máinapucahini manacuchahini eta juca eyeherepi. Ema viáchucaini Abraham énapa ena machichanaveana títapucanahi nanacucha eta viyeherepiyarehi.) ²³ Te tiúrihi ímaha eta emar-chirahi mácani amuya alauchu te sávarumuhuana, ítauchirapaipahi eta mavanairipi ema Moisés, tatuparacahe vahi ecusemahini eta nuyehe táichavenehi eta nucanarasirahi ema maca achane te sávarumuhu.

²⁴ Vahi ecuémunanásicava eta epanereruana. Epanerechinava tayehe eta táuriqueneana. Ácaicutiara eta táurivahi eta vicanarasirahi ena achaneana, tayapanepa eta sávarumuhupuca —máichavacapa.

Ena Jesús máechajisihapa eta másinehi

²⁵ Tacahe, natiarihi ena tinerejicavana ena ticavasanahi te Jerusalén, nacahepa éna:

—Ema maca, émara ema natanujirirua ena tuparairucana, ema navarahaquenehi nacapaca táichavenehi eta máimijachirava ema Cristo mavaneruhi ema Viya. ²⁶ Ímahasera éma, vahi mapicacacavahini eta macametarairuirahi te juca Templo. Nájinavare ena tuparairucana náijaracavahini nacaratatahini. Nájinavare nacamatinaahini. ¿Nasuapari-papuca puiti éna, eta émairahi ema Cristo? ²⁷ Vémetecasera vuíchaha émaina ema Cristo, taicha vímatihini ema maca, étapa eta máuchusinehi. Te máitecapa ema yátupiquene Cristo, nájina téchaimahi távihapuca eta máuchusihayare —nacahepa.

²⁸ Émasera ema Jesús máimatihini eta napanereruana. Tásiha, muracapanapa eta máechajisirahi eta te Templo máimituresirahi. Ánipa macahe:

—¡Éti ímijachava ímatinuhi, étapa eta núchusinehi! ¡Váhisera ímati eta tímitecanuhi! ¡Váhivare ímati ema Eternoquenehi, ema tivanecanuhi! Núti, vahi nútijiriruvainahini eta nítesirahi. ²⁹ Nútisera nímatihini éma taicha étaquenehi násinehi eta mayehe eta nítecapauchiraheni —máichavacapa.

³⁰ Eta nasamirahi éna tuparairucana, tiápajupanavahi eta nasemanevahi. Navarahapa nacaratatayarehini, náeratatacapaini, vuíchahasera máisapahini ema Viya eta nacaratasira éma. ³¹ Natiarihisera camuriana ena tisuapanahi. Tásiha, nacahepa:

—¡Víti vémeteaca émaripa ema Cristo ema maca! ¡Taicha nájina mácuti eta máichirahi eta tiáramicareana máichaqueneanahi ema maca! —nacahepa.

Ena tuparairucana náevatacapa ena suntaruana nacaratapanayarehi ema Jesús

³² Ena fariséoana nasamaemachapa ena achaneana eta nacunachirahi ema Jesús. Tásiha, napanereuchavanepa ticurujicacanapa ena tuparairucana. Náevatacapa ena suntaruana nacaratapanayarehi ema Jesús te

Templo te mávihahi. ³³ Tacahe, ema Jesús máichavaca-
—ena suntaruana:

—Vuíchaha tituparacahe eta ecaratacanuhini. Yá-
tupisera ánipirine eta nucaheyare eta eyehe. Tásiha,
nuchavainapa mayehe eta tivanecanuhi. ³⁴ Éti, etanu-
canuinapa, váhisera íchimavanuimahi. Taicha vahi ítuji-
cavaimahi ecapayacanu te návihayare núti
—máichavacapa.

³⁵ Tacahe, ena ticatianacanahi tiyaserejiricanapa.
Ánipa nacahe:

—¿Távihapapuca macaijuhénapa eta vaipa virata-
haimahi vicapayacaimahi víti? ¿Mavarahapuca tiyana-
yare te tayerehiquene avasare, macapayacaya ena vi-
janeanana israelítana tiávihanahi te tayerehiquene?
¿Mavarahapuca máimitucayare ena apavasanana?

³⁶ ¿Tájahapucáji tacayemahi eta juca máechajiriruvahi
eta vaipa viratahaimahi vicapayaca te jácani macaiju-
heyare? —nacahepa.

**Tétavicavayare eta viúricacarevana maicha ema Jesús,
tacutiya eta ichape cajacure táuchurehi eta máriana.
Ticaitarecahaviya éma.**

³⁷ Te jena téqueneha sache eta piéstairahi, tímahaca-
repana eta jena sache. Tiyanavarepa ema Jesús te na-
muri ena achaneana. Titupihapa, téchajicapa muraca.
Ánipa macahe:

—Te natiarihinapuca nácani timauneanahi, náiteca-
pauchanu. Núti níjaracayare eta náerayare nácani
tisuapanuanayare —macahepa.

³⁸ Taicha ani tacahehi eta Sagrada Escritura: “Ema
Mavanneruhi ema Viya, tétavicavaya eta viúricaca-
revana máicha, tacutiya eta ichape cajacure táuchure-
hi eta te máriana. Ticaitarecahaviya éma” tacahepa.

³⁹ Eta juca macayemaqueneanahi ema Jesús,
máimicaecherachahi eta masiapahasiravacayarehi
ema Espíritu Santo te nasamureana nácani tisuapana-
yarehi éma. Vuíchahasera táitachavahini, taicha
vuíchaha machavahini mápanahini te mávasa te anu-
ma ema Jesús.

**Apanapanepa eta napanereruanahi ena achaneana
mayehe ema Jesús**

⁴⁰ Tacahe, ena achaneana apanapanepa eta napane-
reruana mayehe ema Jesús. Ena apamuriana
achaneana, nacunachapa éma. Ánipa nacahe:

—Yátupiquene ema maca achane, émaripa ema pro-
feta ema vicuchapaquenehi máiteruyarehi.

Ena apamuriana, ánivare nacahe:

—Émaripa ema maca ema Cristo.

Énaserá ena apamuriana, téjcapavanarichucha. Áni-
pa nacahe:

—Galileo ema maca Jesús. Váiparinehiséra étainahi
máuchusiha ema Cristo tayehe eta avasare Galilea.
Taicha eta Sagrada Escritura táechajisihahi ema Cristo
émayarehi mámariequeneyarehi ema víyahaini Rey
David. Téhesera te avasare Belén eta máuchusihayare,

étaichuhi te mávasahi ema víyahaini Rey David
—nacahepa.

⁴⁴ Natiarihihivare ena apamuriana navarahaichucha
náemeratacayarehi, váhisera napatsicavahini nacara-
takahini.

**Ena tuparairucana vahi náurica eta nasuapirahi ema
Jesús ena achaneana**

⁴⁵ Tacahe, ena suntaruana vanairucanahi tichavana-
pa nayehe ena tivanecanahi tuparairucanahi. Vahi
náijaracavahini nacaratatahina éma. Tacahe, náichapa
ena tuparairucana:

—¿Tájaha tacayema vahi íamapahini éma?

⁴⁶ Ena suntaruana najicapapa:

—Víti vahi vipatsicavahini vicaratatahina éma, taicha
tétavicava eta máitupajijiasirava ema maca. Émahipu-
ca ema Cristo vicuchapaquenehi. Nájina mácuti eta
máechajisira ema maca achane —nacahepa.

⁴⁷ Tacahe, ena fariséoana náichapa:

—¡Éti apanavare ísapavaipahi tivayuaracahe ema
mácara! ⁴⁸ Nájina émanaina ema tuparairuca viyehe vi-
ti nasuapahini ema máenatataji. Váhvare émanaripa
vichamuri fariséo, vahi masuapahini. ⁴⁹ Énaserá ena
nani achanetatajiana máimatirahanahi eta viyehe ley,
náehicávanetatajipa. Táurica nacaiçuñahini táicha
—nacahepa.

⁵⁰ Matiarhihivare ema Nicodemo, ema tipaipiuchahi
ema Jesús te jena yátiquenehi. Fariséohivare éma.
Máichavacapa:

⁵¹ —Váiparinehi vétavicaímahi eta viyehe ley vítijirica-
vahini vicapacahini ema achane. Tacamunuhi véchanu-
mayarehi eta maviurevahi —macahepa.

⁵² Éna najicapapa:

—Vémeteaca píti apanavare pijaneanahipuca éma,
pítirichupuca galiléovihi. Vivanecavi péchajicuha eta
Sagrada Escritura apaesa pecha vahi étaimahi te
Galilea máuchusihayare ema profeta Cristo vicucha-
paquene —nacahepa.

⁵³ Tacahe, te títapiricanapa eta náechajisihairahi ema
Jesús, téjanerecanapa. Tiyanaracanapa te napenana.

Esu esena ticayepahi

8 Ema Jesús májinaripahi. Tiyanaripa te tachachacu
eta avasare, te cerro ticaijarehi Olivoquiji. Tatiari-
hihi eta avasarechicha ticaijarehi Betania, eta máiteca-
pihahi éma. ² Te apanavarepa sache, te tijararahi-
chichapa, tiyanavarepa éma tayehe eta Templo. Téja-
capa éma, tímiturecapa. Namutu ena achaneana
tiyananahi napaucha, nasamararacayarehi éma. ³ Tac-
ahe, sutiarhihi esu esena ticayephipuca, esu suve-
hahi ema apana achane. Ena escribánoana énapa ena
fariséona, eta náimereuchirahi ésu, námapa te mami-
rahu ema Jesús te namurihi ena achaneana. ⁴ Tacahe,
náichapa ema Jesús:

—Tata maestro, esu suca esena nachimaracahi
ticayepahi, suvehahi ema apana achane. ⁵ Eta viyehe
ley máijararuhavi ema víyahaini Moisés, tímítuca-

havihi vicapacayarehi eta vitupisisirayare te márijahiana nácani ticapecaturanahi. ¿Tájahapuca picayema piti? —nacahepa.

⁶ Éna nayaseserecahi ema Jesús, taicha natanucahi eta tiviuachayarehi éma. Émasera ema Jesús tétipaicapa tiájupairicapa te apaquehe te mavauqui. ⁷ Énaserá tímiyanavanarichucha nayaserecahi. Tacahe, máesenimurihapa. Máichavacapa:

—Te etiarhipuca éti mapecaturareanahi, enerejicava ínpuca eyuca esu suca esena —máichavacapa.

⁸ Tacahe, tétipaicavarepa tiájupairicavarepa éma.

⁹ Eta nasamirahi eta juca, téchavanarichuhinéni eta napecaturana. Titsirihacavanapa. Tásiha, timutserahavanapa tiúchuchujicana. Nativapa tiúchucanahi ena ichavicapanana. ¹⁰ Te máesenicavarepa ema Jesús, nájinarihahi éna. Sucarineipahi esu esena. Tásiha, máichapa esu esena:

—Nuchicha, tiyananapa namutu ena timetauchavianahi. ¿Nájinapa apanainahini ena navaraha ticapacaviana?

¹¹ Tásiha, ésu suíhapa:

—Nájjina, tata.

Éma máichavarepa:

—Núti apanavare, váhivare nímicapacavimahi.

Piyana pichava. Váipasera picuapechava picuquicha eta pecatu —máichapa.

Éma Jesús, ema namicahu ena achaneana

¹² Te táequenepa eta juca, tépanavavarepa tímitureca ema Jesús. Máichavacapa ena achaneana:

—Nútira numicauchahehi eti achaneana te juca apaquehe. Eta tacahe, nácani téhicanuanayare, vahi téjecapavanaimahi. Taicha eta nímiturapiana, etapa timícauchavacahi. Tásiha, nacatichainapa eta timapicu, vaipa napaucaimahi —máichavacapa.

¹³ Tásiha, ena fariséoana natiarihipahivare. Tacahe, náichapa:

—Pítijiváichucha péchajisiavahi. Tájina pisuapacarevaina.

¹⁴ Éma Jesús majicapavarepa:

—Tisuapacare eta juca néchajiriruvana, tayanapane nútijivahi néchajisiava. Taicha nímatihini nutuparahaichuhi eta nímeresiravayare. Nímatihivare eta nucaijuheyare. Étisera vahi ímatihini távihapuca eta násinehi, váhivare ímati eta nucaijuheyare. ¹⁵ Éti étachucha éhicahehi eta nayeherepiana nanacaqueneana ena iáchucanaveanaini. Étasera tíchahehi eta épuruiranihi. Nútisera vahi népuruhéimahi éti.

¹⁶ Jéhevaresera, te jácani sáchehare, népuruhepapuca táichavenehi eta emasuapirahi, tatupiruvayarehi eta népuruiraheya taicha vahi nácarichuimahi népuruhe nútí. Matiarhi ema Tata tivanecanuhi. Éma apana máimahahi eta emasuapajiraivahi. Tépuruheyarehivare éma. ¹⁷ Te eyeherepi éti, te natiarihipuca apinana ena títametacarahiana, te ticuticanahi eta náechajiriruva, tisuapacareanayarehi éna. ¹⁸ Ene nucahehi nútí. Yátupihí eta numetarapiana. Émapa ema

Ticachichanuhi, éma títametacahehi eta yátupirahi eta numetarapiana —máichavacapa.

¹⁹ Énaserá nayaserecavarepa:

—¿Távihasica mávihahi ema ticachichavihi?

Éma Jesús majicapavarepa:

—Éti vahi ímatinu. Váhivare ímatimahi ema Ticachichanu. Te ímatinuhini, ímatipahivareini ema Ticachichanu —máichavacapa.

²⁰ Éta juca eta máechajiriruvanahi ema Jesús eta máimituresirahi tayehe eta Templo. Éta máejasinehi te tachacaya eta nanasirareana eta námavahuana. Nájinaserá napatsicavahini nacaratcahíni taicha vuíchaha máisapavacaimahi ema Viya eta nacaratasirainahini éma.

Éma Jesús tímereuchavapa eta émairahi Cristo

²¹ Éma Jesús tiápechavavare mametacavaca:

—Puiti tiánehípa eta nuyanirayare. Éti etanucanuinapa. Váhisera íchimavanuimahi. Émepenainapa eta epecaturana. Tímicuñacaheyare te infierno taicha vahi ecamapuravahini eta nutiarirahí, esuapanuhini. Taicha vahi ítujicavaimahi ítecapa te návihaya nútí —macahepa.

²² Tásiha, ena ticatianacanahi náichacacapa:

—Mavarahainapuca ticapacavayare. Táitusiava macahehi eta máechajiriruvahi eta váhiji viratahaimahi véhica éma. ¿Távihapuca eta macaijuheya? —nacahepa.

²³ Éma Jesús máichavarepa:

—Éti tayehehi eta apaquehe. Nútisera tayehenuhi te anuquehe. Éta iávasahi éti te apaquehe iávihahi. Nútí návasaichuhi te anuquehe. ²⁴ Éta tacahe, numetacahe-numahi eta tanasinapa eta epecaturana te épenapa. Taicha te vahi esuapanuhini eta nútiquenériahi ema ecuchapaquenehi, tanasiyare eta epecaturana te épena —máichavacapa.

²⁵ Tacahe, nayaserecapa éna:

—Piti pímiyahava mavaneruhi ema Viya. ¿Nájahavisica pítinavaji?

Éma máichavarepa:

—¿Áyahepapuca numetacahe? ²⁶ ¡Tétavicavahi eta tamuracavahi eta esamureana! Tavaraha muraca eta nucajachiraheya. Vuíchahasera nicha. Émasera ema tivanecanuhi, tatupiruvahi eta máechajiriruvana. Éta tacahe, eta néchajiriruvana nútí eyehe eti achaneana, étarichuhi eta nusamaqueneanahi mayehe —macahepa.

²⁷ Énaserá váhiquene nácaicutiarahini eta mametasiravacahi eta mayehe ema Maiya. ²⁸ Tásiha, máichavarepa:

—Jéhevaresera te ecaturiphanupa te anuquehe, tapaenumavainapa ímatinuyare eta nútiquenerahi ema Cristo ecuchapaquenehi. Ecaicutiarayareva yátupihí nímitucahe eta máimiturapiana ema Tata. Vahi étaina nuviyahini te nuchuti nútijiriruvainahini.

²⁹ Puíticha, ema Tata ticachanenuhi, vahi majunijiacanuhini, váhivare nácarichuhini taicha nítauchaipa-

hisera núti eta mavarahaqueneanahi éma —máichavacapa éna.

³⁰ Eta nasamirahi ena achaneana eta mametarpianahi, ichaperinehi eta nasuapirahi ema Jesús ena camuriqueneana achaneana.

Tímaticareana ena mavanarana ema Viya énapa ena tavanarana eta pecatu

³¹ Tacahe, ema Jesús máichavacapa ena tisuapanaripahi. Máichavacapa:

—Te ímiyanava ecaratavaca eta esuapirahi eta nímiturapiana, éti yátupiquenehe nímiturehehi. ³² Tásiha, ímatinapa eta yátupiqueneana táuriqueneana. Vaipa vanaracahémahi éti —máichavacapa.

³³ Nararihihisera ena ticanarajiricanahi éma. Náichapa:

—Viti mámariequeneháviní ema viáchucaíni Abraham. Tájina vímatiyahini eta vítaresirahi nacavanarahavihiní. ¿Tájaha tacayema eta picahéhi vaipa vanaracahavimahi? —nacahepa.

³⁴ Ema Jesús máichavarepa:

—Nutupiruva numetacahe: Namutu nácani tíchanahi eta pecatu, tavayuaruanahi éna. Nacutihi ena vanaracana taicha tétavicava eta tavayuasiravacahi. ³⁵ Ímijachavaipahi machichahehi ema Viya. Váhisera tacahehiní, taicha tavayuaruhehi eta pecatu. Nútisera nuti Machicha ema Viya nuratahahi nucuchuhahe. Vaipa vanaracahémahi. Vaipa tivayuacahémahi eta pecatu. Jéhesare, yátupina eta machichaheraya, máichecuaracuireyare éta. ³⁷ Néchahivare núti eta mámariequenehérahí ema viáchucaíni Abraham. Epanerechaichuchasera ecapacanu, taicha ecaticahi eta nímiturapianahi. ³⁸ Núti néchajisihahi eta máimechaqueneánahí ema Tata. Étisera étachucha íchahi eta mavanairipianarichuhi ema ticachichahe —macahepa.

³⁹ Éna najicapapa:

—Viti machichaequeneánaichaha ema viáchucaíni Abraham —nacahepa.

Ema Jesús máichavarepa:

—Te yátupinahini machichaequenehénahini ema Abraham, ecutihini éma eta yátupirahi eta macaematanesirahi ema Viya. ⁴⁰ Esapihahi éti, epanerechaichucha ecapacanu. Ema Abraham, vahi tácahehiní eta mapanereruhi éma. Núti numetacahehi eta yátupiqueneana mapanereruana ema Viya. Váhisera esuapanuimahisami. ⁴¹ Éti ícharichucha eta máichaque-neasahi ema ticachichahe —máichavacapa.

Ema najicapavarepa:

—Viti vahi apáchichahávina. Émanaichu ema ticachichavi, ema Viya —nacahepa.

⁴² Ema Jesús majicapavarepa:

—Te yátupinahini machichahenahini ema Viya, etupiruvaipahini émunacanu. Taicha núti étaquenehi násiha me Viya. Vahi nútijiriruvainahini eta nítesirahi puiti. Nuvanecasivahi mayehe. ⁴³ ¿Tájaha tacayema vahi árataha eacutiara eta nímiturapiana? Étaserapuca eta emavarairahi esama. ⁴⁴ Nútisera nímicacherachinaheyare ema ticachichahe. Émara ema Váinaraji. Ema

téchahehi, taicha evarahahi íchayare eta máichaque-neana éma. Taicha éma, ticapahi eta máitaresirahi te tépanavainapa. Váhiquene mavarahahini máehicahini eta yátupiqueneana. Étachucha máurica tivayuarereca. Tépiyahirahipaipa. Máurihayapara eta máimahi. Éma, náiyahi ena tépiyahirahiana. ⁴⁵ Eta echichairahi ema maca tépiyahirahi, váhiquenehíni esuapa eta juca nímiturapiana yátupiqueneana. ⁴⁶ Éti, ímijachanupuca jararihi eta néjecapiravahi. Nutupiruvahinenisera eta numetasirahéhi eta yátupiqueneana. ¿Tájaha tacayema vahi esuapanu? ⁴⁷ Taicha nácani mayeaneanahi ema Viya, náuricayarehi nasamararaca eta máechajiriruvana ema Viya. Étisera vahi machichahénahini ema Viya. Eta tacahe, vahi iúricahini esamararacahini eta máechajiriruvana numetaruheanahi —máichavacapa.

Te májinaichahahi ema Abraham, manasiqueneripahi ema Cristo

⁴⁸ Tacahe, ena ticatianacanahi náichavarepa:

—Piti achane picachequetatajichucha. Yátupiquenehi mávaháruvihu ema Váinaraji. Táitusiava, máurishivihu máicha —nacahepa.

⁴⁹ Ema Jesús majicapavarepa:

—Vahi máurishinuinahini. Eta juca nucaematanesirahi ema Tata, nuvarairahi ecunachayare éma. Étisera épurunuichucha. ⁵⁰ Núti vahi nucunachavaimahi. Matiarhisera ema ticunachanuhi. Éma téchahavihi, te nútupuca nétupicavahi eyehe, téhesera étihipuca.

⁵¹ Nutupiruva numetacahe: Nácani tisuapanayare eta numetarapiana, máepenacacanayare éna —máichavacapa.

⁵² Najicapavarepa ena ticatianacanahi:

—Jéhevare puiti, vímaticavipa eta pimáurishivaquenehi. Apanasicáji ena profetana tépenanahi, émapa ema Abraham. Tásiha puiti, picachehajiriruvavare eta nácani tisuapanayare eta pimetarapiana máepenacacanayarehi. ⁵³ Pivarahapapuca picachuricayare ema viáchucaíni Abraham, apanasica ema tépenahi, énapa ena profetanaini. ¿Nájahavisica piti pivayuyucavapa? —nacahepa.

⁵⁴ Ema Jesús majicapavarepa:

—Tájina nucunachacarémahi, te nútijiricavaríchuchapuca nucunachavahi. Mararihisera ema Tata ticunachanuhi, ema ímijachaquenehi ema ecasiña éti. ⁵⁵ Éti ímijachavahi ímati éma. Váhinéni ímatihini. Jéhevare núti nímatihí éma. Téhesera numetacahehiní eta numaimatirahi, népiyahirahiripapucaini nácutiheripahíni éti. Étasera yátupiquenehi eta nímatirahi éma, nusuapahivare eta mavanairipiana. ⁵⁶ Ema víyarahaini Abraham ema iáchucaíni, tétavicavahi eta máurisamurevahi eta máimatiranuhi núti —máichavacapa.

⁵⁷ Tacahe, ena ticatianacanahi náichapa:

—¡Vuíchaha pácayehe cincuenta áñoinal! ¡Picaemuñavapa pímati ema víyarahaini Abraham!

⁵⁸ Ema Jesús majicapavare:

—Nutupiruva numetacahe: Májinaichahahi ema Abraham, nunasiqueneripahi núti —máichavacapa.

⁵⁹ Tacahe, tiápajucavapa eta nasemanevahi. Navehapa eta márijahiana, nayucayarepaini éma. Tiúchuca-pasera éma eta te Templo. Tiyanapa tiyumurucavapa.

Ena Jesús macanaraca ema achane máimiuchurehi eta mapuchuquiva

9 Tacahe, eta mapaisirahi ema Jesús te tajuhe eta avasare, máetupiacapa ema achane máimiuchurehi eta mapuchuquivahi. ² Eta véhisirapahi ema Jesús viti máimitureana, viyaserecapa éma:

—Tata maestro, ¿tájahapuca tiviu-chahi ema maca eta mapuchuquivahi te tiúchuca-inapa? ¿Énapuca tiviu-chanahi ena ticachichana, téhesera mapecaturaichuhipuca éma? —vicahepa.

³ Tacahe, tijicapahavipa:

—Váhinéni étaina taviuchahini eta mapecatura éma. Énaripa ena ticachichana, váhivare énaparacaina. Matuparahaichuhi me Viya, mavarairahi nímerecayarehi puiti eta máitupajijiasiravahi ema Tata. ⁴ Núti apanava nucamapurayare eta sache níchirayare eta máematanerepiana ema Tata eta mavanesiranuhi taicha járajapavare eta yati nájina ticaematanena. ⁵ Ticamapuravacarerichaha eta nutiarahirahi te juca apaquehe nuti namicahuhi ena achaneana —macahepa.

⁶ Tásiha, tiátutuicapa te apaquehe ema Jesús. Máepiyacapa eta tiúrajichicha te matuture. Mayajihauquichapa ema púchuqui. ⁷ Tásiha, máichapa:

—Piyana picasipauquipana tayehe eta noque ticaijare Siloé —máichapa. (Te véchajiriruva, eta Siloé ticaijare Vanairuca.)

Tacahe, ema púchuqui tiyanapa ticasipauquipanahi. Tijahúchava tímairirica. Tichavapa te mapena.

⁸ Náraminehi ichape ena machacayapenanahi énapa ena tímatianahi eta mapuchuquivainihi. Tásiha, nacahepa:

—Vímatihí ema émana limosnerohi púchuquihí. Émasera ema maca achane tímairiricahí. ¿Apanapuca éma? —nacahepa.

⁹ Najicapapa ena tímatianahi yátupi:

—Émara ema maca.

Ema apana, macahevare:

—Vahí émaina. Mavasichucha.

Émasera ema achane púchuquinihi máichavacapa:

—Nútira nútí púchuquinihihi —macahepa.

¹⁰ Tásiha, nayaserecapa ema achane:

—¿Tájaha pícharacavahi eta pímaírisirahi? —náichapa.

¹¹ Éma majicapapa:

—Ema maena achane ticaijare Jesús máepiyacahi eta tiúrajichicha. Tásiha, tiyajihauquichanupa. Tivane-canupa nucasipauquipana te noque Siloé. Te nuyana-pa nucasipauquipanahi, nímaíricarinehi —máichavacapa.

¹² Éna náichapa:

—¿Táviha ema mácara achane?

Éma majicapapa:

—Jéhepuca, vahi nécha.

Ena tuparairucana navaraha náecha eta manarasirahi ema púchuquinihi

¹³ Tacahe, nasamairiricapa ena fariséoana eta manarasirahi ema púchuquinihi. Tásiha, nacavanairipipa náepana ema púchuquinihi, taicha natanucahi éna eta tiviu-chayarehi ema Jesús. Ichaperinehi eta nacatianasirahi éma táichavenehi eta máipuresirahi te jena sache sávarumuhuquenehi. ¹⁵ Te títecapapa ema púchuquinihi, nacatupihapa éma te namirahu.

Nayaserecapa tájahahipuca táicharacavahi eta máimairirisirahipahi. Éma, máichavacapa:

—Ema achane típuchanuhi tiyajihauquichanuhi eta máture. Tásiha, nucasipauquipa. Nímaíricapa —macahepa.

¹⁶ Nararihi ena nacahepa:

—¿Ema mácara achane vahi machaneraina ema Viya, taicha vahi mapicauchahini eta sávarumuhua-tacapichahuene!

Ena apamuriana, ánvivare nacahe:

—Váiparinehisera máituruequenehaimahi maicha eta tíramicareana te yátupinahini macapecurarahihíni —nacahepa.

Tacahe, apanapanenejiana eta napanereruana.

¹⁷ Tásiha, nápechavare nayasereca ema achane:

—¿Tájaha picayema píti mayehe ema achane ticaimairiricavihi?

Éma, máichavacapa:

—Núti németeaca émahí ema profeta.

¹⁸ Énasera ena tuparairucana váhiquene nasuapahini eta émaírahí ema púchuquini. Tásiha, náimichuhapa ena ticachichanahi. ¹⁹ Nayaserecapa:

—Vivaraha viyaserecahe: ¿Yátupihí eta máimiuchurehi eta mapuchuquiva ema pichicha? ¿Tájaha táicharacavahi eta máimairirisirahi puiti?

²⁰ Ena ticachichanahi najicapapa:

—Yátupi ema maca ema vichicha. Máimiuchurehivare eta mapuchuquivainihi. ²¹ Váhisera véchahini tájahapuca táicharacavahi eta máimairirisirahi. Váhivare vecha nájahapuca ticaimairiricahí. Émaina eyasereca. Ajairaripa éma. Émapa téchinavahi eta mametasirahyare —náichapa.

²² Tacahehi eta najicapirahi taicha tipicanahi éna nacaicúñahini, nacaquijihivaréni te náurujisirarevana taicha ena ticatianacanahi ema Jesús nacuchucapa eta vantu, nacavanaripirapa nacuija nasuapa ema Jesús émaírahí ema Cristo. ²³ Eta tacahehi eta náichirahi: “Émaina eyasereca. Émapa téchinavahi”.

²⁴ Tacahe, ena tuparairucana nápechavare náicha ema achane púchuquini. Ánipa nacahepa:

—Pátupiruva pimetacahaví te máijarepuca ema Viya eta pinarasirahi. Vítisera vímatihí ema maena achane tisipecaturarahí —nacahepa.

²⁵ Éma majicapavarepa:

—Jéhepuca, vahi necha nútí te tisipecaturarahíhipuca éma. Tacarichu néchahí eta nupuchuquivainihi nuti, púitiserá nímaíricaripa máicha —macahepa.

²⁶ Nápechavare nayasereca éna:

—¿Tájaha máicharacavihi eta macaimairirisiravihi?

²⁷ Majicapavarepa éma:

—Cápachi numetacahe. Vuíchahacaru esuapanu.

¿Evarahahipucasera éhicayare éma éti apanavare?

—máichavacapa.

²⁸ Tacahe, nacajachapa éma:

—¿Pítisera péhicaipahi éma! Vítisera véhicahi éma ví-yarahaini Moisés. ²⁹ Taicha véchahi éta máechajisihahi éma Viya éma Moisés. Émasera éma máenatajaji, vahi vecha távihapuca másiha —nacahepa.

³⁰ Éma achane majicapavarepa:

—¿Tájina échaquenéna éti páureanasami! Vahi ímatiequeneha távihapuca másihahi éma ticaimairi-canuhi. ³¹ Váhipuca echa váiparinehi tisamacaremahi mayehe éma Viya mácani achane ticapecaturarahi. Nacarichu tisuapacareanahi nácani títauchanahi éta mavanairipianahi éma Viya. ³² Váhivare visamairirica nácani nacaimairiricahini éma mácani mámiuchurehi éta napuchuquiva. ³³ Núti németeaca te tacuijahini éta vanairucairahi me Viya éma maena achane, váhiva macuratahahini maicha éta tíaramicareana máichaqueneanahi —máichavacapa.

³⁴ Tacahe, tise-manapa éna éta máichiravacahi. Naca-hepa:

—¿Píti pétaviurequenehi éta picapecaturaivahi! ¿Éta tivichavihi! ¿Puiti pisapihapa pivarahaya pímitucavahi víti! —náichapa.

Tásiha, nacuchucapa éma.

Ena tépiyacavanahi púchuquiana taicha éta namasuapajiraivahi

³⁵ Éma Jesús masamairiricapa éta náquijsirahi éma máipuchaquenehi. Tásiha, te macainunavarepa, máichapa:

—¿Pisuapapuca píti éma Machicha éma Viya?

³⁶ Éma achane majicapapa:

—Pimetacanupaini, tata. ¿Nájahapuca éma Machicha éma Viya, apaesa nusuapahini? —macahepa.

³⁷ Éma Jesús majicapapa:

—Nútiripara nuti pímaquenehi, nuti péchajirunuhi.

³⁸ Tacahe, éma achane tépuyucapa te mamirahu éma Jesús. Tásiha, máichapa:

—Nusuapavi, Tata —macahepa.

³⁹ Éma Jesús máichavarepa:

—Núti tímitecanuhi te juca apaquehe, nímimatichayare éna máimatirahanahi éta yátupiqueneana máechajirivanahi éma Viya, apaesa náimatiequeneha. Éta juca tímicutijiricavahi nucaimairiricayarehi nácani púchuquianahi tayehe éta máechajirivanahi éma Viya. Nácanisera tímijachavanahi téchemarahiana, nímahaya te najacapapuca éta nímiturapi, tísapavanayarepuca éta nucaimairirisiravacayare. Téhesera vahi nacuisapava, tíapajupana-vainapa éta napuchuquivayare. Éta naviurevayarehi —macahepa.

⁴⁰ Tacahe, éna fariséoana natiarihiqueneanahi te machacaya, éta nasamirahi, nayaserecapa:

—Píti pímiyachahaviripapuca púchuquihavihi. ¿Váhira púchuquihavinahini! —nacahepa.

⁴¹ Éma Jesús majicapavacapa:

—¿Éti épiyacavahi púchuquie! Taicha vahi evaraha esuapanuhini. Tásiha, tanasipa éta eviurevahi táichavenehi éta epecaturana. Te yátupinahipucaini esuapanuhini, tacuijahini taviuchahehini —máichavacapa.

Éma Jesús tímicaecherachava éta majaneasirayare éna téhicanahi éma

10 Tacahe, éma Jesús máechajisihahi éta tajaneacasiva éta uvesa, máimicutichirahi éta macatiuchirahi éna téhicanahi éma. Ánipa macahe:

—Nutupiruva numetacahe: Mácani tijanearecahi éta uvesa, tétavicavahi éta máechapajirisirayarehi. Te yátiana, máimisipayarehi te tapena, tásiha, máeratapapa éta tapajacura éta majaneasirahi, apaesa tájina tacuquichiravaina. Taicha nararihi éna tíamerahiana,

ticaetemarahanavare. Navarahahi ticayumuruquianayarehi éta nasiapirayarehi te tapena éta uvesa, námechayarehi. ³ Émasera éma pástulero, te yáticarahi mavejiéquenehahi éta tapaja, máichuhahi éta táijareana éta uvesana. Éta máichuirahi,

tiúchuchujanapaipa táehicapapa, taicha táimatiahuchahi éma pástulero. ⁴ Éma, máinapumirau-chapapa éta mayeheana uvesa. Táehimurihapapa tamutu éta uvesana, taicha táimatihahi éta mahu. ⁵ Váiparinéhiséra táehicaimahi mácani apanaquene achane. Tavarahayarehi tijunaracana taicha vahi táimatiahuchahini éma apanaquene —máichapa éma Jesús.

⁶ Éma Jesús máimicutichinahi éta juca. Váhiserá nácaicutiarahini éna éta máimitusiravacahi.

Éma Jesús éma yátupiquenehi tijaneacahavihi taicha máuriquenehi éma

⁷ Éma Jesús mápechavaca máimitucavaca. Ánipa macahe:

—Nutupiruva numetacahe: Núti nímicutijiricavahi tapajacurahi éta tapena éta uvesa te tanarasirarehi éta. ⁸ Tínapumirauchanuanahi éna tépiyacavana máestroana, váhisera máimitureanainahini éma Viya. Tíamerahianachucha éna, ticaetemarahaniana. Váhiserá táehicaimahi éta uvesana taicha vahi táimatiahuchahini éna. ⁹ Núti nujaneacavacahi éna nuchanerana, nucutihi éta tapena éta uvesa. Nácani ticasifavana éta nuyehe, nucatiuchayarehi núti. Tájina náichavaimahi, tájinavare náechuricaimahi. Néchavacahi núti.

¹⁰ Éma tíamerahi, tímitecachi éma tíamerecayare, ticaparecayare. Macaejanerepaicayareva. Nútisera tímitecanuhi níjaracayare éta náitaresiraya. Máitavacayare éta náuricacarevayare nícha. ¹¹ Énerichuvare núti yátupiquenehi éta nujaneasiravacahi éna nuchanerana, tacutihi éta majaneasiravacahi mácani achane éta mayeheana uvesa. Núti níjarareca éta náitaresira éta nucatiuchiravacahi. ¹² Mácanisera tuparairu-

cachucha, vahi macatiuchaimahi eta uvesa. Te máimaha-pa eta tinicarahi sárare, tijunayarehi. Vahi tipatsicavaimahi macatiucha eta uvesa, taicha vahi mayehenahini. Tacahe, eta tinicarahi ticamapuravainapa tacapacayare eta uvesa. Eta tacaitiruana, téjanerepaicanapa. ¹³ Ema maca achane tijunaya taicha vahi téñamavaimahi tayehe eta uvesa. Éma tímijachavahi majaneacavaca, étachuchasera macunehi eta mavacha.

¹⁴ Núti yátupiquenénu pastulérunu taicha tiúrihi eta nujaneasiravaca ena nuchanerana. Tímatinuhivare ema Tata, tacutihi eta nímatirahi núti éma. Énerichuvare tacahehi eta nímatiravacahi ena nuchanerana. Éna tímatinuanahivare. Eta néñamairavacahi, núti nímiararecavahi eta nítaresira náichavenehi éna.

¹⁶ Nararihivare ena apamuriana nuchanerana. Váhisera ániña nacavasa. Nucurujicavacayaresera, népanayareva. Tisuapanuanayareva namutu. Étanayaréichupa eta náumuriva. Nucarinenapa núti néchavaca.

¹⁷ Ema Tata, yátupihhi eta máemunasiranu taicha nímiararecachi eta nítaresira náichavenehi ena nuchanerana. Nuchavayaresera nítareca. ¹⁸ Nájinanéni napamicanuhini eta nísapiravaya ticapacanuana. Níjararuvahi núti eta nacapasiranuya. Taicha nutuparahaichuhi me Tata núti néchinavayarehi. Níjararuvayare. Tásiha, nuchavayareva nítareca —máichavacapa.

¹⁹ Eta nasamirahi ena achaneana eta juca máechajirivanahi ema Jesús, típutsimuriavavacavarepa. ²⁰ Natarihihi ena ticatianacanahi. Nacahepa:

—¿Tájaha tacayema esuapa ema mara? Máurishi éma, mávahárupuca ema Váinaraji —nacahepa.

²¹ Énaserá ena apamuriana, ánivare nacahe:

—Te yátupinahini mávaháruinahini ema Váinaraji, vahi macuratahahini macaimairirica ema púchuqui. Nájinavare mácuti eta máechajisira —nacahepa.

Ena tuparairucana vahi návarahahini najacapa ema Jesús

²² Te jena sácheanahi diciembrequenehi eta ticasarahimuhuana te Jerusalén, ena achaneana napiestachahi eta año táepaniravahi náetupirica eta Templo. ²³ Ema Jesús matiarhihi te tajuhe eta te Templo te tayehe eta alar máepiyaruihi ema Reyni Salomón. ²⁴ Te náimahapa ena ticatianacana, nachayacapa ema Jesús. Tásiha, náichapa:

—¿Tájaha tacayema pímpanererechahavihi? Pátupiruvapa pimetaçahavi te yátupivihipuca pítiquenehi Cristo —náichapa.

²⁵ Ema Jesús majicapavacapa:

—Cápachi numetacaheripahi. Vuíchahacaru esupanu. Eta juca níchaqueneanahi ímahaqueneanahi tásihaqueneanahi me Tata, étaripara tímereuchanuhi.

²⁶ Étiserá váhiquene esuapanu. Taicha vahi étinahíni nuyehenenahini uvesa. ²⁷ Eta nuyehéana uvesa tímatiahuchanuanahi éta. Núti apanavare nímativachivare. Eta tacahe, téhicanuanahi. ²⁸ Níjaracavacayaresera núti eta náitaresirayare máichecuaraquireyare.

Váhiquene náimahahini eta náicuñayaréni. Nájinavare tiverejicanuanaimahi ena nujanearuanahi. ²⁹ Taicha máijjararunuanahi ema Tata. Éma, nájina ticachuriacainahini. Nájinavare tiratahaimahi tiverejicaimahi ena majanearuanahi. ³⁰ Taicha núti émapa ema Tata vicuticacahi eta vítipajijiasiravavacahi —máichavacapa.

³¹ Tacahe, ena ticatianacana natanucapa eta mári-jahiana. Navarahapa natupisicayarehini ema Jesús.

³² Máichavacapasera éna:

—Íchapemurihi eta níchirahi eta táuriqueneana ímahaqueneanahi, máijjararuanahi ema Tata. ¿Étase-rapuca tiviuçhanuhi eta evarairahi etupisicanu te mári-jahi?

³³ Tacahe, najicapavarepa:

—Vahi étaparacaina eta píchirapuca jácani táuriqueneanahi. Eta tiviuçhavihi pímiçhachiravahi machichavi ena Viya. Pítirichuhi vicutiquenehi achane. ¡Pítiserá pímiçhachavaipahi Vívavi! —nacahepa.

³⁴ Ema Jesús majicapavarepa:

—Eta ajureca te Salmo, vahi ímatiequenehahini eta táechajisiaherahi eta macayemaquenehi ema Viya: “Víyahéhi nícha eti nunerejiruheanahi”. ³⁵ Véçhahi eta tacayemaquenehi eta ajureca, vahi tépiyahirahimahi. Taicha tamutu eta táechajiriruvana eta Sagrada Escritura táechajisihairahi eta juca máechajiririvanahi ema Viya. Nácani nacatuparahahi me Viya, éma tímijarechavacahi “Víyanahi”. ³⁶ Nútiripa puiti, nuvetijipa nímiçarechacare “Viya” taicha émarichu ema Viya tinerejicanuhi, tivanecanuhi eta núcupaisiraya te juca apaquehe. ³⁷ Núti nítaucharahi eta mavanairipiana ema Tata tivanecanuhi. Tásiha, tatuparacahe esuapanuvaneyarehi. Tayanapane vahi tisuapacarehi eta nímiturapiana eta eyehe, étapaseraini esuapahini eta tíramicareana níchaqueneanahi. Étara tímereuchanuhi eta mávahásiranuhi ema Tata, návahásirahivare núti apanava éma —máichavacapa.

³⁹ Tacahe, tíapéçhavanavarepa navaraha nacaratacayarehini ema Jesús, napresuchayarehini. Émasera tíuchucavanepa.

⁴⁰ Tásiha, tiyanavarepa ema Jesús te tinapaica te apachara eta cajacure Jordán. Manasipanapa eta te avasarechicha Betábara te máicachasirisinehini ema Juan. ⁴¹ Camuriana ena achaneana tiyanaracanahi eta mayehe. Tásiha, nacahepa éna:

—Ema víyarahaini Juan, tayanapanehi tájina máimerechahini eta tíramicareana, yátupihisera eta profetairahi éma, taicha tamutupa eta mametarapiana mayehe ema maca Jesús, vímaharipa puiti eta yátupiqueneanahi —nacahepa.

⁴² Tacahe, ánaqui camurianahi ena achaneana tisuapanahi ema Jesús, téhicanahivare.

Eta máepenira ema Lázaro

11 Matiarhihi ema achane ticaijare Lázaro. Éma, máemunacasarehi ema Jesús. Ticavasahi tayehe eta avasarechicha ticaijare Betania, návahahivare ena maparapenaveana, esu María ésupa esu Marta. Te jena sácheana, ticajumahi muraca ema achane. ² (Esu

suca María, ésuhi esu tisipapevachahi ema Jesús tayehe eta táijiyequenehi perfumeama. Suájapevachahivare te suchutumaca.)³ Tacahe, ena náni apinana esenana ticaparapecacana náimivanerecapa, nametapanayarehi ema Jesús eta macajumairahi muraca ema Lázaro.⁴ Te máechapa ema Jesús, macahepa:

—Eta juca jumare, vahi títaimahi ema Lázaro.

Matuparahaichusera me Viya, mavarairahi nímereca eta máitupajijiasirava éma, nímeresirayareva eta nítupajijiasiravahi nuti Machicha, apaesa nacuna-chahavi ena achaneana —macahepa.

⁵Jéhesare, ema Jesús yátupihí eta máemunasirahi ema Lázaro, énapa ena esenana maparapenaveana.

⁶Váhisera mayanavanehini máimahapanahíni ema máemunacasare. Manasirichaha apinahi sache.⁷ Tásiha, te apanapa sache, ema Jesús máichahavipa viti máimitureana:

—Viyana vichava te Judea.

⁸Víti vijicapapa:

—Tata maestro, cáperichaha ena ticatianacavianahi navarahahi ticapacaviana. Tásiha, puiti pivarahaichaha piyanayare ánaqui nayehe —víchapa.

⁹Ema Jesús máechajisihahi eta mavanecasivahi. Máichahavipa:

—Vahi táeñamavácarehini. Yátupí eta sache ticayehe doce hora. Te vípaica te sáchemuhu, vahi vicáyute-tuímahí taicha vímairirichahi tayehe eta tijarahí.¹⁰ Nácanisera tipaicanahi te yátimuhu, ticayuteterejianayarehi taicha vahi náimairirichahíni. Ema Tata tijeanacanuhi núti taicha nítauchahi tamutu eta mavarahaqueneana. Vahi máisapahíni jácani náichanuhíni; tapaenumava máímaha tiuri —macahepa.

¹¹Tacahe, te táequenepa, macahevarepa:

—Ema vémunacasare Lázaro máenahi tímacahi.

Nuyanayaresera nucajamipanayare.

¹²Víti víchapa:

—Tata, te tímacahipuca éma, étapa táicutiarahi eta mativareraya —víchapa ema.

¹³Víti vímijachaichucha yátupihí tímaca. Tásiha, ema Jesús matupirupa timetacahavíhi:

—Tépenaipa ema Lázaro.¹⁵ Núrisamuresera eta májinanuirahi eta ánaqui. Tiúripanaya eta eyehe taicha ímahaya eta níchaqueneyare apaesa esuapanu. Puiti viyanaya vímahapanayare —macahepa.

¹⁶Tacahe, ema vichamuri Tomás máichahavipa viti machamuriana:

—Viyana víti apanavare. Te nacapacapuca éma, nacapacahavirineva víti apanava —máichahavipa ema Tomás. (Tatiarihivare eta máchucarapi Chame.)

Ema Jesús, ema téchahi eta macaechepusirayare ena náepenaqueneana, máimichavayare macaitareca

¹⁷Tiuri, viyanapa vícaijuhe eta avasarechicha Betania. (Eta Betania tachacayahi eta Jerusalén, apina kilómetro y medio eta tayerehivahi.) Tásiha, te viánehipaipa, timetacahavianapa cuátroripa sache eta náecarairahi ema Lázaroíni.¹⁹ Camurianahichahasera ena achaneana te napena ena maparapenaveana, esu

Marta ésupa esu María. Nacamitisiripanahi apaesa vahi nacuiyaharacavaicha ena apinana.²⁰ Tacahe, te suéchapa esu Marta eta máitecapirayarehi ema Jesús, tiyanapa suácapahí. Ésusera esu María sunasirichuhi te tajuhe eta peti.²¹ Te suéchajicapa esu Marta ema Jesús, sumetacapa eta máepenirahi ema suparapeíni. Tásiha, suíchapa:

—Tátachicha, te pitarihinahini eta ani, vahi ñicuepe-nahini eñi nuparapeíni.²² Váhisera néñamava. Nucasiñavihi eta piyehe. Pímahainepa píti eta pícharacaya eta piyaseasirayare eñi Viya —suíchapa.

²³Ema Jesús majicapapa:

—Tiuri eta péñamirahi ema piparape. Váhisera picupica. Tichavayare títareca te pimirahu —máichapa.

²⁴Esu Marta suíchavarepa:

—Yátupí, Tata, néchahi eta ñichavirayare títareca te táitecapapa eta sáchezare náechepusiraya ena náepenaqueneana —suahepa.

²⁵Ema Jesús máichavarepa:

—Jéhevare núti, nucaitarerahi nácani nucaechepureanaya. Táitusiava numetacavi: Nácani tisuapanuanayare, tayanapanepuca náepena, nucaitarecayaresera núti.²⁶ Ene ecaheyare éti éhicanuanahi, tayapanepuca épenayare, nútisera nucaitarecaheyare. Tásiha, tájinapa tímiapechaimahi épenahíni. ¿Pisuapanupuca eta níchiravíhi? —máichapa.

²⁷Ésu sujicapapa:

—Nusuapavi, Tata. Pítira yátupiquenévihi Cristo, Ñichichavi eñi Viya. Pítiripa piti vicuchapaquenévihi píteruyarehi te juca apaquehe —suíchapa.

Ema Jesús tíyaha te tachacaya eta máecari ema Lázaro

²⁸Te títapiricapa eta suéchajisirahi esu Marta mayehe ema Jesús, tiyanapa suíchuhapanahi esu suparape María. Sujajaicapa, ani tacahehi eta suíchirahi: —Eñi Maestro ñirarihi eta ani. Ñicavanairipi piyanayaréji —suíchapa.

²⁹Te susamapa esu María eta matiarahirahi ema Jesús, téchepurucavanepa. Tiyanavarepa suácapahí.

³⁰Taicha ema Jesús vuíchaha máitecapahíni te napena. Manasirichuhi eta te suácapinehi esu Marta.³¹ Eta náimairahi ena suchimarana eta suéchepusirahi súchusirahi esu María, tiyananapa náehiequenehahi. Náimijachahi éna tiyanayarehi ésu te máecari ema suparapeíni, tíyahapanayarehi.

³²Tacahe, te suítecapauchapa ema Jesús, esu María sutupirupa tépuyucahi te máivapechacaya. Tásiha, suíchapa:

—Tátachicha, te pitarihinahini eta ani vahi ñicuepe-nahini eñi nuparapeíni —suíchapa.

³³Tásiha, tíyahapa esu María, énapa ena téhicanapahí ésu. Eta máimairahi ema Jesús eta náiyairahi, ticatisamurevavarepa éma apanavare. Tíyahavarepa. Tásiha, mayaserecapa:

—¿Táviha écarihahi? —máichapa.

Ena najicapapa:

—Yare, Tata, pímaha.

³⁶ Tacahe, ena natiarihiqueneana eta náimairahi eta máiyairahi ema Jesús, téchajicacanapa:

—Piáha. Tíyahavaréra éma apanava. Tétavica-vahipucáji eta máemunahirahi —nacahepa.

³⁷ Ena apamuriana, ánivare nacahe:

—Ema maca ticaimairiricahi eta púchuqui. ¿Tájaha-puca vahi macanaracahini ema Lázaroinisami, apaesa vahi macuepenahini? —nacahepa.

Eta máechepusira ema Lázaro te máecari

³⁸ Tacahe, ichape eta macatisamurevairahi ema Jesús. Mapauchapa eta ecari nasecajueruhi te mari. Tatiarivare eta márime tajahajacahi eta tapajacura eta ecari. ³⁹ Tacahe, ema Jesús mavanecavacapa:

—Ecaerajica eta jara tachujihí eta máecari.

Ésusera esu Marta suíchapa:

—Tata, németeaca tijeheripa jácani taicha cuátrorí-pahi sache eta ñépenirahi —sucahepa.

⁴⁰ Ema Jesús máichavarepa:

—Cápachi numetacavipa, te pisuapanu yátupina, pímahayare eta macunachacarevahi ema Viya taicha nímerecaya eta tamutuirahi marataha —máichapa.

⁴¹ Tacahe, nacaerajicapa eta márime. Tásiha, ema Jesús máesenicapa te anuma, tiyujaracanamapa:

—Tata, nuhasulupayachavi eta pisamiranuhi.

⁴² Váhiquene péñauchanu eta jácani nuyasearuviana. Puiti nuyaseacavi eta pítupajijásirava, apaesa náimaha ena nani achaneana natiarihiqueneana, apaesa nacunachavi. Náechavare eta pítirahi pivanecanu —macahepa éma.

⁴³ Te títapiricapa eta mayujarasirahi, máimamaracapa eta ecari. Tipiaracapa muraca, ánipa macahe:

—Lázaro, péchepuca eta te jara piávihihi. Yare, piúchuca —máichapa.

⁴⁴ Tacahe, ema máepenaquenénihí tiúchucapa. Mámapaichuhi eta máyuruhanahi étapa eta máepacimirahi. Tásiha, ema Jesús mavanecavacapa naverurua-ca eta máyuruhanahi, apaesa tiyanayarepa te peti.

Ena tuparairucana napanerechapa nacaratacayarehi ema Jesús

(Mt 26.1-5; Mr 14.1-2; Lc 22.1-2)

⁴⁵ Tacahe, ena suchimaranahi esu María, eta náimairahi eta juca máichaquenehi ema Jesús, camuriarinehi ena tisuapanahi éma. ⁴⁶ Natiarihisera ena apamuriana tiyananapa nayehe ena fariséoana ticatiana-chahi ema Jesús. Eta namaurisirahi eta juca, tiyanana nametapanavaca ena tuparairucana. ⁴⁷ Tacahe, ena tuparairucana náimichuhapa namutu ena juéseana, ticurujicacanapa. Tásiha, nacahepa:

—¿Tájaha vícharacavayare, tátanaveana? Ema maena achane Jesús, tétavicavahi eta máitupajijásiravahi máichahi eta tíamicareana. ⁴⁸ Vahi táuricahini vísapahini máimiyannahini máitarecahini, machu námuriana náehica ena achaneana, masapihainapapuca nasuapayare éma. Machu ena aquenucana romanoana náimijachinapapuca tatiarihiyare eta tíñepiyare. Tisemanainapapuca. Nárajapainapapuca eta ani.

Náquipaisinahavinapapuca eta víávasa. Nasapihainapapuca tiverejicahavianayare eta víávacureanahi —nacahepa.

⁴⁹ Matiarihíhi ema achane ticajarehi Caifás. Émahí ema ichapequenehi tiyujaracarahi te jena áñohi. Tacahe, máichavacapa éna:

—Éti vahi ímatiequeneha eta víchararacavayare.

⁵⁰ Németeaca núti tíuripana máepena ema émanaina achane mavachareca eta náitaresiraina namutu ena apamuriana achaneana —máichavacapa.

⁵¹ Eta juca máechajiruvahi ema Caifás, váhinéni étainahini táichahini eta máechemaraivahíni éma. Étahi eta émahíhi ema ichapequenehi tiyujaracarahi te jena áñohi. Manacasamureruichuhi ema Viya eta máechajisihahi eta máepenirayare ema Jesús náichavene ena israelítana. ⁵² Étasera juca máepenirayarehi ema Jesús, mavacharecainapa eta naviurevahi namutu nácani machaneranayarehi ema Viya te apanapanenequeneana avasareana. Vahi tácarichuhini eta naviurevana ena israelítana. Taicha te táequenénapa, mavarahahi macurujimuriahayarehi, étamurianayarehi namutu éna.

⁵³ Tacahe, tacutipa eta napaneruhi ena tuparairucana eta nacapasirayare ema Jesús. ⁵⁴ Eta tacahe, ema Jesús vaipa máimerecavahini eta te Jerusalén. Majunijicapa eta Judea. Tiyanapa eta te mávapahi apaquehe tachacaya eta avasare ticajare Efraín. Manasipanapa ánaqui, vítipa viti máimitureana.

⁵⁵ Tacahe, semanayare eta Pascua, vipiéstara viti israelítana. Namutu ena achaneana tíávihana te apanana avasareana tiyanaracanapa tayehe eta Jerusalén. Tisipahacavanayarehi taicha náimijachahi ani tacahehi tacuija nacuquichiravaina eta náimerisiravayare me Viya. ⁵⁶ Tacahe, ena achaneana nacunepaipahi te Jerusalén ema Jesús. Eta návihairahi te Templo, téchajiricacanaripa. Ánipa nacahe:

—¿Tájaha ecayema? ¿Títecayarepucáji ema Jesús puiti juca piéstaya? —nacahepa.

⁵⁷ Énaripa ena tuparairucana tivanerecanapa ena ticuneyanayare ema Jesús. Te matiarihinapuca, nametapanayarepa ena tuparairucana. Tásiha, éna náimicaratacayarepa.

Esu María susipapevacha ema Jesús te perfumeama

(Mt 26.6-13; Mr 14.3-9)

12 Séisirinehi sache eta piéstayarehi eta Pascua. Tichavavarepa ema Jesús tayehe eta avasarechicha Betania, mávasahi ema Lázaro, ema macaechepurehi te máecari. Tacahe, ena máemunacareana tíúrisamureanarinehi eta náimairahi eta máitecapirahi ema Jesús eta nayehe. ² Ticacherujianapa náenicayarehi. Ema Lázaro macachanehi te mesa eta nanisirahi. Esu Marta téchapajiricavacahi. ³ Tacahe, esu María suámapiapa eta táijijeyequene perfumeama te bótechicha. (Te navírare eta juca perfumeama te nasucure ticajare nardo.) Tétavicavahi eta tasivachavahi. Ticutiamacacahi te botella eta tasiavavahi. Tacahe, suépusapevachapa ema Jesús,

suájapevachapa te suchutimaca. Enevanerine táinica-juecha eta peti eta táijiyevahi. ⁴ Matiarihihi ema vichamuri Júlasí. Ema maca émarichu tíjararecayarehi ema Jesús. Témechajicavapa éma:

⁵ —¿Tájaha tacayema váhivaréyapa tacaijarareca-sihini eta juca tasivachaquenehi perfumeama? Vivehahini eta camuriquene plata, tásiha, vímicatasihahini ena páureana —macahepa.

⁶ Ema maca Júlasí, vahi étainahini eta majapanuirainahini ena páureana. Étachuchanéni mavarairahi mayumuruca eta plata, taicha ema tíamerahihi. Títecapa émarichuhivare tiúnarecarahi eta plata. ⁷ Tacahe, ema Jesús máichapa:

—Pésamirica esu suca esena. Suíchachaha ésu eta suvarahaquene taicha nícumunuichuhi eta juca tayeheyarehi eta nécarí. ⁸ Ema páureana, tamutuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe —macahepa.

Ena Lázaro, navarahavare nacapaca

⁹ Tacahe, camuriana ena tisamairicanahi eta matiarahirahi ema Jesús te Betania. Tiyananapa náimahapanayarehi. Énerichuvare náimahapanayarehiva ema Lázaro, ema máechepurehi te máecari.

¹⁰ Tacahe, ena tuparairucana napanerechavarepa nacapacayarehi ema Lázaro. ¹¹ Taicha émavenehi tíchahi eta nasuapiraipahi ema Jesús ena camuriqueneana achaneana. Vaipa nasuapahini eta navanairipiana ena tuparairucana.

Títecapapa ema Jesús te Jerusalén

(Mt 21.1-11; Mr 11.1-11; Lc 19.28-40)

¹² Te apanapa sache, ena nani achaneana táimiyanaqueneanahi eta piéstayarehi eta Pascua, nasamairiricapa eta máitecapirayarehi ema Jesús tayehe eta avasare. ¹³ Tiúrisamureanarinehi. Eta náurisamurevahi, navehapa eta tajuru eta cáchipaca. Tiyananapa nácapahi éma. Eta napiarasirapahi, ánipa nacahe:

—¡Yare, Tata! ¡Piti yátupiquenévihi rey viyehe viti israelítana! ¡Asulupaya! ¡Piti vanáirucaquenévihí me Viya! ¡Ichape eta vicunachiravi piti! ¡Viva ema Viáquenu! ¡Viva! —nacahepa.

¹⁴ Ema Jesús ticaperapahi eta burricu eta masiapi-rahi, taicha ene tacahehi eta táechajiriruvahi eta Sagrada Escritura: ¹⁵ “Eti ecavasanahi te Jerusalén, vaipa ecupica, taicha márjapa ema eyeheyare Rey. Tímaticareyarehi éma, ticaperayare eta burricuchicha. Mámaphi eta iúritaresirayare” tacahehi eta Sagrada Escritura.

¹⁶ Eta juca ajureca eta vimacaicutiaraquenehi viti máimitureana. Tapaenumava te máechepucapa ema Jesús, vicaicutiarahi eta tacayemahi eta Sagrada Escritura, táechajisihairahi éma, étapa eta tamutu eta apamuriana máíchararacavanahi.

¹⁷ Tiuri puiti, ena apamuriana achaneana tímararacanaripa ema Jesús eta macaechepusirahi ema Lázaro te

máecari, náechajisihairahi éna eta náimahaquenehi.

¹⁸ Eta tacahe, camuriqueneanahi ena achaneana tiyananahi nácapahi éma, taicha navarahahi náimati ema tíchahi eta tíamicare. ¹⁹ Tásiha, eta náimairahi ena fariséoana eta camurianairahi ena tiácapanahi, náichacacapa:

—¡Váhichara víturucaimahi taicha tétavivavahi eta nasimutuvahi ena téhicanahi éma!

Ena apavasaqueneana navarahavare náimati ema Jesús

²⁰ Natiarihivare ena apamuriana achaneana apajuecuruhana tayehe eta Jerusalén. Énerichuhi éna tímitecanahi tiyujarapananahi te jena piéstairahi.

²¹ Tiyananapa napauchahi ema vichamuri Felipe. Ánipa tacahe eta nayaseasirahi:

—Tata, víti apanava vivaraha vímati ema Jesús —nacahepa.

²² Tacahe, ema Felipe tiyanapa mametacahi ema Andrés. Tásiha, ena apinana tiyananapa nametapanahi ema Jesús. ²³ Tásiha, ema Jesús máichavacapa:

—Jéhevare puiti, tiánehipa eta népeniraya nuti Manerejirunuhi ema Viya. Nápechavayaresera nítareca, apaesa nucunachacareyare eyehe. ²⁴ Nutupiruva numetacache: Te vahi vicuevaca eta evaraqui te apaquehe, vahi téjapacaimahi. Tanasiyareichuhi eta tasimutuva eta evaraqui. Téhesera vévacahi, tétavivavaya eta táejapasiraya. ²⁵ Nácani téñamavanahi eta náitaresira, tiávamirahuana eta náehisiranu, énajivayare ticamitiequenehavanayare eta náitaresira. Nácani tíjaracavanayare eta náehisiranuyare, tájinavare vahi náeñamavahini eta náitaresira te juca apaquehe, tiúchuchuanayare éna. Máíchequaraquireyare eta náitaresirayare. ²⁶ Énerichuvare nácani tivarahanayare ticaemataneacanuana, tacamunu tímerecavanayare yátupi eta náehisiranuhi. Tásiha, nútí nucaejacavacayare éna te néjasihayare nútí. Ena nani, tétavivavayare eta macunachirayare ema Tata.

Ena Jesús tímereuchava eta máepeniraya

²⁷ Ema Jesús táimipanererecachi eta máepenirayare. Ánipa macahehi eta máechajiriruvahi:

—Tiánehinapa eta népeniraya. ¡Ichape eta nupisirahi! ¿Tiúripuca nuyaseaca ema Tata macatiuchanuini apaesa vahi nucucatajivaini? ¡Váhiquene nuyaseacaimahi, taicha nútí tímitecanuhi te juca apaquehe eta népeninavacaya ena achaneana!

²⁸ Tacahe, macahevarepa:

—Tata, pímereca eta pítipajijíásirava apaesa nacunachavi ena achaneana —macahepa.

Tásiha, tíjahúchavapa nasamahi eta mahu ema Viya te anuma. Ánipa macahe:

—Nímerecaripa eta nítipajijíásiravahi. Jéhesare, nápechavayareva nímerecayare —macahepa.

²⁹ Tacahe, ena achaneana natiarihiqueneanahi nasamahi eta máechajisirahi ema Viya. Váhiserá nácaicutiarahini, náimijachaichucha titureca. Tásiha,

ena apamuriana, ángelepuca éma téchajicahi nacahevare.

³⁰ Ema Jesús máichavacapa:

—Vahi nútivenéna eta juca esamaquenehi. Ema Tata tímisamahehi, mavarairahi esuapayare. ³¹ Achichu juca sácheanayare, ticapacuanainapa ena achaneana téhicanahi ema Váinaraji. Eta nacapasiranuya, tacaviureyare namutu ena achaneana te juca apaquehe eta náicuñayare. Eta népenirayare nuvachachainapa eta nuratahairaya nucuchucuhavaca nácani ticasifñavanahi nuyehe. Téquecavanainapa eta nuyehe ena machanerainihi ema Váinaraji. ³² Eta tacahe, te nacatupihanupa te anuquehe te crusu, te nacaicutiarapa ena achaneana apanapanenejiana eta nasamairisiraya, énajivainapa tipachuananaya téhicanuanainapa —máichavacapa.

³³ Eta juca máichiravacahi ema Jesús, mavarahahi nacaicutiarayarehi eta táichararacavayarehi eta máepenira. ³⁴ Tacahe, ena achaneana tisamararacanihi najicapapa éma:

—¿Tájahasica tacayema eta péchajisihahi eta pépeniraya te crusu? Viti vímijachaipahi pítiripa ema Cristo, piti Manerejiruvihí ema Viya. Viti visamahi eta Sagrada Escritura te náechajicuha máichecuareyarehi eta máitaresiraya ema Cristo. Vahi vicaicutiarahini —náichapa.

³⁵ Ema Jesús máichavacapa:

—Ecamapurava esamararacanu mapurare nutiarihichaha eta eyehe. Numicauchahechaha taicha ánipirine eta juca ímairanuyare apaesa vahi eucayutete tayehe eta timapicu. Taicha nácani tájinahi náechaquenénahi, ticayutetuanayare. ³⁶ Esuapanu eta juca numicauchahechaha apaesa ímiturecaya éti apanava, íamayare eta juca tajarahiquene —máichapa.

Te títapiricapa ema Jesús eta máichiravacahi, tiyanapa majunijimurihapa. Vaipa máimerecavahini eta nayehe.

Tétavicava eta namuracasamurevanahi ena ticavasanahi te Jerusalén

³⁷ Ichapemurihi eta náimairahi ena ticavasanahi te Jerusalén eta tiáramicareana máichaqueneanahi ema Jesús, váhiquenesera nasuapahini éna. ³⁸ Étahisera tacachehi títauchavayarehi eta májucaqueneanahi te ajureca ema profetaini Isaías tayehe eta tamuracavahi eta namasuapirayare. Ani tacahehi eta táechajiriruvahi: “Tata Viáquenu, nájina ticaicutiaranaina eta péchajirivanahi vímiturapianahi víti. Píti pímerecaripahi eta pítupajijiasiravahi, váhiquenesera nasuapavihini”.

Énerichuvare ani tacahehi eta májucaqueneanahi ema Isaías: ⁴⁰ “Ema Viya, eta máimairahi eta namuracasamurevanahi, máisapahi tiápajucava eta namasupajirairavahi, tímicutijiricavahi púchuquiána éna. Váhiquene tétupirisamurechavanaimahi. Váhivare navarahaimahi nacasiñavahini me Viya, apaesa macanaracavacahini” tacahehi eta májucaquenehi

ema víyahaini Isaías. ⁴¹ (Ema profetaini Isaías, tiáramecahi eta máimairahi te mavapure eta táetavisiraya eta majaraiva ema Cristo, étpa eta masantu-vahi eta te máejasihahi.)

⁴² Nararihihisera ena aquenucarahana tinerejicavarnaripahi ena tisuapanahi. Váhiserá návarahahini náimerecavahini eta náehisirahi, napisirahi nacaquijihini eta te návacureana. ⁴³ Taicha étachucha náuricahi eta nacunachacarevahi nayehe ena nachamuriana, ena fariséona. Tasapihaichucha náepuruhi eta nacunachacarevayarehini me Viya.

Tímicuñarahi te vahi visuapa eta máechajiruvana ema Jesús

⁴⁴ Ema Jesús tijaranupa eta máechajisiravacahi ena achaneana. Máichavacapa:

—Nácani navarahahi tisuapanuana, tímaticareanaripa eta nasuapirahivare ema Tata, ema tivane-canuhi. ⁴⁵ Tacutiquene nácani tímatinuanahi eta nímiturapiana, náimatipahivare eta mapanereruana ema Tata. ⁴⁶ Taicha nútí yátupiquenénuhi eta numicau-chiravacahi ena téhicanuanahi te juca apaquehe. Váipasera tavehaimahi eta timapicu. ⁴⁷ Tacutiquene nútí, vahi étaina táimitecanuhini te juca apaquehe eta nícuñacahehini eti achaneana. Eta tímitecanuhi, nucuchucuhaheyarehi. Nácanisera nasamairicari-pahinénipuca eta néchajiruvana, váhisera nasuapanuhini, nasapiha tépurunuanahi, muracayarehi eta náicuñayare. Eta náepuruirahi eta néchajiruvana, étaripa tiviuhavacainapa te jena sáchezare nacayaseserehipa te mamirahu ema Viya. ⁴⁹ Taicha vahi nútijiriruvainahini eta nímituresirahi. Ema Tata tivanecanuhi, éma tíjaracanuhi eta nímiturapianayarehi. ⁵⁰ Eta tacahe, numetacachehi puiti tamutu eta numetacasivanahi. Vahi nuhapapicaimahi, taicha nímatihí tacaitarecayarehi nácani tisuapanahi eta máimiturapiana ema Tata —macahepa.

Ema Jesús, masipapevachavacapa ena máimitureana

13 Tiuri, te jena sácheanahi tamirahupaipahi eta Pascua, ema Jesús máecharipa táitecapauchayarepa eta majunijisirayarehi eta juca apaquehe. Tiyanayarepa mayehe ema Maiya. Tétavicavahi eta máemunasirahavihi viti máimitureana. ² Jéhesare ema Júlasí, máimipanerecharipa ema Váinaraji eta máijaresirayarehi ema Jesús. Émasera ema Jesús, máecharipa eta machavirayarepa mayehe ema Maiya taicha eta másinehi. Émarichuhi ema Maiya tíjaracahi eta tamutuirayarehi máituruequeneha. Tacahe, te jena yati, eta máenisirahavihi viti máimitureana, técheputapa ema Jesús. Tivejamuhicavapa eta mamuiraha. Tiáyuruñequechavapa te mayehe paño. ⁵ Tásiha, majucuhapa eta une te bañadora. Tépanavapa tisipapevachavavihi eta vívapeana viti máimitureana. Mavehavarepa eta paño, tíjapevachavaviha.

⁶ Tásiha, te macapayacapa ema Pedro, éma vahi máisapavahini eta masipapevachira eta máivape. Máichapa:

—Tata maestro, vahi táurica eta pisipapevachira-nuhini núti —macahepa.

⁷ Tásiha, ema Jesús majicapapa:

—Páuresamivihi píti. Vuíchaha picaicutiarahini eta tacayemaqueneanahi eta juca. Achichuinapasera picaicutiarainapa.

⁸ Ema Pedro máichavarepa:

—Nútisera, vahi pisipapevachanuimahi.

Ema Jesús máichavarepa:

—Te vahi nucusipapevachavi, vaipa pítiparacaimahi eta nuyehe.

⁹ Tacahe, ema Pedro máichapa:

—Tata, vahi tácarichuimahi pisipaca eta nívaeana. Énerichuvare eta nuvahuana étapa juca nuchuti.

¹⁰ Tásiha, máichavarepa ema Jesús:

—Nácani nacaviravahi vahi tácomesaimahi tiápechavana ticasipana. Tacarichu ticasipayarehi eta náivapeana. Éti, epachihavacaripa; váhisera ámutuhini epachihahini —máichapa.

¹¹ Ema Jesús máichahavihi eta juca vahi vámutuhini vipachihahini taicha máimatihí ema tíjararecayarehi.

¹² Te títavapa eta masipapevachirahavihi, ticamuirihavarepa eta mamuiriha. Tásiha, téjacapa te mesa. Máichahavipa:

—¿Ímatiequenehapuca éti eta juca níchirahehi? ¹³ Eti ímijarechanu “Tata Maestro”. Étupicahisera, taicha yá-tupiquenénuhi eta numaestravahi. ¹⁴ Eta níchirahehi núti emaestro nusipapevachirahehi, ene ecaheyare éti eta ítaresiraya. Esipapevachacacayare eta ívapeana.

¹⁵ Éhicayare eta juca níchaquenehi. Étayareichu eta nímitusirahehi. ¹⁶ Nutupiruva numetacahe: Ema musu vahi macachuricaimahi ema máquenu. Émaripa ema vanairucahi váhivare macachuricaimahi ema tivanecahi. ¹⁷ Te yátupina ecaravahuinapa eta juca nímiturapiana, tájina íchiravaimahi. Ecutinuyareva eta ítauchiraya tamutu.

¹⁸ Néchahinéni núti vahi ámutuhini esuapanu. Nímatihivare eti yátupiqueneana nunerejiruanahi. Títauchavayarehisera eta táechajiruvahi eta Sagrada Escritura, ani tacahehi: “Ema néniruasahi, masapihahi ticatianacanuhi”. ¹⁹ Puiti nucaínapucava numetacahe apaesa te táitauchavapa eta juca numetarapi, ímatinuinapa nuti yátupiquenénuhi Cristo. ²⁰ Nutupiruva numetacahe: Nácani tijacapaheanayare éti nuvanerua-na, ticaecheranahi eta najacapiranuhi núti apana. Énerichuvare, najacapahivare ema Tata Nucaiya quene.

Ema Jesús máechajisíha eta máijaresirayare ema Júlasi

(Mt 26.20-25; Mr 14.17-21; Lc 22.21-23)

²¹ Te títapiricapa eta máichirahavihi ema Jesús, téñamavaipa te masamure eta máijaresirayarehi ema émana vichamurihi. Tacahe, matupiruvapa máichahavihi:

—Nutupiruva numetacahe: Mararihi ani te etaracu ema tíjararecanuyare —macahepa.

²² Tacahe, viáramecarinehi eta máichirahavihi. Véseniuijiricacapa. Vahi vímatihini nájahhipuca ema máichaquenehi. ²³ Nutiarisera nuti nachamuri máemunarupananuhi ema Jesús. Nucachacayahi éma eta véjasirahi te mesa. ²⁴ Tacahe, ema Pedro tíumatsiuiquichanupa nuyaserecaini nájahhipuca ema máichaquenehi ema Jesús. ²⁵ Tásiha, núti nujajaicapa ema Jesús:

—Tata, ¿nájahasica ema píchahi?

²⁶ Tásiha, tíjicapanupa:

—Nuyuvetumecaya eta pan, néchipaejicaya. Ema níjararuyare, émara ema tíjararecanuyare —macahepa.

Tacahe, máechipaejicapa eta pan, máijaracapa ema Júlasi. ²⁷ Jéhesaréinehi, ema Váinaraji enevanepa mávahácahi éma. Tásiha, ema Jesús máichavanepa:

—Júlasi, eta juca pipanereruhi, táitauchavavanepa puítinaichu —máichapa.

²⁸ Váhisera vácaicutiarahini eta juca máichirahi ema Jesús ema Júlasi. ²⁹ Vímiyahichucha eta mavacharesirayarehivare eta tinicacare tayeheyare eta piesta, mácajihivarepucaini ena páureana, taicha émahí técha eta tarera máunasirarehi eta plata eta matesorerovahi. ³⁰ Te títanésipa ema Júlasi eta manisirahi eta pan, tianapa tíuchucahi. Tijunijicahavipa te jena yátiquenehi.

Ema Jesús macavanairipipa eta vémunasiracacayare

³¹ Eta máachusiraipa ema Júlasi eta viyehe, ema Jesús máichahavipa:

—Títecapapa puiti eta táitauchiravayare ímahainapa éti eta máitupajijiasirava ema Viya étapa eta nítupajijiasiravayare núti Manerejirunuhi éma. Éti ecunachahavinapa. ³² Nímerecainapa eta máitupajijiasiravahi ema Tata, ema apana máimerecayareva eta nítupajijiasiravahi nuti Machicha. Puiti juca sácheanayare títauchavainapa. ³³ Nuchichanaveana, ánipirine eta juca ecachaneranyare. Tásiha, nuyanainapa. Éti, etanucanuinapa; vuíchahasera ítujicavaimahi ecapayacanua. Étarichuhi eta numetarapihi nayehe ena ticatianacanuana eta níchiravacahi vahi títujicavanaimahi ticapayacanua. ³⁴ Puiti nunaquicayare eta juca arairu nuvanairipi eta eyehe. Émunacacayarehi ena echamuriana. Ecutinuyarehi eta némunasiráhehi núti. Ene ecaheyare éti apanavare. ³⁵ Te yátupina émunacaca, eta tímatiacaeheanayare ena achaneana étirahi eti nímitureanahi —máichahavipa.

Ema Jesús máimereucha ema Pedro eta máepiyasiravaya vahi máimati ema Jesús

(Mt 26.31-35; Mr 14.27-31; Lc 22.31-34)

³⁶ Tásiha, ema Pedro mayaserecapa:

—Tata Maestro, ¿távihainapa picaijuheya?

Ema Jesús majicapavarepa:

—Eta nucaijuheya puiti, éti vuíchaha ítujicavaimahi éhicanu. Ecapayacanuyaresera. Váhivare ánasimahi éti. Vuíchahasera tǎjahúchavaimahi —máichapa.

³⁷ Ema Pedro majicapavarepa:

—¿Tájaha tacuichavaini vahi nucuratahahini néhicavi, Tata? Núti níjaracava népena píchavenénahi píti —máichapa.

³⁸ Tacahe, ema Jesús máichapa:

—Píti, pímiachavapuca píjaracava pépena eta picatiuchiranuya. Numetacavisera: Puiti juca yati, te tamirahuinarichaha eta táechajísiraya eta varayu te tíjararahi, píti mapaheyare pépiyacavayare vahi pímatinu, eta picatiuchiravayarehi píti —máichapa.

EMA JESÚS, JÉHEVARE ÉMA TÉHICACARE ETA VÍTECAPIRAYA ME VIYA

14 Vahi ecueñamava éti. Ácasiñava eta me Viya; ácasiñavavare eta nuyehé. ² Taicha ánaqui te mávasa ema Tata, camuri eta tiáviravacare iávihayare éti, taicha ícuchihi éti. Tacahe, tatuparacahi nuyanyare nétupiricayare eta iávihayare. ³ Te táuripa eta iávihayare, nútijapainavarepa nuchavainapa népanahéna pa apaesa áchahanenu éti tayehe eta návihayare núti. ⁴ Eti ímatiripa eta nucaijuheya. Ímatipahivare eta achene nuyanihayare.

⁵ Tásiha, ema Tomás majicapapa:

—Tata, váhira vímati távihapuca eta picaijuheyare; váhivare vímati eta achene piyanihayare —macahepa.

⁶ Ema Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarerahi, nájina apanaina ácasiñaimahi eta ítecapirayare me Tata. ⁷ Eta ímatiranuipa núti, ímatiripahivare ema Tata, taicha ímahanuripa puiti eta juca nucachanérahehi —macahepa.

⁸ Ema Felipe máichapa:

—Tata, pímechahavipaini ema Viya apaesa viúrisa-murepaini eta vímatirainahini.

⁹ Ema Jesús majicapavarepa:

—Ánaquiaparipa eta picachaneranuhi, piti Felipe, vuíchahacaruvaré pímatinu. Eti ímahanuripahi, ímatinupavare yátupihí. Tímicutijiricavaipahi émainahini ímararacahini ema Tata. ¿Tájaha tacayema pivarahai-chahavare nímechavi ema Tata? ¹⁰ ¿Váhípuca pisuapanuhi eta mávahásiranuhi ema Tata, tásiha, éta pa eta návahásirahivare núti apanava? Eta juca nucayema-queneanahi, vahi nuvehaqueneanaina te nuchuti. Étara eta mávahásiranuhi ema Tata, títauchavahi eta mavarahaqueneanahi. ¹¹ Esuapanu eta návahásirahi núti ema Tata, éta pa eta mávahásiranuhivare éma. Te vuíchahapuca esuapanuhini eta numetarapi, étavan-erécainaséra esuapa eta tiáramicareanahi níchaqueneanahi. ¹² Nutupiruva numetacahe: Nuyanainapa eta me Tata. Eta tacahe, éti yátupi eta esuapiranuhi, nítsivahe éti. Níjaracahe eta eratahairaya ecuchuca eta tiáramicareana, ecutinuyare. Níjaracahevare eta eratahairaya ímitupirucha eta náchanevana ena achaneana. Jéhesare, eta juca tiápajupanavayare eta tacunacha-

careva tayehe eta tiáramicareana íchaqueneanayare.

¹³ Núti níjaracahevareva tamutu jácani eyasearunua-nayare te níjare, taicha nuvaraha ichape eta ecunachirayare ema Tata.

EMA JESÚS MACAMETARAPI ETA MÁUCUPAISIRAYA EMA ESPÍRITU SANTO

¹⁵ Eta esuapiranuhi tímereuchaheya eta yátupirahi eta émunasiranuhi. ¹⁶ Tásiha, núti nuyaseacainapa ema Tata máevataca ema Espíritu Santo. Éma, tímica-tacaheyare, ticurisamurechaheyareva. Yátupique-nevare eta mávahásiraheyare eta ítaresirayare. Vahi tí-najiacahémahi. ¹⁷ Éma, tímitucaheyare, máitameta-cayare tamutu eta yátupiqueneanahi tásihaqueneana eta me Tata. Énasera ena achaneana, vahi ticaijaracasianaimahi, taicha vahi návarahahini najacpahini éma. Eta namaratahairahi náimaha éma, náimijachahi vahi máimaticarehíni éma. Étiserá ímatiyare éma, taicha máitavacacayare eta mávahásiraheyare. ¹⁸ Núti, váhivare nujunijiacahémahi. Nuchavayare eyehe, ecachanenuyareva. ¹⁹ Puiti juca sácheanayare, ena achaneana vaipa tímahanuanaimahi. Étiserá ímahanu-paracaya, taicha nuchavayarehi nítareca. Éti apanavare ítarecayareva nícha núti. ²⁰ Te nuchavapa nítareca, échavainapa éti eta mávahásiranuhi ema Tata, échavainavarepa eta návahásirahevare núti, éti apana iávahácanuhivare. ²¹ Nácani náimatiyare eta nuvanairipiana, náitauchayareva, éta tímicaecherachayare eta yátupihí eta náemunasiranuhi. Tásiha, ichapeyare eta namunavayare me Tata táichavenénahi eta náemunasiranuhi. Núti apanavare ichapeyareva eta námunasiravacayare. Tásiha, nímerēcavayareva nayehe —macahepa.

²² Ema Tadeo máichapa:

—¿Táicharacavayare, Tata, eta vicarichuirayare pímerēcava eta viyehe; tásiha, ena apamuriana achaneana, vaipa tímahavianaimahi? —macahepa.

²³ Tacahe, ema Jesús majicapapa:

—Nácani témunacuanayare, nasuapayare eta nuvanairipianahi. Tásiha, ema Tata, tétavicavayarehi eta máemunasiravacaya. Tásiha, vítijapainapa viávahácavacayare éna. ²⁴ Nácanisera vahi témunacuanaimahi, váhivare nasuapaimahi eta nuvanairipiana. Eta juca esamaqueneanahi puiti, vahi tásiha-quenenahini te nuchuti. Tásihaquenehi me Tata, ema tivanecanuhi.

²⁵ Nucamapurava numetacahe puiti taicha ánipirine eta juca nucaheyare eta eyehe. ²⁶ Émasera ema Espíritu Santo mavaneruyare ema Tata níchavenénahi núti, ema tímicatacaheyare, ticurisamurechaheyareva. Énerichu tímitucaheyare, témechaheyare tamutu eta juca numetarapiana eyehe.

²⁷ Puiti nucametavaya eta eyehe. Nuvarahasera tacuijahini íchiravainahini, ecanarasiraina eta epaneruruana. Núti vahi nácutinuhini ena apamuriana achaneana eta nujunijisiraheya. Vahi ecuvayuchava eta éñamavairaina. Váhivare ecupica. ²⁸ Puiti numetacaheripa eta nuyanirayare; tásiha, éta pa eta nuchavi-

rayare eta eyehe. Eta tacahe, te yátupina émunacanu, evapinavayarehi nuyehe núti eta nuchavirainapa mayehe ema Tata, nápechavaya nucachane éma tayehe eta máetaviuchirahi eta majaraivahi étapa eta máitupajijiasirava. ²⁹ Nucametarapivane eta juca, apaesa te ímaha táitauchavapa, esuapainapa yátupi.

³⁰ Ánipirine puiti eta juca néchajirisiravahi eta eyehe taicha ávanepaipa títecapa ema Váinaraji eta mavarairahi tíaquipaicanuyare. Éma, yátupihí táquenuhi eta juca apaquehe. Váhiquenesera títahacanuimahi núti. ³¹ Nuvarahasera náimatiya ena achaneana eta némunasirahi yátupi ema Tata; tásiha, nítauchaparacahi tamutu eta mavanairipiana. Échepuca. Viyana viyejecava eta te juca —máichahavipa.

Eta táenaqui eta uva étapa eta tasimutuquene eta tatavavajiana

15 Núti nucutihi eta sucureca uva. Étiripa éti ecuti eta tatavana. Ema ticachichanu tímicutijiricavahi ema tijaneacahi eta sucureca. ² Éma máechuca eta máhiriquerehi tatava. Máepachiacavare eta apana tatava eta ticahirisi apaesa tacahipana. ³ Eti epachiha-vacaipahi taicha eta nímiturapiana emetacasivanahi. ⁴ Eta tacahe, ímiyanavayare eta iúrujasiranuyare taicha eta návahásirahehi núti, apaesa ácuti eta tatava ticahiriqui. Taicha te viyuvetuca eta tatava eta uva, vaipa ticahimahi. Ene ecahehi éti, te vahi ecuimiyana iúrujiacanú, tájina vaipa ecaemataneacanuimahi.

⁵ Nápechava nímicutichinahe puiti. Núti nucutihi eta táenaquihi. Éti tímicutijiricavahi nutavahehi. Te ímiyanava iúrujiacanú, ichapemuriyarehi eta ecaemataneasiranuya. Téhesera ácarichu éti, tájina eratahaquenémahi ícha. ⁶ Nácani tijunijiacanuanayare, ticutianayare te ticaechu eta tatava. Tíájiquiyarehi. Tásiha, nacurujicainapa, náijuchainapa te yucu.

⁷ Ímiyanava yátupina eta iúrujasiranu. Yátupinavare eta itauchiraina eta nímiturapiana. Tásiha, te eyaseacapunuca jácani evarahaqueneanahi, núti níjaracaheya.

⁸ Nuvaraha ímerekavaya eta táurivayare eta ecaemataneasiranu, apaesa tétavicavainapa eta macunachacarevaya ema Tata. Tásiha, ecaecheraipahi eta yátupirahi nímiturehe. ⁹ Ímiyanava eta iávahásiranu taicha tétavicavahi eta némunasirahehi tacuti eta máemunasiranuhi ema Tata. ¹⁰ Eta ímiyanirava itauchapaipa eta nuvanairipiana, tijurucapaipa eta ímatirahi eta némunasirahehi. Tacuti eta nítauchirahi núti eta mavanairipiana ema Tata, nímatipaipa eta máemunasiranuhi éma. ¹¹ Eta juca nímicutiarachirahi, nuvarahahi iápajuca eta iúrisamurevahi tásihaquenehi eta iávahásiranuhi núti. Ecutinuya eta núrissamurevahi.

¹² Nápechahe numetacahe eta juca nuvanairipi eta eyehe: Yátupina eta émunasiracacaina. Ácutinu eta némunasirahehi núti. ¹³ Ena achaneana, te navarahahi náimerecaya eta náemunasirahi nácani náemunaruanahi, natanucayarehi náijaracasicha. Nácani tíjararecavanapuca eta náepenirahi énavenehi ena náemunacasareana, éna yátupihí náimereca eta náemunasirahi. Ene nucahehi núti, níjararecavayare

eta népeniraya íchavene eti némunacasareanahi.

¹⁴ Jéhevare, éti yátupiquenehi némunacasareanahi, eta itauchirahi eta nuvanairipianahi. ¹⁵ Vahi vánaracahéna nuyehe, taicha ena vanaracanahi vahi náimatimahi eta mapanereruanahi ema náquenu. Étiserá némunacasareanahi. Eta tacahe, numetacahe tamutu eta mapanereruana ema Tata. ¹⁶ Vahi étinahini enerejicanuhini eta éhisiranuhi. Núti nunerejicahehi. Puiti nutuparacahe, nuvaraha táuri eta ecaemataneasiranu eta epaisiraya eta ecametarairuyare. Nuvaraha ecájimuyacahini ena achaneana náehicanuhini. Yátupina eta ímitusiraina apaesa náimiyana eta náehisiranuhi. Tásiha, ema Tata tíjaracaheyare tamutu eta eyasearuanayare te níjare. ¹⁷ Nuvaraha itaucha eta juca nuvanairipiana. Yátupina émunacaca.

Ena achaneana ticatianacaheanayare tacutiya eta nacatianasiranuhi núti

¹⁸ Puiti numetacahevare, te nacatianacahe ena achaneana, échavayare éti vahi étinahini nacatianaca. Núti nacatianacahi. ¹⁹ Taicha, te étainaichahini iávacuhahini eta tayeherepiana eta apaquehe, ena achaneana témunacaheanaripahini, tacutihini eta náemunajirisiracacahi éna. Étasera eta nunerejirahehi te nataracu ena achaneana, étapa tiviucahehi eta nacatianasirahehi taicha ínajicaipa eta máeperajiquene tayehe eta apaquehe. ²⁰ Échavavare eta juca numetaruhehi: “Vahi másapihaimahi ticaemunacasi ema musu mayehe ema máquenuhi”. Núti ticatianacuanahi; ene ecaheyarehi éti, eta nacatianasiraheyareva. Vahi nasuapahini eta nímiturapiana. Váhivare nasuapaimahi eta ímiturapiana éti apanava. ²¹ Eta éhisiranuhi núti, étaripa tiviucaheyare tamutu eta juca nacatianasiraheinapa táichavenehi vahi náimatihini ema Tata tivanecanuhi.

²² Tacuijarichuhipucaini naviurevainahini éna, te vahi nucuitecchini eta nímitusiravacahini. Tépurunuanahiséra, náepuruhivare eta nímiturapiana; tásiha, tétavicavahi eta naviurevanahi. ²³ Taicha nácani ticatichanuanahi núti, nacatianacahivare ema Tata. ²⁴ Énerichuvare tacuijahini taviuchavacahini te vahi nucuime-recahini eta tíaramicareana níchaqueneanahi. Mamaratahaquenehi máichahini mácani apana achane tacutihini eta níchaqueneanahi núti. Étasera náimahiripahi, váhiquenesera nasuapahini. Nasapiha ticatianacuanarichucha, nacatianacahivare ema Tata.

²⁵ Étasera tacaheyarehi eta táitauchiravayarehi eta táechajiriruvana eta Sagrada Escritura te Salmo, ani tacahehi: “Tájina taviuchanuhini eta nacatianasiranuhi”.

²⁶ Étiserá, mararihiyare ema tímicatacaheyare, ticurisamurechaheyareva. Te nítecapauchayarepa ema Tata, nuyaseacaya mavaneca ema Espíritu Santo. Éma, te máitecapapa, tímereuchaheyare eta yátupiqueneana. Tímereuchanuyareva núti eta eyehe. ²⁷ Éti apanavare ímereuchanuyareva taicha tiyereripahi eta ecachaneranuhi, tépanavapa te nunerejicahénapa.

16 Núti numetacahe eta juca apaesa vahi ecuarami eta nacatianasirahe, váhivare ecuinajicava eta éhisiranuhi. ² Taicha tiáquijicaheanayare tayehe eta viúrujisirarevana. Énerichuvare navarahayare ticapacaheana. Éna, náimijachayarehi tiúriyarehi eta náichirayare te mamirahu ema Viya. ³ Éna, náichayare eta juca táichavene eta namáimatirahi ema Tata, váhivare náimatinuhini núti. ⁴ Numetacahe eta juca apaesa te táitecapapa eta íchavaquenevaya, vaipa ecuarameca. Échainapa eta numetasirahehi.

Éma Espíritu Santo tímicatacahavihi

⁵ Puiti tiánehinapa eta nuyaniraya nuchava eta me Tata. Eta nucachaneirahehi, ticatianacuananahi núti ena achaneana. Puítisera eta májinairanuyare, ticatianaheanainapa éti. Eta juca tacahehi, nupaenumava numetacahehi puiti. Étisera németeaca vuíchaha ecaicutiara eta numetarapi, taicha váhivare eyaserecanuhini eta nítametasirayare, étahinéni eta nucaijuhayare. ⁶ Esapiha éti ecatisamurevahi taicha eta juca numetasirahehi eta nuyaniraya. ⁷ Tayanapane vahi eyaserecanuhini, nutupiruvaseva numetacahe: Tatuparacahi eta nuyaniraya nuchava mayehe ema Tata, taicha te vahi nucuyana, vahi títecaimahi ema nuvaneruya. Éma tiúrichaheyare, tímicatacaheyare, ticurisamurechaheyareva. ⁸ Énerichuvare ena achaneana te juca apaquehe, manacasamurechaya eta nacatuparahairahi náichayarehi eta táuriqueneana, náehicanuvare núti. Manacasamurechavacayareva éna eta náimatiraina eta nasipecaturaravahi. Taicha te vahi nacubaraha náinajica eta tamauriqueneana, téhevare vahi nacubaraha náehicanu núti, ticaicuñanainapa te yucu. ⁹ Éma Espíritu Santo manacasamurechavacayare ena achaneana eta najacapacarevaya me Tata nácani ticasañavanapuca eta nuyehe, taicha nuyanaya eta me Tata, néchajiuachavacayare éna. (Vaipa ímahanuimahi éti.) Nácanisera vahi nasuapanuhini núti, tanasiquenehi eta napecaturanahi. ¹¹ Manacasamurechavacayareva ema Espíritu Santo eta yátupina táiturevayare éna eta máicuñayare ema Váinaraji náehiruhi te juca apaquehe. Éna apanava náepujuquichainapa tayehe eta yucu infierno.

¹² Maverachahaneni eta juca nuvarahaqueneanahi numetacahe. Váhisera eratahaimahi ecaicutiara puiti. ¹³ Téhesera máitecapapa ema Espíritu Santo, éma tiámayarepahi eta yátupiqueneana numaimitureheanarichaha, émainapa tímitucaheyare. Taicha mametacativahi eta máechajisiraheyare, énerichuvare timetacaheyareva eta íchavaquenévanayare. ¹⁴ Ichapenapa eta nucunachacarevayare máicha. Émainapa timetacaheyare eta nuvanairipianayarehi eyehe. ¹⁵ Taicha ema Tata tituparacanuhi eta nítirayarehi nécha tamutu. Eta tacahe, eta juca mametarapianayare ema Espíritu Santo tásihaqueneanayare nuyehe.

Vahi tánasimahi ecatisamureva. Tichavayare eta iúrisamurevaya

¹⁶ Ánipiyareichusera eta emaimairanuyare. Téhesera táequenénapa, iápechavainavarepa ímahanuyare. Taicha nuyanayarepa te mávihahi ema Tata.

¹⁷ Tacahe ena apamuriana nuchamuriana tiyaserecanuana:

—¿Tájahapuca tacayema eta juca mametarapihi, eta macahehi ánipirine eta vimaimairayare, tásiha, te táequenénapa viápechavainavarepa vímaha? ¿Tichavavanevaya eta mayanirayare eta me Maiya? ¿Váhipuca mánasimahi eta machaviraya? Váipavare vácaicutiara eta ánipirine eta macaheyare eta viyehe —nacahepa.

¹⁹ Éma Jesús macaicutiaravacahi eta navairairahi nayasereca. Máichavacapa:

—Núti numetacahehi eta ánipirine eta emaimairanuyare. Tásiha, te táequenénapa eta emaimairanuyare, iápechavainavarepa ímahanuya. Eta juca emacacutiaraquenehi. ²⁰ Tásiha puiti, nutupiruva numetacahe eta íyahairainasamipa éti, eJapanuvairayareva. Énasera ena apamuriana achaneana, tiúrisamureanainapa éna. Tásihasera te táequenénapa, vaipa íyahaimahi. Tétavicavasera eta iúrisamurevainapa eta táitsivaya. ²¹ Eta juca tímicutijiricavahi te tínacayare esu esena. Ánipichuhi eta sucatiruhavahi taicha eta suínasirayarehi. Téhesera te tamutupa eta suínasirahi, suémisisicainapa eta sucatiruhavainihi. Tiúrisamuréinapa eta suímairahi eta suchicha, tajurusirayarehi te juca apaquehe. ²² Ene ecaheya éti, ecatisamurehi puiti, ánipirichusera. Téhesera te viápechava vímahacacaya, tétavicava eta iúrisamurevaya. Nájinainavarepa tihapapicahémahi eta iúrisamureva.

²³ Te jena sáchevare, vahi nútumahi eyaserecanu. Émasera ema Tata eyaserecayarehi. Éma, tíjaracahayarehi tamutu jácani eyasearuanayare te níjare.

²⁴ Puíticha tájinaichaha eyasearapinahini me Tata te níjare. Ticamunucarehi eyaseacayare. Éma tíjaracahénapa. Étainapa ticurisamurecaheyare ichape.

Numetacahe eta nucapaquechiravacayare ena nánarayanayare

²⁵ Núti nímicutichinahehi eta juca numetasirahehi. Téhesera te táequenénapa, nutupiruvainapa numetacaheyare eta yátupiqueneana mapanereruanahi ema Tata. ²⁶ Te jena sache, eyaseacainapa ema Tata te níjare. Váipayare tacamunuimahi nuyaseuchahe eta mayehe. ²⁷ Taicha émaripa ema Tata témunacahehi éti, táichavénehi eta émunasiranuhivare núti. Éti esuaparipa eta yátupirahi eta mavanésiranuhi ema Tata. Tíjaracahénavanepa eta eyasearuanayare. ²⁸ Núti, eta násihahi mayehe eta nítésirahi te juca apaquehe. Puítisera nujunijicainavarepa eta apaquehe, nuchavainavarepa mayehe ema Tata —máichahavipa.

²⁹ Tacahe, viti máimitureana víchapa:

—Jéhevare puiti pitupiruvapa eta péchajisihahi. Vaipa pímicutiarachinahávihi. ³⁰ Vímativarepa eta yá-

tupirahi pímatiequeneha tamutu. Jéhesare, pímatiequeneha tamutu eta vipanereruana, étaripa eta juca vivarairahi viyaserecaviyare. Visuaparipa puiti eta yátupiquenérvahi Machichavi ema Viya —víchapa.

³¹ Tacahe, ema Jesús máichahavipa:

—Jéhepuca eta esuapiranu puiti. ³² Puítisera juca yati, títecapainapa eta éjanerepáisirayare éti. Ejunijicanuinapa, nucarichuinapa núti. Matiarihiyaresera ema Tata. Éma, ticachanenuyare. ³³ Numetacahevare tamutu eta juca apaesa vahi ecuarameca. Ácasiñava yátupina nuyehe apaesa tacuija ecuichiravaina, tayanapane ecatajivayare muraca te juca apaquehe. Ácasiñavahisera eta nuyehe, taicha núti máijjararunuhi ema Tata eta nucapaquemurihairayare namutu ena ná-naranahi —máichahavipa.

Eta mayujarasirahi ema Jesús, mayaseuchavacahi me Maiya eta náurivaina ena máimitureana

17 Te títapiricapa ema Jesús eta máechajisirahavihi viti máimitureana, tépanavapa tiyujaracahi. Máesenicapa te anuma. Ánipa macahe:

—Tata Nucaiyaquene, títecapauchanupa puiti eta táitauchiravayare eta pipanereruana. Nuvarahasera nucunachacaréni eta piyehe, tácutini eta nucunachiravihi píti. ² Yátupihí eta píjarasiranuhi eta aquenucairanuyare, te namirahu namutu ena achaneana. Nucaitairesirayarehivare namutu ena píchuhaque-
neanahi píjararunuanahi. ³ Níjaracayare eta náitaresirayare máichecuaraquireyare ena píjararunuanayare apaesa náimativi, píti Tata yátupiquenévihi Viya, nútipa núti Jesucristo, núti pivanerunuhi te juca apaquehe. ⁴ Núti nímerecahi ne achaneana eta picunachacarevahi. Nítauchaipahi tamutu eta pivanairipianahi pivarahaquenehi níchayarehi. ⁵ Puítisera nuchavainavarepa eta piyehe. Píjaracanuyare eta nuchavirayare te píjaravahi. Néjacainavarepa te pivare tayehe eta návinehi acane te tépanavainapa eta apaquehe.

⁶ Nítamuturucaripahi eta nímitusiravacahi ena píchuhaqueneanahi píjararunuanahi píti. Nímimatichavacahivare eta piúrivahi píti. Yátupihisera eta pichichanaveanahi éna, taicha nasuapahi eta nímiturapiana píjararunuanahi núti. ⁷ Náecharipahi tamutu eta juca nímiturapiana tásihaqueneanahi piyehe. ⁸ Náecharipahivare eta yátupiquenérvahi eta pivanesiranuhi. Eta tacahe, natupiruvahi najacapa eta nímitusiravacahi eta péchajiriruvana.

⁹ Eta tacahe, puiti nuyaseacavi, Tata, eta pijaneasiravacaina ena píjararunuanahi téhicanuanahi, taicha pichaneranahi éna. Vahi éna nuyaseuchavaca ena masuapajirairahanahi te juca apaquehe. ¹⁰ Núti néchahi eta piyeheravacahi éna. Eta tacahe, néñamavahi eta nayehe, nuyehanaipahi éna. Yátupihí eta náimatiranuhi eta pivanerunuhi, tásiha ticunachanuanahi ichape.

¹¹ Puiti núti nujunijicavacainapa ena píjararunuanahi. Énasera nanasiyarechaha te juca apaquehe. Nútisera nútijapainapa eta piyehe. Tata Nucaiyaquene, píti yátupiquenévihi eta písantuvahi. Nuyaseacavi pijanea-

sinanuvacachucha éna, apaesa náimiyavahi eta náurujiasiracacaina, návahásiracacayare nácutihini eta viávahásiracacahi víti. ¹² Núti nímatichavihi píti eta nayehe, éta pa eta píjare, apaesa yátupina eta náehisravina. Ichapemurihi eta nujaneasiravacahi éna eta nucachaneravacaichaha. Eta tacahehi, vahi náinajicavahini eta náehisrahavihi. Émanarichu ema téjecapavahi, ema tijararecanuyare. Étasera tacaheyarehi eta táitauchiravayarehi eta Sagrada Escritura.

¹³ Puiti nútijapainapa, Tata, tayehe eta jara piávihahi. Eta nucachaneravacaichaha éna, numetacavacahi eta pipanereruana, taicha nuvaraha vácuticacahini eta viúrisamurevaina. ¹⁴ Taicha ena achaneana te juca apaquehe, ichapemurihi eta nacatianasiravacahi táichavenehi eta najacapirahi eta péchajiriruvana nímitusiravacahi. Éna, vaipa náehicahini eta tayeheana eta juca apaquehe, ticutinuanaripahi núti eta numaehisirahi eta te juca apaquehe.

¹⁵ Vahi nuyaseacavi eta piviravacainahini te juca apaquehe. Nuyaseacavi núti eta picatiuchiravacainahini mayehe ema Váinaraji. ¹⁶ Taicha yátupihí éna vaipa tayeheanainahini eta juca apaquehe, ticutinuanaripa núti vahi tayahenuinainahini eta juca apaquehe.

¹⁷ Píjaracavacahini eta náurivainahini eta piyehe, náitusirainahini cápachi eta péchajiriruvana yátupiqueneana. ¹⁸ Píti pivanecanuhi nímiturecayarehi eta péchajiriruvana nayehe ena achaneana te juca apaquehe. Tásiha, núti nuvanecavacayareva ena nímitureana, náimituca ena apamuriana achaneana.

¹⁹ Puiti, eta némunasiravacahi éna, níjararecava núti, nítauchayare eta pivarahaquenehi. Nuvaraha ene nácahehine éna, yátupinahini nájaracavahini eta nacaemataneasiravayarehi. Yátupinahivaréni nasuapa eta péchajiriruvana yátupiqueneana.

²⁰ Váhivaresera nacarichuhi éna nuyaseuchavacahi eta piyehe. Énerichu nuyaseuchavaca ena tisuapanayare eta táunavayare eta áñoana, ena tijacapanayare eta péchajiriruvana. ²¹ Nuyaseacavivare váhini tacuitavahini eta náurujiasiracacayare éna. Píjaracahivaréni, Tata, te nasamureana eta návahásirahavinahini tácutihini eta viávahásiracacahi víti. Náurujiasirahavinavare víti, apaesa ena achaneana te juca apaquehe náimatihini yátupina eta pivanesiranuhi.

²² Núti níjaracavacaipahi éna eta náitupajijiasiravacayarehi tamutuirayarehi narataha. Vicutihí víti eta tamutuiravirataha. Návahácacahini éna, vácutihini víti eta viávahásiracacahi. ²³ Píti piávahácanuhi núti. Tásiha, núti návahácavacahi éna apaesa yátupinahini éna étanainarichuyare eta napanereruana, apaesa ena apamuriana achaneana te juca apaquehe étainahini náimatiarainahini eta pivanesiranuhi, éta pa eta pémunasiravacahi ena nímitureana tacutihí eta pémunasiranuhi núti.

²⁴ Tata Nucaiyaquene, píti píjaracanuhi ena nani píchuhaqueneanahi. Nuyaseacavi puiti eta nucachaneravacainahini tayehe eta návihayare núti. Náimahahini eta nujaravahi píjararunuhi taicha eta pémunasiranuhi te tépanavainapa eta tacaepiyairahi eta apaquehe.

²⁵ Tata Nucaiyaque, píti yátupiquenévihi eta pisantu-vahi. Ena achaneana te juca apaquehe vahi náimati-vihini. Nútisera nímativihi. ²⁶ Ena nani píjararunuanahi nímitachaviripahi. Tétavicavahi eta pémunasiranuhi. Tásiha, nuvaraha yátupina nasamava eta táetaviuchirahi eta pémunasiravacahi taicha éna tiávahácanuanahi núti.

Títecapanapa ena ticaratacanaya ema Jesús

(Mt 26.47-56; Mr 14.43-50; Lc 22.47-53)

18 Te títapiricapa ema Jesús eta mayujarasirahi, tiyanapa tiámamurihahavipa te apachara eta tatavarapi ticaijare Cedrón. Ánaqui tatiarihi eta huerta ticaijare Getsemaní. Visiapapa tayehe. ² Tacahe, ema Júlasí máimatihí eta juca viávirarehi taicha ichapemurihi eta vicachanerahi ema Jesús tayehe eta huerta. ³ Tacahe, te jena yátiquenehi, títecapapa ema Júlasí. Mámamurihapaipahi ena oficialeana énapa ena camuriqueneanahi suntaruana romanoana, vanairucanahi éna nayehe ena tuparairucana, taicha napamicavacahi ena fariséoana. Ticamicahuanapaipahi. Ticaepuchiriquianapaipa, étapa eta nayehe espada. ⁴ Émasera ema Jesús máecharipa eta nacaratasirayarehi. Tacahe, mácapavacapa éna. Máichavacapa:

—¿Nájaha etánuca?

⁵ Ena najicapapa:

—Ema Jesús Nazareno vitanucapahi.

Éma máichavarepa:

—Nútira etánurepahi.

Ema Júlasí mapauchapa, máetserarecapa. Tásiha, titupihachaha te machacaya. ⁶ Eta majicapirahi ema Jesús, máichirahi: “Nútira etánurepahi”, tiáquipaimuriavanapa ena suntaruana te apaquehe. ⁷ Tásiha, mayaserecavarepa ema Jesús:

—¿Nájaha ema etánucapahi?

—Ema Jesús Nazareno —najicapavarepa.

⁸ Éma, máichavarepa:

—Cápachi numetacaheripahi nútihira etánurepahi.

Te nútichucha etánucanupahi, ísapayare nayana ena nani —máichavacapa.

⁹ Étapaichuhi eta máechajiruvahi ema Jesús te tiyujaracaipa nájina émanainahini náemitiachahini te namuri ena máijararuanahi ema Maiya. ¹⁰ Tacahe, ema Pedro, tatiarihihi eta mayehe espada te mañahe. Mavehapa, máechuchacachapa eta machaca te vaure ema achane ticaijare Malco, mavanarahi ema aquenuca Caifás. ¹¹ Émasera ema Jesús macahepa:

—Pinaca te tatumaramuhi eta piyehe espada. Vahi pihapapicaimahi eta táitachiravaya eta mavarahaquenehi ema Tata, taicha nutuparahaichuhi mayehe eta juca nucatajivairaya —macahepa.

Nacaratacapa ema Jesús, námapa te mamirahu ema corregidor

(Mt 26.57-58; Mr 14.53-54; Lc 22.54)

¹² Tacahe, ena suntaruana émapa ema comandante nacaratacapa ema Jesús, náitijivauchapa. ¹³ Tiyananapa námapa te mapena ema Anás. Étarichu mapena

ema Caifás, taicha ema maca Anás máimachucahi ema Caifás, émapasera tuparairucahi te jena áñohe máitsivaequenehi ema máimachuca. ¹⁴ Ema maca Caifás, émarichuvare ticaechajiruvahi eta máepeni-rainahini ema émana achane tivachachayarehi eta náitaresirana namutu ena achaneana.

Ema Pedro tépiyacavapa vahi máimati ema Jesús

(Mt 26.69-70; Mr 14.66-68; Lc 22.55-57)

¹⁵ Ema Pedro, nútipa nuti Juan viyanapa véhiequenehapaipa ema Jesús. Nusiapapa nútí te tajuhe eta canchón mapenahi ema aquenuca Anás, taicha náimaticasarenuhi ena mavanarana. ¹⁶ Émasera ema Pedro manasipa te aneca te tapajachacaya. Tásiha, néchajiacapa esu vanaracahi téchahi eta tapaja, sucasiapahini ema Pedro. ¹⁷ Tásiha, esu suyaserecapa ema Pedro, ánipa suicha:

—¿Pítirichu jácani apanava ñímiture eñi ñica Jesús?

Ema Pedro majicapapa:

—Vahi nútina.

¹⁸ Tásiha, eta jena yátiquenehi táetaviuchahi eta tacasaraivahi. Ena mavanaranahi ema Anás, énapa ena suntaruana ticamururecanapa eta yucu, násasiavayarehi. Eta náurujiasiraipahi eta yucu, titupihapavare ema Pedro te nachacaya, másasiavahivare.

Ticayaserehipa ema Jesús te mamirahu ema Anás

(Mt 26.59-66; Mr 14.55-64; Lc 22.66-71)

¹⁹ Tacahe, ema Anás mayaserecapa ema Jesús áyananapuca ena téhicanahi éma, tájahahivarepuca eta máimiturapihi eta nayehe. ²⁰ Ema Jesús majicapapa, ánipa macahe:

—Núti vahi nuyumurucavahini eta nímituresirahi.

Nímerecavahi te namuri namutu ena achaneana te viúrujisirarevana, étapa te Templo. Éta nímituresiranahí. ²¹ ¿Tájaha tacayema piyaserecanu nútí?

Piyaserecapaini ena tisamararacananahi. Énaina nametacavi eta nímiturapianahi nútí —macahepa.

²² Matiaríhihi ema émana suntaru te machacaya. Eta masamirahi eta máechajiruvahi ema Jesús, máehamirahapa éma. Tásiha, máichapa:

—¿Tájaha tacayema tíñemahi eta pijicapirahi ema aquenuca macapicahuquenehi? —máichapa.

²³ Tacahe, ema Jesús majicapapa:

—Váhira táñemahihini eta nujicapirahi ema aquenuca eta taviuchanuhini. ¿Tájaha tacayema péhanu? —macahepa.

²⁴ Tacahe, ema Anás máevatacapa mayehe ema Caifás, émarichuhi corregidor. Ticaitihapaipahi eta námirapahi éma.

Ema Pedro tiápechavavare tépiyacava vahi máimati ema Jesús

(Mt 26.71-75; Mr 14.69-72; Lc 22.58-62)

²⁵ Tacahe, ema Pedro manasirichuhi titupihahi te tachacaya eta yucu, tiásacavahi éma. Nayaserecavarepa nápechahi:

—¿Pítirichu jácani máimiture ema maca achane?
—náichapa.

Ema Pedro majicapapa:

—Vahi nútina —macahepa.

²⁶ Tásiha, matiaríhivare titupihahi ema mavanarahi ema aquenuca, macheji ema máechatichacaruhi ema Pedro. Tacahe, éma téchajicapa, máichapa:

—Núti németeaca nímahavihi picachanehi éma tayehe eta huerta te vicaratasinehi ema maca —máichapa.

²⁷ Émasera ema Pedro macahevarepa:

—Váhiquene nímati éma —macahepa.

Tásiha, enurujipa téchajicanecha eta varayu.

Ema Jesús námapa te mamirahu ema Pilato

(Mt 27.1-2, 11-14; Mr 15.1-5; Lc 23.1-5)

²⁸ Te jena yáticarahi, te tijarahipa, nacuchucapa ema Jesús te mapena ema Caifás. Námapa tayehe eta palacio mávihahi ema Pilato. Váipasera nasiapahini ena tuparairucana. Náimichuhahi ema Pilato. Nanasi-pa te aneca, namavarairahi náechipejicavahini eta nanisirayarehi eta cordero pascual te jena sache.

²⁹ Tacahe, ema Pilato tiúchucapa, máechajimurihapa éna. Máichavacapa:

—¿Tájaha eta maviurevahi ema maca achane íamaquenepahi eta ani nuyehe? —macahepa ema Pilato.

³⁰ Éna najicapapa:

—Jucarihi eta maviurevahi. Eta tacahe, viámapahi eta piyehe.

³¹ Tásiha, ema Pilato, máichavacapa:

—Eyana iama. Étina ícuñaca ema maca, taicha jararihi eta eyeherepichuhi eti israelítana —máichapa.

Éna najicapapa:

—Étaserá víti, vaipa ísapahavíhíni vítaucha eta víyeherepi vímicapaca mácani ticaviurevahi, vitupísica te márijahi. Émasera ema maca vivaraha máepena. Vivaraha pémetatacaini te crusu —nacahepa.

³² Tacahehi eta táitachiravapaipa tamutu eta máechajirivanapahi ema Jesús eta máepenirayarehi te crusu.

³³ Tisiapavarepa ema Pilato te tajuhe. Máichuhapa ema Jesús. Tacahe, mayaserecapa:

—¿Yátupisareji réyvíhi píti nayehe ena pijaneanana israelítana? —macahepa.

³⁴ Ema Jesús máichapa:

—¿Pitupiruvahipuca eta juca píchiranuhi, pivarairahi pecha te yátupihipuca eta nurreyvahi? ¿Pitanucahipucasera eta nuviurevayare, picutihipuca eta napaneruhi ena nujaneanana israelítana? —máichapa ema Jesús.

³⁵ Ema Pilato majicapavarepa:

—Vahi nímati eta epanereruana eti israelítana.

Énarichuhi ena pijaneanana ena tuparairucana, éna tiámavianapahi eta ani nuyehe. ¿Tájaha eta pivíurevahi eta nayehe? —máichapa.

³⁶ Tásiha, ema Jesús majicapavarepa:

—Jéhesare, jararihi eta návacurehi; váhisera étaina te juca apaquehe. Te étainahini te juca apaquehe eta návacurehi, téhacacauchanuaripahini ena nímitu-reanahi, váhivare nacucaratacanuhini ena ticatianacuanahini. Taicha yátupiquenehi eta návacurehi, vahi étaina te juca apaquehe —macahepa.

³⁷ Tacahe, ema Pilato mápechavarepa mayasereca:

—Tacahe, ¿yátupíhi eta pírryvahi? —máichapa.

Ema Jesús majicapapa:

—Yátupi réynuhi nútí. Eta núcupaisirahi, núchucahi te juca apaquehe, nímiturecayarehi eta yátupiqueneana. Nácani tisuapajirahianayare, nasamararacayare eta yátupiqueneana —macahepa.

³⁸ Tacahe, ema Pilato macahevarepa:

—¿Píti pímiyahava pímati eta yátupiqueneana? Núti, németeaca nájina narataha náimatimahi eta yátupiqueneana —macahepa.

Ema Pilato macavanairipipa náetataca ema Jesús te crusu

(Mt 27.15-31; Mr 15.6-20; Lc 23.13-25)

³⁹ Te tamutupa eta mayaseresirahi, tiúchucavarepa ema Pilato. Máechajimurihapa ena ticatianacanahi ema Jesús:

—Tájina maviurevaina ema maca achane eta ní-mairahi nútí. Étísera jucarihi eta eyeherepi te Páscua-muhua ena nucaitisirayare ema émana presu.

¿Evarhapuca nucaítica ema eyehe Rey, íáquenumuri eti israelítana? —máichavacapa éna.

⁴⁰ Énaserá tipiararecanapa eta najicapirahi:

—¡Vahi vivaraha picaitica ema maca! ¡Émaina picaitica ema Barrabás! —nacahepa.

Ema Barrabás táemerataruhi eta máetaviuchirahi eta mámeraivahi.

19 Tacahe, ema Pilato macavanairipipa náestaca ema Jesús. ² Tásiha, ena suntaruana navehapa eta épire itapepi, náitsamemacapa. Nanacapa te machuti ema Jesús, majarapiyarehiji náicha. Namuiria-chavarepa eta muíriare mularume. ³ Tásiha, nachayacapa éma, nacavayumarajipa nacaecahijiricapa. Anipa nacahe:

—Tata, ¡pítitataji nayehevihiji Rey ena israelítana! —nacahepa.

Náehamirahavare te mamira.

⁴ Ema Pilato tiápechavarepa tiúchucahi. Tásiha, máichavacapa ena achaneana:

—Nímereca te emirahu ema maca achane. Nuvarahasera ácaicutiaraini eta tamajinairahi maviurevaihini eta nímairahi nútí —máichavacapa.

⁵ Tacahe, nacuchucapa ema Jesús, mámapaipa eta itapepi te machuti, majarapihi náepiyaruihi éna, étapa eta namuriaruihi mularume. Tásiha, máichavacapa ema Pilato:

—Mácaripa ema maca achane. Ticaemecharáhiripa, ticaestaripavare. Maratapa —macahepa.

⁶ Te náimahapa ena tuparairucana énapa ena nasuntaruana, tipiaracanapa:

—¡Pémetatareca te crusu! ¡Pémetatareca te crusu!
—nacahepa.

Ema Pilato máichavacavare:

—Núti tájina maviurevainahini eta nímairahi. Étina écha eta íámairaya éma. Étina émetatareca te crusu —máichavacapa.

⁷ Éna najicapavarepa:

—Ichape eta maviurevahi ema maca eta viyehe, taicha tímijachavahi Machicha ema Viya. Vivaraha máepena, taicha váhiquene vísapahini eta juca —nacahepa.

⁸ Eta masamirahi ema Pilato eta machichairahipuca ema Viya ema Jesús, ichaperinehi eta mapisirahi.

⁹ Tisiapavarepa tayehe eta mayehe palacio. Máichuhavarepa ema Jesús. Mayaserecavarepa:

—¿Nájahavisica píti? ¿Távihasica eta piásinehi? —macahepa.

Émasera ema Jesús, tájina vahi majicapahini.

¹⁰ Tásiha, ema Pilato máichavarepa:

—¡Vahi pivaraha pijicapanu! Péchapuca píti eta nuratahairahi nucuchuhavi, énerichuvare nuratahavare nucavanairipi náetatacavi te crusu —macahepa.

¹¹ Ema Jesús mapaenumavapa majicapa:

—Váhiquene piratahaimahi pítijiva pémetatareca-nuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana ena tíjarrecanuanahi eta piyehe. Píti váhipanaichuhinéni eta pipecaturahi eta píchiranuhi —macahepa.

¹² Tacahe, ema Pilato mavarahainipa macuchuhavarehini ema Jesús. Énasera ena tuparairucana tipiaracanavarepa:

—¡Te picaitica ema maca, vépiyaequenehaviyare mayehe ema ichapequene aquenuca Emperador! ¡Ema maca achane macatianarui ema Emperador taicha tímijachavahi rey! —nacahepa.

¹³ Tacahe, te masamapa ema Pilato eta náechajiriruvahi éna, tiyanapa te anuquehe, téjacapa tayehe eta máejasirare apaesa namutyarepa náimaha. (Eta mávacurehi, amairiha máripahi. Eta jena sache, viérnesi táequenereruhi eta Pascua.) Tacahe, tiánehiripa las dóceyarehi eta sache macavanairipipa nama ema Jesús. Tásiha, máichavacapa ena achaneana:

—¡Mácaripa ema eyehe Rey! —macahepa.

¹⁵ Énasera tipiaracanavarepa:

—¡Pémetatarecavane! ¡Máepenavanepa! ¡Váhiquene vivaraha ema maca! —nacahepa.

Tásiha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Emperador! —nacahepa.

¹⁶ Tacahe, ema Pilato máisapapa. Máijaracavacapa ena masuntarurana eta náetatasirayare ema Jesús. Jéhesaréinehi námapa éma.

Náetatacava te crusu ema Jesús

(Mt 27.32-44; Mr 15.21-32; Lc 23.26-43)

¹⁷ Tacahe, náijaracava ema Jesús eta macurusuraya. Tiúchucava éma, mámapaipahi te majihu. Námapa eta te Calvario (te hebreo ticaigare Gólgota). ¹⁸ Tásiha, ema Pilato máepiyacava eta ajureca eta táechajiriruvahi, ánipa tacahehi: “Éma Jesús Nazareno, Rey nayehe ena israelítana”. Te tápusi eta macurusura nanacava eta juca ajureca. Natiarihivare ena apinana ticaetatanahivare te machacaya. Émasera ema Jesús, te enumuhu mávihahi. ²⁰ Camuriana ena achaneana téchajicuhanahi eta ajureca, taicha eta macaetataiyahi ema Jesús tacachacayaichuhi eta avasare. Eta ajureca, te hebreo, te griego, téhepa latín. Mapana eta táechajiriruvanahi. ²¹ Eta tacahe, ena tuparairucana tiyananapa mayehe ema Pilato nayaseapanahi máitsivachahini eta ajureca. Éna navarahahi áni tacaheyarehi eta ajureca: “Éma maca tímijachavahi Rey nayehe ena israelítana”. ²² Émasera ema Pilato máichavacava:

—Eta ajureca nunacaquenehi, nájina tihapapicaimahi —macahepa.

²³ Te náitauchava ena suntaruana eta náetatasirahi ema Jesús, nasuertehachava eta mamuiriha nayehe ena cuátroqueneana. Navehavarepa eta apana mamuiriha. Étasera tájina taparinahini, amairijuheichucha eta itsameruca. ²⁴ Vaipa návarahahini navetsayucahina. Tásiha, nasuertehachavarepa, náimairayarehi nájahayarehipuca mácani tivecuaharehi.

Tacahehi eta táitauchiravahi eta Sagrada Escritura eta táechajiriruvahi: “Ticajjiricacanapa eta numuirihaini. Nasuertehachavare eta apana numuiriha”. Jéhesare, tacahehi naicha ena suntaruana.

²⁵ Te tápecu eta macurusura ema Jesús, sutiarihini esu maena, ésupa esu mápenaru, ésupa esu apana María mayena ema Cleofas, ésupa esu María Magdaleana. ²⁶ Tacahe, te máimahapa esu maena eta sutiarirahi te machacaya, nútipa nuti máimiturehi máemunaruquenehi, ánipa máicha ésu:

—Mémechicha, márahi ema nítivayare ema pichichayare. Éma títátiviyare.

²⁷ Tásiha, énerichuvare tituparacavarepa núti:

—Némunacasare, nutuparacavi esu meme. Esu pényare. Pímainanu —máichanupa.

Jéhesaresera, núti Juan ichaperinehi eta nujacpirahi esu maena. Námapa te nupena.

Eta máepenirahi ema Jesús

(Mt 27.45-56; Mr 15.33-41; Lc 23.44-49)

²⁸ Tacahe, eta máimairahi ema Jesús eta táitauchiravaripa tamutu eta táechajiriruvanahi eta Sagrada Escritura, ánivare macahehi:

—Tétavicava eta numauneva —macahepa.

²⁹ Tatiarirahi eta tisisica vino te tinaja. Náechipajicapa eta machuchujiruyarehi. Náimicapayacapa tayehe eta majaca te tíuqui curina. ³⁰ Tacahe,

machuchujicapa ema Jesús eta tisisica vino. Tásiha, macahepa:

—Jéhevare puiti, títauchavapa tamutu —macahepa. Tásiha, téyusicapa. Tépenapa.

Éma émana suntaru mayuvaracapa te machene ema Jesús tayehe eta lanza

³¹ Tacahe, ena tuparairucana vahi návarahahini ná-nasihini ena ticaetatanahi te crusu te jena sache sávaru páscuairahi. Tacahe, tiyananapa mayehe ema Pilato, nayaseapanahi macavanairipihini eta nacavetupaiquechavacayarehi apaesa náepenavanehini. Navarahahi náecarávane, taicha tétavacavahi eta tacapicahuirahi nayehe éna eta jena sácheana páscuairahi. ³² Jéhesaréinehi, tiyananapa ena suntaruana, nacavetupaiquechavacapa ena apinana tiámerahiana nacaetataquenehi te crusu te machacaya ema Jesús. ³³ Tásiha, éneyareichuhivaréni ema Jesus. Téhesera te náitecapauchapa, náimahapa eta máepeniraipahi. Tacahe, vaipa nacavetupaiquechahini éma.

³⁴ Táitsivahisera ema émana suntaru mayuvaracapa te machene tayehe eta lanza. Enevanepa tiúchucahi eta iti étapa eta une. ³⁵ Núti Juan nájuequenehahi tamutu eta juca, nímahaqueneanahi. Nuvaraha nítametacahe tamutu. Yátupihivare eta numetasi-rahehi, taicha nuvaraha esuapahini éti apanavare. ³⁶ Títauchavahi eta juca táechajiriruvahi eta Sagrada Escritura: “Tájina vahi nacavetucaimahi eta máperana”. ³⁷ Jararihivare eta apana Escritura, ánivare tacahe: “Náimahayare ema najarachaquenehi”.

Nacucupaicapa te crusu ema Jesús, náecarayarepa

(Mt 27.57-61; Mr 15.42-47; Lc 23.50-56)

³⁸ Te tamutupa eta juca, matiarihihi ema achane José, ticavasahi te Arimatea. Émarichuhi tisuapajirahihi mayehe ema Jesús. Váhisera máimerecavahini, mapisravacahi ena machamuriana aquenucarahana. Tiyanapa éma mayaseapanahi ema Pilato eta máquehe ema Jesús. Tacahesera ema Pilato máisapapa. Tiyanapa ema José, macucupaipanapa eta máquehe ema Jesús. ³⁹ Émapa ema Nicodemo macachanehi, ema téjirapanahi ema Jesús te jena yátimuhuquénehi. Mámapahi éma eta treinta kilo eta perfume mayajihayarehi. ⁴⁰ Tacahe, ema José émapa ema Nicodemo navehapa eta máquehe ema Jesús, náyuruacapa eta te sávana tijapu táurinaquenehi. Nayajihacavarepa tayehe eta táijiyequene perfume. Tacahehi eta viyeherepi te vécarayare ena náepenaqueneana. ⁴¹ Tacahe, te tachacaya eta máepeninehi ema Jesús, tatiarihihi eta huerta te távihahi eta mari natsecajueruhi ecariyare tacutihi eta covacha. Nájinaichaha nacaecarasihini tayehe. Étapa náecarihahi eta máquehe. Tiputuvahuanapa taicha cáperehichicharipahi. Vahi táisapacarehini náecarahini te yati, váhivare táisapacarehini te apanapa sache taicha sávarumuhupahi.

Éta máechepusira ema Jesús te máecari

(Mt 28.1-10; Mr 16.1-8; Lc 24.1-12)

20 Tacahe, te jena sache lumincuquenehi, te tijarahichichapa, tiyanapa esu María Magdalena tayehe eta máecari. Timapicuichaha te suítecapauchapa eta ecari, suímahapa tájinaripahi eta márime tajihainihi eta tapajacurahi eta ecari. ² Te suímahapa, tichavavanepa tijunapapaipahi. Suíchuhanayarehi ema Pedro nútipa nuti Juan. Timetacahavipa ésu:

—Námechapa jácani eta ñáquehéni eñi Viáquenu. Vaipa vecha távihahipuca nanasihahi —sucahepa.

³ Tacahe, núti émapa ema Pedro viúchucapa viyanapa vijunapapaipahi. Nucachuricapa ema Pedro. Nítecapavanepa núti tayehe eta máecari ema Viáquenu.

⁵ Nétipaicapa. Nujiñañajuechapa. Tacarinehi nímaha eta máyuruhainihi. Váhisera nusiapahini. ⁶ Te títecapapa ema Pedro, tisiapapa éma tayehe eta ecari. Máimahapa eta máyuruhainihi. Tanasirinecha enurujuhehi, étapa eta mamuhisiequene ema Jesús.

⁸ Tacahe, nusiapavarepa núti tayehe eta ecari. Nímaha eta táichararacavahi. Tásiha, ichaperinehi eta nusupirahi. ⁹ Vipaenumavapa vicaicutiarahi eta táechajiriruvahi eta Sagrada Escritura, eta máechepusirayarehi ema Viáquenu te máecari. ¹⁰ Te tamutupa eta vímairahi, víchavapa te vipena.

Éma Jesús tímerecavapa suyehe esu María Magdalena

(Mr 16.9-11)

¹¹ Esu María Magdalena, énerichuvare tiápechavaripa tichava eta te máecari. Sunasipa, týahaipa. Tásiha, tétipaicapa sujiñañacahi te tajuhe. ¹² Tiáramicarepa suímaha ena apinana ángeleana, tijapumuirihavacahi. Téjacanahi éna te tajuhe eta máecarini. Éma émana te tanapainihi eta machuti, ema apana te máivape. ¹³ Tásiha, ena ángeleana nayaserecapa ésu:

—¿Tájaha ticaiyacavi, nuchicha? —náichapa.

—Ticaiyacanuhi eta námechirahi eta ñaquehe eñi Viáquenu. Vahi nécha távihapapuca nanasihahi —suc-ahepa.

¹⁴ Te títapiricapa eta suíchiravacahi, téviurucavapa, suímaharinehi ema Jesús. ¹⁵ Tásiha, éma apanava mayaserecapa:

—¿Tájaha ticaiyacavihi, nuchicha? ¿Nájaha pitanuc-ahi? —máichapa.

Ésusera suímijachaichucha ema tijanearecarahi eta huerta. Tásiha, suíchapa:

—Tata, te pítihipuca piámahi eta ñáquehe eñi Viáquenu, picatajicanu pimetcacanu távihapuca pinasihahi. Nuvaraha námayare núti —suíchapa.

¹⁶ —¡María! —máichapa.

Suésenicainehi ésu. Supaenumavapa suímatihí éma. Tásiha, suíchapa:

—¡Pítiquenehi, Tata Náquenu!

¹⁷ Tásiha, ema Jesús máichapa:

—Vahi picuemamahacanu, taicha vuíchaha nápanahini te mávihahi ema Tata. Piyana pimetcavaca

ena apamuriana nímitureana eta nápanirayare mayehe ema Tata, Ecaiyaquenehivare éti apanava —máichapa.

¹⁸ Tacahe, esu María Magdalena tiyanapa sumetapana vacahi ena suchamuriana eta suímairahi ema Jesús, etapa eta mametarapianahi.

Tímerecava ema Jesús nayehe ena máimitureana
(Mt 28.16-20; Mr 16.14-18; Lc 24.36-49)

¹⁹ Étarichu te jena sáchequenehi lumincuquene, yátiripahi, viúrujicavahi viti máimitureana ema Jesús te tajuhe eta peti. Vérateaquenerecavahi taicha eta vipisirahi ena tuparairucana. Tiáramicarepa titupihahi ema Jesús te vimuri. Téchajicahavipa:

—¿Ícharacava, nuchichanaveana? —máichahavipa.

²⁰ Tásiha, tímechahavipa eta majarana te mavahuana etapa te machene. Tacahe, víti ichaperinehi eta viúrisa-murevahi eta vímairahi éma. ²¹ Tásiha, máichahavipa:

—Vahi ecueñamava. Núti, mavanerunuhi ema Tata núcupaicayare te juca apaquehe, nímitucaheyarehi éti. Puiti nuvanecaheyare núti ímitucavacayarehi ena achaneana, apaesa náehicanuhini éna apanava —macahepa.

²² Tásiha, tiáchajuacahavipa víti. Tásiha, máichahavivarepa:

—Táuri eta ejacapiraina ema Espíritu Santo eta máitecapauchiraheya, mávahásiraheya. ²³ Éma, tímitucaheya eta ítametasiravacaya ena achaneana eta naperdonachacarevahi mé Viya ena téneuchavanahi. Te vahi nacuvaraha téneuchavana, tanasiyare eta navirevana taicha eta napecaturana —macahepa.

Ema Tomás vahi masuapa eta máechepusiraipahi ema Jesús

²⁴ Te jena sache eta máimeresiravahi ema Jesús eta viyehe, májinahi ema vichamuri Tomás. ²⁵ Tásihasera, ena apamuriana vichamuriana nametacapa éma eta vímairaipahi ema Jesús. Émasera macahepa:

—Vahi nusuapa. Téhesera te nímaha eta majara te mavahu taicha eta clavo, nímisipavare eta nuvaucui tayehe eta majara te machene, tapaenumava nusua-payare eta máechepusiraipahi —macahepa.

²⁶ Te óchopa sache eta táetavisiravahi, viúrujicavipavare te viúrujisirareva. Matiarhipahi ema Tomás te vimuri. Tásiha, tiáramicarevarepa tímerecavahi ema Jesús. Titupihahi te vimuri. Téchajicahavivarepa.

—Ícharacava, nuchichanaveana —macahepa.

²⁷ Tásiha, máichuhapa ema Tomás:

—Yare, nuchicha —máichapa—. Pímaha eta nu-jarana te nuvahuana. Pímisiapa eta pivauqui eta te juca nuchene, apaesa pisuapanu.

²⁸ Tacahe, ema Tomás majicapapa:

—Tátachicha, piti yátupiquenévi Viya. Tétavicavahi eta nucasiñairavihi —máichapa.

²⁹ Ema Jesús majicapapa:

—Nuchichasami Tomás, pipaenumava pisuapanu eta pímairanuipahi. Tétavicavasera náuricacareva nácani

tisuapajirahianahi vahi tácomesahini náimahanuhini —macahepa.

Nuvaraha esuapa eta juca libro nájurehi

³⁰ Jucarihichahavare eta apamuriana tiáramicareana máichaqueneanahi ema Jesús, eta vímahaqueneanahi viti máimitureana. Váipasera tamutuhini tacajuhini te juca libro. ³¹ Nuvarahasera ácaicutiara eta nájureanahi apaesa esuapahini ema Jesús eta émairaquenehi Cristo, Machichaquenehi ema Viya. Taicha te esuapapuca éma, máitavacacayare eta ítaresirayare.

Tiápechavavare tímerecava ema Jesús nayehe ena sítequeneana máimitureana

21 Tiuri, te táequenepa eta juca, viyanapa víti te Galilea, vicuchapayarehi ema Jesús. Ánaqui matiarhihi ema Pedro, ema Tomás, ema Natanael, ema nuparape Jacobo, nútipa nuti Juan. Natiarhivare ena apinanahi vichamuriana. Tacahe, ema Pedro máichahavipa:

—Nuyanayare nénipanayare te cáquiure —macahepa.

Tásiha, víti vijicapapa éma:

—Véhicaviyare víti apanava —víchapa.

Tacahe, te vítecapapa, viávacuhapa tayehe eta pacure. Vénicaipahi te jena yátiquenehi. Tájinasera vítucavahini. Te tijárahichichayaréipa, vímahapa ema Jesús. Titupihapahi te tachausi. Váhisera vímativanehini. ⁵ Tásiha, téchajicahavipa:

—¿Ícharacava, nuchichanaveana? ¿Tájina ítucava eta jima? —macahepa.

Vijicapapa víti:

—Tájina vítucava —víchapa.

⁶ Tásiha, éma tivanecahavipa viáquijieca eta viyehe tarrafa te apachacaya eta pacure tinapaicahi te vaure.

—Eta ítusiavayare eta jima —máichahavipa.

Visuapahisera víti. Tásiha, te vichuruecapa eta viyehe tarrafa, vaipa víchinahini taicha táetaviuchahi eta camurirahi eta jima. Tijitacarenecha. ⁷ Tásiha, núti níchapa ema Pedro:

—¡Émara ema Viáquenu! —níchapa.

Masaminenurichuhi ema Pedro eta níchirahi, ticamuirihavanepa taicha tivejamuhicavahi éma eta mamuiriha. Tépuhecavapa, mavarairahi macapayacavaneyarehi ema Viáquenu. ⁸ Víti apamuriana vipauchapa eta tachausi. Vichuruecapaipahi eta viyehe tarrafa; tínicaipahi eta camuriquene jima. Cien métrorichuhisera puca eta viyerehirahi eta tachausi. ⁹ Te víucupacapa te tachausi, vímaharinehi tatiarhihi eta yucu, etapa eta jima jitaruca, etapa eta pan. ¹⁰ Tásiha, ema Jesús máichahavipa:

—Íama eta ítrevahi jima —máichahavipa.

¹¹ Ema Pedro machurupaicapa eta tarrafa. Vímaharinehi eta ichapemuriquene jima. Ciento cincuenta y tres eta tasimurivahi. Váhisera táetsayucanini eta viyehe tarrafa. ¹² Tásiha, tíchuhahavipa ema Jesús:

—Yare, enica —macahepa.

Tásiha, viyanapa víti, vinicayarehi. Váhisera vipatsicavahini viyaserecavahi te nájahhipuca éma taicha tétavicavahi eta viáramesirahi. Vímatiacahisera eta émairahi ema Viáquenu. ¹³ Tásiha, ema Jesús témeñahavapa. Mavehapa eta pan. Tíjaracahavipa. Éta eta jima táimaquienepa, tíjaracahavivarepa.

¹⁴ Eta juca eta mapahequenepa eta máimeresiravahi ema Jesús eta viyehe eta máechepusirahi te máecari.

Ema Jesús mavaraha macacutiara te yátupipuca máemunaca ema Pedro

¹⁵ Te vítanesipa eta vinisirahi, ema Jesús mayaserecapa ema Pedro. Ánipa máicha:

—Piti Pedro, nuvaraha nuyaserecavi: ¿Picachuricapuca píti ena nani apamuriana eta pémunasiranuhi? —máichapa.

Éma majicapapa:

—Némunacavi, Tata. Pécharichuhi píti jácani némunasiravihi —macahepa.

Ema Jesús máichavarepa:

—Tiuri, te yátupihpuca pémunacanu, nuvaraha pijaneasinanuvaca ena téhicanuanayare, taicha vahi náitucahini nacatiuchavahini. Téñamacareanahi —macahepa.

¹⁶ Te táequenepa, mápechavare mayasereca:

—Pedro, nuvaraha nuyaserecavi: ¿Yátupi eta pémunasiranuhi? —máichapa.

—Némunacavi, Tata. Pécharichuhi píti eta némunasiravihi —máichapa ema Pedro.

Ema Jesús máichavarepa:

—Tiuri, te yátupipuca pémunacanu, pijaneasinanuvaca ena téhicanuanahi —macahepa.

¹⁷ Te táequenevarepa, mapahequene mayasereca:

—Pedro, ¿yátupi eta pémunasiranuhi? —máichapa.

Émasera ema Pedro titsirihapa taicha mapaheripa eta mayaseresirahi. Majicapavarepa:

—Pécharichuhi, Tata, eta némunasiravihi —macahepa.

Tásiha, máichavarepa ema Jesús:

—Tiuri, te yátupihpuca pémunacanu, pijaneasinanuvacayare ena téhicanuanahi. ¹⁸ Nutupiruva numetacavi: Eta piámapervahi, píti péchinavahi eta pítaresirahi. Picamuirihahi, piyanahivare te jácani pivarahaqueneanahi picaijuhe. Jácanisera áñoanayare eta pichávicavaipa, apanainapa eta pítaresirayare. Apana-

nainapa ena timuriachavianayare, taicha títijivauchavianayare, tásiha tiámavianainapa te jácani pimavarahaquenénihi picaijuhe —máichapa.

¹⁹ Eta juca máichirahi ema Jesús, mavarairahi máiminecapaequenehayarehi eta máichararacavayarehi eta máepenirayare ema Pedro. Tétavicavainapa eta macunachacareva ema Viya maicha ema Pedro, taicha vahi téquécavaimahi eta máimairahi eta macatajivairaya. Tásiha, máichavare ema Jesús:

—Piti Pedro, tacuija tahapapiricahini eta pítauchira tamutu eta nutuparasiravianahi —máichapa.

Eta táichecuine eta májurehi ema Juan, máemunaruquenehi ema Jesús

²⁰ Tásiha, téseniequenehavapa ema Pedro, tímahanupa eta néhiequenehairapahi nuti máemunarunuhi ema Jesús. (Nútirichu núti nuyaserecavi te mesa te nájahhipuca ema tíjararecayarehi.) ²¹ Eta máimairanuhi ema Pedro, mayaserecapa ema Jesús tájahapuca eta níchararacavayarehi núti apana. Ánipa macahe ema Pedro:

—Tata, ¿tájahapuca máicharacavayare ema apanava ema maca?

²² Ema Jesús majicapapa:

—Núti nécha. Te nuvarahapuca máitareca máimahayare eta nápechiravayare nuchavirayare, vahi tacuimipanerecavi. Pítisamisera, pítaucha tamutu eta nutuparasiraviana. Tacuija tahapapiricahini eta péhisiranuhi.

²³ Tacahe, ena nuchamuriana, ichaperinehi eta napanerequenehairahi eta numaepenirayarehi. Váhisera mametacahini eta numaepenirayarehi. Tacarichu macahehi: “Te nuvarahapuca núti máitareca máimahayare eta nápechiravayare nuchavirayare, vahi tacuimipanererecavi” macahepa.

²⁴ Nuparapenaveana, núti yátupiquenenuhi eta máimiturenuirahi ema Jesús. Nutupiruvahi néchajisiha te juca nájurehi eta yátupiqueneana nímahaqueneanahi.

²⁵ Jucarihichaha eta apamuriana máichaqueneanahi ema Jesús. Váipasera támutuhini nájuequenehahini, taicha tétavicavahi eta táichapemurivahi. Te vítameta-capucaini tamutu eta máichaqueneanahi, váipapuca vicuratahahini vítuca, namutuhinéni ena achaneana te juca apaquehe tiájuequenerahiana.

Tamutupa eta juca nájurehi.

Hechos

1 Piti Teófilo, títecapáuchaviripa eta táinapure nájure tayehe eta máichavaquenévahi ema Jesucristo te títecapapa te juca apaquehe. Nájuchahi tamutu eta máichaqueneanahi, etapa eta máimiturapianahi. ² Nararihihi ena manerejiruana apóstoleana. Émaripa ema Espíritu Santo máimicatacahi eta matúparasíravacahi éna. Nájuchavarepa eta mayapirahi te anuma. Puiti nímiama recavare eta piyehe eta juca nájure, apaesa pímati tamutu eta téchacareana tayehe eta máichavaquenévahi ema Jesús. ³ Te táequenepa eta máepenirahi, téchepucapa te máecari, tiápechavavare títareca. Tásiha, cuarentaquenehi sache eta macáchanéravacaríchaha ena máimitureana. Máimerecahi ichape eta machavirahi títareca. Máimitucavacahi éna, eta táichararacavayare eta náehisirayare ema Viya ena achaneana te tamutu avasareana.

Ena Jesucristo mametaca eta máucupaisirayare ema Espíritu Santo

⁴ Te jena sache, macáchanevacaríchaha ena apóstoleana, mametacavacapa. Ánipa maicha:
—Vahi ecújúnijica eta juca viávasa Jerusalén. Ecuchapayare eta táitauchiravayare eta máijararuvahi ema Vicaiyaquene. Étaripa eta juca numetarapianahi.
⁵ Échavarichu ema Juan, máicachasicavacahi te une ena achaneana. Étiserá, puiti juca sácheanayare, tiúcupaicayare ema Espíritu Santo. Ema tícachasicahayare, tiávaháchéhéna —macahepa ema Jesús.

Eta mayapira ema Jesús te anuma

⁶ Tacahe, nayaserecapa ena tiúrujiácanahi ema Jesús. Ánipa naicha:
—Tata Viáquenu, ¿puítinaríchu píjaracahavi viti israelítana eta vítináini vigóvernachacáca te juca viávasa? —nacahepa.
⁷ Ema Jesús majicapapa, ánipa maicha:
—Vuíchaha táechacare. Vahi tatuparaca étinahíni echa tájahapuca sáchevayare, tájahapuca cájevayare títauchavaya. Taicha tayumurevahi eta juca maicha ema Tata Vicaiyaquene. Macarichu éma máiturúqueneha eta juca. ⁸ Jucarihisera eta ítucaquenezare. Ema Tata tíjaracahayare ema Espíritu Santo, tiávaháchéhayare tímicatacaheyare. Tacahe, échajisianuínapa núti. Tamutuyare avasareana eta epaisiha, te Jerusalén, te Judea, te Samaria, etapa te jácani tayerehiqueneana avasareana tayehe te juca apaquehe —máichapa ema Jesús.

⁹ Tacahe, te títavapa eta máechajirísiravahi, tiyanapa tiyapa te anuma. Tacahe, ena máimitureana náimara-raequenehaipa eta mayanirahi. Táepacuchirahi eta úcaji. Vaipa macaecherahini te anuquehe. ¹⁰ Eta mayanirahi ema Jesús te anuma, náimaramaracáichaha ena máimitureana. Tacahe, tiáramicareanapa tímerecavana ena apinana ángeleana. Tijapumuirihavaca.
¹¹ Tacahe, náichapa ena ángeleana:

—¿Tájaha íchahi ímararacahi eta anuma, eti máimitureana ema Jesús? Puiti enecapararecahi ema Jesús eta majunijisiraheripa, mayanirapa te anuma. Vimetacahé: Te jácani sáchezare, ema Jesús tichavayare te juca apaquehe. Tiúcupaicayare tacutiyaichu eta mayanirahi —náichavacapa ena ángeleana.

Nanerejicapa ema Matías, máitsivayarehi ema Júlasí

¹² Tiuri, eta návihairahi te anuquehe masihi ticaijare Olivoquiji. Tachacayahi eta Jerusalén, apina kilómetro eta tayerehivahi. Tiyananapa tichavana tayehe eta avasare. ¹³ Te títecapanapa te avasare, tisiapanapa te peti apina piso, eta náitecapihahi. Tiápananapa te téqueneha piso. Natiarihihi ema Pedro, ema Jacobo, ema Juan, ema Andrés, ema Felipe, ema Tomás, ema Bartolomé †, ema Mateo, ema apana Jacobo, ema Simón, émapa ema Judas. ¹⁴ Natiarihivare ena maparapenaveana ema Jesús, ésupa esu maena María, énapa ena apamuriana esenana. Tamutu sácheana, ena nani tiúrujicavanahi eta nayujarasirahi.

¹⁵ Tacahe, te jena sácheana, ena náurujiರುವanahi náetavicahi ciento veinte eta nasimutuva ena máimitureana ema Jesús. Tacahe, téchepucapa ema Pedro te namuri, titupihapa. Máichapa:

¹⁶ —Nuparapenaveana, ema víyahaini David macaimitucasiquenehi mayehe ema Espíritu Santo, ánaquiríchaha eta áñoana eta matiarahiraya ema Júlasí, ema tínapumiráuchaya ena suntaruana nacaratacaya ema Jesús. Títauchavapa eta mametarapihi ema Espíritu Santo. ¹⁷ Taicha ema Júlasí, émainichuhi vichamurini tayehe eta juca vématanerepihi —macahepa ema Pedro. ¹⁸ (Émasera ema Júlasí ticapacavahi

† Ema Bartolomé ticaijarehivare Natanael. Ema apana Jacobo, machichahi ema Alfeo (váipasera véchapirica eta máitairesira ema Alfeo). Ema Simón, nachamurinihi ena revolucionario ticaijareana “cananístana”. Ema nani cananístana nacanarajiricahi ena apavasanana romanoana, navarairahi náquijica, nacuchucayare te návasa Judea. Ema maca Judas, matiarahi ema maparape ticaijarehivare Jacobo, váhisera nachamurinahini ena apóstoleana. Ema maca Judas, mapanahi eta máijare: eta Tadeo etapa eta Labeo, etapa eta Judas. (Te pivaraha pecha, pitanuca te libro Marcos 3.18 etapa te Mateo 10.3.)

tichumucavapa. Tiáquipaicavahiséra eta máquehe. Tiúchumuriapa eta maturupiana. Te táequenepa, navehapa eta mavachainihi eta máijararesirahi ema Jesús. Navacharecapa eta apaquehe. ¹⁹ Te náechapa ena ticavasana te Jerusalén, nanacapa eta táijarehi Acéldama. Eta ticaijarehi puiti “Apaquehe máitinevacha ema Jesús”.)

²⁰ Tímiyanava eta máechajisirahi ema Pedro, ánipa maicha:

—Ema víyahaini David májucunachahi eta mametarapiana ema Espíritu Santo eta te Salmo. Áni macahehi: “Machu nacuija nacusia pa eta mapena majunijirui pa nácani macutipanereruana eta mavainarajiva”. Ánivarepa macahe: “Tatuparacahi masiapaya ema apana achane máitsivaya te mávacurénihi” macahepaji ema Espíritu Santo.

²¹ Tacahe, tituparacahavi vinerejicayare ema apana, máitsivaina ema Júlasí, apaesa vahi macuejiacava te vimuri viti dócequeneana. Máimicatacavahi eta véchajisiha eta máechepusirahi ema Jesús. Nararihi ani te vitaracu ena vichamurianahi te juca áñoana te matiarichaha ema Jesús te vimuri. Ena ticachanehavianahi te ticaicachasinapa ema Jesús me Juan. Vahi najunijicahavini. Natiarihiquenehi te tiyapapa ema Jesús te anuma —macahepa ema Pedro.

²³ Tacahe, ticanerejianapa ena apinana: ema ticaijare Matías, émapa ema apana ticaijare José Barsabás (énerichuvare náimijarechahi Justo). ²⁴ Tacahe, tiyujaracanapa, ánipa nacahe:

—Tata Viáquenu, piti pímati eta visamureana vimutu. Pímechahavi nájahapuca ema tiuri nayehe ena nani apinava vinerejiruanahi máitsivayare ema máemitariuhi apóstoleni Júlasí, táimicuñaruhi eta mapecatura —nacahepa.

²⁶ Tacahe, nasuertehachapa ena apinana. Tatocachapa ema Matías. Tásiha, natuparacapa eta mávacureyare nachamurirayarehi ena apamuriana apóstoleana.

Eta máucupaisirahi ema Espíritu Santo

2 Tiuri, títecapapa eta sache napiestara ena israelítana ticaijarehi Pentecostés. Tiúrujicavanahi ena apóstoleana énapa ena apamuriana nasimutuvaqueneana máimitureana ema Jesús. ² Tacahe, tiáramicarepa eta ticaema te anuquehe tiásiha te anuma ticutipahi eta muraca técativava. Ticaemapapa muraca te táinahu eta peti návihahi éna. ³ Tacahe, tiáramicarepa tímerecava eta tacuti eta tanene eta yucu. Tijarahivacapa te nápusiana namutu ena náurujiruvanahi. ⁴ Tacahe, ena mávahácavacari pa ema Espíritu Santo. Tiáramicareanapa apáechajiríruvavacapa taicha eta mávahásiravacáipahi ema Espíritu Santo. ⁵ Te jena sache, natiarihivare ena camuriqueneana israelítana te Jerusalén tiásihana te tamútuyaréini avasareana. Tipicaurahianahi tayehe eta nayehe religión. ⁶ Te nasamapa eta tacaemairahi te anuquehe, ticurujicacanapa ena achaneana. Náraminehi ichape

taíchavenehi eta nasamirahi ena apáechajiríruvavacarípa.

⁷ Ichaperinehi nárami. Tacahe, náichacacapa: —¿Tájaha tacayema eta juca? Ena nani, váhira vichamurianaina tayehe eta avasare viávihihi. Ticavasana te Galilea ena nani. ⁸ Tásihasera, náitucavivare eta véchajiriruvapachu vímiuchurehi víti. ¿Tájahapapuca tacayema eta juca? ⁹ Camuriana eta véchajiriruvana taicha viti viásihahajiruanahi te apanapanejiana avasareana. Nararihi ena tiásihana te Partia, te Media, te Elam, te Mesopotamia, te Judea, te Capadocia, te Ponto, te Asia, te Frigia, te Panfilia, te Egipto. ¹⁰ Nararihivare ena tiásihana te Cirene te Libia. Nararihivare ena tiásihana te Roma, ena yátupi-queneana israelítana énapa ena tépiyacavanaripa israelítana. ¹¹ Nararihivare ena tiásihana te Creta étapa te Arabia. Vimutusera visama eta véchajiriruvapachu. ¿Tájahapuca tacayema? Ena nani téchajicanahi timetacahavianahi eta táuricacarequeneana tásihaqueneanayare me Viya. Vicaicutiarahi tamutu taicha téchajicanahi te véchajiriruvapachu —nacahepa.

¹² Namutu napanerequenehahi. Vaipa náimatihini tájahapuca tacayema. Tiyaserejiricacanavarepa:

—¿Tájahapuca tacayema eta juca? —nacahepa.

¹³ Natiarihiserá ena apamuriana nacaecahirichucha, ánipa nacahe:

—Nacavahaqueneana ena nani —nacahepa.

Ema Pedro máechajicapa ena achaneana

¹⁴ Tacahe, titupihapa ema Pedro te namirahu ena achaneana. Natiarihivare ena óncequeneana apóstoleana. Téchajicapa muraca ema Pedro eta máechajisirahi, ánipa macahe:

—Tátanaveana nujaneanana, emutu eti ecavasana te juca Jerusalén, ecatajicanu esamanuchaha. Ácaicutia-raquenéna eta juca nucayemayare. ¹⁵ Eti ímijachahi vicavahaqueneana. Vahi vicavahaqueneana. Tapaenu-mava las nuéverava yáticarahi. Écharichuhi éti vahi vítuca vera viti israelítana te yáticarahi. ¹⁶ Eta juca ímahaquenehi iáramiquenehi puiti, eta tacaheyarehi taicha mametarapihi ema Viya mayehe ema víyahaini profeta Joel. Tásiha, ema Joel májucunachapa eta mametarapihi ema Viya, ánipa tacahe: ¹⁷ “Jararihiya eta sácheanaya níjaracayare ema Espíritu Santo nayehe namutu ena achaneana. Tásiha, ena echichanaveana, ajairana énapa ena esenana, nacametarairuinapa eta néchajiriruva. Ena amaperuana, níjaracayare eta náechirayare eta táicharacavayare. Ena ichavichichana ticametacasianayare te navapure. ¹⁸ Taicha nuvanecayare ema Espíritu Santo, níjaracayare mávahácavaca namutu ena nuchanerana. Tasiha, nacametarairuinapa eta néchajiriruva tásihaquenehi nuyehe. ¹⁹ Te juca anuma nímerecayare eta tiáramicareana. Te juca apaquehe nucuchucayare eta ecutiarrareanaya, apaesa ímatinu nuti nucarichu nurataha nicha tamutu. Nucamiricaya eta ecuñaraqui. Tépusaicavayare eta náitine ena achaneana váinarajique-
neanahi. Nucamiricayare te avasareana eta yucu étapa

eta ichape quiijare. ²⁰ Eta sache, nucaemahayare eta tajaraiwa. Énerichuvare nítivachayare eta táimahi eta caje. Ítimeyare nícha. Tásiha, títecapainapa eta nusacherayare nuchaviraya nuti Iáquenu. Te jena sácheyare, ichape eta napisirainapa ena achaneana taicha nícuñacavacainapa namutu ena ticapecaturahianaichaha. ²¹ Étiserá eti ecasiñanuhi échajicanuhi eta te níjare nuti Iáquenu, nucuchucuhaheyare” macahepa ema Viya.

²² Tiuri puiti, nuparapenaveana nujaneanana, esamavare eta juca apana numetaruheyare. Ímatihi ema Jesús Nazareno. Ema maca ajaira, mavaneruhi ema Viya. Écharichuhi éti eta tíaramicareanahi máichaqueneanahi ema Jesús. Ema Viya máijaracahi eta máitupajijiásiravayare, mavarairahi máimerecayarehi te emirahu eta émairahi mavaneru ema Viya. ²³ Tiyerehichahahi eta juca, ema Viya mapanerecharipahi eta máicharacavayarehi ema Machicha. Eta tacáhe, máisapahi eta íjarasirahi ema Machicha nayehe ena váinarajiqueneana achaneana. Éma, émetataruhi te crusu. Éma, ímicaparuhi. ²⁴ Émasera ema Viya macaechepucahi ema Machicha. Macaitarecahi tayehe eta máepenirahi, taicha vahi mávarahahini mánasihini máepenahini. ²⁵ Ema víyarahaini rey David timetacahavihi eta te Salmo eta máechajiriruva ema Jesús. Ánipa macahe: “Tata, piti pímararacaruhi eta picáchanéranuhi. Piti pijaneacaruhi te nuchacaya. Pétumechanuhi tamutu sácheana. ²⁶ Tacahe, núrismure ichape. Nuvarahavare nujirauchaviyare néchajisihaviyare. Núti, te népenapa, tájina néñamavaimahi, taicha nucasiñavahi piyehe eta pímuchavirayarehi piáchanechanu. Vahi písapaimahi témitiequeneha eta náquehe nuti pichicha pémunaruquenehi. ²⁸ Piti píjaracaruhi eta picaechepusiranuyarehi te nécari, nápechiravayarehi nítareca. Tásiha, nuvavinavayare eta nutiarahirayare te pimirahu” tacahepa eta Salmo.

²⁹ Nuparapenaveana, véchahi vimutu eta máepenirahi macaecarasirahi ema viáchucaini David, taicha vímharichaha puiti eta máecari. ³⁰ Ema víyarahaini David, yátupiquenehi profeta. Macuchapahi eta táitauchiravayare eta mametacasivahi me Viya, eta matiarahirayarehi ema émana mámariequeneayarehi ema ticaijareyarehi Cristo ema téjacayarehi te trono. Máitsivayarehi ema máchucaini. ³¹ Ema Viya máimechahi ema David eta máicharacavayarehi ema Cristo máechepusirayarehi te máecari. Tacahe, ema David májucunacharipa eta vahi tánasimahi tépena eta máchaneva ema Cristo; váhivare témitiequenehaimahi eta máquehe. ³² Puíticha, ema Viya macaechepucahi ema maca Jesús. Tásiha, viti véchajisihahi eta juca taicha vímahaquenehi eta mápechiravahi títareca. ³³ Tacahe, ema Maiya macayapapa te anuma ema Machicha, macaekaripa te mavaure. Tacahe, máijaracaripa ema Espíritu Santo ema máitsivayarehi taicha ema matuparaharichuhi. Tacahe, ema Jesús máevatacapa ema Espíritu Santo eta viyehe. Étara eta juca ímahaquenehi puiti, esamaquenehi eta máucupaisirahi ema Espíritu Santo.

³⁴ Vahi ecuimijachahini émainahini ema David mápanahini te anuma. Émahisera téchajisihahi eta matiarahirayarehi ema apana tíapanayarehi te anuma. Ánipa macahehi: “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi, máichapaji ema Viya”. Étara eta juca macayemaquenehi ema víyarahaini David.

³⁶ Tiuri puiti, emutu eti nujaneanana israelítana, nuvaraha ímatiyare ema Jesús émetataruhi, émara ema Viáquenu, émairahivare ema Cristo, maicha ema Viya —macahepa ema Pedro eta máechajiriruvahi.

³⁷ Tacahe, eta nasamirahi eta juca ena achaneana, ichaperinehi eta náeñamiravahi te nasamureana. Tásiha, nayaserecapa ema Pedro énapa ena apamuriana apóstoleana, ánipa nacahe:

—Viparapenaveana, ¿tájahapuca vícharacavaini víti? —nacahepa.

³⁸ Tacahe, ema Pedro majicapapa:

—Ítsivacha eta juca ítaresiraina te mamirahu ema Viya. Eta íjarasiravaya mayehe ema Jesucristo, ecaicachasiya emutu éti. Tásiha, ema Viya macaepahainapa eta epecaturana. Tíjaracahénavarepa ema Espíritu Santo. ³⁹ Taicha ema Viya mavarahahi tíjaracaheyare ema Espíritu Santo emutu éti énapa ena echichanaveana énapa ena apavasanana, namutupa nácani manerejiruanahi máichuhaqueneanahi ema Viya, tayanapane ticavasanahi te tiyerehiqueneana avasareana —macahepa ema Pedro.

⁴⁰ Tacahehi eta juca máechajiriruvanahi ema Pedro. Ichape eta maconsejachiravacahi, ánivarepa máichahi: —Ácaijuhe ema Jesús. Ínajica eta eváinarajivana. Érajicava nayehe ena tíchana eta tamauriqueneana —macahepa.

⁴¹ Tacahe, natiarihi ena tisuapanahi eta máechajiriruvahi. Enevanepa ticaicachasiana éna. Mapanacqueneana mil ena tisuapajirahianahivare.

Eta náitaresirahi ena náinapureana téhicanahi ema Cristo

⁴² Ema achaneana, eta nasamararasirahi eta náimiturapiana ena apóstoleana, ichaperinehi nasuapa. Tásiha, tíuririnehi eta náitaresirana. Náemunacaine ena nachamuriana. Tamutu sácheana ticurujicacacani eta nayujarasirayarehi étape eta nanisirayarehi eta pan táicutiarahi eta máepenirahi ema Viáquenu. ⁴³ Ichape eta náramirahi ena achaneana, taicha náimaharipa eta tíaramicareana náichaqueneana ena apóstoleana, máimicatasiravacahi ema Viya. ⁴⁴ Namutu ena tisuapajirahiana tíurujicavanaparácacahi ticajicacacani eta náimahaqueneana. ⁴⁵ Te náimaha ema mácani nachamuri ticamunuvahi, náijarareca eta náimahaqueneana. Tásiha, náijaracapa eta plata ema ticamunuvahi, náimicatasihayare. ⁴⁶ Tamutu sácheana tíurujicavanahi eta te Templo. Tásiha, te napenana tíchuacacacani ténicacacani. Ticachanecacacahivare eta nanisirahi eta pan táicutiarahi eta máepenirahi ema Viáquenu. Náurismurevahi, táurivaipahi te nasamure-

ana.⁴⁷ Najiraucha nacunachahi ema Viya. Tacahe, namutu ena apamuriana achaneana napicauchahi éna. Tásiha, tamutu sácheana ema Viya máichuhavacahi ena apamuriana tisuapanavare.

Eta manarasirahi ema achane masarini

3 Tiuri, étana sache, te las trespa cáperehi, ema Pedro émapa ema Juan tiyananapa tisiapanayarehi eta te Templo. Te jena hora, las trésqunenpa sache, hora eta nayujarasira ena israelítana.² Matiarahi ema achane masari. Máimiuchurehi eta mamásariva. Tamutu sácheana nanapana eta te Templo. Nanaquica eta te ichapepana tapaja ticaijare Tiúrinapana, mayaseseresihayarehi eta limosna nayehe nácani achaneana tisiapanapahi.³ Tacahe, ema masari, te máimahavacapa tisiapanayarehi ema Pedro ema Juan, mayaseacavacapa eta limosna.⁴ Tacahe éna, náesenicapa ema masari. Tasiha, máichapa ema Pedro:

—Pímararacahavi.

⁵ Tacahe, máimamaracaripahi. Máimijachaipa náijarayarehi eta plata.⁶ Tásiha, ema Pedro máichapa:

—Tájina nuviya eta plata níjaracavihini. Jucarihisera eta juca nucatajicaviyare. Nucanaracaviyare. Táichavene eta máitupajijiásirava ema Jesucristo ema Nazareno, nuvanecavi: Péchepuca, pipaica —máichapa.

⁷ Tacahe, ema Pedro machuruvauchavanepa te mavahu vaure, macaechepucapa. Énevanerínehi túmevaca eta mapaiqueana eta mayucarana.⁸ Tacahe, ema masarini tójahúchavapa titupihia, tipaicapa. Tacahe, tisiapanapa te Templo máehicavacapaipa éna. Máeteresinapaipa eta mapaisirapahi. Macunachapaipa ema Viya, mahasulupayachavare eta macanarasirahi.⁹ Namutu ena achaneana náimamaracahi eta mapaisiraipahi, macunacharinehi ema Viya.¹⁰ Te náimatipa ena achaneana ema masarini, ichaperinehi eta náamirahi. Ánipa nacahehi:

—Ánaquiaparipa eta mayaseseresirahi eta limosna ema maca, máejasiraparaca te tapaja ticaijare Tiúrinapana taicha eta mamasarivahi. Puítisera tipaicapa, tétérecavarepa. ¿Tájahapuca máicharacavahi eta manarasirahi? —nacahepa.

Ticametarairu ema Pedro te Templo

¹¹ Tacahe, ema masarini vaipa máinajiacavacahini ema Pedro ema Juan. Tacahe, náurujiacapa namutu ena achaneana te návihahi ena apóstoleana te tajuhe eta Templo, te tayehe eta alar máepiyaruhi ema reyni Salomón.¹² Tacahe, eta máimairahi ema Pedro ena achaneana náamirahi eta juca, máichavacapa:

—Tátanaveana, nujaneanana israelítana. Iáramihi éti eta juca víchirahi víti. Ímijachapa vítijivahi vicanaraca ema maca achane masarini. Ímijachapapuca viti vítupajijiavahi táichavene eta víjarasiravahi mayehe ema Viya. Eta juca ánira tacahehi, vahi vítina vicanaracahini ema maca. Ema ticanaracahi, émaquenehi ema Jesús Nazareno,¹³ taicha ema Viya † tójaracahi eta

tamutuirayare marataha ema Machicha Jesús. Émara ema maca Jesús ema épuruquenehi éti, íjarareruhi mayehe ema aquenuca apavasajuecu Pilato.¹⁴ Éma, mavarahahineni macaitica ema Jesús, étisera vahi ávarahahini máuchucuhahini ema máuriquenénihi yátupiquenehi santo. Masapihapa eyaseserecachi máuchucuha ema ticapahi.¹⁵ Tásiha, émapa ímicapacahi ema Ticaitarecavahi. Émasera ema Viya macaechepucachi te máecari. Véchajisihahi víti éma taicha vímahaquenehi eta mápechiravahi títareca.¹⁶ Puiti, ímararacahi eta manarasirahi ema maca masarini. Eta juca eta tímicaecherachahi eta machavirahi títareca ema Jesús. Taicha émahí ema tójaracavahi eta vítupajijiavahi eta vicanarasirahi ema maca achane, táichavenehi eta vicasiñairahi éma.

¹⁷ Tiuri puiti, nuparapenaveana, éti ímicapacahi ema Jesús taicha vahi ímatihini eta émairahi ema Cristo ema vicuchapaquenehi. Énaripa ena tupairucana eyehe, váhivare náimatihini éma.¹⁸ Étasera tacaheyarehi eta juca taicha máechajiriruvachuhi ema Viya nametacavahi ena profetana eta macatajivairayarehi ema Cristo.

¹⁹ Tásiha puiti, éneuchavainapa ecáijuhénapa ema Viya, apaesa macaepaha éma tamutu eta epecaturana. Énerichuvare ema Viya técasarechaheyarepa éti.²⁰ Ene ecahehi etsecava ejacapayare ema Jesucristo te machavapa. Éma, iáquenuyare taicha manerejiruhi ema Viya te tépanavainapa tamutu.²¹ Ema maca Jesucristo puiti téjacahi te anuma. Jararihiyaresera eta sache eta machavirayare, máetupiricayareva tamutu. Ánaquiaparipa, eta juca mametarapihi ema Viya nayehe ena mayeheana santo profetanaini eta náimitusirayare ena achaneana.²² Ema émana víyahaini profeta ema Moisés, mametacahi ena viáchucanaveanaini, ani macahehi: “Ema Viya Dios tivanecanuhi núti numetacaheyare eta máechajiriruva. Títecyare ema apanayare profeta mavaneruyareva ema Viya, tacutiyare eta mavanesianuhi núti. Éma, tiúchucayare te namuri ena víamariqueneana. Tatuparaca nasuapayare tamutu eta mavanairipianayare.²³ Taicha ema Viya máimicapacayare namutu ena masuápajirárahánayare mayehe ema profeta máiteruyarehi, taicha mamavarahahi nacasiapahini ena machanerana” macahepa ema Moisés.

²⁴ Namutu ena apamuriana profetana, émaripa ema Samuél énapa ena náequenereruana profetana, náechajisihahi eta juca vímahaqueneanahi puiti juca sácheana.²⁵ Ánaquiaparichaha, te vuíchaha máuchucuhini ema víyahaini Moisés, ema Viya mametacaipa ema viáchucaini Abraham, ánipa macahe: “Nunereji-cayare ema émana piámariéquene tiúchucayare. Éma, tójaracaya eta táurivaya eta náitaresiraya namutu ena achaneana apánapanenéjiqueneána te juca apaquehe” macahepa ema Viya. Tiápechava mametacaipa

† Ema Pedro téchajicahi te náechajiriruva ena israelítana, máimijarechirahi ema Viya: “ema nacasiñaquehehi ena viáchucanaveanaini ema Abraham, ema Isaac, ema Jacob, énapa ena apamurianaini viáchucanaveanaini”.

étarichuhi máechajiriruvana mayehe ema machichaini Isaac, énapa ena mámarinaveánaini. Puiti títaucha-varipa eta juca máechajiriruvaichuhi ema Viya. Tásiha puiti, éti tituparacahehi ínapucayare ejacapa eta máijjararuheya ema Cristo, taicha étirichuhi israelítahehi. Ímatihivare eta apamuriana máechajiriruvana ema Viya, nájuchaqueneana ena víyarahanaíni profetana. ²⁶ Tásiha, eta macaechepusirahi ema Viya ema Machicha Jesús, tivanecahavipa vimetacahe éti. Te ecasiñavapuca eta mayehe, máquijisinaheyare eta evainarajivana. Tíjaracahenapa eta iúricacarevayare —macahepa ema Pedro.

Emapa Pedro émapa ema Juan námaqueneanahi te namirahu ena tuparairucana

4 Téchajicanarichaha ema Pedro ema Juan te namirahu ena achaneana, títecapanapa ena tuparairucana, énapa ena tímiturecarahiana ticaijareana saducéoana. Námapahivare ema náquenuruha ena tasuntarurana eta Templo. ² Tisemanapa taicha vahi náuricahini eta nasamairisirahi ena apinana apóstoleana náimitusirahi ena achaneana. Vahi náuricahini eta nametasirahi eta yátupiquenerahi eta máechepusirahi ema Jesús te máecari, mápechiravahi títareca. ³ Tacahe, nacaratacavacapa, náimisiapavacapa te cárcel. Váipasera nacayaseserehíni, taicha cáperehichícharínehi. Tiámmainucavapa te apanapa sache, nacuchucavacaya ticayaseserehianayarehi. ⁴ Camuriasera ena tisuapanahi táichavenehi eta nasamarasirahi eta náechajiriruvahi ena apóstoleana. Eta natupahi ena téhicanaripa ema Viáquenu Jesucristo cinco mil ena achaneana ajairana. Camurianavare ena esenana énapa ena amaperuana. ⁵ Te apanaquenepa sache, ema corregidor Caifás ticurujicapa ena apamuriana aquenucarahana tayehe eta ichapequene cabildo te Jerusalén. Natiarihihivare ena escribánoana. Matiarhihivare ema Anás ema pasado corregidorhi, énapa ena machichanaveana: ema ticaijarehivare Juan émapa Alejandro. Natiarihihivare ena apamuriana machichanaveana.

⁷ Tacahe, náemepanapa ema Pedro ema Juan te cárcel. Nacatupiacapa te namirahu, nayaseserecapa. Ánipa naicha:

—Éti, vahi vituparacahehini eta ímitusirahi eta juca. ¿Nájaha tivanecahehi icha eta juca? ¿Nájaha ema tíjaracahehi eta ítupajjiásiravahi? —nacahepa.

⁸ Tacahe, ema Espíritu Santo máimicatacachi ema Pedro eta majicapirahi ena tiyaserecanahi, ánipa macahe:

—Tátanaveana juéseana, tátanaveana víyacárana te juca víávasa. ⁹ Evaraha echa eta juca táuriqueneana táicharacavahi eta vicanarasirahi ema maca achane macajumaqueneníhi. ¹⁰ Vimetacaheyare puiti. Vivaraha vémechaheyare, eti énapa namutu ena achaneana te juca víávasa Israel. Ema maca achane, ímahaquenehi eta manarasirahi. Vivaraha vímimatichahe eta máitupajjiásirava ema Jesucristo ema Nazareno tacanaracachi eta vipiarsirahi te máijare. Éma, émeta-

táruhi te crusu, ecaparuhi. Émasera ema Viya macaechepucahi te máecari. ¹¹ Éti, épuruhi ema Jesús, ema manerejiruquenehi ema Viya. Puiti, ecutipapa ena máitucarahana tépiyarecana peti, te náepurupuca eta tatumequene esuíqui táesuquirayarehini eta peti.

¹² Macarichu ema Jesucristo eta marataha eta macatiuchirahaviya macuchucuirahaviyarehi. Taicha ema Viya manerejiruhichuhi ema Jesús eta macuchucuirahaviyare. Nájina apanaina manerejiruinahi te vimuri viti achaneana eta te juca apaquehe —macahepa ema Pedro.

¹³ Tacahe, ena tuparairucana náraminehi eta náitusirahi téchajicana ema Pedro ema Juan. Náichacacapa:

—¡Tájina vahi napicacaracavahini eta viyehe! Ena nani tájina náitucaquenéna eta letra. Máiturereanahi. Tájina náimatiyahini eta viyehe escuela. ¿Máijaracavacahipuca ema Jesús eta náitupajjiásiravahi te macachanevacaichaha ema? —náichacacapa.

¹⁴ Tájina naviyahini nacayema taicha matiarhihi ema achane masarini, titupihahi te namirahu. Taicha náimahahi eta yátupirahi eta manarasirahi. ¹⁵ Tacahe, navanecapa eta nacuchusiraya ena apóstoleana eta te náurujisiavahi. Nanasipa ena aquenucana téchajiricanaripa. ¹⁶ Ánipa nacahe:

—¿Tájaha vícharacavayare nayehe ena nani? Taicha namutu ena achaneana ticavasanahi te juca Jerusalén náechahi eta náichirahi ena nani eta tiáramicare. Tásiha, vahi visuapacaremahi te vépiyaequenehava-capuca. ¹⁷ Váhisera távaraha vísapa náimiyana náimitureca nayehe ena achaneana. Vípicararecavacaya apaesa vahi nacuimiyana náechajisiha eta máechepusirahipuca ema mácanínnavaji Jesús —nacahepa.

¹⁸ Tacahe, nacasiapavarepa ema Pedro ema Juan. Navanecapa éna, ánipa naicha:

—Vahi vivaraha ímiyana échajisiha eta juca, váhivare ecuimitureca nayehe ena achaneana eta máechepusirahipuca ema Jesús —náichapa.

¹⁹ Najicapapasera ema Pedro ema Juan, ánipa naicha:

—Esamahavichaha. Ema Viya timetacahavi eta véchajisiháirayare. Étiserá ecaticapa véchajisiha éma. Émaquenehisera tisuapacarepanahi eyehe éti. Epanerecha yátupina. ²⁰ Víti, vahi vimatinaimahi eta véchajisiháiraya tamutu eta juca vímahaqueneanahi visamaqueneanahivare mayehe ema Jesucristo —nacahepa.

²¹ Tacahe, ena tuparairucana eta nasamirahi eta namasuapirahi, tisemanapa. Tacahe, náipicararecapa. Tájinasera náicharacahini. Nacaiticapa taicha tájina naviurevainahini jácani táimicuñacahini. Taicha namutu ena achaneana nacunachahi ema Viya táichavenehi eta náimahaquenehi. ²² Cuarenta áñoripa eta mahañora ema maca achane masarini. Tétavacavahi eta tiáramicarevahi eta manarasirahi maicha ema Vi ya.

Ena téhicana ema Jesús tiyaseserecana eta natumesamurevaina

²³ Eta náuchucuiraripa ema Pedro émapa ema Juan, tiyananapa eta te návihahi ena nachamuriana.

Nametacapa tamutu eta nacatianasirahi ena tuparairucana. ²⁴ Te náechapa, ena nachamuriana tiyujaracanapa namutu. Ánipa nacahe eta nayujarasirahi:

—Tata Viáquenu, píti pépiyacahi eta anuma, eta apaquehe étapa eta ichapequene une mar. Pétupiricahi tamutu eta juca vímahaqueneanahi puiti. ²⁵ Píti pimetacahi ema víyahaini David pivanarainihi eta májucunachiraya eta te Salmo. Ani tacahehi eta májurehi: “Tatiarihiya eta avasareana, ena achaneana navarahaya nacanara ema Viya. Énaparichu ena nujaneanana, énerichuvare napanerechaya nacanara ema Viya. Máetupicushiana éna. ²⁶ Ena réyeana te juca apaquehe títsecavanayare eta nacanarairayare. Énaripa ena aquenucarahana nacapanererya nacanaraya ema Viya, nacanarayareva ema Cristo manerejiruhi éma” tacahehi eta májurehi ema David.

²⁷ Étaripa te juca viávasa, ticuticacahi eta napanerechirahi ema Herodes Antipas, ema Poncio Pilato, ena apavasanana, énapa ena vijaneanana israelítana, navarairahi nacapaca ema sántoquene pichicha Jesús, ema pinerejiruquenehi. ²⁸ Títauchavahi naicha eta juca pipanereruana étaarayarehi tacaheyarehi eta péchajiriruvana. ²⁹ Pítisera, Tata Viáquenu, pímararacahavihi puiti eta náichirahavihi viti pivanaranahi. Píjaracahavisera vitumesamurevaina eta véchajisihairaya eta péchajiriruva. ³⁰ Píjaracahavi eta vítupajijíásiravaina viratahairaina vicanaraca ena nacajumaqueneana, vímeresiraina eta tiáramicareana táichavenehi eta vicasiñairahi ema sántoquenehi pichicha Jesús —nacahepa.

³¹ Te títapiricanapa eta nayujarasirahi, tíjahúchavapa tiyayacare eta apaquehe návihahi éna. Tacahehi eta mávahásiravácahivare namutu ema Espíritu Santo. Váipasare napicacaracavahini eta náechajisirahi eta máechajiriruva ema Viya.

Ticajicacanahi tamutu eta náimahaqueneana

³² Namutu ena nasimutuvaqueneana tisuapajirahianahi, ticuticacahi eta napanereruana eta nacajicacairahi. Namutu nácani téchanahi eta náimahaqueneana nacayehequeneanahi, vahi nayavanihacacahini. Tatupiruvahi te nasamureana eta nacajirahi.

³³ Tacahe, tímiyanavanahi ena apóstoleana eta náechajisihairahi eta máechepusirahi ema Viáquenu Jesucristo. Tisuapacarepaicha eta náimiturapianahi. Máimicatavacahivare ema Viya ena téhicanapahi ema Jesús. Namutu éna, típicauchacareanahivare ne achaneana. ³⁴ Nájina émanáinahíni te nataracu máemepaurechavahíni. Taicha ena ticayeheana apaquehe, pétipuca, náijararecapaipa. ³⁵ Tásiha, náijaracavare eta plata ena apóstoleana. Tásiha, ena apóstoleana náijaracavacavare nácani páurepananahi.

³⁶ Matiarihivare ema achane ticajare José. (Éma máuchurehi eta te tíurupuhi te mar ticajare Chipre.) Ema maca José náumurivaichaha ena levítana. Ena apóstoleana nanacapa eta máijarehi Bernabé (te véchajiriruva ticajare Ticaurisamurerahi). ³⁷ Ema maca máijararecapa eta mapenapahini. Tásiha, máijaracapa eta plata ena apóstoleana.

Eta mapecaturahi ema Ananías ésupa esu mayena Safira

5 Matiarihivare ema achane ticajarehi Ananías ésupa esu mayena ticajaru Safira. Énerichuvare náijararecapa éna eta nayehe apaquehe napenapahini. ² Ema maca achane macaerajicapa ticutimuriahacaca eta plata tavachahi eta mayehe apaquehe. Esu mayena suéchahi eta mayumurusirahi eta ticutimuriahacaca eta plata.

Tacahe, te títicapapa ema achane nayehe ena apóstoleana, máichapa:

—Níjararecahi eta nuyehe apaquehe. Júchahi tamutu eta plata tavachahi —macahepa.

³ Tásiha, ema Pedro máichapa:

—Píti, Ananías, ¿tájaha tacayema písapavahi ticaetemavi ema Satanás? Pipanerechaipa pivayuaracayare ema Espíritu Santo eta piyumurusirahi ticutimuriahacaca eta tavachahi eta piyehe apaquehe.

⁴ Pímaha, Ananías. Piyeherichuhi eta apaquehe píjarareruhi. Nájina tipamicavinahi eta pinaquisiravaya. Puiti eta juca píjarasiravahi pinaquicava, pépiyahirahipaipa pímiyachahi tamutu eta juca plata tavachahi eta piyehe apaquehe. Pátupiruvapaini eta pivarahaquenehi pinaquica. Émasera ema Viya máimraracahi eta juca pépiyahiraivahi. Vahi vítinahini pivayuaracahini —máichapa ema Pedro.

⁵ Te masamapa ema Ananías eta juca, tiáquipaicavapa, matupiru tépena. Te nasamairiricapa ena achaneana, namuturinehi típica ichape. ⁶ Tacahe, nararihi ena natuparaháichuhi técararecana. Navehapa eta máquehe ema Ananías. Náyuruacapa. Námapa te ecarí, náecarapanapa.

⁷ Te táequenepa eta mapanaquene hora, títicapapa esu Safira, mayena ema Ananías. Vuíchaha suéchahini eta máicharacavahi ema suima eta máepeniraipahi.

⁸ Tacahe, ema Pedro mayaserecapa, ánipa maicha:

—Pimetacanu. Eta juca plata mámaquenepahi ema pima, ¿étahipuca tamutu eta tavachahi eta eyehe apaquehe? —máichapa ema Pedro.

Tásiha, sujicapapa:

—Eta tavachahi tamutu —suíchapa.

⁹ Tacahe, ema Pedro máichapa:

—¿Tájaha tacayema ecuticacahi eta juca épiyahiraivahi evayuarasirahi ema Espíritu Santo? Ávane tichavana ena técarapananahi ema pímaini. Tásiha, puiti pítipavayare tiámavianayare —máichapa.

¹⁰ Tacahe, eta máichirahi ema Pedro, enevanepa tiáquipaicavahi ésu te máivapechacaya ema Pedro. Tépenavarepa. Te tichavanapa ena técarapananahi ema suímaini, náimaharinehi ésu tépenaipavare.

Navehavarepa esu, námavarepa náecarapana te machacaya ema suímaini. ¹¹ Te nasamairicapana namutu ena achaneana, ichaperinehi eta napisira ema Viya, navetijipa eta napisirahi ena téhicanahi ema Cristo.

Máijaracahi ema Viya ena apóstoleana eta náimeresiraya eta tíamicareana

¹² Tacahe, ena apóstoleana, ichape eta máijarasiravacahi ema Viya eta náimeresirayare eta tíamicareana te namirahu ena apamuriana achaneana. Ticurujicánahivare tamutu sácheana ena tisuapajirahiana te náurujsirareva te tajuhe eta Templo, te tayehe eta alar máepiyaruhi ema reyni Salomón. ¹³ Namutu ena apamuriana achaneana máehicarahanaríchaha ema Jesucristo, vahi napatsicavahini nacanara taicha namutu napicauchahi. ¹⁴ Camurianapaipasera ena ajairana énapa ena esenana ena téhicanapaipahi ema Jesús. ¹⁵ Camurianaipa ena nacanararuanapáipahi ena apóstoleana. Tacahe, námavacapahi ena apamuriana nacajumaqueneana, nanaquicapaipea te calle mayanihayarehi ema Pedro. Eta máetavisirayarehi éma, távichayare eta macuna, tacanaracayarehi eta najumana. ¹⁶ Énerichuvare, títecapanapa te Jerusalén ena achaneana tíásihana te avasareana nachacayarahani. Námapahi ena nacajumaqueneana énapa ena návaháruana ena éreanana. Namutu ena nani tinarcapahi tayehe eta náichavaquenévanihi.

Naémeratacapa ema Pedro émapa ema Juan

¹⁷ Váipasera máuricahini eta juca ema corregidor, énapa ena machamuriana. (Saducéohanahi éna.) Tisemanarinehi táichavenehi eta náehisirahi ena camuriqueneana achaneana eta náimiturapihi ena apóstoleana. ¹⁸ Tacahe, nacavanairipipa nacaratatajica ena apóstoleana. Náimisiapapa te cárcel, ticaeratanapa. ¹⁹ Émasera ema Viya majaneacavacahi éna. Te jena yati, mavanecapa ema mayehe ángele. Mavejiapanapa eta cárcel návihahi éna. Mavanecapa náuchuca, ánipa maicha:

²⁰ —Eyana ímerekava te jena Templo. Emetaca ena achaneana eta mavarairahi ema Viya máitsivachaya arairuya eta náitaresirayare ena téhicanaya ema Jesucristo —máichavacapa ema ángele.

²¹ Náuchusihapa ena apóstoleana te cárcel, timapicuhichaha te tiyananapa tayehe eta te Templo. Tinahacavanavarepa tímiturecana.

Tacahe, te jena yáticarahi ema corregidor mavanecapa ena comisarioana máimichuhapa namutu ena apamuriana tuparairucana énapa ena náiyacarana israelítana. Te tíurujicavanapa namutu, nacavanairipipa náepana ena apóstoleana eta te cárcel. ²² Te títecapanapa te cárcel ena suntaruana, navejiacapa eta tapaja. Nájinari pahisera. Tacahe, tichavanapa nayehe ena náquenuruhana. Nametacapa eta nájinari pahihahi ena apóstoleana. ²³ Tacahe, náichapa:

—Te vítecapauchapa eta cárcel, vímahapa tanasihi ticaeratahi eta tapaja. Natiarihivare ena séntinélana

tijaneacanahi eta tapaja. Tacahe, te vivejiacapa eta tapaja, nájina émanainahini vichimapahini te tajuhe —nacahepa ena vanairucana.

²⁴ Te máechapa ema corregidor, énapa ena machamuriana tuparairucana, émapa ema náquenu-muri ena tasuntarurana eta Templo, náramirinehi ichape. Tacahe, náichacacapa:

—¿Tájaha tacayema eta juca? Vaipa vímatiequeneha. ¿Tájahapuca vícharacavaya? —náichacacapa.

²⁵ Téchajiricavanarichaha éna, títecapanecha ema émana achane. Mametacavacapa éna. Ánipa macahe: —Ena naena ajairana érataruanahi te cárcel, náenahi ánaqui te Templo tímiturecanahi nayehe ena achaneana —máichapa.

²⁶ Tacahe, ema náquenuruha ena suntaruana, émajacaruvapa tiyana. Mámamurihapaipahi ena suntaruana, náepanayarehi ena apóstoleana. Jéhesare, námamurihapa, tájinasera náicharacapahini eta námirapahi taicha napicahi ena apamuriana achaneana natupisicavacahini te márijahiana. ²⁷ Te nacaitecapapa, nacaupihapa te namuri ena tuparairucana. Tásiha, ema corregidor ánipa maicha:

²⁸ —Víti vivanecahehi muraca eta vaipa ecuapechava ecuimitureca eta máechepusirahipuca ema Jesús, tásiha, éti ímivanavarichucha ímitureca. Namutupa ena achaneana tayehe eta juca víávasa Jerusalén náitucapa eta ímiturapiana éti. Visapihapa evaraha vítiyare táecatihahi eta máepenirahi ema achane Jesús. ¿Tájaha tacayema vahi esuapahavihini? —macahepa.

²⁹ Tacahe, ema Pedro énapa ena apamuriana apóstoleana najicapapa, ánipa naicha:

—Tatúparáca mativayare visuapa ema Viya. Éma tisuapacarepana eyehe éti. ³⁰ Víti, véhicahi ema Viya, émarichuhi nacasiñaquenehi ena víachucanaveanaini. Émahi ema ticaechepucahi ema Jesús, ema ímicaparuhahi eta émetatasirahi te crusu. ³¹ Tásiha puiti, ema Viya máunacahi te anuquehe anuma. Macaejacahi te mavaure tayehe eta trono. Máijaracaripa eta matuparahayarehi Aquenucayarehi Ticatiurahiyareva. Taicha mavarahahi ema Viya vimutuyare viti israelítana véneuchavaya mayehe, apaesa éma tiperdonachavivare tamutu eta vipecaturana. ³² Víti véchajisihahi eta juca taicha vímahaquenehi eta mápechiravahi títareca. Víti véchajisihahi maicha ema Espíritu Santo máijararuhavihi ema Viya viyehe viti visuapana éma —náichapa ena apóstoleana.

³³ Te nasamapa eta juca ena aquenucana, tisemanapa. Navarahapa nacapacavacayarehini. ³⁴ Matiarihisera te nataracu ema achane ticaijare Gamaliel. Ema tuparairucahi doctrinero fariseo. Ema maca achane ticapicahui nayehe namutu ena achaneana. Tacahe, titupihapa te namirahu. Macavanairipipa náuchucachaha ánipina ena apóstoleana. ³⁵ Tacahe, máichavacapa ena machamuriana aquenucarahana:

—Tátanaveana, nujaneanana israelítana. Échapava eta evarahaquenehi íchaya nayehe ena nani achaneana. ³⁶ Échapuca éti cape juca táitaresirahi, téchepucahi ema émana achane ticaijare Teudas. Éma

macahehi eta máitupajijiásiravahi. Tásiha, camuriana ena achaneana téhicanahi. Cuátrocientoanahi ena ajairana ena machaneranahi. Tásihasera, nacapacahi ena mánarana. Tásiha, namutu ena téhicanainihi téjanerepaicanahi. Títavapa tamutu. ³⁷ Tásiha, te táequenevarepa, te jena sache eta nacatupairahi ena achaneana, téchepucavarepa ema apana ema ticaijare Judas, ema ticavasa te Galilea. Camurianavare ena téhicanahi. Énerichuhivareséra nacapacahi ena mánarana. Namutuhivare téjanerepaicana ena téhicanainihi. ³⁸ Tiuri puiti, esamanu eta juca numetaruheya. Ésamiricachucha ena nani achaneana. Vahi ecuimicasiapava nayehe. Taicha eta juca náichaquenehi te nayehechuchapuca éna, títavayarehi. ³⁹ Téheserapuca mayehehi ema Viya, vahi eratahaimahi ecamitiaca. Échapavachucha. Machu ecucaemuñava ecanara ema Viya —máichavacapa.

⁴⁰ Tacahe, tésamiricavanapa namutu. Náimisiapavarepa ena apóstoleana. Náestacavacapa. Tásiha, navanecavarepa eta vaipa nacuapechava nacuechajisiha eta máechepusirahi ema Jesús. Tásiha, nacaíticavacapa. ⁴¹ Tacahe, tiúchucanapa ena apóstoleana te náurujisiavahi ena tuparairucana. Tiúrisamureanapáichucha eta nacaestairahi. Ánipa nacahe:

—Ema Viya máimararacahi eta vicamichirahi tamutu eta náimicatsiriasirahavihi táichavene eta véhisirahi ema Jesús —nacahepa.

⁴² Váhiquene nacatsimavahini. Tímiturecanáichucha tamutu sácheana, náechajisihahi ema Jesucristo. Tímiturecanahi te Templo étapa te pétiana.

Ticatuparacasiana ena siéteana ajairana

6 Te jena sácheana, eta nasimutuvaipa ena téhicanahi ema Jesús tisiapanapaipa ticajanemuriana-paichucha. Natiarihivare ena israelítana, apáechajiríruvanarípa éna. Natiarihihi ena páurepanana te nataracu énapa ena máimaruana. Ena nani najacapahi eta nayehe ración tamutu sácheana. Étana sache, ena nani apáechajiríruvanarípa vaipa náurisamurehini taicha vaipa nácuticacahini náechapajirícahina ena máimaruana. Ánipa nacahe:

—Váipa nácuticacahini eta najacapirahi eta tinicacare ena vijaneananarichuhi máimaruana —nacahepa.

² Tacahe, ena dócequeneana apóstoleana nacurujicapa namutu ena téhicanahi ema Jesús. Tásiha, náichapa:

—Vahi táuricahini víchepaichini eta vicametarairuira eta máechajiriruva ema Viya. Ticaichepairicahavipa eta víjarasirahi eta tinicacare ena vichamuriana. ³ Tiuri puiti, nuparapenaveana, tacamunu vinacayare siéteanaina ena ajairana te emuri éti, nácani ímatiqueneana tiúriana achane, téchemarahiana náimatiqueneha tamutu, mávaháruanahivare ema Espiritu Santo. Énaina vituparaca naicha eta juca. ⁴ Taicha víti vímianavayare viyujaraca vímiturecayare eta máechajiriruva ema Viya —náichapa ena apóstoleana.

⁵ Tacahe, namutu navaraha eta náechajiriruvahi. Tacahe, ticanerejianapa ena ticatuparahanayare. Naveha-

pa ema Esteban, achane tiuri, tisuapajirahiquene mayehehi ema Viya, mávaháruhivare ema Espiritu Santo. Navehavarepa ema Felipe, ema Prócoro, ema Nicanor, ema Timón, ema Parmenas, émapa ema Nicolás †. ⁶ Tacahe, náichuhapa te namirahu ena apóstoleana. Tásiha, nanacapa eta navahuana te nachutiana, nayujarauhapa, náijarasihapa eta náematanerepiyarehi.

⁷ Tiuri, eta nasamirahi eta máechajiriruva ema Viya, camurianapaipaicha ena téhicanahi tayehe eta avasare Jerusalén. Tisimutuanavare ena tiyujaracarahiana israelítana náunacaipa te nasamureana eta náehisiraipa ema Jesucristo.

Eta nacaratasirahi ema Esteban

⁸ Tiuri, ema Viya máimicatacahi ema maca Esteban. Máijaracahivarehi eta ichape eta máichirahi eta tiáramicareana te namirahu ena achaneana. ⁹ Tatiarihivare te Jerusalén eta apana náurujisireva. Tiúrujicavanahi ena israelítana prisionéroanaini náuchucureanapasera. Éna tiásihanahi te apanana avasareana, te Cirene, te Alejandría, te Cilicia, étapa te Asia. Nácapaemajiricapa ema Esteban te yátupihipuca ema Jesús émaquenehi Cristo. Vahi nasuapahini taicha tétavicavahi eta namasuapajiraivahi. ¹⁰ Ema Espiritu Santo máijaracahi ichape ema Esteban eta máitusiraya téchajica. Eta tacahe, vahi náratamahini nacachuriaca éma. Tisemanapa eta máitahasiravacahi. ¹¹ Tacahe, náimitucapa ena apinana ajairana navachachaque-neanahi eta náepiyequenehairaya ema Esteban. Ánipa naicha eta náimitusirahi:

—Visamahi ema maca macacahihhi ema víyarahaini Moisés, macacahivare ema Viya —náichapa.

¹² Tacahehi, eta nacaechepusirahi eta semanere nayehe ena achaneana, énapa ena aquenucarhana, énapa ena escribánoana. Náimiyusemacavacapa. Tásiha, nacaratacapa ema Esteban. Námapa ticayase-rehiya te namirahu ena tuparairucana. ¹³ Tásiha, náichuhavare ena apamuriana tépiyaequenehanaya. Ánipa nacahehi eta náepiyahiraivahi:

—Ema maca achane vahi máituca timatina macacacahi eta viyehe Santo Templo. Máepuruvare eta viyehe-repiana. ¹⁴ Énerichuvare macahehi ema Jesús Nazareno máquipaicayareji eta Templo, máitsivachayarehiji eta viyeherepiana máijararuhavihi ema víyarahaini Moisés —náichapa ena tépiyahirahianahi.

¹⁵ Tacahe, namutu ena natiarihiqueneanahi náejaruanahi náimararacaripa ema Esteban. Eta mamira macavasirahi ema ángele.

Eta maconsejarapi ema Esteban

7 Tacahe, ema corregidor mayaserecapa ema Esteban, ánipa maicha:

—¿Yátupihhi ene picahahi eta juca nametarapianahi ena nani? —máichapa.

† Ema maca Nicolás, ticavasainihi eta te avasare Antioquía eta máuchusinehi. Éma, apavasanahi, máehicahinivare eta nayeheripiana ena israelítana. Tásiha puiti, máehicaipa ema Jesucristo.

² Tacahe, majicapapa ema Esteban, ánipa maicha: —Tátanaveana, nuparapenaveana. Esamanuchaha. Eta acane, ema Viya tiúcupaicahi másihahi te mávasa anuma. Tímerecavapa mayehe ema viáchucaini Abraham. Ema Abraham, mávihaichaha te tinapaica te apaquehe ticajare Mesopotamia, ticajarevare Caldea. Vuíchaha mayanahini macavasahini te Harán.

³ Máechajicahi ema Viya ema Abraham, ánipa maicha: “Pijunijica eta juca piávasa, énapa namutu ena pijaneanana. Piyana eta te apana apaquehe. Núti níjaracaviya eta arairu piávasaya” máichapa ema Viya. ⁴ Tacahe, ema Abraham masuapapa; tiúchucapa eta te tinapaica te Caldea. Tiyanapa eta te avasare Harán. Te táequenepa eta máepenirahi ema máiyaini, mavanecapa ema Viya ema Abraham máiteca eta te juca apaquehe viávihi puiti víti. (Te jena áñoana ticajarehi Canaán.)

⁵ Tájinasera máijarahini mayehenahini apaquehe, ánicuchicháinahipucáini. Mаметacahisera eta máijarasirayarehi eta mayehyarehi apaquehe. Taicha eta apaquehe máijarayarehi nayeheyarehi ena machichanavequeneana te máepenapa ema Abraham. Nájinarichahasera machichanaveanainahini te jena áñoanahi. ⁶ Énerichuvare mamentacahi ema Viya, ánipa maicha: “Ena pichichanavequeneanayare ticavasarecanaya nayehe ena apavasajuecuana. Ticatajivayaresera naicha ena napaureanaya. Nacajireyare. Cuatrociento áñooyare eta náichirayare. ⁷ Nútisera, níjaracayare eta náicuñayare ena achaneana te jena avasare nácani ticajireanayare ena pichichanavequeneanayare. Tásiha, te táequenenapa, nucuchucuhavacainapa. Tásiha, títecanainapa ani te juca najirauchiha-nuyare” máichapa ema Viya.

⁸ Ema Viya mafirmachapa eta matratune eta máitachirayarehi eta juca máechajiriruvahi mayehe ema Abraham. Énerichuvare mavanecapa ema Abraham timarcachavayare, máicutiarayarehi eta macasiñavairahi me Viya. Namarcachayareva namutu ena machichanaveana ajairana, énapa ena mámariequeneana ajairana. Eta tacahehi, te óchoquenepa sache eta máuchusirahi ema Isaac machicha ema Abraham, mamarcachapa. Énerichuvare, máichahi ema Isaac te macachichapa ema Jacob. Ema Jacob, énerichuhivare máichavacapahi ena dócequeneana machichanaveana, ena víyanaveanaini víti. ⁹ Ema José, nacapinaruhi ena maparapenaveana taicha máemunacapanahi ema naiya. Eta tacahe, nájjararecapa ena maparapenaveana nayehe ena apavasanana. Tásiha, éna náequenecapa nájjararecapa mayehe ema ticavasa te apana avasare Egipto. Émasera ema Viya majaneacahi ema amaperu José.

¹⁰ Macatiuchahivare tayehe eta macatajivairana. Máijarahivare eta máitucaqueneyare. Ema rey aquenucahi tayehe eta Egipto máemunacahi ema José. Máimatiacahi eta máitusirahi. Eta tacahe, ema rey macajupahahi eta majaneasirahi tamutu eta máimahaqueneana. Aquenucahi máicha, nayehe namutu ena ticavasana te Egipto.

¹¹ Tásiha, te jena áñoanahi, táitecapauchapa eta eucuha te tamutu eta avasareana tayehe eta táunavahi eta Egipto étapa eta Canaán. Tétavicavahi eta nacatajivairahi ena achaneana. Tásiha, ena viáchucanaveanaini, tájina naviyahini eta nanicaquene.

¹² Émasera ema Jacob te masamairiricapa eta tatiarirahi eta tinicacare te Egipto máunaruhi ema rey, máevatacapa ena machichanaveana eta navacharepana eta tinicacare. Te téchuriacanavare eta tinicacare, mápechavarepa máevataca ena machichanaveana. ¹³ Te apihequenepa eta nachavirahi, ema José tímimatichavapa nayehe ena maparapenaveana. Tacahe, ema rey mapaenumavapa máimati énairehi maparapenaveana ema José. ¹⁴ Tacahe, ema José máimichuhapa ema maiya Jacob énapa ena natiaririqueneanahi te mapena. Setenta y cincoqueneana eta nasimutuva éna. ¹⁵ Tacahehi eta mayanirahi ema Jacob macavasairahi tayehe eta te Egipto. Étapa máepenihahi. Te táequenepa, étarichuvare náepenihahi ena machichanaveanaini viáchucanaveanaini. ¹⁶ Váhisera nacaecarasihini eta náperanaini te Egipto. Nacayecapapa eta nacaecarasirahi eta te ecari te tachachacu eta avasare Siquem te tinapaica eta Canaán. Étarichuhi eta máecari ema Abraham †.

¹⁷ Tiuri, tiánehipa eta máitachirayarehi eta máechajiriruvahi ema Viya matratunehi mayehe ema Abraham, ánaquiaparichaha eta áñoana eta máijarasirayarehi eta apaquehe nayeheyarehi ena machichanavequeneana. Ena nachichanaveana ena viáchucanaveanaini, ánaquipa náejapasihahi te Egipto. ¹⁸ Tayerevahi eta año, titupihapa ema apana rey te Egipto. Éma arairuhi rey, vaipa macapayacahini máimatihini ema José. Váipavare mávarahahini maecha eta manaquiruanainihi máemataneanainihi ema José. ¹⁹ Masapihapa macatianacavacahi ena viáchucanaveanaini taicha eta náejapasirahi éna. Macaetemajiricavacapa. Macavanairipapa eta vahi nacueperajica ena amuyana ajairachichana náuchusiravanahi. Najunijica apaesa vahi nacuitareca. ²⁰ Tacahe, te jena sácheanahi, tiúchucapa ema amuya alauchu Moisés. Ema Viya máemunacahi ichape ema maca amuya. Mapana caje eta nacajurusirahi ena ticachichana te napena. ²¹ Te náimahapa téchemarahipaipa ema amuya, vaipa mayumurucacarehini. Tacahe, nayumurucapa ema amuya te pacurechicha te curichepiraquiana távihahi te cajacure. Ésusera esu machicha ema rey suíchimavapa, suvehapa. Ésupa ticajurucahi suchichayarehi. ²² Tacahe, ema amaperu Moisés ticaimitucasipa tamutu eta náitupajijiásiravanahi ena ticavasanahi te Egipto. Tacahe, ichape eta máitupajijiásiravahi eta

† *Ánaquiaparipa tatiarirahi eta avasareni Siquem, návasa ena mámariequeneana ena achane ticajare Hamor. Te tachacaya eta jena avasareni, tatiarirahi eta mari enurujuhe. Tacahe, ánaquiaparipa ema Abraham mavacharecapa eta apaquehe táimivehapa eta mari enurujuhe, mavarairahi sucaecarasiyayarehi esu mayena Sara, énapa namutu ena machichanaveana. Émaripa étarichuyareva macaecarasiyahi. Ena machichanaveana ichapemurirahi áñoana eta náechapajirisirahi eta ecari, taicha étarichuyarehi nacaecarasiyayarehi éna, énapa ena apamuriana mámariequeneana ema Abraham.*

máechajisirapahi étapa eta máematánerepianahi. ²³ Te ticayehepa cuarenta año ema Moisés, mavarahapa tiyana máejirapanavaca ena majaneanana israelítana. ²⁴ Te títecapapa ema Moisés, máimahapa ema émana achane ticavasa te Egipto téhararecahi, máehahi ema majaneana ema Moisés. Tacahe, macatiuchapa ema majaneana. Émapa títsirijiequenehahi. Macapacapa ema ticavasa te Egipto. ²⁵ Eta mapaneruhi ema Moisés, mavarahahi nacaicutiarayare ena majaneanana eta mavaneruirahi me Viya eta macuchucuiravacayarehi eta te nacatajivairahi. Váhisera nácaicutiarahini éna. ²⁶ Tacahe, te apanaquenepa sache, ema Moisés máimahapa téhacacani ena apinana majaneanana. Mavarahapa macaichepaica. Máichapa: “¿Tájaha tacayema éhacaca éti? Ímaha eparapecacahi” máichapa. ²⁷ Tacahe, ema túmepanahi mayehe ema apana, máevatajicapa ema Moisés, máichapa: “¿Tájaha tacayema pímisipava píti eta viyehé? ¿Nájahapuca tivanecavihi juéseviyarehi eta viyehé, viáquenumuriviyarepuca víti? ²⁸ ¿Pivarahapapuca picapacanuyareva núti, tacutiya repuca eta picapasirahi cape ema egipcio?” máichapa. ²⁹ Te masamapa ema Moisés eta náechirahi ena achaneana émairahi ticapaca, tiyanapa tijunahi eta te apaquehe ticajare Madián. Ánaquipa eta máerajisiavahi máitatijiyavahi. Mavehapa esu mayena, ticaparapepa. Apinana ena machichanaveanahi ajairana suyehe esu mayena.

³⁰ Te cuarenta áñoa eta mávihairahi ánaqui, te étana sache, tipairiricahi te mávapahiana apaquehe tachacaya eta cerro ticajare Sinaí, majanearesirahi eta uvesana. Tacahe, tiúcupaicapa ema Viya eta te távihahi eta chéyaraji yucuqui. Timurujirinehi eta yucuqui maicha ema Viya. Váhisera táijuchahini táitahini eta tapacajiana. ³¹ Eta máimararasirahi eta juca ema Moisés, máramirinehi. Tiyanapa mapaucha, máimatiyarehi. Te macachacayapa, masamapa eta mahu ema Viya. Ánipa máichahi: ³² “Nútichucha Viya nacasiñaquenehi ena piáchucanaveanaini. Nútirichu macasiñaquenehi ema Abraham, ema Isaac, émapa ema Jacob” máichapa ema Viya. Tacahe, ema Moisés tiyayacareinehi eta mapisirahi. Vaipa mapatsicavahini máimararacahini. ³³ Tásiha, ema Viya máichavarepa: “Pivejuchupevachava eta péparupeva taicha santo eta juca apaquehe piávihahi piátatayapairuhi.

³⁴ Pisamanuya puiti, jucarihi numetacaviyare. Núti nímararacahi eta nacatajivairahi ena nuchanerana tiávianahi te Egipto. Nusamahi eta náiyairahi. Nuvaraha nucatiuchavacayare. Eta tacahe, núcupaicahe numetapanaviya. Nuvanecaviyare puítirichu piyana tayehe eta Egipto, picuchucuhavacayarehi” máichapa ema Viya.

Tacahehi eta matuparasirahi ema Moisés mayehe ema Viya, mavaneruhi náquenumuriyarehi ena majaneanana, macuchucuhaya éna eta te nacatajivaiyahi. Étasera te tínapucainapa vahi náesachahini éma.

³⁶ Tásiha, émarichuhi ema maca Moisés macuchucuhavacapa namutu ena majaneanana tiásihanahi te Egipto. Eta macuchucuiravacahi, máimerecahi eta tiáramicareana te jena avasare Egipto, étapa eta te mar ticai-

jare Títsiama Une, étapa te mávapahiana vámahí. Cuarenta año macahehi ema Moisés eta máichirahi eta juca. ³⁷ Émarichuva ema Moisés ticaechajiriruvahi nayehe ena majaneanana israelítana eta máuchusirayarehi ema profetayare. Máichapa: “Ema Viya Dios tivanecanuhi núti numetacaheyare eta máechajiriruva. Títecayare ema apanayare profeta mavaneruyare ema Viya, tacutiya eta mavanesianuhi núti. Éma, tiúchucayare te namuri ena viámariequeneanayarehi. Tatu-paraca nasuapayare tamutu eta mavanairipianayare” macahehi ema Moisés. ³⁸ Émarichuvare ema Moisés, ema máichuhaquenehi ema ángele tiápanaya eta te jena cerro Sinaí, nacuchapirahi ena achaneana machamuriana te vámahí. Tasiha, máechajicahi ema Viya ema Moisés. Te títapiricapa ema Viya, ema Moisés tiúcupaicapa, mametacavacapa ena achaneana tamutu eta mametacasivanahi me Viya. Énerichuvare ema Moisés májuchapahi te libro eta mavanairipiana ema Viya, tisuapacareanahi viyehé viti israelítana véhicanyaya. ³⁹ Eta mávihairahi ema Moisés te cerro, vaipa náimahahini ena viáchucanaveanaini. Tásiha, vaipa návarahahíni náehicahíni éma. Navarahapa tichavanayarehi te Egipto. ⁴⁰ Tacáhénapa, te náichapa ema Aarón: “Vivaraha pépiyasinahavi eta visiñarajina táinapumirauchahaviya, taicha vaipa vecha tájahapuca máicharacavahi ema Moisés, ema ticuchucuhahavihi tayehe eta viávinénihí te Egipto” náichapa. ⁴¹ Tacahe, náepiyacapa eta nasiñarajiyarehi, amairiha oro, tavasimahi eta torillo. Napiestachayarepa eta náepiyaruhi nasiñaraji. Tacahe, ticaparecanavare eta vaca; náijaracasichahi eta nasiñaraji eta námavahuhi, náimicutichaipa ema Viya. Ténicacanapa. Tiúrisamureanapa eta náimairahi táurinavahi eta nasiñaraji náepiyaruhi. ⁴² Émasera ema Viya, eta máimairahi eta juca, vaipa máuricahini. Tásiha, vaipa majaneacavacahini éna. Váhisera máicuñacavanehini. Máisapapa ticasiñarajiana, téneuchavanapa te tamirahu eta nasiñarajiana. Tásiha, tamutupa nacasiñaraji eta jarairiquiana. Taicha ánipa tacahehi eta Sagrada Escritura nájurehi ena profetana. Ánipa maicha ema Viya: “Émitisicanuhi núti, eti israelítana. Vaipa nútinahini ácasiña eta jena cuarentaquenehi año te mávapahi vámahí. ⁴³ Étapa ecasiñahi épuyumirauchahi eta esiñarajiana ticajare Moloc. Énerichuvare ecasiñahi eta jarairiqui ticajare Renfán. Eta ecaparuhi, vahi nútinahini íjaraca. Étapa íjaracahi eta esiñarajiana. Éti, éperajiricapa eta esiñarajiana te tayeheana trono tapenahua-na épiyaruhanahi. Eta tacahe, nucajanerepaicaheya te apachacaya apaquehe ticajare Babilonia” máichapa ema Viya.

⁴⁴ Te jena mávapahi vámahí ema Moisés mavanecapa ena viáchucanaveanaini náepiyaca eta mapenayarehi máucupaisirareyarehi ema Viya. Mavecunaruhi eta tiáviha te anuma máimechaquenehi ema Viya. Étarichu náunasirare eta ajureca tiáma eta mavanairipiana ema Viya. ⁴⁵ Te tépenapa ema Moisés, máevachacapa ema Josué émapa máitsivahi téchapajiricayarehi ena achaneana. Tacahe, tiyananapa mámam-

rihapa ema Josué. Ena achaneana námapahi éna eta mapena máucupaisirare ema Viya. Nacaijuhepa eta apaquehe natuparahahi. Natiarihiserá ena achaneana ticavasana tayehe. Váhisera tácajerahichaini eta náitahasiravacahi ena nánaranahi taicha ema Viya máimicatacavacahi. Tacahe, tayerevahi eta áñoana ena náeperajicahi eta mapena ema Viya. Te tijurucapa ema rey David, ticatuparahapa, machimapapa eta tatiarihichaha. Émapavavare máechapajirica. ⁴⁶ Taicha ema maca rey David máemunaruhi ema Viya. Tacahe, ema David mavarahapa tépiyarecaya eta mapenaya ema Viya amairihayarepa mari. ⁴⁷ Váhisera tátauchahini eta mapanereruhi ema David, taicha ema Viya vahi máisapahini. Émapa títauchahi ema machicha ticaijare Salomón. Émapa tépiyacahi eta Templo.

⁴⁸ Tiuri puiti, numetacahevare, ema Viya ticavasahi te anuquehequene anuma. Vahi títecaimahi macapena te témploana vépiyruanasami viti páureanasami achaneana. Taicha ema Viya máichapa eta máechajiriruva: ⁴⁹ "Te anuma táviha eta nuyehe trono néjasihahi. Ánaqui tásiha eta nuvanairipiana tayehe te juca apaquehe. Núti vahi nácamunu eta peti te juca apaquehe. Núti vahi nácamunu eta nunarasirarena. ⁵⁰ ¿Váhipuca échava eta nútirahi népiyaca tamutu eta juca ímahaqueneanahi te juca apaquehe?" macahepa ema Viya eta máechajiriruvahi.

⁵¹ Puitiripa eti esamararacuanahi, ¿tájaha tacayema éhicahi eta namuracasamurevanaini ena íchucanaveanaini? Váhivare ávarahahini esama puiti eta máechajiriruvahi ema Viya táichavenehi eta evainarajisamurevavacahi étapa eta emasuapirahi ema Espíritu Santo. Éti, eta epanereruana tacuti eta napanereruana ena íchucanaveanaini eta navainarajivana. ⁵² Éna, námecatajivachahi namutu ena profetanaini. Nacapacavacahi nácani téchajisihanahi eta máitesirayarehi ema Cristo. Tásiha puiti, eta máitesirai pa ani, épururipa éma, masapihapa íjararecahi ímicapacahi éma taicha tétavacavahi eta máurivahi. ⁵³ Étaripa eta mavanairipiana ema Viya, ángeleana ena tíjarapananahi ema Moisés. Échajicuhaipahinéni éti, esamaripahinéni; váhiqueneséra esuapahini —máichapa ema Esteban eta maconsejachiravacahi.

Eta máepenira ema Esteban

⁵⁴ Te nasamapa ema Esteban eta máichirahi, tisemarinenehi. Tinicavanarinehi eta nasemaneva. ⁵⁵ Émasera ema Esteban vahi mapicaracavacahini éna taicha mávaháruhi ema Espíritu Santo. Máesenica te anuma. Máimaharine eta majaraiva ema Viya, émapa ema Jesús titupihahi te vaure tinapaicahi eta majaraiva ema Viya. ⁵⁶ Tacahe, ema Esteban máichavacapa ena achaneana natiarihiqueneanahi:

—Ésenica te anuquehe. Núti nímahahi eta anuma téjiacahi. Émapa ema Jesucristo, máenahi titupihahi te mavaure ema Maiya —máichavacapa ema Esteban.

⁵⁷ Énaserá eta nasemanevahi, tichujiquiñahavanapa. Tijajamurihanapa náetereuchapa namutu. ⁵⁸ Nacaratacapa, námapa te tachachacu eta avasare. Ánaqui eta

natupisisihayarehi nacapasihayarehi te márijahiana. Ena téhanahi nanaquicapa eta náepacuhána, natuparacapa ema nayehehi comisario ticaijarehi Saulo.

⁵⁹ Tacahe, nanahacaripa natupisicahi ema Esteban. Tiánehiripa nacapaca. Émasera tiyujarauchavaichaha. Ánipa macahehi:

—Tata Náquenu Jesús, pijacapinanu eta náchaneva.

⁶⁰ Eta máquipaisiravahi, tépuyucapa tipiaracapa muraca. Ánipa macahe:

—Tata, piperdonachavaca ena nani eta juca náichiranuhi napecaturahi —macahepa.

Te títapiricapa eta mayujarasirahi, tépenapa.

Éma Saulo mapanerecha mapanajiricavaca eta macatichiravacahi ena téhicanahi ema Jesús

(Hch 22.6-16; 26.12-18)

8 Éma maca Saulo, eta mapanereruhi tacutihi eta napanereruana ena ticapacanahi ema Esteban. Tiúrisamurepa éma. Natiarihivaresera ena apamuriana ajairana tiúripanereruana. Navehapa eta máquehe ema Esteban, náecarapanapa. Tíyahanapa ichape eta nacatiequenerahi. Étarichu te jena sache tépanavanapa napanajiricavaca muraca ena téhicanahi ema Jesús tayehe eta avasare Jerusalén. Téjane-recanapa náicha, ena camuriqueneana. Tiyananapa te apana avasareana tinapaica te Judea étapa te Samaria. Énaserá ena apóstoleana nanasirichuhi te Jerusalén.

³ Tacahe, ema Saulo, ema náinapuraquipahi ena tipanajiricanahi ena téhicanahi ema Jesús. Tisiapanapa te napenana. Nacaratacavacapa ena nachimapaqueneanapahi ajairana, esenana. Nachururupaicavacapa eta námirapahi te cárcel.

Éma Felipe ticametarairu te avasare Samaria

⁴ Te jácani avasareana náitecapihapahi ena najunaqueneanahi, tímiyanavanarichucha ticametarairuana eta máimiturapiana ema Jesucristo. ⁵ Éma maca Felipe majunaquenehivare. Títecapapa eta te avasare ticaijare Samaria. Tacahe, ticametarairupa nayehe ena achaneana eta náehisiraya ema Jesús, émairahi Cristo ema nacuchapaquenehi. Tiúrujicavanapa ena achaneana. ⁶ Namutu nasamararacahi eta macametarairuirahi ema Felipe. ⁷ Taicha náimahapa eta macanarasiravacahi ena nacajumaqueneana camuriqueneana: ena muracaquihana, ena tiyayacareana, énapa ena masariana. Camuriana ena éreanana máimijunaqueneanahi te náquehe ena achaneana návaháruanahi. Tipiáreanapáipa eta náuchusirapahi. ⁸ Eta tacahe, ichaperinehi eta náurisamurevahi ena achaneana tayehe eta jena avasare.

⁹ Te jena avasare Samaria, matiarhihi ema émana achane ticaijare Simón. Iápemarehi éma. Ánaquiparipa eta macaetemajirisiravacahi ena achaneana. Títupajijiácavahi tépiyacava éma. ¹⁰ Namutuhi ena nasimutuvaqueneana achaneana énapa ena ticaimahaqueneana nasamararacahi nasuapahi eta macayemaqueneanahi. Nacunacharinehi, ánipa nacahe eta náechajiriruvahi:

—Ema maca achane títupajijíacavahi ichape maicha ema Viya —nacahepa.

¹¹ Ánaquiaparipa eta mavayuarasiravacahi éna, tayehe eta mahiápemarevahi. Eta tacahe, napi-cauchahi éma. ¹² Téhesera nasamapa ema Felipe, nasuapapa eta nasamirahi eta máechajiriruva ema Viya. Náehicapa eta mametarairuhi mayehe ema Jesús eta émairahi Cristo, ema nacuchapaquenehi. Tacahe, camuriana ena ajairana énapa ena esenana ena ticaicachasianahi taicha eta nasuapirahi ema Jesús. ¹³ Émaripa ema iápemaréni Simón, masuapavare éma. Ticaicachasivarepa. Máehicapa macachanepaipa ema Felipe. Ichape máramipahi eta ichapequeneana tiáramicareana máchaqueneánapahi ema Felipe.

¹⁴ Tiuri, te Jerusalén, nasamairiricapa ena após-toleana eta náehisiraipahi ema Jesús ena achaneana ticavasanahi te avasare Samaria. Tásiha, ticaevatavaneanapa ema Pedro ema Juan. ¹⁵ Tiuri, ena téhicanaripa ema Jesús, vuíchaha máucupauchahini ema Espíritu Santo, mávahácavacahíni éna. Tacarichuichaha eta nacaicachasirahi eta navarairahi náehica ema Viáquenu Jesús. Tásiha, te títécapanapa ema Pedro ema Juan, tiyujaracanapa nayaseacapa ema Viya máijarasiraina ema Espíritu Santo eta mávahásiravacaina ena téhicanaripahi. ¹⁷ Tacahe, ema Pedro émapa ema Juan nanacapa eta navahuana te nápusiana éna. Tacahe, ema Espíritu Santo mávahácavacaripa eta náemamachutíchiravacahi éna. ¹⁸ Tacahe, ema Simón eta manecapirahi eta mávahásiravacahi ema Espíritu Santo te náemamachutíchiravacahi éna, mavarahapa éma mavachachavaca ena após-toleana. ¹⁹ Ánipa máichavaca:

—Íjaracanu núti apana eta nítusiraina eta ítucaquenehi, apaesa te nunaca eta nuvahuana te nápusiana ena nácani achaneana, máucupaicapaini ema Espíritu Santo, mávahácaini éna —máichavacapa.

²⁰ Tacahe, ema Pedro máichapa:

—Pémitiequenehaya píti étapa eta piplatane. Taicha píti vahi tiuri eta pipanereru. Pímijachahipuca vicavacharapiyare eta máijararuhaviana ema Viya. ²¹ Vahi pítiparacaina píti, taicha eta pipanereruana vahi tátupiruvahini mayehe ema Viya. ²² Pínajica eta pivainarajivana. Piyaseaca ema Viya, tijuricati tiperdonachavi eta taurivahi eta pipanereruhi píti. ²³ Taicha nímatiacavihi eta pétáviuchirahi eta picapinaruravahi. Eta juca picahehi taicha vahi tínajiacavimahi eta pivainarajiva —máichapa ema Pedro.

²⁴ Tacahe, tipicapa ema Simón. Ánipa maicha:

—Ímicatacanu éti, eyujarauchanu me Viya apaesa vahi tacuitauchava eta juca ecayemaqueneanahi —máichapa.

²⁵ Tacahe, ema Pedro ema Juan tinahacavanapa títiturecana eta máimiturapiana ema Viáquenu Jesucristo. Te tamutupa eta náimituresirahi, tiyananapa tichavanayarepa te Jerusalén. Tétávajicanapa te avasarechichana tayehe eta Samaria. Ticametarairuanapa nayehe ena achaneana.

Ema Felipe máimituca ema achane ticavasa te Etiopía

²⁶ Tiuri, te jena sácheana, tiúcupaicapa ema émana ángele mavaneruhi ema Viya. Máechajicapa ema Felipe. Ánipa maicha:

—Felipe, pétipiricava, piyana te tinapaica te vana. Pivenacuhayare eta achene tiásiha te Jerusalén, tiyana te avasare Gaza. Pétavicayare eta mávapahiana vómahi —máichapa.

²⁷ Tacahe, tétupiricavapa ema Felipe, tiyanapa. Te achene ticainunacacanapa ema achane ticavasa te avasare ticajare Etiopía. Ema maca achane †, sujupaha esu Candace, reina tayehe eta apaquehe ticajare Etiopía. Ema maca achane ema tijaneaca eta suímahueneana esu reina. Éma, másinehi te Jerusalén, máejirapanahi ema Viya. ²⁸ Ema maca achane machavaquenepaipahi te mávasa. Eta mapaisirahi, téjacapahi te mayehe carro. Téchajicurecapahi eta Sagrada Escritura májure ema profetaini Isaías. ²⁹ Tacahe, ema Espíritu Santo mametacapa ema Felipe, ánipa maicha:

—Pémeñahava te tachacaya eta jena carro —máichapa ema Espíritu Santo.

³⁰ Tacahe, te témeñahavapa ema Felipe, te macachacayapa eta carro, masamapa ema achane téchajicurecapahi. Tásiha, mayaserecapa. Máichapa:

—¿Picaicutiara eta jara péchajicurepahi?

³¹ Ema achane majicapapa:

—Váiparinehi nucaicutiaraimahi taicha nájina nametacanupahini eta tacayemapahi. Te pítucauca píti pimetacanu, picatajicanu. Yare, piávacuha péjaca te juca nuchacaya —máichapa ema achane.

³² Tiuri, eta máechajicurepahi ema achane, ani tacahehi: “Eta uvesa, te nacarataca nacapacayarepuca, vahi ticatiuchavaimahi. Te nachucamecapuca, váhivare tipiararecaimahi. Ene macahehi ema maca achane, vahi mácapauchavahini, váhivare máechajiuchavahini te námapa tayehe eta nacapasihayarehi. ³³ Tétavacavahi eta nacatsirirairahi éma, tayanapane tájinanéni maviurevainahini. Nájnavare nacatiuchahini. Ena mámariequeneanaini, nájina náechajisihahini éna”.

³⁴ Tacahe, ema maca achane mayaserecapa ema Felipe. Máichapa:

—Picatajicanu pimetacanu. ¿Nájaha ema táechajisihahi eta juca libro májurehi ema profeta? ¿Ema táechajisihahi ema maca profeta, vahi apanapuca? —macahepa.

³⁵ Tacahe, ema Felipe tépanavapa mametaca ema táechajisihahuenehi eta libro. Mametacapa eta émairahi táechajisihahi ema Jesús, ema Cristo ema nacuchapaquenehi. ³⁶ Tacahe, te máechapa ema achane, mapanerequenehaini eta napaisirapahi. Tacahe, te nacapayacapa eta únecura, macahepa ema achane:

—Te juca jararihi une. Nuvaraha pícachasicanu —macahepa.

³⁷ Tacahe, ema Felipe majicapapa:

† Eunucohi ema maca achane.

—Tiuri, te yátupihipuca eta pisuapirahi te pisamure eta picasiñairaya ema Jesús, nícachasicavi —máichapa.

Majicapapa éma:

—Yátupi nusuapa ema Jesucristo eta émairahi machicha ema Viya —macahepa.

³⁸ Tacahe, macavanairipipa nacaicheca eta carro. Tiúcupaicanapa éna, tiyananapa te úneure. Tacahe, ema Felipe máicachasicapa ema achane. ³⁹ Te tichavanapa tayehe eta úneure, títahúchavapa témitiaca ema Felipe, taicha ema Espíritu Santo manaracuhapa. Váipa macaecherahihini. Váipavare máimahahini ema achane. Tímiyanavapasera tipaica ema achane. Tiúrisamurepaipahi. ⁴⁰ Eta máucupaisinehi ema Felipe eta te avasare ticaijare Azoto. Tacahe, tétavajicapai pa eta te avasareana. Ticametarairupaipahi eta máitecapirapahi eta te apana avasare ticaijare Cesarea.

Emasaulo masuapa eta máichuirahi ema Jesucristo (Hch 22.6-16; 26.12-18)

9 Tímiyanavarichucha ema Saulo eta mapánajirisi-ravácahi ena téhicanahi ema Jesús, mavarairahi máimicapacavacaya. Tiyanapa tiyasesereca eta órdenemayehe ema corregidor tayehe eta Jerusalén.

² Máichapa ema Saulo:

—Nuvaraha nuyanaya te jena avasare Damasco. Nuvarahavare píjaracanu eta órdenemayehe, eta nuvaratasiravacaina ena téhicanahicacha ema Jesús, namutu nácani nétupiaruanayarepahi ajairana, esenanapuca. Nutanucavacayare te náurujisirarevana ena vijaneanana. Présoanayarepahi eta námirayare eta te juca Jerusalén —máichapa.

³ Tacahe, tiyanapa ema Saulo. Eta mapaisirapahi éma te achene, tiánehipa títecapa te avasare Damasco, tiáramicarepa eta majaraiva ema Viya tísiha te anuma. Tamicauchapa éma. ⁴ Tásiha, tiáquipaicavapa eta mapisirahi. Tásiha, masamapa eta mahu ema Jesús. Máichapa:

—Saulo, Saulo, ¿tájaha tacayema picatianacanu pipánajiricanu? —máichapa.

⁵ Majicapapa ema Saulo, mayaserecapa:

—¿Nájahavi piti Tata?

Majicapapa:

—Nutí Jesús. Nutí picatianaruhi, eta pipanajirisi-ravaca ena téhicanuanahi. Pésamiricavachucha, taicha pítiivaichucha píchavahi. Vahi piúrimahi te pímiyanava picatianacanu. Péhicanusera píti —máichapa ema Jesús.

⁶ Tacahe, ema Saulo tiyayacarenecha eta mapisirahi eta máechajisirahi ema Jesús. Macahepa:

—¿Tájahapuca eta pivarahaquene nítauchaquenéna piyehe, Tata? —máichapa.

Tacahe, ema Jesús máichapa:

—Pécheputa. Piyana pítecapa te jena avasare. Ánaqui mararihi ema timetacaviyare eta pítauchaquene nuyehe —máichapa ema Jesús.

⁷ Ena apamuriana ajairana macachanequeneanapahi ema Saulo, ichape eta tiáramecana. Taicha nasamahi ema téchajicahi, váhisera náimahahini. ⁸ Tacahe, ema

Saulo técheputa eta te máquipaisinevahi. Vaipa máimairiricahini. Tacahe, nachurucapaipahi eta nacaitecapiraya tayehe eta avasare Damasco. ⁹ Mapana sache eta mapuchuquivahi. Váhivare tinica. Tájivare máerahini.

¹⁰ Tiuri, eta te jena avasare Damasco, matiarihini ema apana téhichavare ema Jesús, ema ticaijare Ananías. Émarichuvare máechajiruhi ema Viáquenu Jesús. Ánipa tacahe eta máechajisirahi:

—¡Ananías!

Éma majicapapa:

—Nutiarahi, Tata —macahepa.

¹¹ Tacahe, ema Viáquenu Jesús máichapa:

—Piyana pitupiruya te jena calle ticaijare Titupina. Te jena mapena ema Judas, picayasesereruyare ema achane ticaijare Saulo, ema tísihahi te avasare Tarso. Puiti máenahi tiyujaracahi. ¹² Nutí néchajicahi éma. Numetacahi éma eta pítecapiraya mayehe. Nuvanecavi pinacaya eta pivahu te mápusi apaesa tacha-va eta máimairirisira —máichapa ema Jesús.

¹³ Te masamapa ema Ananías, macahepa:

—Tata, namutu timetacanuana eta máicharacavanahi ema achane eta mavainarajivahi nayehe ena téhichaviana ticavasana te Jerusalén. ¹⁴ Éma, tímitecahi puiti eta ani, mámapahi eta órdenemayehe náijararuhi ena tuparairucana eta te Jerusalén eta máepanirahaviya mapresuchirahaviya vimutu viti véhichavianahi —macahepa ema Ananías.

¹⁵ Émasera ema Jesús máichapa:

—Piyanchucha, taicha ema maca, nunerejiruhichuhi nutí. Nuvanarayarehi éma. Nuvanecayare mayana macametarairu eta níjare nayehe ena achaneana te apanana avasareana étapa eta nayehe ena vijaneanana israelítana. Nuvanecayareva máechajisihahi eta níjare nayehe ena ichapequeneana aquenucana réyeana. ¹⁶ Nutí nímechayare eta macatajivairayare ichape táichavenenahi eta máehisiranuyare —máichapa ema Jesús.

¹⁷ Tacahe, masuapahi ema Ananías. Tiyanapa tayehe eta peti mávihahi ema Saulo. Tisiapapa. Máechajicapa. Manacapa eta mavahu te mápusi. Tásiha, máichapa:

—Nuparape Saulo, ema Viáquenu Jesús tímerecavahi eta piyehe te achene te pítecinapa. Éma, tivane-canuhi níteca eta piyehe. Mavarahahi tichavayare eta pímairisira. Mavarahavare tiávahácaviya ema Espíritu Santo —máichapa.

¹⁸ Tacahe, enevanepa témitiaca eta tépacuchainihi eta máuquiha, téjamihauquicha. Tichavapa eta máimairirisira. Tásiha, ema Saulo técheputa, matupirupa ticaicachasi. ¹⁹ Te tamutupa, tinicapa. Tichavapa eta matumeva. Manasipanapa jena sácheana nayehe ena machamurianarípahi téhicanahi ema Jesús tayehe eta avasare Damasco.

Tépanavapa ticametarairu ema Saulo

²⁰ Tacahe, tépanavapa ticametarairu ema Saulo te náurujisirareva ena israelítana. Máechajisihapa ema Jesús émairahi Machicha ema Viya. ²¹ Namutu ena

tisamararacanahi, ichaperinehi nárami. Tásiha, nacahepa:

—¿Tájaha tacayema? Émara ema maca ema tipánajiricavacahi ena téhicanahi ema Jesús, ena ticavasana te Jerusalén. Tímitecahi te juca eta mapresuchirapanavacayarehi ena apamuriana, mámamurihayarehi nayehe ena tuparairucana eta te Jerusalén. ¡Tásiha puiti, émarinechavare ticametarairuhi mayehe ema Jesús! —nacahepa.

²² Émasera ema Saulo tiápajucavapanapa eta máitusira ticametarairu. Máimerecahi eta yátupiquenerahi ema Jesús émairahi ema Cristo, ema nacuchapaquenehi. Te tamutu eta náurujisirarevana ena israelítana eta te Damasco, macapaquechamuripa nácani ticatianacanahi eta véhiruhi.

Éma Saulo nacaratacayarepaini ena israelítana. Émasera tiyanapa tijuna.

²³ Tayerevahi eta áñoana, † ena israelítana napanerechapa nacapacaya ema Saulo. ²⁴ Émasera masamairiricapa eta náemauchirahi. Tamutu sácheana, yátiana nacunehi eta te acheneana máuchujisihayarehi, taicha ichape eta navarairahi nacapaca éna. ²⁵ Énasera ena machamuriana náitucahi eta nayumurusirahi náiyaracuhapa eta te ichape saye. Náitiacapa te tiupi enure. Tacahe, nacajuchucupapa eta te apachacaya eta yúchama. Tacahehi eta máitujisiravahi tijuna.

Éma Saulo títecparipa te Jerusalén

²⁶ Te títecparipa ema Saulo te Jerusalén, mavarahapa masiapamuriha ena náinapureanahi téhicanahi ema Jesús. Énasera napicarichucha éma, taicha vuíchaha nasupahini eta máehisiraipa ema Jesús. ²⁷ Matiarisera ema achane Bernabé. Émapa tiámahi ema Saulo tímimaticahahi nayehe ena apóstoleana. Mametamurihapa eta máichararacavahi ema Saulo eta máimairahi ema Viáquenu Jesús eta te achene, étapa eta máechajisirahi, máichuirahivare ema Saulo. Mametacavare eta yátupirahi máituca ticametarairu ema Saulo mayehe ema Jesús eta te avasare Damasco. ²⁸ Tacahe, ema Saulo manasipa te Jerusalén. Masiapamurihapa éna, énapa macachanejiricavacahi. Vahi mapícarácavahíni eta macametarairuirahi mayehe ema Viáquenu Jesús. ²⁹ Máechajiricavacapahi ena israelítana †† te jácani mácapajisihavacapahi. Macanaraemachavacahi éna. Vahi náuricahini eta máimituripianahi. Tisemanapa mayehe. Tásiha, navarahapa nacapacaya éma. ³⁰ Nasamairicapasera ena machamuriana. Tacahe, náevatacapa mayana tayehe eta te mávasa Tarso. Náehicapa ena apamuriana tinapananayarehi tayehe eta avasare Cesarea, étapa nachavinehi. Tiánucuhapa éma, tiyanapa macarichupa.

† Te pivaraha pecha, pitanuca te libro Gálatas 1.18. †† Ena nani, yátupiqueneanahi israelítanahi, náuchureanahisera te jácaniana apanana avasareana. Táitusiava, apaechajirivanaripa eta ticajiare griego. Puiti tichavanaripa eta te Jerusalén, návasahi ena ticachichanaini.

³¹ Tacahe, tiúricavanapa ena náumurivana ena téhicanahi ema Jesús tiávihana te apanana avasareana tayehe te Judea, te Galilea, étapa te Samaria. Tásiha, tétumechacacanahi eta náimiyansiravaya napicau-chiraya ema Viáquenu. Máimicatamurihahivare ema Espíritu Santo. Eta tacahe, camurianapaipavare ena téhicanahi.

Éta manarasirahi ema achane ticajiare Eneas

³² Tiuri, ema Pedro tiyanapa máejiravacapaipa ena machamuriana eta te avasareana. Títecapapa nayehe ena apamuriana machamuriana ticavasanahi eta te avasare ticajiare Lida. ³³ Matiaruhi ema émana achane ticajiarehi Eneas. Macajumaquenehi éma. Ocho añoripahi eta macajumairahi. Vaipa táurihini tiyamuriaca, váhivare máechepucahini te macamane. Tacahe, máitecapauchapa ema Pedro. ³⁴ Máichapa: —Pésenicanu, Eneas. Ema Viáquenu Jesucristo ticanaracaviya. Puiti tájinapa eta pijumaini. ¡Pécheputa! —máichapa.

Tacahe, ema Eneas enevanepa téchepuca. Tájinapa máichiravainahini. ³⁵ Tacahe, náimahapa eta manarasirahi namutu ena ticavasanahi tayehe eta te avasare Lida énapa ena ticavasanahi te tachacaya ticajiare Sarón. Eta náimairahi, náinajicapa eta nayeherepianaini. Tásiha, náehicapa ema Viáquenu Jesús.

Éta suápechirava títareca esu Tabita

³⁶ Te jena sácheanahi, sutiaruhi esu esena ticajiaru Tabita, eta suátserepihi Dorcas. Ésu, ticavasahi eta te avasare ticajiare Jope. Ésurichuhivare téhichi ema Jesús. Eta suítaresirahi esu suca esena, sucajivaca ena páureana eta suímahaqueneana. Tímicatarahi nayehe nácani ticaijuheanapahi. ³⁷ Te jena sácheanahi, esu Dorcas ticajumapa. Suvayuhapa, tépenapa. Tacahe, navehapa, náicachapa eta suáquehe. Nacasiapapa te tajuhe te anuquehe téqueneha piso.

³⁸ Eta juca avasare Jope tachacayaichuhi eta apana avasare Lida, eta mávihahi ema Pedro. Náecharipahi eta matiarihirahi ema Pedro te Lida. Tacahe, navanecapa ena apinana ajairana, náichuhapanayare éma. Te náitecapauchapa, náichapa:

—Vivaraha viámavi puítirichu ánaqui te Jope. Pímahapanaini esu vémunaruquenehi vichamuri Tabita. Tépenaipahi —náichapa.

³⁹ Tacahe, tiyanapa ema Pedro, máehicavacapa éna. Te títecapanapa, náimisiapapa eta te tajuhe suávihahi esu Dorcas. Namutu ena esenana máimaruanahi, te náimahapa ema Pedro, náurujiacapa. Tíyahanapa, náimechapa ema Pedro eta namuirihana suparuaruanahi ésu te achanerichaha. ⁴⁰ Tacahe, ema Pedro macavanairipipa náuchuca namutu. Tacahe, tépuyucapa éma, tiyujaracapa. Tacahe, máimarracaripa esu esena suépenaquene. Tásiha, máichapa:

—Tabita, péchepuca.

Tacahe, ésu téjamihauquichapa. Suímahapa ema Pedro. Téjahapaicapa. ⁴¹ Tacahe, macaratacapa eta su-

vahu, macaechepucapa. Énevanepa máichuhavaca ena máimaruana énapa ena apamuriana machamuriana. Máimechapa eta suchaviraipa títareca. ⁴² Tacahe, náechapa namutu ena ticavasanahi eta te avasare Jope. Camurianarine ena tisuapanahi ema Viáquenu Jesús. ⁴³ Ema Pedro manasipanapa jena sácheana tayehe eta avasare te mapena ema machamurihivare ticaijare Simón, náimijarechavare Suélareru.

EMA VIYA MAVANECA EMA PEDRO MÁIMITUPANAYARE EMA CORNELIO

10 Te jena avasare ticaijare Cesarea matiarahi ema émana achane romano ticaijare Cornelio. Militar ema achane. Eta mávacure ema capitán, comandante te étana compañía tayehe eta batallón ticaijare Italiano. ² Ema maca achane mapicauchahi ema Viya. Tamutuhi sácheana tiyujarauchavahi. Máimitucavachivare namutu ena machichanaveana énapa ena tíavihanahi te mapena. Énerichuvare máimicatacavacahi ena israelítana páurequeneana, máijaracahi eta camuri plata. ³ Te jena sache, las tréscuenepa cáperehi, ema Cornelio tiyujaracahi. Tíjuhúchavapa máimaha máucupauchahi ema émana ángele mavaneruhi ema Viya. Máechajicapa ema ángele, máichapa:

—¿Pícharacava? Cornelio —máichapa.

⁴ Tásiha, ema Cornelio tipicarinehi eta máimarasirahi ema ángele. Majicapapa:

—¿Tájaha pivaraha eta nuyehe, tata?

Tásiha, máichapa ema ángele:

—Tímitecanuhi numetacavi. Eta piyeheana oración piyujarauchiravana etapa eta pímicatasiravacahi ena ticamunuvana páureana, táitecapauchahi tamutu ema Viya. ⁵ Pímvianereca puiti náepana ema achane ticaijare Simón, eta máchucarapihivare Pedro. Ema tíavihahi puiti te jena avasare ticaijare Jope. ⁶ Eta peti máitecapihahi mapena ema apanavare Simón ema náimijarechaqueneva Suélareru. Eta táviha eta peti mapenahi te tachausi eta mar. Ema maca Pedro ema timetacaviyare eta pítauchaqueneánayare —máichapa ema ángele.

Te tamutupa eta máechajisirahi ema ángele, tiyanapa tichava. Tacahe, máichuhapa ema Cornelio ena apinana mamusurana. Máichuhavare ema émana masuntarura. Énerichuvare tipicaurahi mayehe ema Viya, títaurahivare mayehe ema máquenuhi. ⁸ Tacahe, mametacavacapa eta mametarapi ema ángele. Tacahe, máevatacapa tayehe eta avasare Jope.

⁹ Te apanapa sache, tíanehianapáipa ena vanairucana tayehe eta avasare. Te jena las dócequenepa sache, ema Pedro tíapanapa eta te téqueneha piso. Tiyujaracayarehi. ¹⁰ Técuháipaicha éma, taicha tájinarichaha manicahini. Vuíchaha náimaquerecahini eta tinicacare. Tacahe, eta mayujarasirahi máimahapa téjiacahi eta anuma. ¹¹ Máimahavare eta tíucupaicapahi eta te mávihahi éma, tacutiayaréni eta ichape sávana. Ticaitiapusivacapai te esquinana. ¹² Camuri eta sárareana, quichareana, cáyureana, támaqueneanapahi eta sávana, tamutu eta apánapanenéji-

queneána sárareana. ¹³ Tásiha, masamapa ema téchajicahi te anuquehe. Máichapa:

—Pécheputa, Pedro. Picapaca étanaina sárare. Pini-ca.

¹⁴ Émasera ema Pedro, majicapapa:

—Vahi, Tata. Tituparacahavi vahi vicunicahini vinica viti israelítana eta juca sárareana vicajachaqueneana, vinicahini. Tájina nímatiya nunicahini eta juca —macahepa.

¹⁵ Tiápechavavare máechajica ema Viya, máichapa:

—Vahi picuimijarecha ticajachacareana eta níjararuvianahi tinicacareana —máichapa ema Viya.

¹⁶ Mapahe eta máechajisirahi ema Viya ema Pedro.

Tacahe, tichavapa eta sávana tíapana te anuma. ¹⁷ Ema Pedro manasirichaha macájarasamúrehi eta mapanerechirahi tájahapuca tacayemahi eta náimahaquenehi. Títecapananecha te tapaja ena vanairucana mayehe ema Cornelio. Nacayasesererupa eta mapena ema Simón Suélareru. ¹⁸ Eta náitecapirahi, nacayasesererupa te étahipuca mávihahi ema Simón Pedro. ¹⁹ Émasera ema Pedro manasirichaha tipanerecarichaha taicha eta máimahaquenehi. Tásiha, ema Espíritu Santo máichapa:

—Nararihi te juca ena mapanana ajairana titanucavianapahi. ²⁰ Piyana pímahavaca éna. Vahi picueñamava eta péhisiravacayare, taicha núti nuvanecavacahi éna —máichapa ema Espíritu Santo.

²¹ Tacahe, masuapapa ema Pedro. Tiúchucapa tiyanapa nayehe ena titanucanapahi. Te máitecapauchavacapa, máichapa:

—Nútira etanurepahi éti. ¿Tájaha tímitecahehi?

²² Tásiha, najicapapa éna:

—Tivanecahavihi ema capitán Cornelio. Ema achane tipicaurahi mayehe ema Viya. Títurahivare nayehe ena achaneana. Namutu ena israelítana napicaucha náemunacavare éma. Puiti víti, vítecapauchavipa, taicha cape juca, ema ángele mavaneruhi ema Viya mametapanahi ema Cornelio máimichuhavi píteca te mapena, apaesa masama eta pimetarapianaya —nacahépa éna.

²³ Tacahe, ema Pedro macasiapavacapa te tajuhe. Nanasipa jena yati mayehe ema Pedro. Te apanapa sache, tiyananapa. Náehicapa ema Pedro ena apamuriana machamuriana ticavasanahi te Jope.

²⁴ Te apanaquenepe sache, napaenumavapa títecapana te avasare Cesarea. Ema Cornelio macucha-paipahi te mapena. Tiúrujicavanaripa ena majaneanana énapa ena máemunacasáreana máichuhaqueneánahi. ²⁵ Te títecapapa ema Pedro te mapena ema Cornelio, mácapapa máepuyumirauchapa matsiucayarepa. ²⁶ Émasera ema Pedro máichapa:

—Pécheputacucha pitupiha. Vahi táuricahini pitsiucanu, taicha nútirichuhi picutiquenehi achane —máichapa.

²⁷ Te tamutupa eta náechajisirahi, tisiapanapa te tajuhe. Máimaharine camurianahi ena náurujiruvanahi. ²⁸ Tacahe, ema Pedro máichavacapa:

—Écharichu éti eta viyeherepiana viti israelítana. Vahi tituparacahavi visiapamurihahe eti apavasanana. Émasera ema Viya tivanecanuhi eta vahi nucupica eta nusiapamurihairaheyare. Nájinavare nunerejirumahi nácani ticajachacareana. ²⁹ Eta tacahehi, nítecavanepa. Tájina nácyemahini. Tiuri puiti, nuvaraha néchaya. ¿Tájahapuca eta tímichuhanuhi? —macahepa.

³⁰ Tacahe, ema Cornelio majicapapa:

—Cuátropa sache eta táetavisiravahi eta juca nímaquenehi. Te jena cáperehi sache hora las tres, núti nunasiquenehi te juca nupena. Ayunanuhi nuyujaracahivare. Tíjuhúchavapa tímerecava ema ángele. Tijanunuca eta mamuiriha. ³¹ Máichanupa: “Cornelio, ema Viya masamahi eta piyeheana oración piyujarsirana. Táitecapáuchahivare eta pímicatasiravacahi ena ticamunuvana páureana. ³² Pímivanerecaya puiti náepana ema achane ticaigare Simón, eta máchucarapi naicha Pedro. Ema tiávihihi puiti te jena avasare ticaigare Jope. Eta peti máitecapihahi ema apanavare Simón ema náimijarechaqueneva Suélareru. Eta távihihi eta peti mapenahi te tachusi eta jena mar. Te máitecapapa ema Pedro, éma tímítucaviyare” máichanupa ema ángele. ³³ Tacahe, enevanepa nímicuhavihi. Tájinasera táichiravainahini eta pítesirahi. Tímararacahávihi ema Viya eta juca viúrujisiravahi puiti. Vivaraha visamaviya tamutu eta pimetacasi- vanahi mayehe ema Viya —máichapa ema Cornelio.

Ticametarairupa ema Pedro te mapena ema Cornelio

³⁴ Tacahe, tépanavapa ticametarairu ema Pedro. Ánipa macahe:

—Nucaicutiarapa puiti vahi vácarichu viti israelítana vijacapacare mayehe ema Viya. ³⁵ Namutuchucha majicapavaca nácani tipicauchanahi éma, tíchana- hivare eta táuriqueneana. ³⁶ Taicha cape juca ema Viya macaiticapahi eta máechajiriruva viyehe viti israelítana. Tivanecahavihi vimetacavacayare eta najacapa- carevahi me Viya nácani ticasifñavanahi mayehe ema Jesucristo, maperdonachiriripa ema Viya eta napeca- turana. Émara Viáquenu vituparaha téchapajirica- haviya vimutu viti achaneana: viti israelítana, étipa eti apavasanana. ³⁷ Écharichupuca éti eta táicharara- cavahi te viávasa Judea cape juca táitaresirahi. Te ticaicachasipa ema Jesús Nazareno mayehe ema Juan, máucupauchapa ema Espíritu Santo máijararuhi ema Viya. Mávahácapa éma, máijaracaripa eta máitupajijí- siravaya. Tacahe, tépanavapa ticametarairu nayehe ena achaneana ticavasana te Galilea. Te jácani mapaisihapahi, máichapahi eta táuriqueneana. Macanaracavacapahi ena nacatajivaqueneana mávaháruanahi ema Váinaraji. Maratahahi éma máichahi eta juca, taicha ema Viya máimicatapahi. ³⁹ Tiuri, víti véchajisiha eta juca, taicha vímahaquenehi tamutu eta máichaqueneanapahi ema Jesús tayehe eta mapaisineanapahi avasareana te Judea, étapa te Jerusalén. Énasera ena tuparairucana nacatichahi éma; náemetatarecapa te crusu eta náimicapasirahi. ⁴⁰ Émasera ema Viya macaechepucahi te máecari te

mapanaquenepa sache. Tásiha, máimerecavare te vimuri eta machavirahi títareca. ⁴¹ Vaipa námutihini ena achaneana náimahahini. Vítinecha vímahapa- racahi viti manerejiruanahi ema Viya. Vinecapaeque- nehahi tamutu eta vicachanerahi ema Jesús te vinisiri- ana. Tásiha puiti, vimetacahiva ena achaneana eta vímahaqueneanahi. ⁴² Taicha tivanecahavipa vicameta- rairuya. Vimetacayare eta émairahi ema Jesús viyehe- yarehi Juez viti achaneana énapa ena náepena- queneana. Taicha ema Viya ema tituparacahi eta mávacureyare juésyarehi. ⁴³ Étaripa eta acane namutu ena profetanaini náechajisihahi ema Cristo. Ánipa nac- ahehi: “Namutu ena tisuapanaya ticasifñanaya ema Cristo, maperdonachavacayare ema Viya tamutu eta napecaturana táichavene eta nacasifñairaya ema Cristo”.

Eta mávahásiravacahi ema Espíritu Santo ena apavasanana

⁴⁴ Tímiyanavarichaha eta máechajisirahi ema Pedro, tíucupaicapa ema Espíritu Santo. Mávahácapa namutu ena tisamararacanahi eta mametarairuhi ema Pedro. ⁴⁵ Tíjuhúchavapa ena mávaháruanahi apáechajiríru- vanapa. Nacunacharipa ema Viya. Nasamapa ena machamurianapahi ema Pedro tiásihanahi te Jope. Náraminehi éna eta mávahásiravacahi ema Espíritu Santo ena apavasananahi, taicha ena israelítana náim- ijachahi nacarichu ena mávaháruanahi ema Espíritu Santo. ⁴⁷ Tacahe, ema Pedro máichavacapa:

—Tájina náechajisiacarevaimahi eta nacaicachasiraya ena nani, cápachi mávahácaripa ema Espíritu Santo vi- cutiripa víti eta mávahásirahavihi —máichapa.

⁴⁸ Tacahe, macavanairipipa nacaichasi namutu te máijare ema Viáquenu Jesucristo. Te tamutupa, nayaseacapa ema Pedro vahi macuyanavanehini. Taca- he, manasipanapa te jena sácheana eta nayehe.

Eta mametarapiana ema Pedro nayehe ena machamuriana te Jerusalén

11 Tacahe, téchacarevanepa te Jerusalén eta na- suapirahi ena apavasanana eta máechajiriruva ema Viya. Tásiha, napanerequenehapa ena apamuri- ana apóstoleana énapa ena náumurivana. ² Tásiha, te títecapapa ema Pedro te Jerusalén, nacajachapa ena apamuriana máinajicarahanaichaha eta nayehe- repiana ena israelítana. ³ Ánipa naicha:

—¿Tájaha tacayema péjirapanavacahi ena apava- sanana? ¡Písapavavare pinica te namesara! —náicha- pa.

⁴ Tacahe, ema Pedro majicapapa mametacapa eta máichararacavahi eta mapaisirahi. Ánipa maicha:

⁵ —Esamanuchaha. Te návihaipe te avasare Jope, nuyujaracaipahi. Nímahapa téjiacahi eta anuma. Nímahavare eta tíucupaicapahi tiásiha te anuma tacutiyareni eta ichape sávana. Ticaitiapusivacapahi te esquinana. Títecapapa te návihahi núti. ⁶ Nímahapa eta apánapanenéjiqueneána sárareana támaquenea-

napahi eta sávana. Tátarihi eta táíñehiqueneana sárareana, quichareana, cáyureana. ⁷ Tacahe, nusamapa eta mahu ema Viya, máichanupa: “Pécheputa, Pedro. Picapaca étanaina sárare. Pinica”. ⁸ Nútisera nuji-capapa: “Vahi, Tata. Tituparachavi viti israelítana vahi vicunicahini eta juca sárareana vicajachaqueneana. Tájina nímatiya nunicahini eta juca”. ⁹ Tacahe, tíapechanuvare téchajicanu ema Viya, máichanupa: “Vahi picuimijarecha ticajachacareana eta níjararuvianahi tinicacareana” máichanupa. ¹⁰ Mapahe eta juca máechajisiranuhi ema Viya. Te tamutupa, tichavapa tiyapa te anuma tamutu. ¹¹ Étarichu jena hora, títecapanapa ena mapanana ajairana titanucanuanapahi eta te peti nítecapihahi nútí. Mavaneruanahi ema émana achane ticavasahi te Cesarea. ¹² Tacahe, ema Espíritu Santo tivanecanupa néhicavaca éna, taicha tájina táéñamavacarehini. Énerichuvare téhicanuanapana ena nani sáisiquneana vichamuriana. Vimuhuani visiapa eta mapena ema achane. ¹³ Timetacahavipa éma eta máimairahi ema ángele tiúcupauchahi eta te mapena. Titupihahi te mamirahu. Tacahe máichapa: “Pímivanereca puiti náepana ema achane ticajare Simón, eta máchucarapi naicha Pedro. ¹⁴ Ema maca Pedro, ema timetacaviyare eta piúchucuiraya, píti, esu piyena, énapa ena pichichanaveanahi” máichapa ema ángele. ¹⁵ Tacahe, népanavapa nímitucavaca ena náurujiruvanahi. Te néchajicaipa, tíjhúchavapa tiúcupaica ema Espíritu Santo nayehe éna. Mávahácavacapa tacutihi eta mávahásirahavihi víti te tépanavainapa. ¹⁶ Tacahe, enevanepa néchavahi eta mametaruhavihi ema Viáquenu Jesús. Áni macahehi: “Échavarichu ema Juan máicachasicahi te une ena achaneana. Étisera tiúcupauchaheyare ema Espíritu Santo. Éma, tícachasicaheyare tiávahácáhénapa” tacahehi eta máechajiriruvahi. ¹⁷ Tiuri, ema Viya máijaracavacahi ena apavasanana ema Espíritu Santo táichavenehi eta náehisirahi ema Viáquenu Jesucristo, tacutihi eta máijarasirahavihi víti. Tásiha, váiparinehi nácapaemachaimahi nútí eta mavarahaquenehi ema Viya —máichavacapa ema Pedro.

¹⁸ Tacahe, ena ticajachanahi ema Pedro, te náechapa, timatinanapa. Nacunachainehi ema Viya, nacahepa:

—Yátupirichuhi eta majacapiravaca ema Viya ena apavasanana eta náeneuchiravaina. Nácutihavihini víti eta visiapiyare te anuma, máichecuarquirénapa eta vítaresiraya maicha ema Viya —nacahepa.

Náehicavare ema Jesús ena achaneana ticavasana te avasare Antioquía

¹⁹ Te jena sácheana, te nacapacapa ema Esteban, napanajicavare ena apamuriana téhicanahi ema Jesús. Eta tacahe, tijunanapa. Téjanerepáicanapa tiyananapa te Siria, ena apamuriana tiyananapa te tiúrupuhi te mar ticajare Chipre, ena apamuriana te avasare Antioquía. Te jácani náitecapihapahi, ticametarairuanapahi mayehe ema Jesucristo nayehe ena najaneana israelítana. Vuíchaha nametacahini ena apavasanana. ²⁰ Tásiha, títecapanapa ena apamuriana † eta te

avasare Antioquía. Énaserá ticametarairuanapa nayehe ena apavasanana. Nametacavacapa, ánipa naicha:

—Te esupa éhica ema Viáquenu Jesucristo, éma ticuchucuhaheyare eta ícuñayaréni taicha eta epecuratana —náichapa.

²¹ Ichape eta tasuapacarevahi eta nametarairuana taicha ema Viya máimicatavacahi. Eta tacahehi, nasuapahi ena camuriqueneana achaneana. Náinajicapaipe eta nayeherepinihi tauriqueneana, náehicapapa ema Jesús.

²² Te nasamairicapapa ena nachamuriana ticavasananahi te Jerusalén eta juca téchacareanahi te avasare Antioquía, ticaevatape ema Bernabé, mayana macaicutiapana te yátupihupuca. ²³ Tacahe, te títecapapapa éma te Antioquía, máimahapa eta máimicatasiravacahi ema Viya. Tiúrisamureinehi. Maconsejachavacapa namutu éna eta náetumechiracacaina eta náehisirahi ema Viáquenu. Vahi nacucainajiruva te tatiarihinapuca jácani náichavaquenevaya. ²⁴ Taicha ema Bernabé, tétávicavahi eta máuriva. Mávaháruhivare ema Espíritu Santo. Tisuapajirahi éma. Tacahe, camurianahi ena tisuapanahi téhicanahi ema Viáquenu maicha ema Bernabé.

²⁵ Te táequenepa eta juca, ema Bernabé tiyanapa te avasare Tarso. Matanupanapa ema Saulo. ²⁶ Te máetupiacapa, mámapa te avasare Antioquía. Tacahe, nanasipa ánaqui. Étana año nacahe eta nacachanervacahi ena nachamurianahi. Camuriana ena náimitureanahi. Te jena avasare Antioquía, táepaninevahi eta nacajarerahi cristianoana namutu ena téhicanahi ema Jesús.

²⁷ Te jena sácheana, natiarihahi te Jerusalén ena profetana máijararuanahi ema Viya eta máechajiriruvana. Tacahe, tiyananapa nacaijuhe te Antioquía. ²⁸ Te títecapanapa, ema émana ticajare Agabo titupihapa te namuri ena machamuriana. Macaimitucasiqunehi éma mayehe ema Espíritu Santo. Mametacavacapa eta tatiarihiyare eta ecuha te tamutu avasareana. (Eta juca táichavaquenevahi eta ecuha te avasareana te jena áñoanahi matupihairahi ema aquenucaini Emperador Claudio.) ²⁹ Tacahe, ena téhicanahi ema Jesús ticavasana te Antioquía napanerechainapa náimiamarecaya eta nanaquiruana, náimicatasiraya ena nachamuriana ticamunuvanahi, énaripa ena ticavasananahi te Judea. ³⁰ Tacahe, tinaquiquicavanapapa eta naratahaquenevaya nanaquica. Tacahe, náimiamarecapa mayehe ema Bernabé émapa ema Saulo. Náijaracayarehi ena náiyarahana pastoreana. Énapa tíjaracanyarehi ena ticamunuvanahi.

Nacapacapa ema Jacobo. Náeratacapa ema Pedro.

12 Te jena sácheana, matiarahi ema rey ticajare Herodes Agripa. Ema macavanairipapa nacarata-

† Ena nani téhicanahi ema Jesús, yátupihahi israelítanahi éna. Náuchusinehisera éna te apanana avasareana: te jena avasare Cirene, étapa eta avasareana táunavanahi eta tiúrupuhi ticajare Chipre.

cavaca ena tachutirihanapahi ena téhicanapahi emá Jesús, náemecharecavacapa. ² Énerichuvare, máimicapacavare emá apóstole Jacobo maparapeni emá Juan. Nayuchatipiquenuhapa eta nacapasirahi. ³ Tacahe, emá rey, eta máimairahi náurisirahi ena ticatiana-canahi emá Jesús, máimicaeratacavare emá Pedro. Te jena semanahi, napiestarahi ena israelítana eta nanisiraya eta pan mayehere levadura. ⁴ Eta nacaeratasirahi emá Pedro, náimisiapapa te cárcel. Navanecapa ena dies y seis suntaruana tijaneacanaya te machacaya. Cuátrómurianahi ena patrullanahi. Emá Herodes Agripa, mapanerechahi macapacayareva emá Pedro te namirahu ena achaneana te táequeneraya eta napiestara. ⁵ Tacahe, emá Pedro, muracahi eta najaneasirahi te cárcel. Énaserá ena machamuriana tiyujaracanahi me Viya. Nayaseacahi ichape eta nasamacarevaina máuchucuiraina emá Pedro.

Emá Viya macuchucuha emá Pedro tayehe eta cárcel

⁶ Tacahe, emá Herodes Agripa máijarechapa eta sache eta máemepaniraya te cárcel emá Pedro eta nacapasiraya te namirahu ena achaneana. Te jena yati tamirahupa jena sache, emá Pedro tímacahi te nachacaya ena apinana suntaruana. Ticaitiahi te apipi cadenana. Ena apinavare suntaruana najaneacahivare eta tapaja. ⁷ Tíjuhúchavapa tímerecava emá ángele mavaneruhi emá Viya. Tijarahijuheinehi eta cárcel. Tacahe, emá ángele macayamuricapa emá Pedro. Macajamicapa. Ánipa maicha:

—Pedro, péjamica. Pécheputa —máichapa emá ángele.

Tíjuhúchavapa téjapumuriha eta cadenana máitihanahi te mavahu emá Pedro. ⁸ Máichavare emá ángele:

—Picapitijuechava eta pítijuhe. Pinaca eta péparupevana.

Tacahe, emá Pedro masuapahi. Tacahe, emá ángele máichavarepa:

—Pinaca eta pépacuhasa. Yare, péhicanu —máichapa.

⁹ Tacahe, emá Pedro máehicavanepa emá ángele. Emá Pedro váhi máimatihini eta máicharacavapahi, máimijacharichucha mavapure. ¹⁰ Tacahe, náetavicapa ena títapucana sentinélana, náetavicavare ena apamuriana. Títecapanapa eta te tapajacura eta cárcel. Eta tapajacura amairihahi fierro tijitacarehi. Témunahiricavapa téjiaca. Tiúchucanapa te aneca te calle. Te tiyerehianapa eta napaisirahi, majunijicapa emá ángele. ¹¹ Tacahe, emá Pedro mapaenumavapa macaicutiara. Macahepa:

—Nímahapa puiti eta yátupirahi tijaneacanuhi emá Viya. Mavanecahi emá ángele ticuchucuhapananuhi eta macapasiranuyarehini emá Herodes énapa ena nujaneevana —macahepa.

¹² Tipanererecapaipa eta mapaisirapahi. Matupirupa te supena esu María, maena emá Juan ticaijarehi puiti Marcos. Éta, náurujisihavahi nayujarasihahi ena camuriqueneana machamurianahi. ¹³ Títecapapa emá

Pedro te tapajacura eta nayehe canchón. Máehahamecava eta tapaja. Tacahe, esu esena amaperu ticaijaru Rode, tiyanapa suímahapana nájahapuca emá téhahamecahi eta tapaja. ¹⁴ Suímatiahuchavanepa emá Pedro, váhisera suvéjiáequenehahini eta súrisamurevahi. Tiyanapa tijunapa te tajuhe, sumetapanavacapa eta matiarahirahi emá Pedro te aneca te tapaja. ¹⁵ Énaserá vahi nasuapahini. Tacahe, náichapa:

—Máurishivipapuca píti.

Ésusera sumetacarichucha eta yátupirahi. Énaserá náichavarepa:

—¡Váhipuca émaina! Émapuca emá mayehe ángele emá tijaneacahi —nacahepa.

¹⁶ Émasera emá Pedro tímiyanavarichucha máehahamecahi eta tapaja. Tacahe, tiyananapa navéjiáequeneha. Náimaharine émasarehi. Tiáramecanarinehi éna. ¹⁷ Émasera máimicutiarachapa te mavahuana eta namatina. Tacahe, mametacavacapa eta macuchucuirahi emá Viáquenu tayehe eta cárcel. Te tamutupa eta mametasiravacahi, máichapa:

—Emetapaná emá Santiago † énapa ena apamuriana vichamuriana —máichapa.

Tacahe, tiúchucapa tiyanapa te apana avasare.

¹⁸ Te tijarahipa, ena suntaruana tinanesicarajianaipa taicha vahi náechahini tájahapuca eta máicharacavahi emá Pedro. ¹⁹ Tacahe, emá Herodes Agripa máimivanerecava natanuca emá Pedro. Májinaserá náetupiacahini. Eta namaetupasirahi, ticayaserehianapa ena suntaruana tijaneacanahi. Nájinaserá émanainahini nanecapahini eta máuchusirahi emá Pedro. Tacahe, macavanairipipa emá Herodes nacapacavaca ena suntaruana. Te tamutupa eta juca, tiyanapa emá Herodes te apana avasare Cesarea; éta mávihahi.

Eta máepenirahi emá Herodes Agripa

²⁰ Te táequenepa, emá Herodes Agripa tisemapa nayehe ena achaneana ticavasana te Tiro éta te Sidón. Énaserá náimivanerecava mayehe emá Herodes. Tiyaseserecanapa eta náurivaina mayehe éma. Taicha eta návasanahi táitecapauchahi eta tinicacare tísihahi eta te mávasa emá rey. Tacahe, nacasiñapa emá Blasto, emá majupaha emá rey, máechajiuchavacaya eta náurivaina. ²¹ Tacahe, emá Herodes máijarechapa eta sache, máimichuhairaya ena achaneana eta jena sáchequenehi. Ticamuirihapa emá rey eta mamuiriha tíurina. Téjacapa emá Herodes te máejasirare. Téchajicapa. ²² Tacahe, ena achaneana eta nasamirahi éma, tipiaracanapa. Nacahepa:

—¡Emá maca téchajicahi váhiya achaneana! ¡Viya emá maca! —nacahepa eta nacunachirahi éma.

²³ Tacahe, tíjuhúchavapa emá émana ángele mavaneruhi emá Viya máijaracapa eta majumahi emá Herodes Agripa. Taicha emá Herodes tímijachavahi Viya, máuricaipahi eta náejirairahi natsiusirahi ena

† Emá maca achane, maparapehi emá Jesucristo. Te náechajiriruvá ena israelítana, ticaijare Jacobo. Te véchajiriruvá ticaijarehi Santiago. Émarichuhi emá tíajucharahi eta carta ticaijarehi Santiago.

achaneana. Eta tacahe, tanicapa eta vusanuana te majuhe. Tacapacapa.

²⁴ Tacahe, tavetijipaipaicha camurianapaicha ena achaneana tisuapana eta máechajiriruvana ema Viya.

²⁵ Te títavanapa eta natuparahahi ema Bernabé ema Saulo, tichavanavarepa te avasare Antioquía. Námapa ema Marcos.

Ema Bernabé émapa ema Saulo tépanavanapa tipaicana ticametarairuanayare

13 Ena téhicana ema Jesús ticavasanahi te avasare Antioquía, natiarihi te namuri ena ticametarairu-rahiana eta máechajiriruva ema Viya. Tímiturahianahi éna. Natiarihichaha ema Bernabé émapa ema Saulo. Natiarihivare ema Simón (ema náimijarechavare Negro), émapa ema Lucio (eta máuchusinehi te avasare Cirene), émapa ema Manaén (ema machajuruhi ema Herodes Antipas, machicha ema Aluresini). ² Étana sache, ticurujicanapa eta nayujarasirahi me Viáquenu. Náichahivare eta ayuna. Tacahe, máechajicavacapa ema Espíritu Santo. Máichapa:

—Ema maca Bernabé émapa ema Saulo, natuparahachuhi ticametarairuanaya taicha nunerejiruanahi éna. Évatasanunuya puiti ena nani apinana —máichapa.

³ Tacahe, titsecavanapa ena apinana eta napaisiraya. Te tamutupa, tiápechavanapa nahayunacha namutu. Eta nayujarauchirahi, nanacapa eta navahuana te nápusiana ena tipaicanyare. Nayaseacapa ema Viya eta táurivainapahi eta napaisiraya. Tacahe, ticametanapa. Tiyananapa.

Ema Bernabé émapa ema Saulo tépanavanapa ticametarairuana te tiúrupuhi Chipre

⁴ Tacahe, ena nani ema Bernabé ema Saulo, mavaneruanahi ema Espíritu Santo, tiyananapa te puerto ticaijare Seleucia. Máehicapahivare ema Juan Marcos. Tímicatarecapahi nayehe. Tacahe, tiánuecanainapa nacaijuheya eta tiúrupuhi ticaijare Chipre. Te títecapanapa te puerto ticaijare Salamina, tiyananapa eta te náurujisirárevana ena israelítana (taicha tamutu avasareana tatiarihipahi eta nayehe sinagoga). Ticametarairuana eta máechajiriruva ema Viya.

⁶ Tamutu napaica eta táichapevahi eta tiúrupuhi. Títecapanapa te avasare ticaijare Pafos. Ánaqui matarihihi ema émana israelíta ticaijare Elimas Barjesús. Iápemare ema maca. Tépiyahirahivare tímijachavahi máimati ema Viya. ⁷ Ema maca iápemare macachanejiricahi ema Prefecto Sergio Paulo. Ema maca Prefecto, téchemarahi. Tásiha, máimivanerecapa náichuhapana ema Bernabé émapa ema Saulo, taicha mavarahahi masamaya eta máechajiriruva ema Viya. ⁸ Émasera ema maca iápemare macatianacavacapa éna. Mayurucapa ema Prefecto eta vahi macusuapa eta máechajiriruva ema Viya. ⁹ Tacahe, ema Saulo (éma ticaijarehi puiti Pablo), mávaháruquenehi ema Espíritu Santo, máimararacapa ema iápemare. ¹⁰ Tacahe, máichapa:

—¡Tivayuarahitataji matsiriarairaha! ¡Piti machicha ema Váinaraji! ¡Piti picatianaca tamutu eta táurique- neana! Píti píchejimiráuchavacahi ena tivarahana téhicana ema Viáquenu. ¡Pínajica eta juca pivainarajivahi! ¹¹ Puiti ema Viya tícuñacaviyare. Púchuquiyare máicha. Tiyereyare eta vahi pímahaimahi eta tajaraiva eta sache —máichapa ema Pablo.

Jéhesaréinehi, tíjahúchavapa témaha eta máimairi- risira, púchuquipa ema iápemare. Tacahe, matanucapa ena tichurucanaya te mavahu. ¹² Te máimahapa ema Prefecto eta juca, tipicarinehi. Tásiha, masuapapa eta masamirahi eta náimiturapiana ena apóstoleana mayehe ema Viáquenu Jesús.

Ema Pablo émapa ema Bernabé tiyananapa tayehe eta avasare ticaijarevare Antioquía Ichipichu

¹³ Tacahe, ema Pablo énapa ena macompañeroana tiávacuhanapa. Najunijicapa eta Pafos. Tiyananapa tayehe eta avasare Perge táunavahi eta provincia Panfilia. Te títecapanapa te Perge, eta jena sácheanahi, ema Juan Marcos majunijicavacapa éna. Tichavapa te Jerusalén. ¹⁴ Éna, tiánucuhanapa nacaijuhepa eta avasare Antioquía Ichipichu te tinapaica eta Pisidia. Te títecapanapa, te apanapa sache sávaru, tisiapanapa eta te náurujisirareva ena israelítana eta nayujarau- chirahi. Téjacanapa. ¹⁵ Tacahe, tisiapanavarepa ena tuparairucana tayehe eta náurujisirareva. Náechajicuhapa ánipi eta Sagrada Escritura májurehi ema Moisés émapa eta nájurehi ena profetana. Te tamutupa eta náechajicuirahi, nayaserecapa ena araitecapianahi. Náichapa:

—Viparapenaveana, te tatiarihipuca eta échajisi- hayare consejo viyehe víti, táuricapa econsejacha- havipa —náichapa.

¹⁶ Tacahe, ema Pablo titupihapa. Macanuquechapa eta mavahuana eta máechajisirayarehi, mavarahahi tauri eta nasamiraina (taicha tacahehi eta nayeherepi). Ánipa macahe:

—Esamanuchaha, nuparapenaveana israelítana. Éti- pa eti epicaurahianahi mayehe ema Viya. ¹⁷ Ema Viya vicasíñaquenehi viti israelítana manerejicavacahi ena viáchucanaveánaini. Te návihaichaha te apanaquene avasare ticaijare Egipto, macaejapacavacahi ena nachichanaveana. Énerichuvare, te máiputsicavacapa te jena avasare návinénihi, máimerecapahi eta máitupajijiasiravahi máimicatasiravacapahi éna.

¹⁸ Tásihasera, cuarenta año eta macamichirahi ema Viya eta náejecapirávana tayehe eta návihairahi te má- vapahi vámahí. ¹⁹ Te táequenepa, macamitiequene- havare eta sítequene avasareana ena apánapanéji- queneána ticavasanainihi te Canaán. Tásiha, máijara- capa ena viáchucanaveanaini eta jena apaquehe natuparahaquenehi maicha ema Viya. ²⁰ Tacahe, 450 año eta majaneasiravacahi, mavanecapa ena juéseanaya téchapajirícanayarehi. Tacahe, tiámainu- cavapa te tijurucapa ema profeta ticaijare Samuel, máequeneréruhi nayehehi juez. ²¹ Tacahe, éna nayaseacapa ema Viya ema nayeheyarehi rey. Tásiha,

máijarasihapa ema Viya ema nayeheyarehi rey ticaijare Saúl, machicha ema Cis, mámariéquenéni ema viáchucaequenéni Benjamín. Cuarenta año eta macatuparahairahi. ²² Te táequenepa, ema Viya máitsivachapa ema Saúl. Ticaijarapa ema David, émapavapa reyhi. Taicha macahepa ema Viya: “Nímararacahi ema David, machicha ema Isaí, núrca eta máurivahi. Taicha máitachayare tamutu eta nuvanairipianaya” macahepa ema Viya. ²³ Tiuri, eta máechajiruvahi ema Viya, matiarhiyare ema émana mámariequeneyare ema maca David tíuchucayarehi ema Ticatiurahiyare veyehe viti israelítana. Puiti vimetacahe eta máimeresiravaipa ema Jesús ema Ticatiurahi quene veyehe. ²⁴ Te tamirahupaichaha eta máimeresiravayarehi ema Jesús, ticametarairuripa ema Juan nayehe ena achaneana vijaneana israelítana. Mavanecapahi eta náeneuchiravaina náinajisiraina eta napecaturana, étapa eta nacaicachasiraina. Títecapapa eta sache máitachiraipa ema Juan tamutu eta mavanahianahi me Viya. Ticametarairurichaha ema, máichavacapa ena achaneana: ²⁵ “Ímijachai papuca nútihí ema Cristo, ema vicuchapaquenehi. Váhira nútina. Títecapainapasera éma, téhicanupahi te néquene. Malayarinehi nútí nácutinasihini eta máitupajijiasiravahi éma. Váiparinehi nácaemuñavaimahi macamusuranuhini nuti páuresami” máichavacapa ema Juan.

²⁶ Esamanuchaha, emutu eti nujaneanana, eti nucuti queneanahi eta mámariequenerahavihi ema viáchucaini Abraham, étipa eti apamuriana epicaurahianahi mayehe ema Viya. Ema Viáquenu tivanecahavi vimetacaheyare yátupina eta iúchucuirayare éti apanava, te ecasiñava me Jesús.

²⁷ Máchusera ácutihini ena tuparairucana te Jerusalén, énapa ena ticavasanahi te jena avasare. Tamutu eta sávaruana eta náurujisiravana, náechajicuhaparacahi eta libro nájucaquenehi ena profetanaini. Váhisera nácaicutiarahini. Eta tacahehi, vahi náimatihini ema Jesús eta émairahi Cristo. Váhivare najacpahini. Éma, tájinahinéni matapiravainahini taviuchahini eta táimicapahini. Énasera nayaseacapa ema Pilato eta máimicapasiraya. Tacahepa masuapapa éma eta nayasearapihi. Tásiha, te títauchavapa eta nacapasirahi, ena máimitureana nacucupaicapa te macurusura, náecarapa. Tacahehi eta táitachiravahi tamutu eta nametarapiana ena profetanaini eta máicharacavayarehi ema Cristo eta máepenirahi, taicha tacajuquenehi éta te Sagrada Escritura.

³⁰ Émasera ema Viya macaechepucahi te máecari.

³¹ Tacahe, camuri eta sácheana máimeresiravahi ema Jesús nayehe ena máimitureana, ena nani macachanevacapahi te másihapa te Galilea, téhepa te tiyanapa te Jerusalén. Ena nani tímahanahi, énara ena téchajisihanahi puiti eta máechepusirahi.

³² Acane, ema Viya macametarapihi nayehe ena viáchucanaveanaini eta macucupaisirayarehi ema Cristo. Títauchavaipahisera puiti eta máechajiruvahi taicha vímatiripa ema Cristo viti nachíchanavéqueneana. ¡Tímerecavaipa ema Jesús, émairahi yátupi-

quenehi Cristo manerejiruhi ema Viya! Máimerecapa ema Viya ema Jesús eta émairahi yátupiquenehi Cristo, taicha macaechepucahi te máecari. Étara tímitecahavi vimetapanaha eta juca táuriquene téchacareana. Étara tacayemaquenehi eta máechajiriruva ema Viya eta te Salmo 2, ánipa macahehi: “Pítira nuchichavi. Puiti jena sache, nímitachaviyare nayehe ena achaneana eta nuchichairavihi eta nucaechepusiravihi te pécarí” máichapa. ³⁴ Eta máechepusirahi ema Jesús te máecari, vaipa tíápechavaimahi tépena. Taicha máechajicahi ema Viya ena israelítana, ánipa máichahi: “Níjaracaheyare ema máuriquene Iáquenuyare. Éma ticatiuchaheyare tamutu sácheana. Máichecuaruireyare eta ítaresiraya máicha, eta ecachanerayare éma. Taicha níjararuvahi eta juca néchajiruvahi mayehe ema David” máichapa ema Viya. ³⁵ Énerichuvare, acane ema Cristo macahehi eta máechajiruvahi te apana Salmo: “Vahi písapaimahi témitiequeneha eta náquehe nuti pichicha pémunaruquenehi” máichapa. ³⁶ Tiuri, ema David, yátupihí eta máechapajirisiravacahi ena machanerana. Te títecapapa eta matuparahahi mayehe ema Viya, tépenapa ema David. Tacahe, náecarapanapa éma. Tépaichavahi eta máeche te máecari. ³⁷ Émasera ema Jesús vahi táepachaicavahini eta máeche te máecari taicha macaechepucahi ema Viya. ³⁸ Nuparape naveana, nuvaraha numetacahe puiti apaesa ímatiequeneha. Ema Viya mavaraha tiperdonachahe eta epecaturana te ácasiña ema machicha Jesús. ³⁹ Viti israelítana, ichape eta véjecapiravahi me Viya taicha vimaitauchirahi eta viyeherepiana máijararuvahihi ema Moisés. Téhesera véhica puiti ema Jesucristo, viperdonachacareya víti mayehe ema Viya. ⁴⁰ Tásiha puiti, ecaunevayare éti, machu ácutiriana ena achaneanaini máechajiruanahi ema Viya eta acane. Ani máichahi: ⁴¹ “Ímahayare, eti épurunuanahi nútí. Nútí níchayare eta tíáramicare te emirahu te juca sácheana. Te nímitetacahepa eta juca, váhiquene esuapahini éti. Tásiha, tapaenumavainapa te ímahapa eta níchaqueneya, íaraminapa. Nímatihesera eta emásuapajiráivanahi. Épenainapa táicha” máichapa ema Viya.

⁴² Te tamutupa eta máechajisirahi ema Pablo, nayaseacapa ena achaneana, ánipa naicha:

—Picatajicahavi. Piápechahavini pímitucahavi eta juca te apanainavare sávaru —náichapa.

Te tíuchucanapa eta te náurujisirareva, tiyananapa ena apinana apóstoleana eta te náitecapihahi. Náehicapana ena camuriana israelítana, énapa ena apavasanana tépiyacavanaripa israelítana taicha napaichaipa ema Viya. Ticaimitucasianapa táurivaina eta najicapiraya eta máurivahi ema Viya, nacasiñairava me Machicha Jesús.

⁴⁴ Te apanavarepa sávaru, namutuyareni ena achaneana ticavasanahi te avasare tíurujiavana nasamararacayarehi eta máechajiriruva ema Viya mametarapiyarehi ema Pablo. ⁴⁵ Énasera ena israelítana masuapajirairahanahi, te náimahapa eta natiari-

hirahi ena apavasanana, tisemanapa eta mametasiravacahi ema Pablo eta najacapacarevahi me Viya éna apanava. Eta tacahe, nácapaemachapa ema Pablo, nacajachapa. ⁴⁶ Te nasamapa ema Pablo émapa ema Bernabé eta náichirahi ena ticatianacanahi, tájina vahi nayútutuémahini. Náichavacapa:

—Tatuparacahi étivayarehi eti vijaneanana vímitucahe eta juca máechajiriruva ema Viya. Étisera vahi iúricahini eta esamirahi, váhivare ésachahini ésenica eta mávasa ema Viya. Tacahe puiti, énainarinepuca vímitucavacaya ena apavasanana. ⁴⁷ Taicha víti vivanecasisvahi me Viya. Vítauchayare eta juca mavanairipi, ani macahehi: “Nutuparacaviyare píti pipaicyare tamutu avasareana te juca apaquehe. Picametarairuyare eta néchajiriruvana nayehe ena achaneana eta nucuchucuiraya nácani tisuapanuanaya” —macahepa ema Pablo.

⁴⁸ Te nasamapa eta juca ena apavasanana, tiúrisamureanapa. Tásiha, nacahepa:

—Tétavacavapa táurinava eta juca máechajiriruva ema Viya —nacahepa.

Énerichuvare, nasuapapa ena máichuhaqueneanahi ema Viya eta náitaresiraya máichecuaraquireya te táequenenapa eta náepeniraya. ⁴⁹ Tacahe, ena tisuapanaripa nacametarairuvare eta máechajiriruva ema Viya nayehe ena achaneana ticavasanahi te tachacayarahana eta avasare Antioquía Ichipichu. ⁵⁰ Nararihihisera ena ticatianacanahi ema Pablo émapa ema Bernabé. Israelítanahi éna. Tacahe, náimitucapa ena tuparairucana te avasare, énapa ena ésenana ticapicahucareanahi, téhicanahi eta nayeherepiana ena israelítana. Énerichuvare napamicapa ena achaneana, navarairahi náquijicaya tayehe eta avasare ena apóstoleana. Jéhesareinehi, ticuticacanapa eta nacaticiravacahi, nacuchucavacapa ena apinana. ⁵¹ Tacahe, eta nayanirayarepa ena apóstoleana, náetatapevachavaca eta náeparupevana te namirahu ena ticatianacanahi. Táicutiarahi eta namáimitucacárevahi éna, tájina-varepa tímiapchaimahi náimitucavacahini. Tacahe, tiyananapa nacaijuhepa eta te avasare Iconio.

⁵² Énasera ena apamuriana téhicanaripa tímiyanavanapa eta nasuapirahi ema Viya. Tiúrisamureanahivare éna taicha eta mávahásirahi ema Espíritu Santo.

Emá Pablo émapa ema Bernabé títecapanapa eta te Iconio

14 Tacahe, títecapanapa ema Pablo émapa ema Bernabé eta te avasare ticaijare Iconio. Tiyanavare natupiru eta te náurujisirareva ena israelítana. Ticámetaráruanavarepa. Tacahe, camurianavare ena achaneana tisuapanahi eta nametarairuhi: ena israelítana énapa ena apavasanana. ² Váhisera téjiacavana ena apamuriana israelítana masuapajirairahanahi. Nayurucavacapa ena apamuriana achaneana apavasanahi. Navarahapa náimiyusemacavaca. Navarahahivare ticuticacanayare nacatichavaca ena téhicanaripa ema Viya. ³ Eta tacahe, nanasipanapa ena apóstoleana. Vahi nayanavanehini. Tiyerehi eta náimiture-

sirahi, taicha navarahahi náetumechavacaya eta nacasiñairahi ema Viya. Tacahe, ema Viya máimicatacavacahi. Máijaracahi eta náichiraya eta tiáramicareana. Eta juca, máicutiarahi eta mavanésiravacahi eta nacametarairuyarehi eta majacapiravacahi nácani achaneana ticasíñavana mayehe. ⁴ Tásiha, típutsimurihavanapa ena achaneana ticavasanahi tayehe. Ena apamuriana náehicapa ena israelítana masuapajirairahana. Ena apamuriana náehicapa ena apóstoleana. ⁵ Tacahe, ticuticacanapa eta napanereruana ena apavasanana énapa ena israelítana énapa ena náquenuruhana, eta nacajachiraya ena apóstoleana. Navarahapa nacapacaya natupisicaya te márijahiana. ⁶ Énasera, ema Pablo émapa ema Bernabé, te nasamairiricapa, tijnunapa nacaijuhepa eta te provincia ticaijare Licaonia. Ánaqui ticametarairuanapa tayehe eta avasare Listra, tásiha, tiyananavarepa te avasare Derbe, étapa te avasareana tachacayarahani.

Emá Pablo macanaracahi ema masari ticavasahi te avasare Listra

⁸ Te jena avasare ticaijare Listra, matiarihini ema émana achane masarihi eta máitaresirahi. Vahi táurihini tipaica, taicha máimiuchurehi eta mamasarivahi.

⁹ Macaheripa ticasamarahihi éma eta mametarairuhi ema Pablo. Tacahe, ema Pablo máesenicapa, máimatiacapa eta macasiñavairahi ema masari mayehe ema Viya macanarasirayarehi. ¹⁰ Tacahe, ema Pablo mapiaracapa:

—Pécheputa píti. Pétumecha eta jara piápeana. Pitupiha —máichapa.

Eta masamairahi eta juca ema masarini, enevanepa téchepuruca. Titupihapa. Tipaicapa. ¹¹ Eta náimairahi ena achaneana eta macanarasirahi ema Pablo ema masarini, náraminehi ichape. Tipiaracanapa te náechajiriruvaichu, ánipa nacahehi:

—Viyana ena nani. Achanemahianahiséra eta náimahi eta náucupauchirahávihi. ¹² Ema maca ticaijare Bernabé, émara Viya Júpiter. Ema maca apana ticaijare Pablo, émara Viya Mercurio taicha ema ticametarairurahi —nacahepa.

¹³ Tiúri, tatiarihi eta peti te tasiaparacu eta avasare, mayujarasirarehi ema achane tavanarahi eta nasiñaraji ticaijare Júpiter. Tatiarihivare eta apina turu mamansurehi. Tacahe, ema maca achane máepanapa eta turu. Mayeheheacapa eta flure taicha mavaraha macapacayarehi eta turu. Máijaracasichayarehi ema Pablo émapa ema Bernabé. Énerichuvare ena achaneana navarahahi náejirayarehi ena nani apinana apóstoleana taicha náimijachaipa énaripa ena nasiñarajanahi. ¹⁴ Étasera te nasamairiricapa ena apóstoleana eta náichirayarehi, ichape eta náéñamirava. Tiúchucanapa, nasiapamurihapa ena achaneana. Tipiaracanapa, ánipa nacahe:

¹⁵ —¡Tátanaveana, mémenaveana! ¡Váhirine táurihini eta juca íchirayare! Vítirichu ecutiqueneana achaneana. Tímitcachavihi vimetapanahé ínajica eta

juca eyeherepianahi. Taicha vahi tiuri, tamapurujihí eta eyeheheasiraparacahi eta esiñarajiana. Ínajicaya eta juca. Éhicayaresera ema Viya, ema yátupiquenehi ti-samahavi. Éma tépiyacahi eta anuma, eta apaquehe, eta ichapequene mar. Tétupiricahi tamutu eta vímahaqueneanahi puiti. ¹⁶ Ánaquiaparipa eta macamichirahi ema Viya eta náichirahi eta navarahaqueneana ena achaneana. ¹⁷ Máimerecahinénisera eta émairahi tépiyaca eta juca táuriqueneana. Tíjaracahavihi eta tiquiva. Tiúrinachayare eta sucurecana vinicaqueneana máicha. Máijarasirahavihi tamutu eta vicamunuqueneana. Ticurísamurechahavivare. Eta tac-ahe, ímatiquenéha yátupina eta émairahi Viya esiñarajiya —náichapa ena apóstoleana.

¹⁸ Eta tacahehi, nametacari pahinéni eta taurivahi eta juca navarahaquenehi naicha. Énaserá ticamesavarichucha eta navarairahi ticaparecana eta túruana. Váhiqueneséra náisapahíni ena apóstoleana náichahíni eta juca.

Natupisicapa te márijahiana ema Pablo

¹⁹ Tayerevahi eta sácheana, títécapanapa ena israelítana tiásihanahi te Antioquía Ichipichu étapa te Iconio. Éna ticatianacanahi ena apóstoleana. Nayurucavacapa ena achaneana, náimiyusemacavacapa. Eta nachimampirahi ema Pablo te calle, natupisisihapa te márijahiana. Náquipaicapa. Eta náimairahi máquipaisiravahi, náimijachaipapuca tépenahi. Nachururupaicapa náquijicayarehi te tachachacu eta avasare. ²⁰ Tacahe, tiyananapa ena machamuriana ema Pablo, náimaha-panayarehi. Te náitecapauchapa, náurujiacaripa. Émasera téchararahaipa téchepucapa. Máehicavacapa tiyanapa eta te máitecapihahi. Te apanapa sache, tiyananapa ema Pablo émapa ema Bernabé te avasare Derbe.

²¹ Te títécapanapa tayehe eta avasare Derbe, nanasi-panapa tayehe. Ticametarairuanahi eta máechajiriruva ema Viya. Camuriana ena tisuapanahi téhicanahi ema Jesús. Te tamutupa eta náimitusiravacahi, tiyananavarepa tichavanapaipa eta te avasareana náimituresinepahi eta te Listra, te Iconio, étapa te Antioquía Ichipichu. ²² Eta te juca avasareana, náimitucavarepa ena téhicanaripa ema Jesús. Náetumechavacapa eta táurivaina eta náehisiraya ema Viya. Náichavarepa:

—Vahi ecuarameca eta nacatianasiráhe ena achaneana táichavene eta éhisira ema Viáquenu. Ecamichachucha tamutu. Échava eta esiapiraya eta mávasa ema Viya —náichapa.

²³ Énerichuvare, natanucapa ena nayeheanapachu pastor nácani nájamuripachu. Téchanayarehi eta nayujarasirana. Tacahe, natuparacapa eta návacureanaya. Te tamutupa eta natuparasiravacahi, tiyujaracanapa nahayunachavarepa, nayaseacapa ema Viya eta majaneasiraina táurivaina eta náehisiraya namutu ena ticasifanaripa ema Viya.

Éma Pablo, ema Bernabé tichavanavare tayehe eta avasare Antioquía

²⁴ Tacahe, tiyananapa ema Pablo émapa ema Bernabé, tétavajicanapa eta te avasarechichana tayehe eta Pisidia. Náitecapirapa tayehe eta avasare Perge táunavahi eta provincia Pamfilia. ²⁵ Ticametarairuanapa eta máechajiriruva ema Viya nayehe ena achaneana ticavasana tayehe eta avasare. Te tamutupa eta nacametarairuirahi, tiyananavarepa nacaijuhepa eta Atalia. ²⁶ Étapa návacuinehi eta nánuesiraya eta mar, nacaijuhepa eta avasare Antioquía. Tichavanapa tayehe eta juca avasare náuchusinehi te ticavanahianapa mayehe ema Espíritu Santo. Étarichuvare nayujarachinehi ena nachamuriana eta majaneasirayare ema Viya ena apóstoleana eta napaisirayare. Puiti eta juca náitauchaquenéipa eta náematanehi. ²⁷ Eta náitecapiraipa, nacurujicapa ena nachamuriana. Nametacapa tamutu eta máimicatasiravacahi ema Viya tayehe eta napaisirapahi. Étapa eta majacapiravacahi ema Viya ena apavasanana eta nasuapiravacahi nacasiñairahi éma. ²⁸ Tacahe, ema Pablo émapa ema Bernabé, tiyerehi eta nanasirahi nacachaneravacahi ena nachamuriana.

Ticurujicacanapa te Jerusalén. Ticaechacasinapa eta panererucanahi.

15 Te jena sácheana, títécapanapa te Antioquía ena apamuriana israelítana, tiásihanahi te Jerusalén. Navarahapa nahapapiricavaca ena apavasanana téhicanaripa ema Jesús. Ánipa naicha eta náimituresirahi:

—Te evaraha iúchucuha eta ícuñayaréni, tacamunu ítauchayare eta mavanairipihí ema Moisés eta vicamarcairaya † —nacahepa.

² Émasera ema Pablo, émapa ema Bernabé nacapaemachavacapa muraca ena tipamicanahi ena apavasanana eta nacamarcairahi. Ichape eta nacapaemachiracacahi. Tacahe, ena nachamuriana navarahahi náetupirica eta juca. Tásiha, natuparacapa ema Pablo émapa ema Bernabé, nayanahini eta te Jerusalén. Eta ánaqui, ticaechacasiyarehi nayehe ena apóstoleana énapa ena náiyarahanahi. Náevatacavare ena apamuriana téhicanayarepahi ena apinana.

Tacahe, eta napaisirapahi te achene, tétavajicanapaipahi tayehe eta avasarechichana táunavanahi eta Siria, étapa te Samaria, návihahi ena apamuriana nachamurianahi. Nametacapaipa eta náinajisirahi ena apavasanana eta nayeherepianaini tauriqueneana, taicha eta náehisiraiipa ema Jesús. Tacahe, ena nachamuriana, eta nasamairisirahi eta juca, tiúrisamureanarinehi éna.

† *Éta mavanairipini ema víyahaini Moisés ticamarcanayarehi namutu ena amuyana ajairana israelítana. Éta tímereuchayarehi eta yátupiquenerahi israelítana. Te juca, ena napaipiruanahi tiásihanahi te Judea, navarahapa nacamesaquehena nacamarcavaya ena ajairana ichanaruinaripa, apavasanahivare.*

⁴ Tacahe, eta náitecapirahi eta te Jerusalén ema Pablo émapa ema Bernabé, ena apóstoleana énapa ena náiyarahanahi pastoreanahi nacurujicapa ena nachamuriana eta najacapiraya ena araitecapianahi. Tacahe, ena apinana nametacapa eta máimicatasiravacapai ema Viya eta napaisirapahi éna. ⁵ Natiarihivare ena religiósosana téhicanarípahi ema Jesús. Titupihanapa éna. Téchajicanapa, ánipa nacahe:

—Táitaurevaquene tacamunurichu nacamarca ena apavasanana téhicanaripa ema Viáquenu Jesús. Tacamunuhivare nacaravahu náehica eta juca mavanairipianahi ema Moisés —nacahepa.

⁶ Tacahe, te apanapa sache, tiúrujicavanapa ena apóstoleana énapa ena náiyarahana. Navarahapa náetupirica eta juca. ⁷ Nacaemataneacaripa eta juca náechajisihahi. Tacahe, titupihapa ema Pedro. Máichavacapa:

—Nuparapenaveana, écharichuhi éti ánaquiaparipa eta manerejisiranuhi ema Viya eta nucametarairuya eta mayehe ena apavasanana eta náuchucuirayarehi táichavenénahi eta nasuapirayare ena apana. ⁸ Ema Viya máimatihahi eta nasamureana ena apavasanana eta nasuapirahi. Tásiha, máimerecahi eta majacapiravacahi eta mávahásiravacahi ema Espíritu Santo tacutihahi eta mávahásirahavihi víti. ⁹ Ema Viya, nájina manerejiruina eta máemunasirahavi. Témunacahavihi vímutu: víti israelítana, énapa ena apavasanana. Eta tacahehi, masípasinavacarípa eta nasamureana éna táichavénehi eta nasuapirahi. ¹⁰ Étiserá evarahapa épuryare eta máichaqueneanahi ema Viya. Ticajeraequenepa eta véhisirainahini eta nayeherepiana ena víachucanaveanaini. Énaripa vahi náitauchapahini tamutu eta nayeherepianapahi. Vítiripa váhivare váratahahini vítauchahini. Tacahe, váipa táuricahini vécatihavacahini ena vichamuriana apavasanana náichahini eta juca. ¹¹ Vécharipahisera yátupi eta víuchucuiraya táichavénehi eta macatajisirahavihi ema Viáquenu Jesucristo. Viti israelítana, vahi étaparacaina eta vicamarcairahi. Ena apavasanana, váhivare étaparacaina eta tájinairahini namarcainahini —máichapa ema Pedro.

¹² Tacahe, timatinanapa namutu. Nasamararacaripa ema Bernabé, émapa ema Pablo. Nametamurihapa eta máimechirahi ema Viya eta mavanésiravacahi éna, taicha máijaracavacahi eta náichirahi eta tiáramicareana te namirahu ena apavasanana. ¹³ Te títapiricanapa eta nametarapianahi, émapavapa ema Santiago téchajica. Macahepa:

—Nuparapenaveana, esamanuchaha. ¹⁴ Ema Simón Pedro timetacahaviripa te tépanavainapa majacapavacainapa ema Viya ena apavasanana machaneranyarehi. ¹⁵ Eta juca eta náechajisihaquenehi namutu ena víyahaini profetana. Émaripa ema víyahaini profeta Amos májuchahi eta juca máechajiriruvana ema Viya, ani macahehi: ¹⁶ “Te táequenénapa eta juca, nápechavaya núcupaicayare te juca apaquehe. Nétupiripanaya eta nupena táquipairuvahi. Tásiha, tiápechavanayare tiyujarauchanuanayare ena achaneana, tacu-

tiyare eta náejirairanuhi ena machaneraini ema rey David. Tisuapanuanayareva. ¹⁷ Énerichuvare títanucanuanayare namutu ena apavasanana. Nuchaneranyareva éna, taicha námayare eta níjare”. ¹⁸ Étara eta juca macayemaquenehi ema Viya. Ánaquiaparipa eta mavarairahi vicaicutiaraya eta juca.

¹⁹ Tímiyanava eta máechajiriruvana ema Santiago, ánipa macahe:

—Tiuri, eta juca eta nupanereruhi núti: Tiúripiana vésamiricavacachuca ena vichamuriana apavasanana náequeruvanaripa mayehe ema Viya. ²⁰ Taratarichu vicajurevaca tametaca eta vaipa nacuapechava nacunica eta taeche eta sárare náijaracasiruana eta nasiñarajiana. Váhivare nacuveha súcani apana esena. Énaripa ena esenana, váhivare nacuveha ema apana achane. Váhivare nacunica eta taeche eta sárare namaechatinure. Étaripa eta táitine, váhivare nacunica. ²¹ Eta vimetacavacayare ena vichamuriana apavasanana eta juca, apaesa vahi nacusemaracavaca ena téhicanarichaha eta mavanairipiana ema Moiséini. Taicha ánaquiáparipa te avasareana eta náechajicuiraparacahi ena vijaneanana israelítana eta mavanairipiana ema Moiséini te náurujisiravana. Puíticha nararihichaha ena náimicapicaucharichucha —macahepa ema Santiago.

²² Tacahe, ena apóstoleana, énapa ena náiyarahana, énapa ena náumurivana, tiúrihi nasama eta mapaneruhi ema Santiago. Tacahe, ticavanahianapa ena apinana téchemarahiana ticapichuanahi, ema Judas Barsabás émapa ema Silas. Éna téhicanayarehi ema Pablo émapa ema Bernabé eta nachaviraya te Antioquía. ²³ Tiuri, eta juca táechajiriruvahi eta carta. Ani tacahehi:

“Vímiamareca eta juca véchajiriruva viti apóstoleana, énapa ena víyahana, énapa ena vichamuriana te juca Jerusalén. Vivaraha tativayare véchajicahe eti viparapenaveanahi te mavahuana ema Viáquenu: eti apavasanana tiávianahi te Antioquía, étipa eti tiávianahi te táunavanahi eta Siria étapa eta Cilicia.

²⁴ Visamairiricahi eta nayanirahi ena tiásihanahi ani te juca. Tiávajiriricaheanapa. Navarahahi nahapapicayare eta epanereruana. Ticamesaheanahi ítauchayare eta mavanairipiana ema Moisés eta ecamarcairaya. Váhisera vanairucanaina eta viyehe eta náimitusirahehi eta juca. ²⁵ Vévatacahi ema Judas émapa ema Silas, vanairucanahi viyehe. Éna, timetacaheanayare tamutu eta juca téchacareanahi viyehe. Ena nani téhicanapahi ema Bernabé ema Pablo, ena viparapenaveana vémunaruqueneana. Ema maca Bernabé émapa ema Pablo, tíjaracavanahi éna náepenacaya ema Viáquenu Jesucristo taicha eta nacametarairuirahi. ²⁸ Áni te juca víti, vicuticacahi eta vipanereruanahi, máimitusirahavihi ema Espíritu Santo. Vahi vávarahahini tacajeraequenehini eta éhisirayare ema Viáquenu. ²⁹ Tacarichu vimetacahe eta juca ticamunucarepana te mamirahu ema Viya:

1. Vahi ecunica eta taeche eta sárare nayujaraurehi ena achaneana te tamirahu eta nasiñarajiana.

2. Váhivare ecunica eta táitine eta sárareana.

3. Váhivare ecunica eta taeche eta sárare namaechatiture.

4. Váhivare ecuveha esu apana esena. Énerichuvare eti esenana, vahi ecuveha ema apana achane. Énerichuvare ímitucavaca ena echichanaveana tacuija eta natuhusivaina.

Te yátupina esuapa eta júcana, tájina íchiravaimahi te mamirahu ema Viya. Éma tímícatacaheyare tijaneacahereyareva tamutu sácheana. Tamutupa eta juca véchajirivanahi eta eyehe”.

³⁰ Tacahe, tiyananapa ena tiámana eta carta, nacaijuhepa eta Antioquía. Te títecanapa ánaqui, nacurujicapa ena nacaijuhequeneanahi nachamuriana. Náijaracapa eta námaquenepahi carta. ³¹ Te najacapapa eta carta, navejiacapa. Náechajicuhapa te namirahu namutu ena nachamuriana. Tétavíjavahi eta náurisamurevahi eta nasamirahi.

³² Nanasipanapa jena cájeanahi ema Judas émapa ema Silas. Éna, énerichuvare eta títucanahi eta máechajiriruva ema Viya. Tiúrihi eta náimitusiravacahi ena nachamuriana. Naconsejachavacahi, náetumesámurechavacáinehi náicha. Te tamutupa eta náimituresirahi, tichavanayarepa nayehe ena tivanecanahi. Tacahe, ena nachamurianaahi náechejemachavacapa.

Nayaseacapa ema Viya táurivainapahi eta napaisiraina. ³⁴ Émasera ema Silas mavarahapa manasiyare.

³⁵ Énerichuvare, ema Pablo émapa ema Bernabé nanasivarepa tayehe eta avasare Antioquía. Tímiyanavanapa ena tímiturecana nayehe ena nachamuriana. Ticametarairuanavare nayehe ena apamuriana achaneana. Natiarihivare ena apamuriana tímícatanahi.

Tiápechavánavare tiyanana ena apóstoleana te avasareana

³⁶ Te táequenepa eta juca semanahahi, ema Pablo máichapa ema Bernabé:

—Vivanavare viápechava vipaica tayehe eta avasareana, véjiravacapahi ena vichamuriana te vipaisineanapahi cape juca te tínapucainapa viyanahi. Vímhatajáhapuca náicharacavahi —máichapa.

³⁷ Tacahe, ema Bernabé tísapavahi tiyana. Mavarahapasepa mama ema Marcos. ³⁸ Émasera ema Pablo vahi mávarahahini mayanahini ema Marcos. Taicha te tínapucainapa tipaicana manaquimuriahahi ema Marcos te avasare Perge tayehe eta Panfilia. Vahi máimicatacahíni tayehe eta náemataneanapahi. ³⁹ Nacaemata-neacaripa eta mamavarairahi mayanahini ema Marcos. Tacahe, tínajicacanapa. Ema Bernabé tiyanapa, macachanehi ema Marcos. Tiávacuhanapa, nacaijuheyarepa eta tiúrupuhi Chipre. ⁴⁰ Tacahe, ema Pablo mapanerechapa mámayare ema Silas. Te tétupiricavanapa, nayujarauchanumapa ena nachamuriana. Nayaseacapa ema Viya eta máimicatasirainapahi eta napaisiraya. Ticametanavanapa tiyananapa. ⁴¹ Eta napaisirapahi te achene tétavajicanapaipa tayehe eta avasarechichana Siria étapa te Cilicia. Náejirava-

capaipa ena nachamuriana natiarihiqueneanapahi. Náetumesámurechávacapáipahi.

Éma Timoteo máehicavacapa ema Pablo, ema Silas

16 Tacahe, ema Pablo émapa ema Silas náejiravacapaipa ena nachamuriana ticavasanihi te Derbe. Tásiha, tiánucuhanavarepa te Listra. Ánaqui te Listra matiarhihi ema Timoteo, suchicha esu ésuna esena israelíta, téhichuvare ema Jesús. Émasera ema maiya, apavasanahi griego éma. Ema maca Timoteo émarichuvare téhichahi ema Jesús. ² Énerichuvare, nacunachahi eta máurivahi ena machamuriana ticavasanihi te Listra énapa ena ticavasanihi te Iconio. ³ Tacahe, ema Pablo mavarahapa mámayare ema Timoteo eta napaisiraya. Tacahe, mavanecapa macamarca † apaesa tacuija nacucayema ena israelítana ticavasanihi tayehe eta napaisihayare. Taicha náimatíhi éma eta machichairahi ema apavasanahi. ⁴ Tacahe, tiyananapa. Náejiravacapaipa ena nachamuriana te tamutu avasareana. Nametacapahi éna eta táechajirivapahi eta carta náimiamareruhivare ena apóstoleana énapa ena náiyarahana tiávihanahi te Jerusalén. ⁵ Ema nachamuriana, eta nasamirapahi eta mametarairu ema Pablo, tétumechacacanapaipa eta nasuapajiravapahi. Tamutu sácheana ticajanemuriánapáichucha ena téhicanapahi.

Éma Viya máechajicahi ema Pablo mayana eta te Macedonia

⁶ Tiuri, ema Espíritu Santo mametacahi vahi nacuyana eta te tinapaicahi eta avasareana te Asia. Tásiha, náetavicapa eta avasarechichana táunavanahi eta Frigia (ticaijarehivare Galacia). ⁷ Nacaijuheyarehi eta provincia ticaijare Bitinia. Téhesera te tiánehanapa, ema Espíritu Santo mavanecavarepa vahi nacuyana tayehe. Tacahe, náetaviequenehapa. Tiánucuhanapa tayehe eta táunavahi eta Mísia. Náitecapirapa te puerto ticaijare Troas. ⁹ Te jena yati, máimahapa ema Pablo te mavapure ema émana achane ticavasahi te tinapaica te Macedonia. Titupihahiji éma. Máichapaji eta máechajisirahi:

—Picatajicahavi, piánueca te juca viávihihi Macedonia. Pímicatapanahavi —máichapaji.

¹⁰ Eta máimairahi ema Pablo te mavapure eta juca, enevanepa vétupiricavapa eta viyaniraya tayehe eta Macedonia, taicha vémeteacahi eta mavarairahi ema Viya eta viyaniraya eta ánaqui, vicametarairuirayare.

Títecanapa te avasare ticaijare Filipos

¹¹ Tacahe, viávacuhapa eta te puerto Troas. Viyanapa tayehe eta tiúrupuhi ticaijare Samotracia. Te apanapa sache, vítecapapa te Neápolis. ¹² Viúcupaicapa viyanapa te avasare Filipos. Eta juca avasare nayehe colonia

† *Eta juca nayeherepi eta nacamarcairahi ena israelítana, te tíuchuca ema amuya ajairachicha, te óchopa sache eta máuchusirahi, namarcachayarepa. Émaripa ema Timoteo ichanaruipahinéni. Émasera ema Pablo macavanairipipa macamarcahivaréni éma apavare, apaesa tacuija nayunacahi ena israelítana.*

ena romanoana. Eta ichapepanahivare tayehe eta avasarechichana tinapaicahi eta te tacunahu táuchu-sine eta sache eta Macedonia. Vinasipanapa tayehe te jena sácheana.

¹³ Te jena sache sávaru, viyanapa eta te nayujarasirarehi te tachachacu eta avasare te tachaúsi eta cacajure. Véjacapa tayehe. Vicametarairupa nayehe ena esenana náurujiರುವನಾಹಿ tayehe. ¹⁴ Sutiarihi esu ésuna esena ticaijaruhi Lidia. Ésu, tiásihai eta avasare eta suchusinehi. Esu suca tíjararecarahi eta yérerucava sédana mularumeana. Ésurichu, tipicaurahi me Viya. Susamararacaripa eta mametarairuhi ema Pablo. Ema Viya mavejiasinaipa eta susamure sujacapyarayepahi eta mametarairu ema Pablo. ¹⁵ Enevanehi ticaicachasihi esu esena énapa namutu ena tiávihanahi te supena. Tacahe, suvarahapa tiámahavi eta te supena. Sucahepa:

—Te esuapapuca eta yátupirahi eta néhisirahi núti eñi Viáquenu Jesús, ítecapauchanupaini te nupena —sucahepa.

Tásiha, ticamesahavipa tiámahavi te supena. Tacahe, vísapavapa véhica.

¹⁶ Te apana sache, te viápechavavarepa viyana tayehe eta nayujarasirare, vicainunapa esu ésuna amaperu mávaháruhi ema éreana. Tijarauquihi ésu máicha. Esu suca amaperu vanaracahi. Ichapemurihi eta plata suvachanahi, suíjaracpahisera ena suáquenuana. ¹⁷ Te tímahahavivare viánucuha, téhichavivare esu suca amaperu. Tipiaracapai te véquene. Ánipa sucahe:

—Ena nani ajairana ñivanarana eñi Viya Viáquenu vimutu viti achaneana. Náechajisihavare eta eyehe eta achene ticaijuhe ñe Viya nayanihayare ena náuchucureanayare —sucahepa.

¹⁸ Ichapemuri eta sácheana eta suéhicarairisirahavihi. Mapuñacapa ema Pablo. Téquerucavapa. Tásiha, máichapa ema éreana ema tiávahácahi ésu:

—Te máijare ema Náquenu Jesucristo, nuvanecavi piúchuca te suáquehe esu suca amaperu —máichapa.

Enevanehi tiúchuca ema éreana. Majunijiacapa ésu.

¹⁹ Te náechapa ena suáquenuanahi, tisemanapa taicha tájinapa suviahini eta suplatanechihavacahini. Tacahe, nacaratacapa ema Pablo émapa ema Silas. Námapa te plaza te namirahu ena tuparairucanahi.

²⁰ Tacahe, nametauchavacapa nayehe ena tuparairucanahi. Ánipa nacahe:

—Ena nani ajairana israelítanacacha. Nacaehepuca eta tauriqueneana. Navarahapa tíminajicahaviana eta viyeherepiana. Navarahavare véhica eta vimaimatiequeneruhi viti romanoana. Váhivare táisapacarehini vítauchahini eta nayeheropianahi énatatajiana —náichapa.

²² Tacahe, ena achaneana tisemanapa nayehe ema Pablo émapa ema Silas. Tacahe, ena tuparairucana juéseanahi nacavanairipipa navejamuhiacavaca, náestacavacapa te yucuquipiana. ²³ Te tamutupa eta náestasiravacahi, námapa te cárcel. Navanecapa ema nacapitara ena carceléroana máechapajirica muraca

eta tapaja. ²⁴ Te masamapa ema nacapitara eta navanairipihí, máimisipavacapa tayehe eta téqueneha cuarto. Máeratapaiquechavacapa te cepo. Manacapa cantavu eta tapaja.

²⁵ Tacahe, eta jena enumuhuquenepa yati, eta nacaeratairahi ema Pablo émapa ema Silas, tijiranaichucha tiyujaracanahivare me Viya. Ena apamuriana présoanahi nasamararacaripa eta jirasare.

²⁶ Tíjahúchavapa tiyamurica muraca eta apaquehe. Tiyamuricapa eta yúchamana. Tíjahúchavapa téjiacavaca eta tapajacurana eta cárcel. Téjapucapa eta cadenana náitihanahi ena présuana. ²⁷ Téjamiuchavapa ema nacapitara ena carceléroana. Máimaharine eta tapajana téjiacavacaripahi. Máimijachapa nájinaripahi ena présoanahi. Tásiha, mavehapa. Tásiha, mavehapa. Mavarahapa ticapacavayarehini táichavenehi eta mapisirahi. ²⁸ Émasera ema Pablo mapiaracapa:

—Vahi picucapacava. Vitiaririchuhi vimutu. Nájina émanaina téjiacavaina —máichapa.

²⁹ Tacahe, ema nacapitara tiyaseserecapa eta namichayare. Tisiapapa máimamurihayarehi éna. Tiyayacarepainecha eta mapisirapahi. Tépuycapa te namirahu ema Pablo émapa ema Silas. ³⁰ Máichuhavacapa éna, mámapa te mapena. Mayaserecavacapa:

—Tátanaveana, ¿tájahapucaini nícharacavaini eta núchucuirayare núti apana?

³¹ Éna najicapapa:

—Pácasiña pisuapa ema Viáquenu Jesucristo. Tásiha, éma ticuchucuhavivare píti, énapa ena pichichanaveana —náichapa.

³² Tacahe, náimitucapa éma eta máechajiriruva ema Viya, énapa namutu ena tiávihanahi te mapena.

³³ Étarichu jena yati ema nacapitara masipasinavacapa eta najarana ema Pablo émapa ema Silas. Tacahe, ticaicachasipa éma, esu mayena, ena machichanaveana, énapa ena apamuriana tiávihanahi te mape-na. ³⁴ Te táequenepa eta juca, mámamurihavarepa te mapena. Máenicavacapa. Tiúrisamureripa éma, énapa namutu ena tiávihanahi te mapena, eta macuchucuiravacayare ema Viya eta nasuapiraipa.

³⁵ Te las nuévepa sache, ena juéseanahi navanecapa ena nasuntarurana nacuchupanavacayarehi ena náerataruanahi. ³⁶ Tacahe, ema nacapitara ena cárceléroana máichapa ema Pablo:

—Jucarihi eta órdena nayehe ena juéseana eta nacaitisiraheya. Tiúripa eyana iúchuca. Vaipa táeñamavacare —máichapa.

³⁷ Émasera ema Pablo máechajicavacapa ena sun-taruana. Máichapa:

—Víti tavanarahavi eta Estado te Roma. Viávacuhahi eta ley. Vahi táuricahini náichahavihiní ena juéseana ticaratachavianapa téstacahavianapa te namirahu ena achaneana. Vahi nayaserecavahinumahini te tatiarhipuca eta viviurevahi. Tásiha puiti, navarahapa nayumuruayare eta nacuchusirahavivare. ¡Vahi ene tácahe! Emetaca énaína náiteca nacuchupanahavi —máichapa ema Pablo.

³⁸ Tacahe, tichavanapa ena vanairucana. Nametacapa ena juéseana eta máechajiriruva ema Pablo. Ichaperine tipicana ena juéseana eta nasamirahi tavanaranairahi eta Roma. ³⁹ Tacahe, tiyananapa ena juéseana nacuchupana. Tiperdonachavanapa nayehe. Náichapa:

—Ájapanuhavi. Eperdonachahavi eta juca víchirahehi. Ecatajicahavi, vahi ecumetauchahavi. Ájapanuhavichucha, tiúripanahipucáini iúchucaini eta te juca avasare viávihi, apaesa náesamiricahepa ena iánaranahi —náichapa.

⁴⁰ Tacahe, te tiúchucanapa te cárcel ema Pablo émapa ema Silas, tiyananapa tichavana te supena esu Lidia, viávihi víti. Vicurujicapa ena vichamuriana. Tásiha, náetumechavacapa, náimitusiranumapa eta náimiyavachucha eta nasuapajiraivaina mayehe ema Viya. Tásiha, tiyananapa.

Nacaechepuca eta semanere ena israelítana te avasare Tesalónica

17 Eta nayanirahi ema Pablo émapa ema Silas, tiánucuhanapa tayehe eta avasareana Anfópolis étapa te Apolonia. Títécapanapa tayehe eta apanavare avasare Tesalónica. Tatiarihihi ánaqui eta náuruji-rareva ena israelítana. ² Eta mayeherepihi ema Pablo, matupiru te náuruji-rareva. Mapana sávaru eta macametarairuirihi nayehe ena achaneana. ³ Manerejicapahi eta te Sagrada Escritura eta máechajicurepahi. Máimitucavacahi eta máitesiraipahi ema Cristo. Ánipa máichavacahi:

—Tiyerehi eta vicuchapirahi eta máimeresiravayare ema Cristo eta viyehe viti israelítana. Tímitucahavihi eta Sagrada Escritura eta macatajivairayarehi, nacapacayarehi. Émasera téchepucayarehi te máecari. Puiti numetacahe: Nímatipa ema Jesús Nazareno, ema nacaparuihi. Téchepucaipahi éma. Eta juca tímicaecherachahi émahi ema Cristo —máichapa.

⁴ Tacahe, tinerejicavanahi ena achaneana. Natiarihi ena tisuapanahi, náurujiacahi ema Pablo émapa ema Silas. Camurianavare ena griégoana apavasanana típicauchanahi ema Viya, téhicanahivare. Énerichuvare ena esenana nayanana ena táiyarahana eta avasare tinerejicavanahivare ena téhicanahi. ⁵ Énasera ena apamuriana israelítana masuapajirairahanahi, ticapinaruanahi eta náimairahi ena camuriqueneanahi achaneana téhicanahi ena apóstoleana. Tisemasamureanarichucha. Nacurujicapa ena ajairana váinarajipanereruana, máematanereanahi te cálléana. Tíchujiricacanapa eta nacaechepusiraya eta semanere. Natanucapa ema Pablo émapa ema Silas, navarairahi nacaetemajiricavaca te namira ena achaneana. Tiyananapa eta te mapena ema Jasón. Náquipaicapa eta tapaja. Tisiapanapa. ⁶ Eta namaichimavirahi ema Pablo émapa ema Silas, nacaratacapa ema Jasón énapa ena apamuriana machamuriana. Nachururupaicavacapaipahi eta námirapahi te namirahu ena tuparairucanahi. Tipiaracanapa eta nasemanevahi, nacahepa:

—Títecapauchahavianahi ena nani achanetatajiana náitecapaurehavianahi. Najararecapahi eta viyeheripiana, nahapapicahivare eta napanereruana ena vijaneanana. ⁷ Éna majacapaqueneanahi ema Jasón te mapena. Namutu ena nani nacaecahihi ema aquenuca viyehe Emperador romano, náepuruvare eta mavanairipiana. Náimijachahiji mararihi ema apana rey ticaijarehipuca Jesús —nacahepa.

⁸ Te nasamapa eta juca, ena tuparairucana énapa ena apamuriana achaneana, napanerequeneháinehi. ⁹ Tájinasera apanainahini náicharachahini, nayasecapa nanaquica eta prenda eta náuchusirayare ema Jasón énapa ena machamuriana. Tiámainucava te náuchucapa te avasare ema Pablo ema Silas, náimichavayarepa eta prenda.

Éma Pablo, ema Silas títécapanapa te avasare Berea

¹⁰ Te jena yátiquenehi, ena vichamuriana námapa nayumurucapa eta nacuchusirahi ema Pablo émapa ema Silas tayehe eta avasare. Tiyananapa nacaijuhe eta avasare Berea. Te títécapanapa ánaqui, tiyanavare tayehe eta náuruji-rareva ena israelítana.

¹¹ Éna nani israelítana ticavasanahi te Berea, tiúripaneruanapanahi nayehe ena ticavasanahi te Tesalónica. Navapina éna, nasamararaca eta mametarairuirihi ema Pablo. Tamutu sácheana nacaravahuhi eta Sagrada Escritura. Navarahahi náechayare te yátuphipuca eta mametarapihi ema Pablo. ¹² Jéhesareinehi, camuriana ena tisuapanahi. Camurianavare ena apavasanana tisuapanahi. Te namuri, natiarihivare ena esenana ticapicahuqueneanahi, énapa ena ajairana.

¹³ Nasamairicavarepasera ena israelítana ticavasanahi te Tesalónica eta macametarairuripahiva ema Pablo eta te Berea. Enevanepa tiyanana nacapayaca. Te títécapanapa, náimiyusemacavarepa ena achaneana. ¹⁴ Énasera ena machamuriana ema Pablo enevanepa náevataca éma te tachausi eta mar. Nanasipasera te Berea ema Silas, ema Timoteo. ¹⁵ Éna tiámanahi ema Pablo, te títécapanapa te puerto, tiávacuhanapa tiyananapa tayehe eta avasare Atenas. Te títécapanapa, étapa nachavinehi ena tinapananahi ema Pablo. Tacahe, ema Pablo matuparacavacapa nametaca ema Silas, ema Timoteo nayanavane nacapayaca éma eta te mávihi.

Tímiturecapa ema Pablo te avasare Atenas

¹⁶ Éta macuchapiravacahi náitecapiraya ema Silas, ema Timoteo, vaipa máitucacarehini ema Pablo eta máimairavacahi ena achaneana nayeheharacahi eta camuriquene nasiñarajiana. ¹⁷ Tacahe, tamutu sávaruana, tiyana eta te náuruji-rareva ena israelítana. Máechajisihahi eta tiúrina échajirirucava nayehe éna, énapa ena apavasanana griego típicauchanahi ema Viya. Tamutuvare sache máechajisihahi éma te plaza nayehe ena achaneana natiarihiqueneanahi. ¹⁸ Natiarihihi ena ajairana ena téhicanahi eta máimiturapi ema ticaijare Epicuro, énapa ena apamuriana ticaravahua-

nahivare eta náimiturapiana ena estoicoana. Te jena sácheana, téchajiricavanapa mayehe ema Pablo. Váhiserá nácaicutiarapahini eta macayemapahi. Nacahepa:

—¿Tájahasamipucara tacayemahicácha eta mapaneruhi ema maca?

Ena apamuriana ánivare nacahe:

—Ema maca ticametarairurahi tayehe jácani apanavare masiñarajianarichu —nacahepa.

Nacahehi éna eta juca, taicha ema Pablo mametacavacahi eta máepenirahi ema Jesús étapa eta máechepusirahi, mápechiravahi títareca. ¹⁹ Tacahe, tiyananapa tayehe eta cabildo náurujisirareva ticaijarehi Areópago. Ánaqui nayaserecapa ema Pablo:

—Vivaraha vímati víti eta juca arairuhi pímiturapihi eta viyehe. ²⁰ Taicha tíramicarehi eta juca vimaimatiquenehi. Vivaraha véchayare tájahapuca tacayemahi eta juca —náichapa.

²¹ Taicha ene nacahehi namutu ena ticavasanahi te Atenas, énapa ena náiteruanapahi. Náuricarinehi náechajisiha tamutu sácheana eta náimahaqueneana nasamaqueneanapahi arairuqueneana.

²² Tacahe, ema Pablo titupihapa te namirahu te nayehe cabildo. Máichavacapa:

—Tátanaveana, eti ecavasana te juca Atenas. Nímararacahehi eta yátupirahi religiósohe. ²³ Taicha te nítecapapa núti eta ani eyehe, nupaicahi tamutu eta eyujarasirareana. Nímahapa eta eyehe altar tatiarihihi eta ajureca ani tacahehi: “Ema Viya vimaimatiquene”. Tiuri, ema maca Viya eyujaraureasa emáimatiquénehi éti, émara ema Viya néchajisihaquenehi núti.

²⁴ Émara tépiyacahi eta apaquehe, étapa eta vímahaqueneanahi távapahianahi eta juca apaquehe. Émara téchahi ticavanairipihite anuquehe étapa te juca apaquehe. Ema Viya vahi tácarichuimahi máucupaisihaya eta te vépiyuaranahi templo, taicha vahi mácamunu eta mapenainachuhini eta te juca apaquehe.

²⁵ Váhivare mácamunu víjaracasichahini eta víámavahu viti achaneana. Vítira vicamunuvahi eta mayehe. Éma, téchapajiricahavihi vimutu. Tíjaracahavihi eta táurivahi eta vítaresira.

²⁶ Acane te tépanavainapa tamutu, ema Viya máepiyacapa ema máinapuiru achane ticaijare Adán. Vimutu viti achaneana, mámariequenehavi ema Adán. Apánapanenéjihavahisera maicha ema Viya. Tamutu eta apaquehe viávapaicahi máicha. Máimicutiarachaphisera eta táenasihayarepahi eta viávasanapachuyarehi. Énerichuvare, máimicutiarachahivare eta táichecuiyare eta vítaresirana. ²⁷ Vitiarihisera viti achaneana vémitisicaipa ema Viya. Émasera mavarahahi vitanucayare. Váhinéni máyerehivahini. Titsecavahi éma te vichacaya. Mácani mavaraha matanuca, máichimavávaneyarehi. ²⁸ Taicha vítarecachi máicha, tímipaicahavihi, achanehavihi máicha. Émaripa éma ichapequene escribáno te emuri éti macahehi eta máechajiriruvahi: “Viti achaneana cáitarecavahihi ema Viya”. ²⁹ Víti vímatihite eta máchanechirahavihi ema Viya, macaitaresirahavihi. Viyamuricahi vipaicahi máicha.

Tacahe, véjecapiravahi víti te vímijachapuca virataha viáchanecha eta visiñaraji. Vímviasichahinenehi eta jácani, váhiserá tasamarahihini, váhivare tapaicahini, váhivare tayamuricahipucaini. Tayanapanepuca táurina te vépiyaca eta óropuca, plátapuca, chinapuca. Váhivare váratahaimahi nacasiñacarehini vícha. ³⁰ Te vicasiñarajihipuca eta vépiyaruana, vimáimatirarichaha. Ánaquiaparípa eta macamichirahi ema Viya ena achaneana eta nacasiñairahi eta nasiñarajiana. Puítisera vaipa macamicha eta juca. Tivanecahavipa vimutu viti achaneana vínajica eta juca, tátupiruvapa eta véneuchiravaina eta mayehe. ³¹ Taicha tatiarihiyarehi eta jena sácheare máicuñacayare namutu ena tíchanahi eta juca. Tamutuina maétupiricayare. Mararihi ema achane manerejiruhi ema Viya, juéseyare eta viyehe. Éma, ticaijare Jesús. Ema Viya máimerecachi eta manerejisirahi ema Jesús juéseyarehi, taicha macaechepucachi te máecari te táequenepa eta máepenirahi —macahepa ema Pablo.

³² Te nasamapa eta máechajisihairahi eta máechepusirahite te máecari ema Jesús, natiarihi ena nacaecahiríchucha. Énaserá ena apamuriana napanerequenehapa. Tacahe, náichapa:

—Téhenarinevare apahena péchajisihavare eta juca, apaesa visamavi —náichapa.

³³ Tacahe, tiúchucapa ema Pablo eta te náurujisirareva. Tiyanapa. ³⁴ Natiarihisera ena apamuriana nasuapahi náehicapa eta mametarapi ema Pablo. Matarihihi ema Dionisio táiyaraha eta nayehe cabildo, ésupa esu ésuna esena ticaijaru Dámaris. Natiarihivare ena apamurianahi.

Éma Pablo tiyanapa te avasare Corinto

18 Te táequenepa eta juca, tiyanapa ema Pablo. Tiúchucapa eta avasare Atenas. Ticaijuhe eta apana avasare ticaijare Corinto. ² Ánaqui macainunapa ema émana israelíta ticaijarehi Aquila, ésupa esu mayena ticaijaru Priscila. Ema maca Aquila máuchusinehi te tinapaica eta departamento Ponto. Tayerevahisera eta áñoana, tiyananapa tayehe eta avasare Roma. Macáemataneínehi ánipihite. Émasera ema aquenucaini Emperador Claudio macavanairipipa náuchuca namutu ena israelítana eta te Roma. Tacahe, tiyanapa ema Aquila tayehe eta avasare Corinto, étapa macainunainehite ema Pablo. ³ Énapa mávayechavacahite ema Pablo. Ena nani ticuticacanahite eta náematanepiana tálabarteroana. Tímicatacacanapa eta nacaematanerahi.

⁴ Tiuri, tamutu sávaruana ema Pablo tiyanahite tayehe eta náurujisirareva. Maconsejachavacahite ena achaneana. Macajimuyacahite eta nasamureana ena israelítana énapa ena apavasanana.

⁵ Tacahe, napaenumavapa nacapayaca ema Silas émapa ema Timoteo, tiásihanahite te Macedonia. Eta natiarihirahite éna, tépanavapa ema Pablo ticametarairu tamutu sácheana eta máechajiriruva ema Viya. Mavarahapa macajimuyacavacaya ena israelítana ema Jesús émarahite Cristo ema nacuchapaquenehi.

⁶ Natiarihisera ena apamuriana masuapajirairahanahi. Nacatianacapa ema Pablo, napanararachavare. Tásiha, tétatajiacavapa ema Pablo eta máepacuhasa, táicuatirahi eta namaimitucacarevahi ena nani. Majunijicayarepa. Tásiha, máichavacapa:

—Étipa ecatapiravayare vaipa iúchucuhaimahi tayehe eta ecuñaraqui te apana vítaresira taicha eta emajacapirahi eta máechajiriruva ema Viya. Vaipa necha núti. Puiti juca nuyaninapa, nímiturecaya nayehe ena apavasanana —máichavacapa.

⁷ Tacahe, tiúchucapa tayehe eta náurujisirarevahi. Tiyanapa te mapena ema apana machamurihi ticaijare Justo. Ánaquipa eta máimituresihahi. Ema maca Justo, vahi israelítana, mapicauchahisera ema Viya. Eta mapenahi te tachacaya eta náurujisirareva ena israelítana. ⁸ Matiarahi ema apana achane ticaijare Crispo, tuparairucahi tayehe eta náurujisirarevahi. Masuapahi éma, ésupa esu mayena, ena machichanaveana, éna ena apamuriana tiávihanahi te mapena. Camuriavare ena tisuapanahi ticavasanahi tayehe eta avasare Corinto eta nasamirahi eta máechajiriruva ema Viya. Namutu ticaicachasianahi. ⁹ Tacahe, étana yati, ema Viáquenu Jesús máechajicapa ema Pablo, ánipa maicha:

—Vahi picupica. Pímiyanavachucha picametarairu te juca avasare, ¹⁰ taicha camuriana ena nuchaneranya. Núti nutiarhiya te pichacaya. Tájina náicharacavimahi ena piánarana —macahepa ema Jesús.

¹¹ Tacahe, ema Pablo manasipa. Étana año y medio macahehi tayehe eta avasare Corinto. Tímiturecahi nayehe ena achaneana eta máechajiriruva ema Viya.

¹² Étasera jena sácheana matupihairahi ema Prefecto ticaijare Galión. Aquenucahi éma tayehe eta avasare Corinto tayehehi capital eta departamento Acaya. Tiuri, ticurujicacanapa ena nacandarayarepa ema Pablo. Nacaratacapa námapa te mamirahu ema aquenuca, nametauchayarehi. ¹³ Tacahe, náichapa ema aquenuca:

—Ema maca achane macontracha eta viyeherepi. Ema máimitucavaca ena vijaneanana, náitsivachayare eta véjirairaya ema Viya —náichapa.

¹⁴ Téchajiuchavayarepaini ema Pablo, émasera ema Galión macachuricapa. Máichapa ena israelítana:

—Tiuri, esamanuchaha éti. Te tíñehhipuca eta máejecapiravahi ema maca, ticaparecahipuca, núti apana nímisipavahini juésenuinahini eta eyehe eta nusamirahénahini. ¹⁵ Étasera échájirirucavánachucha te máijare ema mácani apana, etapa eta eyeherepiana éti. Tájina táíñehicaréna eta juca. Vahi nímisipavaimahi núti, juésenuinahini tayehe eta juca. Ímahainepa éti —máichapa.

¹⁶ Tacahe, máevatacavacapa náuchuca te mamirahu.

¹⁷ Tacahe, namutu ena apavasanana griégoana nacaratacapa ema Sóstenes, nacapitarahi ena israelítana. Náestacapa te mamirahu ema Prefecto Galión. Émasera váhiquene máimisiapavahini. Váhivare macatiuchahini. Ema Pablo tichavapa tayehe eta Antioquía

¹⁸ Tiyerehichaha eta jena sácheana manasirarichaha ema Pablo. Te ticaicutiaravapa, mavarahapa tiyanaya eta te Jerusalén, tétavajisirayarepahi eta te avasare Efeso, etapa te avasare Tiro, táunavahi eta Siria. Tásiha, ticametavapa nayehe ena machamuriana.

Macachanevacapaipa ema Aquila ésupa esu mayena Priscila. Tiyanapa tipaicana eta te puerto ticaijare Cencrea. Te tiánuecanayarepa, ema Pablo ticachucasinumapa títahisinumapa eta machuti, máitachirayarehi eta mayehe promesa. Te títecapanapa te avasare Efeso, nanasihayarehi ema Aquila ésupa esu Priscila. Te jena sache sávaru, tiyanapa ema Pablo tayehe eta náurujisirareva ena israelítana. Téchajiricavaipa nayehe, máimitusiravacahi éna. ²⁰ Tacahe, éna navarahapa náiminasicha, émasera vahi máisapavahini. ²¹ Téhesera te ticametavapa nayehe, máichapa:

—Nuyanayare tayehe eta Jerusalén. Ánaqui nunarasihayare eta jena sácheana piéstairayare. Nuchavayaresera nímahapanaheyare éti, te mavaraha ema Viya tacuijaichu níchava —máichavacapa.

Tacahe, tívacuhavarepa. Majunijicapa eta Efeso.

²² Te títecapanapa ema Pablo tayehe eta avasare Censarea, tiánucuhapa tayehe eta Jerusalén. Máechajipánacapa ena machamuriana. Te táequenepa, tiyanapa te avasare Antioquía. ²³ Tiyerehi eta cájeana manasiranumahi tayehe eta avasare Antioquía. Tacahe, tíapechavavare tipaica. Máejiravacapahi ena machamuriana te jácani návihavacapahi tayehe eta avasarechichana te Galacia etapa eta Frigia. Maconsejachavacapahi ena machamuriana. Matiarahi ema Apolo te Efeso

²⁴ Te jena sácheanahi, títecapanapa te avasare Efeso ema émana israelíta ticaijare Apolo. Éma máuchurehi te avasare Alejandría. Máituca ticametarairu éma. Máimativare yátupi tamutu eta Sagrada Escritura ticaijare Antiguo Testamento. ²⁵ Mavapinahi éma tamutu, étaripa eta máechajisirana. Ema Apolo máitucachi eta máimiturapiana ema Juan Tícachasiricarahi eta máitecapirayare ema Cristo ema nacuchapaquenehi. Máechahi eta máicachasisírahi ema Juan ema Jesús, ema yátupiquenehi Cristo. Váhisera tamutuhini maecha eta máichavaquenevahi ema Jesús. Tamutu sávaruana, tiyanapa tayehe eta náurujisirareva ena israelítana. Ticametarairupa, vahi mapicacaracavahini. Ánipa macahe:

—¡Títecapaipa ema Cristo ema vicuchapaquenehi! Ema ticaijare puiti Jesús. Vétupiricavaya vimutu eta viyaniraya te Jerusalén. Ema véhicaya taicha ema viáquenuya —macahepa.

Étasera te nasamapa ema Aquila ésupa esu Priscila, námapa éma te napena. Tásiha, náimitucapa tamutu eta apamuriana téchacareana mayehe ema Jesús.

²⁷ Manasipanapa ema Apolo te jena cájeana. Tacahe, mavarahapa tiyanayare te tinapaica eta departamento Acaya. Tásiha, ena machamuriana náimicatacapa. Ticajureanapa eta carta nayehe ena nachamurianahi tayehe eta avasareana macaijuheyarehi apaesa táuri eta najacapiraina. Te títecapanapa éma tayehe eta Acaya,

ichape eta máimicatasiravaca ena machamuriana taicha ema Viya máijaracahi eta máitupajijiasiravahi. ²⁸ Máimitucahivare ena israelítana eta te náuruji-ravana. Máiminecapáequenehávacahi tayehe eta Sagrada Escritura ema Jesús émahí ema Cristo ema nacuchapaquenehi.

Títecapapa ema Pablo te avasare Efeso

19 Tiuri, manasipa ema Apolo eta te avasare Corinto. Te jena sácheana, ema Pablo tiúchucahi eta avasareana táunavanahi eta Frigia. Eta mayanipahahi te achene te márijuecuana. Tacahe, títecapapa tayehe eta avasare Efeso. Te jena avasare, natiarihihi ena apamuriana tisuapajirahianahi. Máimatívacaipa éna.

² Tacahe, mayaserecavacapa:

—¿Mávaháruhépa ema Espíritu Santo te ecáiju-héinapa ema Viya? —máichavacapa.

Tásiha, éna najicapapa:

—Váhira visamairirica eta matiarahirahi ema Espíritu Santo.

³ Mápechavare ema Pablo mayaserecavaca:

—¿Tájahasica tacayemahi eta ecaicachasirahi éti? —máichavacapa.

Éna najicapapa:

—Eta vícaicachasirahi véhicahi eta máimiturapianahi ema Juan Tícachasiricarahi —náichapa.

⁴ Ema Pablo mametacavacapa:

—Tiuri, yátupi ema Juan máicachasicavacahi ena achaneana eta náitsivachiraya eta náitaresirana. Énerichuvare, mametacavacahi eta nasuapirayare ema achane téhiequenehapahi éma. Puiti numetacahe: Ema maca téhiequenehapahi ema Juan ticaijare Jesús. Émaqueneripahi ema Cristo —máichavacapa.

⁵ Tacahe, te nasamapa eta juca, navarahapa ticaicachasiana te máijare ema Víáquenu Jesucristo. Tacahe, ema Pablo máicachasicavacapa. ⁶ Tacahe, manacapa eta mavahu te nápusiana. Tásiha, tiúcupaicapa ema Espíritu Santo, mávahácavacapa. Témunahiricavanapa apáechajirírúvána. Ticametarairuanapa eta máechajiriruva ema Viya. ⁷ Eta nasimutuvahi ena nani, dóceanahi ena ajairana.

⁸ Tamutuhi sávaruana tiyana ema Pablo te náuruji-rareva ena israelítana. Mapana caje ticametarairu nayehe ena achaneana. Vahi mapicacaracavahini eta macametarairuirahi. Macajimuyacavacahi ena achaneana, náehisiráina ema Jesús, náimatiraina eta émairahi Cristo, ema nacuchapaquenehi. ⁹ Natiarihisera ena apamuriana murácasamuréanaríchucha. Váhivare návarahahini náehicahini ema Jesús. Te jácani náurujisiravana, nacaecahirichucha eta arairu máimiturapihi ema Jesús. Tacahe, ema Pablo térajicavapa eta nayehe. Máiputsimurihapa ena tisuapajirahianahi, mámamurihapa tayehe eta colegio máimituresirarehi ema ticaijare Tirano. Tacahe, ema Pablo tímiyanavapa tímitureca tamutu sácheana nayehe ena machamuriana. ¹⁰ Apina año eta máimituresirahi. Tacahe, ena máimitureanahi tiyananapa tipaicana. Ticametarairuanapaipa eta máechajiriruva ema Viya

nayehe ena achaneana ticavasanahi eta te avasarechichana táunavanahi eta avasare Efeso, tayehehi capital eta departamento Asia. Tásiha, nasamairirícapa namutu ena achaneana: ena israelítana énapa ena apavasanana. ¹¹ Ema Viya máimicatacahi ichape ema Pablo eta máichirayare eta tíaramicareana. ¹² Ichape-muriana ena achaneana macanararuanapahi tayehe eta páñoana, camisapuca macaratajiruanapahi. Máijaracavare nacaitecapaya nayehe ena nacajumaqueneana, tásiha tacanaracapaipa. Énerichuvare táquijicapahi ena éreana.

¹³ Te jena avasare, natiarihihi ena síteana israelítana ticaparapejiricacana, machichanaveanahi ema ticaijarehi Esceva, náiyarahaini ena tiyujaracarahiana te Jerusalén. Tacahe, ena nani sítequeneana napairiruanahi. Náitucahi naveha eta itiriji. Éna, eta navehairahi eta itiriji, navarahapa éna apanava napiaracayare eta máijare ema Jesús. (Váhisera náehicahini eta máimiturapiana.) Matiarihihivare ema achane macajumaquenehi maicha ema éreana. Tacahe, te napauchapa ema macajumaquenehi, náichapa:

—Piti éreana, vivanecavi te máijare ema Jesús máechajisihauenepahi ema Pablo. Piúchucu te máquehe ema maca macajumaquene —náichapa.

¹⁵ Tásiha, ema éreana majicapapa:

—Nímati ema Jesús, émapa ema Pablo. Étisera vahi nímatihe. ¿Nájahahepuca? ¡Ásajipucaini nusuapaheni! —máichapa.

¹⁶ Tacahe, ema achane mávaháruhi ema éreana majunauchavacapa éna. Máehavacapa máquipapaicavacapa namutu ena sítequeneana. Tiyananapa tijnana, najunijicapa eta mapena ema macajumaquene. Mamuiriareanapaipa, ticajaranapaipa. ¹⁷ Tásiha, téchacarehi eta juca nayehe namutu ena ticavasanahi tayehe eta avasare Efeso, énaripa ena israelítana. Te nasamairirícapa, tipicanarinehi. Tásiha, nacahepa:

—Tétavicavapa tamutuíra tarataha eta máijare ema Jesús, náquenu ena nani —nacahepa.

¹⁸ Tacahe, ena téhicanapaipa ema Jesús, te náurujisiravana te tiyujaracana, timetaurecavanapaipa tamutu eta náejecapiravana eta náitaresirahi. ¹⁹ Natiarihi ena apamuriana ticaratacanahi eta iápemarecare. Námapavacapaipa eta náitucaqueneanaini nasiñarajianainihi, nayehepuca libro. Náijuquechavacapaipa te namirahu ena nachamuriana. Vaipa nacatiequenehapahini. Natupaequenehapasera eta tavachanahi te navacharecainapa tacapayacahi eta 250,000. ²⁰ Tacahe, ichape eta nasuapira ena achaneana eta máechajiriruva ema Viya. Camurianapaipa ena téhicanapahi.

²¹ Te táequenepa eta juca, ema Pablo macahepa:

—Nuvarahapa néjirapanaya ena vichamuriana ticavasana te Macedonia énapa ena apamuriana ticavasana te Acaya. Tásiha, nánucuhayare te Jerusalén. Te tamutupa eta juca, nuyaninavarepa te Roma —macahepa.

²² Tacahe, máevatacavacapa náinapuca ena apinana machamuriana ema Timoteo émapa ema Erasto.

Tiyananapa tayehe eta Macedonia. Émasera manasi-panarichaha tayehe eta Efeso.

Tisemamurianapa ena achaneana te avasare Efeso

²³ Tacahe, te jena sácheanahi, tisemamurianapa ena apamuriana achaneana taicha camurianapa ena téhicanapahi ema Viáquenu Jesús. Áni tacahehi eta nasemirahi. ²⁴ Matiarihahi ema achane ticaijare Demetrio. Ema maca achane, máepiyacahi eta suyehe trónochicha esu nasiñaraji ticaijaru Diana. Ticutihahi eta pétichicha eta táimahi eta templo suávihihi ésu. Amairihahi plata. Tiúrihi eta maganasesira éma, énapa ena apamuriana plateroana macutiqueneanahi. ²⁵ Tacahe, macurujicapa ena apamuriana plateroana. Tásiha, máichavacapa:

—Tátanaveana, éti ímatihahi eta juca vématanerepihi, tiúrihi eta viganasesira. ²⁶ Ímharichuhi puiti éti, esamahivare ema maca Pablo macahehi eta máechajiruvahi ena nani visiñarajiana vépiyaruana viti achaneana váhiji yátupinahini vénainahini. Ichapemurianaripa ena tisuapanahi, taicha nasamaripa eta máimiturapiana namutuyareni ena achaneana ticavasanahi te juca viávasa Efeso, énerichuhivare ena ticavasanahi eta te avasarechichana táunavana eta Asia. ²⁷ Ticauyayacarehi eta juca. Táemitiequenehahini eta juca táurivahi eta viganasesira. Étaripa eta templo suávihihi esu súrinaquene visiñaraji Diana témitiequenehapuca, nacuijapapuca nacuechahi. Náemitisicáinapapúca eta táurivainihi eta náejirairahi namutu ena achaneana te juca apaquehe —máichavacapa.

²⁸ Tacahe, eta nasamirahi ena apamuriana, tisemanarinehi, tipiaracanapa. Ánipa nacahe:

—¡Viva esu Diana visiñaraji viti efesioana! —nacahepa.

²⁹ Tacahe, tisemamurianapa ena apamuriana achaneana. Apanapa eta napanerecha. Tiuri, natiarihahi ema Gayo émapa ema Aristarco, macompañeroana ema Pablo náuchureanahi eta te avasare Macedonia. Tacahe, ena achaneana nacaratacapa ena nani apinana. Námapa tayehe eta náurujisirávea. ³⁰ Émapa ema Pablo mavarahapa masiápamuriháyahéhi máechajicavacayarehi, énasera ena machamuriana vahi náisapahini. ³¹ Natiarivare ena apamuriana, tuparairucanahi tayehe eta departamento Asia, mayeaneanahi amigo ema Pablo. Nacametarapipa vahi macuímisipava. ³² Tacahe, eta náurujisirávahi tijajamurihanahi. Ema émana tipiaracahi, apanahi eta macayema. Ema apana, énerichuvare tipiaracahivare apanahivare eta macayema. Namutuyareni ena achaneana apápipijivácachucha eta nacayemaqueneana. Vahi náimatiequenehahini tájahapuca tacayemahi eta náurujisirávahi. ³³ Tacahe, ena apamuriana israelítana náichuhapa ema Alejandro. Nametacapa eta táicharacávahi eta náurujisirávahi. Tacahe, navanecapa téchajica, maconsejachavacayarehi ena achaneana. Tásiha, ema titupihapa te nami-rahú. Máimicutiarachapa te mavahu namatinachaha. ³⁴ Tásiha, náimativanepa ema émarichuhi israelítahi.

Tépanavanavarepa tipiaracana. Apina hora nacahe eta napiarareresirahi:

—¡Viva esu Diana visiñaraji viti efesioana! —nacahepa.

³⁵ Tacahe, títecapanecha ema tayehehi alcalde eta avasare. Macamatinaacavacapa. Tásiha, téchajicapa. Ánipa macahe:

—Tátanaveana, mémenaveana. Emutu eti tachichanaveana eta juca viávasa Efeso. Nájina émanáina achane vahi macuechahini eta véchapajirisira vimutu eta templo suávihihi esu súrinaquene visiñaraji Diana, esu sucapicahuquenehi taicha eta juca mari suáquehehi ánaquiaparipa eta táemirisirahi te anuma. ³⁶ Nájina tépuruina eta juca. Ésamiricavachucha. Vahi ecuijajahuchava. Epanerechinava te tiúriyarepuca. ³⁷ Taicha ena nani ajairana ímaqueneanapahi, tájina natapiravainahini. Vahi nacaecahi esu visiñaraji, váhivare námeyecha ésu eta suyereruvana. ³⁸ Tiuri puiti, ema Demetrio, énapa ena machamuriana, te navarahapuca timetaurecana, nararihi ena juéseana. Nacaunehi nácani timetaurecanaya. Táuchusihayare eta natapiravana. ³⁹ Téheserapuca apana jácani evarahaquene, ticaechacasiyarehi te reunión tásihaqueneharehi viyehé viti tuparairucana. ⁴⁰ Tíñehicare eta juca íchaquenehi. Náimijachaipa ena achaneana víchahi eta revolución puiti jena sache. Tijuricati natiarivi tiyaserecavíanaya eta táicharacavahi eta juca. Tájina viviya-vaimahi —macahepa ema alcalde.

⁴¹ Te tamutupa eta máechajisirahi, mavanecapa téjanerecana ena achaneana. Títavapa eta náurujisirávahi. Tacahe, téjanerecanapa ena achaneana, tamutupa eta nasemirahi.

Tiyanavare ema Pablo te departamento Macedonia etapa te Acaya

20 Tacahe, te táequenepa eta jácani sácheana, ema Pablo máichuhavacapa ena machamuriana, maconsejachavacapa. Tásiha, ticametavapa nayehe. Tiyanapa tiánueca macaijuhepa eta te departamento Macedonia. ² Máejiravacapaipa namutu ena machamuriana ticavasanapahi te avasarechichana. Máetumechavácapahi éna eta maconsejachiravacapahi, máitecapirapa tayehe eta avasare Corinto, táunavahi eta departamento Grecia (ticaijarehivare Acaya). ³ Ánaqui manasipanapa tayehe, mapana caje eta mávihairahi. Tásiha, mapanerechaipa tiávachuhaya te pacure eta mánuesirayare macaijuheraya eta te Siria. Étasera te máechapa eta navarairahi nacapaca ena israelítana mánarana, téquecavapa eta mapanere-ru. Tiyanapa tipaica tichavapa tayehe eta Macedonia eta mávacuíyayarehi. ⁴ Eta machavirapa, náehicapa ena machamuriana ema ticaijare Sopater ticavasahi te Berea, ema Aristarco émapa ema Segundo ticavasanahi te Tesalónica, ema Gayo ticavasahi te Derbe. Máehicavare ema Timoteo. Natiarivare ema Tíquico émapa ema Trófimo ticavasanahi te tinapaica eta Asia. ⁵ Tacahe, títecapanapa te Filipos, návihahi nútí. Tacahe, ena siétequeneana vichamuriana títapucanapa

tiyanana tiánuecanapa, nacaijuhepa eta apana puerto ticaijare Troas. Ánaquipa nacuchapihavihi. ⁶ Tásiha víti, te táequenepa eta Pascua vinisirahi eta pan mayehere levadura, vipaenumavapa viúchuca tayehe eta Filipos. Viávacuhapa viyanapa. Cinco sache eta viánuesira. Vicápayamuríhapa te Troas. Vinasipanapa tayehe, siete sache vicahe.

Máejirapa ema Pablo ena machamuriana ticavasanihi te Troas

⁷ Te jena tínapuca sáche tayehe eta semana, tiúrujicavanapa ena vichamuriana. Viyuvetucayare, vinicayare eta pan táicutiarahi eta máepenirahi ema Viáquenu Jesucristo. Tacahe, ema Pablo maconsejachavacapa jena yati, taicha tiúchucayarehi te jena yáticarahi. Tiúnahi eta máechajisirávacahi. Te énumuhupa yati tímiyanavaríchaha téchajica. ⁸ Eta viúrujisirávahi te anuquehe peti te mapanaquene piso. Tatiarihihi camuri eta namicahuana. ⁹ Matiarhihi ema émana amaperu ticaijare Eutico. Téjacahi éma eta te ventana. Tacahe, eta táunavahi eta máechajisirahi ema Pablo, ema amaperu téyucaipahi. Eta máimasirahi, tiáquipaicavapa te anuquehe ventana. Tacahe éna, tiúcupaicavaneánapa nacáechepupánayarehi. Éma tépenaripahi. ¹⁰ Tacahe, ema Pablo tiúcupaicapa, mapauchapa ema amaperu. Mayuratanauchapa majupahacapa. Tacahe, máichapa ena machamuriana:

—Vahi ecueñamava. Tichavayare títareca —máichapa.

Jéhesaréinehi, tichavapa títareca ema amaperu. ¹¹ Tacahe, tichavanavare tiápanana te náurujsiávahi. Tacahe, tinicanapa. Tásiha, ema Pablo tijárahíacaráchaha eta máechajirisiravacahi. Te títapiricapa, tiyanapa. ¹² Tacahe, te téjanerecanapa, námapa ema amaperu máitareruhi. Ichape eta náurismurevapahi.

Tiúchucanapa tayehe eta Troas, nacaijuhepa te Mileto

¹³ Viti viávacuharipa, viyanapa vicainapucavahi tayehe eta apanavare puerto Asón eta mávacuiyarehi ema Pablo, taicha ichape eta táepiñu. Émasera ema Pablo tipaicayarehi tímitupiruchavapa. ¹⁴ Te vítecapapa te Asón, tiávacuhapa éma. Tacahe, viyanapa vicaijuhehi eta apanavare puerto Mitilene. ¹⁵ Te apanapa sache viúchucavarepa tayehe, viánucuhapa te tachacaya eta tiúrupuhi ticaijarehi Quío. Te apanavarepa sache, vítecapapa te apanavare tiúrupuhi ticaijarehi Samos. Víchecapa tayehe, vinaracanumapa eta te puerto ticaijarehi Trogilio. Te apanapa sache viyanavarepa, vítecapapa te puerto ticaijarehi Mileto. ¹⁶ Vaípa vétavajicahini te Efeso, taicha ema Pablo vaípa mávarahahini váyereréjipahini eta vipaisirapahi te táunavahi te Asia. Taicha mavarahahi títecapavaneyare te Jerusalén, eta máimaiyayarehi eta napiestara ticaijare Pentecostés. Éta tiámahaviyare te viratavayarepuca.

Eta maconsejachira ema Pablo nayehe ena náiyarahana pastoreana ticavasana te Efeso

¹⁷ Etasera eta viávihairahi te Mileto, ema Pablo máimichuhavacapa ena náiyarahana pastoreana tayehe eta avasare te Efeso. ¹⁸ Te títecanapa éna, majacavacapa. Tásiha, tépanavapa máechajiricavaca, máichavaca:

—Éti ímatinuhi táichararacavahi eta nítaresirahi eta jena sácheana te nítecapauchahénapa. Tájina níchahini níti eta nuyechiravana. ¹⁹ Tájnavare vahi népiyacavahini aquenucanuinahini eta eyehe. Nucaemata-neacahi ema Viáquenu. Vahi nusemaimahi tayehe tamutu eta níchavaquenévanahi naicha ena nujaneanana israelítana, navarairahi títaequenehanuana. Tasapiha ticaiyacanu naicha eta namásuapajirávana.

²⁰ Tamutu numetacahehi eta táuriqueneana tiúrichaheyare éti apanava. Nímitucahehi te jácani viúrujisirávana éta te epenana. ²¹ Nuconsejachahivare namutu ena achaneana, eta náeneuchiravaina me Viya, eta náitsivachiraina eta náitaresirana, éta te nasuapiraina nacasiñairaina ema Viáquenu Jesucristo.

²² Puítisera nuyaninapa te Jerusalén. Taicha nuvanecasisvahi mayehe ema Espíritu Santo. Vahi necha níti tájahapuca nícharacavaya eta ánaqui. ²³ Tacarichu necha eta mametasiranuana ema Espíritu Santo. Tamutu eta avasareana nupaisihanapahi, timetacanupahi éma eta nucatajivairaya, napresuchiranuya te cárcel te Jerusalén. ²⁴ Tájinasera vahi nupicacava. Tayanapanéine népenapuca, vahi néñama eta nítaresira. Nuvamaha nímiyanavaya eta núrivahi mayehe ema Viya. Nuvapinavahi eta nítauchiraya eta nutuparacasivahi mayehe ema Viáquenu Jesucristo. Taicha éma tituparacanihi nucametairuya eta máemunasirahavihi ema Viya vimutu viti achaneana.

²⁵ Numetacahe: Puiti juca nuyaniraya, vaípa iápechavaimahi ímahanu. Eti ínapureanahi nímitureanahi emutu éti te iávasanapachuhi. Nímitucahehi tamutu eta véhisiraya ema Viáquenu Jesucristo. ²⁶ Eta tacahe, numetacahe puiti: Vaípa nútiparacáina te natiarihinapuca téjecapavanaya te etaracu éti. ²⁷ Tamutuhi numetacahe eta mavarahaqueneana ema Viya. Tájina vahi nuyumurupicahini. ²⁸ Tiuri puiti, ejaneacavayare éti, énerichuvare ejaneacayare ena iúmurivana taicha etuparahaipa mayehe ema Espíritu Santo eta ejaneasirayare ena manerejiruanahi ema Viáquenu, énavenehi tépenahi éma, máepusaicahi eta máítine.

²⁹ Ecaunevaicha muraca, taicha puiti juca nujunijisiraheya, tijuricati títecanaya ena navarahaya témejecapávachaheánaya. Navarahaya ticajanerecaheanaya tacutiyare eta chuye tinicarahi te tacajanereca eta varayuana. ³⁰ Énaparichu ena vichamuriana te etaracu, natiarihiyare ena tímiturecanaya nahapapicayare témejecapávachanaya ena nácani apamuriana vichamuriana, navarairainahi éhicayare eta napaneruana. ³¹ Tásiha, ecaunevaicha yátupina. Échavayare eta mapanaquene año eta nutiarahirahi eyehe. Tamutu sácheana, yátiana nuconsejachahehi, émana-

pachuhi numetaca. Níyahasamurehi taicha eta ní-mairahehi.

³² Puítiserá, nuparapenaveana, nuyanainapa. Nuyáseuchahéyareséra me Viya eta majaneasiraheya. Ecaravahuirainapa yátupina eta máechajiriruvana ema Viya. Túmeheyarepaipa táicha. Ema Viya mavarahahi ímijuruchayare eta juca máechajiriruva; taicha mavaraha tíjaracaheya eta ícuchianahi te anuma eta iávihayare, ecachaneraya ena apamuriana masántu-chaqueneánarípa. ³³ Eta návihairahi eyehe, vahi nujamurachahini eta emuirihana étaripa eta plata íjaracunuhini.

³⁴ Ímararacunuhí éti eta táichararacavahi eta nucaematanera. Nucaematanehi tiásihanahi te nuvahuana, nuviyahi eta nucamunuqueneana, énapa ena tímicitacacuanahi. ³⁵ Tamutu nímitucahehi tacaheyare eta vicáematanéraya, vímicatasirayareva ena ticamunuvana, nacajumaqueneana. Véchavayare tativa eta máechajiriruvahi ema Viáquenu Jesucristo, ani macahehi: “Viúripanaya me Viya, te vicajirica eta vímahaqueneana nayehe ena apamuriana. Vahi vícuja-muracha náijaracasichahavi” macahepa.

³⁶ Te tamutupa eta juca maconsejachiravacahi ema Pablo, tépuyucanapa namutu. Tiyujaracapa mayaseuchavacapa me Viya. ³⁷ Tásiha, tíyahanapa namutu, najupacapa náetserarecapa ema Pablo. ³⁸ Típanererecanaipa taicha eta mametasiravacahi váipa tiápechavanaimahi náimaha éma. Tásiha, tiyananapa nana-pana eta te mávacuiyayarehi.

Eta viyanirapa eta te Jerusalén

21 Te vijunijicapa ena vichamuriana, viávacuhapa viyanapa vitupiruruchapaipa eta tiúrupuhi ticaijare Cos. Te apanapa sache vicaijuhepa eta tiúrupuhi ticaijare Rodas. Te apanavarepa sache viánucuhavarepa eta puerto ticaijare Pátara. ² Éta vicainunainehi eta apana pacure tiyanayarehi tayehe eta apachara apanavare departamento Siria. Tacahe, viávacuhapa tayehe, viyanapa. ³ Eta vipaisirapahi, viánu-cuhapa eta tiúrupuhi Chipre tanapaicapahi te sapa eta viyehe. Vímiyanavachucha vipaica vítecapira te puerto ticaijarehi Tiro tayehe eta Siria. Taicha eta pacure véhirupahi tanaquicayarehi eta carga támaquenepahi tayehe eta puerto. ⁴ Éta vicainunainehi ena apamuriana vichamuriana. Vinasipanapa nayehe, siete sache vicahe. Te juca, ema Espíritu Santo mametacavacahi ena vichamuriana eta máichavayare ema Pablo te Jerusalén. Tacahe, nametacapa ema Pablo eta vahi macuítécapa te Jerusalén. ⁵ Téhesera tiúchucayarepa eta pacure véhirupahi, viyanapa te puerto. Téhicahavianapa namutu ena vichamurianahi, énapa ena nayanana énapa ena nachichanaveana. Tinapanahavianapa te pacure. Te vítecapapa te playa, vépuyucapa vimutu, viyujaracapa. ⁶ Te tamutupa, vémamavauchavacapa vicametavapa eta nayehe, viávacuhapa. Tásiha, tichavanapa éna te napenana.

⁷ Eta viásihairahi te Tiro, vítecapapa te Tolemaida. Éta paénasihahi eta vipaisirahi te une. Viyanapa

véchajicavacahi ena vichamuriana. Vinasipa étana sache eta nayehe. ⁸ Te apanaquenepa sache viyanapa vicaijuhepa eta avasare Cesarea. Te vítecapapa, viyanapa te mapena ema Felipe ema ticametarairurahi, ema nasietenehi ena nanerejiruanahi téchapa-jiricanahi eta nirureana nayeheana ena máimaruana. Vinasipa eta mayehe. ⁹ Ema Felipe, natiarihi ena cuátroana machichanaveana esenana, máimaruana-richaha. Ena nani máijaracahi ema Viya eta náitusirahi ticametairuana. ¹⁰ Eta jena sácheana viávihairahi mayehe ema Felipe, títecapapa ema émana profeta ticaijarehi Agabo. Éma tiásihahi te Judea. ¹¹ Títecapauchahavipa tímahapanahaviyarehi. Tacahe, mayaseacapa eta máitijuhe ema Pablo. Tásiha, títiapechavapa, éta pa eta mavahuana. Tásiha, macahepa:

—Ema Espíritu Santo ani macahehi eta máechajiriruvahi: “Ena vijaneanana te Jerusalén nacaratacayare ema ticayehe eta juca itijuere. Náitiacaya, náijararecayareva nayehe ena apavasanana” —macahepa ema Agabo.

¹² Tacahe, vimutu viti, énapa ena ticavasanahi tayehe, viyaseacapa ema Pablo eta vahi macuyana te Jerusalén. ¹³ Émasera ema Pablo máichahavipa:

—¿Tájaha tacayema ímipanererecanu eta juca íyáuchiranuhi? Vahi nupica te náiticanupuca. Núti níjaracava népena te Jerusalén máichavenénahi ema Viáquenu Jesucristo —máichapa.

¹⁴ Te vímahapa vahi váratahahini víchejica, vísapapa tiyana. Vicahepa:

—Énenarinepuca tácahe, máimahavirinepa ema Viya —vicahepa.

¹⁵ Te tamutupa, vétupiricavapa. Viyanapa te Jerusalén. ¹⁶ Téhicahavianapa ena vichamuriana ticavasanahi te Cesarea. Téhicahavipahivare ema vichamuri ticaijare Nasón. Ánaquiripahi eta máehisirahi ema Jesús. Éma, máuchurehi eta te tiúrupuhi Chipre. Tatiarihisera eta mapena te Jerusalén, eta vítecapihayarehi.

Ema Pablo máejirapanapa ema Santiago

¹⁷ Te vítecapapa te Jerusalén, ena vichamuriana tiúrisamureanaríne eta najacapirahavihi. ¹⁸ Te apanapa sache ema Pablo tiámahavipa, viúrujicavayarehi te mapena ema Santiago. Vichimapapa natiarihipa namutu ena víyahana pastoreana. ¹⁹ Tacahe, ema Pablo máechajicavacapa éna. Mametacavacapa tamutu eta máimicatasirapahi ema Viya eta macametarairuirapahi nayehe ena apavasanana éta pa eta máichirapahi eta tiáramicareana.

²⁰ Te nasamapa ena mametaruanahi, nacunacharinehi ema Viya. Tacahe, náichapa ema Pablo:

—Tétavicavapa táuriva eta juca pimetarapiana. Pímahapasera natiarihihira ena camuriqueneana ena vijaneanana téhicanahi ema Jesús. Énaserá, muracuqueneanahi religiósoanahi, téhicanahi eta mayeherepini ema Moisés. ²¹ Puiti, jucarihi eta pépiyaequenehi eta pihápapicahíji eta pímitusiravacahi ena vijaneanana ticavasanahi te avasareana estranjeroana.

Pímitucavacahiji eta váhiji nacusuapa eta mavanairipiana ema Moisés, váhivaréji nacumarcacha ena nachichanaveana ajairana, váhivaréji nacuehica eta viyeherepiana. ²² ¿Tájahapuca tácharacava eta juca? Tijuricati ena achaneana tiúrujicavanainapa, te nasamairiricapa eta pitirahirahi. ²³ Tiúripiana eta juca píchayare. Nararihi te juca vitaracu ena cuátroana ajairana. Títáuchanapáipa eta nayehe promesa. ²⁴ Pisipahacavaya, piámamuriha éna eta pímeresiravaya tayehe eta Templo. Pivachachinaya eta uvesa navehaqueneana apaesa éna náisapava nacachucasi eta nachutimacana. Eta táicutiarayare eta vahi yátupinahi eta pépiyaequenehi, apaesa náimahavi eta pipicauchirahi eta mavanairipiana ema Moisés. ²⁵ Énaserá ena vichamuriana apavasanana, vímiamarecaripa eta vicartane. Náecharipa eta vaipa étaparacáinahíni nayehe eta juca. Tacarichu vahi nacunica eta taeche eta sárare nayujareuhi te tamirahu eta nasiñarajiana, váhivare nacunica eta táitine eta sárareana, váhivare nacunica eta taeche eta sárare namaechatinure. Énerichuvare vahi nacuveha esu súcaini apana esena. Énaripa ena amaperuana, tacuija eta natuhusivaina —náichapa ena pastoreana.

Nacaratacapa ema Pablo eta te Templo

²⁶ Tacahe, ema Pablo tísapavapa. Te apanaquenepa sache, tisipahacavapa, énapa ena cuátroqueneana ajairana. Mámavacapa, tiyananapa te Templo. Nametapanayarehi ena téchapajicarahiana eta Templo, semanayareipahi eta nanaquisiravayare eta námavahuana. ²⁷ Tacahe, te náitauchapa eta siete sache eta nasipahasiravahi, tichavanapa te Templo. Te jena sache, natiarihipavare ena apamuriana najaneanana tiásihanahi te tinapaica eta Asia. Eta mávihairarichaha ema Pablo te Templo, náimahapa éma. Tacahe, náimiyusemacapa namutu ena achaneana. Nacaratacapa ema Pablo. ²⁸ Tipiaracanapa:

—¡Tátanaveana israelítana! ¡Yare, ímicatacavahi! Émara ema maca achane ema tipaichahi tamutu avasareana. Tímiturecapahi nayehe ena achaneana eta macontrachirahi eta viávasa. Énerichuvare macatianacahi eta mayeherepi ema Moisés, étapa eta juca viyehe Templo. Puiti macasiapavare te juca Templo ema apavasanatataji. Majararecapa eta juca tacapicahuquenehi —nacahepa.

²⁹ Ena nayunacahi eta juca, taicha náimahahi te calle ema Pablo macachanepahi ema Trófimo ticavasahi te Efeso. Náimijachahi mámahi ema Pablo te tajuhe eta Templo.

³⁰ Tacahe, tijúnapacarajíanapáipa namutu ena achaneana te tajuhe eta avasare. Ena ticatianacanahi ema Pablo nacaratacapa éma, nachururupaicapaipa eta nacuchisirahi tayehe eta Templo. Tacahe, ena apamuriana náeratacavanepa eta tapajacura eta Templo. ³¹ Navarahapa nacapacavaneyarehini. Masámairicavánepaséra ema comandante nayehe ena suntaruana, tatiarahirahi eta revolución te tajuhe eta avasare.

³² Tacahe, ema comandante máichuhapa ena

masuntarurana énapa ena oficialeana. Tiyananapa tijunapanapaipa. Ena achaneana, te náimahapa eta máitecapauchirahi ema comandante, náinajicapa eta náehairahi ema Pablo. ³³ Tacahe, ema comandante mapauchapa ema Pablo, macavanairipipa nacaratataca, náitiacapa te apiipi cadena. Tásiha, mayaserecapa te nájahahipuca, tájahapuca maviurevahi. ³⁴ Énaserá ena achaneana tipiaracanarichucha, apapijijipa eta nacayema. Vaipa mácaicutiarahini ema comandante tájahapuca eta nacayemahi taicha eta najajasirahi. Tásiha, macavanairipipa náma te cuartel. ³⁵ Ticajerahisera eta nápanirapaipa te tayehe grada eta cuartel. Nanaracuhapa ema Pablo, taicha ena achaneana navarahaichucha nacapacavane. ³⁶ Taicha namutu náehicapahi tipiaracanapaipa:

—Máepenávanetataji —nacahepa.

³⁷ Te tisiapanayarepa te tajuhe te cuartel, ema Pablo máichapa ema comandante:

—¿Písapanupuca néchajica?

Tacahe, ema comandante majicapapa:

—¡Jéhepuca, píti pítuca péchajica te véchajiriruva griego! ³⁸ Tacahe, ¿váhiyara píatina ema ticavasa te Egipto, ema tíchahi eta revolución ticaeteharecahi cape juca viásinequenehi, ema majunaquenehi tiámamurihahi te mávapahi ena cuatro mílqueneana ticapahiana? —máichapa.

³⁹ Tacahe, ema Pablo máichapa:

—Vahi nútina, tata. Nútirichu israelítanu. Eta núchusine te Tarso. Tavanaranu eta ichape avasare capital te Cilicia. Picatajicanusera písapanu néchajicaya nayehe ena achaneana —máichapa.

Téchajicapa ema Pablo te namirahu ena achaneana

⁴⁰ Tacahe, ema comandante máisapapa téchajica. Titupihapa ema Pablo te tayehe grada eta cuartel. Tacahe, macanunquechapa eta mavahu, macamatinacapa ena achaneana. Te timatinanapa, tépanavapa téchajica eta náechajiriruva ena majaneanana, ánipa macahe:

22 —Tátanaveana, nuparapenaveana. Esamanuchaha eta néchajisiraheya nucatiuchiravaya —macahepa.

² Tacahe, te nasamapa eta máechajisiravacahi te náechajiriruva, tésamirimuriávanapa ticasamarianapa. Tinahacavapa téchajica ema Pablo, máichavacapa:

³ —Nútirichu ejaneana, israelítanu. Eta núchusine te avasare Tarso tayehe capital eta Cilicia. Ánipasera nujurusinehi te juca viávasa Jerusalén. Ema tímitucanuhi ema víyacara Gamaliel. Nujuruchahi eta nupicauchirahi yátupi eta viyeherepi náijararuhavihi ena viáchucanaveanaini. Eta nítaresirahi, nímicapicáuchahi ema Viya, tacutihi puiti eta ímicapicáuchirahi éti te juca sácheana. ⁴ Eta nítaresirahi, nucatianacavacainihi ena téhicanahi ema Jesús. Nupresuchavacahi nucasiapavacahi te cárcel ena ajairana énapa ena esenana. Nímicapacavacahi éna. ⁵ Tímatinuanarichuhi namutu ena aquenucarhana émapa ema corregidor.

Taicha éna tíjaracanuanahi eta órdeno nayeheya ena vijaneanana ticavasanahi te Damasco, náimicatasiranuyare eta nucaratasiraya ena téhicanahi ema Jesús. Tacahe, nuyanapa népanavacayarehini éna, ticaemecharahianayarehi.

Emo Pablo mametacavacapa eta máehisrahiva éma apanava ema Jesús
(Hch 9.1-19; 26.12-18)

⁶ Tacahe, eta nupaisirapahi te achene, nánehiripa eta avasare Damasco. Te jena las dócequeneyárepa sache, tiáramicarepa eta tijarahi timícauchanuhi tíásiha te anuma. ⁷ Náquipaicavapa te apaquehe. Nusamapa ema téchajicanuhi, máichanupa: “Saulo, Saulo, ¿tájaha tacayema picatianacanu pipánájiricanu?” ⁸ Tacahe, nuyaserecapa: “¿Nájahavi piti tata?” níchapa. Tásiha, tijicapana: “Nuti Jesús Nazareno, nuti picatianaruhi, eta pipánájirisiravaca ena téhicanuanahi” máichanupa. ⁹ Énerichuvare ena téhicanuanapahi náimahahi eta tijarahi timícauchanuhi. Tiáramecanarinehivare éna apanava. Váhisera nácaicutiarahini ema téchajicanuhi. ¹⁰ Tacahe, nujiicapapa núti: “¿Tájahasica níchayare, Tata?” Tásiha, ema Viya máichanupa: “Pécheputa, piyana pítecapa te avasare Damasco. Ánaqui mararihi ema timetacaviyare tamutu eta pématanerepiyare pítauchaquenéyare nuyehé” máichanupa. ¹¹ Tásiha, púchuquinupa taicha eta tijarahi. Tacahe, ena nucompañeroanapahi tiámanuanapa tichurucanuanapaipa te nuvahu, nacaitecapiranupa te avasare Damasco. ¹² Eta ánaqui, matiarahihi ema émana vijaneanana ticavasanahi te Damasco nacunachahi éma. ¹³ Títecapa ema Ananías, tímahapananuhi. Te títecapauchaupa, máichanupa: “Nuparape Saulo, tachava eta pímairisira”. Tacahe, tíjahúchavapa nímairisira. Nímahapa éma. ¹⁴ Tacahe, máichanupa éma: “Ema Viya nacasiñaquenehi ena viáchucanaveánaini, píti manerejiruvihi taicha mavarahahi tímimatichaviya eta mapanereru. Énerichuvare mavarahapa tímimatichavi ema máuriquene Cristo, émaquenehi téchajicavihi eta cape. ¹⁵ Péchajisihayare éma eta picametarairuyare nayehe namutu ena achaneana picainunaque-neanaya. Pimetacayare eta juca pímairahi étapa eta pisamirahi éma. ¹⁶ Tiuri puiti, enevane picaicachasiya te máijare ema Viáquenu Jesucristo. Picasíñava mayehe eta tacasiparaya eta pipecaturana” máichanupa ema Ananías.

Emo Pablo mametacavacapa eta macavanahirahi nayehe ena apavasanana

¹⁷ Tásiha, te nuchavapa ani te Jerusalén, nítecapa ani te juca Templo. Te nuyujaracaipa, tíapechanuvarepa téchajicanu ema Viya. ¹⁸ Eta nímairahi éma, máichanupa: “Piyayauchavayare eta piúchusiraya te juca Jerusalén, taicha vahi tisuapavianaimahi eta péchajisiháiranuya”. ¹⁹ Tacahe, núti níchapa: “Tiuri, Tata. Énasera, tímatinuanahi eta néstarasiravacahi nupresu-

chiravacahi eta téhicavianahi. Tamutuhi te náurujisirarevana nutanusihavacapahi éna. ²⁰ Énerichuvare, te nacapacapa ema Esteban ema pivanarainihi, nutiarihihivare. Nímicatadahivare ena ticapacanahi, nujaneasiravacahi eta namuirihana. Tijuricatipuca nasamara-racanu eta numetasiravaca eta péchajisiranuhi” níchapa. ²¹ Émasera ema Viáquenu tipamicanuichucha: “Piyanyaresera. Núti nuvanecavi pipaicyare nayehe ena apavasanana ticavasanahi te tayerehiqueneana” máichanupa.

²² Tacahe, ena achaneana, eta nasamirahi eta juca, vaipa návarahahini nasamararaca. Tisemanapaicha. Típiaracanapa:
—Tiúripana máepenachucha ema maca achanetataji. Vaipa táurichahini máitarecaríchahahini —nacahepa ena mánarana ema Pablo.

Emo comandante macasiapapa te tajuhe ema Pablo

²³ Muracapanapa eta napiarasira. Tivejamuhiacavanapa eta nacamisana eta nasemaneva. Navehavare eta máteji. Náevajasicapa ema Pablo. ²⁴ Tacahe, ema comandante macavanairipipa nacasiapa ema Pablo te tajuhe eta cuartel. Macavanairipivare náestaca, mavarairahi máimicaecherachaya ema Pablo eta maviurevahi, tájahapuca tacayemahi eta nasemirahi ena achaneana eta mayehe. ²⁵ Étasera te náitiacayarepa eta náestasirayarehi, téchajiuchavanumapa ema Pablo eta mayehe ema nacapitara ena suntaruana. Máichapa:

—Núti tavanaranuhi eta viávasa Roma. Picunevachucha, machu péjecapava eta péstasiranu, vuícha-táimaticarehini eta nutapiravapuca —máichapa.

²⁶ Te masamapa ema nacapitara eta juca, tiyanapa mametaca ema comandante. Máichapa:

—Péchapavachucha eta pivarairahi pémostareca ema maena achane. Taicha tavanaráji eta Roma —macahepa ema nacapitara.

²⁷ Tacahe, ema comandante tiyanapa mapauchahi ema Pablo. Máichapa:

—¿Yátupisaréji tavanaravi eta Roma? —macahepa.

Emo Pablo majicapapa:

—Yátupi —máichapa.

²⁸ Tásiha, macahepa ema comandante:

—Núti, ichapemuri plata náquijica eta nusiapirayare eta tavanaranuirayare eta Roma. Píti, ¿tájahapuca eta pítujisiravahi eta pisiapirahi? —máichapa.

Emo Pablo máichavarepa:

—Núti tavanaranuhi eta Roma taicha étarichuvare náuchusinehi ena ticachichanuana —máichapa.

²⁹ Tacahe, térajicavanapa ena téstacanayarehini ema Pablo. Émaripa ema comandante, te máechapa eta tavanarairahi eta Roma, típicarinehi eta máitiasirahi.

Emo Pablo námapa te namirahu ena aquenucarahana

³⁰ Te apanapa sache, ema comandante mavarahapa máechayare tájahapuca eta maviurevahi ema Pablo

eta nayehe ena majaneanana. Mavejapuacapa eta cadenana máitihanahi. Macurujicapa eta corregidor énapa ena aquenucarahana. Tiyanapa mámahí ema Pablo, macatupihapa te namirahu.

23 Tacahe, ema Pablo máesenimurihapa ena aquenucarahana, máichavacapa:

—Nuparapenaveana. Núti eta nítaresirahi puíticha juca nucahehi, tájina níchiraváinahi eta nusamiravahi te mamirahu ema Viya —macahepa.

² Ema corregidor Ananías, tise mapa eta masamirahi eta máechajiriruvana ema Pablo. Macavanairipipa ena titupihanahi te machacaya ema Pablo. Máichapa:

—¡Ésapajacacha ema mácatátaji!

³ Émasera ema Pablo majicapapa:

—¡Pítira téhaviyare ema Viya, táichavene eta apimirairavi! Te juésvihipuca píti eta péjasirahi eta te jara, tatuparacavi pímatinuma te tatiarhipuca eta néjeca-pirava apaesa pémehanu. ¿Tájaha tacayema eta juca pivanairipihí? —máichapa.

⁴ Ena apamuriana achaneana natiarhiqueneanahi náichapa ema Pablo:

—¿Tájaha tacayema piácapaemacha ema corregidor, macapicahuquenehi tiyujaracarahi mayehe ema Viya? —náichapa.

⁵ Ema Pablo majicapapa:

—Tátanaveana, eperdonachanu. Vahi néchahini eta émairahipuca corregidor, macapicahuquenehi tiyujaracarahi. Tájina nímatiya nucajachareca ena tuparairucana, taicha nusuapa eta máechajiriruva ema Viya. Ani tacahe: “Vahi picucajacha mácani tuparairuca tayehe eta piávasa”.

⁶ Tacahe, ema Pablo máimativacapa ena aquenucarahana, natiarhirahi ena saducéoana, énapa ena apamuriana fariséoana. Tásiha, tizaranupa eta máechajisirahi:

—Nuparapenaveana. Nútirichuvare fariséonu. Énerichuvare ena ticachichanuana fariséoanahivare. Ecatupiacanuhi te juca emirahu táichavenehi eta nucuchapirahi eta véchepusiraya te táequenenapa eta vépenira —máichavacapa.

⁷ Te nasamapa eta juca, ena fariséoana énapa ena saducéoana típutsimuríavanapa, napanerequenehapa. ⁸ (Taicha ena saducéoana, vahi nasuapa eta náechepusiraya ena náepenaqueneana; váhivare nasuapa eta natiarhirahi ena ángeleana; váhivare nasuapa eta tatiarhirahi eta náchaneva ena náepenaqueneana. Énasera ena fariséoana nasuapa tamutu eta juca.) ⁹ Tacahe, téchajicanapa muraca. Tacahe, te nataracu ena fariséoana, natiarhihi ena escribánoana. Téchepucana. Nacahepa:

—Ema maca achane, tájina matapiravaina. Éneserapuca táechajicahi eta máchaneva ema Jesús, ángelepuca mácani. Vahi vicucanara ema Viya —nacahepa.

¹⁰ Tacahe, ichape eta semanere. Tíñepipa náicha. Tacahe, ema comandante, eta máimairahi eta nase-mavahi, tipicanecha tájahapuca náicharachahini ema Pablo. Tásiha, máimichuhavanepa ena suntaruana

navehapa ema Pablo, náimijunijicapa te namirahu ena mánanarahi. Náimichavavárepa ema Pablo te cuartel.

¹¹ Tásiha, te jena yátiquenehi máechajicapa ema Viya ema Pablo, máichapa:

—Túmevinachucha, Pablo. Taicha tíurihi eta péchajisihairahi eta níjare te juca Jerusalén. Puiti piyanayare eta te Roma, éneyareichu tacaheyare eta péchajisiraya —máichapa.

Napanerechapa eta nacapasiraya ema Pablo

¹² Te apanaquenepa sache, natiarhihi ena apamuriana napanerechapa eta nacapasiraya ema Pablo. Nacahepa eta náechajiriruvahi:

—Tacamunurine máepenavane ema mácatátaji Pablo. Tásiha puiti, víti vinacaya eta juca vícutiaraya. Vuíchaha vinicaimahi, vuíchahavare véraimahi, machu vásapiha vicaicuña me Viya te vahi vicuitaucha eta juca vipanereruhi. Tiámainucava te víturucapa vicapaca ema maca, vinicapa —nacahepa.

¹³ Náetavicahipuca cuarentana ena ajairana, ena tíjaracavanahi ticaechajiriruvanahi eta juca. ¹⁴ Tacahe, tiyananavarepa nayehe ena tuparairucana. Náichapa:

—Víti víjaracavapa eta vítaequeneháiraya ema mácatátaji Pablo. Vinacaripe eta juca vícutiaraya. Vuíchaha vinicaimahi, vuíchahavare véraimahi, machu vásapiha vicaicuña me Viya te vuíchaha vicuitaucha eta juca vipanereruhi. ¹⁵ Tacahe, puiti eti tuparairucana eyaseacayare ema comandante máma achichu te emirahu, etanuca eta etseraruina macayaserehi ema Pablo eta juca máichavaquénévahi. Tásiha, víti vitsecavayare eta vicapasirayare éma te vímahapa máuchuca —náichapa.

¹⁶ Tiuri, matiarhihi ema suchicha esu maparape ema Pablo. Masamairicapa eta juca. Tiyanapa te cuartel mametapana ema Pablo. ¹⁷ Tacahe, ema Pablo máichuhapa ema nacapitara ena suntaruana, máichapa:

—Piáma ema maca amaperu te mamirahu ema comandante. Jucarihi eta juca mametacaya —máichapa.

¹⁸ Tásiha, ema nacapitara mámapa ema amaperu mayehe ema comandante. Máichapa:

—Ema máena macaerataquene Pablo tiyaseacanuhi náma eta piyehe ema maca amaperu. Jucarihihi eta timetacaviya —máichapa.

¹⁹ Tacahe, ema comandante macaratavauchapa ema amaperu, mámapa máiputsiacapa. Tásiha, mayase-recapa, máichapa:

—¿Tájahasica eta pimetacanuya?

²⁰ Ema amaperu máichapa:

—Nararihi ena nujaneanana navarahahi nacapaca ema nécuca. Achichu tiyaseacavianayare piama éma te namirahu ena tuparairucana te cabildo. Nacaetseraruya ticayaseserehiyare eta juca máichavaquénévahi. ²¹ Váhisera picusuapavaca taicha cuarentana ena ajairana ticuchapanahi te picuchucapa éma, nacapacayarepa. Taicha najurachahi eta nacapasiraya ema Pablo, tásiha napaenumavainapa te náitauchapa eta napanereruhi, tinipanainapa. Puiti éna,

pítinecha nacuchapahi te pisuapayarepuca éna —máichapa ema amaperu.

²² Tacahe, ema comandante macahepa:

—Tiuri, piyana te pipena. Nacuijaserá picumetaca eta juca pimetarunuhi —macahepa.

Emá comandante máevatacapa ema Pablo mayehe ema Prefecto Félix

²³ Tiuri, ema comandante máichuhapa ena apinana nacapitarana ena suntaruana. Máichapa:

—Etsecayare ena docientoana suntaruana tiámanaya eta espada, docientoanavare ena tiámanaya eta lanza, setentana ena ticaperanayarepahi. Enápanayare ema Pablo te Cesarea. Iúchuca puiti te las nueve yati. ²⁴ Énerichuva etsecayare étanaina cavayu maperainapahi ema Pablo. Táurisera eta iámirainapahi. Íjaracaya ema Prefecto Félix —máichavacapa.

²⁵ Tacahe, máimiamarecavarepa eta carta. Eta juca táechajiruvapahi eta carta:

²⁶ “Nuti Claudio Lisias nímiámareca eta juca carta piyehe piti piúriquene excelentísimo aquenuca. Néchajicavinuma tativa.

²⁷ Jucarihi eta juca téchacarehi. Ena israelítana nacaratatachi ema émana achane ticaijare Pablo. Navarahahi nacapacaya. Étasera te néchapa núti tavanarairahi éma eta Roma, nuyanapa námahi ena nusuntarurana nucatiuchapanapa. ²⁸ Eta nuvarairahi necha eta maviureva, námapa te namirahu ena tuparairucana israelítana te juca. ²⁹ Nímahapa tájina matapiravainahini táimicapacahini táemeratachicupacíni te cárcel. Étachuchanénipuca tímicitachahi eta nayeherepiana. ³⁰ Tásiha, nusamairicavarepa eta nacamesairayarehi nacapaca. Tacahe, nímiámarecapa puiti eta piyehe. Énerichuvare nuvanecahi ena timetauchanahi náiteca ara piyehe, étaina macayase-rehiya.

Tamutupa eta juca néchajirivanahi piyehe”.

³¹ Tacahe, ena suntaruana náitauchahi eta vanairipi. Námapa ema Pablo te jena yati. Títecapanapa te avasarechicha ticaijare Antípatris. ³² Éta nachavinehi te apanapa sache ena suntaruana ena tipaicanapahi. Énasera ena ticaperana tímiyanavánapa eta nanapaniraya ema Pablo. ³³ Tacahe, te títecapanapa te Cesarea, náijaracapa ema prefecto eta carta, émapa ema Pablo. ³⁴ Te tamutupa eta máechajicuirahi eta carta, ema prefecto mayaserecapa ema Pablo:

—¿Táviha eta piúchusine píti? —macahepa.

—Núti núchusine te Cilicia —máichapa ema Pablo.

³⁵ Tacahe, ema prefecto máichapa:

—Tiuri, véchayare te náitecapa ena piánarana —máichapa.

Tásiha, macavanairipipa macajaneha te palacio máepiyaruinihi ema ichavicaini Aluresi.

Téchajiuchavapa ema Pablo te mamirahu ema Félix

24 Te táequenepa eta cíncoquene sache, títecapanapa te Cesarea ena tuparairucana tiási-

hanahi te Jerusalén. Matiarihahi ema Ananías corregidorhi, énapa ena apamuriana náiyacaranahi. Matiarhipahiva ema abogado ticaijare Tértulo. Tiyananapa mayehe ema prefecto, timetaurecanapa. ² Tacahe, náepanapa ema Pablo. Te títecapapa, tépanavapa téchajicapa ema Tértulo, ánipa macahe:

—Vihasulupayachavi, tátachicha Prefecto, eta viúri-vahi pícha. Tájina víchiravainahini eta pítusirahi, pijaneacahavi eta juca aquenucairavihi eta viyehe.

³ Vimutu viti achaneana te avasareana, tamutuvare sácheana vicunachavihi. Vihasulupayachavihi, tátachicha Félix, eta piúrivahi eta viyehe. ⁴ Picatajicahavi, tata, pisamahavi. Vahi picuyacujihavi eta juca viyasearuvianaya. ⁵ Puiti vímatipa ema maca achanetataji, tihapapirahi éma. Tamutu avasareana te jácani viávi-hapahi viti israelítana, mayurucavaca ena vijaneanana. Émarichuva tachutirihahi nayehe ena téhicana ema Jesús Nazareno. ⁶ Énerichuvare mavarahapa máechipejicayare eta tacapicahuquene Templo. Eta tacahehi vicaratacapa. Vícuñacayarehi taicha tacahehi eta tavanésirahavihi eta viyehe ley. ⁷ Émasera ema comandante macatiuchapa tiverejimirauchahavipa taicha camuriana ena masuntarurana. ⁸ Tásiha, máichahavipa: “Te evarahapuca emetaucha ema maca, eyana te mamirahu ema viáquenuruha Prefecto” máichahavipa. Tiuri, puiti vitupiruvahi viti eta vimetasiravi. Te pivaraha, picayasesereru éma eta yátupirahi eta máichavaquenevahi ema maca eta vimetauchirahi puiti —macahepa ema Tértulo.

⁹ Tacahe, ena apamuriana natiarhiqueneanahi, énerichuvare nacahehi:

—Yátupi eta juca máechajirivanahi —nacahepa namutu.

¹⁰ Tacahe, ema prefecto máimicutiarachapa máechajiuchava ema Pablo. Tépanavapa téchajica ema Pablo, ánipa macahe:

—Tájina táichava néchajiuchavaya te pimirahu taicha néchahi núti ánaquiáparipa eta juéseravihi tayehe eta viávasa. ¹¹ Tiúripana picayasesereru. Núti, dóceravahi sache eta nítecapirahi te jena viávasa Jerusalén eta néjirairayarehi ema Viya. ¹² Nájina nucájachaquenéna. Nájnavare nímiyusemaruina te tajuhe eta Templo, étaripa te náurujsirareva ena nujaneanana. Téhepu-caini cálleana nucajacharecahini. ¹³ Ena nani ticatianacanuana, tájina naviya náetseraruinahini eta nametauchiranuhi. Vaipa tisupacareana. ¹⁴ Ena nani náimijachahi vahi nétupicava eta nímituresirahi. Nútisera nusuapa tacutihi eta nasupirahi namutu ena viáchucanaveanaini. Émarichuhi nucasiñahi ema Viya, ema nacasiñaquenehivare ena viáchucanaveanaini. Núti nusuapahi tamutu eta táechajiriruva eta Sagrada Escritura. ¹⁵ Núti nucasiñavahi mayehe ema Viya, nucuchapavahi eta véchepusiraya te vécarí vimutu viti matapiravareanahi, énapa ena ticatapiravana. Puiti, énaripa ena timetauchanuanahi ticutinuanahi eta nasupirahi eta macaechepusiraya ema Viya ena náepenaqueneana. ¹⁶ Núti, eta nusuapirahi tamutu eta juca, vahi návarahahini néjecapavahini te mamirahu

ema Viya. Váhivare návarahahini néjecapava te nami-
rahu ena achaneana.

¹⁷ Tiuri, camuripa áñoana nupaisirahi. Tacahe, nuchavapa te návasa Jerusalén. Náminapahivare eta nanicavachaya ena nujaneanana páureana. Énerichuvare nucamavahupahiva me Viya. ¹⁸ Te tamutupa eta tacasipairahi eta náchaneva étapa eta nuvahuana, nuyanapa te Templo eta nunapanayarehi eta námavahuana me Viya. Eta návihairahi te Templo, tichimapanuanapa ena nujaneanana tiásihanahi te departamento Asia. Nájinasera achaneanahini nachimaphini te nuchacaya. Váhivare náimahanuini nímiyusemacavacahini ena achaneana. ¹⁹ Ena nani nujaneanana tiásihanahi te Asia, énarata titecanayarehini timetaurecana, te tatiarihinahipucaini eta nuviureva. ²⁰ Piyasereca ena nani natiarihiqueneanahi puiti, te námicacherachapuca eta nuviurevahi te ticatupiacanuanapa te namirahu ena tuparairucana. ²¹ Téheserapuca eta tímicaviuchanuhi eta numetasiravacahi éna: “Puiti juca sache ecaturipihanuhi te juca emirahu táichavenehi eta nusuapirahi eta véchepusiraya te táequenénapa eta vépenira” níchavacapa núti —máichapapa ema Pablo.

²² Émasera ema Prefecto Félix máecharipahi tamutu eta náehisirahi ena achaneana ema Jesús, étapa eta táurivahi eta nayeherepiana. Tásiha, te tamutupa eta náechajirisiravahi, máichavacapa:

—Tiuri, tácaheine achichupaine vécha eta juca, te máitecapa ema comandante Lisias. Nuyaserecaya éma eta juca íchavaquenevahi éti —máichavacapa.

²³ Tacahe, ema prefecto Félix mavanecapa ema mayehe capitán máimichava te palacio ema Pablo. Macavanairipivare vahi nacuerataca, táuri eta manarasiraina. Táuri eta náechapajirisiraina ena vichamuriana, téjiranayarepahi.

²⁴ Te jena sácheana, tiyanapa ema Félix te apana avasare. Te tichavapa, mámapa esu mayena ticaijaru Drusila. Ésurichuhivare israelíta. Náimichuhapa ema Pablo, téchajiricavanayare. Tacahe, ema Pablo mametacavacapa eta táicharacavahi eta máehisirahi ema Jesucristo. ²⁵ Eta máechajirisiravahi ema Pablo, máichavacapa:

—Te ecasiñava me Jesucristo, éhicavare eta máimiturapiana, tiperdonachaheyare ema Viya. Matapiravarehena te mamirahu. Énerichuvare, tiúrinapa eta ítare-siraya, eratahainapa ecaratacavayare. Puiti, táuricapa ecasiñavavane, taicha járajapa eta sácheyare nacayaserehirayare nácani ticatapiravanahi. Ticaicuñanainapa te yucu —máichavacapa ema Pablo.

Te masamapa eta juca ema Félix, tipicarinehi. Máichapa:

—Tiuri, taratapa puiti eta juca. Nuvarahasera nápechavaya nusamararacavi. Te apahenavare nímicuhaviyare —máichapa.

²⁶ Ema Félix ticuchapavahi te máijaracayarepuca eta plata ema Pablo eta máuchucuiraya. Eta tacahehi máimichuhaparacahi téchajiricavanayarehi. ²⁷ Váhiseramáuchucuhahini ema Pablo, taicha ema Félix mavara-

hahi tiúriyarehi nayehe ena israelítana. Apina año eta tayerevahi. Ticaitsivanecha ema Félix. Tisiapapa ema Porcio Festo, émapavapa prefectohi.

Nacatupiacapa ema Pablo te mamirahu ema Festo

25 Te émapavapa aquenucahi ema Festo, te mapanaquenepa sache, tiyanapa te Jerusalén. ² Tacahe, ema corregidor énapa ena apamuriana tuparairucanahi, ticurujicacanapa mayehe ema aquenuca Festo. Nametauchapa ema Pablo. ³ Nayaseacapa ema Festo macátajicavacahini eta máevataca te Jerusalén ema Pablo. Taicha navarahahi titsecavanyarehi te achene eta nacapasiraya. ⁴ Émasera ema Festo majicapapa:

—Tiuri, ema Pablo ticaeratahi te Cesarea. Núti achichupaichu nuyanayare nuchavaya tayehe. ⁵ Eta tacahe, te tatiarhipuca eta échaqueneanahi eti tuparairucana, tiúripa éhicanu te Cesarea apaesavecha te ticaviurevahipuca ema maena achane —máichavacapa.

⁶ Te tiánehipa eta diésquene sache eta mávihairahi ema Festo te Jerusalén, tichavapa te Cesarea. Te apanapa sache téjacapa tayehe eta mávacure. Máimichuhapa ema Pablo. ⁷ Te titecapapa ema Pablo, tisiapapa te mamirahu ema Festo. Témeñahavanapa ena mánarana tiásihanahi te Jerusalén. Timetaurecanapa ema Pablo. Camuri eta máejecepiravahiji. Ichape eta maviurevahiji nayehe. Tájinasera naviyahini eta náetserarúinahíni. ⁸ Émasera ema Pablo máichavacapa eta macatiuchiravahi:

—Núti tájina nutapiravaina tayehe eta nayeherepiana ena nujaneanana, étainapucáini eta Templo, émainahivarepucáini nucaecahi ema ichapequene aquenuca Emperador —máichavacapa.

⁹ Émasera ema Festo, énerichuhivare mavarahahi tiúriyare nayehe ena israelítana. Tacahe, mayaserecapa ema Pablo:

—¿Pivarahapuca piyana te Jerusalén, étaina tacaechacasiya te numirahu eta juca píchavaquenevahi?

¹⁰ Tacahe, ema Pablo majicapapa:

—Étaripa návihahi puiti te pimirahu píti viyehe juez manacaquenevihi ema Emperador. Pítipa tituparacavi picuchucuhanuyarehi taicha pécharichuhi píti tájina nuviurevainahini nayehe ena nujaneanana. ¹¹ Téheserapuca nucaviurevahini, táimicapacanuríne eta nuviureva. Vahi nucatiuchavaimahi. Tájinasera nuviurevaina eta nametauchiranuhi ena nani. Váhivare tituparacavi píjararecanuhini eta nayehe ena nani. Téheserapuca te vahi picucaiticanu, nuyasesereca puiti nuyana te mamirahu ema Emperador. Étaina nucametauchacasiya mayehe —máichapa ema Pablo.

¹² Tacahe, ema Festo macayasesererupa nayehe ena mayeheana abogado. Tásiha, máichapa:

—Piti Pablo, piyaseserecavi piyana te mamirahu ema Emperador. Nísapavi piyana —máichapa.

Títecapapa ema rey Agripa, ésupa esu Berenice

¹³ Te jena sácheana, títecapapa te Cesarea ema rey Agripa, ésupa esu Berenice. Náechajipanayarehi ema Festo. ¹⁴ Eta nanasiquenerahi te jena sácheana, ema Festo mametacapa ema rey eta máichavaquenévahi ema Pablo. Máichapa:

—Mararihi ani ema achane ticaeratahi ticaijare Pablo. Manaquiruhi ema Félix. ¹⁵ Te nuyanapa te Jerusalén, ena tuparairucana timetacuanapa eta máichavaquenevahi, tiyaseacuanapa eta nímicapasiraina. ¹⁶ Tásiha, núti nujicapavacapa: “Viti aquenucarahana tayehe eta Roma, vahi tituparacahavi vímicapacahini mácani ticametauchacasihi te vuíchaha ticamirahucacanahi ema mánarahi” níchavacapa. ¹⁷ Tacahe, te títecanapa ani, vahi náyererejihini núti. Te apanaquenepa sache néjacavanepa te návacure, nímichuhapa ema Pablo. ¹⁸ Núti nímijachapa ichape eta maviureva. Étasera eta nametauchirahi, tájina vahi táíñepihini. ¹⁹ Étachuchanénipuca tímíavíuchahi eta nayeheana religión. Émapa ema náehiruhi ticaijarehipuca Jesús, ema mácani tépenahi. Puítisera ema Pablo máechajisihahi eta mápechiravahi títareca. ²⁰ Núti vahi nímíatíqueneha eta táícharacavaya eta juca. Tacahe, níchapa ema Pablo: “¿Pivarahapuca piyana te Jerusalén, étaina tacaechacasiya eta juca píchavaquenévahi?”

²¹ Émasera tiyaseuchavapa eta mayaniraya te mamirahu ema Emperador Augusto. Tacahe, nímivane-recapa macajaneha tíamainucava te nítujicava nímivane-recapa nanapana mayehe ema Emperador —máichapa ema Festo.

²² Tacahe, ema Agripa máichapa ema Festo: —Núti apana nuvarahasa nusamaini ema mácara achane —máichapa.

Tacahe, ema Festo máichapa:

—Tiuri, achichu pisamaya éma.

²³ Tacahe, te apanapa sache tisiapanapa ema Agripa ésupa esu Berenice tayehe eta náejasirare ena aquenucana. Tiúrina eta náítecapira. Jánunuhacavaca eta namuirihana. Énapa ena aquenucana tachutirihana nayehe ena militáreana énapa ena tuparairucana tayehe eta avasare. Tacahe, ema Festo máimichuhapa ema Pablo. ²⁴ Tacahe, téchajicapa ema Festo, ánipa macahe:

—Tata Rey Agripa. Tátanaveana. Emutu eti etiarhi-queneanahi te juca viúrujisirávahi. Mácahi ema maca achane nametaurehi ena majaneanana eta nuyehe, ánaqui te Jerusalén, étapa ani te juca Cesarea. Nararihi camuriana navaraha náimicapaca ema maca. ²⁵ Nútisera tájina nímaha matapiravaina táimicapacahini. Émasera tiyaseuchavapa tiyanayare te mamirahu ema Emperador Augusto. Nísapahisera mayana eta mayehe. ²⁶ Vuíchahasera nucajurehini ema náquenu Emperador, taicha tájina nuviyahini eta matapiravainahini. Puítisera nucatupíha éma te pimirahu piti rey Agripa, étapa eti tátanaveana. Nuvaraha ímicatcanu eta táícharacavaya eta juca, apaesa nucajurepaini ema

Emperador. ²⁷ Taicha vahi tiuri vévataca ema présuhi te tájina matapiravaina —macahepa ema Festo.

Ema Pablo téchajíuchavapa te mamirahu ema rey Agripa. Mametacavacapa eta máítaresirahi te vuíchaha máéhícahíni ema Jesús.

26 Tacahe, ema Agripa máichapa ema Pablo: —Tiuri, nímaha péchajica —máichapa.

Tacahe, ema Pablo macanuquechapa eta mavahu. Tépanavapa téchajica, ánipa macahe:

² —Tiúrisamurécare eta nítujisiravahi néchajica te pimirahu, piti rey Agripa, eta nucatiuchiravaya núti apanava eta juca nametauchiranuhi ena nujaneanana israelítana. ³ Núrisamure ichape taicha píti pímatihí tamutu eta juca viyeherepiana viti israelítana, étapa eta véchapajirisirahi. Eta tacahe, nuyaseacavi puiti pisamanu eta nucayemaya. Pácayehe paciencia nuyehé.

⁴ Eta námaperuvahi núti, fariséonuhi te návasa núchusinehi étapa te Jerusalén nujurusinehi. Néhicahi eta viyeherepiana viti israelítana eta nítaresirahi. Nucachanevacahi ena fariséoana ena típícauchacaréánapána. Namutu ena nuchajuruanahi tímatinuanahi eta nítaresirahi. Ena títametacavianaya eta nítare-sirahi. ⁶ Puiti ticatupiacuananahi te pimirahu, piti rey, táíchavene eta vicuchapiravahi eta macaechepusirahaviya ema Viya te vépena, taicha tacahehi eta máechajiriruvahi nayehe ena viáchucanaveánaini. Vimutu viti tachichanaveanahi eta viávapairu Israel, vimutu vicuchapavahi eta juca táítauchiravaya eta máíjararuhaviya ema Viya. Eta tacahehi, tamutuhi sácheana, yátiana vítatihí ema Viya, viyujaracahi mayehe. Táíchavenehi eta nucuchapiravahi núti, timetauchuananahi ena nujaneanana. ⁸ Tiuri puiti éti, németeaca tisupacarehi eyehe eta macaechepusiraya ema Viya ena náepenaqueneana.

Ema Pablo mametacavacapa eta mapánajirisíravaca ena téhicanahi ema Jesús

(Hch 8.1-3; 9.1-2)

⁹ Nútiripa acane nímijachahi nétupicava eta me Viya eta níchaqueneánahi nucatianasiravacahi ena téhicanahi ema Jesús Nazareno. ¹⁰ Eta juca níchirahi te Jerusalén. Tímícatcanuanahi ena tuparairucana eta nucaratasiravacahi ena matapiravareanahi téhicanahi ema Jesús; nímisiapiravacahi te cárcel. Eta nímairahi eta nacapasirayarepahi, néhicahi eta napanereru éna. ¹¹ Ichapemurianahi ena nucarataruana. Némecharecavacapai ena nétupiaruanapahi te náurujisirarevana. Nímínajicavácápáipa eta náehisirahi ema Jesús. Nécatihavare eta náepuruiraya. Muraca eta nuvainarajichiravahi nayehe. Tamutuhi nutanusihavaca te apanaqueneana avasareana tayerehiqueneana.

Emá Pablo mametacavarepa eta máehisiraipa éma apanava emá Jesús
(Hch 9.1-19; 22.6-16)

¹² Étarichuvare tímiyananuhi te avasare Damasco. Tivanecanuanapa comisiónnuhi ena tuparairucana; tíjaracanuanahi eta órdena. ¹³ Tacahe, tata rey, te nánehipa te avasare, te jena sache las dócequenepa, tíjahúchavapa tímícauchanu eta majaraiva emá Viya, tíásiha te anuma. Tijarahipana tayehe eta sache. Tímícauchanupa, énapa ena téhicanuanapahi. ¹⁴ Tacahe, viáquipáicavapa vimutu eta vipisirahi. Nusamapa emá Viya, téchajicanuhi te véchajiriruva viti israelítana. Máichanupa: “Saulo, Saulo, ¿tájaha tacayema picatíanacanuhi? Pésamiricavachucha, taicha pítijiváchucha píchavahi. Vahi piúrimahi te pímiyanava pipanajiricavaca ena téhicanuanahi” —máichanupa. ¹⁵ Tacahe, níchapa: “¿Nájahavi, piti Tata?” Tijicapanupa éma: “Núti Jesús. Núti picatíanaruhi, eta pipanajirisiravaca ena téhicanuanahi. ¹⁶ Pécheputa, pitupíha. Núti nímerécavahi eta piyehe, taicha nunerejiruvíhi nuvanaraviya. Puiti numetacaviya eta juca pématanerepiyare eta nuyehe. Péchajisihayare eta níjare nayehe ena achaneana eta juca pímairanuhi puiti, éta pa eta apamuriana nímerereruanayare. ¹⁷ Núti nucatiuchaviya te tájahapuca náicharacaví ena vijaneana israelítana énapa ena apavasanana. Puiti nuvanecavíhi péchajisihanuya eta nayehe ena apavasanana. ¹⁸ Pímitucavacayare eta mavanairipiana emá Vicaiyaquene. Nacaijuhe éma, apaesa náitujicava náimaha eta majaraiva. Náinajicapa eta náichaqueneasana te timapícu. Vaipa nacuehíca emá Satanás. Ena tisuapanuanaya téhicanuanaya, nuperdonachavacaya eta napecaturana. Nasiapamuríhaya ena náinapureanahi nunerejiruana” máichanupa emá Jesús.

Emá Pablo mametacavacapa eta masuapirahi eta matuparacasivanahi me Jesús

¹⁹ Tacahe, tata rey Agripa, nusupahi núti emá Jesús eta mavanésiranuhi. ²⁰ Nucametarairupa tativahi nayehe ena ticavasanahi te Damasco. Te nuchavapa, éta pa te Jerusalén, éta pa te avasarechichana te Judea. Tásiha, núchucapa tayehe eta avasareana tayerehiqueneana nayehe ena apavasanana. Numetacavacapai eta nácaijuhéraina emá Viya, náeneuchiravaina náitsivachiraina eta náitaresiraina, táuripa eta náitaresiraina. ²¹ Étara eta juca tivíuchanuhi nayehe ena nujaneana eta nacaratasiranuhi te Templo, navarairahi ticapacuanahi. ²² Émasera emá Viya tímícatacanuhi. Puítirichucha tímícatacanuhi éma. Eta tacahe, nutiaríhichucha puiti. Tásiha, vahi nuchávacuéjehavahíni nucametarairuyarechucha nayehe namutu ena achaneana, ena páureana énapa ena rícoana. Tájinasera vahi nuhapapícahíni eta táechajiriruvanahi eta Sagrada Escritura eta táitachiravayarehi eta macatájivairayarehi máepenirayarehi emá Cristo. ²³ Tásiha, émayarehi tínapuca técheputa te máecari. Éta, táicutiarahi eta véchepusiraya víti apana te vécarí vimutu

viti achaneana, viti israelítana énapa ena apavasanana. Tásiha, tivanecahavípa vimetacaya ena achaneana, apaesa nácasíñava mayehe éma.

Emá Pablo mavarahapa macajimuyasamurechayare emá Agripa eta máehisiraya emá Jesús

²⁴ Tímiyanavarichaha téchajica emá Pablo eta máechajíuchiravahi, témechajicavapa muraca emá Festo, macahepa:

—Máurishivípa pítí Pablo, táichavene eta pivayuchiravapa picaravahu. Éta pa timaurishichavíhi.

²⁵ Émasera emá Pablo majicapapa, macahepa:

—Váhiya máurishinuina, tata aquenuca Festo.

Nutupíruvahi eta juca nucayemaqueneanahi. Jéhevare eta yátupiqueneanahi. ²⁶ Émarípa emá maca rey Agripa máimatívare tamutu eta juca. Eta tacahehi vahi nupicacacavahíni eta néchajísirahi te mamirahu taicha nucasíñavahi núti eta máimatírahi emá. Namutuhívaré ena achaneana náechahi, taicha tájina vahi tayumurucavahíni. ²⁷ Pítírípa pítí rey Agripa ¿písupahi jácáni eta nacayemaqueneanahi ena profetaníni? Núti németeacahí písupahi pítí.

²⁸ Emá rey Agripa majicapapa:

—Pícajímuyacayaréni eta nusamure. Núti apanavare néhicayare jácáni emá Jesús.

²⁹ Tacahe, emá Pablo máíchavarepa:

—Tiúrípana písupavane puítínaríchu, yátupína te písamure. Nuyaseacaya emá Viya eta písupírína. Éneríchuvare nuyaseacayare eta esupírína emutu eti apamuriana eti esamararacuanahi. Éhícanéni emá Jesús, tácutíhíni eta néhísráhi núti. Váhisera nacuératacahéni, vahi ecucutínúhíni núti eta nucaertáirahi táichavenehi eta néhísráhi emá Jesús —máíchapa.

³⁰ Te nasamapa eta juca máechajírírúvahi emá Pablo, técheputa emá rey, emá prefecto, esu Berenice, énapa namutu ena natíaríhíqueneanahi náejaruanahi.

³¹ Tásiha, tíyananapa típutsiacavanapa, náechajísíhayarehi eta juca. Náíchacacapa:

—Emá maca achane, tájina mavíurevaina táimícapahíni. Váhívaré táurícahíni macaertahíni te cárcel.

³² Emá Agripa mametacapa emá Festo:

—Tiúríhíni pícaítíca emá maca achane te vahi macúyaseserécáhíni eta mayaníraya te mamirahu emá Emperador —máíchapa.

Tícaevatapa emá Pablo te Roma

27 Tiuri, matíaríhíhi emá capítán tícaíjare Julio, nacapítaríhi ena masuntarurana emá aquenucaíní Augusto. Tacahe, te tíurípa eta napanereru eta náevatasírahavíya te Roma, natuparacapa emá Julio mámaya emá Pablo énapa ena apamuriana présoana. ² Viávacuhapa te íchape pacure tíasíhahi tayehe eta puerto Adramítío. Tíyanayarehi te apanavare puértóana te Asia. Téhicahavípai emá Aristarco ticavasahi te Tesalónica tayehehi capital eta departamento Macedonia. ³ Te apanapa sache, vítecapapa te puerto Sidón.

Tacahe, ema Julio majapanupahi ema Pablo, máis-apahi tiyana máejirapanavaca ena vichamuriana. Náechapajiricahi ema Pablo. ⁴ Te viásihavarepa te Sidón, vétavicapa eta tiúrupuhi Chipre tinapaicapahi te sapa, váipasare viácapapahini eta técticava. ⁵ Tacahe, vijuchecherecapaipa eta mar te tachacayapahi eta Cili-cia, étapa eta Pamfilia, vítecapirapa te avasare Mira tayehe eta Licia.

⁶ Eta tayehe, viávacuhavarepa tayehe eta apanapa pacure máechajiaruhi ema capitán Julio. Eta juca pacure tiásihahi te avasare Alejandría. Puiti tacaijuheyarepa te Italia. ⁷ Te jena sácheana vahi vijuricatipahicháini eta vipaisira. Muracarichucha eta técticava eta viácapirapahi. Muraca eta nacaemataneasirapahi, vítecapirapa te tánara eta puerto Gnido. Tacahe, vétavicavarepa eta puerto Salmón te tasumuqui eta apanavare tiúrupuhi ticaijare Creta. Viávicuchapáipa eta tiúrupuhi, étapa tiávichahávipahi tayehe eta técticava. ⁸ Ticajerapahi eta vipaisirapahi. Vijúchecherecapáichucha, vítecapiravarepa tayehe eta apanavare puerto Buen Puertohiji eta ticaijare te tachacaya eta avasarechicha Lasea.

⁹ Ticachuricahavipa eta tiempo taicha eta viyérejevapahi. Tíñehiripa eta tapaisirava te mar, taicha tinacuchavaipa eta muracana técticava. Eta tacahehi ema Pablo maconsejachavacapa, macahepa:

¹⁰ —Tiuri, tátanaveana. Váipara tiuri vímianavahini vipaica, taicha tíñehicarepa vécharicava. Machu vicamitiaca eta pacure, eta carga, vítipa machu vérica —macahepa.

¹¹ Émasera ema capitán Julio, ema comandante tayehe eta pacure, émapa ema piloto vahi návarahahini nánasihini. Vahi nasuapahini ema Pablo.

¹² Taicha vahi táurihini eta puerto, tájina távichahini tayehe eta muracana técticava. Napanerechaichucha tiyananayare. Ánipa nacahehi:

—Vahi tiuri eta vánasi te juca. Viyanachucha tayehe eta apanavare puerto Fenice tayehe eta juca Creta. Tiúripa eta jena, távichahi tayehe eta muracana técticava. Étaina vicuchapiha eta te táetupiricavapa eta sácheana —nacahepa.

Muraca técticava te mar

¹³ Tacahe, tépanavapa eta técatitavahi te vana. Tiápajuecavanapa éna. Náimijachapa tímiyanavanayarehi tiuri eta náehisirayarepahi eta técticava †. Vahi náemetecahini táequacavahini te cajaha. Viánehipaipa vicachacaya eta tiúrupuhi Creta. ¹⁴ Te ticaicutiaravapa, tíjahúchavapa téquacava, muracapa técticava tiásiha te cajaha. ¹⁵ Tavehapa eta vipacure. Tiámahavipa. Viyerehipa eta tachaui. Navarahainipa náimichava eta pacure te tachaui, váhisera náratamahini. Tásiha, náisapapa tiámahavi eta técticava. ¹⁶ Témetavichavipa te apachacaya eta tiúrupu-

† *Acane eta ichapequeneana pacure, amairihaichaha te náurape eta napaisihahi te une. Camurianahi ena achaneana tinaucanapahi. Nacatupihavare eta ichapequeneana sábanana tímicatacayarepahi tévatajica eta técticava.*

hichícha ticaijare Claudia, étapa tiávichahavihi. Váiparichu muracainahini eta técticava. Étapa víturusine vijataca eta étasi pacure vichururepahi. Vinacacuhapa te tajuhe eta ichapepana pacure. Ichapesera eta vicaemataneasirapahi. Tacahe, náinunuacapa eta pacure te enureana apaesa vahi tacuvejiajuecha eta táepacuruha. Nacamiricapa eta ichapepana tavanterame tévatajicapahi eta pacure taicha napicahi támahini eta técticava, táejahapaicahini eta pacure tayehe eta playa ticaijare Náecharisirareva. Tacahe, táevatajicapaipa eta vipacure, vétaviequenehairapa eta playa. ¹⁸ Tíñehichucha eta táepacuruhana. Eta napisirahi éna, náepuhecavacapa te une eta támaquenepahi. ¹⁹ Te mapanaquenepa sache, vivehavarepa eta apamuri támaqueneanapahi tayereruvanapaichuhi eta pacure, véchipaicavarepa. ²⁰ Jéhesare, ichapemurihi eta sácheana vahi tacaecherahini eta sache, étapa eta jarairiquiana. Eta vímairahi vahi tarasahini eta muraca tépacuca, vaipa vémeteacavahini viúchucuhahini.

²¹ Ichapemurihi eta sácheana tájina vinicahini. Tacahe, ema Pablo titupiha te vimirahu, máichahavipa:

—Tátanaveana, tiúripanáichuhipucáini esuapanuhini te vuíchaha viúchucuhini tayehe eta Creta. Puiti vahi vícucatajivahini. ²² Puítisera, vahi ecupica, taicha nájina tépenaimahi. Técharicavayaresera eta pacure, témitiacaya. ²³ Néchahi núti eta juca, taicha yati téchajicanuhi ema ángele mavaneruhi ema Viya, ema náquenuhi nucaematanearuhi. ²⁴ Ani macahehi eta mametasiranuhi ema ángele: “Vahi picupica, Pablo. Vahi pépenaimahi. Énaripa ena nani picachanequeneanapahi, váhivare tépenanáimahi táchavenehi eta pitarihirapahi eta nayehe. Picamesavayare pítecapaucha ema Emperador pitupihamiraureya” máichanupa ema ángele. ²⁵ Eta tacahe, tátanaveana, túmehénachucha, taicha núti nucasiñavahi mayehe ema Viya. Nusuapahi eta mametarapiana ema ángele eta nuyehe.

²⁶ Tiámahavayaresera eta técticava tayehe eta tiúrupuhi —máichavacapa ema Pablo.

²⁷ Apinaquenepa semana eta támirahavipahi eta muraca técticava te ichapequenehi mar. Te jena enumuhuquenepa yati, ena marinéroana náimijachaipa tiánehianaripa eta tiájipahi taicha nasamahi eta cachuela te tachaui. ²⁸ Náicutiecapa eta táupenava eta une. Náimahapa treinta y seis metro eta táupenavahi. Te tiyererehavare, náicutiecavarepa, veinte y siete metro eta táupenava. Náemetecapa tiánehianaripa eta tachaui. ²⁹ Tacahe, nacajuchucupahi eta cuatro ánclana te tahivu eta pacure, taicha napicahi táemestaquihahini eta vipacure tayehe eta máriana. Navarahaipaicha tájahúchavahini tijarahi. ³⁰ Eta napisiraipaicha, ena marinéroana navarahapa tijunanayarehini, tijunijicahavianayarepa. Nacucupaicapa eta étasi pacure vicavacurehi. Nacaetserarupa nacajuchucayare eta apana ancla te tasumu eta pacure.

³¹ Ema Pablo máimatiacavacapa eta navarairahi tijnana. Tacahe, mametacapa ema capitán Julio énapa ena masuntarurana. Máichavacapa:

—Te vahi nacunasi te juca pacure ena nani, éricayare éti, vahi iúchucuhaimahi —máichavacapa.

³² Tacahe, ena suntaruana náechupicavacapa eta enureana táitihapahi eta étasi pacure. Náinajicapa te une.

³³ Te tijarahipa, ema Pablo tivanecahavipa vimutu vinicanuma. Máichahavipa:

—Enicanumapa apaesaina, taicha apinapa semana eta juca iávamina, emaimasirahivare. Tatuparaca enicanuma apaesa táetumechahe eta iávaresirayare. Nájinasera témitiacaimahi te vitaracu —máichavacapa.

³⁵ Tacahe, te tamutupa eta mavanisiravacahi, ema Pablo mavehapa eta pan; mabendiciónchapa te vimirahu. Mavejecapa, tinicapa. ³⁶ Vétumechavapa vimutu, vinicapa víti apanava. ³⁷ Camuriahavihi viti támaqueneanapahi eta pacure. ²⁷⁶ eta visimutuvapahi. ³⁸ Te vítanepa eta vinisirahi, navehapa ena marinéroana eta apamuri trigo, náquijicapa te une, navairahi téchacayare eta támaquene eta pacure.

Técharicavapa eta pacure

³⁹ Te tijarahipa, ena marinéroana vahi náimativahini távihahipuca eta viávihi. Náimahapasera eta tachausi ticayehi playa. Navarahapa náimipau-chayare eta pacure, viúcupaisihayarehi te playa. ⁴⁰ Tacahe, náechuacavarepa eta enureana ticaratacanahi eta ánclana. Tanasivacapa te amahe une. Nacaesimucavarepa eta tayeheana leme eta pacure. Tacahe, nacanunquechapa eta étana tavanterame ticarataca eta técativacapa tiávihiapahi te tasumu. Táimicacapa eta napauchiraya eta playa. ⁴¹ Tiámahavipasera tayehe eta remanso. Vaipa táupenahini. Tásiha, ticaratachavipa eta playa. Tachuchucapa eta tavaparu. Vaipa tayamuricahini. Tacahe, eta tamuracavahi eta tépacuca, tacavaracapa eta tahivu eta pacure. ⁴² Ena suntaruana navarahapa nacapacayarehi ena présoana, napisirahi náitujicavahini tijunana eta návaresiraya. ⁴³ Émasera ema capitán Julio vahi máisapahini taicha mavarahahi macuchuchayarehi ema Pablo. Macavanairipipa ena náitucanahi tiávarecana napaucha eta tachausi. ⁴⁴ Ena apamuriana máitucarahanahi tiávarecana nayurata-mecavacapa eta tabla, nacuchucuiyavahi te tiájipahi. Tacahehi eta viúchucuirahi vimutu.

Ema Pablo mávhaipa te tiúrupuhi Malta

28 Tacahe, te vimutupa viúchucuhahi, tiúchujichahavianapa ena ticavasanahi tayehe eta tiúrupuhi. Timetacahavianapa eta táijarehi Malta eta viúcupaisihahi. Nacamuruequechapa eta yucu, tíchuhahavianapa viásacavayarehi taicha vicasarechavacapai taicha eta une étapa eta tiquiva. Énapa títatihavianahi. ³ Tacahe, ema Pablo tinerecapa eta yucuqui máijuquechapa. Tatiarihihipuca eta quichare te manereru. Tásiha, tiúchujicapa eta quichare, táimijunapa eta yucu. Táechucapa te mavahu ema Pablo. ⁴ Te náimahapa ena ticavasanahi tayehe eta tiúrupuhi eta táechusirahi ema Pablo te mavahu, nacahepa:

—Ema maca achane ticaviurevapuca jácani, ticáparecahíchupuca. Tiúchucuhahi te une, ánipasera taviyihahi te tiájipahi eta matuparahahi. Vaipa máuchucuhahini —nacahepa.

⁵ Émasera ema Pablo máquijipicapa te yucu eta quichare. Tájina máichavahini. ⁶ Tacahe, ena tímararacanahi nacuchapaipa máepenahini, támahipucahini eta mavahu. Eta náimairahi tájina máichavahini, napanerequenehapa.

—Viyachupuca ema maca —nacahepa.

⁷ Te tachacaya eta vécharisinevahi, tatiarihihi eta barraca, maverahi eta pétiana napenanahi ena machaneranahi ema subprefecto, tupairucahi tayehe eta tiúrupuhi. Ema ticaijarehi Publio. Émapa tíchuhahavihi téchapajiricahavihi eta jena mapanaquenehi sache.

⁸ Matiarihihivare ema maiya ema Publio. Ticajumahi éma, eta muraca fiebre. Tisacahivare iti. Tívecahi éma te matuleta. Tiyana ema Pablo, máejirapanahi.

Tiyujaracapa, mayaseacapa ema Viya eta macanarasiraina ema macajumaquene. Tásiha, manacapa eta mavahu te máinahu. Jéhesare, tinaracapa ema achane. ⁹ Eta náimairahi ena apamuriana achaneana eta macanarasirahi ema macajumaquene, náepanavacapa ena apamuriana nacajumaqueneana. Macanaracavacapaipa ema Pablo. ¹⁰ Mapana caje eta viávihairahi tayehe eta tiúrupuhi. Ichaperinehi eta náitáti-rahavihi ena achaneana. Te viávacuhayarepa, tijaracasihahávianapa eta vicamunuqueneánayarehi eta vipaisirayareva.

Tímiyanavanavarepa eta napaisirahi, nacaijuherahi eta Roma

¹¹ Tasiha, viávacuhavarepa tayehe eta apanavare pacure tachimararuhihivare eta muracana técativacapa tayehe eta puerto viávihi. Eta juca pacure ticaijarehi Castor-Polux, Chámeana. Tiásihahivare te Alejandría. ¹² Eta vipaisirahi, vítecapapa te apanavare puerto ticaijarehi Siracusa. Víchecapa tayehe mapana sache vicahe. ¹³ Te viyanavarepa, vijuchecapapa vítecapirapa tayehe eta puerto Regio. Te apanapa sache tépanavavarepa eta técativacapa te vana. Tímicatachavipa eta vipaisirapahi. Te apanapa sache, vítecapapa tayehe eta puerto Puteoli. ¹⁴ Te jena avasare, vicainunapa ena apamuriana vichamuriana, tíminasichahavianapa. Étana semana vicahe eta nayehe. Tásiha, vipaicapa te tiájipahi, vicaijuhepa eta te Roma. ¹⁵ Ena apamuriana vichamuriana ticavasanahi te Roma tisamairicahavianapa eta vítecapirayarehi. Nárajapapa tiácapahavianahi te achene te apanahivare avasare ticaijarehi Foro de Apio. Énerichuvare ena apamuriana tiácapahavianahivare, ticuchapahavianapa tayehe eta apanahivare avasarechicha ticaijare Tres Tabernas. Te máimahavacapa ema Pablo, tiúrisamuréinehi naicha eta nácapirahavihi ena vichamuriana. Tétumechavapa ema apana. Mahasulupayachapa ema Viya. ¹⁶ Te vítecapapa te Roma, ema capitán Julio mahentregachapa ema comandante tayehe eta guardia ena présoana.

Émasera ema Pablo náisapapa títecapapa te apana peti, matiarihihisera ema émana suntaru tijaneacahi.

Emá Pablo máimitucavacapai ena téjirapanana te máitecapihahi

¹⁷ Te mapanapa sache eta vítecapirahi te Roma, ema Pablo máimichuhavacapa ena náiyarahana ena israelítana ticavasanahi te jena avasare. Te tíurujicavanapa, ema Pablo máichavacapa:

—Nuparapenaveana, tájjanéni nutapiravainahini. Tájinavare nícharacahini ena vijaneanana. Váhivare nucaecahi eta nayeherepianaini ena viáchucanaveanaini. Nucaeratahisera te Jerusalén, timetauchanuanahi te namirahu ena tuparairucana romanoana. ¹⁸ Eta nayaseresiranuhi, navarahahineni ticaicanuana taicha náimahahi éna tájina taviuchanuhini táimicapanuhini. ¹⁹ Énasera ena vijaneanana tuparairucanahi váhiquene návarahahini nacaiticanuhini. Eta tacahehi nuyaseserecapa núti étaina nucametauchacasiya te mamirahu ema Emperador. Tájinasera vahi numetauchaimahi ena nujaneanana ticaetemajiricanuanahi.

²⁰ Eta tacahe, nímicuhahehi nuvarahahi nímatihyare éti, numetacaheyareva eta juca níchavaquenevahi. Ticaviurenuhi eta néhisirahi ema Cristo, ema vicuchapaquenehi vimutu viti israelítana, eta tímitiacanuhi puíticha te juca cadena —máichavacapa.

²¹ Tásiha, ena náichapa:

—Tájina váhiya visamairicavi. Váhivare vijacapa eta carta tíásiha te Judea táechajisihavihini píti. Énapa ena vichamuriana israelítana tíásihanapahi eta ánaqui, váhivare náechajisihahini eta piviuerevahipuca píti.

²² Vivarahasera visamavi puiti péchajisiha eta pipaneruanahi, taicha visamairicahi eta nacatichirahi ena vijaneanana tiávihanapahi te avasareana eta juca arairuhi éhiruhi —náichapa.

²³ Tacahe, náijarechapa eta sache máechajisiraya. Te jena sache, títecapanapa ena camuriqueneana israelítana tayehe eta máitecapihahi ema Pablo. Tépanavapa te jena yáticarahi téchajicahi éma. Tiámainucava te

cáperehichichapa títapiricapa eta macametarairuirahi eta máechajiriruva ema Viya. Máimivehpicapahi eta máechajicuirapahi eta Sagrada Escritura. Máimitucavacahi éna eta náimatiraya ema Jesús eta émairahi Cristo, ema nacuchapaquenehi. Macajimuyacavacahi eta náehisiraina éma.

²⁴ Tásiha, típutsimurihavanapa ena tisamararacanahi. Natiarihihi ena apamuriana nasuapa eta macayemaqueneanahi ema Pablo. Natiarihisera ena apamuriana vahi nasuapahini. ²⁵ Éna, vahi návarahapahini nasama, timutserahavanapaipa tiyanana. Tacahe, ema Pablo máichavacapa:

²⁶ —Machu ecucutihini ena viáchucanaveánaini acane. Matupiruvahi ema Espiritu Santo eta máechajisihavacahi éna te mametacapa ema víyarahaini profeta Isaías. Máichapa: “Piyana pimetaca ena naena achaneana. Ani píchayare: Nímatihe éti eta emasuapajiraivahi. Épiyacavahi religiósöhehi; tétavicavahisera eta tamuracavahi eta esamureana. Eta juca emasuapajiraivahi, tahapapiricahi eta ecaicutiarairahi eta numetarapiana étapa eta nímereuchaqueneana. Tájinapa táichahíni vicuchapahini eta éneuchiraváina, evarairapucaini ecasiñahini me Viya, apaesa macanaracahini” máichapa ema Espiritu Santo.

²⁸ Ácaicutiaraqueneéna éti, puiti juca vicaijuheya vimetacaya ena apavasanana eta mavarairahi macuchucuhaya éna apana ema Viya. Tásiha, éna nasapihayare nasamaracayare —máichavacapa ema Pablo.

²⁹ Te tamutupa eta máechajisirahi ema Pablo, tiyananapa ena majaneanana, tíumehavanapaipahi.

³⁰ Apina año macahehi ema Pablo tayehe eta máitecapihahi. Tamutu sácheana majacapavacahi ena tipaipiuchanapahi. ³¹ Máechajisihahi eta máechajiriruva ema Viya, máimitucahivare eta náehisiraina ema Viáquenu Jesús, émairahi yátupiquenehi Cristo. Nájina nacamatinaahini. Náisapahi ticametarairu.

Tamutupa eta néchajiriruvana eta piyehe.

Romanos

¹ Nuti Pablo, mavanaranuhi ema Viáquenu Jesucristo, manerejirunhivare eta mayehenuyarehi apóstole. Tituparacanuhi eta nucametarairuyare eta mapanerechirahi ema Viya eta mavarairahi macuchucuhaya namutu ena ticasíñavanaya mayehe ema Machicha.

² Ema Viya, ánaquiaparipahi eta juca mametasiravacahi ena víyarahanaiani santo profetana eta mapanerechirahi eta macuchucuiraya ena achaneana. Tásiha, nájuqueneharipahivare éna. ³ Eta Sagrada Escritura táechajisihaipa ema Machicha ema Viya eta máucupaisirayarehi te juca apaquehe. Yátupiyarehi Crístohi éma. Achanequenehi eta máimahi. ⁴ Natiarihihisera ena ticatianacanahi éma. Náimicapacahi éma. Émasera ema Espíritu Santo, tiáramicarehi eta macaechepusirahi éma te máecari. Éta pa tímereuchahi eta yátupiquenérahahi Machicha ema Viya. ⁵ Puiti ema Viáquenu Jesucristo tijapanunuhi eta matuparasiranuhi eta nuyaniraya nupaicaya te tamutu avasareana, nucametarairuyarehi eta najacapacarevayarehi me Viya namutu ena tisuapanayare, náehica éma. ⁶ Te namuri ena nasimutuqueneana, etiarhivare éti apanava. Tíchuhahéhivare ema Viya, machaneryarehi ema Machicha Jesucristo, mavaraha tauri eta ecaemataneasiraya éma. Puiti nucajurehe eta juca nuncartane emutu eti nuchamuriana ecavasanahi te avasare Roma, máemunaruqueneanahi ema Viya. Nuvaraha macatajicahehinehi ichape ema Tata Vicaiyaque-ne, émapa ema Viáquenu Jesucristo; náijaracahéhinehi táurivaina eta epanereruana.

Éma Pablo mapanerechaipa tiyanayare te Roma

⁸ Núti, tétavicavahi eta nucunachirahi ema Viáquenu Jesucristo, nuhasulupayachahi ema Viya íchavenehi emutu éti. Namutu ena achaneana te avasareana téchajisiaheanahi eta yátupiriripahi éhica ema Viya. ⁹ Núti nuvapiNAVahi eta nucaemataneasirahi ema Viya, eta nucametarairuirahi eta máimiturapiana ema Machicha Jesucristo. Ema Viya tímararacanuhi eta néñamiravahi eyehe éti. Núti, tamutu sácheana te nunarasirana, te néchepusirana, nuyaseuchahehi me Viya, máijaracahéhinehi eta iúriváinahíni éti. ¹⁰ Nuyaseuchavahivare eta máispiranuinahíni nítujisiravainahini nupaipiuchahe. ¹¹ Ichape eta nuvarairahi nímahahe, nímicatacahehinehi eta tajurusiraya eta íachanevana apaesa muracaquenénapaini eta éhisiraya ema Viya. ¹² Éti apanava ímicatacanuhinehi. Vétumejiricacahivaréni eta véhisirahi ema Viáquenu.

¹³ Nuparapenaveana, nuvaraha numetacahe apaesa echa. Ichapemurihi eta nuvarairahi níteca nímahapanaha. Puíticha, vuíchahasera nítujicava. Tijuricati nétupicavahinehi eta nítésirainahinehi eyehe, natiarihichuhipucaini nucajimuyacavacahinehi eta nanerejisiravainahinehi náehicahinehi ema Viáquenu, tácutihinehi te nupaicainapa te apana avasareana. ¹⁴ Taicha ichape eta néñamiravahi núti eta nucaturahairahi nucametarairuirayare nayehe namutu ena achaneana te ichapeana avasareana énapa ena tiávihana te vámahiana, ena tiávihana te isanítiana. Nájina nunerejiruimahi. Namutuyare numetacavaca: ena cráyanana rícoana énapa ena páureana. ¹⁵ Tacahe, núti nutserereacavahi eta nupaipiuchiraheya te iávasa Roma, nuvarairahi nímitucahe eta máechajiriruva ema Viya tayehe eta véhiruhi.

Vijacpacareipahi mayehe ema Viya táichavene eta vicasiñavairahi mayehe

¹⁶ Núti nuvapiNAVahi eta nímitusirahinehi tayehe eta véhisirahi ema Cristo. Tájina vahi nutsirihahinehi, taicha tétavicavahi eta macasiñacarevahi ema Viya máitavichayare tamutu eta macuchucuirahavi. Éma, tétavicavahi eta mavarairahi nacasiñavahinehi ena israelítana eta mayehe, énapa namutu ena apamuriana achaneana. Tétavicavahi eta máitupajijiasiravahi máitsivachinehi eta náitaresirana, tamutupa arairuhi máicha. ¹⁷ Taicha ema Viya máimerecaripa eta vijacpacarevahi eta mayehe vimutu viti vicasiñavanahi mayehe. Tájinapa vácamunuhinehi. Tarataripa eta vicasiñavairahi mayehe. Tásiha, éma ticuchucuhahaviripa. Taicha eta Sagrada Escritura, ani tacahehi eta táechajiriruvahi: “Nácani ticasíñavanahi eta me Viya, tijacpacareanahi, máichecuaracuireyare eta náitaresiraya táicha”.

Ticaviurevana namutu ena achaneana táichavene eta náejecipiravana

¹⁸ Acane ema Viya manacasamurechahi ena achaneana eta matiarirahinehi éma. Manacasamurechahivare eta máicuñasiraya namutu ena téjecapavanahi, máurirahanahi. Yátupihinehi eta nacaicuñairayare táichavenehinehi eta namasuapirahinehi eta yátupiqueneana, váhivare návarahahinehi náinajicahinehi eta navainarajivana. ²⁰ Máimahasihinéni ema Viya Eterno eta viyehe, véchahisera eta matiarirahinehi, taicha tamutu vímaha eta máepiyaruanahi, étaripa eta apaquehe éta pa eta tatiarihiqueneanahi. Émarichuhi ema Viya téchapaji-

ricahi tamutu eta táepaniravahi eta juca apaquehe, puíticha eta juca viávacurehi. Étara vímatiarahi eta matiarahirahi ema máitupajjiaruvaquenehi. Énaserá ena achaneana, vai návarahahini nacasiñavahini eta mayehe. Étapa naviurevahi éna. ²¹ Tamapurujihisera eta náimatirahi ema Viya, vahi návarahahini nasuapahini; váhivare napicauchahini. Váhivare nahasulupayachahini éma. Tétavicavahi eta táejecapiravahi eta napanereruana. Étachucha napanerechahi eta tájiparacana. Muracasamureanahivare. ²² Ticasiñavavai-canahi taicha tímijachavanahi títupajjiacavana. Tétavica vahisera eta namaiturerevanahi. ²³ Vaipa najirau-chahini ema Viya máepenacacahi. Váipavare mapicauchacarehini nayehe. Tásiha, náemitisicaipa éma. Nasapihapa najirauchahi eta nasiñarajiana achanemirana matumerairahanahi náipunechucha ena achaneana. Tamutuchucha nacasiñarajipahi cáyurepuca, quicharepuca, sáraremirapuca.

²⁴ Tacahe, eta máimairahi ema Viya eta náichirahi eta júcana, máisapapa éma. Máinajiacavacapa. Puíticha navaraharichucha tímianavana naicha eta natuhusivana titsiriacareanahi. Tavayuachivare eta najamurairavana tauriqueneana. Tétavicavahi eta namaeperajisiracacahi. ²⁵ Tétavicavahivare eta náepuirahi ema Viya, émayarehi najiraureyarehini. Tasapihapa téjecapavanahi, eta náimijachirahi tíuripana eta najirauchira eta nasiñarajiana náepiyuanahi. Tásiha, náemitisicapa ema yátupiquenehi. Jéhevarequenehi máichecuaraquireyarehi eta majirauchacareva. Amén.

²⁶ Eta tacahe, ema Viya macaerajicavacapa. Vaipa mávarahahini máemechavacahini. Máisapapa náichahi eta navarahaqueneanahi. Tásiha, tétavicavahi eta náichaqueneanahi. Nararihi ena esenana, énjicacapa náichacacahi eta napecaturana. Vaipa nácomesahini ema ajaira. ²⁷ Énaripa ena ajairana, nararihivare énjicacahi náichacacahi eta pecatuana. Vaipa nácomesahini esu esena. Navayuchaipa eta najamurachiracacahi. Váhiquene nátsirihahini. Táichavenehi eta náejecapiravahi, énajivapa tímitaequenehavana tayehe eta náicuñayare.

²⁸ Ena nani, ichape eta nacaerajisiravahi eta me Viya. Vaipa návarahahini náesenicahini éma. Váhivare návarahahini napanerechahini eta táuriqueneana. Tásiha, ema Viya máinajiacavacapa, vaipa émainahini máechavacahini. Máisapapa tímianavana eta náichirahi eta tájiparacana tauriqueneana. ²⁹ Tétavicavahi eta náepiyaresirahi eta napecaturana tauriqueneana: Navehahi esu esena apayena. Ena amaperuana náichahi eta natuhusivanahi. Téharahiana nayehe nácani matapiravareanahi. Tamutupa navaraha nacayehe, cáetemarahiana, ticapinarurahiana, ticipahiana, tipiararecana te tise mana, tivayuarecana, sémarairihiana, téchejihiana. ³⁰ Tíñemahi eta náechejisirana nayehe ena apana achaneana. Nacatichavare ema Viya. Tiácapaemarahiana, cájamuravana, píncanillana, tisiñavavairicana. Tisipanerehiana eta náichirayare eta apana pecatu navarahaqueneana. Masuapajirairahanavare nayehe ena ticachichana. ³¹ Tímijacha-

vanahi tétupicavana eta náichirahi eta tauriqueneana. Tivayuarahiana eta náechajirisiravana. Vahi témunarahiana. Váhivare tiperdonarahiana, nájina najapanuqueneana. ³² Náechahinéni éna eta taurivahi eta júcana me Viya. Náechahivare éna, eta táimicapacacavacayarehi, tímianavanarichuchasera eta náichirahi. Náimiaquipaicahi nácani apamuriana. Émasera ema Viya máitachayarehi eta náicuñayare.

Éma Viya títupiruvahi eta máitachirayarehi eta náicuñayare

² Étiarhisera éti ímijachahi tájina eviurevaimahi eta vahi ácutimahi ena apamuriana máimatirahanahi ema Viya. Ímijachavahi tájina epecaturaina. Éti ecaechivacahi ena tíchanahi eta tauriqueneanahi. Váhisera étupicavahini eta ecaechirahi, taicha étirichuhi nacutiqueneanahi eta íchaqueneana. Énerichuhivare eti ecaviurevahivare. ² Víti véchahi matupiruvahi ema Viya eta máicuñasiravacaya ena tíchanahi eta juca tauriqueneana. ³ Étipa, éjecapavahi eta ímijachirahiticaitehayare eta ícuñayare, eti ícharahiana eta tavasiqueneana ecutirichuhinéni ena ecaechiqueneana. ⁴ Émasera ema Viya, tétavicavahi eta máurivahi eta eyehe. Vahi máicuñacahevanehini. Ticamichahehi, ticuchapahevare, mavarairahi éneuchavahini eta mayehe, ínajicahini eta íchira eta tauriqueneana. Tásiha, vahi ecuemepureca eta máurivahi eta eyehe. ⁵ Taicha táíñehiqueneyare eta ícuñasamiyare éti, te vahi ecueuechava, ínajicavare eta tamuracavahi eta esamureana. Taicha evayuchapaichucha eta ecurumutusrirahi eta etapiravana. ⁶ Taicha éma, matupiruvahi eta máijarasirayare eta táitsivayare eta víchaquenepachu. ⁷ Vítiripa viti machanerana ema Viya, tíjaracahavinapa éma máichecuaraquireyare eta vítaresiraya, taicha vivaraha puiti vicurisamurechaya éma, vímianavaya eta vivapinairavayare vicha eta táuriqueneana. Vicuchapavaya eta visiapiraya eta te majaraivahi, vicunachacareya mayehe, máichecuaraquireya eta viúricacarevaya. ⁸ Muracainapasera eta máicuñasiravacaya namutu ena masuapajirairahanahi énaripa ena ticatianacanahi eta yátupiqueneana, tasapihahi náuricahi eta tauriqueneanahi. Navayucharipa eta náimiyusemasirahi ema Viya. ⁹ Ichape eta nacatajivairaya, tíyahahacavanayare namutu ena tíchanahi eta juca tauriqueneana. Ticuticanayare namutu eta náicuñayare, ena israelítana énapa ena apavasanana. ¹⁰ Étisera eti íchanahi eta táuriqueneana, tíjaracahénapa ema Viya eta íávi-haya te majaraivahi. Tétavicavaya eta ecunachacarevaya mayehe. Tinaracainavarepa eta epanereresiranainihi. Ecuticacaya emutu eta iúricacarevaya. Eti israelítana, vahi ecachuricaimahi ena apavasanana.

¹¹ Éma Viya vahi manerejicaimahi ena máicuñauranaya. Ticuticanayarehi máicha. ¹² Nácani máimatirahanahi eta mavanairipiana ema víyarahaini Moisés, ticaicuñanayare. Énerichu nácani náimatihiné-nipuca, tavetijinapa ticaicuñanayare taicha vahi nasuapahini. ¹³ Taicha vahi tijacapacareanaimahi mayehe

ema Viya nácani vahi náitauchahini eta nasamaque-
neanahi. Tijacapacareanayaresera nácani títauchanahi
tipicauchanahi eta vanairipiana. ¹⁴ Nararihivare ena
tinerejicavanahi ena apavasanana, váhinéni náimatihini
eta vanaripiana, nasapihasera natupiruvahi te
nasamureana eta náichirahi eta táuriqueneanahi,
taicha yátupihahi eta nasuapirahi eta manacasamure-
chaquenehi ema Viya. ¹⁵ Éna, náimerecahi eta manaca-
samurechirahi ema Viya eta vanairipi te nasamureana.
Énajivaya tisamavana te napanereruana eta táurivahi
eta náichaqueneana, éta ticatiuchavacahi. Te téjeca-
vanapuca, tisamavanahivare eta tamaurivahi eta
náichaqueneana. Tásiha, napicahi eta náicuñayarehi
táicha. ¹⁶ Járarajapa eta sáchezare, ticayaseserehia-
nainapa namutu ena achaneana te mamirahu ema
Viáquenu Jesucristo. Éma, máimatiya tamutu eta
náichaqueneana tayumurevanahi. Étarichuhi eta
numetarapihi te nucametarairupa.

Ena israelítana, ena ticatuparahanainihini eta vanairipi- ana, váhisera náitauchahini

¹⁷ Étisera eti israelítana, ímijachavahi yátupihahi itaucha
eta vanairipiana, ecunachavaipahi mayehe ema Viya.
¹⁸ Ímijachahivare ítuca eta mavarahaqueneanahi ema
Viya. Énerichuvare eta vanairipi éhiruhi tímitucahehi
eta enerejisirayare icha eta táuriqueneana. ¹⁹ Tétavica-
vaipahivare eta ecunachiravahi taicha ímijachavaripa
ecatuparaha eta ímitusiraya ena apavasanana apaesa
náesenicahini ema Viya, náimatiyareva eta máechajiri-
ravana, náinajicayareva eta napecaturana, vápavare
nansimahi eta te timapicu. Ímijachahivare ímatie-
queneha tamutu eta vanairipiana, ítamuturusirahi
tamutu eta tayeheana yátupiqueneana. ²¹ Éti evaraha-
hipuca ímitureca. Tituparacahehisera étivaya ítaurahi.
Éti, ímiturecahi vahi nacuamereca ena achaneana;
étisera epanerechahi eta iámeresiraya. ²² Tacutiquene
váhivare iúrica nacaesenarahini ena eparajairavana;
étisera epanerechahi eta ecaesenaraya. Ecatichavare
eta nasiñarajiana; étisera matsiriarairahahehi eta eve-
hairahi eta táijaracasiana eta nasiñarajiana. ²³ Ecuna-
chavahi eta ímijachiravahi ítuca eta mavanairipiana
ema Viya; étisera tamutu sácheana ícatayayajicahi
eta mavanairipiana. Tétavicavahi eta emapicauchirahi
éma. ²⁴ Ani tacahe eta Sagrada Escritura: “Ena
achaneana vahi napicauchahini ema Viya íchavenehi
éti israelítana” tacahepa.

²⁵ Eti ecunachavaipahi eta israelítairaheni. Tacamu-
nuhisera eta ítauchirainahini eta vanairipiana. Taicha
eta juca emaitauchirahi, tímicutijiricavaichucha vahi
étinahini israelítanainaheni. ²⁶ Ticachuricaheanaripa
nácani apavasanana, nasapihaipa náitauchahi eta
vanairipianahi. Ema Viya máimahahi eta táurivahi eta
náitauchirahi, váhinéni israelítanainahini éna. ²⁷ Ena
apavasanana títaurahianahi tayehe eta vanairipiana,
éna tiyaseserecanainapa eta ícuñayare emutu eti
emaitauchanahi, émepururecavaipahi israelítairaheni,
éta pa eta ecaravahuirahi eta vanairipiana. ²⁸ Váhivare
étaimahi ecunachacarevaya eta ecamarairahi te

iáquehe eti israelítana. ²⁹ Nácanisera yátupiquenehi
eta nasuapajiraiva, jéhevare ena yátupiqueneanahi is-
raelítana. Vahi tácomesaimahi ticamarcana te náque-
heana, taicha éna yátupiquenehi te nasamureana
námahi eta nacamarcairahi eta machanerairavacahi
ema Viya. Vahi étaparacainahini eta nacaravahuirah-
hipuca eta vanairipiana, étainapapucaini nacunacha-
carevainahini nayehe ena achaneana. Eta ticamunu-
carehi eta náitauchirayare eta mavanairipiana ema
Viya. Éta pa nacunachacarevaya eta mayehe.

Ena israelítana tímijachavanahi nacarichu ticu- nachacareana

3 Eti nujaneanana ímijachavaipa ecunachacarehi
taicha eta israelítairaheni, ecamarairahivare te
iáquehe. ² Jéhesare, jararihi eta ecunachacarevahi,
máicha ema Viya. Éma, matuparacavacahi ena
viáchucanaveanaini eta náimituresirahi eta yátupi-
queneana máechajiriruvana, vítipa viti námari-
queneana. ³ Tayanapane natiarihihi ena vijaneanana
vahi náitauchahini eta natuparahahi, émasera ema
Viya, váhiquene títavaimahi eta máitauchiraya tamutu
eta máijararuvanahi eta nayehe. Taicha tétavicavahi
eta máitauravahi éma. Tayanapanepuca natiarihi ena
achaneana énaína náepiyahirahi, émasera ema Viya
máitauchayare tamutu. Eta Sagrada Escritura, ani tac-
ahe: “Tayanapane ena achaneana vahi navarahahini
nasuapa eta pítauravahi, piti Tátachicha, tamutu
sácheana pímerecahi píti eta pítauravahi. Tayanapane
natiarihi náimijachahi vahi tátupiruvahini eta
píchaqueneana, tétavicavahisera eta pitupiruvahi te
tamutu” tacahepa. ⁵ Vimutu vímati tétavicavahi eta
majapanuravahi ema Viya. Németeacaserá etiarihi eti
ímijachahi tiápajucavayarehi eta macunachacareva
taicha eta esipecaturairavacahi. Ímijachavavare vahi
tátupiruvahini eta masemairahi eta ecapecaturairahi.
¡Tétavicavahi eta éjcapiravahi! Ecuti ena achaneana
mapanerereana. Ema Viya, tatuparacahi máicuñaca-
vacayare namutu ena téjecapavanahi, taicha tétavi-
cavahi eta masantovahi. ⁷ Ímijachavahi tísapacarehi
eta épiyahiraiva, taicha ímijachavahi títametacahe eta
yátupirahi eta tatupiruvahi eta máechajiriruvana ema
Viya. Ánipapuca tacahe eta epanereruana: “Ema Viya
ticaijare tijapanurahi. Tacahe, tiápajucavayare eta
macunachacarevahi éma, taicha táetaviuchayare eta
majapanuirahavi eta máimairainapa eta vivayuchi-
ravahi eta vivainarajivana. Tásiha, vahi tátupiruvahini
eta mavarairahi tícuñacahavi, taicha tiápajucava eta
macunachacareva vícha, ¿masi?” ecahepuca eta
epanereru. Natiarihivare ena tépiyaequenehahavi
náimijachahiji tacahe eta vímiturapi viti apóstoleana.
Muracayaresera eta náicuña namutu ena tacahehi eta
napanereruana.

Vimutu viti achaneana vicaviurevahi eta me Viya

⁹ Eti nujaneanana, vahi ecuimijachava viti israelítana
víuripanahi nayehe ena apamuriana achaneana. Táji-

naquene viúrivainahini te mamirahu ema Viya. Taicha vímatiequenehapa eta vimutuirahi vicaviureva me Viya viti achaneana, viti israelítana énapa ena apavasana. ¹⁰ Eta Sagrada Escritura, ani tacahe: “Nájina náurihini, émanainahipucáini máurihini, ésunainahipucáini esena súrihini. ¹¹ Nájnavare énajivainahini náimatihini ema Viya, váhivare navaraha náesenica ema Viya. ¹² Namutuhi téjcapavana, namutuhivare táquipaicahi eta tamauriqueneana. Nájina náichahini eta táuriqueneana, émanainahipucaini máichahini. ¹³ Tíñmahipi eta náechejirisiravana. Tétavicavavare eta navayuaravanahi. Éna nacuti eta quichare téchurahi, tétavicavahi eta nacaetemaraiva. Náemata-nechucha namaldicióncha nácani apamuriana. ¹⁵ Apaesarichu nacamunu navarahaipavare ticaparecana. ¹⁶ Sirujiana eta náitaresirana, ticaetemarecana. ¹⁷ Vahi natanucaimahi eta náurivainahini nayehe ena apamuriana. ¹⁸ Tájina vahi napicauchaimahi ema Viya” tacahepa eta Sagrada Escritura.

¹⁹ Nujaneanana, eti ímijachavaipapuca vahi étinahini táechajisiha eta Sagrada Escritura. Téchajisihahehisera, taicha eti iávacuhanahi eta vanairipiana. Emutuhi ecaviurevahi. Te jena sácheyare, vaipa ecatiuchavaimahi. Ematinainaripa emutu taicha eta eviurevanahi. Táurica eta ecaicuñairayare emutu. ²⁰ Natiarihipucasera nácani tímijachavanaripahi tijacapacareana taicha navarahainapa náitauchaya eta vanairipiana. Váhiquenesera tijacapacareanaimahi me Viya, taicha vahi étaparacaimahi eta náitauchirahi. Taicha eta vanairipiana, tímimatichahavichucha eta vicepecaturairahi.

Vijacapacarehi mayehe ema Viya táichavenehi eta vicasiñavairahi mayehe ema Machicha Jesucristo

²¹ Puítisera, ema Viya tímimatichahaviripa eta vijacapacarevayarehi eta viúchucuiraya. Vahi étaparacaina eta vivarairahipuca vítaucha eta vanairipiana. Tanasi-queneripa eta Sagrada Escritura, táechajisihaipahi eta máitecapiraya ema ticatiuchahaviya, vijacapacareya máicha. ²² Eta tacahehi puiti, yátupihí eta vijacapacarevahi vimutu viti vicasiñavanahi mayehe ema Jesucristo. Ema Viya vahi manerejicaimahi nácarichuhini ena tíuriana. Váhivare máepuruimahi ena achaneana tisipecaturanahi. Eta nacasiñairavahi eta mayehe, majacapavacahi namutu. ²³ Taicha yátupihí eta vicepecaturairahi vimutu. Vimutu véchuriaca eta viúrivana, vijacapacaréni me Viya. Nájina émanáinahini mátipiruhíni. ²⁴ Étasera eta máemunasirahavihi ema Viya, tijapanuhavihi. Tijacapahavihi táichavenehi eta vicasiñairahi ema Machicha Jesucristo. Émapa tivachachinahavihi eta vitapiravana táichavenehi eta vicepecaturana. ²⁵ Ema Viya, tétavicavahi eta matupiruvairahi. Vahi macamichaimahi ena téjcapavanahi te machacaya. Tásihasera, tijapanuhavihi. Máijararecahi ema Machicha eta mavachachirahi eta vicepecaturana, vímicapacahi éma. Eta vicasiñaira ema Jesucristo, macaepahahi eta véjcapiravanahi vicepecaturanahi. Tásiha, vijacapacarehi mayehe ema Viya.

²⁷ Tacahe, puiti visamaripahi eta majacapirahaviripa ema Viya, étachucha tíchahi eta vicasiñairahi ema Jesucristo. Vahi vétupicavahini eta vicasiñavavairisirahi eta vítauchiraipa eta vanairipiana. Váhiquenevare étaparacaina.

²⁹ Vahi ácarichuimahi eti israelítana ejacapacarehi me Viya. Énerichuvare tijacapacareanahi namutu ena apavasanana ticasíñanahi. Tijacapahavihi ema Viya vimutu viti vicasiñavanahi eta mayehe. ³¹ Váhivare ecuimijacha nútinahipucaini nímitucahe vaipa tasuapacarehini vyehe eta mavanairipiana me Viya. Viti véhicanahi ema Jesús, táitusiava vicarichuhi virataha vítaucha eta mavanairipiana ema Viya. Vahi vínajicaimahi.

Vicutiyarehi ema víyarahaini Abraham eta macasiñavairahi mayehe ema Viya

4 Németeaca etiaríhi eti evarahaipa échajisiha ema víachucaini Abraham. Evaraha ecunacha eta macaemataneasiranahi ema Viya, ímijachirahi éta tíchahi eta majacapacarevahi me Viya. Ímijachahivare táuriha eta macasiñavavaisiravapuca éma. Numetacahesera: Eta majacapacarevahi me Viya, vahi étainahini táichahini eta macaemataneasirahi ema Viya. ³ Eta Sagrada Escritura, ani tacahe: “Ema Abraham, tétavicavahi eta macasiñavairahi me Viya. Eta tacahe, tijacapacarénehi me Viya” tacahepa.

⁴ Tiuri puiti, viti achaneana, te vicaematanerecahi, tatuparacahi ena vicaemataneyeruanahi eta navachachirahaviyarehi. Vahi tíjaracasichahavianaimahi eta najapanuirahavihini. Émasera ema Viya tijapanuhavihi, tijacapahavihi táichavenehi eta vicasiñavairahi eta mayehe. Vahi étaparacaimahi eta vicaemataneeasirahi. ⁶ Énerichuva ema víyarahaini David máechajisihiha eta náuricacarevahi ena ticapecaturarahiana eta majacapiravacahi ema Viya, tájina étaparacaina eta nacaemataneeasirahi. ⁷ Ánipa macahehi: “Tétavicavapa eta náuricacarevahi nácani maperdonachaqueneanahi ema Viya eta napecaturanaini, tijacapahavihi tímicutijiricavainehi tacuijahini véjcapiravainahini” macahepa.

⁹ Tacahe, eta juca viúricacarevahi, vahi vácarichu vicituparahaini viti israelítana. Énerichuhivare tatuparacahivare ena apavasanana. Vécharipahi eta majapanuirahi ema Viya ema Abraham. Tacarichuhi eta macasiñavairahi, majacapahi ema Viya. ¹⁰ Ímijachaipapuca éti, eta majacapacarevahi ema Abraham tásihaquenehi eta macamarcairahi. Numetacahesera: Váhiquene étainahi táichahini eta macamarcairahi éma, taicha te táequenepa eta majacapirahi ema Viya, mapaenumavahi ticamarca ema Abraham. Éta táicutiarayarehi eta majacapiraipa ema Viya táichavenehi eta macasiñavairahi. Émara ema achane máinapuiruhi ticasíñavahi me Viya. Puíticha ema Abraham, émapa vicaiyaquenehi vimutu viti vicasiñavanahi me Viya, vijacapacareipa viti apanava. Tacamunui-pasera vácuticacahini vicasiñavahini mayehe, viti israelítana étipa eti apavasanana.

Emā Viya máitauchayare eta máijarasirahaviya eta vícuchihi táichavene eta vicasiñavairahi eta mayehe

¹³ Emā Viya tíjaracavahi eta máijarasirayare emā Abraham énapa ena mámariéqueneana tamutu eta apaquehe, návapairuyare. Máijaracayare táichavenehi eta macasiñavairahi emā Abraham. Vahi étaparacainahíni eta masuapirainahini eta vanairipiana. ¹⁴ Taicha te tatiarihinahini eta náicuchihi ena títauchanahi eta vanairipiana, tamapurujipapucaini eta vicasiñavairahi, tamapurujipavarepucaini eta máijarasiravahi emā Viya eta majacapirahaviyare. ¹⁵ Taicha eta vanairipiana, étachucha támaparaucha eta náicuña ena téjecapavanahi. Tásiha, vimutu vicaicuchiyaehini eta vícuña, taicha vimutu véjecapavahi †.

¹⁶ Emā Viya, tétavicavahi eta majapanuravahi. Tásiha, yátupi máitauchayare eta máijarasiravana nayehe namutu ena mámariéqueneana emā Abraham. Vahi nácarichuhini ena téhicanahi eta vanairipiana. Nayeheyareva namutu ena ticasíñavanahivare mayehe, ticutianahi emā Abraham eta macasiñavairahi. Eta tacahe puiti, eta vicaiyairahi vimutu víti emā Abraham te mavahuana emā Viya. ¹⁷ Taicha emā Viya, ánipa maicha emā Abraham: “Puiti nunacaviyare píti nacaiyaqueneyare ena achaneana te camuriquene avasareana”. Tásiha, emā Abraham, ticasíñavahi muraca me Viya eta máitauchirayare eta máijarasirayare emā machichaya, tayanapane eta mácheruanahi éma, ésupa esu mayena. Taicha emā Viya, tamutuhi máituruequeneha. Emā Abraham ticasíñavanahivare eta majacapirayare eta máicuchihi, tayanapane tájinaichaha máimahahini.

¹⁸ Emā Viya mametacavarepa emā Abraham eta macachichairayare, camurianayare ena mámariéqueneanayare. Eta nasimutuvayare, tamutu nacavasayarepahi, camurianayarehi eta návasanaya. Emā Abraham, ticasíñavahi eta táitauchiravayarehi tamutu. Ticuchapavaipa eta máuchusirayare emā machichayarehi. ¹⁹ Emā Abraham, ichavicaipa éma, cien año eta mahañora. Ésupa esu Sara, ichavicaipavare, macheruhivare. Vaipa náuriahahini eta nacachichairayarehi. Váhisera máeñamavahini emā Abraham. Ticasíñavahi muraca eta mayehe emā Viya eta tamutuirahi máituruequeneha eta máitauchirayarehi tamutu eta máijarasiravanahi. Váhivare mapicacaracavahini. Eta macasiñavairahi, tétavicavahi eta macunachirahi emā Viya. ²² Eta tacahe, ichape eta majacapacarevahi me Viya táichavenehi eta macasiñavairahi muraca.

²³ Tacahe, eta vicaravahuirā eta Sagrada Escritura, vímatiequeneha vahi mácarichuhini emā Abraham majacapacarehini me Viya. ²⁴ Puiti, víti apanava vijacpacarehi me Viya eta vicasiñavairahi mayehe. Taicha emā Viáquenu Jesucristo táimicapacahi eta vipeca-

turana. Émasera emā Viya macaechepecuahi emā Machicha te máecari apaesa vijacpacareyarehi mayehe vimutu víti vicasiñavanahi mayehe.

Tétavicava eta víuricacarevahi táichavene eta majacapirahavihi emā Viya

⁵ Púitiripa vijacpacareipa me Viya táichavenehi eta vicasiñavairahi eta mayehe. Tásiha, tétavicavaipa víurivahi eta mayehe. Vaipa vípicacaracavahini tayehe eta vícuñayarehini, taicha emā vímicuñaruhi emā Viáquenu Jesucristo, macaepaharipa eta vícuñayarehini. ² Máichavenehi emā Cristo, tétavicavahi eta majapanuirahavihi emā Viya. Tásiha, tijacapahaviripa táichavenehi eta vicasiñavairahi eta mayehe. Tamutu sácheana víúrisamurehi eta vicuchapiraipa eta vijacpirayare eta vícuchihi visiapirayare te majaravahi emā Viya. ³ Te tatiarihinapuca eta vicatajivairayare, vivapinavachucha eta vicamichirahi taicha tétumechahaviya eta vímiyanirava véhica emā Viáquenu. ⁴ Táichavenehi eta vímiyanirava véhica, vijacaparipavare eta vitumevayare víratahairayare vicamicha tamutu. Tásiha, eta vicamichirahi tamutu, vicuchapainapa eta táitsivayare vícuchihi. ⁵ Tájina tímipanererécahvimahi taicha yátupiyarehi eta vijacpirayare eta vícuchihi. Vicasiñavahi mayehe emā Viya taicha tímimaticahaviripa te visamureana eta máemunasirahavihi máichavenehi emā máijararuhavihi Espíritu Santo.

⁶ Víti, tájina viviyaimahi eta vicuchucuiraváinahíni. Émasera emā Cristo, te tíurihi eta máimairahi, tíjaracavahi tépena víchavenehi víti máurirahanahi, eta macuchucuirahaviya. ⁷ Váhisera tácuticacahini eta visamureana víti achaneana. Vimutuhi véñama eta vítaresira. Téhesera tatiarihinapucaini eta véñamirainahini mácani achane máetaviuchahi eta máuriva, víjaracavapapucaini vépena eta vicatiuchirainahini éma. ⁸ Émasera emā Viya, tétavicavahi eta máemunasirahavihi, tayanapane eta vicapecaturahirichahanéni. Máijararecahisera emā Machicha Jesucristo máepeninahavihi. ⁹ Tásiha puiti, vijacpacareipa me Viya táichavenehi eta vicasiñairahi emā Jesucristo eta máepeninahavihi. Ichapehinéni eta véjecapiravahi, vimaesenisirahi emā Viya, mavarahahisera éma macaepahayarehini eta vícuñayarehini táichavenehi eta vipecaturana. Eta máepenirahi te crusu emā Machicha, puiti emā Viya tíchuhahavihi vipauchayare éma. Tájina vípicahini eta vívahásiraipa éma. Tásiha puiti, eta vicasiñavairahi eta mayehe, vaipa véñamavahini tayehe eta víuchucuirayare taicha eta máechepusirahi te máecari, eta tímicaecherachahi eta máitupajijiasiravahi eta macuchucuirahaviya. ¹¹ Puiti, tétavicavaipa eta víúrisamurevahi mayehe emā Viya máichavene emā Viáquenu Jesucristo. Tétavicavahi eta víurivahi mayehe.

† *Emā Pablo te mayeherepi eta máechajiruvana, ani macahe: “Te táviha tájina vanairipi, nájinavare ticaviurevahini eta nájecapira tayehe”. Étasera eta macayemaquenehi, ani tacahe: “Tatiaríhi eta viviorevahi vimutu, taicha tatiaríhi eta vanairipi te tamutu jácani vicaijuhepuca”.*

Éma Adán tímiaquipaichavi vimutu. Émasera ema Cristo émapa ticuchucuhaviyare.

¹² Tacahe, ema Adán, ema máinapuiruhi achane tiá-vapaicahi eta juca apaquehe, éma tinacuchahi eta pecatu. Tásiha, táichavenehi eta pecatu, járajapapa eta vépenira, tavachaequenehi eta pecatu, taicha tímirijicahaviripa tayehe eta pecatu. ¹³ Te tájinaichaha májuchahini ema Moisés eta vanairipiana, tatiarhipahi eta pecatu te juca apaquehe. Étasera tamajinairaichaha eta vanairipiana, vuíchaha nacaviurevahini ena achaneana. ¹⁴ Namutusera ena mámariéqueneana ema Adán tépenanapaipahi taicha mámaparaucha-ripahi eta mapecatura éma, tayanapanepuca eta napecaturana vahi tácutihini eta mamasuapajiraivahi, tayanapanehivare tájinaichaha eta vanairipi májurehi ema Moisés. Ema Adán, émapa ticaetehavihi. Te táequenepa, márajapainapa ema apana, émainapa tétupiripanahaviyare. ¹⁵ Víti, tétavicavaipahi eta visimutuvahi viti vicaicuñanayarehini tayehe eta ecuñaraqui te yucu infierno, étanaichuhinéni eta máejecapiravahi ema viáchucaini Adán. Émasera ema Viya, ichaperinehi eta majapanuirahavihi vimutu, mavarairahi ticuchucuhaviyare máichavenehi ema Machicha Jesucristo. Tamuturipahi macaepahahi eta tasimutuqueneana vipecaturana. Tájina tavachaequenénahini. Tájinavare jácani vicaematanearaqaimahi. ¹⁷ Étanarichuhinéni eta pecatu máejecapiravahi ema émana achane, émaripa ema viáchucaini Adán. Tiámairijicahaviripasera eta vépeniraya vimutu. Émasera ema Viya tiápajucavaipa eta majapanuirahavihi. Tijacpahaviripa máichavenehi ema émanaquenerichuvare achane, ema Jesucristo. Tijaracahavinavarepa eta arairuyare vítaresirayare vimutu viti vicasíñavanahi eta mayehe.

¹⁸ Eta mapecaturahi ema Adán, yátupi tiámaparáuchaviripa vimutu eta vicaicuñairaya. Émasera ema Jesucristo, tájina matapiravainahini eta máitaresirahi. Éma, tiámaparáuchaviripa eta vítaresiraya víti, vijacapacareipa me Viya. ¹⁹ Camurihavihi viti tacaerajiruanahi me Viya, táichavenehi eta mamasuapajiraivahi ema émana achane. Puítisera camurihaviripa viti vijacapacareanaripahi me Viya táichavenehi eta masuapajiraivahi ema apana achane Jesús, taicha tájina matapiravainahini eta máitaresirahi.

²⁰ Te táequenepa eta máejecapirahi ema Adán, ema Viya manaquicahi eta vanairipi. Éta tímitucahaviyarehi eta tavayuchiravahi eta vipecaturanahi. Puíticha tiápajucavapaipaicha eta pecatu, émasera ema Viya tiápajucavaichucha eta majapanuirahavi. ²¹ Tacahe, eta pecatu, ichape eta támaparáuchirahavihi tayehe eta vépenira. Étasera eta majapanuirahavi ema Viya tiámaparáuchaviripahivare eta vijacapacarevahi mayehe. Tásiha, píjaracahavinavarepa eta vítaresiraya máichecuaraquireyare máichavenehi ema Viáquenu Jesucristo.

Puiti eta majacpirahavipa ema Viya, vicutuparahapa vitupiruvainapa eta vítaresiraya. Vínajicainapa eta pecatuana.

6 Tiuri puiti, németeaca etiarihi eti ímijachaipapuca tíurihi vímiyanava vicha eta pecatu apaesapuca tácaecherapaipa eta táetaviuchirahi eta majapanuirahavi ema Viya. ² Váhiquenesera táuricahini vímiyanavahini vicha. Taicha tépaharipa eta tapamisirahavini eta pecatu. Nuvaraha vahi ecuemitisica eta ímitucasi- vanahi. Eta vicaicachasirahi eta víjarasiravahi véhicaya ema Viáquenu Jesucristo, viúrujiacaripa éma. Tásiha, tímicutijiricavaipa vácachanehini eta máepenirahi, vépenahivaréni víti. Vaipa tárataha tipamicahavi eta pecatu. ⁴ Eta vicaicachasiraipa te une, tímicutijiricavahi vicaecarasihí, vicachanepa ema Cristo eta máepenirahi. Énerichuvare eta viúchusirahi te une, vicutipa éma eta máechepusirahi te máecari. Tanasiripa eta ichasini vítaresira. Tásiha puiti, arairupa eta vítaresirahi taicha máetaviuchirahi ema Viya eta macaematanesirahavi tacuti eta ichape máitupajijasiravahi te macaechepucapa ema Machicha. Vaipa táuricahini víchahini eta pecatu.

⁵ Taicha eta viúrujasiraipa ema Cristo, vicutiripahi éma eta máepenirahi. Tásiha, étarichu vicaheyarehi víti apanava eta véchepusirayarehi, vicutiyarehi éma eta máitaresirahi, tájina matapiravainahini. Tásiha víti, arairuinapa eta vítaresira. ⁶ Tacutiquene, eta tamaurivainihi eta ichasini vítaresira tacapecaturarivainihi, tímicutijiricavahi te vicaquenureca. Tétavicavahi eta tacavanarairahavihi, tipamicahavihi eta víchirayarehi eta tamauriqueneana. Puítisera táecarasipa eta ichasi vítaresira, tacutihi eta náecarairaipa ema Viáquenu Jesús. Vaipa tipamicahavimahi. ⁷ Taicha mácani achane eta máepeniraipahi, tícheaipahi eta macapecaturairahi. ⁸ Puiti vécharipa eta máechepusirahi te máecari ema Viáquenu Jesucristo, tájina tímiapachaimahi máepenahivaréni taicha tájina tárataha táimicapachini. Ene vicahehi víti eta viúrujasirahi ema Cristo. Vécaraipahi eta tamaurivahi eta ichasihí vítaresirahi. Puiti, tamutupa ticaitsivahi. Vicutinapa éma eta vítaresirainapa. ¹⁰ Eta máepenirahi ema Cristo, éta tímicapacahi eta vipecaturana. Éma, vaipa tiápechavaimahi tépena. Tamuturipahi. Tásiha, eta máechepusiraipahi, máichecuaraquirénapa eta máitaresira te mavaure ema Maiya. ¹¹ Ene ecaheyare éti, écarainapa tamutu eta tapamisirahéni eta epecaturana. Puiti eta ítaresirainapa, macarichu ema Viya ecaematanearyu, táichavenehi eta iúrujasirahi ema Viáquenu Jesucristo.

¹² Vaipa ecuisapa eta tapamisirahe eta pecatu. Váhivare ecusuapa jácani tajamurachaqueneanahi eta iáqueheana, taicha tétavicavahi eta tamaurivahi eta tajamurachaqueneanahi. Tímicutijiricavainapa épenaquene, vaipa échaimahi eta pecatu. Ítarecainapasera mayehe ema Viya, íjararecainapa eta iáqueheana mayehe. Ísapainapa ema Espíritu Santo tipamicahé eta ecaemataneasiraya ema Viya, eta íchiraya

eta táuriqueneana. ¹⁴ Eta pecatu, vaipa ticavanarahémahi. Émainapasera puiti ema Viya, tímicitacahénapa eta íchirahi eta táuriqueneana. Énerichuvare vaipa tácamunuhini eta táipicararesirahe eta vanairipiana apaesa vahi ecuquicha eta tauriqueneana.

Ena ticapecaturarahiana tímicutijiricavahi ena ticaque-nurecana eta tapamisirahi eta náichirahi eta pecatu

¹⁵ Puiti, németeaca etiarahi eti ímijachahi tísapacarechaha eta vicapecaturaira taicha vaipa táipicararecavahihini eta vanairipiana. Étisera, tétavicavahi eta tájecapiravahi eta epanereruana. Ímipanapa eta majapanuraivahi ema Viya. Vaipa epicauchahini.

¹⁶ Écharichuhi éti, te ímiyanavayarechuchapuca eta tapamisirahehi eta pecatuana, ecutirichapuca mácani ticaquenurecahi, tipamicavayarehi eta masupirayarehi ema máquenu. Ene ecahehi eta esuapiraichaha eta pecatu. Éta tiámaparáuchahehi eta esiapiraya te yucu infierno. Téheserapuca émainapa esuapaya ema Viya, tatupiruvainapa eta ítaresiraya. ¹⁷ Nuhasulupayachasera ema Viya eta ínajisiraipa eta tapamisirahénihini eta pecatuana. Puiti tatupiruvaipa te esamureana eta esuapirahi eta véhiruhi ímitucasivahi. Puiti íjaracavainapa ecaemataneaca ema Viya, iávácuharipa eta táuriva eta ítaresiraya. ¹⁹ (Nímicutichinahehi eta juca, taicha vahi máejerarena eta ecaicutiarairaina éta. Nuvaraha yátupina ecaicutiaraya.) Cape eta ítaresirahi, étarichaha íjararecahi eta iáquehe tayehe eta tauriqueneana, étaviuchahi eta evainarajivanainihini. Puiti íjararecaya eta iáquehe íchayare eta táuriqueneana, táurivaya eta ítaresira. Tacuija tahapapicahé eta ecaemataneasiraya ema Viya.

²⁰ Taicha cape juca ítaresirahi étarichaha tipamicahéhi eta epecaturana. Vuíchaha étainahini ecaemataneaca eta táurivaya eta ítaresira. ²¹ Tájinavare ímaequenehahini eta íchirahi eta tauriqueneana. Puítisera, tétavicavahi puiti eta etsirihacarevahi tayehe, taicha ímatipa tiámaparáuchahehi eta esiapirayarehini te yucu infierno. ²² Puíti víuchurepa tayehe eta tapamisirahehi eta pecatu. Iávacuhaipa eta ecaemataneasiraya ema Viya. Jéhevare eta íuritaesirayare me Viya, máichecuaraquirenapa eta ítaresiraya. ²³ Eta víchirahi eta tauriqueneana, tacarichu tiámaparáuchahavi eta visiapiarayarehi te yucu infierno. Émasera ema Viya mavaraha tíjaracasichahaviya eta vítaesirayare máichecuaraquireya, te yátupina eta vicasíñairayare mayehe ema Viáquenu Jesucristo.

Viti véhicanahi ema Jesucristo, títavaripa eta tapamisirahavahi eta vanairipiana

7 Nuparapenaveana, écharichu éti eta yátupirahi tisuapacarehi eta vanairipiana nayehe ena achaneana, étachuchasera te títarecanarichaha. ² Tímicutijiricavahi súcani esena sucaimaquene. Tatuparacahi ésu sucachaneyarehi macarichuhi ema suima, vahi sucucaecahi éma, te jácani achanerichaha éma. Te suvehapuca ema apana achane, ticapeca-

turaipa ésu. Téhesera te tépenaipapuca ema suima, ésupa téchinava. Tísapacare suápechava suácaima mayehe mácani suvarahaqueneyare suímayare. Vahi pecatuina eta suápechiravayare ticaima.

⁴ Ene ecahehi eti nuparapenaveana. Ema Cristo, máepeninahehi te crusu, macaepaharipa eta tapamisirahénihini eta vanairipiana. Puiti émapa téchahehi ema Cristo. Ecutiripa esu esena suépenaimaquene te tiápechava ticaima, tásiha apanapa ema téchahi ésu. Puiti mavanaraheripa ema Cristo, ema máechepurequenehi te máecari. Mavarahahi ichapeyarehi eta ecaemataneasiraina eta mayehe ema Viya. ⁵ Taicha cape juca ítaresiraichaha, esuapahi eta tavarahaqueneana eta iáqueheana. Te esamapa eta vanairipi tiápajucavahi eta evarairahi ícha eta tauriqueneana. Tásiha éta, tiámaparáuchahehi eta ícuchihi eta esiapirayare te yucu infierno. ⁶ Puítisera vaipa tapamicahavahihini eta vanairipiana. Puiti víuchurepa eta ichasi vítaesiraini. Émapa vicaemataneacayare ema Viya taicha tépanavaripa eta arairu vítaesira eta mávahásirahaviripa ema Espíritu Santo.

Eta viáquehe tichurucavahi eta tavarairahi vicha eta tauriqueneana

⁷ Etiarhipuca eti ímijachahi tipamicahéhi eta vanairipiana eta ecapecaturairaya. Váhiquenesera étaina. Vítiripa vahi vímatiequenehavanehini eta taurivahi eta vicapecaturairahi, te vuíchaha vímatihini eta vanairipiana. Vuíchahavare vímatihini eta taurivahi eta vijamurachirana eta apayehe. Eta vanairipi, ani tacahéhi: “Vahi picujamuracha eta apayehe”. ⁸ Téhesera te vímatipa eta juca vanairipi, víápajucavapa vijamuracha tamutu eta vímahaqueneana tájiparacana. Te tacuijahini eta juca vanairipiana, váhirichuhini vicujamurachahini eta apayeheana. ⁹ Eta víámaperuvaichaha apaicape, vuíchaha vímatihini eta vanairipiana. Téhesera te vímatiequenehapa, visamavapa eta tatiarhipa eta véjecapiravahi eta vimaitauchirahi eta vanairipiana. Tásiha, véchapa eta vépenirayare, tatiarhirahi eta vícuchihi eta vícuñayarehi. ¹⁰ Tacahe, víti vímijachaipahi víúchucuhayare te vítauchapapuca eta vanairipiana. Tájinachuchasera tájjaracavahihini eta víúchucuirainahini. Étachucha tiámaparáuchahavi tayehe eta vépenirayarehi. ¹¹ Téhesera te amahe eta visamure, jararihi eta pecatu. Tavayuaracavahipaipa, tacamapuiravahi eta tatiarhirahi eta vanairipiana, taicha tavaraha táimicapachavi.

¹² Nuvaraha numetacahé: Tiúrihisera eta vanairipi, sántohivare, tatupiruvahivare. ¹³ Németeacasera etiarahi eti ímijachapuca vahi tiuri eta vanairipi taicha támapiricahi eta vépenirayarehi. Vahi tacucahe eta epanereruana. Numetacahé: Váhiquene étainahini eta vanairipi támaparacavahihini eta vépeniraya. Étarichu eta vicapecaturairahi, étapa tiámaparáuchahavihi eta vépenirayarehi. Étasera eta vanairipi tímereuchahavi eta vimaurivahi víti te visamureana, tétavicavahivare eta vimasupajiraivahi.

¹⁴ Eta vanairipiana tavarahahinéni tímitupiruchahavi. Étasera eta veche máteji, tavayuararui eta tavarairahi víchaya eta tauriqueneana. ¹⁵ Taicha víti váhiquene vímatiequeneha tájahapuca eta vícharacavaya. Vahi véhicahini eta vipanerechaquenehi vivarahaquenehi vicha. Tasapihachucha víchahi eta vicatichaquenehi vimavarahaquenehi vicha. ¹⁶ Tatupiruvahi eta vanairipiana eta tametasirahavi eta vicaicuñairayare táichavenehi eta vipecaturana. Tásiha, te víchapapuca eta tauriqueneana, visamava te visamure eta taurivahi eta víchirahi, vémechaemachirava eta tametasirahavihi eta vicaicuñairayare. ¹⁷ Tatiarihi te víachaneva eta pecatu. Tásiha, váipanéni vítijiricavahini víchahini eta pecatu. Étasera eta távahásirahavihi te visamure eta pecatu, etapa tipamicahavihi eta víchirayarehi eta tauriqueneana. ¹⁸ Véchahivare víti eta taurivainihi eta táitaresiraini eta víaquehe. Tétavichavihi eta tamasuapajiraivainihi. Tímicutijiricavaipa tichururerechavihi. Vivarahahinéni vétupiricavahini, váhiquenesera táisapahavihihi eta víaquehe vétupiricavahini. ¹⁹ Te vivarahainipa vicha eta táuriqueneana, vahi váratahaimahi vicha. Étachucha víchahi eta tauriqueneana vimavarahaquenehi vicha. ²⁰ Te víchahipuca jácani vimavarahaquenehi vicha, vaipa vítinahini tásihahini eta víchirahi, etapa eta pecatu tipamicahavihi, taicha tiávahácahavi víti.

²¹ Te vivarahainipa vicha eta táuriqueneana, tasapihachucha eta pecatu tímiapitavairicavahi tíchejimirauchavihi. Eta tacahehi eta víchavaquenevahi.

²² Étasera eta víachaneva, tétavichahinéni eta tajamurachirahi víchahini eta mavarahaqueneanahi ema Viya.

²³ Jararihisera eta pecatu te amahe eta víaquehe. Ichapemurihi eta táehacacairahi tacanarahi eta paure víachaneva. Tavaraha tíchejimirauchahavi apaesa vahi vicuitauchahini eta mavarahaqueneana ema Viya. Tétavichavihi eta táitiasirahavihi, tímicutijiricavaipa vicaerata.

²⁴ ¡Tétavichavapa eta véjapanuraivasamihi viti páureana! ¡Tacahehi eta víchararacavahi! Németeaca eta vipanereruanahi víti, ticutimahinepa nájinapa tiratahaimahi ticuchucuhahavi tayehe eta tavayuasirahi eta víaquehe eta pecatu, támirahaviyare tayehe eta vépenira. ²⁵ ¡Mararihisera ema Víaquenu Jesucristo! ¡Macarichu éma marataha ticuchucuhahavi tayehe eta juca tauriqueneana! Puítiripa núti, ichape eta nuhasulupayachirahi ema Viya. Tétavichavihi eta nuvapinairavahi eta níchirahi eta mavarahaqueneanahi. Étasera eta ichasiqenetataji náquehe, ticavanaranuichucha tayehe eta pecatu.

Tiúriyarehi eta vítaresira taicha eta mávahásirahavihi ema Espíritu Santo

8 Puítisera témitiacaripa eta vícuñayarehíni viti víavahácanaipahi ema Cristo Jesús. Eta mávahásirahavihi ema Jesucristo, tiávahácahviripavare ema Espíritu Santo. Émapa, ticaepahahi eta tapamisirahavihi eta pecatu, etapa eta támaparauchirahavihi eta visipiraya te yucu infierno. Ema Viya, eta máimairahi eta

vimaetumechiravahi, vimaratahairahi vítauchahini eta vanairipiana, mavanecapa tiúcupaicahi ema Machicha, macaqueheyarehi eta juca víaquehe viti achaneana. Eta máijarasiravahi, macamitiequenehaipa eta tapamisirahavihi eta víaquehe eta vicapecaturairana. Puiti émainapa téchahaviyare ema Espíritu Santo. Véhicainapa eta mavarahaquenehi. Tásiha vínajicainapa eta visuapirainihi eta tavarahaqueneanainihi eta víaquehe tacapecaturaraivaini. Émapa tétumechahavihi eta vítauchiraya eta mavarahaqueneana ema Viya.

⁵ Nácanisera nasuapahi eta tavarahaqueneana eta náquehe, étachucha napanerechahi eta náchiraya eta tauriqueneana. Vítisera viti visuapanahi eta mavarahaqueneana ema Espíritu Santo étainapa vipanerechaya eta vicurismurechiraya ema Viya. ⁶ Nácani napanerechahi eta tavarahaqueneana eta náquehe, támaparaucharipa eta nasiapiraya te yucu. Vítisera viti vipanerechanahi eta mavarahaqueneanahi ema Espíritu Santo, viti vítarecayare. Víúrinapa mayehe ema Viya. ⁷ Nácani napanerechaichucha eta tavarahaqueneana eta náquehe, éna macatianaruanahi ema Viya. Taicha váhiquene návarahaimahi nasuapa eta mavanairipi. ⁸ Tacahe, éna étachucha nacurismurechahi eta náquehe, vahi náituchahini nacurismurechahini ema Viya eta mavarahaquenehi.

⁹ Puítisera éti, eta mávahásiraheripahi ema Espíritu Santo, vaipa étaimahi epanerecha eta tavarahaqueneanahi eta iáquehe. Étapa epanerechaya eta mavarahaqueneanahi éma. Nácani vahi mávaháruanainahini ema Espíritu Santo, váhivare machanerainahini ema Cristo. ¹⁰ Étisera, eta mávahásiraheripa ema Cristo, tayanapane táicuchirichuhi eta iáquehe eta táepeníraya táichavenehi eta pecatu, étasera eta iáchaneva títarecayarechucha, taicha ejacaparéipahi me Viya. ¹¹ Táichavene eta mávahásiraheripa puiti éti ema Espíritu Santo, ema Viya macaechepucayare eta iáqueheana, tayanapanepuca épenaquenénaripa. Tacuti-yarehi eta macaechepusirahi ema Machicha Jesucristo te máecari. Éti iápechavayare ítareca maicha ema Espíritu Santo.

¹² Tacahe, nuparapenaveana, vicatuparahapa eta visuapiraya ema Espíritu Santo. Vaipa étaimahi visuapa eta tavarahaquene eta víaquehe. ¹³ Taicha te étachuchapuca esuapa eta tauriqueneana tavarahaqueneanahi eta iáquehe, tájinapa íuchucuiyaimahi, ecaicuchihi eta épeniraya. Téhesera éhichahi eta mavarahaquenehi ema Espíritu Santo, ínajicayareva eta íchira eta tavarahaqueneanahi eta iáquehe, ejacapainapa eta ícuchihi eta ítaresirainapa.

¹⁴ Taicha vimutuhi viti visuapanahi ema Espíritu Santo, machichahaviripa ema Viya. ¹⁵ Émaripa ema Espíritu Santo timetacahaviripa eta machichairahaviripa ema Viya. Visamavaipa te amahe eta visamure. Éma, vahi tipamicahémahi. Váhivare típicararechémahi tayehe eta ícuñayarehini. Tímicutichahénapasera eta yátupirahi macachichairahahi ema Viya. Tásiha, ecasiñavaipa eta mayehe ema Viya, émairaipahi ecaiya-

quenehi. “Tátachicha Nucaiyaquene” ecaheyarehi.
¹⁷ Eta macachichahaviraipa ema Viya, vijacainapa eta vícuchihi máijararuhaviya. Vicutinapa ema Cristo eta máijarasirahi eta máicuchihi éma. Puiti, eta vicatajivairahi te juca vítaresirahi, vicutihi ema Cristo eta macatajivairahi, tásiha, vicachanéna éma tayehe eta mávihahi eta majaraivahi.

¹⁸ Puiti németeacahi núti, tayanapane ichapepuca eta vicatajivairahi puiti juca sácheana, tájinachucha táichavahi taicha jararihiyare eta ichape táitsivayare, vijacapaya eta ichape víuricacarevaya te majaraiva ema Viya. ¹⁹ Jéhevare, tétavicavahi eta tajamurachacarevahi te táitecapapa eta sáchevare eta vímairaya eta vicuchapaquenehi eta tacaitsivairaya eta viáquehe vimutu viti machichanaveana ema Viya. ²⁰ Tacutiquene te jena sáchevare vicuchapaquenehi, tamutuinape témitiacayare eta témecatavachahavianainihi te juca apaquehe. Tamutuinape arairuyare, tétavicavainapa eta táurivaya eta apaquehe. Vímahe puiti ticatajivanahi tamutu te juca apaquehe: Eta sárareana, ticajumanahi, táepenanihi; étapa eta sucurecana. Eta tacatajivairahi tacutihi eta sucatajivaira esu súcani esena ticacatiruhahi eta suínasira. Étasera eta arairuyare apaquehe, ticaitsivainapa tamutu. Vaipa pecatupáiremahí, tamicauchainevarepa eta majaraiva ema Viya eta viávhaya viti machichanaveanahi. ²³ Ema Espíritu Santo máitsivacharipa eta viáchanevana. Vaipa táesachaimahi vicha eta pecatu. Váipavare víchaimahi eta tauriqueneana. Tásiha, víti, ichaperipa eta vicuchapiraipaicha eta jena sáchevare eta tacaitsivairayare eta viáqueheana. Títauchavainapa eta macachichairahavina ema Viya. Yátupinapa mayehavainapa.

²⁴ Yátupihí puiti eta machichahavirahi ema Viya. Ichapevare eta vicasíñavahi eta mayehe eta vicuchapirahi eta víuchucuirayare te jena sáchevare. Vácamicahá tamutu, vímianava eta vicasíñavairahi eta mayehe támutu sácheana. Tapaenumavainapa vímahainapa, tájinapa vicuchapaimahi.

²⁶ Énerichuvare, ema Espíritu Santo tímicitacahavihi te tamutu eta vimaratahaqueneanahi. Tavetiji tímicitacahavihi eta vimaitusirahi eta viyaseuchiravayarehi te vijuvasirana. Éma, tiyaseuchahavi te viáchanevana. Víúmitichahi taicha muraca eta vivarairahi eta mayasearuana. Vaipa virataha véchajicahini.

²⁷ Émasera ema Viya máimatihí eta visamureana jácani vivarahaqueneana viyaseaca, étaripa eta mayasearapi ema Espíritu Santo. Taicha ema Espíritu Santo máimatihí eta mavarahaqueneanahi ema Viya, tásiha tiyaseuchahavihi viti machaneranihi.

Éma Viya mavaraha ticachanehaviyare víti te majaravahi

²⁸ Vécharipahivare tétavicavahi eta majaneasirahavihi ema Viya vimutu viti vémunacanahi éma. Tayanapane vicatajivahipuca, éma tamutuhí tiuri máicha. Títauchavayare eta mapanereruana éma eta víuricacarevarehi eta máichuirahavihi. ²⁹ Acaneripahi eta máimatirahavihi, tinerejicahavipa machichahavi-

yarehi. Mavarahahi éma vicutiyare ema Machicha Jesucristo eta máurivahi. Tímicitijiricavayarehi viparapeya éma, véchavimurihi eta macachichairahavihi ema Viya. ³⁰ Tásiha, te máimahapa tiuri, tíchuhahavipa viti manerejiruanahi. Eta visuapirahi vipauchaipe éma, tijacpahavipa. Tásiha, tíjaracahavipa eta vícuchihi eta visiapiraya tayehe eta majaraiva.

Tájinaquene ticaerajicahavimahi mayehe ema Viya taicha yátupihí eta máemunasirahavihi

³¹ Tásiha puiti, nuvaraha yátupina eta ecaicutiariraya eta juca: ¡Tétavicavahi eta macatiuchirahavihi ema Viya! Tájina táichava eta nacatiansirahavipuca nácani achaneana. ¡Váhisera nárataha ticapaquechahavianaimahi! ³² Eta majapanuirahavihi ema Viya, vahi mavayuacahini máijararecapa ema Machicha eta nacapasirahi víchavenehi vimutu víti. Tásiha, mavetijinapa eta macatiuchirahaviyare puiti te tamutu eta jácani víchavaquenevana. ³³ Puiti tájinapa viviurevaina táimicuñacahavihini viti manerejiruanahi, taicha ema Viya tépachiacahaviripa eta majacapirahavihi. ³⁴ Tájinaquenepe tímicuñacahavimahi taicha ema Cristo máepeninahaviripa, tichavaripavare títareca. Púiticha téjacahi te mavaure ema Viya, téchajirucaviripa éma. ³⁵ Ema Cristo, tájinaquene vahi máinajicaimahi eta máemunasirahavihi. Tásiha, yátupina eta vicasíñairaina éma. Tayanapanepuca vicatajivahi, váhivarepuca vicuitucahi vétupirica eta víchavaquenevanahi, vicamichahisera máicha. Te vécuhapuca, te vítajihapuca, vahi vicainajirucahini máicha. Te típicararechavianapuca, te tipanajiricahavianapuca, te navarahapuca ticapacahaviana, váhiquenesera vicainajiruvahini máicha. ³⁶ Te tamutu eta juca, vicuti ena machanerana ema Viya ena táechajisiháquenenahi acane eta Sagrada Escritura, ani tacahehi: “Tamutu sácheana ena ticatianacanahi ema Viya titanucavianahi viti machanerana, navaraha ticapacahaviyare. Tivapinavanahi eta nacapasirahavihi, ticuti ena ticaparecanahi eta vaca te náichayare eta ichape piesta”. ³⁷ Váhiquenesera vipicaimahi eta náipicararesirahavianahi. Tétavicavahi eta máetumechirahavihi ema Jesucristo táichavenehi eta máemunasirahavihi. Tájina navare tihapapicahavimahi eta véhisirahi éma. Núti nucasiñava ema Viáquenu eta majaneasirahaviya. Tájinaquene ticaerajicahavimahi eta máemunasirahavihi. Vahi étainapucaini eta vicatajivapuca eta vítaresira, étainapucaini eta vépenira, étainapucaini náipicararesirahavipuca puiti juca vítaresiraichaha, étainahipucaini táimipanererechavihini, jácani víchavaquenevaya eta vítaresiraya. Tájinaquene vahi vipicahini eta típicaareanahi te juca apaquehe, énainapucaini ena ichapemuriqueneana mayeheana ángele ema Váinara-ji, étainahipucaini eta náíñehivanahi. ¡Tájinaquene ticaerajicahavimahi mayehe ema Tata taicha yátupihí eta máemunasirahavihi taicha viávahácahi ema Viáquenu Jesucristo!

Ena israelítana, éna manerejiruanahi ema Viya

9 Nuparapenaveana, tétavicavahi eta némunsirahi ena nujaneanana israelítana. Eta tacahe, ichape eta náimipanerechiranuhi nucatisamurehivare, táichavenehi eta namaehisirahi ema Viáquenu Jesucristo. Táetaviucha eta néñamiravahi eta nayehe, nuvarahainehi níjararecavahini nuyanahini núti te jena yucu, apaesa vahi nacuyanahini éna. Énainahini náurihini éna mayehe ema Cristo. (Núti nutupiruva puiti juca numetasirahehi. Ema Espíritu Santo, émaripa téchahi tamutu eta nupanereruanahi. Tímisamanuhi eta nétupirisirahi eta numetasirahehi.)⁴ Tétavicavahi eta náuricacarevayahini éna, taicha manerejiruanahi ema Viya, máichavenehi ema náchucaequenéni Israel, mavarairahi ema Viya machichanaveanayaherehi. Ichapemurihi eta macachaneravacahi, máimechirahi eta majaraiva. Máijaracavaca eta matratune eta majaneasiravacayare. Máimimaticahivare eta mavanairipiana. Máimimaticahivare eta náechajisiraya émachuca te nayujarasirana. Mametacahivare eta máitesirayaherehi ema ticatiurahiyare nayehe. Ena nani, tétavicavahi eta táurivahi eta náicuchiyarehini taicha manerejicavacahi ema Viya éna máumurivanarichuhi ema Cristo, najaneanarichuhi eta máucupaisirahi te juca apaquehe. Émasera, Viyahi éma. Púiticha émaripa téchahi tamutu. Máitavacacaipa eta vijirau-chirahi. Amén.

⁶Tayanapane eta macatajisiravacahi ichape ema Viya ena nujaneanana israelítana, tamapurujisera, éna namutuyaréni témepururecavana. Vahi návarahahini náehica. Váhisera étainahini táichahini eta mamaitauchirahi eta matratune ema Viya. Nasapihapa namapuruji namutuyaréni, vahi machichanaveanainahini ema Viya, táichavenehi eta namasuapajirairvanahi. ⁷Nuvaraha némechahe eta manerejisirahi ema Viya ena apinana machichanaveana ema Abraham. Matiarihini ema Ismael, émapa ema Isaac. Ema Viya vahi manerejicahini ema Ismael, máijarasiravacayaherehi eta náicuchihi ena mámariequeneana. Macarichu ema Isaac, manerejiruquenehi ema Viya. Eta mametacativahi ema Abraham eta me Viya, ani tacahehi: “Puiti juca cájeyare, níjaracaviyare píti ésupa esu Sara ema echichayare, ticaijareyare Isaac. Núti níjaracayare eta máicuchiyarehi ema Isaac, énapa ena mámariequeneana” macahepa. Puiti nuvaraha ecaicutiaraya eta juca: Ema Viya máimijarechahi “nuchichanaveana” nacarichuhi ena navaraha najacapayare eta náicuchihi, nasuapirahi eta máijarasiravahi nayehe.

¹⁰Numetacaheyareva eta táicharacavahi eta macachichairahi ema Isaac ésupa esu mayena Rebeca. Chámeanahi ena náinapureanahi nachichanaveana.

¹¹Tacahe, vuíchaha náuchuahini ena nani amuyana, tájinaichahavare napecaturainahini, táimaticarepahipucaini eta táuriva eta náichaquene. Te tiánehipa eta suínasirayare, ema Viya mametacapa esu Rebeca, ánipa macahe: “Chámeanayaherehi ena pichichanaveana. Émasera ema tñapucayare tiúchuca, éma, mósoyare

mayehe ema máti”. Étaipaichuhi eta macayemaquenehi ema Viya te Sagrada Escritura, ani macahehi: “Némunacahi ema Jacob, máequenereruhi tiúchuca. Émasera ema Esaú, máinapurehi tiúchuca, vahi núrianaca éma” macahepa. Tacahe puiti, vímatiequenehaipahi eta táichararacavahi eta manerejisiravacahi ema Viya, máichuiravacahivare nácani mavarahaqueneana. Vahi étaparacainahini jácani táurivainahini eta náichaqueneana.

¹⁴Puiti, vahi ecuimijachahini vahi tétupicava ema Viya eta manerejisiravacahi ena achaneana. Váhiquenesera énéna tacahe. ¹⁵Ema Viya mametacahivare ema Moisés, ani macahe: “Núti necha mácani nujapanuquenyare” macahepa. ¹⁶Tacahe, vahi vámutu vácuticaca eta majapanuirahavi ema Viya máichuirahaviyaherehi. Éma téchahi eta manerejisiravacahi nácani majapanuqueneana máichuhaqueneanayare. Vahi étainahini eta náimijachiravahi tíchuhacareana taicha eta náurivahíji, napamisirahipuca naicha eta táuriqueneana. ¹⁷Ema Viya ánvare macahehi eta te Sagrada Escritura mayehe ema rey te avasare Egipto: “Núti nunacavihi eta piávacurehi pirreyvayaherehi, taicha nímativi eta pimuracasamurevahi. Nuvarahasera núti nímitachaviyare eta tamutuirahi nurataha nítupajiasirava, apaesa táimaticare eta níjare te tamutu eta juca apaquehe” macahepa ema Viya. ¹⁸Tacahe, ema Viya manerejicahi nácani mavarahaqueneanayare máichuha. Máisapahisera ena masuapajirairahana tajurucachuchaini eta namuracasamurevahi.

¹⁹Németeaca, áninapapuca ecaheyare éti: “Ene tacahe jácani, ¿tájahapuca tacayema eta vicaviurevahi eta mayehe? Taicha vahi véchavahini eta víchirahi eta tauriqueneana. Émarichuhinéni tíchahavihi” ecahénapapuca éti. ²⁰Vahi tacucahe eta epanereruana. ¿Vahi epicahini iácapaemachirahi ema Viya? Eta cachapare mátejisi vahi táuricaímahi tácapaemachahini súcani tépiyacahi: “¿Tájaha tacayema pímpipanajicanu eta pépiyasiranuhi, váhiyapa nucunachacarehini eta pépiyasiranuhi?” vahi táichaimahi. ²¹Esu típuarecarahi, ésu téchinavahi jácani táimahianayare eta suípune, suíchayaherehi eta suícarahiyare, tásiha suépiyacavare eta suyehe vásenilla, tacahehi eta suvarahaquenehi.

²²Tatuparacahi ema Viya máicuñacavaneya namutu ena achaneana váinarajiqueneana, máimitaequenehavacavane éna. Tatuparacahivare máimerecavane eta máitupajiasirava étaipa eta masemirahi tayehe eta namaurivahi. Tétavicavahisera eta macayehevahi paciencia. ²³Víti apana, ene tacahehi eta táetaviuchirahi eta majapanuirahavihi, máimerecachi eta táichapeva eta macunachacareva. Acaneripahi eta manerejisirahavihi eta vicachaneraya éma tayehe eta majaraiva.

²⁴Vahi vácarichuhini viti israelítana manerejiruhavihi; énerichuhi eti apavasanana manerejiruhehivare. ²⁵Eta Sagrada Escritura májurehi ema víyahaini Oseas, eta máechajiriruva ema Viya, ema yátupiquenehi eta macasiñacarevahi, ani macahehi: “Núti nunerejicayare níchuhavacayare ena ichapemuriqueneana ena achaneana apavasanana. Tayanapane vahi náesenica-

nuhini cape eta náitaresirahi, tijacapacareanahisera nuyehe. Ichape eta némunasiravacayare taicha nuchichanaveanayarehi éna” macahepa. ²⁷ Énaser ena nujaneanana israelítana, ánimurianarichuhi ena tisuapanahi eta máichuarapi ema Viya. Nacuti éna ánimuriqueneana náechajisihahi ema víyahaini profeta Isaías, ani macahehi: “Tétavicavahinéni visimutuva viti israelítana, ánimurihavirichuchasera viti viúchuchuhanayare. ²⁸ Ema Viya, vaipa macamichaimahi eta náejecapiravanahi ena achaneana. Tíjahúchavayarepa eta máicuñasirayare eta apaquehe. Máijahúchayarehi máítaequeneha tamutu”. ²⁹ Ánivare macahehi ema Isaías: “Muracarinehi eta náquipaisirahi eta viávasa. Te tacuijahini eta majapanuirahavihi ema Viya viti vinerejiruanahi véhica éma, vítaequenehini vimutu. Nájina nánasihini te viávasa. Vicutiyaréni ena ticvasanahi te Sodoma, énapa te Gomorra, máítaequeneruanahi ema Viya, ema tétavicava eta máitupajijiasirava, máituruequenehahi tamutu” macahepa ema Isaías.

Ena israelítana, vahi návaraha náehica ema Jesucristo

³⁰ Nuvaraha numetacahe eta juca, apaesa écha. Ena apavasanana nasapihahi tijacapacareanahi me Viya, váhinéni náesenicahini éma cape eta náitaresirahi. Tacarichusera puiti, táichavenehi eta nacasiñavairahi eta mayehe, tijacapacareanaripahi éna. ³¹ Énaser ena nujaneanana, tímijachavanahi tijacapacareanayarehi me Viya táichavenehi eta navairairahi náehica eta vanairipiana. Váhisera najacapacarehini. ³² Taicha éna, náemepurarecahi eta najacapacarevayarehini me Viya. Vahi návarahahini nacasiñavahini mayehe ema Machicha Jesús. Éna tímijachavanahi étachucha nacunachivahi tayehe eta náitachirahi eta navanesiracacana. Eta tivichahi eta nacatianasirahi muracuquenehi ema Viáquenu Jesús, vahi návarahahini nacasiñavahini eta mayehe. ³³ Ema Viya, eta máechajiruvana eta Sagrada Escritura, ani macahehi: “Puiti névatacaya ema Nuchicha Cristo nayehe ena israelítana. Nímahaya nájahapuca ticatianacanaya éma, énapa ena ticasíñavanayare eta mayehe. Nácani ticatianacanapuca, énajivayare ticamitiequenehavanayare, ticaicuñanayareva táicha. Nácanisera ticasíñavanayare eta mayehe ema nuvaneruyare, vahi máinajiacavacaimahi” macahepa ema Viya.

10 Nuparapenaveana, tétavicavahi eta néñamiravahi nayehe ena nujaneanana israelítana. Eta nuyaseserepi me Viya te nuyujarasirana, nuvarahahi náuchucuhahini. ² Nucunachavacahi éna eta náetavichirahi eta napicauchirahi ema Viya. Téjcapavahisera éna eta táichararacavahi eta vijacapacareva me Viya. Éna, tímiuriacavanahi tíurianahi, tímijachavanahi tijacapacareanahi me Viya táichavenehi eta náitachirahíji eta vanairipiana. Vuíchaha náimatihini eta táichararacavayarehi eta najacapacareva eta nacasiñavairaya me Viya. Váhivare návarahahini nasuapahini. ⁴ Taicha ema Cristo macaepaharipa eta tasuapacarevahi eta vayehe eta mavanairipiana ema Moisés. Vaipa étaparacaina eta viúchucuiraya. Tacarichu eta

vicasíñavairahi mayehe éma, vijacapacareyare me Viya.

⁵ Émarichuhi ema Moisés, muracahi eta matuparasirahi ena achaneana, ánipa macahe: “Éti, tapamiruanahi eta ítauchirayarehi tamutu eta vanairipiana. Te yátupipuca ítauchahi tamutu sácheana, te tájinapuca eta éjecapiravainahi, tásiha ejacapacarenapa me Viya” macahepa. Nájinasera náratahahini náitachahini eta vanairipiana. ⁶ Máejerarepanasera eta vijacapacarevahi me Viya táichavenehi eta vicasíñavaira eta mayehe. Vahi tácomesahini vitanupanahini ema Cristo te anuma, taicha tíucupauchahaviripa éma. Váhivare tácomesahini vitanupanahini te máecari vícaechepupanahini éma, taicha téchepucaripahi éma. Tacamunuhisera eta vicasíñavairaina mayehe ema Cristo te visamureana. Eta vipiarasiraina eta máijare eta víjarasirava eta véhisirayare éma.

Tásiha núti, eta nucametarairuihahi, néchajisihá étachucha eta arairu véhiruhi eta majacapirahavihi ema Viya viti vicasíñavanahi eta mayehe. ⁹ Eta juca eta nímiturapi: Eta viúchucuiraya viti achaneana, tacamunuhi eta visuapiraina ema Viya eta macaechepusirahi ema Machicha te máecari. Éma, macaepahayare eta vipeaturana, te yátupina eta vicasíñavairahi te visamure ema Jesucristo. Tacamunuhivare yátupina eta víjarasiravahi véhica éma. Víchayarehi éma: “Núti níjaracavahi néhicavi, Tata Jesús. Pítipa náquenuvivi, péchanupa pítí” vicahenapa.

¹¹ Eta Sagrada Escritura, ani tacahehi: “Nácani ticasíñavanayare mayehe ema nuvaneruyare, tájina náichiraváimahi. Tamutu tíuriyare eta náitaresira”.

¹² Ema Viya, vahi máepuruimahi nácani ticasíñavanahi mayehe. Ticucicacayarehi eta majacapiravaca ena israelítana énapa ena apavasanana, taicha émaichuhi ema Viáquenuhi vimutu. Tétavicava eta majapanuirahavihi, ticuchucuhahaviya vimutu viti vicasíñavanahi mayehe. ¹³ Taicha ánivare tacahehi eta Sagrada Escritura: “Ema Viáquenu macuchucuhavacayare namutu nácani tipiaracanahi eta máijare táichavenehi eta nacasiñavairahi mayehe” tacahepa.

¹⁴ Tásiha, eta náuchucuhairayare, tacamunu napiaracaya eta máijare ema Viáquenu táichavenehi eta nacasiñavaira mayehe. Táurivaina eta nasamirahi eta náimitucasivana. Tacahe, tacamunuhivare eta viyana vipaicayare víti te tamutu avasareana eta vicametarairuiraya nayehe éna. ¹⁵ Émaripa ema Viáquenu, ichape eta máichuhairahavihi viti visuapajirahiana, mavaraha eta vicametarairuirayare. Títauchavayare eta tacayemaquene eta Sagrada Escritura, ani tacahehi: “Tétavicavahi eta náurisamurevana ena achaneana eta nasamirahi eta táuriquenehi máichuarapi ema Viya eta majacapiravacaya. Tásiha tíuriyare eta majacapirahavihi viti mavaneruana ema Viya” tacahepa.

¹⁶ Váhisera námutihini nasuapahini eta juca arairuhi véhiruhi vímitucaquenehi. Ema Isaías, ani macahehi te Sagrada Escritura: “Tata Náquenu, ánimurianarichu ena tisuapanahi eta juca nímiturapiana nuvanahiana piyehe” macahepa. ¹⁷ Téhesera te táurihini nasama

ena achaneana eta vímiturapiana mayehe ema Cristo, titupiruvanayarehi ticasíñavana mayehe.

¹⁸ Esamanuchaha. Ena nujaneanana israelítana, tájina naviyahini nayunaca eta namacasiñavairahini mayehe ema Cristo. Nasamapa eta máechajiriruvana ema Viya, taicha te tamutu avasareana tisamaca-repaipa. Eta Sagrada Escritura, ani tacahehi: “Tamuturipahi te juca apaquehe ticasamahuhi. Eta máechajiriruva ema Viya tamuturipahivare tacaitatapahihi te juca taquiñacucujiana te apaquehe” tacahepa. Náimati-pavare. Váhivare návarahahini nasuapa. Eta máechajiriruvana ema Viya májurehi ema Moisés, ani macahehi: “Ímaha, eti israelítana. Nasapihaya nujacapavacayare nuti ena apamuriana achaneana, énaripa ena máesenicanurahanahi. Nuvaraha etsirihaini éti, éneuchavayare eta nuyehe” macahepa. ²⁰ Jararihivare eta apana máechajiriruvahi, májurehi ema víyarahaini Isaías, ani macahehi: “Núti nímercavaipa nayehe ena nani váhiquenehi náesenicanuhini, váhivare nacayaseseruruhini”. ²¹ Ánivare macahe ema Viya: “Tamutuhi sácheana eta níchuiravacahi ena nani israelítana. Tétavicavahisera eta namasuapajiraivahi. Vahi návarahahini nachavahini eta nuyehe” macahepa.

Ánimurianarichu ena israelítana ena tisuapajirahanahi, macuchucureanayare ema Viya

11 Esamanuchaha. Nuvaraha vahi ecuimijachaimahi macaerajicavacahipuca ema Viya ena machanerana israelítana. ¡Váhiquene énéna tácahe! Éti ímatinuhi nútirichuhi israelítanuhi, mámariéquenenuhivare ema Abraham, émapa ema apanavare náchuca Benjamín. ² Eta acane, tétavicavahi eta máemunasirahavihi ema Viya viti israelítana. Puíticha vahi máinajiacahavihiní. Échava éti eta tacayemahi eta Sagrada Escritura eta máichavaquenevahi ema víyarahaini profeta Elías. Ani tacahehi eta mametauresiravahi me Viya eta mayujarasirahi: ³ “Tátachicha Nucaiyaquene, ena nani apamuriana nujaneanana israelítana nacapajicavacahi namutu ena piyeheana profetana nuchamuriana. Puiti navarahahivare ticapacanuana. Navetataicaipavare eta pipena. Nucarinehi núti nítarecahi puiti” macahepa. ⁴ Tásiha, ema Viya majicapapa, ánipa macahe: “Vahi picarichuhini píti. Nararihi siete mil ena ajairana nujanearuanahi, ticasíñanuanahi. Vahi náisapavahini éna náepuyumirauchahini ema nasiñaraji Baál ena masuapajirairahanatatajihí” macahepa ema Viya. ⁵ Ene vicahehi víti, vahi vámutuhini viti israelítana masuapajirairahanahi me Viya. Vitiarichaha ánimuriahavihi viti manerejiruanahi majapanuquenehavihi. ⁶ Numetacahe: Ema Viya, eta majapanuirahavihi viti israelítana, váhiquene táichavenénahini jácani víchirainahipucaini eta táuriqueneana. Jéhesare, tijapanuhavihi táichavenehi eta táetaviuchirahi eta máemunasirahavihi. Tájina étaparacaina eta víchirapuca eta táuriqueneana.

⁷ Tacahe, vímaha puiti ena nujaneanana, ánimurianarichuhi ena ticasíñavanahi me Cristo, manerejiruanahi majacapaqueneanahi. Énasamisera ena apamuriana,

vahi nacasiñavahini mayehe, muracanaichucha te nasamureana. Étapa tivichahi vahi tijacapacareanaimahi me Viya, tayanapane nácani navarahahi. ⁸ Títauchavapahi eta táechajiriruvahi eta Sagrada Escritura eta nayehe. Émarichuhi ema Viya ticamitisicavacahi apaesa vahi nacucaicutiara eta máimiturapiana ema Cristo. Puíticha ene nacahehi. ⁹ Ema víyarahaini David, ánivare macahehi tayehe eta Sagrada Escritura: “Ena nani, ticasíñavavaicana eta tavayuchirahi eta náimahaqueneana. Ichapemurihi eta nacapiestairairana náenisiracacana. Ichapevaresera eta náichirahi eta tamauriqueneana. Puiti, Tátachicha, pítsivachayare eta náurisamurevahi. Járjapainapa eta pícuñasiravacayare. ¹⁰ Nuvaraha púchuquianaina pícha. Vahi nacucaicutiara eta náitaresira. Tacaetipapaicainapa eta tajitacareva eta napisirahi. Tájinapa nanarasiraimahi” macahehi ema David.

Eta majacapirahi ema Viya ena apanapanenejiqueneana

¹¹ Esamanuchaha. Nuvaraha vahi ecuímijacha tanasiyarehi eta náquipaisirahi ena nujaneanana. ¡Váhiquene énéna tácahe! Puítisera nasapiha ena apavasanana najacapacarehi me Viya, taicha mavaraha máimicatsiriacavaca ena israelítana, apaesa náeneuchavayare eta mayehe. ¹² Puiti tijacapacareanahi me Viya namuturipa ena apanapanenejiqueneana achaneana te juca apaquehe, taicha eta náquipaisiravaipa ena nujaneanana. Puiti eti apavasanana, tétavicavahi eta iúricacarevaipa. Jéhesare tiápajucavapanayaresera eta iúricacarevaya éti, étapa eta náuricacarevayare éna, te nachavapa náeneuchava.

¹³ Németeaca ímatinuhi núti eta nucatuparahairapa eta nímitusiraheyare eti apavasanana. Táitusiava puiti tétavicavahi eta nucunachiravahi eta nucaemataneasirahahi. ¹⁴ Numetacavacahi ena nujaneanana eta yátupirahi eta ejacapacareirahi me Viya, apaesa nímahahini éna, te najamurachayarepuca eta najacapacarevahi éna apanava, ticutiheanayarepuca éti. Nuvaraha nanerejicavahini nácani náeneuchavahini, apaesa náuchucuhayare. ¹⁵ Páureanasami éna eta náquipaisirahi. Esapihahi éti apanapanenejiqueneana te juca apaquehe, tétavicavahi táuriva eta ejacapacarevahi me Viya. Jéhesaresera, tétavicavapaini eta tajaraivainahini te visamure te nachavirainahini, náeneuchavapaini éna, náehicapaini ema Cristo. Tímicutijiricavapaini eta navayuchirahi eta náurisamureva ena achaneana te macaechepusiravacaya namutu ena náepenuqueneana tiúrianahi. ¹⁶ Eta natiarahirapa puiti ena nujaneanana tinerejicavanahi téhicana ema Cristo, németeaca namutuyare jácani náehicayare ena apamuriana.

Tacutiquene, viti machaneranaahi ema Viya vicuti eta ichape yucuqui. Ema Abraham macutihi eta táquehequi. Viti israelítana mámariéqueneanaini vicutihi eta tatabavajiana. Ema víachucaini majacapaqueneripa ema Viya. Tásiha, németeaca namutuyaréni ena nu-

janeanana, énerichuvare náeneuchavapapucaini nacasiñavahini me Viya te jácani sácheyare, apaesa najacapacarevarepaini éna apanava. ¹⁷ Puiti ena nujaneanana náquipairuvahi, vuíchaha nasiapahini eta náicuchihi te namuri ena machaneranahi ema Viya. Étipa eti apavasana, esapihaipa machaneraheripa ema Viya. Tíjaraca heripa éma eta táuricacarequene iávihayarehini te majaraivahi eta náicuchinihi ena israelítana. ¹⁸ Puiti étipavaipahi machanerahehi ema Viya. Nutuparacahesera, vahi ecucasiñavavaica eta ítujisiravahi esia pa tayehe eta náicuchihi ena nujaneanana israelítana. Taicha vahi ecachuriacavacaimahi éna eta iúrivahinéni eta ejacapacarevahi me Viya. Vahi ecuemitísica eta esiapirahi táichahi eta náquipaisiravahi ena masuapajirairahana. Éti máetumechaqueneana ema Viya; vahi étina étumechahini éma.

¹⁹ Váhivaresera ecupanerecha te esamureana: “Yá-tupi éna máquijicavacahi ema Viya eta namasuapajiraivahi. Tásiha, tinerejicahavipa víti, taicha viúripanahi víti eta máimairahavihi ema Viya” váhinéni tácahehini eta epanereru. ²⁰ Tacahe, échapava éti apanava, machu ácutiriana ena nujaneanana. Éna, eta náquipaisiravahi tímcutijiricahi ticaechuanahi, táchavenehi eta namacasiñavairahi me Viya. Puiti étipa náitsivahi éna eta ecasiñavairahi mayehe. Váhisera ecucasiñavavaica. Ecuneuchava éti apanava. Epicaucha ema Viya. ²¹ Ena nujaneanana israelítana, éna títapucanayarehíni nasiapamuriha ena machanerana ema Viya. Váhisera nacasiñavahini eta mayehe. Éti apanava, tacamunuhivare ecasiñava eta mayehe apaesa esiapahini. ²² Tacahe, ticaecheravapa eta máurivahi ema Viya, étapa eta matupiruvahi. Tétavica vahi eta matupiruvairahi eta náerajisiravacahi ena masuapajirairahana. Tétavica vahi eta máurivahi eta eyehe, eta ímiyaniravahi eta ecasiñavairahi eta máurivahi. Nácanisera vahi nacasiñaimahi, macaerajicavacayare. ²³ Tiuri puiti, te náeneuchavapuca me Viya ena nujaneanana, nacasiñavahivarepuca mayehe, éma majacapavacayarehi éna, machichanaveanavarepa. Taicha éma, tétavica vahi eta majapanuirahi. ²⁴ Taicha éti cape juca eta ítaresira, énerichuvare masuapajirairahéhi éti, emaesisirahi ema Viya, tásiha, tájinahinéni ejacapacarevainahini. Esapihasera éti esiapamuriharipa ena apamuriana machaneranahi ema Viya. Ene nacahe yarehi ena israelítana. Éna, te náesenica ema Viya, camuriqueneanayarehi ena ticasíñavanaya mayehe. Tisiapanayareva tayehe eta náicuchihi.

Te namutupa ena apavasana manerejiruanahi ema Viya, tapaenumavainapa náesenicayare ema Viya ena israelítana

²⁵ Tiuri puiti, nuparapenaveana, vahi nuvaraha ecasiñavavaica eta ítupajijiasirava. Tásiha, nuvaraha numetacahe eta juca tayumurevainihi, máimimatichaquenénuhisera ema Viya. Eta namuracasamurevacahi ena nujaneanana, vahi tánasimahi. Téhesera námutupa nasiapa ena apavasana manerejiruanahi

ema Viya, napaenumavainapa ena nujaneanana náesenicayare ema Viya. ²⁶ Tacahe, eta nacasiñavaira me Viya, tiúchuchuanayare namutu éna. Títauchavayare eta máechajiriruvahi ema Viya te Sagrada Escritura, ani macahehi: “Nuvanecayare ema Ticatiurahi yarehe ena achaneana. Ticavacureyarehi te Jerusalén. Masipahacavacayare ena majaneanana israelítana eta navainarajivana, máitsivachirayareva eta náitaresirana. ²⁷ Núti nátauchayare eta nutratunehi yarehe eta népachiasiravacayare namutu eta napecaturana” macahepa.

²⁸ Tacahe, ena nujaneanana nacatianacapa puiti eta juca véhiruhi. Étasarepa ítujisiavayare éti. Émasera ema Viya máemunacavacarichucha, taicha manerejiruanahi ena náchucanaveanaini. ²⁹ Taicha ema Viya, tamutu eta máijararuanahi, vahi máemepururecaimahi. Máítauchayarehiva tamutu eta máichuarapiána. ³⁰ Éti acane eta ítaresirana, vahi ávarahahini esuapahini ema Viya. Puftisera eta namasuapajiraivahi ena israelítana, ichaperipahi eta majapanuirahéhi éma.

³¹ Énerichuvare éna, te jena sácheyare, majapanuvacayarehi éna, tacuti eta majapanuirahéhi éti puiti.

³² Taicha ema Viya máimatihí eta emutuirahi emasuapajiraivahi éti apavasana, vítipa viti israelítana. Mavarahasera vicuticacayarehi eta majapanuirahavihi vimutu.

³³ Ema Viya, ¡tétavica vahi eta majapanuraivahi eta viyehe, tavayuchahi eta viúricacarevahi máicha! ¡Tétavica vahi eta máitupajijiasiravahi! ¡Tétavica vahi eta macachuriasirahavihi eta máimatiequenehairahi tamutu! ¡Matupiruvahi éma tamutu eta manerejirisirahi! ¡Vahi víturuequenehaimahi vicaicutiara eta mapanereruana! ³⁴ Taicha nájina tímatiequenehaimahi eta mapanereruana. Nájinavare náimitucahini éma. ³⁵ Nájinavare náijaracasichahini tájaháinahipucáini, étanainahipucáini máitsirijicavacahipucaini eta máijarasirahi éma. ³⁶ Taicha tamutu eta tatiarihiqueneanahi, tacarichu tásihaqueneanahi mayehe, étaripa eta víjararuanahi mayehe, mavaraha táítauchavapaini eta mapanereruanahi táuriqueneanahi. ¡Máitavacacahi eta vicunachirahi éma! Amén.

Vicatuparahahi yátupina víjaracava eta véhisira ema Viya

12 Tacahe, nuparapenaveana, nuvaraha ácaicutiara yátupina eta majapanuirahéhi ema Viya. Eta táetaviuchirahi eta majapanuirahéhi, ecaturahahi íjaracava yátupina eta iáqueheana étapa eta iáchanavana eta éhisiraina émainachucha ema Jesucristo. Tacutihi eta iámavahuhi me Viya. Jéhesare, tétavica vahi eta ecurisamurechiraya éma tayehe tamutu eta ecaemataneasirana éma. ² Énerichuvare eta ítaresirana, vaipa ecuehica eta tayaherepi eta juca apaquehe. Ítsivachapasera eta epanereruana, apaesa támotupa apanainahi eta ítaresiraina. Tásiha, ímatisarepa eta mavarahaqueneanahi ema Viya, ítucayareva icha eta táuriqueneana. Ecurisamurechayare éma eta íchira eta tatupiruvacueneanahi.

³ Núti mayehenuhi apóstole ema Viya. Tituparacanuhi numetacaheyare: Emutu éti, tátupiruva eta epanereruana tayehe eta ítucaqueneana máijjararuheanahi ema Viya, apaesa tauri eta ecaemataneasiraina mayehe. Nacuija nacasiñavavaica. ⁴ Tacutihi eta viáquehe viti achaneana. Camurianahi eta táunavanahi, táematanepachuhivare. Vahi étainarichuhini eta táitucaqueneanahi. ⁵ Ene vicahehi víti. Camurihavihi, étanaichuhisera eta viáquehehi eta víurujiasiracacahi eta véhisirahi ema Cristo, vímicatacaairahi eta vicaemataneasirahi éma.

⁶ Ema Viya, apanapanenejihí eta vítucaqueneana eta máijjarasirahavihi eta vématanepachuyarehi máicha. Tacamunuhisera vahi vicuemepururecava eta vítucaqueneanahi máijjararuhavianahi, apaesa táuri eta vicaemataneasiraya. Te tíjaracahavipuca éma eta vítusirayare vicametarairu, vijaneacavainapa, machu vihapapirichahini eta táimiturapiana eta véhiruhi. ⁷ Te tíjaracahavipuca eta vítusirayare vímicataca ena víchamuriana, tatupiruvayarehi te visamure eta vímicatasiravacaya. Nácani náitucahi tímiturecana, vahi nayacujimahi eta náimituresiraya. ⁸ Nácani náituruequenehahi eta náetumechiraya nácani apana, váhivare nayacujimahi. Nácani tíjaracasírecanahi eta náimahaqueneana, tátupiruvayarehi te nasamure eta nacajirahi ena ticamunuvanahi. Nácani cátoparahanihí téchapajiricarahianayare, tivapinavanayare eta náitauchirahi eta natuparacasivahi. Nácani tímicatacanahi ena tijapanucareanahi, tíúrisamureanaya eta náimicataresirahi.

Eta víurivahi nayehe ena achaneana ticaecherayare eta yátupirahi eta véhisirahi ema Viáquenu Jesucristo

⁹ Nuparapenaveana, yátupina eta émunasiracacaina ena echamuriana. Vahi apimirahemahi, ímijachava eta émunasiracaca. Evapinavaya eta íchira eta táuriqueneana. Épuruyare eta tamauriqueneana. ¹⁰ Tiápajucavainapa eta émunajirisiracacaina eta echamuricaairahi. Ecnachainapa namutu ena echamuriana. Yátupina eta epicauchiracacahi. ¹¹ Étumechavaina eta ecaemataneasirahi ema Viáquenu. Tavapinava eta esamureana. Tacuija eplujuvavacaina.

¹² Íúrisamurereacavayare eta ejacapiraya eta ecucha-paquenehi. Ecayeheyare paciencia tayehe eta ecatajivairana. Vahi tacuechuquiha eta eyujarasirana.

¹³ Ímicatajiricaca ena echamuriana, tayehe eta nacamunuiravana. Tiúriyare eta ejacapiracaca te epaiiuchacaca.

¹⁴ Te natiarihinapuca nácani náehahe, napanajiricahepuca, eapanuyare éna. Eyaseuchaya me Viya eta náuricacarevaina. Váhisera ecuyaseucha jáceni náicuñavanéna.

¹⁵ Te tatiarihinapuca jáceni tíúrisamurecare nayehe náceni, éti apanava íúrisamureyareva. Téhesera te tatiarihinapuca eta ticatisamurecarehi nayehe náceni, eapanuvacayare éna, íyahayareva éti apana.

¹⁶ Ecurisamurechacacaya ena echamuriana. Vahi ecucasiñavavairica. Ácuticacahi nayehe ena mánsuanahi, váhivare ecucasiñava eta ítusirahi.

¹⁷ Te tatiarihinapuca náicharacahe eta nacatichirahe, vahi ecuitsicava. Íchayaresera eta jáceni táuriqueneanahi nayehe namutu ena achaneana. ¹⁸ Nacuija ecucaticaha. Te natiarihinapuca nacatianacahe eyanau-chayare te napena émemunacavayare apaesa vaipa nacucaticaha. ¹⁹ Némunarqueneana, te tájahapuca náicharacahe, vahi ecuitsicava. Cápachi mararihi ema Viya, máimahainepa éma téchayare eta náicuñayare. Taicha ema Viáquenu, ani macahehi tayehe eta Sagrada Escritura: “Nímahainepa núti eta táitsivayare. Núti néchahi eta náicuñayare ena ticaviurevanahi eyehe” macahepa. ²⁰ Ánivare macahe éma: “Te pímaha máecuhapahi mácani ticitianacavihi, pénicayare. Te mamaunepahipuca, pésicayare. Eta máimairainahi eta pémunasirahi, ticatisamurevainapa titsirihainapa” macahepa. ²¹ Vahi ecuisapava ítscava eta náichiraheya te táíñehiqueneana. Étumechavasera eta íchiraya eta táuriqueneana. Éta ticaepahayare eta nasemaneva.

13 Éti, emutu esuapajirahiyare nayehe ena tuparairucana, taicha éna manacaqueneanahi ema Viya eta návacureanahi. Nájina émanaina máemunasiricavahini. ² Eta tacahe, nácani tícapauchavanahi nayehe ena tuparairucana, tímicutijiricavahi nácapaemachahivare ema Viya. Jéhesare, ticaicuanayarehi ena téjecapavanaripahi. ³ Taicha ena tuparairucana, vahi étaina tíminacavacahi éna eta náipicararesiraya náceni tíchanahi eta táuriqueneana. Nácansera ticaviurevanahi, táuricahi tipicanayarehi. Te evarahahipuca íúri nayehe, esuapajirahiya nayehe, tásiha, éna ticunacheanainapa. ⁴ Taicha ema Viya, émahí macaejacavaca te návacureanahi, náurichayarehi ena achaneana. Téhesera ecaviurevahi, epicayarehi taicha éna vahi támapurujimahi eta nacatuparahairahi. Natuparacasivahi me Viya eta náicuñasirayare ena ticaviurevana. ⁵ Eta tacahe, tavarahaichu esuapajirahiyare nayehe ena tuparairucana, apaesa vahi nacuiñacahe. Tavetijipa esuapajirahiyare taicha éti etuparacasivahi me Viya. ⁶ Tacutiquene tatuparacacacahi eta evachachirayare eta impuesto. Taicha ena tuparairucana, natuparacasivaichuhi mayehe ema Viya, náitauchiraya eta nacaemataneasira éma.

⁷ Tásiha, ítaurahiyare te jáceni nayaseasiraheana eta cuota étapa eta nayaseasiraheana eta impuesto. Epicauchavare náceni típicachacareanahi. Émunacavare náceni témunacacareanahi. ⁸ Nacuija ecan-tevéya. Tituparacacacahi evachachavaneyare jáceni entévehi nayehe. Tituparacacacacahi émunacacayare ena echamuriana. Náceni títauchanahi eta juca náemunasira, náitauchahi eta mavanairipi ema Viya. ⁹ Te pémunarahihi píti nayehe ena achaneana piparaepianahi ticutiyaehi eta pémunasiravahi píti, vahi pipanerechaimahi picapinaru, váhivare picaparecaimahi, váhivare píamerecaimahi, váhivare pivehaimahi esu apana esena mayena ema apana achane, váhivare pépiyaequenerecaimahi. Taicha náceni

témunarahanahi, vahi nacaetemaimahi ena naparaepiyana. Te yátupi eta émunaraivaya, máejerare eta ítauchirayare tamutu eta vanairipiana.

¹¹ Eta tacaheyare eta ítaresirayare. Vaipa véjekaracha eta sácheana. Vahi vímacacaracavaimahi. Vitsecavayarehisera taicha víánehipaicha eta jena sácheyare eta máitecapiraya ema véhiruhi. ¹² Eta vicuchapiraipa eta machavirayare ema Víáquenu, tacutihi te vicuchapaipa te jena yati eta tijarahahi. Puiti vímahapa eta tajarahiquene. Tásiha, ínajicapa eta íchaqueneanaini te timapicu. Puiti tiápajucavasera eta iúrivana, étapa eta íchaqueneanaina te tijarahi. ¹³ Ímicapicauchavayare eta itaresirana. Iúrisiyare tamutu sácheana. Vahi ecavahaimahi. Váhivare ímisiapavaimahi nayehe ena ticapiestaranahi. Váhivare túhusihémahi. Vahi tivayuaachémahi eta tájiparacana. Vaipa iúmeharerecaimahi, váhivare ecapinarurahimahi. ¹⁴ Tásihasera, ímereco eta iúrivaina. Ácuti ema Víáquenu Jesucristo eta máurivahi éma. Vaipa ecusuapa eta tajamurachaqueneanahi eta íaqueheana. Váhivare ecupanerecha eta íchiraya éta.

Vahi ecuaecahi ena echamuriana

14 Te napauchahépuca nácani navarahahi tisiapamurihaheana, echamurianayare, vahi ecuepuruvaca. Ejanuvacasera eta ejacapiraya. Te jácani apaesarichuhi eta nacasiñavairahi mayehe ema Víáquenu, napicauchaichaha eta nayeherepiana ichasiana, vahi ecucapaemachahini éna. ² Nararihi ena títuca nanica tamutu eta tinicacareanahi. Nararihivare ena apanahi eta nayeherepi, náimijachahi vahi tiuri nanica eta vaca. Tásiha, máechejirechucha eta nanica. Éna, vuíchaha muracanainahichaini tayehe eta véhiruhi. Eti ítuca enica tamutu, vahi ecuepuruvaca éna vahi tinicanahi eta vaca. Étipa eti máechejirehi eta enica, váhivare ecuepuruvaca ena tinicanahi tamutu. Taicha majacapaquenehevacaipahi ema Viya emutu. ⁴ Vahi ecuimijachavaimahi étinahi échavaca eyaseserecarahi ena machaneranaahi ema Viya. Éma, téchavacahi ena mavanaranahi. Máimararacahi eta táurivahi náicha, macunachavacahi éna. Te váhipuca, émainahi techa eta máemechiravacaya.

⁵ Tacutiquene váhivare ecuepurucaca tayehe eta sache iúrujisiravana eyujarasirana. Nararihi náimijachahi tiúripa te sávarumuhuana. Nararihivare tiúripaahi nasama te lumincumuhuana. Nararihivare tamutuchucha sácheana tiúrihi eta náimairahi. Étipa échinava eta sache éhiruyare. ⁶ Nácani tiyujarauchavanahi te jena sache, ena navarahahi napicaucha ema Víáquenu. Ena apamuriana, vahi tácomesahini nanerejichahini eta sache, éna apanava napicauchahi ema Víáquenu. Ena nacahehi nácani tamutuchucha nanicahi, eta napicauchirahi ema Víáquenu, nahasulupayachahi éma. Nácanisera náepuruhi nanica eta jácani tinicacareana, táichavenehivare eta napicauchirahi ema Viya, nahasulupayachavare éma. Tamutuhi tiuri naicha.

⁷ Taicha vahi vítijiruváinahini eta vítaresira. Émaripa téchahavihi ema Víáquenu. Émachucha vicaemata-

nearuhi, visuapirayarehi éma te tamutu. Étaripa eta vépenirapuca, váhivare vítijiruváinahini véchina-vahini. Émarichuhi téchahavivare te tamutu. ⁹ Ema Jesucristo, tatuparacahi eta máepeninahaviyarehi, tiápechavayarehivare tichava títareca, apaesa émainapa Víáquenuya viti vítareruanaichaha, énapa ena náepenaqueneanaripa.

¹⁰ Étiserá, vahi étinahini tátuparacahehine échavaca eyaseserecarahi ena echamuriana. Váhivare étupicavahini eta épurujisiracacahi. Échavarichu eta vimutuirayare vicayaseserehi te mamiaru ema Víáquenu Jesucristo. ¹¹ Ema Víáquenu, ani macahehi te Sagrada Escritura: “Núti acaneripahi eta nítaresirahi; puíticha máepenacacanhivare eta nutiarahirayare. Tásiha, nútirichu nucatuparahahi nuyaseserecavacayare namutu ena achaneana. Namutu tépuyumirauchanuanayare te numirahu. Tímatinuanayare eta yátupirahi núti tituparacanu júesnuhi nayehe, nuti Iáquenu” macahepa. ¹² Tacahe, vimutu émanapachuhaviya vimetaurecava mayehe ema Viya. Éma máimatiya tamutu. Táji-na virataha víyumurucahini.

Vahi ecuimiaquipaica ena echamuriana

¹³ Tásiha éti, vaipa ímijachavaimahi étinahi échavaca, eyaseserecarahi ena echamuriana. Táurisera eta ecachanéracacaina. Tasapihasea, te tamutu jácani íchaqueneana, étaviuchaya eta iúrivahi nayehe. Tacuija jácani táimiaquipaicavaca éna ícha. ¹⁴ Núti, eta mavanaranuirahi ema Jesucristo, numetacahe: Tájiina eta tinicacareana tamaeperajicahavimahi eta vinisirahi. Nararihisera ena vichamuriana, tépuruana eta jácani tinicacareana, napisirahi eta tamaeperajisiravacayarehíji. ¹⁵ Tásiha, nuconsejachahe: Vahi ecuimiyusemaca ena nani, váhivare ecucapaemachahini tayehe eta jácani tinicacare, machu ímicainajiruchavaca ena echamuriana mavachareruanahi ema Cristo eta máepenirahi. ¹⁶ Máchuvare émechajisiava tayehe eta ímatiquenehi tiúri. ¹⁷ Taicha eta véhiruhi ema Viya, vahi étaparacaina jácani vinicaquene-repiana, véraqueneana. Étaripa eta ticunachacarehi mayehe, eta víchirapaipa eta táuriqueneana, navetijiva nayehe ena vichamuriana. Mavarahavare vítuca-vahini tájiina tahapapiricahini eta vicurujisiracacahi, apaesa táimiyavaini eta víúrisamureva vimutu, maicha ema Espíritu Santo. ¹⁸ Éti, te yátupina eta émunasiravacahi ena echamuriana tépuruanahi eta jácani tinicacare, tiúriyare eta ecaemataneasiraya ema Cristo. Tétavicavahi eta ecurisamurechirahi ema Viya, ecunachacarehivare nayehe ena achaneana.

¹⁹ Tacahe, vitanucayare eta víúrivaya nayehe ena vichamuriana, apaesa vétumechacaca tayehe eta véhiruhi. ²⁰ Vaipa íacapaemachacacaimahi tayehe eta jácani tinicacare. Váipavare ecuiputsicacaimahi, machu émitiaca eta echamuricacairahi eti majanearuanahi ema Viya. Yátupiquene eta táurivahi tamutu eta tinicacare. Tájiina táimanéna. Énasea nácani tépuruanahi jácani tinicacare, te nanicapuca, ticauyayacare táimiaquipaica tayehe eta pecatu. ²¹ Tiúripaichu vahi ecu-

nica eta vaca, váhivare ecuera eta cátsiama, machu étaina táimiaquipaicapuca ena echamuriana tayehe eta pecatu, máchuvare nacainajiruva eta véhiruhi. ²² Éti, yátupihí eta esuapirahí ema Viya tayehe eta tinicacareana. Ejaneacavasea te mamirahu éma. Té-tavicava eta náuricacareva nácani náimatihí eta náurivahí te nasamure, vahi nacaecahirahihini énajivainahini. ²³ Nácanisera tísapavanahí tinicana, tiávamirahuanahí, énajivapa tímiaquipaicanahí eta nanisirahí, taicha vahi tátupiruvahini eta nanisirahí. Tamutu jácani vahi tátupiruvahí eta visamure eta víchira, pecatuanahí éta.

Ecurisamurechaya ena eparaepiyana. Vahi étijiricavaimahí eaurisamurechava.

15 Tacahe, viti vímatianahí eta táurivahí eta vinisirahí eta jácani tinicacareana, tituparahaviripa véchapajiricavacaya ena vichamuriana tímijachanahí vahi táurihini eta nanisirapuca. Vácayehe paciencia nayehe. Vaipa vipanerechahini étachucha vicurisamurechirava vítijiricáva. ² Emutuchuchasea éti, ecurisamurechaya ena eparaepiyana. Éñamava éti eta náuricacarevayare, apaesa tápajucavapaipa eta nasuapirahina eta véhiruhi. ³ Taicha ema Cristo, vahi mácarichuhini macurisamurechavahini. Éma, ticurisamurechahí ema Maiya te tamutu. Eta tacahe, nacatianacahí ena achaneana váinarajiqueneana. Tásiha, títauchavahí eta tametarapí eta Sagrada Escritura, ani tacahehi: “Núti nímiyanavahí eta nítauchirahí eta pivanairipiana eta nuyehe, tayanapane eta náumehairanuanahí ena piánaranahí” tacahepa eta Sagrada Escritura. ⁴ Ema Viya tivanecahí ena víyarahánaini profetana nájuchahí eta máechajiriruvana te Sagrada Escritura. Éta, ticamapuravacareyarehi eta táimitusirahivarehi, apaesa táetumechahavi eta véhisira, tacurisamurechahavinavare. Tímitucahavihivare yátupina eta vicasiñava me Viya eta máijarasiraparaca eta víuricacarevaya. ⁵ Puiti nuvaraha máijaracahéhi ema Viya eta evarairahí ecutiya ema Jesucristo eta mapanereruana, étaripa vahi mácarichuhini macurisamurechavahini. Ema Viya máetumechahéhi emutu, macurisamurechahevaréni te jácani íchararacavanapuca, apaesa táuri eta ecachanecacaira. ⁶ Nuvarahavare ácuticahini eta epanereru. Tásiha, te iúrujisiravana, étanainarichuhini eta iáhuana eta ecunachirayare ema Viya, Macaiyaquene ema Viáquenu Jesucristo.

Ema Pablo ticatuparahahí ticametarairuyare nayehe ena apavasanana

⁷ Tacahe, nuparapenaveana, ejacapacacayare eti echamuricanahí, apaesa macunacharehi ema Viya nayehe namutu ena achaneana. Ecutiya ema Viáquenu Jesucristo eta majacapirahivahí víti. ⁸ Écharichuhivare eta máucupaisirahí éma te juca. Tétavacavahí eta mamansuvahí eta máimitusiravacahí ena majaneanana israelítana. Mavarahahí máimimatichavaca éna eta máitauravahí ema Viya tamutu eta

máechajiriruvana máijararuvana nayehe ena viáchucanaveanaini. Váhiquene tivayuarahí. ⁹ Énerichuvare máimimatichahí ena apavasanana eta majapanuiravacahí ema Viya apaesa nacunachayarehi éna apanava éma. Títauchavayarehi eta máechajiriruvahí ema Cristo eta Sagrada Escritura, ani macahehi: “Puiti núti, énapa ena nuchaneranahí apavasanana vicuticacahí eta vicunachiravihí, piti Tata, vijirauchiravihí eta vipicauchiravihí”. ¹⁰ Te apana Escritura, áni-vare tacahe: “Eti apavasanana, étipa eti israelítana, étamurihéipa ecuticacainapa eta iúrisamurevaya me Viya”. ¹¹ Te apanavare Escritura, áni-vare tacahe: “Étamurihénapa eta ecunachirahí ema Viya, eti apavasaqueneanahí. Váhivare ínajicahini eta ecunachiraya éma”. ¹² Eta májurehi ema víyarahaini Isaías te Sagrada Escritura, áni-vare tacahe: “Tíjahúchavainapa ema Cristo, te nájina nacuchapaimahí. Éma, aquenucayare nayehe ena apavasanana. Macarichuyare éma ticasiñavanayare mayehe, eta nacuneraya éma” tacahepa. ¹³ Ema Viya, tétavacavahí eta macunecarevahi, ticasiñacarehivare. Tásiha puiti, tétavacavahí eta nuvarairahí máijaracahéni éti eta tavayuchiraina eta iúrisamurevaina, tavayuchirainavare eta ecasiñaira mayehe, apaesa tanaracaina tamutu eta epanereruana. Eta mávahásirahehi ema Espíritu Santo, máetumechahéni muraca apaesa táetaviuchiravaya eta ecasiñavairayare mayehe ema Viya eta máijarasiraparaca eta iúricacarevaya.

¹⁴ Tiuri puiti, némunaruqueneana nuparapenaveana, nucasiñavahí núti eta eyehe, eta étaviuchiraipa eta iúri-va étapa eta ímatiequenehairahí tamutu eta máimiturapiana ema Viáquenu. Yátupihivare ítucahi econsejachacaca. ¹⁵ Nucasiñahivare eyehe puiti juca eta níjarasirava nucajurehe eta juca nucartane étapa eta juca táechajisihacqueneanahí, apaesa vahi ecuemitísica, taicha nutuparahahí me Viya eta nujaneasiraheya eti apavasanana. ¹⁶ Éma, tituparacanuhi eta nuyansirayare nupaipica te tamutu avasareana, nucametarairuiraya nayehe namutu ena achaneana eta najacapacareipahí me Viya eta nacasiñavairahí eta mayehe. Tituparacanhivare eta nujaneasiraheyare emutu eti esuapanahí éma. Tásiha, nuvaraha núti nímerecaheya te mamirahu ema Viya te jena sache ticutiyahehi námavahuhe. Éma tiúrisamurénapa eta majacapiraheya, taicha máepachiaruhéipahí ema Espíritu Santo.

¹⁷ Eta mavanaranuirahí ema Jesucristo, nucunachava eta nucaemataneasirahí ema Viya. ¹⁸ Váhisera nucasiñavaimahí, nucunuchavaimahí tayehe eta jácani nacaemataneasiranahí ena apamuriana mavanarana. Nútisera nítauchahí eta nucatuparahairahí me Cristo eta nímitatichiravacahí ena apavasanana eta nasuapirahí ema Viya, náehisirapahí eta nímiturapihí étapa eta núrivahí eta nayehe. ¹⁹ Nímechavacahí ichape eta tíaramicareana eta nítipajijiasirava maicha ema Espíritu Santo. Tacahehi eta nítauchirahí tamutu eta nucametarairuirahí eta máimiturapiana ema Jesucristo. Tamutuhi nupaica, népanavahí te Jerusalén,

níhecuha tayehe eta departamento Ilírico. ²⁰ Taicha ichape eta nuvarairahi nítecapauchaya tamutu avasare, te jácani nájinaichaha nacametairuhini. Nuvarahaya nucametairuyare nayehe ena achaneana tájinahi nasamihahini eta máijare ema Cristo. ²¹ Nítauchahi eta táechajiruvahi eta Sagrada Escritura, ani tacahehi: “Náechapa puiti eta máijare ema Cristo ena achaneana tájinaquenehi apaesainahini nasamairiricahini eta máijare. Náimatiequenehapa eta máimiturapi, éna eta namaitucaquenehi namasamaquenehivare” tacahepa.

Ena Pablo mapanerechapa tiyanayare te Roma

²² Ichapemurihi eta áñoana nuvarairahi nupaipiuchahe éti, nucachaneheya apaesaina. Váhisera nítujicava, taicha eta nupaipiuchirapahi eta apana avasareana. Púitiserá nítauchapa eta nupaisirahi tayehe eta avasareana. ²⁴ Tásiha, puiti nupanerechahi nétavauchaheya achichu juca, nuyaniraya te avasare España. Nuvaraha vicaurisamurechacainapa. Te támutupa eta nucachaneheya eta nétavauchiraheya, németeaca ímicatacanuyare jácani eta nuyanirayareva.

²⁵ Nuyananumayaresera te Jerusalén. Nunapanumayare eta nanaquiruvana ena vichamuriana nayeheya ena apamuriana vichamurianahivare ticavasanahi ánaqui. ²⁶ Taicha ena vichamuriana te Macedonia, énapa ticavasanahi te juca Acaya, tinaqui quicavanahi eta náimicatasihaya ena apamuriana vichamuriana páureana ticavasanahi te Jerusalén. ²⁷ Tétavicavahi eta náurisamurevahi eta nanaquisiravahi, navairahi títsirijicavanaya nayehe. Táurica eta juca náitsirijisiravaya, taicha ena nachamuriana israelítana tímimati- chanahi ena apavasanana eta máimiturapiana ema Viáquenu. Tásiha puiti, énapavaya ena vichamuriana apavasanana, nacajiyare ena nachamuriana israelítana. ²⁸ Tacahe, te támutupa eta níjarasiravacayare ena vichamuriana páureana eta nanaquiruvana ena nuchamuriana te juca, nuyaninavarepa nucaijuhe te España. Nétavajicainapasera eta ara eyehe. ²⁹ Németeaca eta nítecapauchiraheya, ichapeyare eta víurisamurevaya eta vétumechiracacayare taicha eta véhisirahi ema Cristo.

³⁰ Nuparapenaveana, nuyaseacahe te máijare ema Viáquenu Jesucristo étape eta vémunasiracacahi maicha ema Espíritu Santo. Nuyaseacahe ímicatatanuhíni eyaseuchanu me Viya te eyujarasirana.

³¹ Eyaseacahini eta majaneasiranuhini eta nítecapauchiravacayare ena masuapajirairahanahi ticavasanahi te Judea. Étape eta juca námaquenyarepahi nanaquiruvanahi ena vichamuriana, táurihini eta najacapi- rayare ena vichamuriana ticavasanahi te Jerusalén.

³² Eyaseacahivaréni ema Viya máisapanuhini eta núsamurevainahíni eta nítecapauchiraheya, ímicatasiranuhíni eta nítujisiravaina nucachanehe. ³³ Ema Tata Vicaiyaquene, tétavicava eta macanarasirahi tamutu eta vipanereruana. Nuvaraha puiti yátupina esamava eta macanarasirahéni éti. Amén.

Ena Pablo máemechajirisiha te macartane namutu ena máimatiqueneana machamuriana

16 Nutuparacahe emutu échapajirisanu eta suítecapauchiraheya esu apana vichamuri Febe. Taicha ésu, tétavicavahi eta suítatiravacahi ena vichamuriana te avasare Cencrea. ² Tauri eta ejacapi- raina esu, evapinavayare te máijare ema Viáquenu Jesucristo. Ímerecayare eta yátupirahi eparapehivare ésu eta echamurirahi tayehe eta véhiruhi. Ímicata- cayare te jácani sucamunuiravana. Taicha ésu, camuri- anahi ena suímicataruanahi. Nútiripa, tétavicavahivare eta suímicatasiranuhi.

³ Échajisinanuyare ema Aquila ésupa esu mayena Priscila. Vahi némitisicavaca éna eta nucachamurirahi tayehe eta vicaemataneasirahi ema Jesucristo. ⁴ Ena, vahi nacatiequenehahini eta náitaresirana eta nacatiu- chiranuhi. Nuhasulupayachavaca éna. Énerichuvare nahasulupayachavare namutu ena apamuriana vichamuriana apavasanana. ⁵ Échajisinanuvare ena apamuriana vichamuriana tíurujicavaráhianahi te napena ema Aquila ésupa esu Priscila. Échajisina- nuvare ema némunarquenehi nítunacasare Epeneto. Éma tínapucahi majacapahi ema Cristo apaicape te nuyanapa te Acaya. ⁶ Échajisinanuvare esu María. Nusamairiricahi eta ichapemurirahi eta suímicatasi- rahehi éti. ⁷ Échajisinanuvare ena nujaneanana An- drónico émapa ema Junias. Éna, nuchamurianainihi eta vicaeratairahi te cárcel. Tétavicavahi vémunasirahi éna viti apóstoleana. Éna, tínapucanahi nuyehe eta náehisirahi ema Cristo.

⁸ Échajisinanuvare ema Amplias, émarichuvare némunarquenehi eta véhisirahi ema Viáquenu. ⁹ Échajisinanuvare ema Urbano, ema vichamurihi tayehe eta vicaemataneasirahi ema Viáquenu Jesu- cristo. Échajisinanuvare ema némunarquene Es- taquis. ¹⁰ Échajisinanuvare ema Apeles. Yátupihí éma eta máimeresirahi tíurihí eta máehisirahi ema Cristo. Échajisinanuvare ena machichanaveana ema víyara- haini Aristóbulo. ¹¹ Échajisinanuvare éma apanavare nujaneana Heredión. Énapa ena machichanaveana ema víyarahaini Narciso, tétavicavahi eta nasuapaji- raivahi éna me Viáquenu Jesucristo. ¹² Échajisina- nuvare esu Trifena ésupa esu Trifosa. Énarichuvare ticaemataneacanahi ema Viáquenu. Échajisinanuvare esu vémunaruquene vichamuri Pérsida. Tétavicava- hivare eta sucaemataneasirahi ema Viáquenu.

¹³ Échajisinanuvare ema Rufo. Éma, tétavicavahivare eta masuapirahi ema Viáquenu. Échajisinanuvare esu maena. Ésu, tímicutijiricavahi mémenahini eta nuyehe ésu. ¹⁴ Échajisinanu ema Asíncrito, ema Flegonte, ema Hermas, ema Patrobas, ema Hermes. Échajisinanu ena vichamuriana tíurujicavarahiana te napena. ¹⁵ Échaji- sinanu ena Filólogo, ésupa esu Julia, ésupa esu Olimpas émapa ema Nereo, ésupa esu maparape. Échajisinanuvare ena vichamuriana tíurujicavarahiana te napena.

¹⁶ Puiti eta néchajisirahehi emutu eti nuchamuriana, nuvaraha nétserarecahe emutu te máijare ema Cristo. Ani te juca, téchajicaheana namutu ena apamuriana vichamuriana te tamutu avasareana.

¹⁷ Nuparapenaveana, nuvaraha ecuneuchavare nayehe ena tipanerechanahi típutsimurihaheana taicha navarahahi tihapapicaheana eta te éhiruhi. Ena nani nacatianacahi eta juca vímiturapihi iáravahuhi.

¹⁸ Érajicavayare eta nayehe, taicha éna vahi émainahini nacaemataneacahini ema Viáquenu Jesucristo. Énajivachucha navaraha tiúrichavana. Tétavicavahivare eta náitusirahi téchajiricavana. Títivehi eta náechajirisirava. Étachuchasera navarahahi tivayuarecana te nasamureana ena achaneana tijimuyapanereruana.

¹⁹ Namutuhi tímatiheana éti, náechahivare eta esuapajiravahi. Eta tacahe, tétavicavahi eta núsismurevahi ícha. Ecajurucaseraini eta íchirahi eta táuriqueneana. Vahi ecuquicha eta tauriqueneana. ²⁰ Nuti nucasiñavahi me Viya, máimicatasiraheya íputsicavaneya ena machanerana ema Satanás. Tásiha, tiúriyare eta íchararacavahi maicha ema Viya. Nuyaseacaparacavare ema Viáquenu Jesucristo táetaviuchahíni eta iúricacarevaya máicha.

²¹ Téchajicahe ema Timoteo, ema nuchamurihi eta vicaemataneasirahi ema Viáquenu. Énapa ena nujaneanana: ema Lucio, ema Jasón, émapa ema Sosípa-ter.

²² Núti apana nuti Tercio, núti nájuchahi eta juca carta, néchajicahe núti apana te máijare ema Viáquenu Jesucristo.

²³ Téchajicahevare ema Gayo, ema nítecapaurehi te mapena. Étarichuhivare viúrujisirarevahi te viyujarasirana. Téchajicahevare ema Erasto, ema tayehehi secretario tésorerohe eta te alcaldía. Téchajicahevare ema viparape Cuarto.

²⁴ Nuyaseuchaheparaca emutu éti me Viáquenu Jesucristo, táetaviuchahíni eta iúricacarevaya máicha. Amén.

Eta táichecuarahui eta macartane ema Pablo

²⁵ Nuvarahahi vácuticacaini eta vijirauchira ema Viya. Éma, mavarahahi tétumechaheya tayehe eta éhisirahi ema Viáquenu Jesucristo. Eta tacahehi eta nucameta-rairuirahi, nímitucavacahi namutu ena achaneana eta majacapiravacahi ema Viya eta nacasiñavairahi me Machicha. Acane eta táepaniravahi eta apaquehe, ema Viya Eterno mapanerechapa eta majacapirayare namutu ena achaneana ticasíñavanaya eta mayehe. Ena israelítana énapa ena apanapanenejiqueneana achaneana, namutu tijacapacareanayarehi. Étaripa eta náechajisihaqueneanahi ena víyarahánaini profetana tayehe eta Sagrada Escritura. Nájinasera nácaicutia-rahini. Mapaenumavapa tímimatichanuhi núti ema Viya eta mapanereruhi.

²⁷ Ema Viya, ¡tétavicavahi eta máitupajijiasirava! ¡Macarichuhi tijirauchacarehi ticunachacarevare tayehe tamutu! ¡Máitavacacayarehi eta vihasulupayachirayare éma tivanecahavihi ema Jesucristo eta macuchucuirahaviyarehi! Amén. Tamutupa.

1 Corintios

1 Nuti Pablo, mayehenuhi apóstole ema Jesucristo. Níchuarecasivaichuhi mayehe, manerejiru-nuichuhi ema Tata Vicaiyaquene, mavarairahi nímitucaya eta náechajiruvana éna. Puiti nucajurehe núti émapa ema vichamuri Sóstenes, eta juca carta eyehe eti vichamuriana ecavasanahi tayehe eta avasare Corinto. Puiti éti ívaháurupa ema Viya taicha etupiruvahi esuapa eta máichuirahéhi éti apanava, mavarairahi émayarepa ema Machicha Jesucristo ecaemataneacayarehi. Ecutiripa ena apamuriana vichamuriana ticavasanahi te tamutu avasareana, taicha ecasiñavahi eta eyujarasirana eta mayehe. Vimutu víti, émanarichuhi ema Viáquenu Jesucristo ema visuapaquenehi. ³ Nuvaraha macatajicahehíni ichape ema Tata Vicaiyaquene, émapa ema Viáquenu Jesucristo; náijaracahéhíni táurivaina eta epanereruana.

Viúricacarepa ichape maicha ema Cristo

⁴ Núti nuhasulupayachaparaca ema Viya táichavene eta majapanuiraheripa. Eta ívahásirahi ema Jesucristo, ichaperinehi eta iúricacarevahi. ⁵ Tíjaracaheripa eta ítupajijiasiravahi eta échajisirana, échemaharipihí tamutu. ⁶ Écharipa eta numetacahequenehi eta máijarasiraheya ema Cristo eta iúrivaya. Puítipa tíjaracaheripahi. ⁷ Tamuturipa tíjaracahéhi ema Viya. Tájina pa íatájivainahíni eta ítupajijiasiravaipahi. Étanecha ecuchapayare eta jena sáchezare machavirayare ema Viáquenu Jesucristo. ⁸ Puiti ema Viya tétumechaheyare puiti juca vicaijuheyare eta ítaresiraya apaesa tacuija ecuavamirahu te jena sáchezare machaviraya ema Viáquenu Jesucristo. ⁹ Ema Viya vahi mahapapicaimahi eta mapanereruana. Yátupi eta máitauhirayarehi eta máichuirahéhi, mavarahahi iúrujicavayare ecachenapa ema Machicha Jesucristo ema Viáquenu.

Vahi táurica vicaerajicaca

¹⁰ Nuparapenaveana, ¿tájahapapuca ecayema éti vaipa tétupicava eta epanereruana? Núti nusamairicahi eta íputsiasiravavacari. Taicha tacahehi eta nametasiranuhi ena suchichanaveana esu vichamuri vénaraha Cloé. Nuparapenaveana, nutuparacaheyare te máijare ema Viáquenu Jesucristo, tácuticáca eta epanereruana. Nuvaraha étanainarichu eta epanereruana. Vaipa ecuiputsiacaca. ¹² Taicha ani tacahehi eta nusamairirisirahehi. Ena apamuriana ánipaji nacahehi: “Víti viúripanahi viti véhicanahi ema Pablo”. Ena apamuriana énerichuvare nacahehiji: “Vítira viúripanahi viti véhicanahi ema Pedro”. Ena apamurianavare nacahepaji: “Vítira viápajupanavahi viúripanahi viti véhicanahi ema Cristo”. ¹³ Váhira tiuri énenahini ácahehíni, taicha ema Cristo vahi apapipijinahini eta máimiturapiana. Nuti Pablo, váhira nútinahini népenahini te crusu íchavenénahíni éti. Eta ecaicachasirahi, váhivare étainahini te níjare. ¹⁴ Tiúririchuhi vahi nútinahini nícachasicahéhíni éti. Nájjina tiyunacaimahi eta nútinahini nícachasicahéhíni te níjare, náepiyaequenehanuhipucai. Yátupi nícachasicavacahi ema Crispo émapa ema Gayo. Téhesera te máijare ema Cristo eta nícachasisiravacahi. ¹⁶ (Néchavapasera eta nícachasisirahivare ema Estéfnas, énapa ena machichanaveana. Váipasera néchava nájahapuca nácani nícachasiruanahi.) ¹⁷ Ema Náquenu Jesucristo tituparacanuhi nucametarairuyare eta viúchucuirayare máicha. Váhira étainahini mavanecanuhini nícachasiricahini. Tacahe, tatupiruvahi eta nucametarairuirahi. Váhisera nuvayuyujicaimahi nútinapapucaini nápapucavahini eta nusupacareva, tásápihapapucaini vahi tacusuapacarehini eta máepenirahi ema Cristo te crusu.

Ema Viya máijaracahi ema Machicha Jesús eta máitupajijiasiravahi

¹⁸ Natiaríhíni ena achaneana náimijachahi súnsurupiana eta juca nucametarairuirahi eta viúchucuiraya taicha eta máepeninahavihi te crusu ema Viáquenu Jesucristo. Ena nani masupajirairahanahi énarataíturavanayare eta ecuñaraquí. Vítisera viti macuchucureanayare, tiúrihi visama eta yátupiqueneana tásihaquenehi me Viya. ¹⁹ Ema Viya ani macahehi eta máechajiriruva eta te Sagrada Escritura: “Tamapurujíni eta náitucaqueneanaini ena títupajijihanaini, énaripa máehicanurahanahi. Súnsurupihí nuyehe eta náchemaravahanahi” macahepa.

Ema Viya máijaracahi ema Machicha Jesús eta máitupajijiasiravahi

²⁰ Eta tacahe puiti, tájjina tacunachacarevainsami me Viya eta máitucaquenehi ema achane títupajijiacavahi, mácani máestropuca, tayanapane macarichuhi nayehe ena apamuriana tímatiequenehanahivare eta tayeheana eta juca apaquehe. Taicha tájjina vahi étaparacaina mayehe ema Viya eta júcana taicha súnsurupianachucha eta mayehe éma. ²¹ Tamutusera eta mapanereruana ema Viya, tétavicavahi eta tapachinavavacahi. Éma, tivanecahavihi viti vicametarairuanayare. Nararihi ena tisuapanapahi eta vimetarairuana. Énaripa tiúchucuhanayarepahi. Tayanapane ena apamuriana náimijachahi súnsurupianahi eta

vimetarairuana. Ena nani achaneana, tamapuruji eta náechemaraivanahi, taicha vahi táimimatichavacahini me Viya. ²² Ena nani nujaneanana israelítana náepiyarichuhi tiyaseserecana, navaraha náimaha eta tiáramicareana tiásihana me Viya. Ena griégoana eta nayeherapi natanucahi eta tápajusiravaya eta náechemaraivaya. ²³ Eta tacahe, vahi tasuapacarehini nayehe eta vimetasirahi eta viúchucuirayare táichavene eta máepenirahi te crusu ema Cristo. Ena nujaneanana titsirihanahi eta juca, tásiha náepuru náehica éma. Ena apamuriana apavasanana náimijachachucha súnsurupiana eta juca. ²⁴ Natarihisera ena tisuapanapahi eta máichuirahi ema Viya, ena israelítana énapa ena apavasananahi. Náimatiripa ema Cristo, eta vanairucairahi mayehe ema Maiya taicha éma tjaracahi ema Machicha eta máitupajijiasiravahi étapa eta matumeva. ²⁵ Tayanapaneinesera te súnsurupihupuca nasama ena achaneana eta vimetarairuana, étasera tápajucavahi tiúripanahi tayehe eta náitucaqueaneanahi éna. Tayanapanevare náimijachahi mamaratahairainahi ema Viya, émahisera túmepanahi nayehe namutu éna. ²⁶ Ímativaichuhi, eti nuparapenaveana, te tíchuhahepa ema Viya, vahi ámutuhini ímatihini eta táichararacavahi eta ítaresirahi te juca apaquehe. Váhivarenéni ámutuhini tuparairucahevacainahini. Váhivarenéni ámutuhini ecaimahaquenevacahini. ²⁷ Tayanapane ena achaneana náimijachahepuca súnsuhéna éti, manerejiruhehisera ema Viya, taicha mavarahahi máimicatsiriacavacayarehi ena tímijachavanahi títupajijiacavana. Tinerejicaheripa éti váhirichu túmejicuhénahini, mavarairahi máimicatsiriacavacayarehi ena tímijachavanahi túmejicuana. ²⁸ Tayanapane eta épurucarehi, náimijachavare máiturerehe, manerejiruhehisera ema Viya. Eta tímicaecherachavacahi eta táejecapiravahi eta napanereruana mayehe ema Viya, taicha vahi éna matanuca ema Viya ena títupajijiacavana, aquenucarahana, ticaimahaqueneanapuca. ²⁹ Eta juca mapanereruhi ema Viya, mamavarairahi nacuija nacucasiñavavaica te mami- rahu éma, náimijachirapuca matuparaca éma nayehe éna. ³⁰ Puítisera éti, majacapaqueneanaripa ema Viya. Mávaháruhevarepa ema Jesucristo maicha ema Maiya. Tacahe, ichaperipa eta échemaraivahi máicha. Sántuheripa máicha, ecutipaipa eta masantuvahi éma. Iúchucurepaipahi tayehe eta ticaviurecarevana. ³¹ Tavaraha vítaucha eta táechajiriruvanahi eta Sagrada Escritura, ani tacahe: “Vahi vítijivaimahi vicunachava taicha eta vítupajijiasiravana. Éma vicunachayare ema Viáquenu taicha ema tiúrichahavihi”.

Ema Pablo macametairuhi eta máepenirahi ema Jesucristo te crusu

2 Nuparapenaveana, échavarichuhi te nítecapauchahénapa cape juca viásinequenehi. Eta nímitusirahehi eta máechajiriruva ema Viya, tiúrihi eta níminecapaequenehairahehi, tamutuhi ticaicutiaracare eta néchajirisirahehi. Vahi tácajerapihini eta néchajirisirahehi. ² Taicha nuvarahahi nímitaticha-

heyare ema Jesucristo, nuvarahavivare yátupinahini ácaicutiara eta masivachaquenehi macatajivairahi éma eta máepenirahi te crusu íchavenehi éti. Eta tacahe, nupamicavahi núti eta nímitusirahehi. ³ Núti, te nímitucahénapa, vahi nítipajijihahini eta nusamiravahi. Nupícarácavahi támapurujihini eta nímitusirahehi. Ichape eta tayayacarevahi eta náquehe taicha eta néñamiravahi vahi tacusuapacarehini eta eyehe eta nímiturapiana. ⁴ Núti, vahi nácutihini mácani achane mavayuyupica eta máechajirisirava. Étisera ecaicutiaravanehi eta nímitusirahehi maicha ema Espíritu Santo. Ecaicutiaravanehi étairahi eta yátupi- queneana tásihaqueneana me Viya. ⁵ Taicha nuvarahahi yátupina muracaina eta ecasiñavairahi mayehe ema Jesucristo taicha ímatihini te esamureana eta yátupirahi másihairahi me Maiya. Vaipa ecuehica eta nayeherepianaini ena viáchucanaveanaini.

Ema Espíritu Santo tímimatichahavihi eta mapanereruana ema Viya

⁶ Étisera ánaquiaparipa eta éhisirahi. Ímatiequenehávacaripa. Tacahe, táurica puiti vímitucaca eta apamuri échajirirucava títucacareana ticajerarapianahi. Eta juca títucacareana tiásihanahi me Viya. Vahi tásihaqueneénahini mayehe mácani vicutiquene achane. Énainahipucaini tásihahini nayehe ena ichapequeneana aquenucana, taicha vahi tánasimahi eta napanereruana éna. ⁷ Eta júcana títucacareana tásihaqueneanahi me Viya, mapanereruana te tépanavainapa acanevaca. Ánaquiaparipasera eta macaerajisirahehi. Tapaenumavapa puiti máimicaecherachahavihi viti achaneana, mavarairahi visiapaya tayehe eta mávasa anuma. ⁸ Ena aquenucanahi, vahi náimatihini eta mapanereruana ema Viya. Nájina émanainahini ema ichapequene aquenuca máimatihini. Taicha te náimatihini eta mapanereruana ema Viya, váhirichuhipucaini nacuémetatacahini te crusu ema Viáquenu. Tájina náimatihini eta émairaquenehi Viya, tiásihahi te anuma. ⁹ Vítisera víti, máimitureanahi ema Espíritu Santo. Vímatihini eta mapanereruana ema Viya. Émahi ema tímimatichahavihi taicha macarichu máimatihini eta tayumurevanahi te mapanereruana ema Viya. Taicha ani tacahe eta Sagrada Escritura: “Tétavacavaya eta náuricacareva ena nani témunacanahi ema Viya. Taicha máijaracavacaya eta náicuchihi natuparahahi maicha éma. Máimahasirichaha eta tacutiquenehi eta náuricacarevaya. Váhivare tisamairicacarehini eta tacutiquenehi te jácani tiyerehi avasareana. Nájina naratahahini náimijachaimahi eta táetaviuchiravaya” tacahepa eta Sagrada Escritura.

¹¹ Viti achaneana, vicarichu vecha eta vipanereruana násihaqueneanahi te visamureana. Nájina apanaina náratatahahini naecha. Ene macahehi ema Espíritu Santo. Macarichu éma téchahi tamutu eta mapanereruana ema Viya, taicha émarichuhi máchanevahi. ¹² Víti, tájina vahi vítijivainahini vímipanerechavahini mayehe ema Viya. Émasera ema Espíritu Santo tímítucavavihi tamutu eta títucacareana

tásihaqueneanahi me Viya, taicha mavarahahi vécha-yare. ¹³ Eta tacahe, eta juca vímiturapianahi tásihaque-
neanahi mayehe ema Espíritu Santo. Vahi tásihaque-
nénahini te vipanereruana. Táitusiava, ena vímitu-
reanahi natupiruvahi najacapa taicha mávaháruanahi
ema Espíritu Santo.

¹⁴ Énaserá nácani achaneana vahi mávaháruanaina
ema Espíritu Santo, vahi najacapaimahi eta máimitu-
rapiana, taicha náimijachahi súnsurupiana. Váhivare
nárataha nacaicutiarahini, taicha ticamunucarehi eta
máimitusiravacainahini ema Espíritu Santo. ¹⁵ Vítisera
viti yátupiqueneanahi mávaháruana, vicaicutiarahi
tamutu eta máimiturapiana éma. Énaserá ena
máehicarahanahi, vahi nacaicutiaraimahi eta apanai-
raipahi eta viyeherepianahi víti. ¹⁶ Tacahehi eta
táechajiriruvana eta Sagrada Escritura: “Nájina
émanaina achane máemunahircavahini máimatihini
eta mapanereruana ema Viáquenu. Tavetijicha májina
mácani máitucahini máimituca ema Viya eta mamaitu-
caqueneanapucaini” tacahepa. Nájnavare nácutiha-
vihíni víti vicaravahuquenehi eta máechajiriruanahi
ema Cristo. Vímatiripa eta mapanereruana.

Vimutu vicompañerocaca tayehe eta vicaemataneasir- ahi ema Viya

3 Nuparapenaveana, cape te nítecapauchahénapa,
vahi tacajerapahini eta nímitusirahehi. Tacutihi te
vicajuruca eta amuya, vépiyayasinahi eta vímitusira.
Tativahi nímitucahe eta epaisirayare éhisirayarehi ema
Jesucristo. Taicha éti vuíchaha támutuhini ínajicahini
eta tajamurachaqueneana eta iáqueheana. Vuícha-
havare éhicahini eta mavarahaquene ema Espíritu
Santo. ² Vahi námainunujicahini eta nímitusirahehi.
Éti ecutihi ena nácani amuyana tiájicanarichaha. Vahi
námainucavahini nanicahini eta cheruji. Ene ecahehi
éti, vahi iámainucavaimahi ácaicutiarahini támutuhini.
Puítirichucha vuíchahavare áratahaimahi ácaicutia-
rahini eta apamuriana títucaceanahi murácapa-
nánahi. ³ Taicha éti vuíchaha támutuhini ínajicahini eta
tajamurachaqueneana eta iáqueheana. Taicha ecapi-
narujiricacaichaha, ecatianajiricacaichaha, íputsimuria-
jiricacaichaha. Eta epanereruana ecutirichaha eta
napanereruanahi ena apamuriana achaneana
masuapajirairahanarichaha. ⁴ Éti épurujiricacahi
nayehe ena echamurianahi, ánipa ecahe: “Víti viúri-
panahi viti véhicanahi ema Pablo”. Éti apamuri eca-
hepa: “Vítira viúripanahi viti véhicanahi ema Apolo”.
Eta juca ecahehi, tacutirichaha eta napanereruana ena
apamuriana achaneana masuapajirairahanarichaha.

⁵ Váhira nútinayarehi éhica nuti Pablo. Váhivare
émaimahi ema maca Apolo éhicayare. Vahi véhicacare
viti, taicha mavanarahavichucha ema Viáquenu Jesús.
Yátupi víti vímitucahehi. Tamutuhisera mayeaneanahi
ema Viya eta esamaqueneanahi. Ema Viáquenu tíjara-
cavahi eta vituparahapachuyarehi. ⁶ Yátupi nútí nína-
pucahi nímisamahehi eta máechajiriruva ema Viya. Te
néquenepa, títecapauchahépa ema Apolo, émapa
títametacahehi tamutu. Émasera ema Viya, ema ticaju-

rusinahehi eta esuapajiraivanahi. ⁷ Táitaurevaquene
nútihinéni névacahi te esamureana eta echajiriru-
cavana, tájinasera vahi nútina néchahe. Émaripa ema
Apolo, ema títametacahehi, váhivare émaina téchahe.
Émara ema Viya, ema téchahi tamutu eta juca. Éma
ticunachacare. ⁸ Nútí, émapa ema Apolo, vicuticacahi
vínunahi eta vicaematane. Vituparahapachuhisera.
Ema Viya tíjaracavahi eta vícuchianapachu, te tíurihi
eta vícáematanérana. ⁹ Víti mamusurahavihi ema Viya.
Éti ecutihi eta sucurecana eta macajurusirahehi ema
Viya.

Eta éhisirahi ema Jesús tacutihi eta náepiyasirahi eta
ichapequene peti. ¹⁰ Tativa, ema maestro tépiyare-
carahi peti arquitecto, éma tinacucha eta labriyu eta
tatumearaya eta yúchama. Tásiha, ena apamuriana
máestroana, énapa tíunachana eta yúchama étapa eta
tamaiquehe. Tiúriyare eta nacaemataneraha. Nanereji-
cayare eta táuriqueneana tasivachaqueneana,
navarairahi tíjanunucayarehi eta náematane. Váhíya
nanacaimahi eta tíjuchacareana, yucuqui, muiji,
cáchipaca; apaesa vahi tacuiju eta peti. Taicha títeca-
yare máimahapanaya ema ticayeheyarehi eta peti.
Tásiha, te máimahapa tíurihi, mavachachainapa namu-
tu ena ticaemataneanahi. Nuti manerejirunuhi ema
Viya eta nímitatichirahehi ema Jesucristo, éhicapaipa
éma. Puíticha eta ecajúherapaipa te anuma, nájina
apanaina naratahahini námahehini. Macarichuhi
marataha éma. Puiti, ena apamuriana mamusurana
ema Viya tímitucahehi apaesa tajuruca eta esuapirahi.
Tacamunusera tíuriyarehi eta náimitusiraheya.

¹³ Taicha tatiarihiyare eta sácheyare máimahayare ema
Viya eta vémataneanapachu, te tíuripuca. Te tíurihi eta
vémataneanahi, ema Viya tíjaracavahi eta táitsiva-
yare eta vématanerepihi. Téhesera vahi táurihini, eta
mayucune táijuchayarehi eta vémataneanahi.

¹⁵ Tacamítiequenehayare tamutu jácani tájina tacuna-
chacarevainahini. Tájina táimaequenénaimahi. Yátupi
viúchuchuhahi víti, tájinasera vímaequenénaimahi.

¹⁶ Écharichuhi éti eta mávahásirahehi ema Espíritu
Santo. Éti ecutihi mayehehi templo ema Viya,
étarichuhi eta máucupaisirarehi máemunaruquenehi.
Éma, máicuñacayare muraca nácani tíjararecanahi éta.
Táitusiava, ejaneacava éti, machu ejarareca eta iúrujia-
siracacahi, ímiyusemaca ema Viya.

¹⁸ Vahi ecuejecapava eta ímijachirahi ímatipa tamutu
eta juca vítaresirahi. Étiserá ecaravahuya eta me Viya.
Éma, tímitucahe eta ítupajijiasiravanaya yátupi-
queneana. Échemaraivaina máicha. ¹⁹ Taicha eta
náitucaqueneanahi ena achaneana te juca apaquehe,
súnsurupianachucha eta máimairahi ema Viya. Taicha
eta Sagrada Escritura, ani tacahe: “Ena tímijachavanahi
náimatiequeneha, énajivachucha tímiaquipaicavanahi
maicha ema Viya, taicha eta namáetupisirávanahi”.

²⁰ Ánivare tacahe eta Sagrada Escritura: “Ema Viya mái-
mati eta napanereruana ena tímijachavanahi títu-paji-
jiacavana. Tájina eta tacunachacarevanahi eta
mayehe”. ²¹ Táitusiava, vahi tiuri ecasiñavavaicahini.
Vahi étupicava eta éhisiravacahi ena enerejiruanahi

éhica. ²² Ecaravahuinasera tamutu eta vímiturapiana viti mavanaranahi ema Viya: ema Apolo, émapa ema Pedro, nútipa nuti Pablo. Ecamapurava eta ítaresi-raichaha te juca apaquehe. Jararihiyarehi eta iúrica-careva puiti étapa eta sácheana vicaijuhequeneana. Vaipa ecupica eta épeniraya. ²³ Échava ema Viya ema téchahehi, taicha éti mayeheheripa ema Machicha Cristo.

Eta nacatuparahairahi ena apóstoleana

4 Nuvaraha némechahe eta vikatuparahairahi viti mayeaneanahi apóstole ema Cristo. Mamusuravahi viti. Tivanecahavihi eta vímitusiraheyare eta mapanereruana ema Viya, eta tayumurevanainihi. ² Puíticha, mácani ticatuparahayare tayehe eta emata-necana, tacamunuhi yátupiyare eta máitauahiraina. ³ Natiarihipuca ena ticaunenuanahi te nítaurahhipuca. Étiripa, enevanehipuca ecaunenu. Núti, tájinavare tá-cayema te ticaunenuanahipuca. Németeaca nítaucha-paipa tamutu eta nucatuparahairahi me Viáquenu. ⁴ Váhisera nucasíñavaicahini, taicha néchahi ema Viáquenu, máimahahi éma tamutu eta nucaematanea-sirahi éma, te tiúrihipuca, váhipuca. ⁵ Eta tacahe, vahi táuricahini tativainahini ecaunehini eta júcana, te vuíchaha ímatiequenehahi. Ecuchapaya eta mápechi-ravayare títeca ema Viáquenu. Éma tímicaechera-chayare eta tayumurevahi te timapicu. Éma tímereu-chahaviya eta vipanereruana te visamureanapachu. Tacahe, ema Viya ticunachahavinapa eta viúripanahi. ⁶ Nuparapenaveana, numetacahe eta juca eta tiúrichaheyare apaesa ácuti eta máuriva ema Apolo, ácutinuvare nútí apana eta núrivahi, taicha étana-richuhi eta vímiturapianahi tayehe eta véhiruhi. Vahi táurica enerejicahini nácani émunaruanaya. Vácutica-casera eta émunasirahavina viti vímiturahianahi. Nacuijavare épuruquenéna nácani tímiturahianahi. ⁷ ¿Tájaha tacayema ímijachavahi éti iúripana nayehe ena apamuriana? Tájina apanaina ecasiñavaia, tacarichu ecasiñavaiyaya tayehe eta máíjararuheanahi ema Viya. Váchuripa tíjaracaheripa éma eta iúripanahi, vahi étijivainahini iúrichavahini. Tásiha, ¿tájaha tacayema ecasiñavaicarichucha éti? ⁸ Éti, eta esamiravahi ecaemuñavaipa tímicutijiri-cavaipa ecayehehini tamutu, ecaimahaquenehini. Ímicutichavaipavare aquenucahenahini eta esami-ravahi. Ímijachavapa vaipa nucamunucarehi eyehe. Jéhechapucaini malayarine yátupinahini aquenucahe-nahini apaesa viti apanava vémeñahavapaini eta eye-he. ⁹ Ímatirichu éti eta procesión náichaqueneasa ena tiverearecanapahi tayehe eta guerra. Nanacahi te náijiquimuri ena ticatuparahanahi eta náepeniraya taniruanayare eta sárareana. Ichape eta náimahaca-revahi nayehe ena achaneana. Viti apóstoleana ticu-timahi tinacahavi ema Viya eta vicutihi ena nani páure-anasamí. Ichape eta vímahacarevahi nayehe ena achaneana, énapa ena ángeleana. ¹⁰ Viti apóstoleana, eta vicaemataneasirahi ema Cristo, tisunsuchahaviasamihiji ena achaneana. Étiserá étaviucharipahiji eta

ítupajijiasiravahi tayehe eta títuacareana mayehe ema Cristo. Tacutiquene náimijachahivare matumerai-rahahavisami. Éti, tétavicavaipáji eta etumevavacahi. Tipicauchaheanaripáji ena achaneana. Vítisami tájina-pa vipicauchacarevainahini nacahehi éna eta náechajiriruvahi. ¹¹ Puítiripa vinasirichuhi eta vicatajivairahi eta vinicaquenerepi, eta vimauneva, étapa eta véchuriasirapa eta vimuiriharapi. Ena achaneana téhahaviana. Tájina viviyava vijunaiya. ¹² Vicávitacávahi te vivahua-na eta vicaematana. Ena achaneana ticajachachajicahaviana. Vítiserá tájina vácayemahini nayehe. Tiúrihi eta vijicapiravacahi éna. Tipanajiricahavianapa, vítiserá vicamichahi tamutu. ¹³ Tamutu sácheana téchajicanahi eta viyehe. Tíñemahi eta nacayemainahavi. Ichape eta vépurucarevahi nayehe. Vítiserá vicayehehi paciencia nayehe, viconsejachavacahi.

Eta mahapasamuresiravahi ema Pablo nayehe ena machamuriana

¹⁴ Eta juca nucajureheirahi, vahi étaina nupanerecha nímicatsiriacahe. Nuvarahahisera nuconsejachevare. Tétavicava eta némunasirahehi, tacutirichu eta nucachichairahahi. ¹⁵ Tayanapane camurianahi ena eyeheanahi máestroana tímitucaheanahi eta éhisir-aina ema Cristo, diez mílnáinahipucaini; nútiserá tímicutijiricavahi nácarichuhini éyanuinahini maestro taicha nútí nímicatichahahi tayehe eta iúchucuirayare maicha ema Jesucristo. ¹⁶ Eta tacahe, nécatiacahehi eta éhisiraina eta núrivahi nútí.

¹⁷ Eta tacahe, névatacayare eta ara eyehe ema némunaruquene nuchicha Timoteo. Éma, títaurahi eta macaemataneasirahi ema Viáquenu. Éma, tímitucaheyare, máemechiraheyareva eta tacayemaqueneana eta nímiturapiana eta véhisirahi ema Cristo. Táuriquenehi eta máimiturapiana taicha étarichuhi eta nímiturapihi nayehe ena vichamuriana te jácani nupaisineanapahi. ¹⁸ Etiarihiripapuca eti ecasiñavaripa eta numaitujisiravaripa néjirapanahini. Ímijachai-papuca nupicahi. ¹⁹ Nuvarahapaicha nútí níjahuchavahini nítecapauchahini. Nucuchapahi eta nítujsiravainahini maicha ema Viáquenu. Te nítecapau-chahepa, nímahainapa ena nácarana tisiñavavai-canahi, te yátupihpuca eta nacaemataneasirapa. Vahi tisuapacareimahi eta nacunachiravana te vahi náimicaecherachahini eta táurivahi eta nacaemata-neasirahi ema Viya. ²⁰ Taicha eta véhisirahi ema Cristo, tacamunuhi vítauchayare vicaemataneacayare. Vahi tácarichuimahiya eta véchajiriruvana. ²¹ Tiuri puiti, te ímianava ene ecahehi, némecharecaheyarehi te nítecapauchahapa. Téhesera te étupiricava eta epane-reruana, ichape eta núrismurevayarepahi eta nímairaheyare, nétsrajicahénapa.

Ema Pablo mavaraha nacaerajica mácani téjecapavahi

5 Jucarihivare eta juca apana téchacarehi eta matiarahirahi ema émana echamuri téjecapavahi, tíñehicarehi eta juca máichaquenehi. Mavehahiji esu

máenaharuva. ¡Váhicha tiuri eta juca máichaquenehi! Énaripa ena navayurevaqueneana ticapecaturarahiana vahi náuricaímahi eta juca. ² Esapihaichucha éti, ¡tétavicavahi eta tahapasamurechirahéhi eta ¡putsimuricacairahi tásihaquenehi eta ecasiñavavaisirahi! ¡Íurihaipa etsirihapaini, táichavenéhi eta máichaquenehi ema echamuri! ¡Íurihaipavare étupiricahini ema maca! Taicha ema Viáquenu Jesús tituparacahavi vicuchucayare te vimuri nácani téjcapavanahi te vahi návarahahini náetupiricava. ³ Puiti, nuvaraha iúrujicavayare éti. Eyaseacayare ema Viáquenu Jesucristo máimicatacahe eta étupirisirayare eta juca. Núti apanavare, tayanapane eta nuyerehihehi, étasera eta náchaneva ticachaneheya. ⁵ Íchayare: “Te máijare ema Viáquenu Jesucristo, víti émapa ema Pablo, vicuchucavi te vimuri. Vaipa tijaneacavímahi ema Viya. Máimaha-vinepa ema Satanás, émainapa téchaviyare. Vivaraha pínajicaini eta juca pimaúrivahi, apaesa táuchucuhaini eta piáchaneva te táitecapapa eta jena sácheyare machavirayare ema Viáquenu Jesús” íchayare.

⁶ Éti, vahi táuricahini ecasiñavavaicahini. Tacamunu ecuchucavane ema mácara achane téjcapavahi apaesa vahi macupareacahe eti apamuriana, machu mámairijicahe. Taicha éma macutiripa eta levadura te nanaca te masa eta pan, tayanajicahi tamutu. Étisera, nuvaraha ecutiya eta pan mayehere levadura vinicasare te páscuamuhuana. Yátupiquenehi arairu taicha vahi tasisijicahini. Ene ecaheyare éti, vahi tépahaimahi eta ísinequenehi te arairuhepa tacuti eta épaniravahi te éhicainapa ema Jesucristo. Taicha éma, tamutuhi mavachacha eta vímicapasirahi, macutihi eta uvesa eta vímijaresirahi. ⁸ Táitusiava puiti, vicutinapa ena nujaneanana israelítana eta nacaerajisira eta levadura te napenana te páscuamuhuana. Tamutusera sácheana vicauneuchavaya tayehe eta tamauriqueneana, vahi pecatumarehavímahi. Tamutu sácheana eta juca vítaresirahi matapiravarehavinahi, tájinasarepa víchiravaimahi te mamirahu ema Viya.

⁹ Cape eta nucartanehivare eyehe, nímimetacahehi eta tamaurivahi eta ecachanevacahini ena tíchanahi eta juca pecatuana tivehajiricacahini: Súcani esena suvehahi ema apana achane, mácani achane mavehahivare esu apana esena. ¹⁰ Tiuri, núti eta numetasirahéhi, váhisera énaina nicha ena nani máehicarahanarichaha ema Viya ena nani tivehanahi esu apana esena apayena, énapa ena tavayuaruana eta plata, énapa ena tíamerahiana, énapa ena ticasíñarajiana. Ena nani, náetaviuchahi eta nasimutuvavacahi, tamutuhi návihávaca. Tacamunuipapuca vérajicavahini eta te juca apaquehe, apaesa vaipa nacuitecapauchahavihini. Váhira énaina níchaquenénahini. ¹¹ Mácanisera tímijachavahi echamuri, vahi nuvaraha ecachanejirica ema tivehahi esu esena apayena, émapa ema tivehahi esu esena amaperu máimaruchaha, émapa ema tavayuaruhi eta plata, émapa ema ticasíñarajiji, émapa ema titupiarahi, émapa ema ticavaharasi, émapa ema tíamerahi. Mácani echamuri, te ene macahehi, tájina vahi táuricahini ácachanevacahini te enisirana. ¹² Vahi

nútina tatuparaca eta nacayaseserehiyayare te numirahu ena anecaqueneanahi eta viyehe. Téhesera te mamirahu ema Viya eta nacayaseserehiraya. Éma téchavacahi éna. Étisera éti, échahi ena echamuriana. Éti eyaserejiricacayare étijicacaya. Eta tacahe, ecaevuisihayare ema mácara téjcapavahi te emuri.

Vahi táurica vimetauchacacahini te namirahu ena máehicarahanahi ema Viya

⁶ Énerichuvare nuvaraha numetacahe eta apana: Te natiarhinapuca ena echamurianaahi navaraha timetauchacacana, vahi távaraha nayanahini nayehe ena tuparairucana máehicarahanahi ema Viya. Étarichu nacamirahucacaiyayare te emirahu eti nachamuriana. ² Tativayare échava eta machaneraherahi ema Viya. Étijivayarehi étupiricaca eta íchavaquenevanahi. Vahi étinayare etanuca ena masuapajirairahanahi taicha járajapayare eta sácheyare ticayaseserehianaya te emirahu éti ena masuapajirairahanahi. Púitsera eta íchavaquenevanahi ánichichaque-neanahi, éti tatuparaca étupiricaya. ³ Écharichu éti tituparacahivayareva ticayaseserehianayareva ena ángeleana te vimirahu. Tacumapurujichapucaini eta tayeheanahi te juca vítaresirahi, vahi vicuituruequenehahini. ⁴ Puiti éti, te tatiarhipuca eta íchavaquenevahi tayehe eta juca vítaresira puiti, váhiquenesera etanucaimahi ena emetauresihahini nácani vahi énaparacaimahi nayehe ena echamuriana. ⁵ Némechahe eta juca, nímaha te etsirihapuca. Váhiquene táuricahini mayanahini mácani vichamurihi matanucachini ena tuparairucana máehicarahanahi ema Viya. Tasapihahini étainahini mametauchihahini mácani machamurihi. Cúverarecapa nacuijahini te etaracu mácani émanainahini vahi macuituruequenehahini mayasesereca jácani téchacareanahi nayehe ena vichamuriana.

⁷ Vahi táuricahini íchahini eta juca. Étijicacainahini eta echamuricacahi evarahapa ejararecaca. Tivarahacarepana eta eratahairaina ecamicha, tayanapanerine ecatajivahi naicha, tíameyechaheanapuca. ⁸ Étisera etivavaicapa íchahi eta juca émecatajivachacacapa. Vahi táuricahini eta juca; násapihahini énahini echamuriana ena etupiaruanahi.

⁹ Váhipuca échahi éti eta namaitujisiravaya tisiapana te mávasa ema Viya ena tíchanahi eta tamauriqueneana. Taicha yátupihi eta namaitujisiravayare tisiapana ena ajairana tivehanahi esu apana esena apayena énapa ena vahi nayanacacaqueneana, énapa nácani tivehana esu esena amaperu máimaruchaha. Énerichuvare ena esenana, váhivare títujicavanaimahi tisiapana te mávasa ema Viya, súcani tivehahi ema achane vahi suímaquenenahi, ésupa súcani amaperu esena namutuchucha suvehapahi. Váhivare títujicavanaimahi tisiapana ena nani tivehacacana ajairacacana, énapa ena nani ticasíñarajiana, ena nani tíamerahiana, ena nani ticapinarurahiana, ena nani ticavaharasiana, ena nani titupiarahiana, énapa ena nani nápicararecapahi eta námeresirayare. ¹¹ Ene ecaheni éti eta

iásinequenéni. Puftisera títsivachavaipahi eta ítaresira, sántuheripa maicha ema Espíritu Santo, ejacapa-carepa mayehe ema Viya, máichavenehi ema Viáquenu Jesucristo.

Tiávahácahviripa ema Espíritu Santo eta te viáquehe viti machanerana ema Viya; tásiha, tituparacahavipa tacuija eta vituhusivaina

¹² Puiti jucarihivare eta numetacaheyare. Nararihipuca ena nacahehi: “Núti néchinava eta nítaresirahi. Eta náquehe tajamurachahi eta tavarahaqueneanahi. Eta tinicacare táicuchihi eta viami. Eta viami tatuparahaichuhi tajacapaya eta vinicaquenyare. Ene tacahe eta náquehe tavarahahi nuveha esu esena tacutihi eta viami tavarairahi tinica” nacahepa. Nútisera te nupanereru, vahi énéna tácahe. Yátupi víti véchinavahi. Váhisera távarahacarehini támutuhichaini víchahini eta tavarahaqueneanahi eta viáquehe, vivayuchahini víchahini eta tauriqueneana. Yátupi tísapacarehi eta vinisiraya eta tinicacareana. Tatiarihisera eta sáchezare, vaipa vácamunuimahi eta tinicacare, maicha ema Viya. Ema Viya máepiyacahi eta viáquehe, mavarairahi vicaemataneacayare éma. Émapa téchahavihi puiti eta juca vítaresirahi. Vahi étinahini táemepiyacahavihíni eta víchiraya eta pecatuana esenamarehavinahini. ¹⁴ Ema Viya macaechepucahi ema Viáquenu Jesús te máecari. Ene vicaheyare víti eta macaechepusirahaviyare víti apanava, taicha tétavivacavihi eta máitupajijiasiravahi.

¹⁵ Écharichuhi emutu éti, eta iáqueheana mayeheripahi ema Cristo. Émaripahi téchahehi. Etiarihipucasera ímijachapuca táuricahini vímicachanechahini eta viáquehe tayehe eta suáquehe esu esena túhusi. Váiparinehi táuricaimahi. ¹⁶ Nuvarahavare némechahe, te mavehahi ema achane súcani esena túhusi, tiánecacahi eta náqueheana eta nacamujichiracacahi. Acane, ema Viya máijaracapa esu Eva mayehe ema Adán. Tásiha, eta Sagrada Escritura, ani tacahe: “Te tivehacacapa, tímicutijiricavapa étanarinehi eta náqueheana”. ¹⁷ Ene tacahehi eta vítaresira mayehe ema Viya, eta mávahásirahavi ema Viáquenu, eta viáchaneva tacachaneripa éma.

¹⁸ Eta tacahe, ejaneacava yátupina, machu iáquipaicava tayehe eta túhusicare. Tamutu eta pecatuana náchaqueneanahi nácani achaneana, tajararecahi eta náchanevapachu. Tavetijipa, mácani achane tivehahi esu esena vahi mayenaquenenahini máimijararecahivare ichape eta máquehe. Ticajachacareinehi eyehe éti eta juca. ¹⁹ Écharichuhivare éti eta mávahásiraheripa ema Espíritu Santo eta te iáqueheana, taicha mavaneruichuhi ema Viya eta mávahásiraheyarehi ema Espíritu Santo. Vaipa étinahini écha eta iáqueheana. ²⁰ Taicha mavachareruhehi ema Viya. Ichape-murihi eta macatajivairahi íchavenehi éti. Puiti, eta iáqueheana étapa eta iáchanevana mayeheripahi ema Viya. Tacahe, puiti, ejaneacavapa eta ítaresiranahi te namirahu ena achaneana, apaesa namutu nacunachaya ema Viya.

Eta maconsejarapi ema Pablo nayehe ena máimarua-na, énapa ena nacaimaqueneana

⁷ Tiuri puiti, nujicapaheyare eta juca eyaseresiranuhi te ecartane. Yátupi tíúrihinéni máyéñarénahini mácani achane. ² Táichavenesera eta tavayuaravahi eta pecatu, ticamunucarehi ena ajairana nayanapachuina, énaripa ena esenana ticamunucarehivare námapachuina. ³ Mácani achane te sutiarhipuca esu mayena, tacamunuhi máitachayare eta máitátiraya máemunasiraya esu mayena. Ésuripa esu esena te ticaimaripapuca, énerichuvare suítauchayare eta suítátiraya suémunasiraya ema suima. ⁴ Taicha esu esena vaipa ésuinahini téchinava eta suáquehe. Émapa téchahi ema suima. Ene macahehi ema achane, váipavare émainahini téchinava eta máquehe. Ésuripahi téchahi esu mayena.

⁵ Éti ecaimaqueneanaripa, vahi ecuepurucaca tayehe eta iánesiracacairana. Téhesera tatiarihinapuca eta eyujarauchiravayare me Viya, ecuticacahipuca eta epanereruhi, tísapacare ínajica ánipina eta iánesiracacana. Te táequenénapa, táuricavare echávauchacacavare, apaesa ema Satanás vahi macuiturucahe eta máimijamurachirahe ena apanana.

⁶ Tiuri, eta juca numetasirahehi, vahi nútina nucavainairipi. Nísapasera eta énéna ácahe. ⁷ Nuvarahahinéni ácutinuhini núti eta mayénarenuirahi. Víjaracasipachusera me Viya eta vítaresiraya. Nararihi ena ajairana máyénaireana eta náitaresira. Nararihivare ena esenana máimaruaana eta náitaresira. Nararihivare ena apamuriana máijararuichu ema Viya ticaimana.

⁸ Énaripa ena nácara vichamuriana máyénaireanachaha, énapa ena máimaruanachaha, énapa ena tépenaimana, tíuripanahinéni nánasihini máimaruanainahini; nácutinuhini núti. ⁹ Étasera te vahi náratahahi ticaratacavana, tacamunuichuhi ticaimanayare, apaesa vahi nacuepujuquichava tayehe eta pecatu.

¹⁰ Tásiha puiti, nutuparacavacayare ena nacaimaqueneanaripa. Ema ajaira vahi macuinajica esu mayena. Esu esena váhivare sucuinajica ema suima. Eta juca vanairipi tásihaquenehi mayehe ema Viáquenu, vahi tásihaquenéna nuyehe núti. Téhesera natiarihinapuca ena vichamuriana náinajicaca, vahi táuricahini nápechavahini nacaimahini, nacacachanehipucaini. Tacamunuhi tichavauchacacanayare tivehacacana.

¹² Tiuri puiti, tájinachaha vanairipina tásihaquenéna me Viáquenu tayehe eta náinajisiracaca ena nacaimaqueneana. Níjaracahesera eta juca nupanereru núti. Te matiarihipuca mácani vichamuri esu mayena vuíchaha vichamurinahi, te tíurihipuca eta nacachane-racacahi, vahi táuricahini máinajicahini ésu. ¹³ Énerichuvare, te sutiarhipuca súcani esena vichamuri ema suima vuíchahavare vichamurinahi, te tíurihipuca eta nacachaneracacahi, váhivare táuricahini suínajicahini éma. ¹⁴ Taicha ema suima, ichape eta majapanucareva me Viya táichavenehi eta sucaimairahi esu mayena. Énerichuvare esu esena mayenahi ema vichamuri, ichape eta sujapanucareva me Viya táichavenehi eta

mayenairahi ema achane vichamuri. Énaripa ena nachichanaveana majapanuhivare ema Viya náichavenehi ena ticachichana, vaipa náepurucarehini me Viya. ¹⁵ Téhesera mácani vuíchaha vichamurina suímahi esu vichamurihi mavarahapuca máinajica esu mayena, suísaparine máinajica. Ema Viya vahi macavanairipi eta suíchejiricahini éma, mayanarine. Taicha ema Viya mavarahahi viúriyare, tacuijapa tahapapiricahavihi eta vipanereruana. Énerichuvare súcani esena vuíchaha vichamurinahi mayenahi mácani vichamuri, te suvarahapuca suínajica ema suima, énerichuvare máisaparinevare suyana. ¹⁶ Taicha piti esena, vahi pecha te pimaitacayarepuca picajayayasamurecha ema pima eta máehisiraina ema Viya. Pítiripa piti achane, váhivare pecha te pimaitacayarepuca picajayayasamurecha esu piyena eta suéhisiraina ema Viya.

¹⁷ Ema Viáquenu tíjaracahehi eta ématanerepianahi te tíchuhahenapa. Etparahapachuhi eta ématanerepiya. Váhisera ínjicaimahi, ímiyanavare ítauchaya eta etparahanahi. Étara eta juca nuvanairipi nayehe ena vichamuriana ticavasanahi te tamutu avasareana.

¹⁸ Nácani ticamarcanaripa te máichuhavacapa ema Viya, vaipa táuricahini nacaepahavahini eta nacamarcairahi. Nácani mámarcreanarichaha te máichuhavacapa ema Viya, vaipa táurica nacamarcahini. ¹⁹ Tájina vahi étaparacaina te vicamarcahipuca, étasera tivarahacarehi vicaemataneacayare eta mavarahaqueneanahi ema Viya. ²⁰ Namutu nácani máichuhaqueneana ema Viya, vahi náitsivachaimahi eta náematanerepianahi nájaracahi te máichuhainapa ema Viya. ²¹ Te ecaquenuhipuca éti te tíchuhahenapa ema Viya, vahi ecueñamava eta ecaquenuirahi. Téhesera ímaha eta iúchucuiraina, tájinachucha táichava.

²² Taicha mácani achane músuhi eta máitaresira, tayanapanerine matiarihinahi ema máquenuinahí; téhesera te mamirahu ema Viya, tínunánaripahi mácani achane nájina máquenuinahini eta máitaresira. Puiti ena apinana mavanaranaripahi ema Viáquenu Jesucristo, taicha ticuticacanaripa eta nacaemataneasiraipa éma. ²³ Taicha mavachareruhehi ema Viya. Ichapemurihi eta macatajivairahi íchavenehi éti. Puiti machaneraheripa éma. Eta tacahe, te navarahapuca nayurucahe ena achaneana, vahi ecuisapava nahapapicahe eta ecaemataneasirayare ema Viya. ²⁴ Eta tacahe, nuparapenaveana, ímiyanavayare ecaematane mayehe ema Viya. Ítauchayare eta ématanerepipachu íjaracasíhi me Viya.

²⁵ Tiuri puiti, tájina vanairipina tásihaquenéna me Viáquenu nayehe ena amaperuana máyénareanaríchaha énapa ena máimaruanachaha. Nútisera numetacaheya eta nupanereruhi. Nuvarahasera esupanu taicha núti nucaimitucasiquenehi mayehe ema Viáquenu, táichavenehi eta majapanuiranuhi. ²⁶ Puiti juca vítaesirahi, tétavicavahi eta vicatajivairahi. Eta tacahe, németeaca núti tíuririchu nánasi ena ajairana nayehe ena nayenana nácani nacayenaqueneanaripahi. Vahi nacuinajicaca. Énaripa ena máyénareanarichaha, vahi nacutanuca ena nayenaina. ²⁸ Mácanis-

era sutiaríhi esu mayena, tájinachucha pecatuina eta mavirahi esu esena. Ésuripa súcani amaperu esena, te tatupiruvahi eta sucaimaira, tájinachuchavare pecatuina eta sucaimairahi. Táitsivasera ichapeyare eta nacatajivairaya eta náitátiracacaya, tavetijipa te natiaríhinapa ena nachichanaveanaya. Eta tacahe, nuvaraha numetacahe apaesa vahi ecucatajivahini.

²⁹ Tiuri, nuparapenaveana, nuvaraha numetacahe tícutimahi ánipirine eta juca vítaesiraya puiti juca vicaijuheyare. Eta tacahe, táurica eta íjarasiravahi yá-tupina eta ecaemataneasira ema Viáquenu. Étiripa, éti natiaríhi ena eyenana, vahi tacucarichu eta ecañamasirava nayehe ena eyenana, énerichuvare me Viya.

³⁰ Te jararihipapuca eta tacáiyasiráhe écatísamurepuca, vahi ecuisapa tahapapicahehini eta ecaemataneasira ema Viáquenu. Te jararihipapuca eta tacaurisamurechirahe, váhivare ecuisapava tahapapicahehini. Te ecaimahaquenehipuca, tísapacare eta ecamapura eta ímahaqueneana eta máijararuhehi ema Viya, váhivare ecuisapa tahapapicahehini eta ecaemataneasirahi ema Viáquenu. ³¹ Nuvaraha táuríhini eta ítaesirayare te juca. Váhisera ecuisapava ecuañamaracava eta ecayeheirayare eta ímahaqueneana te juca apaquehe. Taicha tamutuyarehi témitiaca te táitecapapa eta táitaviraya eta juca apaquehe.

³² Eta tacahe, vahi nuvaraha ecañamaracava tayehe eta júcana, taicha mácani achane máyénarehi, tájina tahapapiricahini eta macaemataneasirahi ema Viáquenu, mavarahahi máicutichiravaya eta macurismurechiraya ema Viáquenu. ³³ Mácanisera achane te sutiaríhipa esu mayena, ticañamaracavainapa taicha eta máitátirayare esu mayena, mavarairahi macurismurechaya ésu.

³⁴ Ene nacahehi ena esenana. Vahi tácuticaca eta napanereruana suyehe esu esena sucaimaquene ésupa esu esena máimaruchaha. Taicha súcani máimaruhi tahapasamurechahi eta suítátiraya ema Viáquenu, suvarairahi suítauchaya eta mavarahaqueneana. Suíjaracayarehi ema Viya eta suáchaneva étapa eta suáquehe. Ésusera esu esena sucaimaquenepa tahapasamurechapa eta suítátiraya ema suima, suvarairahi sucurisamurechaya éma.

³⁵ Eta júcana nuconsejarapianahi eyehe, nuvaraha eta táurivaina eta ícharacavaya. Vahi nuvaraha nupamicahe tayehe eta tacajeraqueneana. Nuvarahasera tacuijahini eta tihapapicahe eta ítátirayare ema Viáquenu.

³⁶ Tiuri puiti, eta juca nuconsejarapi mayehe mácani achane te sutiaríhipuca esu machicha esena máimaruchaha. Te tahapapiricaipapuca eta sucaimairayare esu machicha, táichavenehi eta suítanahasiraipa; te tíuríhi eta máimairahi, máisapayarehi ticaima esu machicha. Tatupiruvayaresera eta sucapaperayare. Tájinachucha táimanena; váhivare pecatuina. ³⁷ Mácanisera achane, te tájina máichiravainahini, nájinavare tipamicaimahi; te mavarahapapuca suánasi máimaruina esu machicha, tíuríhi maicha. ³⁸ Tacahe, tiuri máichayare mácani achane máimachayarehi,

tatuparacahi ticaparapeyare esu machicha. Mácanisera vahi máimachahini esu machicha, éma tiúripana maicha.

³⁹ Esu esena ticaima tatuparacahi suítauchayare eta suñarasaravahi ticaima, sunasirichuya eta mayehe ema suima eta náitaresirana. Tiámainucava te táitecapapa eta máitaviraya ema suima, tiúchucuhapa ésu. Ésupa téchinava eta suítaresirayare. Tísapacarepa eta suápechava sucaima. Tacamunuhisera mácani vicuti-quenehi vichamurihi tisuapajirahi me Viya. ⁴⁰ Tiápajucavaserá tiúripanaya te suánasipa máimaruina. Eta juca tásihaquenepa te nupanereru. Németeacahi núti tétupicavapahi eta nuconsejarapiana taicha mávahárunuhi ema Espíritu Santo.

Emá Pablo mametacavaca eta nayaseresirahi te tiúrihipuca nanica eta tinicacareana tacayujarahuquene te tamirahu eta nasiñarajiana ena achaneana

8 Puiti numetacaheya eta táicharacavahi eta enisira eta tinicacareana nayujaraurehi te tamirahu eta nasiñarajiana ena achaneana. Yátupi vimutu vímatiequeneha tájinachucha táimanena eta juca. Váhisera vácasíñavaimahi eta vítusirahi. Tacamunuhisera tajurucaya eta vémunasiravaca ena vichamuriana, vímicatasiracacaya eta véhisira ema Viáquenu. ² Taicha nararihi ena ticasiñavavaicanapa, tímijachavanapa náimatiequeneha tamutu. Eta juca náichahi táimerecachi vuíchaha náitucahini, vuíchaha nacapayayaracahini eta mapanereru mácani yátupipa máituca. ³ Nácanisera yátupihí témunacanahi ema Viya, éta tímicaecherachahi eta machichanaveanairahi éma.

⁴ Tiuri puiti, numetacaheyare eta juca nuconsejarapi tayehe eta juca enisirana eta tinicacareana tacayujarahuquenehi te tamirahu eta nasiñarajiana ena achaneana. Tájinachucha táichava, taicha eta nasiñarajiana vahi yátupinahini víyanainahini te juca apaquehe, taicha émanarichuhi ema yátupiquenehi Viya. ⁵ Ena achaneana náimijachahi camurianahi ena víyana te anuma, étaripa te juca apaquehe. Namaveracapa ena náquenuanahi nayeheanahi viya, camurianapa naicha eta nasiñarajiana. ⁶ Vítisera viti vímatiequenehanahi émanarichuhi ema Viya Vicaiyaquene te anuma. Ema Jesucristo, émanarichuhi ema Viáquenuhi. Ema Tata Vicaiyaquene mapanerechapa eta tatiarihiyare tamutu eta vímahaqueneanahi; vítipa vimutu achaneana, mavaraha vitiarihiya eta vicaemataneasiraya éma. Tásiha, ema Machicha tépiyacahi tamutu. Puiti émapa téchahavihi vimutu. Éma, tíjaracahavihi eta arairu vítaesira.

⁷ Tisimutuanasera ena vahi náimatiequeneha eta juca. Énaripa ena vichamuriana, nararihi ena vuíchaha náemitisicahini eta navairara napicaucha eta nasiñarajianaini. Éna, tisamavanahi vaipa náetupicavanahi eta nanisirahi eta tinicacare tacayujarahuquenehi, vahi táurichahini eta nasamirahi. ⁸ Numetacahesera puiti, vahi étaparacaina eta tinicacare, vijacapacareyare me Viya táicha. Váhivare étaimahi tiúrichahavihi mayehe ema Viya, te vahi vinicahi. Váhivare tijararecahavihi

mayehe te tiúrihipuca eta vinisira. ⁹ Eta tacahe, ecauneuchava yátupina machu émejecapavacha ena apamuriana vichamuriana vuíchaha náimatiequenehahini eta júcana. ¹⁰ Étisera éti ímatiequeneanaripa, te ísapavayahipuca enica eta tinicacare nayujarareanahi te tamirahu eta nasiñarajiana; tacahe, te máimahahepuca ema echamuri, énerichuvare tísapavayarehi tinica. Táitsivahisera tipicacaracavahi jácani te masamure. ¹¹ Eta tacahe, échapavaya éti tayehe eta ímatiequenehairaripa machu émejecapavacha ema echamuri mácani vuíchahapiravahi máimatiequenehahini eta júcana. Émarichuhi íumurvahi eta mavacharesirahehi ema Cristo eta máepenirahi te crusu. ¹² Éti, te ehapapicapuca eta táurivahi eta napanereruana ena echamuriana, éti ecapacaturaipa eta mayehe ema Cristo, taicha eta émejecapavachirahi ena echamuriana. ¹³ Ácutinu eta juca nuyeherepihi: Te nútinahipucaini némejecapavachaini mácani nuchamuri táichavene eta nunisirainahini eta vaca, váhirine nunicaimahi, apaesa vaipa nucuemejecapavachahini éma. Éti apanava, ene ecaheyare. Váhivare ecuemejecapavacha ena echamuriana.

Emá apóstole Pablo, tatuparacahi náitátiyare ena máimitureana

9 Núti, nájina náquenuinahini te juca apaquehe. Yátupi apóstolenuhi mayehenuhi ema Viáquenu Jesucristo. Nucutinasivacahi eta návacurehi nayehe ena apamuriana apóstoleana taicha nímaquenehi ema Viáquenu Jesús. Étiripa, etupiruvahi esuapanu eta nímitusirahehi. Éta tímereuchanuhi eta táurivahi eta nucaemataneasirahi ema Viáquenu. ² Tayanapane nacañajivarinepuca nácani vahi tisuapapajicanuanahi eta apóstolenuirahi. Étisera esuapanuyarehi, taicha etiarahi eti nímitureanahi, étira ímereuchanuhi eta yátupirahi apóstolenuirahi mayehe ema Viáquenu. ³ Étara nucatiuchiavahi eta juca nayehe ena tépurujiricanuanahi.

⁴ Éti tituparacahehinéni ítátinuhini núti tayehe eta nunicaquenerepi táichavenehi eta apóstolenuirahi. ⁵ Énerichuvare tituparacahehi ítátihavaréni te sutiarihinahini esu esena nuyenainahini, súcani nucutiquenehi tisuapajirahi. Tácutihini eta ítátiravacahi ena esenana nayanahini ena apamuriana apóstoleana, émaripa ema Pedro, énapa ena maparapenaveanahi ema Viáquenu. ⁶ Éti, ímijachaipapuca núti émapa ema Bernabé, vicarichuhi vahi tatuparacahavihi eta ítátirahavinahini eta vicametarairuirahi. ⁷ Puiti nuvaraha nímicutiarachinaheyare eta nacaitaticasira ena ticaematanehahiana. Ani tacahe: Namutu ena suntaruana ticaitaticasianayarehi nayehe ena comandanteana. Énerichuvare, ema tisucurecahi eta tinicacare, tatuparacahi masamapuhayarehi eta tahi eta masucureanahi. Émaripa ticayehehi vaca tatuparacahi máerayarehi eta tacheneama eta mavacane. ⁸ Eta juca níchirahehi, vahi nácarichu núti nucapanereruhi eta júcana. Énerichuvare eta Sagrada Escritura májurehi ema Moiséini títametacahavihivare. ⁹ Ánipa tacahehi eta táechajiri-

ruvahi: “Vahi picuitisumucha eta pivuiyerana, te ticaematanepahi taicha técuhanapahi éta”. Táitaurevaquene ema Viya vahi tácarichuhini eta vuiye eta máechajisihahi. ¹⁰ Énerichuvare víti mayunacahi te máechajiriruvahi. Mavarahahi vicaenicasiyare vimutu víti vicaematanerachiana. Tacutihi mácani achane ticaematanerahi. Macaemataneacahi muraca eta máesane, mavarairahi máimaequenehayare eta távameanahi eta máesane. ¹¹ Ene vicahehi víti eta vévasirahi eta máechajiriruva ema Viya te esamureana. Éta tíurichahehi. Tásiha, éti ecutinapa eta sucureca tímecavahi eta táhi. Tájina táichava eta ítátirahaviyarehi víti. ¹² Ena apamuriana ticasíñavanahi eta eyeshe. Tásiha éti, tíuríhi eta ítátirahi. Vivetijipa víti vítáticarehi eta eyeshe.

Váhisera vávarahahini vicasíñavahini víti eta eyeshe, viyaseacahehinehi eta ítátirahavinahini. Vicamichahi tamutu, vimavarairahi tatiarihinahini jácani apanainahini tahapapirichahini eta esamirayarehi eta máechajiriruva ema Cristo. ¹³ Écharichuhi éti eta mavanairipi ema Viya nayehe ena téchapajiricana eta mayehe Templo, nanicayarehi eta tinicacare námaque-neasana ena achaneana náijaracasiruanahi ema Viya. Cáijaracasianayareva éna eta vaca táeche eta námavahuanahi ena achaneana. ¹⁴ Ene tacahehi eta mavanairipi ema Viáquenu eta viyehe víti vicametarairuanahi eta tapachinaquene máechajiriruva, tituparahavihi vijacapayarehi eta vinicaquene taicha eta vicametarairuirahi. ¹⁵ Nútisera tájina nímatiyahini nuyaseacahehinehi eta ítátiranuinhahini. Étaripa puiti te juca nucartane, váhivare nuyaseacahe íjaracanhini. Nucamichahi tamutu. Tíuririnehipucaini népenavanehinehi, machu tachimaracanicu táitava eta juca núrísamurevahi nútí tamajinairahi nuyaseacahehinehi.

¹⁶ Nútí vahi étaparacaina nucasiñavahi taicha eta nucametarairuirahi. Nutuparahaichuhi eta juca. ¡Páurechichanusami te némunahacava nínajica eta juca nucametarairuirahi! ¹⁷ Taicha nútí, vahi nútíjivainahini níjaracavahini mayehe ema Viáquenu eta nucametarairuiraya, étapapucaini nujacapihahini eta nuvachayarehi eta mayehe. Nuvanecasiserahi me Viya eta matuparasiranuhi eta juca nématanayarehi. ¹⁸ Ichapesera eta nuvarairahi eta nucametarairuirahi, taicha tijarahi te nusamure eta nuratahairahi nucametarairu, tamajinairahivare nuyaseacahehinehi eyeshe éti. Vahi nupamicahinehi eta ítátiranuinhahini táichavenénahini eta nucatuparahairahi eta apóstolenuirahi.

¹⁹ Nájinahinéni te juca apaquehe napamicanuhini eta nucaemataneasirainahini táichavénehipucaini jácani náitátiranuhini, énahihipucaini náechanuhini. Nútisera níjaracavahi nítauchayarehi tamutu eta nucamunucarevahi nayehe ena achaneana, apaesa étainahipucaini níurusihavacahini ena nasimutuvacueneana, machanerainahini ema Cristo. ²⁰ Étaripa te nítecapauchavacavare ena nujaneanana israelítana, ichaperinehivare eta nupicauchiravacahi éna, apaesa najimuyasamurepupucaini eta náehisirainahini ema Cristo, étainapapucaini níurusihavacahini éna. Ena nani,

ichape eta nasuapirahi eta mayeherepiana ema Moiséini. Tásiha, te nucainunavaca éna, tájinavare vahi nucaecahihini eta nayeherapihi, nupicauchahivare éna apanava. Váhinenehi nútíparacainahini tayehe eta náehiruhi. ²¹ Tatiarihiserahi eta yátupiquenehi néhiruhi nuvanahihinehi mayehe ema Viya, máijararunuhi ema Cristo. Énerichuvare te nucainunavaca nácani apavasanana máehicarahanahi eta mayeherepianahi ema Moiséini, váhivare nucaecahivaca. Nupicauchahivare éna, nuvarairahi nucajimuyasamurechavacahini éna apanava. ²² Te nucainunahivarepuca ena vichamuriana nácani vuíchahinehi náitamuturucanahinehi náimatiequenehahinehi eta véhisirahi ema Cristo, váhivare nucaecahivaca eta namaimatiequenehairichaha. Ichaperinehi eta nujapanuiravacahi. Nímicitacavacapa, nuvarairahi náimatiequenehahinehi yátupinahinehi eta véhiruhi. Namutu ena achaneana, nujapanuvacahi. Nutanucahi eta nucajimuyasihayare eta nasamureana apaesa nanerejicavapaini náehicahinehi ema Cristo, machanerainahinehi éna. ²³ Nútí nítauchahi tamutu eta júcana apaesa najacapa eta tapachinaquene máechajiriruva ema Viya, apaesa vácuticacapaini vámutuhinehi vijacapa eta viúrivayare maicha ema Viya.

²⁴ Écharichuhi éti, ena ticavijarahiana pelota, tijaneacavanayarehi muraca, ichape eta ticaravahunu-manayare apaesa túmeanainapa eta naratahairaya navereasihaya ena nánaranayarehi. Te vahi najaneacavahinehi, vahi tiverearecanaimahi. Ene ecaheyare éti, ichape eta étumechiravayare apaesa tauri eta ecaemaneasiraya ema Viáquenu, ejacapihainasarepa eta etuparahinehi mayehe. Eta navereareruanahinehi ena ticavijarahiana, vahi tánasimahi. Témitiequenehavaneyarehi. Vahi tácutimahi eta vijacapaqueneyare me Viya. Éta, tájinapa ticamitiequenehaimahi. ²⁶ Nútiripa eta nucaemataneasirahi ema Viáquenu, ichape eta nupamisiravahi, taicha eta nímatirahi eta mavarahaquene. Vahi némpururecavaimahi. ²⁷ Nucaratacavahi muraca. Vahi nusupahinehi eta tajamurachaque-neanahinehi eta náquehe. Nupamicahi eta táemitisirainahinehi eta tauriqueneana, machu néjecapavapupucaini, tásiha váipapucaini nucujacapahinehi eta nícutihinehi. Ichape eta nutsirihacarevapupucaini, tavetijipa eta camurianairahi ena nímitureana tayehe eta véhisira ema Cristo.

Ena Pablo maconsejachavaca vahi nacucuti ena ticasíñarajijana

10 Nuparapenaveana, nuvaraha némechaheyare eta náichararacavahi acane ena viáchucanaveanahinehi máumurivanahinehi ema Moiséini. Eta náehisirahinehi éma, tatiaríhi eta úcaji tímícauchavacapahinehi namutu éna. Eta nánuesirahinehi eta mar ticajirehi Títsiama Une, namutu náimahahinehi eta tájijivahinehi eta nánuesiraya. ² Namutu ena nani tíjaracavanahinehi eta náitauchiraya eta náehisiraya ema Moisés, eta nánuesirahinehi eta ichape une mar, náehisirahinehi eta úcaji †. ³ Énerichuvare namutu

† Ena Pablo máimicuticha eta nánuesirahinehi eta ichapequene mar, tímicutijiricavahinehi eta nacaicachasihinehi te une, étapa te jara úcaji.

ticuticacanahe eta nanisirahi eta tinicacare tásiha-quenehe me Viya. ⁴ Namutuhivare térana eta une tásihaquenehe me Viya. Eta juca une náeresaparacahi éna, táuchurehi tayehe eta mari, maicha ema Cristo. Émairahi ema tnapumirauchapahi éna, máitátiva-capahi eta napaisirapahi. ⁵ Tamapurujihisera eta majaneasiravacahi ema Viya. Vahi émainahini éma náesenicahini. Tájinachucha vahi nacaurisamurechahini éma. Eta tacahe, máicuñacavacapa ema Viya. Namutuyaréni tépenaracánahe tayehe eta mávapahi apaquehe. Tiúchucuhanahisera ena nachichanaveana.

⁶ Ena viáchucanaveanaini, táimicuñacahi eta najamurachirahi eta tauriqueneana. Étara eta juca ticauyayacarehi eta viyehe, énémahihávinahini víti apanavare vácutihini éna eta najamurachirahi eta tauriqueneana. ⁷ Váhivare ecutitipa éna eta nacasiñarajirana. Échava eta Sagrada Escritura ani tacahehi: “Ena achaneana náichapa eta napiestachirahi eta nasiñaraji. Ticaejacacanahe eta nanisiraya, téranapa. Téchepucanapa tírimaicanahe te tamirahu eta nasiñarajihí” tacahépa eta Sagrada Escritura. ⁸ Váhira énéna vicucahe víti. Váhivare vicuveha esu apana esena. Tacuija eta vituhusivaina. Machu vácutiriana éna eta nacaiçuñairahi táichavenehi eta náichirahi eta juca tauriqueneana. Tépenaracanahe. 23,000 achane ena tépenanahi te jena étanaquenehe sache. ⁹ Váhira vicuyurujica tayehe eta mapaneruanahi ema Viáquenu. Ena nani tiyuruchavanahi, vaipa nasuapahini ema Viya. Tásiha, máicuñacavacapa éma, táechucavacapa eta quichare. Tépenaracanahe. ¹⁰ Váhira tacucaracava eta échajisirana mayehe ema Viya. Vahi ecuti eta náejecapiravahi ena viáchucanaveanaini. Macapapajiruanahi ema ángele mavaneruhi ema Viya. ¹¹ Tacahehira eta juca náichavaquenevahi ena viáchucanaveanaini. Púiticha tanasihi te ajureca téjacahi tamutu maicha ema Viya. Tamutu eta juca témechahavihi víti, ticatsimavacarehivare viyehe víti vinecapaequenehanahi eta juca táitavirainapa puiti juca sácheana vicaijuhehare. ¹² Eta tacahe, vahi ecuimijachahini tájina tiáquipaicahena. Tatuparacahi ecauneuchavayare tayehe eta tauriqueneanahi. ¹³ Puiti juca eta vítaresira, jararihi eta tavaraha témejecapavachahavi. Váhiserá ecuramihini, taicha eta tacahehi eta náichararacavahi namutu ena achaneana te juca apaquehe. Ecasíñavayaresera muraca mayehe ema Viya, taicha yátupi eta macasiñacarevahi. Éma, vaipa máisapaimahi távayuchavahichaini eta tapamisirahe. Jéhesare éma, tíjaracahénahe eta etumevayare, ecamichirayare tamutu.

¹⁴ Tásiha puiti, eti nuparapenaveana némunarqueneana, érajicavayare nayehe ena ticasíñarajijiana. ¹⁵ Éti ímatiequenehahi tamutu. Eta tacahe, numetacahé apaesa táuri eta epanerequenehairaya. ¹⁶ Étaripa eta juca vérasahi vimutu viyujaraureasahi te vinicayare, étarichuhi táicutiarahi eta máitine máepusairuhi te crusu ema Viáquenu Jesucristo. Étaripa eta pan vinicaqueneasa viyuvetuhejiricacahi, étarichuhivare táicutiarahi eta máeche ema Viáquenu. Eta vérirahi

étape eta vinisirahi, táicutiarahi eta viúrujasiracacahi te máijare, tásiha éma tiávahácahavihivare vimutu víti viúrujiacacanahe éma. ¹⁷ Yátupi apanapanenejihavihi víti, visimutuvacueneanahi. Émanarichuhisera ema viávaháruhi. Eta vinisirahi eta pan, étarichuhi te máijare eta viyujarauchirahi.

¹⁸ Eta juca viúrujasiracacahi, vicutivacaipa ena nujaneanana israelítana. Éna, tiúrujiacacanahe eta nanisiraya eta tacayujarahuquenehe me Viya eta tinicacare, navarairahi mávahácavacaini ema Viya táichavenehi eta nanisira. ¹⁹ Tiuri puiti, vímatiequenehahi tájinachucha táimanéna eta vaca nayujaraurehi náijaracasiruhi eta nasiñaraji ena achaneana. Tacutirichu eta vaca mayujaraurehi. Taicha eta nasiñaraji, tájinachucha tasamacarevainahini. ²⁰ Nuvarahasera némechahe, eta nayeherepiana ena nani máimatirahanahi ema Viya, énachucha náijaracacacahi ena éreanana eta tinicacare. Vahi émainahini ema Viya náijaracacacahini. Eta tacahe, vahi nuvaraha ímicasiapava éti eta nayehe, machu náimivehahe nayehe ena éreanana. ²¹ Vahi táuricahini apiquerehahavinahini: eta véhisirahi ema Viáquenu, tásiha véhichavivarepucaini ena éreanana. Te enicayare eta tinicacare, te érayarepuca, tatupiruva eta ecurujisiracacaina mayehe ema Viya. Mácarichu émaina ecasiña. ²² Machu ímiyusemaca ema Viáquenu, taicha vahi áratahaimahi ecanara éma.

Vímerecaya eta vémunaraivanaya nayehe ena vichamuriana

²³ Yátupinéni víti véchinavahi, viyeherepipachuyarehi eta vinisiraya, váhisera tácuticacahini táetupicavahini mayehe ema Viya, váhivare tácuticacahini táimicatavahihini eta vipauchiraya ema Viya. ²⁴ Tásiha, nuconsejachahe puiti: Vahi ácarichuimahi eti iúrichavayarehi; énerichuvare etanucayarehi eta táurichiravacayarehi ena apamuriana.

²⁵ Te enicayarepuca eta vaca tiásiha te mercado, vahi ecuavamirahu eta enisirayare, váhivare ecucamesa ecuecha te ticayujarahuhipuca eta vaca, apaesa tacuija tahapasamurechahe. ²⁶ Taicha ema Viáquenu, éma tépiyacahi eta apaquehe, étape tamutu eta távapahianahi. Vituparahaichuhi eta vinisiraya máicha.

²⁷ Títecapa te náichuhahepuca enica nácani vahi vichamurianainahini, te ísapavayarepuca tiámaheana, tiúrichucha enica eta náijararuhehare. Váhiserá ecuyasereca te ticayujarahuhipuca eta tinicacare. ²⁸ Téhesera natiarihinapuca nácani tinecapaequenehanahi, te nametacahépuca eta nayujarauchirahi te tamirahu eta nasiñaraji, tiúripána vahi ecunica, apaesa tacuija tahapasamurecha eta mapanereru ema timetacahéhi. Éti, émitisicapuca eta epicauchirahi eta nasiñarajiana. Émasera ema echamuri, vuíchaha máemitisicahini. Tásiha, nuvaraha tacuija tahapapicahini eta mapaneruana icha éti.

³⁰ Téhesera etiarihinapapuca ecahe: “Vahi núrica nucarinepapuca núti tituparacanuhi nujaneacavayare apaesapuca vaipa nuemejecapavacha eta ma-

panereru ema apana. Núti nuhasulupayachaparaca ema Viya eta nunisirayare” ecahepuca. ³¹ Tiuri puiti, nuconsejachaheya: Tamutu eta enisirana étapa eta érirana, étapa eta ecaematanerana, tiúriyare tamutu eta íchirayare te mamirahu ema Viya énapa ena achaneana. Jéhesare, ena achaneana nacunachainapa ema Viya taicha eta náimairaheyarehi tiúrihi icha tamutu. ³² Jéhesare, nájinapa émejecapavaruímahí, énaripa ena israelítana, énaripa ena apavasanana, navetijipa ena vichamurianahi, taicha vicuticacahi eta machichairahavihi ema Viya. ³³ Ácutinu núti eta nuyeherepihi. Ichapemurihi eta nuvarairahi nucurismurechavaca namutu. Vahi nácarichuhini núti nutanucachini eta núríchiravayare. Énerichuva nutanucahivare eta núríchiravacaya ena apamuriana, taicha nuvarahahi tauri eta náehisiraina ema Viya, náuchucuiraina éna apanavare.

11 Núti puiti juca nítaresirahi, étapa nupanahi eta máitaresirahi ema Cristo. Nuvaraha éne ácahéni éti apanavare, epananuyare núti eta juca nítaresirahi.

Esu esena témetserajjicavaya nayehe ena suchamuriana te iúrujjisiravana

² Ichape eta nucunachahe eti nuparapenaveana, taicha eta emaemitisiranuhi. Ímiyanavahivare éhica eta ímitucasivanahi nuyehe. ³ Nuvarahasera némechaheyare eta juca apanavare téchacarehi. Ema Tata Vicaiaquene, éma machutirihahicha ema Cristo. Ema Cristo, émapa vichutirihahi vimutu viti ajairana. Ene nacahehi ena ajairana nacayenaqueneanapa, éna nachutirihanahivare ena esenana nayenana. ⁴ Eta tac-ahe, viti ajairana vahi viúrihahini vicaepacasihini te viyujarauchavaya étaripa te vicametarairuyare. Taicha te vicaepacasihi, tímicitijiricavaipa vémeperuhi ema Cristo eta vichutirihairahi éma. ⁵ Ésusera esu esena tatuparacahi ticaepacasiyarehi te tiyujarauchavayare, étaripa te ticametarairuyare. Taicha te vahi ticaepacasihi, tímicitijiricavaipa suémepuruhi ema suima eta suchutirihairahi éma. Te vahi ticaepacasihi ésu, tímicitijiricavaipa sucachucasiquenénahini ésu. Sucutihi ena túhusiana. ⁶ Esu súcani esena vahi suávarahahini ticaepacasi, ésu tivaraha sucutiyahe ema mácani ajaira. Tásiha, te suvarahapuca suácutihavi viti ajairana, tiúripanahi sucachucasipaini, suítahisivanepaini. Téhesera te tímitsiriacavayarehipuca eta suítahisiraya, tiúripanaichuhi sucaepacasihini, suácutihini ena supáraese-návana. ⁷ Taicha te tépanavanainapa ena achaneana, ema mánapuiruhi ajaira vahi étainahini máuchusine-nahini suyehe esu esena. Te mavahuana ema Viya máepiyasinehi ema ajaira. Ema Viya manacahi eta máimahi, mavasirichuhi eta máimahihi ema Viya. Eta máurinavahi tásihaquenehi me Viya. Ésusera esu esena suínapiuruihi, súchurepa esu te máquehe ema ajaira, étaripa eta súrinavahi tásihaquenehi mayehe. Eta témepiyacahi esu esena, macompañerayare ema ajaira, mayenayarehi ésu. Vahi ésuina esu suémepiyacahini ema ajaira eta sucaimairaya. Eta tacahe, eta viyujarauchiravana, viti ajairana tatuparacahavi vahi

vicaepacasihini, taicha viti vicaquehehi ema Viya, vicuticacahi ema viáchucaini Adán. ¹⁰ Énaserá ena esenana, tatuparacavacahi ticaepacasianayare eta nayujarauchiravana, nacutiyahehi ena ángeleana ticaepacamiranahi te natupihamirauchayare ema Viya, navarairahi náimereca eta napicauchirahi. ¹¹ Púitiserá, eta juca vítaresirahi véhisirahi ema Viáquenu, ichapemurihi eta véjjiasiraipa eta náitátirahaviya ena esenana. Vítiripa ichapemurihivare eta náejiasirahavihi éna eta vítátiraya viti ajairana. ¹² Esu esena, yátupihí eta súchusirahi ésu te maeche ema ajaira, púitiserá viti ajairana étapa viúchusihahi te sujuhe esu esena ticachichahavi. Viásihaquenehisera vimutu mayehe ema Viya.

¹³ Nuvaraha epanerequenehaya yátupina eta juca. Németeaca nájina éti ímijachavahini tiúrihi esu súcani máepacasinávehi eta suyujauchiravahi me Viya. ¹⁴ Viti ajairana véchahi eta tatsirihacarévhahi viújjiquihini eta vichutimaca. ¹⁵ Suímiturevahisera esu súcani esena súrihahi tiújjiquiyarehi eta suchutimaca. Étara tiúri-nachahi ena esenana. Náijaraichuhi éna eta nacaepacsiraya taicha natuparahaichuhi éna. ¹⁶ Te natiarihinapuca nácani vahi nuvaraha nasama eta juca nímiturapihi, tacamunuhi napanerechinavayare tatívaina. Tájina vímatiyahini eta juca apayeherepi. Énaripa namutu ena vichamuriana, tájina apanaina nayeherepinahini.

Ema Pablo macajachavaca eta namaetupisiravahi te tinicanayare eta tinicacare táicutiarahi eta máepeninahavihi ema Viáquenu

¹⁷ Tiuri puiti, numetacaheyare eta juca apana. Tájina- pa ecunachacarevainahini nuyehe, taicha vaipa táetupicavahini eta iúrujjisiravanahi eyujarauchiravana. ¹⁸ Jucarihisera eta juca ticatihi nuyehe. Nusamairicahi te iúrujjisiravana íchirana eta culto, vaipa tacuticacahini eta epanereruana, íputsimuriavavacapa. Németeaca núti cañarihihi eta íchavaquenévhahi. ¹⁹ Páurehesami eta íputsimuriavairacacahi. Étainapasera ecaeche- raiyaya eti yátupiqueneanahi machaneranahi ema Viya, énapa ena vahi machaneranainahini. ²⁰ Eta juca tíchahehi vaipa táetupicavahini te ecurujicaca enisirayare eta tinicacare táicutiara eta máepeninahavihi ema Viáquenu te crusu. Váipasera émainahini tatupiruruchahini. ²¹ Títecapa vaipa ecuchapacacahini. Nararihi ticainapupuiricavanapa tinicana nayéhechirá- vavacapa. Tinahacavanapa térana técvahachávanapa. Nararihisera ena apamuriana técuhanaripaicha. ²² Tájina- pa táurivainahini eta juca íchaquenehi. Ticutipa tacuijaquenéhanini epenainahini, étainapaini enisihahini érihahini. Tímicitijiricavaipa épuruvacahi ena apamuriana machaneranahi ema Viya. Ímicatsiriacavare nácani tájinaquenehi naviyavahini. Étupicavai- papuca eta juca ecahehi. Tájinaquenehasera ecunachacarevaina eta nuyehe.

Eta táetupisiravahi eta vinisirahi eta tinicacare táe-mechahavihi eta máepeninahavihi ema Viáquenu te crusu

(Mt 26.26-29; Mr 14.22-25; Lc 22.14-20)

²³ Núti tatupiruvahi eta nucaimitucasirahi mayehe ema Viáquenu. Tásiha, étarichuhivare eta nímiturapihi eyehe. Taicha ani tacahehi eta nímitusirahehi: Te jena yátiquenehi te ticaijararecasiyarepa ema Viáquenu Jesús, mavehapa te mavahuana eta pan. ²⁴ Te tamutupa eta mahasulupayachirahi ema Viya, mayuvetucapa eta pan. Tásiha, máichavacapa ena máimitureana: “Enica eta juca néche. Étivenehi nímiararecavahi eta népeniraya. Eta juca aparahiyare te apaquehe, te étipava énicaca, éta témechaheyare nuyehe” macahepa. ²⁵ Te tamutupa eta nanisirahi, mavehavarepa te mavahuana eta máerirare, mahasulupayachavare ema Viya. Tásiha, máichavarepa ena máimitureana: “Era eta juca nítineama táepusairuvayare. Eta juca táicutiarahi eta nucaejasirayare eta arairu matratune ema Tata Vicaiaquene eta eyehe, majacapiraheyare eti ecasiñanuanayare, arairupa eta éhiruyare. Eta íchirapacayare te énicaca, éta témechaheya eta nuyehe” macahepa ema Viáquenu. ²⁶ Puíticha tanasi eta juca. Aparahiyarehi viyehe. Te vénicaca étapa eta vésichacaca, vémechacacahi ena vichamuriana eta máepeninahavihi ema Viáquenu. Tiámáinucava vicainajiruyare te mápechavavare máiteca.

Tacamunu eta vipicauchirayarehi te vinicaya

²⁷ Namutu nácani tinicanahi téranahi eta táicutiarahi eta máepeninahavi ema Viáquenu, te vahi tétupicavahi eta napaneremuanahi, váhivare napicauchahini, ticapecaturanaripa éna. Náemepururecaripa eta máitine étapa eta máepenirahi. ²⁸ Eta tacahe, nácani tinicanayare, tativanumayare tipanereacavanayare te tájinahipuca náichiravainahini te mamirahu ema Viya. Te tájinahini nasama, tísapavanayarehi eta nanisirayare, náerirayare. ²⁹ Taicha te vahi tipicauchacarehi eta náimairahi eta máeche ema Viáquenu eta nanisirayare, náerirayare, énajivaichucha tíchavanahi, tímicuñacavanaripahi eta nanisirahi. ³⁰ Étara tíchahehi eta juca táitusiava esimutupa eti ecajumanahi, tájinapa tatumevainahini eta iáqueheana. Ena apamuriana tépenanapaipa táicha. ³¹ Téhesera vítijivahi vétupirica eta vítaresirahi, ema Viáquenu vahi tícuñacahavimahi. ³² Taicha mavarahahi vétupiricayarehi. Vaipa vicaicuñaimahi tayehe eta nacaicuñairayare ena apamuriana achaneana máimatirahanahi ema Viya. ³³ Eta tacahe, eti nuparapenaveana, te ecurujicacayare eta enisirayare, ecuchapacacayare apaesa ínuna eta enisirayare. ³⁴ Téhesera matiarhipuca mácani técuhasamureripaicha, tiúripa manicanuma te mapena, apaesa vaipa macuemecharecahe ema Viya taicha eta tamaetupisiravahi eta iúrujisiravahi. Étasera eta juca apamuriana téchacareanahi viyehe, nímaharinepa núti. Nétupiricaya te níteca eta ara eyehe.

Vimutu viti vítupajijiasiravapachuyare maicha ema Espíritu Santo

12 Nuparapenaveana, nuvaraha numetacaheyare eta apana téchacareana, apaesa yátupina ácaicutiara. Jucarihi apanapanenejiji eta vítupajijiasiravayare maicha ema Espíritu Santo.

² Écharichuhi éti, te vuíchaha émainahini éhica ema Viáquenu Jesucristo, ísapajiricavaichaha tipamicahéana éhica eta nasiñarajiana tájinaquenehi eta tajícaparaiváinahini. ³ Nuvaraha némechaheyare eta juca ímatirayare nayehe nácani vahi mávaháruanaimahi ema Espíritu Santo. Te nacahepuca: “Másájitajipucaini ema iáquenu éti”, te nacahepuca eta juca, ímativacaya éna. Taicha ena mávaháruanahi ema Espíritu Santo, nacarichu ena tatuparacahi námatiyare eta aquenucairahi ema Jesús. Énasera ena vahi mávaháruanainahini ema Espíritu Santo vahi tatuparacahini nácahepuca: “Ema Jesús émara Viya Viáquenuhi”.

⁴ Víti mávaháruanahi ema Espíritu Santo, apanapanenejiji eta vítupajijiasiravana máijararuhavianahi. Émanarichuhisera éma. ⁵ Énerichuvare apanapanenejiji eta vémataneana máijararuanahi ema Viáquenu. Émanarichuhisera éma. ⁶ Te tamutu eta vicaemataneasira, ema Viya émarichuhi ema téchahavihi, tíjaracahavihi eta vítumevahi, viratahairaya vimutu. ⁷ Énerichuvare ema Espíritu Santo, víjaracasi-pachuhi eta vítupajijiasiravayare máicha, vímitusi-hayarehi eta tasimutuqueneanahi namutu ena vichamuriana. ⁸ Nararihi ena máimicatavaca ema Espíritu Santo eta náitusiraya téchajicana, náimituresiraya. Ena apamuriana máijaracavacavare máejerareyare eta nacaicutiarairaya eta mapanereruana ema Viya. Émanarichuhisera ema Espíritu Santo tíjaracahi eta juca. ⁹ Nararihivare ena máijararuanahi eta nacuchapirayare muraca eta nayasearuanahi ema Viya táichavene eta nacasiñavairahi eta mayehe. Nararihivare ena máijararuanahi eta nacanasirayare ena nacajumaqueneana. ¹⁰ Nararihivare ena máijararuanahi eta nacuchusiraya eta tiáramicareana. Ena apamuriana náijaraichuvare eta ticametacasianaya mayehe ema Espíritu Santo eta máechajiriruvanahi ema Viya. Ena apamuriana máijaracavare eta náimatiasiravaneya ena achaneana nájahapuca nácani mávaháruanahi ema Espíritu Santo, nájahavarepuca ena mávaháruanahi ena éreanana. Ena apamuriana máijaracavare eta tiúririchuya eta náechajisiraya eta apaechajiriruvana. Ena apamuriana máijaracavare eta náitusirayare, nápepica náechajisiha eta apaechajiriruva, trépeteanayarehi. ¹¹ Tamutu eta juca máichaqueneanahi ema Espíritu Santo. Macarichuhi ema máitaparahahi máijaracavaca eta náitucaquene-pachuyare namutu ena mavarahaqueneanahi máijaraca.

Émanarichuhi ema véhiruhi

¹² Viti achaneana, apanapaneneji eta táijareana eta viáquehe. Tisimutuhi eta táitupajijiasiravana. Étanarichuhisera eta táuchusihahi te viáquehe. Ene tacahehi eta véhisirahi ema Viáquenu Jesucristo. Vimutu viti véhicanahi éma, apanapanenejihavihi, visimutuhivare. Émanarichuhisera ema véhiruhi. ¹³ Tacahe, vahi étaparacaina te israelítahávipuca, te apavasasajuecuhavivarepuca, étaripa te máquenurehavhipuca. Téhesera te vicaicachasipa eta véhisirayare ema Viáquenu, étanarinepa eta vímahi maicha ema Espíritu Santo. Énerichuvare, eta mávahásirahaviripa, viciticacaripa eta máecasarechirahavihi eta viáchanevana.

¹⁴ Yátupi eta viáquehe vahi étanainarichuhini eta táimahanahi, étapa eta táitupajijiasiravanahi. ¹⁵ Étaripa eta vívape, vahi távasihini eta vivahu, váhivare tacuticacahini eta táitupajijiasiravanahi. Étarichuhisera táunavahi eta viáquehe. ¹⁶ Étaripa eta vichaca, vahi távasihini eta viúquiha. Étarichuhivaresera táunavahi eta viáquehe. ¹⁷ Váiparinehi táuricaímahi amairihainahini eta viáquehe tacaquihahini. Tásiha, tacuijapucaini víquiñainahini, tacuijapaini visamaquenénahini. Váhivare táuricaímahi amairihainahini eta viáquehe tacaquiñahini. Tásiha, tacuijapucaini visirinahini, tacuijapaini vijiurenahini. ¹⁸ Ema Viya manacahi eta táematanerepianayarepachuhi eta juca táunavanahi eta viáquehe. Taicha tacahehi eta mapanereruhi ema Viya te tépiyacahavinapa. ¹⁹ Vahi mávarahahini étanainarichuhini eta táitupajijiasiravainahini eta viáquehe, amairiquihavavinahipucaini. ²⁰ Yátupi tisimutuhi eta táitupajijiasiravanahi eta viáquehe, étanarichuhisera eta távihahi.

²¹ Tamutu eta juca viáquehe ticamunujiricacahi. Étaripa eta viúquiha tacamunuhi eta vivahuana. Étaripa eta vichuti tacamunuhivare eta vívapeana, vipaisihayare. ²² Étaripa eta tíávihanahi te amahe vijuhe, matumeairairahaipahi eta vímairahi, étahisera tíápajucavahi ticamunucarepanahi. ²³ Jucarihi eta viáquehe ticutimahi vahi múnainahi eta vímairahi. Étahisera tíápajucavapanahi vimuiriachahi. Jucarihivare eta viáquehe vaipa táuricahini vímererahini. Tásiha, tíápajucapanahi vépacucurehi, vicatiuchahivare. ²⁴ Jucarihivare eta apana táunavahi eta viáquehe ticutimahi vaipa vicamunuhi vépacuchahini. Tímererecavahi nayehe ena achaneana. Tamutu eta juca máepiyaruanahi ema Viya, máicuchahi eta táimahanapachuhi, mavarahahi tácuticacahi eta vémunasiraya tamutu eta táunavanahi eta viáquehe. ²⁵ Eta tacahe, te vicaematane, tamutu eta viáquehe tiyamuricahi, tímicatajiricacahi. Ichapehi eta táejiasiracacahi. Vahi táiputsiacacahini. ²⁶ Étaripa te tatiarihipuca eta táichavaquenevahi eta táunavahi eta viáquehe, támairiacahi ticati eta viáquehe. Téhesera tatiarihipuca eta táurisamurevahi taicha eta táitupajijiasiravanahi, tamutuyarehi eta viáquehe tíúrisamure.

²⁷ Ene ecahehi éti eta éhisirahi ema Viáquenu Jesucristo. Eta iúrujisiravahi mayehe, ecuticacahi eta táu-

navanahi eta máquehe. ²⁸ Énerichuvare, ema Viya tituparacahavipachu eta viávacurepachuhi, mavarairahi vijaneacaheyare eti vichamuriana, machaneranahi. Tituparacahavihi viti apóstoleana vímahaheya, énapa ena profetana, énapa ena tímiturecarahianahi eta máechajiriruvana ema Viya, énapa ena títuruequenehanahi nacuchuca eta tíáramicareana, énapa ena ticanararecanahi ena nacajumaqueneana, énapa ena tímicitarahianahi nayehe ena nacamunuquenévana, énapa ena tíúrianahi eta nacavanairipirana, énapa ena tíúririchu eta náechajisaha eta apaechajiriruvana, énapa ena trépeteana tíucanahi nápepica eta apaechajiriruvana. ²⁹ Vahi étanainarichuhini eta viávacureanahi. Vahi vámutuhini apóstolehavinahini, vahi vámutuhini profetahavinahini. Vahi vámutuhini vímiturecaini. Vahi vámutuhini vicuchuca eta tíáramicareana. ³⁰ Vahi vámutuhini vítupajijiacavahini vicanararecaini ena nacajumaqueneana. Vahi vámutuhini véchajicanahini te apaechajiriruvana. Váhivare vámutuhini trépetehavinahini. ³¹ Tiuri puiti, étipa tacamunu eyaseaca ema Viya májaracahe eta ítupajijiasiravaina eta ticamunucarepana. Jéhesare, nuvaraha nímitucaheyare eta apana táurinaquenepana. Esamanuchaha.

Eta ticamunucarepanahi eta vémunaraivaya

13 Vítiripa, te tacuijahipucaini eta vémunaraivainahini, vaipa tisuapacarémaihi eta vimetarairuana. Vémunasiricavapa. Tayanapane vítucahipuca véchajica tamutu eta apaechajiriruvana, vácutipucaini eta náechajisira ena ángeleana. ² Te tacuijahipucaini eta vémunaraivainahini, tájinapa vicunachacarémaihi me Viya. Tayanapane vicametarairuhipucaini eta vimetacasivanahi te anuma, támutuhivarepucaini víturuequeneháini, étaripa te máijahúchapucaini macayejecahini ema Viya eta ichapequene mari táichavenénahini eta víyaseasirainahini eta vicasíñavairainahini eta mayehe. ³ Tásiha, te tacuijahipucaini eta vémunaraivainahini, tájina vijacapacarémaihi me Viya táicha. Tayanapanevare vicajiricahipucaini tamutu eta vímahaqueneana te vipena, téhevare vísapucaini náijuchaini eta viáquehe táichavenénahini eta namaurisirahi véhica ema Viáquenu. ⁴ Téhesera yátupihí vémunarahi, vicayeheyarehi paciencia, vijapanurahiyare. Vahi vicapinarurecaini. Váhivare píncanillahavimahi. Váhivare vicasíñavavaicaimahi. ⁵ Váhivare vicavapajaimahi jácani táíñemahiqueneana. Váhivare viverejimirauchaimahi ena apamuriana achaneana. Váhivare tijuricati visemaimahi. Váhivare vicatianarecaini. ⁶ Váhivare táuricahini vicaecahirahihini te vímaha nácani ticaejeanahi. Víúrisamuresera te vímaha ena achaneana tíúrihi eta náitaresira. ⁷ Te yátupihí vémunarahi, vicamichayare tamutu. Vahi énevánemahi visuapa eta echajirirucavana náepiyapiruanahi ena achaneana. Vicuchapayarehi eta táetupirisiravayare eta panerercana. Vahi víjahúchavaimahi vínájicava, vicuchapínávayare. ⁸ Tájinapa títaimahi eta vémunaraivayare, vímiyanavainapa eta vítaresiraya.

Eta jena sácheanayare, vímatiequeneha tamutu. Vaipa vicamunu eta vimetacasivana eta metarapianayare tásihaqueneanayare me Viya. Tájina viátajivaimahi eta visamirayare eta apaechajiriruvana. Váipavare tácajeraimahi eta visamirayare vímatiequenehavanéna. ⁹ Taicha puiti te juca vítaresirahi, apaesachicharichu eta vímatiequenehairahi, apaesachicharichu eta vítusirahi eta metarapiana tásihaqueneanahi me Viya. ¹⁰ Járjapainapasera eta sácheyare, vímatiequenehainapa yátupi eta mapanereruana ema Viya, eta vímámatiequeneruanahi puiti. Vaipa vácamunu ena tímitucahavianahi.

¹¹ Nímicutihavahi núti eta víamaperuvahi. Vuíchaha vítuchahini vipanerereca, vimapachichijiricavaichaha. Téhesera te ajairahavipa, te esenapuca, títsivachavapa eta vipanereruana. Vínajicapa eta víamaperuvainihi. ¹² Ene vicahehi víti eta juca vítaresirahi. Puiti vuíchaha támutuhíni vímatiequenehahini. Ticutihaha te vímararacaicha eta vicuna te jácani ichasi espejo, vahi tacaecherainahi. Járjapainapasera eta sácheyare ticaecherainapa tamutu. Puiti, ticajera eta vicaicutiarairahi víti. Ema Viya vuíchaha tímitucahávihi tamutu eta mapanereruana. Téhesera te apajarahinapa, tamutuya vicaicutiara máicha. Tacutihichu eta máimairahi puiti eta vipanereruana víti te amahe eta visamureana. ¹³ Puiti, eta juca vicaijuheya, vímianava vámutu muracaina eta vicasiñavairahi me Viya, váhivare vicuyacujihini eta vicuchapirapaipa eta víurivainapaipa, tacuijavareni tahapapirichahini eta vémunaravayare. Jéhesare, tíapajucavapanayarehi eta vémunaraiva. Étara ticunachacarepanahi me Viya.

Tísapacare eta náechajisiraya eta apaechajiriruvana

14 Tacahe, nuvaraha núti yátupina eta émunaravaina. Nuvarahavare eyaseaca ema Espíritu Santo eta ítupajijiasiravaina, étaripa eta ítusiraina ecametarairu eta máechajiriruva tásihaqueneanahi mayehe ema Viya. ² Tájina táichava, nácani téchajicana ema Viya eta apaechajiriruva. Éma masamahi. Vítipasera viti apamuri vaipa vácaicutiarahini eta náechajiriruvahi. Yátupihupuca máimitureanahi ema Espíritu Santo, váhisera náimerechavahini eta máimiturapihi éma. ³ Vahi tácuti nácani nacametarairuhi eta máechajiriruvana tásihaqueneanahi mayehe ema Viya, ticaicutiaracarehi tamutu eta nametarapianahi. Tatupiruvahi eta náimitusiravacahi ena apamuriana. Náetumechahi eta náchanevana eta nasuapiraina. Éta nacurisamurechihavacahi te jácani napanereresirana. ⁴ Ema mácani téchajicahi ema Viya te apaechajiriruva, mayehechiravarichuhi te máchaneva eta macajurusiraya eta masuapajiraivaya. Émasera mácani ticametarairuhi eta máechajiriruvana tásihaqueneanahi mayehe ema Viya, macajurusinahi eta nasuapajiraivayarehi ena machamuriana.

⁵ Nuvarahahinéni núti ámutuhini ítupajijiacavahini maicha ema Espíritu Santo, échajicahipucaini te apaechajiriruvana. Tíapajucavahisera eta nuvarairahi ecametarairuhini eta máechajiriruvana tásihaque-

neanahi mayehe ema Viya, taicha étara tíuripanahi eta juca tayehe eta échajisirainahini te apaechajiriruvana. Tíurihinéni échajicahini, tacamunuhisera natiarihinahini nácani trépete, nametacavacasarepaini ena apamuriana eta tacayemaqueneanahi apaesa tajurusihapaini eta nasuapajiraivainahini. ⁶ Nútiripa, nuparapenaveana, nítecapauchahepucaini néjirapanaheni, tásiha néchajicapahipucaini te apaechajiriruva eta eyehe, éti vahi ácaicutiaraimahi, váipavare tímicatacáhemahi eta tajurusirainahini eta ecasiñavairahi me Viya. Tacamunuhi néchajicahini te échajiriruvaichu eta nímitusirahénahini, éti ecaicutiarasarepaini tamutu eta numetacasivanahi me Viya, étapa eta máimerechacunenahi, étapapuca eta máimatiquenehi, arairu eta viyehe.

⁷ Eta juca tímicutihavahi te mapacharajihini eta masiviviripi ema ticasivivihini. Vaipa tacaicutiaracarehini tájahapuca eta masiviviripi. Émaripa ema violinista, váhivare ticaicutiaracarehini tájahapuca eta mapununerapi. ⁸ Énerichu tacutihini mácani cúnetéru nayehe ena suntaruana, te váhivare ticaicutiaracarehi eta macachujairahi, váiparinehi tíurujicavanaimahi ena suntaruana táichuhaqueneanahi, taicha vahi nácaicutiarahini. ⁹ Ene ecahehi éti, eta échajisirahi eta apaechajiriruva, nájina nacaicutiarahini. Tímicutihavahi nacaicutiaracarehini ena suntaruana táichuhaqueneanahi, taicha vahi nácaicutiarahini. ⁹ Ene ecahehi éti, eta échajisirahi eta apaechajiriruva, nájina nacaicutiarahini. Tímicutihavahi nacaicutiaracarehini ena suntaruana táichuhaqueneanahi, taicha vahi nácaicutiarahini. ⁹ Ene ecahehi éti, eta échajisirahi eta apaechajiriruvana. ¹⁰ Yátupi tisimutuhi eta apaechajiriruvana te juca apaquehe. Nayehepachuhisera nácani ticaechajiriruvana. ¹¹ Vítipa te náechajicahavipuca ena extranjeroana te náechajiriruva, váiparinehi vácaicutiaraimahi. Énaripa váhivare ticaicutiarahavianaimahi víti. ¹² Tiuri puiti, vahi tacumapuruji eta evarairahi ejacapa eta ítupajijiasiravanaya máijjaruheyarehi ema Espíritu Santo. Tíuripana eyasesereca eta ítusiraina ímitucavaca ena echamuriana apaesa tajurucapaipa eta nasuapajiraivaina éna apanava.

¹³ Tásiha, mácani téchajicahi te apaechajiriruva, tacamunuhi mayaseacahini ema Viya eta máitusirainahini mametacavaca eta tacayemaquenehi eta máechajiriruvahi apaesa nacaicutiarasarepaini nácani tisamaracananahi. ¹⁴ Taicha eta viyujarasirahi víti te apaechajiriruvana, te vítapiricapa eta viyujarasirahi, vahi tánasihini véchavahini eta vicayemaqueneanapahi, vémitisicavanehi tamutu. ¹⁵ Eta tacahe, tíuripanahi viyujaraca te véchajiriruvaichu, tásihaqueneanahi te visamure. Te vijirayarepuca, tíuripanahivare te véchajiriruvai-chuvare, tásihaquenehahivare te visamure, vicaicutiarasarepaipa eta vicayemaqueneanapahi. ¹⁶ Téhesera apaechajiriruvahi eta eyujarasirahi me Viya, yátupihini eta ecunachirahi éma. Énasera ena tisamaracahanahi vahi náehicaimahi eta eyujarasirahi náimicatasiraheni eta nayujarasirahi; taicha vahi nácaicutiarahini eta ecayemaqueneanapahi. ¹⁷ Tíurihinéni eta eyujaracasahi eta ehasulupayachirahi ema Viya, énasera ena echamuriana vaipa támicatacavacahini eta eyujaracasahi. ¹⁸ Jéhevesera núti, ichape eta nuhasulupayachirahi ema Viya taicha eta nítusirahi néchajica eta apaechajiriruvana. Nucachuricahehi

emutu éti. ¹⁹ Étasera te nucametarairuyare te namuri ena vichamuriana, vahi nuvaraha nácuti ena tiúpiemana eta náechajisira te apaechajiriruvana. Núti ánipirichu te néchajica, tamutuhisera ticaicutiaracarehi nayehe ena nímitureanahi.

²⁰ Nuparapenaveana, éti vaipa amaperuhénahini. Nuvaraha táuripaini eta epanereruana, eta íchirayare eta táuriqueneana. Nuvarahasera ácutihini ena amaperuana vúichaha náitucahini naicha eta tamauriqueneana. Énenapaini ácahehine éti. ²¹ Ema Viya, ani macahe eta te Sagrada Escritura: “Nutuparacayare ena apanaqueneana achaneana apaechajiriruvana náimitureca eta nuvanairipiana eta nayehe ena achaneana távacuanahi eta avasare. Váhiquenesera nasuapaimahi” macahepa ema Viya.

²² Tacahe, nácani tiyujaracananahi te apaechajiriruvana, táicutiarahi eta máijarasiravacahi ema Viya náichavenehi ena máehicarahanarichaha ema Viáquenu. Jéhesare, tayuchusamurechavacayare eta nasamararasirahi. Énasera nácani ticametarairuanahi eta máechajiriruvana ema Viya, tayuchusamurechavacayare ena téhicanahi ema Jesús, taicha ticaravahuanayare eta nasamararasirahi. ²³ Étasera te jácani iúrujisiravana, te eyujaracahipuca emutu te apaechajiriruvana, tásiha, te natiarhipuca nácani masuapajirairahanarichaha, ticaecahiheanayarehi éna, náimijachayarehi máurishihehi. ²⁴ Tiúripanayare eta ecametarairuyare emutu eta máechajiriruvana ema Viya, te échajirírúvaichu. Tásiha, te natiarhipuca te iúrujisiravahi ena masuapajirairahanarichaha, ticatisamurevanayarehi taicha eta nasamararasiraya. Tipanerequenehavanainapa eta nacapecaturairahi. ²⁵ Tacahe, tímatiacavanainapa eta máimatirahi ema Viya tamutu eta napecaturana tayumurevanainihi. Tépuycanainapa téneuchavanainapa mayehe ema Viya. Téchajisiaheanainapa: “Yátupiquenényapa mávahávacahi ema Viya ena nániana” nacahenapa.

Tacapicahu tamutu eta iúrujisiravana

²⁶ Nuparapenaveana, áni tacaheyare eta iúrujisiravanayare. Eneřejicava eti íputsiacavayare eta ejirairaya. Énerichuvare tinerejicavayare mácani tíjaracavayare ema tímiturecayare. Énerichuvare te matiarihinapuca mácani mavarahahi ticametarairuyare eta mametacativasanihi me Viya, tájinachucha táichavahi. Tísapacarehivare eta échajisirayare te apaechajiriruvana. Tacamunuhisera matiarihiyare ema trépeteyare. Tamutu eta júcana, étara ticajurucayare eta nasuapajiravainapaipaicha ena echamuriana. ²⁷ Téhesera te natiarihinapuca apinana, mapananapuca ena tivarahani téchajicana te apaechajiriruva, tájinachucha táichava. Tísapacarechucha. Tévacajiricacanayarehisera te jácani náechajisirayare. Váhivare téjiacavaimahi ema nayeheyare trépete. ²⁸ Téhesera nájinapuca naviyavahi ema nayeheyare trépete, tiúripanaichuhi vahi nacuechajica te apaechajiriruva te namuri ena echamuriana náurujiiruvana. Tiúri, te navarahahipuca náechajica ema Viya, tavarahahi

nacarichuyarechucha eta náechajisiraya. ²⁹ Nácani ticametarairuanayare eta máechajiriruvana tásihaque-
neanahi mayehe ema Viya, te apinanahipuca, mapanahipuca, tájinachucha táichavahi, tiúrichucha.

Ticamunucarehisera ena náurujiiruvanahi tisamararacananahi napaneréquenehayarehi tamutu eta nacayemaqueneanapahi ena ticametarairuanahi. ³⁰ Téheserapuca matiarihini mácani máejaruhi, ticametacasihiquenehi me Viya; tásiha mavarahapuca macuchujipica eta mametacativasanihi, tísapacarechucha eta máechajisiraina. Macuchapavayaresera máitapiricanuma mácani máinapuiruhi téchajica. ³¹ Emutu eti ecametacasiqueneanahi eta máechajiriruvana ema Viya, ítsivajiricacayare. Émanainapachu mácani téchajicayare, apaesa ena ímitureanahi namutu nacaravahu, náetumechavahivare éna apanava. ³² Ena ticametarairuhiana tatuparacahi ticuchapavanayare. Vahi ticainapupuicavanaimahi. ³³ Taicha ema Viya vahi mávaraha mapacharajinahini nácani ticametarairuanayare. Tásiha, éti ecaejarusinavayare apaesa ecurisamurecha ema Viya.

Táepiyarichuhi eta juca viyeherepi víti te viúrujisiravana. ³⁴ Ena vichamuriana esenana timatinanayarehi. Vahi téchajicanaimahi. Nasamararasina-
vaichucha. Taicha suíjaraichuhi me Viya esu esena susamararasirayareichuhi. ³⁵ Te natiarhipuca eta suvarahaquenehi suecha esu esena, tiúripanahi te náitecapapa te napena suyaserecapa ema suima. Taicha vahi súrihahini esu esena sucayasesereruhini eta suvarahaquenehi suecha te namuri ena echamuriana.

³⁶ ¿Tájaha tacayema eta ecasiñavavaisirahi? Vahi étinahini ínapucahine mametacahehine ema Viya eta máechajiriruva. Váhivare ácarichuhine éti tatuparacahine eta ejacpirahi. ³⁷ Te natiarhipuca nácani tímijachavanaripa náimatiequeneharipa tamutu eta máechajiriruva ema Viya, náimijachaipapuca mávahá-cavacaripa ema Espíritu Santo, tatuparacahi éna napánerechinávanumayare eta juca nájurehi eyehe, tásihaquenehi me Viáquenu, mavanairipichuhi éma. ³⁸ Téhesera matiarihihipuca mácani tépuruyare eta juca numetarapianahi, émaina máepurucare, vaipa tisamacaremahi eta eyehe.

³⁹ Tiuri, nuparapenaveana, epamicavachucha ecametarairu eta máechajiriruva ema Viya. Tásiha, táuricachucha ísapa nácani téchajicanaparacahi te apaechajiriruva. ⁴⁰ Tacapicahuhisera támutu eta iúrujisiravana. Ecaejarusinavapahi tamutu eta íchaqueneanayare te iúrujisiravanahi.

Eta máechepusirahi ema Cristo te máecari

15 Nuparapenaveana, nuvaraha némechaheyare eta numetarairuhi eyehe eta máechajiriruvahi ema Viya tayehe eta viúchucuirayare. Étara táemesiavahi eta juca te esamainapa, etupiruvavanehi ejacapa. Puíticha tanasihi eta esuapirahi. ² Tásiha, puiti iúchucuhapaipa táichavenehi eta ímianiravahi esuapa

eta numetarairuanahi eyehe. Németeaca yátupihí eta íjarasiravahi eta éhisiraya eta juca esamaquenehi.

³ Écharichuhi eta nímiturapianahi eyehe, étarichuhivare tacahehi eta nímitucasivahi. Eta júcana eta tisuapacarepanahi: Yátupirahi máepeninahavihi ema Cristo táichavenehi eta vipeaturana, émairahi ema táechajisahaquenehi eta Sagrada Escritura. ⁴ Eta náimairahi tépenapa éma, náecarapa. Téchepecuhisera éma te mapanaquenepa sache, taicha tacahehi eta tametarapihi eta Sagrada Escritura, timetacahavihi tamutu eta máichararacavayarehi éma. ⁵ Tímerecavahi mayehe ema vichamuri Pedro, énerichuvare ena apamuriana apóstoleana. ⁶ Tásihapa tímerecavavarepa nayehe ena quinientuqueneana eta nasimutuvanahi ena vichamuriana. Puíticha nararihichaha maverana ena tímahana. Nararhipasera ena tépenanapaipahi. ⁷ Te táequenevarepa, tímerecavavarepa mayehe ema Santiago. Tásiha, tiápechavavarepa tímerecava nayehe namutu ena apóstoleana.

⁸ Tásiha, te táequenevarepa eta júcana, tiápechavapa tímerecava nayehe, nútupavapa nímahahi éma. Ichape eta táramicarevahi nuyehe eta máichuiranuhi nútí néquenereruhi mayehenuyarehi apóstole, tacuti eta táijahúchirava te tiújuçayare esu esena. ⁹ Ichapemurihinéni eta némepuruirávahi nútí nayehe ena apamuriana apóstoleana. Váhivare táuricahini apóstolenuinahi eta nímairavahi, taicha ichapemuríhi eta nupanajirisirávacahi ena náinapureanahi machaneranahi ema Viya. ¹⁰ Tíçuhanuhisera ema Viya, taicha eta máemunasiranusamihi. Apóstolenuhi puiti eta mayehe. Váhisera némepururecavahini eta máemunasiranuhi. Jéhevare nútí, nucachuricahi ena apamuriana apóstoleana. Ichapemuripanahi eta nucaemataneasirahi éma. Váhisera níputsiaracavahini nútí. Eta máemunasiranuhi ema Viya, tímícatacanuhi eta nucaematanerahi. Tíjaracanhivare eta nétumechiravahi. ¹¹ Tájinasera vahi étaparacaina eta juca nájahapuca nácani ena ticaemataneapanahi. Étarichuhi eta vímiturapiana eyehe, eta esuapaquenehi puiti.

Tayanapane vépenaipapuca, véchepecuyarehisera

¹² Víti vímitucaheripa eta máechepecusirahi ema Cristo te máecari. Németeacaserá etiarihichaha eti vuíchaha esuapahini taicha nusamairiricahi eta ecahehíji: “Vahi téchepecuanaimahi ena náepenaqueneana”. ¿Tájahapuca tacayema vuíchahacaruhi tasuapacarehini eyehe? ¹³ Éti éjicapavahi eta epanereruana. Ímijachaipapuca vahi máratahaimahi ema Viya mácaechepecavaca ena náepenaqueneana. Te vahi macuratahahini, váhivarepuçaini macucaechepecuhini ema Cristo te máecari. ¹⁴ Tacahe, te vahi macuechepecuhini ema Cristo, váipapuçaini tacusuapacarehini eta vímiturapianahi eyehe, tamapurujipapuçaini eta esuapirahi. ¹⁵ Te yátupinahini vahi tacusuapacarehini eyehe eta náechepecusirayare ena náepenaqueneana, váhivare tacusuapacarehini eta macaechepusirahi ema Viya ema machicha Cristo. Tímícutijiricavaipahini vépiyahirahihini vivayuarerecapuçaini víti te máijare ema Viya, taicha eta

vímitusirahehi eta macaechepusirahi ema Viya ema Cristo. ¹⁶ Te yátupinapuca vahi tisuapacarehi eta náechepecusirayare ena náepenaqueneana, váipavarepuca tásuapacarehi eta máechepecusirahi ema Cristo. ¹⁷ Énerichuvare, te váhipuca tisuapacarehi eyehe eta máechepecusirahi ema Cristo, tásiha énerichuvare váipapuca tisuapacarehivare eta macaepahaira ema Viáquenu eta epecaturana táichavenehi eta ecasiñairahi éma. ¹⁸ Te yátupinapuca vahi tisuapacarehi eta júcana, tímícutijiricavaipa témítiequeneanaripa ena náepenaqueneanahi téhicanahi ema Cristo te achaneanarichaha. ¹⁹ Te yátupinapuca vahi tisuapacarehi eyehe eta júcana, tamapurujiripa eta vijaneasiravahi eta vítaresirahi puiti juca táichavenehi eta vicuchapiravahi vivarairahi vicachane ema Cristo te apana vítaresira. Te vahi tacuitauchava eta juca, ichapeyare eta vicatisamurevairaya.

²⁰ ¡Yátupiquenehisera eta máechepecusirahi ema Cristo te máecari! Tacahe, éma ecutiararehi viyehe eta véchepecusirayare víti apanavare te vépenaripapuca. ²¹ Taicha eta vépenira manaquipairuhi ema máinapuiruhi ajaira te juca apaquehe ticaijare Adán. Ene macahehi ema Cristo, éma tinaquipaicahe eta máinapuisirahi tayehe eta véchepecusiraya te vécari. ²² Táichavenehi eta mámariequenerahavihi ema Adán, émapa tímahavihi tayehe eta vépenira. Puítisera táichavenehivare eta véhisirahi ema Cristo, émapa tímahaviyare tayehe eta viápechiravayare vítareca. ²³ Yátupiquenehi táejarurevahi eta juca. Tínapuçahi ema Cristo téchepecuca. Éma ecutiararehi viyehe. Tásiha, te mápechavavare máiteca te juca apaquehe, énainapa téchepecuanayare ena náepenaqueneanaripa machaneranahi. ²⁴ Tacahe, tíanehinapa eta táichecuaraiyare eta tauriqueneanahi te apaquehe. Taicha ema Cristo macamítiequenehainapa tamutu eta náitupajijiasiravanainihi ena táquenuruhanainihi eta tauriqueneana. Ema Viya máijaracayarehi eta matumevayare macapaquechirayarehi namutu ena mánananahi, étainapa mácatayanusihavacayare. Tacahe, macaepahainapa eta vépeniraini. Nájinainapa tépenaimahi. Taicha ema Cristo matuparahaichuhi mayehe ema Maiya eta aquenucairayarehi, émayarehi téchayarehi tamutu. Taicha ánipa macahehi ema Viya eta te Sagrada Escritura: “Éma nutuparacahi téchayarehi tamutu”. ²⁸ Tájinasera vahi ticasiñavavaicaimahi ema Cristo eta émairaipa técha. Te máimahapa támutupa máetupirica, macuchapainapa eta vanairipianayarehi mayehe ema Maiya, taicha éma tíjaracahi ema Machicha eta máitupajijiasirava. Tásiha, ema Cristo máimereuchainapa étairahi tásiha eta vanairipiana mayehe ema Maiya. Émarichuhi téchahi tamutu.

²⁹ Tiuri puiti, nararihi ena apamuriana ticaicachasianahi náitsivahi ena náepenaqueneanaripa, namavarairahi náemítiequenehahini tayehe eta náechepecusirayare. Ena nani, muracahi eta nasuapirahi eta yátupirahi eta náechepecusirayare ena náepenaqueneanaini.

³⁰ Nuvaraha ácutihavi víti eta vicasiñairavahi me Viya. Tayanapane ichape eta tacauyayacarevahi eta vépeni-

rainahini puiti juca sácheana, vicamichahisera tamutu taicha vicuchapavahi eta macaechepusirahaviya ema Cristo. ³¹ Nútiripa, nuparapenaveana, tamutuhi sácheana ticauyayacarehi eta népenirainahini. Ichape eta tapicacarevahi. Nucurisamurechavasera eta núrismurevahi icha éti eta iúriavipahi mayehe ema Viáquenu Jesucristo. ³² Núti muracahi eta nusupirahi eta véchepusiraya te vécariana. Te váhipuca nusupahini, vahi nacucanaranuhini te juca avasare Efeso. (Náetaviuchahi eta navainarajivanahi, nacutihi éna eta sárareana táíñehiqueneanahi.) Tájinchuchasera táimaequenénahini nuyehe eta nímiyanavayare eta nucatiuchira eta véhiruhi, te tacuija yátupinahini eta véchepusirayare te vépena. Nararihisera ena téjecapavanahi eta napanereruana. Tímijachavanahi vaipa téchepucanaimahi te náepenapa, taicha ani nacahehi: “Vicamapuravachucha puiti vera vinica, viúrisamureyare taicha achichupuca vépenacaru. Tásiha, títavainapa tamutu eta viyehe” nacahepa.

³³ Vahi tacucahe eta epanereruana éti. Taicha éna, vahi tétupicavahi eta nayeherepianahi. Ticauyayacarehi najarareca eta táurinavipahi eta eyeherepiana. ³⁴ Tátupiruvapa táuri eta ítaresiraina éti. Váipavare ecuquicha eta pecatuana. Taicha nararihi ena vuíchaha náimatihini ema Viya te emuri. Titsiriacareripahi eta nacasiriquirahehi eti machaneraqueneanahi ema Viya.

Apanainapa eta vicaqueheyare eta véchepusirainapa

³⁵ Németeaca núti nararihi vuíchaha nasupahini. Navarahapuca tiyaserecanuanaya: “¿Tájahapuca náicharacavayare eta náechepusirayare ena náepenaqueneanaini? ¿Tájaimahinapapuca eta nacaqueheyare?” ³⁶ Ena tiyaserecanuanaya, tájina náechaqueneana. Puiti, nuvaraha epanerequeneha. Nímicutiarchinaheyare tayehe eta evaraqui. Eta evaraqui váhira tímaruca te vahi vémurichahini te apaquehe. Ene vicahe viti achaneana. Tínapuca eta vépenira étapa eta náecarairahavi. Tásiha, te táequenepa, vijacapaya eta viáqueheana arairuya. ³⁷ Te vévacapa eta jácani evaraqui, vémurichapa te apaquehe. Te tinanapahi eta apaquehe, tímarucapa eta vévaraqui. Váhisera étainahini tachavahini táuchuahini eta evaraquihi. ³⁸ Táquehepachuhi eta táimarusirahi eta evaraqui maicha ema Viya. Vahi apaimamajinahini eta táimaru. ³⁹ Étaripa eta veche viti achaneana, vahi távasimahihini eta taeche eta sárare. Apanahi eta táimahi. Eta taeche eta cáyure, apanahivare eta táimahi. Eta taeche eta jima, énerichuvare apanahivare eta táimahi. ⁴⁰ Énerichuvare, eta nacaquehera ena tiávihanahi te anuma, vahi távasihini eta vicaqueherahi viti viávihanahi te juca apaquehe. Apanahivare eta táurinavahi eta nacaqueherahi éna. Víti, apanahivare eta táurinavahi eta vicaqueherahi. ⁴¹ Énerichuvare nuvaraha ácaicutiara eta tajaraivahi eta sache, apanahivare eta táimahi. Vahi távasihini eta tajaraivahi eta caje. Étaripa eta tajaraiva eta jarairiquiana, apanahivare. Jararivare eta tijarahipanavacahi tayehe eta apamuriana. ⁴² Ene tacaheyare eta vicaquehera víti te véchepucapa.

Apanayare eta táimahi. Te vépenapapuca, ticaecarasiyarehi eta viáquehe, timuyuyarepa eta véche, tépachaicavayarehi. Téchepucayarehisera eta apana viáqueheyare eta máepenacacainapa. ⁴³ Ticaecarasiyarehi eta viáquehe, taicha ticajachacarepuhapa eta véche. Téchepucayarehisera eta tapachinaqueneyare viáqueheyare. Ticaecarasiyarehi eta viáquehe, matumerairahahi. Téchepucayarehisera eta viáquehe, tétavicavainapa eta tatumevayare. ⁴⁴ Ticaecaracasiyarehi eta enaha viáquehe. Téchepucayarehisera eta viáqueheyare apaimahinapa, tijarahinapa eta vicaqueheraya vicutinapa eta macaqueherahi ema Cristo eta máechepusiraipa. Tanasiyareichuhi eta táimahi eta viáquehe, espírituinapasera.

⁴⁵ Eta Sagrada Escritura, tacahehi eta táechajiriruvahi: “Ema Adán, máinapuiruhi ajairahi máchaneruhi ema Viya”. Éma ticaejaparecahi eta vímarusirahi viti achaneana, vicutihi éma eta vijurusirahi eta vítaresirahi. Tásiha, te táequenénapa, ema apana ajaira ticajare Cristo, émapa tijaracahaviyare eta apanayare vítaresirayare, vicaquehenapa eta máquehe. ⁴⁷ Ema ajaira máinapuiruhi, te ticaepiyainapa, máteji eta máquehehi. Éma, távapahiyarehi eta apaquehe. Émasera ema apana ajaira, mávasarichuhi te anuma. Éma Viáquenuhi.

⁴⁸ Viti achaneana, énerichuvare mátejihi eta viáquehe, taicha mámariequenehavahi ema máinapuiru ajaira. Eta vicaqueherahi tavasimahihi eta macaqueherahi éma. Tipachinayarehisera eta viáqueheyare, tacutiyare eta tapachinavahi eta macaqueherahi ema ticavasahi te anuma. Eta vicaqueherayare tavasimahiyare eta macaqueherahi ema ticavasahi te anuma, taicha machichahavihi víti.

⁵⁰ Nuvaraha níminecapáequenehahéyare, nuparapenaveana, eta veche máteji vahi étaimahi tisiapayare te mávasa ema Viya. Tínapucayarehi ticaitsiva eta veche máteji, máepenacacayarehi éta. ⁵¹ Énerichuvare nuvaraha níminecapáequenehahéyare eta juca tayumurevainihi: Vahi vámutuimahi vépenayare viti vítareruanáichaha. Ticaitsivayaresera eta viáquehe, víti éna ena náepenaqueneanaripahi. ⁵² Ticaema eta chujare, tíchuhahavinapa viti véhicanahi ema Cristo. Tíjuhúchavainapa eta táitsivachiravainapa eta viáquehe viti vítareruanáichaha, tacutiyarechucha viúmatsisina. Tíjuhúchavainavarepa téchepucanayare ena náepenaqueneana, máepenacacainavarepa éna. ⁵³ Taicha tatuparahahi eta viáquehe ticaitsivayare, máepenacacainapa. Máichecuaraquirenapa eta vítaresiraya. ⁵⁴ Te tamutupa eta táitsivachiravayare eta viáquehe, títauchavainavarepa eta tametarapianahi eta Sagrada Escritura: “Ema Viáquenu macaepahaipa eta vépeniraini”. ⁵⁵ ¡Vaipa tápicacarehi viyehe eta vépenirapapuca, taicha vahi vánasimahi vépena! ¡Yátupihi eta véchepusiraya te vécarí! ⁵⁶ Eta tacahe, vihasulupayacha ema Viya, taicha éma ticatiuchahaviyare tayehe eta vépenira. Tájina vahi vémitiequenémahi, véchepucayarehisera máichavenehi ema Viáquenu Jesucristo. Tásiha, te jena sácheyare, vaipa

vicapecaturaimahi. Váipavare vicaicuñaimahi táicha. Vaipa vépenaimahi.

⁵⁸ Táitusiava, eti némunaruqueneanahi nuparape-naveana, ímiyanavachucha eta étumechiravaina tayehe eta juca véhiruhi. Vahi tacuequequérecava eta epanereruana. Ecaemataneacaquenena yátupina ema Viáquenu, taicha écharichuhi éti vahi támapurujimahi eta ecaemataneasirahi éma.

Eta nanaquiruvanayare

16 Étasera eta juca enaquiquisiravayare eta nayeheyare ena vichamuriana ticavasanahi te Jerusalén, étarichu éhicayare eta nímitusiravacahi ena vichamuriana ticavasanahi te avasareana eta táichapevahi eta departamento eta Galacia. ² Puiti, nuvaraha nutuparacaheyare: Te lumincumuhuana, íputsisinavayarepahi, émanapachu eta manaquiruvanayare. Étiserá échinavahi áyanahipuca jácani evachasanahi te semanamuhuana. Iúnasinávapaipa apaesa tacuijapa étaparacaimahi te nítecapauchahepa. ³ Te nítecapapa eta ara eyehe, vévatacapa ena enerejiruanahi éti nayana te Jerusalén. Éna tiámanayare eta enaquiruvanahi éti. Níjaracayaresera eta nucartane eta náimeraquiyparepahi. ⁴ Téheserapuca nútinapaichu návaraha nuyana apaesa nútinapaipa nácáchanenupahi ena vanairucanayare.

Ema Pablo mavarahapa tiyanaya máejirapanavacaya

⁵ Eta nítesirayare, nuvaraha nétavajicayarepahi te avasareana tayeheana provincia eta Macedonia, nítecapirainapa eta ara eyehe. ⁶ Nuvaraha nunasipanayare eta eyehe. Tijuricati nucuchapa eta táetavisirahavina eta muracana técaticava. Tijuricati ímicatacunupahi éti apanava eta nímiyaniravayare nupaica. ⁷ Taicha vahi návarahahini ánipinarichuhini eta néjirairaheyare. Nuvarahahi nunasipanayare. Émapasera téchanuyare ema Viáquenu. ⁸ Nuvarahahivaresera nunasipananumayare ani te juca Efeso. Tiámainucava te táetavicavapa eta piesta ticaijare Pentecostés, nútijapainapa. ⁹ Taicha nuvarahahi nucamapuravanumayare nucametarairu taicha camurianahi ena tivarahani tisamararacanuana. Énerichuwaresera nararihivare camuriana ena viánaranahi.

¹⁰ Nutuparacaheya, te máitecapauchahepa ema Timoteo, tauri eta ejacapiraina. Échapajirisinanuyare, taicha émarichuhi nucutiquenahi eta vicaemataneasirahi ema Viáquenu. ¹¹ Nutuparacahehare nacuija nacuepuru éma. Ímicatacasera eta mapaisirayare éma apaesa máitecapauchanúvane, émapaicha nucucha-

pahi nútí, énapa ena apamuriana nuchamuriana te juca.

¹² Nuvarahahivaréni mayanahini ema vichamuri Apolo eta ara eyehe, máehicavacahini ena tiámanahi eta nucartane. Váhisera máisapavahini mayanahini puiti. Téhenarínevare apahenavare, mayanapa.

Táichecuaqui eta macartane ema Pablo

¹³ Ecuneuchava yátupina. Túmehénahi tayehe eta juca véhiruhi. Yátupina eta éjairavacáina. Vahi ecupica eta vicatajivairanahi. ¹⁴ Eta émunaraivayare yátupina táuchurena te esamureana, étaina táemesiava tamutu jácani íchaqueneanayare.

¹⁵ Puiti nuvaraha némechahe ena títapucanahi téhicana ema Viáquenu te avasare Corinto, ema Estéfanos, esu mayena, énapa ena machichanaveana. Ichapemurihi eta náijarasiravahi eta náitátirahi ena apamuriana vichamurianahi. ¹⁶ Puiti nuvaraha epicau-chavaca esuapavaca ena nani. Énerichuvare epicau-chavare esuapa ena apamuriana tímicatachavianahi eta vicaemataneasirahi ema Viáquenu.

¹⁷ Ichaperinehivare eta núrismurevahi puiti eta náitecapauchiranuhi ema Estéfanos, ema Fortunato, émapa ema Acaico. Tímicutijiricavainehi ámutuhini ítecapauchanuhini éti eta nímairavacahi ena nani mapanana tiásihanahi eta ara eyehe. ¹⁸ Téchararahainehi eta nusamure, túmenuinevare eta nusamiravahi. Ene ecaheyare éti eta táetumechiravayare eta esamureana eta ímairainahi ena nani mapanaqueneana te nachavapa eta eyehe. Epicau-chavare ena nani, émunasinavayare.

¹⁹ Téchajicaheana namutu ena vichamuriana ticavasanahi tayehe eta avasareana te juca Asia. Téchajichevare ema Aquila ésupa esu Priscila, énapa namutu ena tíurujiricavanahi te napena, taicha énarichuhi vicutiqueneanahivare eta véhisirahi ema Viáquenu. Te iúrujicavapa, ejupacacayare éti, táicutiarainahi eta émunajirisiracacahi.

²¹ Nuti Pablo eta nímiamaresirahi eta néchajiriruva eta eyehe, nútijacaruvapa nájucha eta táichecua-raquihi eta nucartane.

²² Nácanisera máesacharahanahi ema Viáquenu náimainavapainepa éna eta náicuñayare te machavapa. ¡Tata Viáquenu, pítecávanéni!

²³ Nuyaseuchaheparaca me Viáquenu Jesucristo táetaviuchahíni eta iúricacarevaya máicha. ²⁴ Nuvaraha ejacapaini ámutu eta námunasiráhevachahi máichavenehi ema Viáquenu Jesucristo. Tamutupa eta néchajiriruvanahi eyehe.

2 Corintios

1 Nuti Pablo, mayehenuhi apóstole ema Jesucristo. Manerejirunuichuhi ema Tata Vicaiyaquene, mavarairahi nímitucaya ena achaneana eta máechajiruvana éma. Puiti juca nucartane, nápechava nucajurehe núti, émapa ema viparape Timoteo. Véchajicahehi emutu eti machaneranahehi ema Viya ecavasanahi tayehe eta avasare Corinto, énapa namutu ena vichamurianahi machaneranahehi ema Viya ticavasanahi te avasareana tayehe eta departamento Acaya. ² Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Nájaracahehini eta táurivaina eta epanereruana.

Tétavicavahi eta macurisamurechirahavi ema Viya, macaepahairahi eta vicatajivairanahi

³ Núti nuvaraha nucunachaparaca ema Viya Macaiyaquene ema Viáquenu Jesucristo. Taicha éma, Vicaiyaquenehivare víti. Tétavicavahi eta majapanuirahavihi, tétavicavahivare eta macurisamurechirahavihi. ⁴ Puiti éma, ticurisamurerechahavihi tayehe tamutu eta viátajivana, apaesa viratahahivaréni víti apanava vicurisamurechavachahivaréni nácani ticatajivanahehi, tacutihi eta macurisamurechirahavihi víti ema Viya. ⁵ Tayanapanehipuca ichapepuca eta vicatajivairahi eta véhisirahi ema Cristo, táetaviuchaquenehivare eta táichapevahi eta macurisamurechirahavihi ema Espíritu Santo máijararuhavihi ema Cristo. ⁶ Yá-tupiquene ichape eta vicatajivairahi táichavenehi eta vímitusirahehi eta máechajiruvana ema Viya, vivarairahi vétumechaheyare apaesa iúchucuhayare. Émapasera ema Viya ticurisamurechahavipa tayehe eta vicamichirahi tamutu. Taicha éma, mavarahahi ímatiequenehayare eta macurisamurechirahe éti apanava te tamutu jácani ecatajivairana. ⁷ Víti vicasiñavahi eyehe eta ecamichirayare taicha vicuticacahi eta vicatajivairahi étapa eta macurisamurechirahavihi vimutu.

Eta macatajivairana ema Pablo

⁸ Nuparapenaveana, nuvarahavare numetacahe eta víchararacavahi víti tayehe eta jena avasare departamento Asia. Ichapemurihi eta vicatajivairahi. Tiánehipa véchurihayaréni eta vitumevanahi tayehe eta vicamichirana tamutu. Váipavare vémeteacahini viúchucuhahini tayehe eta vépenira. ⁹ Vicutiripa nácani nacaparusana te navahu ena aquenucana. Ema Viya máisapapa eta juca, mavarairahi vaipa vítijivaimahi vicasiñava. Mavarahapa yátupina eta vicasiñairayarehi eta

mayehe, taicha éma, macarichu maratahahi máimichava ticaitarechahavi te vépenapapuca. ¹⁰ Cape juca ticatiuchahaviripa tayehe eta vépenirayarehini. Puíticha ticatiuchahavirichaha. Tétavicavainehivare eta vicasiñavairahi eta mayehe, vahi tísapahavimahi vépenávanehíni. ¹¹ Tacahe, nuvaraha ímicatacavahini eyujarauchahavini víti. Éti, németeaca camurihénapa éti eyujarauchahaviyare, camuriheyareva éti ehasulupayachainapa ema Viya eta máimianirava ticatiuchahavi.

Ema Pablo vahi máitujicavavanehini mayanahini tayehe eta avasare Corinto

¹² Visamavahisera víti eta vicunachiravahi eta tájijnairahi víchiravainahini, váhivare apiapiemahavinahini. Sánturuhahaviripa te nataracu namutu ena achaneana, evetijipa éti. Émahisera ema Viya tímicatacavahi táuririhi eta vítaresirahi táichavenehi eta máemunasirahavihi. Vahi vítijiriruvainahini eta vítupajjiasiravanahi. ¹³ Puiti, tacahehi eta nucartaneana. Vahi apiapiemanuinahehi. Váhivare tácajerahini eta ímatiequenehairayare. ¹⁴ Éti, ímatiequenehapaipa eta nímiturapiana. Puiti nuvaraha esamayareva eta nuconsejapiana apaesa vácuticaca vivapinacaca vítjicaca te jena sache te machavapa ema Viáquenu Jesucristo.

¹⁵ Tacahe puiti, eta táinapuiruhi nupanereruhi, nuvarahahi néjirapanaheyarehini, nétavauchiraheyarehini te nuyanirayarehi tayehe eta departamento Macedonia. Tásiha, te nuchavayarepaini, nápechavavare néjirapanáhe, apiheyarehini eta nucurisamurechiraheyarehini. Tacahe, te tamutuyarepa, ímicatacunupapucaini éti eta nuyanirayarevare tayehe eta departamento Judea. ¹⁷ Apanaripahisera eta nupanereruhi. Vuíchaha néjirapanahémahi. Váhivare nuvayucahemahi eta nuvarairahi néjirapanahe. Nítauchayare núti. Vahi ímijachaimahi éti nucuti mácani achane te mapanerechahi, váhisera máitauchahini. ¹⁸ Núti nucasiñavahi eta máimatiranuhi ema Viya. Vahi nuvayuacahemahi éti. ¹⁹ Cape juca, te nímitucahepa núti, émapa ema Silvano, émapa ema Timoteo, vímimatichahehi ema Jesucristo, Machichaquenehi ema Viya. Puiti ímatipa éma, tájinaquenehi mavayuaravaina éma. Núti apanava, tájina nuvayuacahini taicha mavanaranuhi núti. ²⁰ Máichavenehi éma, títauchavahi tamutu eta mapanereruanahi ema Viya. Víti, te visamavaipa eta máijararuvanahehi ema Viya, vijirauchahi éma. Vicahehi: ¡Amén! ¡Vicasíñava vímahainapa eta máitauchirainapa! ²¹ Émaripa ema Viya témura-

cachahavihi eta viúrujasirahi ema Cristo, víti étipa éti. Timarcachahaviripahivare éma, táicutiarahi eta machichairahavipa, taicha manerejiruhavihi. Tíjaracahaviripavare eta mávahásirahavihi ema Espíritu Santo te visamureana, máitametasirahaviparaca títauchavaya tamutu eta viúricacareyarehi.

²³ Núti, vuíchaha nítecaimahi eta ara eyehe, taicha némunacahehi, numavarairahi nucarameacahehine éti. Ema Viya tímatinuhi eta nutupiruvairahi. ²⁴ Vahi nuvaraha nupamicache eta esuapiranuinahini nápepejicahini, taicha éti muracaheripahi eta esuapirahi eta juca véhiruhi. Nuvarahahisera nímicatacahe eta tápajusiravaina eta iúrisamurevayare éti.

2 Eta tacahe, vuíchaha nítecaimahi. Taicha vahi návarahahini nápechavahini némecatajivachahini te esamureana eta néjirairaheyare. ² Taicha te ecatisamureva nícha, tímaticaréipahi nájina ticurisamurechanuyarehi. ³ Tacahe, eta táitsivahi eta néjirapanairaha, nucajurehepa eta táinapuiru nucartane, nuvarairahi ésamiricavayare apaesa vaipa nucatisamurevaimahi icha éti. Nuvarahahisera núrisamurehine ícha. Tacahe, németeaca étiripa iúrisamurehivaréni ámutu eta nuyehé. ⁴ Jéhevare, te jena sache, te nucajurehepa eta nucartane, ichapemurihi eta nupanereresirahi, nucatisamurevahivare. Níyahacavahi ichape. Váhiserá étaparacainahini nuvaraha némecatajivachahini te esamureana. Núti nuvarahahi ímatihini eta táichapevahi eta némunasirahehi.

Ema Pablo máijaracahi eta maconsejarapi eta naperdonachirayarehi ema téjecapavahi

⁵ Tiuri puiti, ema maca téjecapavahi máichahi eta pecatu, tétavicaavahi eta ecatisamurevahi máicha. Núti apanavare nucatisamurevahivare. Váhiserá táurica vivayuchava eta vémecharesira éma. Puiti, tarataharipa eta ecuchusirahi te emuri éti. ⁷ Puiti táuricapa eperdonachayare eta máichavaquenevahi. Ecurisamurechainapa éma apaesa vahi macuvayuchava eta macatisamurevahi, máinajicavapuca. ⁸ Nuvaraha puiti iápechavahini ímereco eta émunasirasamihi éma. Ejacapavare te emuri. ⁹ Eta tacahe, nucajurehi cape juca, nuvarairahivare nucaicutiaraha te esuapayarepuca eta nuanairipianahi. ¹⁰ Núti nuperdonacharipa ema maca achane te máijare ema Cristo. Táuricapa eperdonachayareva, ecutiranuyare eta nuperdonachirahi. ¹¹ Taicha te váhipuca viperdonachacacahi, tíñehicarehi macamapurava ema Satanás, taicha tímaticarehi eta mavarairahi tímiáquipaicahaviyare.

Vaipa máitucacarahini ema Pablo

¹² Núti, te nítecapapa eta te avasare Troas, ními-jachahi nuchimaphini ema nuparape Tito. Tétavicaavahi eta néñamiravahi, nuvarairahi néchayarehi tájahapuca eta ícharacavahi éti. Yátupihinéni natiarihini ena camuriqueneana ena tivarahanahi tisamana eta nímituresirahi eta máimiturapiana ema Jesucristo.

Étasera eta néñamiravahi eta eyehe émapa ema Tito, nucametavavarepa nayehe ena vichamuriana. Nuyanavarepa tayehe eta juca departamento Macedonia, nutanusirayare éma.

Ema Viya, tétavicaavahi eta majaneasiravacahi ena mavanaranahi

¹⁴ Tásiha, tétavicaavahi eta núrisamurevahi eta nuchimahirahi ema Tito eta te juca. Puiti, ichape eta nuhasulupayachirahi ema Viya eta majaneasirahaviparaca, tíjaracahavivare eta máitupajijiasirava eta viratahairahi vicanara tamutu, táichavenehi eta mávahásirahavihi ema Jesucristo. Tituparacahavivare vicametarairuyarehi eta máimiturapiana, mavarairahi tíuriyarehi eta nasamiraya namutu ena achaneana tacuti eta najiusira jácani táijiyequeneana. ¹⁵ Taicha eta vicametarairuirahi tímicutijiricavahi eta táijiyeva eta incienso, eta máijarasirahi ema Cristo te mamirahu ema Maiya. Tacapusisiacahi namutu ena tisamahaviana. Natiarihi ena masuapajirairahana, náemituaruanayare taicha namavarairahi nasuapahini. Tijechehi eta najiusira tacutihi eta máquehe mácani máepenaquenehi. Natiarihivare ena tisuapanapahi náuchucureanayarehi; ticutirinehi najiucahini eta táijiyequene. ¡Tétavicaavahi eta néñamiravahi eta vicauparahairahi!

¹⁷ Viratahasera vítaucha eta vituparahahi. Taicha víti, eta vicametarairuira, tájina vahi vicavacharapi eta máechajiriruva ema Viya, vétupiripicapahipucaini, vivarairainahini tajamurachacarehini, tácutihini eta náichira ena apamuriana tímijachavanahi yátupiqueneana mavanerua ena Viya. Vítisera yátupiquenehavihi mavanarahavihi ema Viya; vitupiruvahi eta vicametarairuira eta máimiturapi ema Cristo.

Viti vicametarairurahiana eta téqueneha matratune ema Viya

3 Vahi nuvaraha ímijachahavi eta vicunachiravainahini puiti. Váhivare vácutihini ena nácani apamuriana tímiturahianahíji, tipairiricana tíamanahi eta carta táechajisihahi eta nacunachacarevahi. Tájinavare vímatiyahini viyaseacahehine víti eta carta vímeraquinapahini táechajisihahini eta ecunachirahavinahini.

² Étisera, tájina véñamiravaimahi eyehe. Taicha tímaticarehi te avasareana eta táurivahi eta ítaresirana éti, táichavenehi eta vinacasamurechirahehi eta máechajiriruva ema Viya. Eta juca tímereuchahavi víti eta yátupirahi mavanarahavianahi ema Viya. Éti, ecutihi eta carta vímeraquianapahi. Émaquene ema Cristo, ema íájuchahi, taicha tíjaracahehi ema Espíritu Santo máitsivachaheyarehi eta ítaresirana, táuriyarehi eta esamureana. Arairuripa eta ítaresirahi. Puiti juca eta ítaresirahi, tájinapa étaparacaina esuapahini eta vanairipiana tacajuquenehi acane te márime tabla.

⁴ Eta tacahe, tájina vahi néñamavaimahi tayehe eta apóstolenuirahi. Nétumechava ichape, taicha nusiñavahi eta manerejirunuirahi ema Cristo, máijarasiranuhivare ema Viya eta máitupajijiasiravana.

⁵ Taicha víti vahi vítijivainahini víjaracava eta vítupajjiasirava. Émaquenehi ema Viya tíjaracahavihi eta vitumevanahi eta vicaemataneasirahi éma. ⁶ Émaquenehi tituparacahavi vicametarairuyarehi eta arairu matratune. Vahi étainahini nupamicaheyare eta esuapirayarehi eta vanairipiana. Taicha eta juca arairu matratune ema Viya, tíjaracahahi emutu ema Espíritu Santo, máitsivachinaheyare eta ítaresirana, arairuina-pa. Étasera eta vanairipi tacarichu táimivanerecahi eta náepeniraya ena téjcapavana.

⁷ Acane, te jena sache te tíúcupaicapa ema Moisés te cerro, mámapahi eta vanairipiana tacajuquenehi te márima tabla. Eta mamira, tétavicavahi eta tarapepesirapahi táichavenehi eta macachanerahi ema Viya. Ena achaneana, vaipa náratamahini náimamaraca eta mamira. Ichapehinéni eta tapicauchacarevahi eta vanairipiana taicha tétavicavahi eta tarapepesirapahi eta mamira ema tíamapahi. Étasera eta mayerevapa, timutserahavapaipahi témitiaca eta tarapepesirahi. Eta vanairipiana, tacarichuhi táimicapacahi nácani téjcapavanahi. ⁸ Étasera eta arairu matratune ema Viya, eta nucametarairuquenehi puiti, tétavicavahi eta tápajusiravahi eta tasuapacarevahi taicha tíamahavihi eta mávahásirahavihi ema Espíritu Santo. ⁹ Yátupihí eta tasuapacarevahi eta vanairipiana, tíapajucavahisera eta tasuapacarevapanahi eta máichuarapi ema Viya, vijacapacarehi mayehe táichavenehi éta. ¹⁰ Yátupi tirapepecahi eta mamira ema tíamapahi eta vanairipiana, váhisera étaparacainahini táurichahavihini. Jéhevarequenehi puiti, tétavicavahi eta víúrivahi maicha ema Espíritu Santo. ¹¹ Eta tarapepesirahi eta mamira ema Moisés, timutserahavapaipahi témitiaca. Eta juca táicutiarahi eta ánipirichuhi eta tasuapacarevayarehi eta mavanairipiana. Étasera eta juca máichuhairahavi ema Viya, tíapajucavahi eta tasuapacarevahi taicha máichecuaraquireyarehi eta víúrivaya táicha.

¹² Étavenehi eta vicasíñavairahi vímahayare eta juca sache vicuchapaquenehi, viti matupararuana vétumechavahi eta vicametarairuirana. ¹³ Váhi vácutihini ema víyarahaini Moisés, tépacamirahavahi te páñome, tíúriyarepa eta náimarasirayarehi ena machamuriana. Váipasare nanecapahini te timutserahavapa eta táemahairapahi eta tarapepesirahi eta mamira, táicutiarahi eta táepahairaya eta tapamisirahavini eta vanairipiana eta vítauchirayarehi. ¹⁴ Puíticha ena nu-janeanana israelítana vahi nácaicutiarahini eta juca. Tacahe, te náechejicuha eta ichasiquene matratune ema Viya tacajuquenehi eta te libro májurehi ema Moisés, vuíchaha nácaicutiarahini. Tímicutijiricaváichucha táepacuchahi eta máepacamirahi ema Moisés. Ticajeraichucha eta nacaicutiarairayarehi. ¹⁶ Mácanisera achane, esenapuca, tíjaracavapa eta máehisirayarehi ema Viáquenu, ichapenapa eta macaicutiarairayare. Tájinapa táepacquiñahaimahi. ¹⁷ Jéhesare, ema Viáquenu tíjaracahavisarepa ema Espíritu Santo. Tásiha, vaipa vipicacaracavahini eta vipauchiraya éma. Yátupina eta vivapinairavahi maicha

ema Espíritu Santo. ¹⁸ Tacahe, vimutu viti véhicanahi ema Viáquenu vicutiripa eta espejo eta tarapepesirahi eta tajaravahi eta sache. Víti, yátupihí vímerecohi eta máurivahi ema Viáquenu. Vaipa vicaepacamirahini. Eta tacahe, víti puiti tíapajucavainapaipa eta vicutirayare ema Viáquenu taicha tíapajucavahi eta majaravahi te visamureana. Étavenehivare eta mávahásirahavihi ema Espíritu Santo máijjararuihi ema Viáquenu.

4 Eta tacahe, váhiquene viyacujiequenehavaimahi eta vicametarairuira, taicha ema Viya tímechahavihi eta máemunaraiva eta matuparasirahavihi eta juca vicaemataneasirayarehi éma. ² Víti, tájina vímatiyahini viyumurujiricahini eta víchaqueneana. Váhivare víchahini eta titsirihacareana. Váhivare víútserurupinahipucaini vihapapicahipucaini eta máimiturapiana ema Viya, taicha vivaraha vicurismurechaya éma. Tamutuhi véchajisihahi eta yátupiqueneana. Jéhesare, vivaraha nacaicutiarahini ena achaneana eta vímiturapianahi tásihaqueneanahi me Viya. ³ Nararihisamisera nácani vahi nacaicutiarahini eta vímiturapiana, taicha ema Váinaraji, tacaiaquenehi eta juca apaquehe, éma tépacacquiñahavacahi éna. Taicha vahi mávarahahini náimatiequenehahini eta máimiturapiana ema Jesucristo, tétavicavahi eta tajarahiquenérahí taicha émaquenehi macunaquenehi ema Viya. Táitusiava éna, vaipa nácaicutiarahini eta vímiturapi. Náemitiaruanayarehi tayehe eta ecuñaraquí táicha. ⁵ Te vicametarairu víti, vahi vítinahini vicunachavahini, vivarahahini éhichahavi. Vivarahahisera esuapahini ema Jesucristo, ecaquenuyarehivare éma. Víti vanairucahivichucha eta eyehe, taicha vicaemataneacahi ema Jesús. ⁶ Ema Viya, te máepiyacainapa eta juca apaquehe, macavanairipipa tatiarihiyarehi eta tíjarahi, témitiacayarepa eta timapicuquenénihi. Ene macahehi eta viyehe. Tímimaticahávihi eta majaraiva ema Machicha. Tétavicavahi eta tajaravahi te visamureana. Éma, tímimaticahavipaipahi eta máetaviuchaquenehi máurivahi ema Viya.

Puiti eta vítaresirahi, vímerecovaya yátupihí eta vicasíñairahi eta macatiuchirahavipaipa ema Viya

⁷ Eta juca véhiruhi vímiturapianahi, tétavicavahi eta tacunachacarevahi. Vahi vítinahini vicunachacarehini. Taicha viti páureanasami, vicutichucha eta muñeca náipune. Émasera ema Viya máimerecohi eta máitupajjiasiravahi, máijjarasirapa eta tatumevayarehi eta víaquehe. Váhisera vítijivainahini. ⁸ Táichavenehi eta vicametarairuira, tatiarihihi jácani víchavaquenévhí; ticatiuchahavishisera ema Viya apaesa víuchucu-paraca. Ichapevare jácani eta táimipaneresirahavihi; vicasíñavahisera eta majaneasirahavihi ema Viya. ⁹ Tipanjirichavianahi ena víánarana, váhisera tijunijicahavimahi ema Viya eta majaneasirahavihi. Tayanapanenachururupaicahavihini, émasera ema Viya vahi máisapaimahi ticapacahaviana. ¹⁰ Tamutu te jácani vicaijuheanapahi, natiarihi ena navaraha ticapacahaviana táichavenehi eta véhisirahi ema Jesús. Tamutu sácheana víamarairicapahi eta vépenira, vicutihí ema

Jesús eta napanereuchirahi éma. Émarichuhisera ema Jesús máechepurequenehi. Éma máimerecahi eta máitupajijiasirava eta macuchucirahavipaipahi tayehe tamutu eta víchararacavaqueneanahi.

¹² Tayanapane víti viámarairicahi eta vépenira táichavenehi eta vímituresirahi, táitsivahisera ejacapahi éti eta tamaichecuaraquireyarehi eta ítaresira táichavenehi eta esuapirahavihi. ¹³ Ema víyarahaini David, ani macahehi eta máechajiriruvana eta te Salmo: “Núti nucasiñavahi mayehe ema Viya, tásiha vahi nupicacaracavahini eta néchajisirayare mayehe” macahepa. Énerichuhi vicahehi víti puiti. Vicasíñavahi mayehe eta macatiuchirahaviyare. Táitusiava, vahi vipicacaracavaimahi eta vímituresiraya. ¹⁴ Taicha véchahi eta macaechepusirahaviyarehi ema Viya, vicutiyarehi eta macaechepusirahi ema Machicha Jesús te máecari. Tásiha, étamurihavinapa, éti apanavare, eta vímeresiravayare te mamirahu éma. ¹⁵ Tamutu eta juca víchavaquenevanahi, támahi eta iúrivayarehi. Vicamichahi tamutu, taicha vivarahahi eti esimutuqueneanahi ejacpahini eta iúrivayare máijararuhehi ema Viya, apaesa ámutuhivaréni eti esimutuqueneanahi ehasulupayachahini éma, ecunachahivaréni.

¹⁶ Eta tacahe, váiparinehi vicainajiruvaimahi. Tayanapanepuca tivitaji eta viáquehe, étasera eta viáchaneva tétavicavaichucha eta tatumeva tamutu sácheana.

¹⁷ Taicha eta viátajivanahi puiti juca vítaresiraichaha, vahi táunacacare. Tétaticavánachucha, tiánucuhávanepa. Énerichuvare, jararihi eta táitsivahi, taicha vijacapahi eta táetaviuchiravaya eta viúricacarevayare. Puiti tájina tácutimahi eta viúricacarevaya, taicha máichecuaraquirénapa éta. ¹⁸ Eta tacahe, vahi vipicacaracavaimahi eta viátajivanahi, taicha vahi táunacacarehini. Vicasíñavahisera mayehe ema Viya eta máimisiapirahaviya eta te mávasa anuma. Tásiha, máichecuaraquirénapa eta viúricacarevaya eta viávihairaya tayehe.

5 Vimutuhi vímati te náquipaicapuca eta viáquehe, tépenayarehi éta. Taicha éta, vahi muracainahini. Tacutihi te viáquipaica eta peti. Máejerarehi vicha taicha vahi muracainahini. Jararihisera eta viáquehe-yarehi te anuma vícuchihi mayehe ema Viya. Éta, nájinapa tiratahaimahi tiáquipaica taicha máepiyaruhi éma. ² Puiti, tétavicavahi eta tacatajivairahi eta viáquehe. Tamutuhi tasama. Eta tacahe, vivarahainehi táijahúchavahini tacaitsivahini eta viáqueheyare te anuma. ³ Taicha vicamunurinehi eta arairu viáquehe, apaesa vahi vitsirihaimahi eta vicachanerayare ema Viáquenu taicha vicutiyare éma. ⁴ Puiti eta juca vítaresiraichaha, tamutuhi tasama eta viáquehe. Ichapemurihi eta táimipaneresirahavihi. Váhisera étainahini eta vivarairainahini vépenávane, étasera vivarairahi tacaitsivahini eta viáquehe arairuinahini. ⁵ Tacahe, ema Viya tamutuhi máicucha eta táichararacavayare te apana vítaresira. Puiti tíjaracahavivare ema Espíritu Santo. Émapa títametacahaviparaca eta vijacapirayare eta vícuchianahi.

⁶ Tacahe, núti vahi nupicahini eta népenirayarepuca, taicha ichape eta nucasiñavairahi mayehe ema Viya. Tájina vahi néñamavaimahi mayehe eta máijarasiranuinapa eta arairu náquehe, tayanapane vuíchaha nímahahini. Eta táimiyansiravaya eta nítaresirahi, nuyerehi eta nícuchihi náqueheyare. ⁸ Nuvarahainehisera táijahúchavahini tacaitsivahini eta juca náquehe, nuyanasarepaini nucachanehini ema Viáquenu. ⁹ Eta tacahe, vivaraha ichapemurihi eta vicurismurechirahi eta vícaemataneasira ema Viáquenu puiti juca vítaresiraichaha. Tásiha éma, tiúrisamureyare eta viyehe te vímerecavainapa te mamirahu. ¹⁰ Taicha vimutu vímerecavayare te mamirahu ema Cristo te mávacureyare. Ánaqui tímaticareyare tamutu eta víchaqueneanapachuhi puiti juca vítaresiraichaha, te víchahipuca eta táuriqueneana, te étahipuca eta tamauriqueneana. Te víchahipuca eta táuriqueneana, vijacapainapa eta vícuchianapahi.

Ema Viya mavaraha vipauchayarehi éma, macaepahairaya eta vipicacarasiravahi eta vícuñayare

¹¹ Nútisera, ichape eta nupicauchirahi ema Viya. Eta tacahe, nímiyanava numetacavacahi ena achaneana eta mayehe, taicha nuvarahahi námutihini napicau-chahivaréni éma. Émasera, tétavicavahi eta máimati-ranuhi táurivahi eta nupanereruana eta nucaemataneasirahi éma. Puiti nuvaraha échahivaréni éti apanava eta táurivahi eta nupanereruana. ¹² Tacahe, eta juca néchajisihahi, vahi nútinahini nucunachavahini. Nuvarahahisera nucunachacarehini eta eyehe, apaesa áratahahini ecamatinaca ena tímijachavanahi náimatiequeneha. Váhisera yátupinahini táuchurequenénahini te nasamureana. ¹³ Éna, tépiyaequenehanuanahi, máurishinuhíji náicha, taicha ichape eta nuvapinairavahi eta nucaemataneasirahi ema Viya. Tiúrihisera eta nuchuti. Nuvarahaparaca ichapenaini eta iúricacarevaina éti. ¹⁴ Núti nímatihí eta táetaviuchirahi eta máemunasirahavihi ema Cristo, taicha máepeninahavihi te crusu. Vimutu viti achaneana vituparahaichu vépenirapachu. Mavachachapasera tamutu ema Cristo. Eta tacahe, tatuparaca vítsirijicava vícaemataneaca éma. Tásiha puiti, viti machanerahavipa. Vaipa vítijiricavaimahi. Émapa téchahi eta vítaresira, taicha eta machavirahi títareca. ¹⁶ Eta tacahe, viti véhicanaripa ema Cristo, étainapa vipanerechayare eta vítsivachiraipa eta vítaresira. Vaipa véhicaimahi eta apana panereruca tayeheanahi te juca apaquehe. Étaripa cape juca viásinequenehi váhichu visuapapajicahini ema Cristo, vímijacharichucha éma vicutihí viti achaneanasami. Puítisera vaipa tácahehi eta vipanereruana. Visuapahi émairahi Machichaquenehi ema Viya. ¹⁷ Puítiripa viti viúrujiacanahi ema Cristo, apanahaviripa. Vínajicaipa eta viyeherepiníhi tamauriqueneana. Tamutupa arairuhi puiti eta viyeheriana.

¹⁸ Ema Viya, tétavicavahi eta máurivahi eta viyehe. Éma, mavarahahi vipauchayarehi éma. Mavarahavivare macaepahayarehini eta vipicacarasiravahi eta

vícuñayare táichavenehi eta vipecaturana. Tásiha, mavaneca ema Machicha Jesucristo apaesa macaepahayarehi eta vipecaturana vimutu viti vicasiflavana eta mayehe, vaipa máecharairicaimahi. Tásiha, tájina eta vipicacarasiravaimahi eta vícuñainahini. Tásiha puiti, ema Viya tituparacahavipa viti véhicanahi eta víchuhairavacayare namutu ena apamuriana achaneana, apaesa éna apanava nacasiflavavare eta mayehe, váipavare tipicacacavanaimahi eta mayehe. ²⁰ Tacahe, víti mavaneruhavihi ema Cristo víchuhavacayarehi namutu. Tímicutijiricavaipa émaquenénahini máechajicavacahini ema Viya. Puiti viyaseacavacahi namutu nacasiflava mayehe ema Jesucristo; váipavare tipicacacavanayarehini eta náicuñainahini náicuchiyaréni. ²¹ Ema Cristo, tájina mapecaturainahini. Étasera mavarairahi ema Viya víuchucuhayare víti, émapa ema Cristo tamuriacahi eta vipecaturana. Puiti, tájinasarepa víchiravaimahi, tájinavarepa viviurevaina te mamirahu ema Viya vimutu viti víurujiaruanahi ema Cristo.

6 Tásiha, núti mavanaranuhi ema Viya, nuyaseacahereyare ímianava tauri eta éhisirahi éma. Vahi ecuemepurureca eta máemunasirahehi, majacapirahivare. ² (Taicha ani macahehi eta máechajiriruvahi tayehe eta Sagrada Escritura: “Nuchicha, tétavícava eta pisamacarevayare eta nuyehe te pipiaracanu. Nucatiuchavivaneyare” macahepa. Jéhesare, puiti juca sache ticamapuracarehi eta epiarasirayarehi éma, ejacapacarechaha me Viya mapurare achanehechaha. Esamacarechaha puiti, taicha ema Viya mavaraha ticuchuhaheyare eta te ícuñayaréni taicha eta epecaturana.)

³ Núti nuvaraha nacuija nacaecahini eta vémata-nerepi viti apóstoleana. Eta tacahe, nupamicavahi núti tíuriyare eta nuyeherepiana. ⁴ Eta tacahe, ichape eta néchapiravahi te nímitureca. Nímerecavahi yátupi eta mavanarairanuhi ema Viya. Ichapemuri eta nucamichirahi eta nucatajivairana, eta néchuriasirana, éropa eta tacajeravana eta nítátijirisirava. ⁵ Vahi nucaínajiruvaimahi táichavene eta náestasiranuhi ena nánarana, náeratasiranuhivare, tájinanéni viviurevainahini. Te apana avasareana timurijiacanuanahi taicha eta nasemanevahi. Eta nítátijirisiravahi, ichape eta tamuracavahi eta nucaematanerahi. Camurihivare eta numacaimasiravahi. Camurihivare eta nécuava eta nupaisirana. ⁶ Éti ímatinuhi yátupihí eta táurivahi eta nítaresira. Ímatinuhivare eta nucaimitucasihi mayehe ema Jesucristo. Táichavenehi eta mávahásiranuhi ema Espíritu Santo, nucayehehi eta paciencia nayehe namutu, nujapanurahivare. Yátupiquenehi eta némunaraivahi. ⁷ Nímitucahi eta yátupihí máimiturapiana ema Viáquenu. Énerichuvare ema Viya tímicitacanuhi tayehe eta máitupajijiasiravahi te tamutu eta nucametarairuirahi eta máechajiriruvahi, éropa eta nucatiuchirahi eta véhiruhi. ⁸ Eta nupaisirapaipahi, natiaríhihi ena ticunachanuanahi, tíuriemanahi eta nuyehere. Natiaríhivare ena tépurunuanahi, tíñemahivare eta nacayemaquene eta nuyehe. Natiaríhivare ena tímijarechanuana tépiyahirahi. Nutupiruvahisera

tamutu eta nítaresirahi. ⁹ Natiaríhivare ena vahi tisuapanuanaimahi, taicha tépuruanahi eta apóstolenuirahi. Natiaríhisamivaresera ena tisuapanuana taicha tisamairicanuanahi eta yátupirahi eta nímiturapiana. Tatiaríhivare te tiánehípa eta népenirayaréni. Núchucahisera, maicha ema Viya. Natiaríhivare ena téhanacanuana muraca. Váhiserá máisapavaca ema Viya eta nacapasiranuinahini. ¹⁰ Tatiaríhivare te nucatisamurevahi ichape. Nútisera nucurisarimurereacavahi tamutu sácheana. Páurenuhi eta náimairanuhi ena achaneana. Ichapemurianahisera ena níjararuanahi eta tacaimahaquenehi eta náchanevana. Ani, tájina nímahaquenéna. Téhesera apana nítaresira, tétavícavaya eta nucaimahaqueneraya.

¹¹ Nuparapenaveana némunaruqueneana, nutupiruvahi te nusamure eta juca nuconsejarapianahi eyehe. ¹² Vahi nuvaraha ecuimijachahini níñajiacache eta némunasirahehi. Németeacahisera éti ínajiicanuhi eta émunasiranuhi. ¹³ Éti, ecutihí nuchichanavehénahini eta némunasirahehi. Nuvaraha tachavahini eta émunasiranuhi, esuapiranuhivaréni.

Viti, tiávahácavahi ema Viya taicha machanerahavihi

¹⁴ Nuparapenaveana, vahi ecuávahácavaca nácani máehicarahanahi ema Viáquenu. Étarípa te arayenahereyare, vahi ecuveha nácani máehicarahanahi. Taicha téjecacayarehi eta panererucana. Viti véhicanahi ema Viáquenu, tatupiruvahi eta vipanereru. Énasera ena máehicarahanahi, tavayuacahi eta tauriqueneana. Víti víuricahi eta tíjarahí; énasera náuricahi eta tímápicu. ¹⁵ Taicha víti, mávaháruhavihi ema Cristo. Váiparinehi vicachanémahi ema Váinarají. Tásiha, te víávahácavaca ena masuapajirairahana, tíápitavairicanahi eta véhisirahi ema Viáquenu. ¹⁶ Énerichuvare, tiávahácavahi ema Viya, émarípa ema Vicaiyaquene. Taicha ani macahehi: “Núti návahácavacaya ena téhicanuanahi. Néchavacayareva éna, taicha éna yátupiqueneanahi nuchaneranahi” macahepa. Eta tacahe, váhiquene táuricahini eta vicasipiravahini eta nayehe ena vahi machanerainahini ema Viya, taicha apanahi ema nasiñarajíhi. ¹⁷ Taicha acane macavanairípa ema Viya, ani macahehi: “Érajícava eta te namuri ena vahi nuchanerainahina, machu napareacahe eta namaeperajivana éna. Tacahe, éti nujacapaheyarehi. ¹⁸ Núti yátupiquenénuyarehi Ecaiyaquenuhi. Éti nuchichanaveanahi” macahepa ema Viya máitupajijihaquenehi.

7 Tacahe, némunaruqueneana nuparapenaveana, vahi távarahahini víñajicavahini tayehe eta juca vicuchapaquenehi puiti. Tacahe, vépachinachayarehi tamutu eta víáquehe éropa eta víáchaneva. Víjaracavayarehi tamutu te visamureana me Viya taicha eta vipicauchirahi éma.

Eta máurisamurevahi ema Pablo táurivaipa eta náitaresira ena machamuriana

² Nuparapenaveana, nuvaraha ímiyanavahini esuapanuhini. Taicha nájinahi te etaracu éti nacatajivahini náinajicavahini níchavenénahini núti. Nájinavare nucaetemaquenénahini, nímipananájicavacahipucaini. ³ Váhivare nuvaraha nucajachahe puiti. Nutupiruvahi eta numetasirahehi cape juca: “Tétavica-vahi eta nucasamurerahehi. Tájina ticamitiscanui-mahi, tayanapanepuca népena”. ⁴ Ichape eta nucasiñavairahi eta eyehe, nuncunachahehi eta ecurisamurechiranuhi. Tayanapanehinéni ichape eta nucatajivairahi, tétavica-vahisera eta étumechiranuhi ecurisamurechiranuhi.

⁵ Étaripa te nítecapapa tayehe eta Macedonia, tájina nunarasirainahini. Ichape eta nucatajivairahi naicha ena ticatianacananahi. Ichaperinehivare eta néñamiravahi eta eyehe. ⁶ Émasera ema Viya tétavica-vahi eta máetumeraivahi nayehe nácani téñamavasamureanahi. Nútiripa nétumechavainehi maicha éma, eta nímairapa máitecapauchiranuhi ema Tito. ⁷ Tavetijipa eta mametasiranupa ema Tito eta ecurisamurechirahinehi éma. Timetacanutvare ichape eta éñamiravahi eta nuyehe; evarairapaicha ímahanu; ichapevare eta evarairahi esuapanu eta étupirisirahi ema maca achane téjecapavahi. ¡Eta juca, tétavica-vainehi eta ecurisamurechiranuhi!

⁸ Ichapehinéni eta táimipaneresirahehi eta nucartane. Nútiripa, ichaperinehivare eta táimipaneresiranuhi nucatisamurevahi te nucajurepa. Némitiscapasera puiti, taicha ánipi eta táimipaneresirahehi. ⁹ Puítisera, tétavica-vainehi eta núrismurevahi ícha, eta táetaviasiraheripahi eta ecatisamurevahi. Eta núrismurevahi, vahi étainahini taicha eta ecatisamurevahi. Núti núrismurevahi taicha títsivachavaipahi eta táurivaipahi eta epanereruana, evarairahi ecurisamurecha ema Viya. Eta tacahe, víti tájina-pa vácayemahini eta eyehe. ¹⁰ Taicha tatiarihihi eta jácani máijjaruhi ema Viya, táimipaneresirahehi, mavarairahi eta éneuchiravaya tayehe eta ejacpiravahi apaesa macuchucuhahe. Eta ecatisamurevahi tiámahi eta iúricacarevaya. Énasera ena apamuriana achaneana tayehe eta juca apaquehe, yátupi ticatisamurevanahi, váhisera náeneuchavahini eta me Viya. Éta, tiáma eta náepenira. ¹¹ Étisera, ¡tétavica-vahi eta iúrivahi tásiha-quehenehi eta ecatisamurevairahi! Enevanerinehi ínajicahi eta éjecapiravahi taicha evarahahi ímiyanava ecurisamurecha ema Viya. Ichaperinehi eta nuncunachirahehi taicha epicauchainehi ema Viya tayehe eta juca íchavaquenévahi. Evarahainehi níjahúchavahini nítecahinehi eta eyehe nímicatacahehinehi. Étisera enevanepa ecurujicacahi taicha eta esemanevahi maicha ema téjecapavahi te etaracu. Enevanepa émecharecapa éma. Ímerecavahi eta tamajinairahi éjecapiravainahini éti. ¹² Núti, te nucajurehénapa eta tánapure nucartane, vahi émainahíni máimipanererecanuhini ema téjecapavahi, váhivare émainahíni máimipanerereca-

nuhini ema maiya, émaripa ema majarareruhi. Íchavenehi éti eta ímipaneresiranuhi te nucajurehénapa, nuvarairahi ímereuchavayarehi eta yátupipapuca eta esuapiranuinahinehi te mavahuana ema Viya. ¹³ Eta tacahe, tétavica-vainehi eta étumechiranuhi núti eta nusamairisirahehi eta esuapiranuipa.

Tavetijipa eta núrismurevapa eta táurivahi eta ejacpirahi ema Tito. Tétavica-vahi eta máurisamurevapai ícha éti eta ésamirisiravaipa. ¹⁴ Váhirichu támapurujihinehi eta nuncunachirahehi mayehe ema Tito eta núrismurevahi ícha éti. Puítiripa, ímereuchavapa yátupihinehi eta ecunachacarevahi. ¹⁵ Éma, tiápajucavapaipa eta máemunasirahehi éti. Máecharairicahi eta táurivahi eta ejacpirahi éma, esuaparinehivare, táichavenehi eta emansuiravahi étapa eta epicachirahi ichape ema Viáquenu. ¹⁶ Núti apanavare, tétavica-vahivare eta núrismurevahi ícha éti. Nucasiñavahi táimiyana eta esuapiranuina te tamutu.

Tatupiruvayare te visamure te vivaraha vicajirica

8 Tiuri puiti, nuparapenaveana, vivaraha vimetacahé eta nanaquisiravahi ichape ena apamuriana vichamuriana ticavasanahi te avasareana tinapaica te juca Macedonia. Éna, nasuapavanepa eta manacasamurechirahi ema Viya eta nacajirisirayarehi. ² Ichape-murihinéni eta náichirahi ena ticatianacananahi náemepaurechavacahi, váhisera náinajicavahinehi. Tivapinavanarichucha. Tatupiruvahi te nasamureana eta náijarasirahi eta nanaquiruvana. Páureanahinéni, tímecavahisera eta nanaquiruvana, ticutirine rícoanainahinehi. ³ Núti néchajisihahi eta juca taicha nunecapaequenehahi eta tápajusiravahi eta nanaquiruvana. Vahi náéñamahinehi, náijaracahi jácani nacayehequene. Vahi vipamicavacahinehi víti. ⁴ Énasera, ichapemurihivare eta nayaseasirahavihi vísapahinehi tinaquicavana éna apanava, navarairahi nacajiyare ena vichamuriana ticavasanahi te Jerusalén. ⁵ Éna, náetaviuchahi eta navapinairavahi. Tínapucapa tinaquicavanahi eta nacaemataneasirahi ema Viya, navarairahi nacurisamurecha éma. Tásiha, étapa eta náicurehi ena vichamuriana. ⁶ Eta nímairahi núti eta navapinavairahi eta nacajirisiraya, nupanerechahi nuanecaya ema Tito machava máiteca eta ara eyehe apaesa táitauchavapaini eta enaquiruvanahehi éti apanava. Cape juca épaniravainapa. Puiti ítauchavanepaini. ⁷ Taicha éti, ichapemuri eta ecasiñavairahi me Viya. Tétavica-vahivare eta échemaravahi. Camurihevare éti ímiturahiana. Evapinavahivare eta ecaemataneasirahi ema Viya. Tétavica-vahivare eta émunaravahi eta veyehe. Eta tacahe, táurica tápajucavahivaréni eta enaquiruvana ecajirisiraya.

⁸ Váhisera nupamicahé eta nuanesirahénahinehi. Nuvarahahisera ímatiequenehahi eta navapinairavahi ena apamuriana vichamuriana apaesa ímerecahinehi éti apanava eta yátupiquenérahinehi émunaravahi. ⁹ Ímatirichuhi éti eta máemunasirahavihi ema Viáquenu Jesucristo. Éma, tamutu tíuricacarehi te mávihahi te anuma, tájinahinéni mácamunuhinehi. Étivenehisera tíucu-

paicapa te juca apaquehe. Páurehi éma eta máitare-sirahi apaesa éti ejacpahini eta iúricacareva maicha éma.

¹⁰ Németeaca táurica ítauchavanéni eta juca enaquisiravahi, váchupa épanavaqueneripahi cape año. Táimiyana eta evapinairavayarehi eta ítauchiraya eta enaquiruvanayare tásihaquenehi eta jácani tatiarihi-queneanahi ecayehequeneanahi. ¹² Etiarihi erataha enaquica apaesachicha. Etiarihivare erataha íápajucava eta enaquisiravahi. Etiarihi erataha enaquica camuri. Tacamunuchucha tátupiruva te esamureana, evapinavahi eta enaquiruvaya apaesa tijacapacareya mayehe ema Viya.

¹³ Vahi nuyaseacahe échuriahini éti táichavéne-nahini eta ímicatasirayare ena apamuriana. ¹⁴ Nuvarahahisera ímrecavahini eta ímicatasiravacayare ena vichamuriana. Puiti ecaimahaquenevacahi, eratahahi ecajirica ena náechuriaruanahi. Tijuricati te apana año, étipavainapapuca échuriaca. Éna títsirijicavanainapa eta eyehe, énapavainapa tinaquicavanayare. Ene tache-yare eta ítaresirayare, ecuticacayare. Nacuija nacucatajiva tayehe eta ecamunuqueneana. ¹⁵ Ví-tachayare eta tacayemaquenehi eta Sagrada Escritura, ani tacahe: “Namutuhi ticaniruana. Nájina nácatajivahini, nájinavare náechuriacahini, váhivare námepururerechahini” tacahepa.

Éma Tito énapa ena apinana vanairucanahi mayehe ema Pablo

¹⁶ Núti nuhasulupayachahi ema Viya eta manacasmurechirahi ema Tito máeñamiravahi eta eyehe, tacutihi eta nusamure néñamiravahi eta eyehe. ¹⁷ Éma, matupiruvahi tijicapenuhi eta nutuparasirahi téchapajiricaheyare. Ichape eta mavarairahi téjirapanahayare, taicha tétavicavahi eta máemunasirahahi.

¹⁸ Eta mayanirayare ema Tito eta ara eyehe, vévatacayare macachaneyarepahi ema apana vichamuriahivare. Tímaticarehi éma eta macunachacarevahi te jácani máimituresirapahi nayehe ena vichamuriana tayehe eta véhiruhi. ¹⁹ Éma maca nerejihi ne vichamuriana eta máimicatasiranuyare eta vipaisirayare, víjarasirayare ena vichamuriana eta enaquiruvanahi. Víchahi eta juca, vivarairahi vicurismurechaya ema Viáquenu. Vímereuchaheyareva eta evapinairavahi éti ecajiravahi. ²⁰ Taicha núti eta viámirayare eta ichapequene enaquiruvana, nuvaraha nímerecayare eta táuriva eta víchira, apaesa vahi nacuechajisianu nácani achaneana. Éma Viya tímararacanuhi eta táuriva eta nupanereruana. Nuvarahavare tiuri eta náimairahi ena vichamuriana.

²² Énerichuvare vévatacayareva ema apanavare vichamuri. Éma, ichapemurihi tímereuchava eta mavapinairahi eta macaemataneasirahi ema Viáquenu. Puiti éma, tivapinavavarepa eta máitecapauchiraheya, taicha macasiñavahi eta máimati-rainapa eta evapinavahi eta ecajiravahi éti. ²³ Núti nuvarahahi námatiyarehi namutu ema Tito, eta émairahi nujupaha tayehe eta juca vématanerepi. Vicuticacahi

eta vicaemataneasirahe, véchapajirisirahahi éti. Étari-pa te nacayasesererupuca nayehe ena apinana vichamuriana macachanequeneanayarehi ema Tito, énerichuvare emetacayare eta nerejianahi ena apamuriana vichamuriana, táichavenehi eta táurivahi eta nacaemataneasirahi ema Cristo. ²⁴ Nuvarahahi ímerecayare eta nayehe ena nani apinana vichamuriana eta yátupirahi eta émunaravahi, apaesa ecurisamurecha namutu ena vichamuriana te nasamairiricapa, náimatirayare vahi támapuruji eta nucunachirahahi.

Tiúripána vivapinavayarehi eta vinaquisiravana nayeheyare ena vichamuriana

⁹ Tiuri puiti, núti nímatihiripahi eta evapinairava tayehe eta ecajirisira nayeheyarehi ena vichamuriana ticavasanahi te Jerusalén. Vaipa tácamunucarehini nápepejiricahehini. ² Ichapemurihi eta nucunachirahahi nayehe ena vichamuriana ticavasanahi te juca Macedonia. Numetacavacahi eta evapinairavahi eta épaniravahi enaquicava cápequeneripahi te apanahi año. Tacahe, eta nasamairirisirahi eta evapinairavahi éti, éna apanava tivapinavavarepa ichape. ³ Éta tacahe, névatacahi puiti ena nani mapanana vichamuriana, apaesa vahi ecuvayaracanu. Vahi tacumapuruji eta nucunachirahahi eta enaquisirava. Nuvaraha tatsecavaipa támutu te nítecapauchahépa. ⁴ Tijuricati náehicanupahi te níteca ena vichamuriana ticavasanahi te juca, tacuijarichaha tatsecavahi machu átsirihacare, machu támapurujipa eta nucunachirahahi. Váipasare ecuimicatsiriacanúti apanava. ⁵ Tásiha, tachehi eta nupanereruana eta névatasirahi puiti ena nani vichamuriana, náinapumirauchanu náitecapauchahé, náimicatacahe eta ecurujisirayare eta enaquiruvana. Nuvaraha evapinavayarehi eta enaquisiravahi. Nájina vahi náimijachanu nútinachucha nupamicahé.

⁶ Némechaheyare jucarihi eta échajirirucava, ani tachehi: “Mácani achane ánicuchicharichu eta máesane máevaruhi, ánimurichicharichu eta mavehayare eta távame eta máesane. Mácanisera ichapepana eta máesane, ichapemurivare eta távame mavehaquene-yare” tacahepa. ⁷ Namutu nácani tinaquicavanayare, tavarahahi tatupiruvayarehi te nasamureana eta nanaquisiravaya. Vahi nacatiequenehaimahi, taicha nájina tipamicaimahi. Taicha ema Viya, tétavicava eta máemunasirahi mácani tatupiruvahi eta máijaracasirahahi. ⁸ Ecasiñavaya yátupina mayehe ema Viya, taicha éma, tétavicavahi eta máitupajijiasiravahi. Mavarahahi tíjaracaheya tamutu eta ecamunuqueneana. Vaipa échuriahimahi maicha éma. Ecayehenasarepa eta ímicatasiravacaya nácani apamuriana ticamunuvanahi. ⁹ Ecutiyarehi ema achane tiuri, ema táechajisihahi eta Sagrada Escritura, ani tachehi: “Éma achane tiúrihi ticunachacarehi me Viya, tivapinavahi eta macajiraparacahi ena páureana. Tájina vahi téchuriacaimahi eta macajirisira te tamutu eta máitaresirahi” tacahepa. ¹⁰ Éma Viya, émahí ema

tinaquicahi eta evaraquiana. Éma, macaejapacahivare eta tinicacare, étapa viáchanechiavayarehi. Ene macaheya eyehe éti. Tíjaracahepa eta enaquisiravaya, tímicutijiricavahi eta táejapasira eta evaraqui. Éma, ticajurucayareva eta enaquiruhi apaesa camurianaina ena ecatajiruanayare. ¹¹ Tásiha, ema Viya tíjaracahepa eta ímahaqueneanayare apaesa ímiyanavayarehi íjaracasireca. Puítiripa eta viámaqueneyare enaquiruvanahi nayehe ena vichamuriana, ichape eta nahasulupayachirayarehi ema Viya. ¹² Taicha eta ímicatasiravacahi ena vichamuriana, ecuchucuhavacayarehi tayehe eta nacamunuiravahi. Tásiha éna, tiápajucavainapa te nasamureana eta nahasulupayachirayarehi ema Viya. ¹³ Ichapeyarehivare eta najirauchirayarehi ema Viya, nacunachirayareva éma. Eta evapinairavahi eta ecajirisirahi eta ímeresiravahi eta esuapirahi yátupi eta véhiruhi, étaripa eta máimiturapihi ema Cristo. Tímereuchahehivare eta iáchanevahi nayehe nácani ticamunuanahi. ¹⁴ Tásiha, tiyaseuchaheanainapa me Viya te nayujarasirana. Ichape eta námunasirahe-yarehi, navarairayareva náimahahevane táichavenehi eta ísirijisiravahi eta máemunasirahehi ema Viya.

¹⁵ ¡Tétavicavahi eta viúricacarehi maicha éma! ¡Tájina-pa viviya apanaina vácayema eta vihasulupayachira ema Viya táichavenehi eta juca víjaracasi!

Yátupi eta masuapacarevahi eta apóstolérahi ema Pablo

10 Nuti Pablo, yátupiquenénuhi eta apóstolenuira. Puiti nuyaseacahe eta ímatiranuína eta némunasirahehi. Nucutihi eta máemunaraivahi ema Cristo éta-pa eta majapanuravahi. Etiarihipuca eti ímijachahi népiyacavahi núri te emirahu; tásiha, te nuyerehi-hevare, tétavicavahíji eta nuvainarajivahi mapicaurairahanuhíji. ² Puiti nutuparacahe: Étupirisamurechavai-pahini te tamirahu eta nítecapauchiraheya, apaesa vahi tacuitauchava nucusemaracahéhini. Ena nani náimijachahi nucutihi mácani achanetataji, étachucha nutanuca eta nuvarahaquenehi. Nucamatinacavacaya-resera te nítecapauchahépa. ³ Yátupi ecutiquenenuhi achanenuhi. Váhisera nácutihini ena apamuriana ajairana náipicararecanuma eta náeharaviana, navarairahi tisuapacareanayarehi. ⁴ Taicha núti vahi néhacacaimahi te nuvahuana, tájinavare nácasíñaimahi. Mararihisera ema Viya ema tíjaracanuhi eta nítupajijiasiravaya nucamatinasihayare éna. Ema Viya, nájina ticachuricaimahi. ⁵ Eta tacahehi eta nucaepahairahi eta semanereana, ena ticasíñavavaicanahi, tímijachavanahivare ena téchinavanahi, vahi návarahahini máimicatacavacahini ema Viya. Váhivare návarahahini náesenicahini éma. Níturucayarehisera nácani muracapanereruanahi eta nasuapiraina yátupi ema Cristo. ⁶ Nucuchapahesera eta yátupina eta esuapajiraivaina. Tásiha, te nítecapa, nímiratahacava eta nítivachirayare eta napanereruana ena masuapajirairahanahi. Te váhipuca náeneuchava, némechavacayare.

Natiarihi ena tímijachavanahi apóstoleana, tímicutichavanahi ema Pablo

⁷ Éti ímijachapapuca tájinaquenénuhi nítupajijiasiravainahini, eta ímairanuhi eta nímahisami. Németecavare natiarihi ena ticunachavanahi machaneranahi ema Cristo. Nuvarahasera náimatinuhini eta machanerairanuhi núti apanava. ⁸ Natiarihipapuca náimijachapapuca vahi nétupicavahi núti eta nupamisirahehi eta esuapiranuhi. Váhisera nutsirihahini taicha yátupihí nutuparahaichuhi eta návacure apóstolenuhi. Taicha ema Cristo mavarahahi nétumechaheyare eta éhisirahi éma. Tájina vahi nucamitiequenehahémahi núti. ⁹ Numetacahehi eta juca, váhisera tácarichuimahi nípicararecahehini te juca nucartane. Tamutuyare títauchava te nítecapauchahépa. ¹⁰ Ena nacahehi eta náechajiruvahi: “Vahi ecusuapa eta macartane. Tayanapane muracapahi eta táechajiriruvana, émasera tájina mamuracavaina. Énerichuvare muraca-caema eta máechajisira” nacahepa. ¹¹ Éna náimijachahi tacarichuhi muraca eta táechajiriruvahi eta nucartane. Tímahanuanayaresera te váhipuca nusuapacarehi te nítecapauchahépa eta ara eyehe.

¹² Núti vahi nímicutichaimahi nayehe ena tímijachavanahi ticunachacareanapanahi. Ena nani énajirica-vaichucha ticunachavana, tímijachavanahi nájina ticachuricanaina éna. Súnsurupichucha eta juca náichaquenehi. ¹³ Nútisera vahi nútijivaimahi nucunachavahini. Émayarehi ema Viya ticunachanuyarehi, taicha éma tíjaracanuhi eta nusuapacarevahi eta eyehe, tásihaquenehi eta níjarasirahehi eta táurinaqueneana máechajiriruvana ema Cristo. ¹⁴ Váhivare nétaviviriacavahini eta nusuapacarevahi eta eyehe. Nútihinéni nínapucahi te nítecapauchahénapa te nímitucahepa eta máechajiriruva ema Cristo. Tacahe, tituparacanuhi eta esuapiranuyarehi. ¹⁵ Váhivare nucunachavaimahi tayehe eta apaematanehi násapihahipucaini. Nuvarahasera tápajucavaini eta esuapajiraivaina mayehe ema Cristo. Nuvarahavare nímitucaheyare eta apamuriana yátupiqueneana, nítauchiraina eta nucatuparahairahi me Viya. Tájina vahi nétaviviriacavahini eta nusuapacarevahi eta eyehe. ¹⁶ Núti, váhiquene nímicasiapavaimahi te jácani avasare nacametairuquenéipa nácani apana, nucunachiravayarepuca tayehe eta táitaurevapaipa apamata-aneanahi.

¹⁷ Numetacahe: Nácani tímijachavanahi ticunachacareana, yátupinahiseráini eta nacunachacarevaina mayehe ema Viya. ¹⁸ Taicha mácani achane, te yátupihí eta macunachacarevahi, vahi émajivaimahi ticunachava. Émayarehi ema Viya ticunachayarehi.

Ichape eta máeñamiravahi ema Pablo nayehe ena machamuriana

11 Tiuri puiti, nuvaraha ecamichaini eta juca nucayemaqueneanayare eta eyehe. Ticutiya-re súnsurupiana. Nuvarahasera ítasamahini. ² Puiti,

tétavicavahi eta néñamiravahi ícha éti, tásihaquenehisera me Viya. Nucutiripa mácani achane suiya esu amaperu eta majaneasirahi ésu. Taicha nuvaraha táurihini eta majacapiraheyare ema Cristo te jena sáchezare. Ácutihini súcani esena amaperu te sutupiruvahi eta sucaimaira, tájinasarepa mácyemahini ema suima. ³ Eta néñamiravahi eyehe, nuvarahahi ecuijahini iáquipaicava, ecucamitiequenehahini eta táurivahi eta éhisirahi ema Cristo. Vahi ecucuti eta suáquipaisiravahi esu vénarahaini Eva, maicha ema Váinaraji Satanás. ⁴ Ímicatisamurechanuhi eta esuapiravanehi ena tépiyahirahiana, apapipahi eta nametarairu tayehe eta náuchucuiraya. Núti, émahí ema Jesucristo ema néchajisihahí. Énaserá, apanahi ema náechajisihahi. Émaripa ema Espírítu Santo, váhivare émainahini náechajisihahini éna. Apanachucha ema nacasiñahi. Éti ejacaparipahi ema yátupiquenehi Espírítu Santo. ⁵ Núti németeaca vahi ticachuricanuanaimahi eta nucametarairuira ena tímijachavanahi apóstolequeneana ticametarairuriahinahí náichava. ⁶ Tayanapanepuca táepurucarehi nayehe eta néchajisirasami, étasera eta nítupajjiasirava, tamutuhi nímatiequeneha. Ímatinuhi éti tayehe tamutu jácani nímitusiraheana níchaqueneanahi.

⁷ Etiaríhiserapuca éti ímijachahi néjcapava eta némeppurechiravahi. Táitusiava népurucarehi eyehe, ichaperipahisera núríchaheripahi éti. ⁸ Váhivare nuyaseacahehipucaini eta nunicaquenerepi eta nímitusirahehi. Yátupi tíjaracuanahi ena apamuriana vichamuriana eta nénisiavayare. ⁹ Tásiha, te níta-hapa eta plata, váhivare nuyaseacahéhi eta nuni-caquene. Taicha ena vichamuriana ticavasanahi te provincia Macedonia náimiamarecahi eta nucamunqueneanahi. Tacahe, nujaneacavahi, vahi nuyaseacahéhi éti. Váhivare nuyaseacahémahi puiti. ¹⁰ Jéhesare, nájina tiratahaimahi tihapapica eta nucunachacarevahi tayehe eta tájina nucobrachirahéhi eta nímitusirahehi emutu eti ecavasanahi te Acaya, taicha yátupihí eta nímatiequenehairahi tamutu eta yátupiqueneanahi máimiturapiana ema Cristo. ¹¹ Eta juca nucayemaqueneana, vahi ímijachaimahi étainhipucaini táichanu eta numaemunasirahénahini. Ema Viya máimatihí eta yátupirahi némunacahe.

¹² Énesera nucaheyare núti. Váhiquene nuyaseacahémahi. Nímiyanavaya eta nujaneasirava apaesa tacuija naviya eta taviuchanu nayehe ena tímijachavanahi tímiturahiana nácutinuhini eta apóstolenuirahi núti. Taicha navarahahi ticunachacareanayarehi tímicutichavanayarehi eta nucunachacarevahi núti. ¹³ Éna, tépiyacavanahi apóstoleana. Tivayuarahianasera eta náitaresirahi. Váhiquenevare vanairucanaimahi me Viáquenu Jesucristo. ¹⁴ Ena nani, vahi tiáramicareana éna eta navayuaravahi, taicha ema Satanás, yátupiquenehi náquenu éna, tépiyacavahi macuti ema ángele vanairucahi me Viya, mavarairahi tivayureca. ¹⁵ Ene nacaheyarehi ena nani mavarahanahi ema Satanás, tépiyacavanapahi pastoreana náuriqueneana. Járjapayarehisera eta sáchezare

najacapirayare eta náicuñayare táichaveneyare eta juca náimiaquipaisirahehi.

Ichapemuri eta macatajivairahi ema Apóstole Pablo taicha eta macametarairuira

¹⁶ Nuvaraha nápechava numetacahe: Vahi ecusuapa eta náimijachiranuhi máurishinu. Te etiaríhipuca éti ímijachanu máurishi, ecayehe paciencia eta nuyehe. Ecamichanu eta juca nucunachiravasampaini apaesachichainahini nácutipaini eta nacunachiravahi ena apamuriana. ¹⁷ Tájina mavanairipina ema Viáquenu tayehe eta vicunachacarevahi. Tíchanuhisera nucunachava taicha éti ímijachanu máurishinuhi.

¹⁸ Táichavenehisera eta nusamairirisirahi eta nacunachiravahi eyehe eta náitupajjiasiravahí, énenapa nucacheyare núti eta nucunachirava. ¹⁹ Éti, ímijachavahi ichape eta échemaraivavacahi. Evapinavahisera eta esuapirahi eta nayaseasirahehi ena máurishiana.

²⁰ Ecamichahivare tamutu eta napamisirahe ítaucha eta tivitacareana vanairipiana. Tiverejicaheanahi eta ecayehequeneana. Tiyurucaheana éhicavaca éna. Tasapíhapa éti ecamichahi tamutu eta juca. ²¹ Núti, tétavicavahi nutsirihahi énemahinuhinahini nácahehini. Te ímijachahipuca tíuríhi tamutu eta juca náichirahehi, eperdonachanuhini vahi nícahahini éta.

Ena nani ticunachavanahi eta náurivahi. Núti apanava núríha eta nucunachiravayarehi, tayanapane ímijachanupuca máurishinuhi. ²² Éna ticunachavanahi énaírahi hebreo israelítana. Núti apana hebréonuvare, israelítanuvare. Énerichuvare núti mámariequenenu ema viáchucaini Abraham, nucutirichuvare éna.

²³ Éna, tímijachavanahi mavanarana ema Cristo. Nútisera, jéhevarequenenuhi mavanaranuhi ema Cristo. Nápapujanavahi núti eta nayehe. (Máurishinuhi eta ní-mairavahi eta juca nucunachiravahi.) Jéhevare núti nápapujanavahi eta nucaemataneasirahi ema Viya, nucachuricavacahi namutu éna. Eta juca nucaemataneasirahi me Viya, témestacanuhi, témeratacanuhivare. Énerichuvare ichapemurihi eta táimicapasiranuyarehini. Ena nani nánarana, vahi náichahini, nájina nacatianacavacahini. ²⁴ Tacutiquene cíncohevare nucaesta naicha ena nujaneanana israelítana te jácani nupaisiranapahi. Mapana arroba eta náestasiranuhi.

²⁵ Mapahevare tépuchiricanuanahi. Étahevare tiyucaracuanahi te márijahiana. Mapahevare térica eta pacure tiámanupahi. Tásiha, étanavare sache étanapa yati nucahehi te táinahu eta une te ichapequene mar.

²⁶ Ichapemurihivare eta nupaisiranahi. Nímahavahivare eta táíñehicarevahi eta tamuracava tajunapirahi eta une te ichape cajacure. Nupicacavahivare naicha ena tiámerahiana. Tipanereuchanuanapahi ticapacuanana ena nujaneanana, énapa ena apavasanana. Tamutuhi náemauchianupahi te jácani avasare, téhepa te mávapahi apaquehe, éta te jácani nupaisirana te une tayehe eta pacure. Énerichuvare témauchanua ena tímijachavanahi nuchamuriana táichavenehi eta népiyaequeneanahi. ²⁷ Ichapemuri eta nucaemataneerahi. Nucatajivahi muraca. Ichapemurihivare eta

numacaimarasiravahi. Nucatajivahivare tayehe eta nécuava étapa eta numauneva. Ichapemurivare eta nucamichira eta ayunanuiranuhi. Nucatajivahivare taicha eta ticasarahi. Néchurivare eta numuiri-harapi.

²⁸ Tayanapaneinesera eta nucatajivairahi ichape, nímiyanavahisera eta néñamiravahi ícha emutu eti nuchamuriana te tamutu avasareana, nuvarairahi tacuijahini tahapapiricahehine tayehe eta éhisirahi ema Cristo. ²⁹ Te etiarhipuca eti vahi túmehénahini eta éhisirahi ema Viáquenu, ichaperinehi eta néñamiravahi níti. Tacutiquene te etiarhipuca éti námiapairu-nehahi, tétavicavahi eta nutsirirahivare, nusemasa-murevarepa.

³⁰ Téhesera tatiarhipuca eta nacunachiravahi, níti apanavare nucunachavare. Étasera numaitupajijiasiravahi, étachucha ticunachacarehi eta nuyehe.

³¹ Émasera ema Tata Vicaiaquene, Maiya ema Viáquenu Jesucristo, máimatihí éma eta tatupiruvairahi eta nucayemaqueneanahi te juca nuncartane. Éma, máitavacacahi eta majirauchacarevahi.

³² Tacutiquene te návihaipahi te Damasco, ema tuparairucahi tayehe, majupahahi ema rey Aretas, máimivanerecachi ena séntinelana te tapajana tayehe eta avasare, mavarairahi ticaratacanuana. ³³ Énasera ena nuchamuriana tinacacuhanuana tayehe eta ichape saye túmehi, ticuchucanuana te ventana, ticajuchucanuana te tiupi enure te apachacaya eta yúchama tayehe eta avasare. Tacahehi eta núchucirahi. Vaipa nacaratacanuhini.

Éma Pablo mavapuchahi tímerecava ema Viya

12 Yátupi tájina nuvehaimahi eta nútijivairahi nucunachava. Numetacaheyesera eta nímairahi te nuvapore máechajisiranuhi ema Viáquenu.

² Catorce áñoa eta táetavisiravahi eta nímairahi tiámanuana tímipairicanuanahíji te anuma te mávasa ema Viya. Váhisera necha te étahipuca eta náquehe námaphi eta nuyanirahi, te étachuchapuca eta náchaneva. Émasera ema Viya, éma téchahi eta níchararacavapahi eta mámiranuhi te mávasa anuma.

⁴ Ánaqui nusamapa eta mahu. Timetacanuapa eta téchacareanahi tayumurevahi. Váhisera táisapacarehini numetajiricahini. ⁵ Étapapucaini nucunachiravahini tayehe eta nímahaquenehi nusamaquenehivare, taicha tímimatichanuhi ema Viya. Váhisera nucunachavaimahi tayehe. Núti nucunachavahi tayehe eta numáitupajijiasiravahi. Étachucha nucasíñavaiyahi tayehe. ⁶ Yátupihinéni eta nucunachacarevahi. Váhisera nucajamuravahini, taicha tájina nímatihini nutanuca eta nacunachiranuhini ena achaneana. Nuvarahasera nanecapaequenehahini eta táurivahi eta nítaresirahi.

⁷ Tétavicavahi eta tiáramicare eta nímahaqueneana te anuma. Tásiha, ema Viya vahi mávarahaimahi nucasíñavaicahini eta nímairahi. Máisapahi ema Váinarajiquene Satanás técajumachanuhi, cútirine tatiarihinahini itape tayuvaraca te neche. Taicha ema

Viya mavaraha vahi nucuvayuchava eta nucunachacarevaina. ⁸ Mapahe eta nuyaseasirahi ema Viya eta macanarasiranuinahini eta nucaturuhavahi. ⁹ Émasera ema Viya, ánipa máichanuhi: “Vuíchaha nucanaracavimahi. Nujapanuvísera. Níjaracaviyare ichape eta pitumevaya, tayanapane eta pimaitupajijiasiravahi. Taicha nuvaraha náimatiyarehi ena achaneana eta nítipajijiasiravahi piyehe” máichanupa. Eta tacahe, núrísamuréichucha puiti eta tamajinairahi eta nítipajijiasiravainahini apaesa máimerecavahini ema Cristo eta máijarasiranuhi eta máitupajijiasiravahi. ¹⁰ Tásiha, nuvavinavahi puiti eta napanajisiranuhi, nucatajivairahi náicha, náumehairanuhivare táichavenehi eta mavanarairanuhi ema Cristo. Nuvavinavahivare eta numaitupajijiasiravahi étapa eta néchuriasirana, taicha eta nímairavahi tamajinairahi nítipajijiasiravainahini, nútisera nusamavahi eta nutumevapaipaicha maicha ema Viáquenu.

Éma Pablo tétavicava eta máeñamiravahi nayehe ena machamuriana

¹¹ Yátupi puiti eta néchajisiavairahi nucatiuchiravahi, tímicutijirícavaipa máurishinuínahini. Íchavenehisera éti, taicha éti tatuparacahi ecatiuchanuyarehini, váipasare nucuechajisiavahini níti, vahi nútijivainahini nucunachavahini. Navetijisera ena tímijachavanahi apóstoleanahíji ena éhiruanahi, jéhevare éna, tájinaquene pa nacunachacarevaina. ¹² Nímerecavahisera eta eyehe eta yátupiquenénuirahi apóstolenu eta nucaemataneasirahehi. Tayanapane camuri eta nucaturuhavana, nucamichahisera tamutu. Nímehacheripahinéni eta tiáramicareana níchaqueneanahi, maicha ema Espíritu Santo. Éta tímicaecherachanuhi eta yátupiquenénuirahi apóstolenu. ¹³ Ena apamuriana vichamuriana te apana avasareana ticajinuanahi éna eta nucamunuqueneanahi. Étisera, tájina vahi nuyaseacahehine étainahipucaini eta nunicaquene, nítecahipucaini íjaracanuini. ¡Váhisera ecusema eta juca numaitecapauchirahihí!

¹⁴ Puiti nutserereacavaipa eta mapaherayarepa níteca eta ara eyehe, nupaipiuchiraheya. Váhivaresera nácamunuimahi ítátinuhini. Váhivare étaina nutanucapahini eta ecayehequeneana. Étiquenesera nucamunuhepahi eta esuapiranuinahini. Taicha nuchichanavehehi éti. Vahi étinayare ítátinu. Núti níttátiheyare taicha níti ecaiyaquenenuhi. ¹⁵ Váhivare néñamiáhémahi eta nucayehequenehi eta níttátiheyare. Váhivare nuyacujimahi eta nucaemataneasiraheyare táurivayare eta íchanevana. Tayanapane váhipuca ecumunanajicanuhi, nútisera tétavicavahi eta némunasirahehi.

¹⁶ Nararivare ena téchajicanahi eta nuyehe. Ani tacahehi eta náechajiriruvahi: “Yátupi te tipaipiuchahavi éma, váhinenicacha tiyaseacahavi eta macamunuquene. Máitucasera eta maverasirahaviya eta viplatane” nacahehi. ¹⁷ Eti ímatihí vahi énavanerecainahipucaini ena névataruasanahi eyehe, énaiahipucaini naverecahehine níchavenénahini níti. ¹⁸ Te nuvaneca-

pa ema Tito émapa ema macachanequenepahi, téjirapanaheanayarehi, ¡tájinavare mayaseacahehine! Taicha vicuticacahi víti eta viúrivahi eta eyehe, táichavenehi eta vémunasirahehi ichape.

¹⁹ Eti ímijachaipupuca nutanucahi núti eta nucatiuchi-ravayarehi eta eyehe. Váhisera tácahehine. Vahi tácamunucaréimahi eta nucatiuchiravaya taicha núti nutupiruvahi eta néchajisirahehi te mamirahu ema Viya étapa te máijare ema Cristo, nuvarairahi tajurucachini eta táurivaina eta iáchanevana, eti némunarqueneanahi nuchamurichichana. ²⁰ Núti, te níteca eta ara eyehe, nupicahi vahi núricaimahi ácahemahihíni eta nuchimapiiraheya: éhajiricácahipucaini, ecapinarujiricacahipucaini, esemajiricacahipucaini, ¡putsimuriá-cacahipucaini, épiyéquenerejiricacahipucaini, iúmehajiricacahipucaini, ecasiñavavairicahipucaini, váhipuca tacuaquejiricacahi eta epanereruana. Te ecahehipuca, vahi iúricaimahi némecharecahehine. ²¹ Nupicahisera nátsirihacarehine núti mayehe ema Viya íchavené-nahine éti, vuíchaha étupiricavahine eta nuchimapiiraheya. Vahi nuvaraha ecaiyacanu éti enerejicavana éjecapavanahi, taicha eta ánaquiaparipahi eta émainajisiraíchaha eta ecapecaturairana. Ímiyanavaichucha eta esenamarahehi, étapa eta empicaurahi-vaichucha.

Eta máipicarairesirahi ema Pablo eta táichecuaraqui eta macartane

13 Puiti mapahenapa eta néjirairaheya. Cape te nítesinehi, numetacahevanehi nútijacuruvahi, camuriripa eta nuconsejairahehi eti éjecapavanahi. Íurihapaini ínajica eta emaurivana. Puiti te nucartane, nápechavahi numetacahe emutu. Vaipa nucaiticaimahi nácani téjecapavanahi. Núti nétupiricavacaya. ³ Etiarihihi eti épurunuhi eta mavanésiranuhi ema Cristo. Ímahayaresera ichape eta máimicatasiránuhi eta nétupirisiraheya. Taicha éma, títupajjiacavahi eta máemecharesiraheya. Tipicacare eta máicuñaraqui. ⁴ Yátupi éma tísapavahi ticaetata, tímicutijiricavaipahi vahi macuratahahine ticatiuchava. Váhisera mánasihine máepenahine, tichavahi títareca puiti taicha eta máitupajjiasiravahi ema Viya. Ene nucahehi núti nísapayarehi, tímicutijiricavahi vahi nucuratahairainahine. Ímahanuyaresera eta máijarasiranuhi eta máitupajjiasirava táichavenehi eta mávahásiranuhi

eta nétupiricaheyahehi taicha nucaturarahahi eta nujaneasiraheyahehi emutu éti.

⁵ Nuvaraha esamavayare étijiva, te yátupihipuca tiúrihi eta éhisirahi ema Viáquenu Jesucristo, te yátupipuca eta mávahásirahehi éma. Taicha éma mávahácavacahi namutu ena machichanaveana yátupiqueneana. Machu émepururecava eta íjarasiravahi éhica éma. ⁶ Nuvarahasera némechahe ímatinuhine yátupinahine eta mávahásiranuhi ema Cristo, jéhevare núti yátupiquenenuhi machanerenuhi. ⁷ Núti, ichape eta nuyujarauchirahehi, nuyaseacahi ema Viya eta étupirisiravayarehi apaesa tacuija eviurevaina mayehe. Ichape eta nuvarairahi íchahine eta táuriqueneana. Tayanapanerinehipuca náepurunuhine, nuvarahasera ímiyanavayare éti íchayare eta táuriqueneana. ⁸ Taicha núti nutupiruvahi niche eta táuriqueneana yátupiqueneana. Váhiquene nísapavaimahi nuhapipica eta yátupiqueneana. Eta tacahe, yátupina ésamiricava. Vaipa eucamesa eta nápepejiricahe numetacache. ⁹ Ichape eta ecurisamurechiranuya te yátupinapa étupiricava. Étijivainapa eratahayare ecaratacava. Vaipa nútiparacaimahi eyehe. Puiti eta nuyasearapi núti me Viya, tamutuyarepa tichavaya eta táurivahi eta ítaresira. ¹⁰ Puiti nucajurehe eta juca carta, nucuchapavahi núti eta néjirairaheya, támuturipahine étupirica apaesa tacuijahine nucucayema. Váhivare nucusemaini eyehe. Nuvarahasera nétumechaya eta iáchanevana. Étahi eta nutuparacasivanahi me Viáquenu eta apóstolenuirahi mayehe.

¹¹ Tiuri puiti, nuparapenaveana, ítátijiricavahi. Etanucayare eta táuriqueneana eta ítaresirana. Ecurisamurechacaca. Tacuijahine eta semanerena eta eyehe. Tácuticaca eta epanereruana. Máijaracahine ema Viya eta tanarasiraina eta iáchanevana, taicha tétavacavahi eta máemunaraivahi éma.

¹² Núti néchajicahe emutu. Nuvaraha nétserarecahevacayare táicutiarahi eta táetavisiravahi eta némunasirahehi te mavahuana ema Viáquenu. ¹³ Ani te juca téchajicaheana namutu ena vichamuriana.

¹⁴ Nuyaseuchaheparaca emutu éti me Viáquenu Jesucristo táetaviuchahine eta iúricacarevaya máicha, evapinavavaréni taicha eta máetaviuchirahi eta máemunasirahehi ema Viya. Macurisamurechaheparacaini tamutu sácheana ema Espíritu Santo. Tamutupa eta néchajirivanahi eyehe.

Gálatas

1 Nuti Pablo, yátupiquenenuhi mayehenu apóstole ema Jesucristo taicha manerejirunuhi. Ema Tata Vicaiyaquene ticutihi eta mapanereruhi ema Machicha eta máichuiranuhi. Puíticha émaquenehi ema Jesucristo tinacanuhi eta juca návacurehi apóstole, émarichuhi ema macáechepucasiquénehi te máecari. Vahi apanainahini achane ema tinacanuhi, énaiahipucaini ena nucutiqueneanahi apóstoleana nanacanuhi eta juca návacurehi. ² Puiti nucajurehe eta juca carta eyehe eti nuchamuriana ecavasanahi tayehe eta avasareana tayeheana provincia eta Galacia. Téhcajicaheana ena apamuriana vichamuriana te juca návi-hahi.

³ Nuvaraha macatajicahehinehi ichape ema Tata Vicaiyaquene, émapa ema Viáquenu Jesucristo. Náijaracahehinehi eta táurivaina eta epanereruana. ⁴ Ema Viáquenu tjaracavahi tépena te crusu taicha mavarahahi ticuchucuhahaviyare tayehe eta vícuñayahinehi táichavene eta vipecaturana, macámitiásinaháviripahivare eta vijamurachirainihi eta tauriqueneana tayehe eta juca apaquehe. Eta tacahehi eta mapanereruhi ema Tata Vicaiyaquene. ⁵ ¡Máichecuaraquireyarehi eta vijirauchiraya éma! Amén.

Étanarichu eta doctrina véhiruhi, tájina apanaina

⁶ Ichaperinehi eta ímipaneresiranuhi. Váhicha németeaca ene ácahehinehi eti éhichahinehi eta apanaque-ne doctrina. Tasapihapa esuapahi eta juca, vaipa émainahinehi esuapa ema Viya. Ínjicavanepa eta esuapirainihi éma. Émepururecapa eta máichuirahinehi. Tasapiha émepururecapa eta máepeninahinehi ema Jesucristo eta máemunasirahinehi. ⁷ Nutupiruva numetacahé, tájina apanaina doctrinaina tácuti eta juca véhiruhi víti. Néchahi eta juca íchararacavahi éti, nararihi ena témejecapavachaheanahi, navarahahi nahapapicayare eta vímiturapianahi tásihaqueneanahi mayehe ema Cristo. ⁸ Víti vímitucaheripahi eta juca yátupiqueneana, étarichuhi eta máechajiriruva ema Viya. Cape juca, te viávihaichaha eyehe, vimetacahévanehi eta macatichira ema Viya eta apanapanequeneana doctrina nahapapiruanahi. Puiti nápechahavare numetacahé: Ticatichacareya me Viya nácani nahapapica eta vímitureheanaripa yátupiqueneanahi. Nútiripa, te nápechavahivaréni níteca eyehe, apánainapáipahivarepucaini eta nímiturapiana, ticatichanuhi ema Viya taicha eta nuhapapisirainahinehi eta máechajiriruvana. Téhevare máitecapucaini mácani émana máimicutichavapahinehi eta ángele másihaque-

nénahipucaini te anuma, te mavarahahivarepuca mahapapica eta vímitureheanaripa víti, énerichuvare macatichayarehi ema Viya.

¹⁰ Nararihipuca ena témeteacuanahi nuhapapicahi eta máechajiriruvahi ema Viya, étainahipucaini níture-sihahinehi ena achaneana, némemunasiravainahinehi nayehe. ¡Tájinasera vahi nuhapapicahinehi núti! Nutupiruvahi eta níturesirahi taicha nuvarahahi nucurismurechaya ema Viya, nímerecavayarehi eta núriva eta mavanaranuirahi ema Jesucristo.

Éma Pablo tímereuchava eta táchararacavahi eta masiapirahi apóstoleyare

¹¹ Nuvaraha numetacahé eti nuparapenaveana eta juca nucametarairuahi, vahi tásihaquenehinehi te nupanereru núti. ¹² Váhivare nímitucasivainahi mayehe mácani apana achane nucutiquenehi apóstole. Émaquenehi tímitucanuhi ema Jesucristo.

¹³ Éti esamairiricanuhi jácani eta níchararacavahi eta nítaresirahi cape juca násinequenehi, te étarichaha néhichahi eta nayeherépiana ena israelítana náchucanaveanainihi núti. Núti, eta nujurusirahi, nímahahi eta tacapicahuirahi eta viyeherepiana. Ichapehi eta némuracachiravahi, nucachuricavacahi ena nuparajuruanahi. Nímicapicauchahi muraca, numavarairahi táemitequenehinehi eta viyeherepianahi nanaquipairuanahi ena náchucanaveanaini. Eta tacahehi, ichape-murihi eta nupanajirisiravacahi ena machaneranehi ema Viya, nuvarairahi nucámitiéquenehavacayahinehi eta náehisirahi ema Jesucristo. ¹⁵ Námavaqueneváhiséra eta manerejísiranuhi ema Viya, te vuíchaha núchuchahinehi te sujuhe esu ticachichanu; tacahehi eta mapanereruhi eta máichuiranuyarehi, taicha eta máemunasiranuhi. ¹⁶ Tásiha, tímimatichanuhi ema Machicha, taicha mavarahahi nucametarairuyare nayehe ena apavasanana eta macuchucuirayare namutu ena tisuapana ema Machicha. Váhiserá nutanucahinehi nácani náimitucanuhi eta nucametarairuyare. Nájinavare nuyasereruina. ¹⁷ Váhivare nuyannahinehi te Jerusalén nutanupanahipucaini ena náinapureanahi apóstoleana. Téhechucha apaquehe Arabia nucaijuhehi. Émasera ema Jesús, éma tímitucanuparacahi. Te váchupa, nuchavavarepa te avasare Damasco. ¹⁸ Te mapanaqueneapa año, nupaenumavapanuyannahinehi te Jerusalén, etapa nímatinehi ema Pedro. Nunasipanapa quince sache nucahehi eta mayehe. ¹⁹ Émapa ema Santiago, maparape ema Viáquenu, ema nímahaquenehivare. Énasera ena apamuriana

apóstoleana, nájina nímahavacahini. ²⁰ (Puiti tímararacanuhi ema Viya, tájina vahi népiyahiraivaina eta juca nucáyemaqueneánapahi te juca nucartane. Nutupiruvahi eta numetasirahehi.) ²¹ Tájinasera vahi nucaimitucasihini nayehe taicha nuyanavanevarepa nucaijuhehi eta te Cilicia, nánucuhapa tayehe eta Siria. ²² Tacahe, ena vichamuriana ticavasanahi te Judea, váhivare náimatínuhini taicha vahi náyerehini tayehe. ²³ Tisamairicanuanahisera eta néquesiravaripahi. Ánipaji tacahehi eta nasamairirisiranuhi: "Ema maca Pablo tipanajiricahavihi cape juca viásinequenehi, ¡téquecavaripahi! Cape juca mavarahahi ticámitiéque-nehaháviyarehíni eta juca véhiruhi. ¡Puiti émarinecha tétucaracavahi ticametarairuhi eta juca véhiruhi víti!" nacahepaji. ²⁴ Tacahe, ichaperinehi eta nacunachirahi ema Viya níchavenehi núti eta néquesiravahi.

EMA PABLO TÍMEREUCHAVA ETA MASIAPAMURIHAIKAPA ENA APÓSTOLEANA, TÁSIHA NATUPIRUVU NAJACAPA ÉMA

2 Catorce áñoripa eta táetavisiravahi, nupaenu-mavapa nápechavahi nuchava te Jerusalén. Émapasera ema Bernabé nucachanehi, émapa ema Tito. ² Taicha numetacativahi me Viya te nuvapure eta nuyanirayarehi tayehe eta Jerusalén, véchajicacayare nayehe ena tachutirihanahi. Eta nítecapirapa, viúrujicavapa, énachuchasera vicachanehi ena tachutirihanahi. Tásiha numetacavacapa eta nímiturapianahi eyehe eti apavasanana étapa eta esuapirahi. Taicha nuvarahahi ena vichamuriana israelítana najacapehehi eti apavasanana vichamurianaripahi. ³ Te jena, natiarihihi eta tépiyacavanahi vichamurianahi, tépiyahirahianapahi eta nasiapamurihairahavihi. Éna, navarahahi tipamicahavianayarehi eta vímitusirahe éti apavasanana éhica eta nayeherepiana ena israelítana. Taicha tacahehi eta náechajiriruvahi éna, ítauchayahiji eta nayeherepiana éna, váhiji tacarichuimahi eta éhisirahi ema Jesucristo. Navarahahivare napamicayahini eta macamarca ema Tito, eta apavasanairahi éma. ⁵ Tájinasera vahi vísapavahini nacachuriacahivihini, taicha víti vivarahahi tacuijahini tahapapicahini eta éhisirahi eta yátupiqueneana téhicacareanahi. ⁶ Tacahe, énaripa ema Santiago, ema Pedro, émapa ema Juan, énapa ena apamuriana náiyarahana ticutinuanahi eta nupanereruhi. Tájinavare vahi nametacanuhi eta apamuriana téchacareanahi nayehe. Étasera eta nasamiranuhi, náimativanepa eta émairahi ema Viya tituparacanuhi eta nucametarairuiraya nayehe ena apavasanana. Nucutihi eta macatuparahairahi ema Pedro máimitusirayarehi ena israelítana. Ema Viya máijaracahi eta mávacurehi ema Pedro apóstolehi nayehe ena israelítana. Máijarahivare eta máitupajijiasiravahi. Ene nucahehi núti tíjaracanuhi eta návacurehi apóstolenuhi nayehe ena apavasanana. Tíjaracanuhi eta nítipajijiasiravahi. Eta tacahehi, náimatipa eta émairahi ema Viya tíjaracasichanuhi eta juca nítucaquenehi. Tacahe, tijupacahavianapa, núti émapa ema Bernabé. Eta juca náichirahavihi táicutiarahi eta náisapirahaviyarehi

vímiyanava vímitucavacayare ena apavasanana. Éna, tímiyanavanayare tímiturecanahivare ena israelítana. (Tépurunuanarichuchapuca eta náimairanuhi. Tayanapanesera váhipuca nujacapacarehi nayehe eta apóstolenuírahahi. Nútisera néchahi eta manerejisiranuhi ema Viya eta apóstolenuírayare.) ¹⁰ Tacarichu tituparacahavianahi eta vímicatasirayarehi ena páureana. Eta tacahehi puiti, nítauchahi núti eta nuvanecativahi nímicatasiravacaya ena páureana.

EMA PABLO TÍMEREUCHAVA ETA MACAJACHIRAHÍ ENA PEDRO

¹¹ Te táequenepa, te jena áñoanahi, títecapauchahavipa ema Pedro te avasare Antioquía. Étasera eta mávihairahi viyehe, téjecapavainapa. Eta tacahe, nucajachapa éma. ¹² Eta máitecapirapa ema Pedro, tájinaipa máichiravainahini eta masamiravahi eta macachanejirisiravacahi ena apavasanana vichamurianahi, tinicahi eta nayehe. Tacahe, te jena sácheana, títecanapa ena máemunacasareanahi ema Santiago, israelítana vichamurianahivare. Te máimahavacapa ema Pedro, titsirihapa éma eta macachanervacahi ena apavasanana vichamurianahi. Vaipa mávarahahini macasiriquivacahini. Tipicahi eta nacaecahirahi ena tímicapicauchanahi eta nayeherepianahi ena israelítana. ¹³ Tacahe, ena apamuriana israelítana vichamurianahi, énerichuvare éna náehicapa eta máejecepiravahi ema Pedro. Térajicavanavare éna apanava. Émaripa ema Bernabé máehicavarepa eta náejecepiravahi éna. ¹⁴ Tacahe, te nímahapa núti eta náejecepiravahi, vahi táurihini eta náichaquenehi, nucajachapa ema Pedro te namirahu ena vichamuriana taicha máejequihapa eta tavanairipihí eta yátupiqueneana máechajiriruvana ema Jesús. Níchapa ema Pedro: "¿Tájaha tacayema eta pitsirihahi ena vijaneanana israelítana eta picachaneravacahi ena apamuriana vichamuriana apavasanana? Pémitisicavapuca eta israelítavirahi cape juca pítaresirahi, táitusiava eta picachanejiricavacahi ena apavasanana vichamurianahi. Tásiha puiti, eta pímaripa náitecapirahi ena vijaneananarichu násihaqueneanahi te Jerusalén, péquecavavarepa nayehe. Váipa pávaraha picachanehini ena apavasananahi vichamurianahi ticutiripahi eta vahi vichamurianainahini éna. Pivarahapuca náepiyacava israelítanáina éna apanavare" níchapa ema Pedro.

NAMUTUCHUCHA TIJACAPACAREANAYA ME VIYA NÁCANI NAVARAHAYA TÉHCANAYARE ENA JESÚS

¹⁵ Tacahe, numetacavacapa namutu eta juca yátupiquenehi: Véchahi víti eta vahi tácomesaimahi vítauchahini eta nayeherepianaini ena viáchucaveanaini. Tarataripahi eta véhisirahi ema Jesucristo, vijacaparéipa vimutu eta mayehe ema Viya. Énaripa ena apavasanana, tayanapanehi náetaviuchahi éna eta nasipeaturaravahi viyehe viti israelítana, títujicavanayarehisera tijacapacareanaya me Viya taicha eta náehisirahi ema Jesucristo. Tayanapane vítamuturuca-

hipuca eta mavanairipiana ema Moiséini, tájina vahi vájacapacaré mahi víti eta me Viya táicha. Vimutu vijacapacare eta me Viya táichavenechucha eta véhisirahi ema Jesús.

¹⁷ Natiarihipuca ena téjecapavanahi te napaneruana, ánipuca nacahehi eta náechajiriruvahi: “Yátupipucáji eta vijacapacarehi me Viya táichavenechucha eta véhisiraya ema Cristo, vivetijinapase rapuca tiápajucavainapapuca eta visipecaturaivaya taicha vínajicainapa eta vanairipiana. Tacahe, émapapuca ema Cristo táemesiavaya eta vicapecaturavaya” tacahenapapuca eta napanereruhi. Éna, tímá pachichijírúvachucha te napanereruana. Ema Cristo váhiquene émaina tásiha eta pecatuana.

¹⁸ Eta néhisirainihi apaicape eta vanairipiana, tájina nachucha vahi táimicatatanuhini eta nujacapacarevarehi me Viya taicha váhiquene étaparacaina. Eta tacahe, níñajicahi eta néhisirainihi. Nímatiripasera eta nujacapacarevarehi me Viya táichavene eta nucasiñairahi eta mayehe. Puíticha tiúripa eta nítaresirahi me Viya. Tásiha, ichapenapahini eta néjecapiravaya núti apana, te nuchavapuca néhica eta mavanairipiana ema Moiséini. ²⁰ Eta nusuapirahi eta máepenirahi ema Cristo te crusu, nujacapacarehi me Viya. Puiti, vaipa nútijivaina necha eta nítaresirahi. Émapa téchanuhi ema Cristo tamutu eta nítaresirahi. Émapa nucasiñahi taicha yátupihini eta macasiñacarevahi taicha yátupiquenehi Machichahi ema Viya. Eta máemunasiranuhi, tímijararecavahi níchavenehi núti. ²¹ Vahi némpururecaimahi núti eta máemunasiranuhi ema Viya. Nararihisera ena tímijachavanahi tijacapacareana mayehe táichavenechucha eta navairairahi náitaucha eta vanairipiana. Ena nani, tímicutijiricavahi náempururecahi eta mapanereru étapa eta máemunasiravacahi. Tímicutijiricavahi náempururecavare eta máepenirahi ema Jesucristo te crusu.

Tacarichuchucha eta vicasiñairahi ema Jesús, vijacaparéipa me Viya

3 ¡Páurehechapucaini, eti nuparapenaveana gálatana! Ímijachaipapuca étupicavahi eta juca ecahehi. Íñajicavanepa eta éhisirainihi eta yátupique neanahi. Vímicatichaheripahi eta iúricacarevahi tásihaquenehi eta máepenirahi ema Viáquenu Jesucristo te crusu. ¿Tájaha tacayema émpururecahi eta juca iúricacarevayahini? ² Esamanuchaha, puiti nuvaraha numetacaheyare. Eta mávahásirahehi ema Espiritu Santo, éta tíchahi eta éhisirahi ema Jesucristo. Vahi étainahini taicha eta íturaivainahipucaini eta vanairipiana. ³ ¡Tétavicavapa eta esunsuvavaca éti! Te épanavapa eta éhisirahi, tájinainiripahi íchiravainahini máicha ema Espiritu Santo. Éma tétumechahehi. Puítiserá éti evarahapa íñajicaya eta mávahásirahénihini, ímijachaipapuca eta ticuchucaheyare eta éjairavanahi. ⁴ Tamapurujinapapuca eta máimicatasirahehi ema Espiritu Santo. Németeacaserá núti vuíchaha émpururecavaimahi. ⁵ Ema Viya tíjaracaheripahi ema Espiritu Santo eta mávahásirahehi. Tímechahevare

eta tíramicareana. Étaripa macatajisirahéhi táichavenehi eta ecasiñavairahi tayehe eta máechajiriruvana. Étasera eta íturaivainahipucaini eta vanairipiana, tájinainapa táimijaracahehini.

⁶ Énerichuvare macahehi ema viáchucaini Abraham. Ticasiñavahi éma tayehe eta máechajiriruvana ema Viya. Tásiha, ema Viya, ichape eta majacapirahi éma. Máemitisicahi tamutu eta máejecapiravanahi. ⁷ Puiti, yátupina ácaicutiara eta juca: Te yátupina vicasiñava me Viya, vijacapacareya mayehe, taicha vicutiyare ema viáchucaini Abraham eta macasiñavairahi me Viya. ⁸ Ema Viya mametacahi ema Abraham eta najacapacarevahi mayehe, nácani ticasíñavanayare éma. Áni macahehi eta máichirahi: “Tétavicavayare eta náuricacarevayare ena achaneana te tamutu avasareana nácani vicutivianayare eta picasiñairanuhi núti” máichapa ema Viya. ⁹ Tásiha, víti vicasiñanahi puiti, tétavicavayarehi eta viúricacarevayare, taicha vicutinapa ema Abraham eta macasiñairahi ema Viya.

¹⁰ Natiarihisera ena tímijachavanahi tijacapacareanayare me Viya táichavenehi eta navairairahi náitamuturuca eta vanairipiana. Téjecapavanapahisera. Taicha ani tacahe eta vanairipi: “Tamutu sácheana ítauchayare tamutu eta juca vanairipiana. Te éjequiha apaesachichaina, éta tímicuñacaheyare”. Váhiquenesera naratahahini náitaucha tamutu eta vanairipiana. Eta tacahe, náviraichu ticaicuñaya, vahi tijacapacareanaimahi. Ánivare tacahe eta vanairipi: “Te ítamuturuca eta vanairipiana, máichecuaraquireyare eta ítaresirayare táicha”. Tásiha, vímatiequeneha eta juca: Eta náitamuturusira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahe eta Sagrada Escritura: “Nácani ticasíñavanahi me Viya, tijacapacareanahi, máichecuaraquireyare eta náitaresiraya táicha”. Tásiha, nuvaraha ácaicutiara eta juca: Eta vijacapacarevahi tásihahi eta vicasiñavairahi me Viya. Eta vítauchirapuca eta vanairipiana, tájina étaparacainahini tayehe eta vijacapacareva me Viya. ¹³ Ánivare tacahe eta Sagrada Escritura: “Mácani achane ichape eta maviureva, ticaetatacasiyarehi te yucuqui. Eta táicutiarahi eta máicuñasirayare ema Viya eta máchaneva”. Víti achaneana, ichape eta vícuñayahini taicha eta vimaitauchirahi tamutu eta vanairipiana. Émasera ema Jesucristo, tépeninahavihi te crusu, tamuriasirahi tamutu eta vícuñayahini víti. ¹⁴ Éma máichahi eta juca, mavarairahi eta iúricacarevayare eti apavasanana táichavenehi eta ecutirahi ema Abraham eta macasiñairahi ema Viya. Puiti, tétavicavahi eta viúricacareva vimutu, taicha tiávahácahavihi ema Espiritu Santo máijjarahavihi ema Viya táichavenehi eta vicasiñairahi ema Jesucristo.

Tájinachucha tájaracahavi eta véhisirahi eta mavanairipiana ema Moiséini. Macarichu ema Viya tíjaracahaviya eta viúricacarevaya.

¹⁵ Nuparapenaveana, nuvaraha nímicutiarachináheyare eta juca. Te matarihipuca ema achane, te

tépiyarecahi tratu mayehe ema apana achane, nafirmachayarehi eta natratunehi. Tásiha, nafirma-charipa eta natratunehi, vaipa táuricaímahi nacaepaha eta tacajuquenehi. Nájinapavare tihapapicaímahi. ¹⁶ Ene macahehi ema Viya eta matratunehi mayehe ema Abraham. Ani macahehi: “Níjaracaviyare píti eta piúricacarevayare. Énerichuvare níjaracayare eta máuricacarevayare ema piámariéquenezare” macahepa ema Viya. Tacahe, émanarichuhi ema mámariequenehi ema táimijarechaquenehi eta matratune, vahi námutihini ena nasimutuvaqueneanayarehi mámariequeneanayarehi ema Abraham. Émahí ema ticaijarehi Cristo. ¹⁷ Tiuri puiti, nuvaraha nímicacherachaya eta eyehe: Eta juca matratunehi ema Viya mayehe ema Abraham, mafirmachaquenehi eta májjarasirayare eta náuricacarevaya nácani ticasifñavana eta mayehe. Étasera eta táetavisiravahi eta 430 áñoripahi, te májuchapa ema Moiséini eta vanairipianahi, vahi macaepahahini ema Viya eta matratunehi, váhivare máitsivachahini eta májjarasirayarehi ema Jesús, mámariequenehi ema Abraham. ¹⁸ Ema Viya mametacahi ema Abraham eta májjarasirayare eta máuricacarevayare, taicha eta máemunasirahi éma. Ene vicahehi víti. Ema Viya tíjaracahaviyare eta viúricacareva taicha témunacahavihi. Eta viúricacarevaya, vahi étainahini eta vítauchirainahipucaini eta vanairipiana. ¹⁹ Etiarihipuca eti evaraha eyaserecanu, ánipapuca ecaheya: “Te yátupipuca vaipa étaparacaina eta vítauchiraina eta vanairipiana, ¿tájahasrapuca tacayemahi eta mavanasirahi ema Viya májucha ema Moiséini eta juca mavanairipiana?” Tiuri, puiti numetacaheya: Yátupi ema Viya máimivanerecahi ema Moiséini májucha eta vanairipiana, taicha mavarahahi máimimatichayare ena achaneana eta tamaurivahi eta pecatuana. Téhesera te títecapapa ema Cristo, vaipa táimiyannahini tasuapacarehini eta mavanairipianahi ema Moiséini. Arairupa tamutu eta véhiruhi maicha ema Jesús. Yátupi ema Viya matupiruvahi eta máechajisirahi ema Abraham. Vahi máimivanerecahini ema Viya, émajacarávahi éma, eta máechajisirahi. Émasera ema Moiséini macaimitucasiquenechucha nayehe ena ángeleana.

Eta mavanairipiana ema Moiséini tivanecahavi vahi vicuquicha eta pecatuana taicha tíñehicarehi eta júcana mayehe ema Viya

²¹ Puiti németeaca etiarihichaha eti ímijachahipuca tacarichuhi téhicacarehi eta vanairipiana. Esamanuchaha. Váhiquene étaimahi vájacapacarehini eta me Viya. Váhivare étainayare ticaitarecahaviyare. ²² Esama eta juca máechajiriruvahi ema Viya eta te Sagrada Escritura, ani tacahe: “Náicuchirichuhi eta náicuñayarehi namutu ena achaneana taicha eta napecaturanahi” tacahepa. Jararihiserá eta viúchucuirayare taicha tíjaracavahi ema Viya ticuchucuhahaviyare vimutu víti vicasifñanaya ema Machicha Jesucristo. ²³ Ánaquiaparipe eta tacaratasiravacahi eta mavanairipiana ema Moiséini nayehe ena israelítana náchucanaveanaini núti. Vahi táisapahini tasimutihichaini eta napecat-

turana. Tiámainucavapa te títecapapa ema Jesucristo, émapa tímitucahavihi eta arairuyarehi eta véhiruyare. ²⁴ Táitaurevaquene eta mavanairipiana ema Moiséini eta típcararécahavihi tayehe eta táíñehicarevahi eta vicapecaturairana. Éta, tétupiricahavihi tacutihí mácani profesor eta máetupirisiravacahi eta napanereruana ena máimitureana. Ene tacahehi eta táechapajirisirahavihi eta mavanairipiana ema Moiséini. Puítisera eta máitecapiraipahi ema Jesucristo, émapa véhicayare, vijacapacarénapa me Viya taicha eta vicasifñairahi ema Jesús. ²⁵ Puíticha, émainapa véhicayare éma, vaipa étaimahi véhica eta mavanairipiana ema Moiséini. ²⁶ Puiti, eta ecasifñairapa ema Jesucristo, machichaheripa ema Viya. ²⁷ Puiti, eta ecaicachasirahi te májjarare ema Jesucristo, tiávahácaheripa éma, éti ecutinapa eta máurivahi. ²⁸ Tayanapane apavasasajuecuhehi éti; tayanapanehivare ecasiriquíqúijihí eti ajairana, ena esenana; tayanapanehivare músuanapuca, líbrianapuca. Téhesera te mamirahu ema Viya, étanarichuhi eta vímahí. ²⁹ Puiti machichaheripa ema Cristo; tásiha, ecutiripa mámariequenehénahini ema Abraham. Ímaequeneharichucha eta matratunehi ema Viya eta májjarasiraheyare eta iúricacarevaya táicha.

4 Esamanuchaha. Nuvaraha nímicutiarachináheyare. Te matiarhipuca ema achane camurihi eta máimahaqueneana te mapena, te matiarhipuca ema machicha, téhesera te amaperurichaha éma, natiarhiyarehi ena téchapajiricanayare, énapa ena tímitucanayareva. Vahi náisapaimahi mamápachichijicaímahi eta máimahaqueneanahi ema maiya, tayanapane émahinéni ticayeheyare tamutu. Tiámainucavasera te máimahapa ema maiya eta máechema-raivahi ema machicha, máisapainapa eta máemamaca eta máimahaqueneanahi. ³ Ene vicahehi víti cape juca viásinequene te vuíchaha vímatihini ema Cristo, vicutinihi ena amaperuana. Tipamicahavianahi véhica eta nayeheripiana ena viáchucanaveanaini. ⁴ Émasera ema Viya, te máimaha tiuri eta táitauchiravayarepa eta mapaneruhi, máevatacapa ema Machicha te juca apaquehe. Ema Jesús, tiáchanechavapa te sujuhe esu maena. Eta máuchusirahi, vivasimahi eta vicaqueherahi víti achaneana. Eta majurusirahi, ticaravahupa eta viyeherepiana víti israelítana. ⁵ Eta tímitecahi éma, mavarahahi ticuchucuhahaviyare víti achaneana. Mavarahahivare vimutu vijacapacareyarepa me Viya, machichahaviyarepa. ⁶ Puiti, eta machichairaheripa ema Viya, tíjaracaheripa ema Espíritu Santo tiávahácaheripa te esamureana. Émapa témechahehi mayehe ema Viya, tímitucahepa eta eyujarauchiravaya: “Tátachicha Vicaiyaquene” ecahenapa. ⁷ Tacahehira eta machichairaheripa, vaipa ísapaimahi nácani napamicahéhini tayehe eta nayeheripiana. Tíjaracaheripa ema Cristo eta iúrivaya, iúchucuirayare máicha.

Ema Pablo, nahapasamurechahi ena machamuriana

⁸ Cape juca iásinequenehi éti, vuíchaha ímatihini ema Viya, váhivare epicauchahini éma. Énachucha epicauchavacahi ena esifñarajiana. Tájina eratahaimahi

émitisica eta eyujarauchirahi tayehe. Éna, vahi yátupinahini víyanainahini, váhivare távahácavacaimahi eta máchaneva ema Viya. ⁹ Puítisera, ímatipa ema yátupiquenehi Viya. Tásiha, énerichuvare éma tímatihevaca, esamacarepa mayehe, taicha machichaheripa. Tásiha puiti, ¿tájaha tacayema evarahavarepa echavayare eta ecasiñayare eta esiñarajiana? Eta ecasiñasanahi, tájina vahi tisamaheanaimahi, váhivare tímica-tacaheanaimahi tayehe eta panererucana. ¿Tájaha tacayema ísapava napamicahe eta ítauchira eta nayeherepiana? ¹⁰ ¿Tájaha tacayema enasirichuhi epicaucha eta piéstamuhuana, étape eta aracherumuhuana caje? ¹¹ ¡Ichape eta néñamiravahi eyehe! ¡Tájuricati támápurujipahi eta juca nímitusirahehi!

¹² Esamanuchaha, nuparapenaveana. Nuvaraha vácuticacahini eta vipaneruana. Váhini vicuehicaini eta nayeherepiana ena achaneana. Németeaca esuapanu taicha vahi eyacujiequenehanuhini. ¹³ Éti etupiruvahi ejacapanu cape te nítecaínapa eta ara eyehe. Écharichuhi eta nucajumairapahi te nítecapauchehapa. Etupiruvahisera esuapa eta numetarairuhi eta eyehe. ¹⁴ Vahi ecaecahinuhini eta nucajumairapahi. Váhivare épurunuhini. Tiúrihi eta ejacapiranuhi tímicutijiricavainehi ángelenuinahini, Cristonuinahipucaini. ¹⁵ Ichape eta iúrisamurevahi te jena sácheana eta návihairahi eyehe. Nímatihi tétavicaivahi eta émunasiranuhi. Te nucamunuvahi, evarahahi íjaracanu eta ecayehequeneana. Tájina éñamahini. Ichape eta nucunachirahehi. Tacahe, máejeha néchajisihaha eta émunasiranuhi.

¹⁶ Eti ímijachapapuca nucaticirahehi eta numetasirahehi puiti eta juca yátupiqueneana. ¹⁷ Ena nani téchapajiricaheanahi, váhisera tátupiruvahini eta náemunasirahehi, navarairachucha típichasicheanayare apaesa vahi ecusuapanu núti, eta vaipa ecuehicanuhi. Navarahahivare éhicayare eta nayeherepiana apaesa énaínapa échapajiricayarehi. ¹⁸ Tiuri, núti vahi nucaticha eta ítatiraina ena apamuriana achaneana. Táurisera eta náemunasiráhena tácuti eta némunasirahehi núti. Éti apanavare evapinavayare tácutirichu te nutiarihihi eyehe. ¹⁹ Nuchichanavechichana, tétavicaivapa tacativa nusama taicha eta ímipanerereriranuhi. Ticutirinehi súcani esena ticatiruhapa, taicha ticatíhi susama eta amuya. Ene nucahehi núti eta nucatisamureravahi, néñamiravahi icha éti. Nuvaraha ácutini ema Cristo eta máurivahi. Tiámainucava te nímahepa ecutinasipa éma eta máurivahi, núrismurenapa ícha. ²⁰ Eta tacahe, nuvarahanecha níjahúchavahini nítecapauchaha. Nútijacaruvainapáini néchajiricavahini eta eyehe eta nímitusirahenahini. Ichapemurihi eta ímipanererésiranuhi.

Éma Pablo máimicuticha ena apinana machichana ema Abraham

²¹ Éti evarahapa éhica eta mayeherepianaini ema Moiséini, puiti nuvaraha níminicapaequenehaheya eta táechajiriruvahi eta Sagrada Escritura mayehe ema Abraham. ²² Táechajisihahi éma, apinanairahi ena

machichanaveana ajairana. Ema máinapurehi machicha ticaijarehi Ismael, esu maena ticaijaru Agar. Ema máequenereruhi machicha ticaijarehi Isaac, esu maena ticaijaru Sara. Esu Sara, mayenaquenehi ema Abraham. Esu Agar, suvanarahi esu Sara. ²³ Esu Agar, araitanaichahahi ésu, te sucachichainapa ema Ismael. Ésusera esu Sara macheruhi eta suítaresirahi. Étasera eta máitupajijiasiravahi ema Viya, máijaracapa ema suchichahi Isaac. Taicha ema Viya máechajicahi ema Abraham, ánipa macahe: “Esu piyena Sara ticachichayare. Ajairayare ema suchicha”. ²⁴ Puiti, nuvaraha nímicutiarachinaheya nayehe ena nani apinana esenana. Esu Sara, tájina suímatiyahini eta vanaracacare, nájina nahapapiricahini ésu. Ene vicahehi víti eta véhisirahi ema Cristo, nájina tihapapiricahavimahi. Vahi suácutihini esu Agar, tapamicahi eta suémata-nereripi taicha sirvientahi ésu. Ene nacahehi ena israelítana náchucanaveanaini núti, napamicasivahi naicha tayehe eta nayeherepianaini. Étarichuhi eta vanairipiana májuchaqueneanahi ema Moiséini te mávihaipahi eta te anuquehe mari ticaijarehi Sinaí, táupahiva eta provincia Arabia, návasahi ena suámariequeneanaini esu Agar. Puíticha ena nujaneanana tachichanaveanahi eta Jerusalén nanasirichuhi eta tapamisiravacahi eta vanairipiana. ²⁶ Jararihisera eta apanahivare avasare ticaijare Jerusalén, tiávihihi te anuma. Víti tachichanaveanahi. Vaipa vítiparacainahini tapamicahivihini eta vanairipianaini. ²⁷ Ema Viya máechajisihahi eta te Sagrada Escritura eta juca arairu Jerusalén. Máimicutichinahi esu ésuna esena. Ánipa macahe: “Piti esena macheruvinihi eta pítaresirahi, tájina vahi pímatihini eta tacativa eta amuya. Puítisera tétavicaivainapa eta piúrisamurevaya. Vaipa pánasimahi macheruvimahi taicha nárjapainapa ena pichichanaveanaya níjararuviyare núti. Picachuricainapa nácani esenana ticachicharahiana” —macahepa ema Viya.

²⁸ Nuparapenaveana, víti véhicanahi ema Jesus, vítira tachichahavianahi eta arairu Jerusalén, taicha vituparairahairahi eta tachichairahaviyare tacuti eta sucatuparairahairahi esu Sara mayehe ema Viya, eta sucachicharayare ema Isaac. ²⁹ Tacahe, ema Ismael, suchicha esu Agar, macatianacapa ema amuya Isaac, ema suchicha esu Sara máijararuhi ema Espíritu Santo. Puíticha, tanasirichuhi eta nacatianasirahavihi ena téhicanahi eta vanairipiana vimutu víti mávaháruanahi ema Espíritu Santo. ³⁰ Ánivarepa tacahe eta Sagrada Escritura: “Pivaneca esu Agar émapa ema suchicha, nayana náchuca eta piyehe. Taicha vahi táuricahini mavehahini eta pímahequeneana te táitecapapa eta pépeniraina. Macarichuyare ema pichicha suyehe esu piyenaquene tivehayare tamutu” tacahepa. ³¹ Nuparapenaveana, ene vicahehi víti. Vahi vácutihini ema suchicha esu sirvienta. Vicutihini víti ema Isaac eta tamajinairahi eta vipamicasivainahini eta vítauchiraya eta vanairipiana, maicha ema Jesús.

Vímiyanavachucha véhica ema Jesús. Vahi vicuehica eta mavanairipiana ema Moiséini.

5 Puiti nuvaraha yátupina ácaicutiara eta macatiuchirahehi ema Cristo, eta vaipa étaparacainayare ítaucha eta vanairipiana. Váipavare ecuisapava te náviraichupuca napamicahe, taicha ticajerayare eta ítauchiraina, machu ajirehéna táicha. Étipasera tacamunu étumechava te nayehe ena nani.

² Nuti Pablo nutupiruva numetacahe: Te ísapavapuca namarcachahe, tímicutijiricavahi tépurucarehi eyehe ema Cristo. Tímicutijiricahivare vahi márataha ticuchucuahe éti. ³ Énerichuvare numetacahe: Namutu nácani ajairana tísapavanayare ticamarcana, tacamunuhi náitauchayare tamutu eta vanairipiana. Tájina ánichichaimahi náejequihaimahi éta. ⁴ Eti enerejiruvana éhica eta vanairipiana, ímijachapapuca ejacapacareipa mayehe ema Viya. Émepurecaripasera eta máemunasirahehi ema Viya. Émepurecavare eta máimicasirahehi ema Cristo. ⁵ Vítisera viti vicasiñanahi ema Jesucristo vicunearipa eta majacapirahaviya ema Viya máichavenehi ema Espiritu Santo eta mávahásirahavihi. ⁶ Eta mávahásirahavi ema Jesucristo, vahi étaparacaimahi eta vicamarcapucaini. Tacarichu ticamunucarehi eta vicasiñairayare yátupina éma, vémunarahinapa eta vítaresiraya.

⁷ Éti, iúrinipahi eta éhisirahi ema Jesús. ¿Tájahase rapuca tacayemahi eta evarairahi ecainajiruva? Ísapavayarepa tiyuracaheana, tímijnajicaheanayarepaini eta yátupiqueneanahi. ⁸ Éti máichuhaqueneanarichuhi ema Viya eta éhisiraya eta yátupiqueneanahi. Váhiquene mávarahahini ísapavahini nácani nahapapicahehina. ⁹ Échapavaicha nayehe ena tiyurarahiana, machu napareacahe. ¹⁰ Nútisera nucasiñavahi eta me Viáquenu eta mamaisapiraheyare ínajicava. Németeacahi vahi ínajicaimahi eta nímiturapianahi. Émasera ema Viya téchahi eta juca náicuñayare nácani tivarahanahehi tihapapicaheana.

¹¹ Esamanurichuhi, eti nuparapenaveana. Natarihipuca nácani tépiyaequenehanuanahi eta nupamisirahehi ecomarca eti nuchamurianahi apavasananahi. Étasera eta nímitusirahehi, tájina váhiquene nupamicahini eta ecomarcairayare. Nasapihapa ena nujaneanana israelítana tipanjiricanuanahi taicha vahi nupamicahini ecomarca. Étara tímiyusemacavacahi eta nasamirahi eta nucametarairuirahi eta víuchucuiraya táichavenehi eta máepenirahi te crusu ema Jesús. ¹² Ena nani tipamicahenahi ecomarca, ¡náechaticavaichaha énajivaina! ¡Nuvarahasa yátupinapaini náechatihicavaini!

¹³ Taicha eti nuparapenaveana, vahi étaina tímichuhahehi mayehe ema Viya eta éhicayare eta mavanairipiana ema Moiséini. Váhivaresera étijiricavaimahi íchayarehi eta evarahaqueneanahi tauriqueneana. Ema Viya tíchuhahehi, mavarairahi étijivaya ítátijiricayarehi taicha eta émunasiracacainahi. ¹⁴ Ema ticavnairipi, ánipa macahe: “Pémunaca ema piparaepiya tacuti eta pémunasiravahi píti” macahepa. Te vítaucha-

puca yátupi eta juca mavanairipi, vahi tácjera eta vítauchiraina jácani apana vanairipi. ¹⁵ Vahi táurica ecatichajiricacahini. Váhivare táurica ecatianajiricacahini, machu étijivaina ecomitieuquenehacaca.

Ema Espiritu Santo tímicitacahavi eta vahi vicusuapa eta tajamurachaqueneanahi eta viáquehe

¹⁶ Esamanuchaha. Ema Espiritu Santo mavaraha tímicitacahavi eta vahi vicusuapa eta tajamurachaqueneanahi eta viáqueheana. Étasera eta viáquehe vahi táisapa eta víchiraina eta táuriqueneana. Étachucha tavaraha vicha eta tajamurachaqueneanahi. Eta tacahe, ichapemurihi eta tacanarairahi ema Espiritu Santo. Tacahe, nécatiacachecha puiti eta esuapirainaiha eta mavarahaqueneanahi maicha ema Espiritu Santo eta eyehe. ¹⁸ Eta tacahe, éti, te émainapuca ema Espiritu Santo tímítucahe, máejeha eta íchiraina eta táuriqueneana. Vahi étaparacaimahi eta episira eta ícuñayarepuca, táichavenehi eta jácani éjecapiravanapuca tayehe eta vanairipiana.

¹⁹ Tímaticareanahi eta tauriquenehi eta náichaqueneana ena tisuapanahi eta tavarahaquenehi eta náquehe: Navehapa esu apana esena, ésupa esu esena suvehapa ema apana achane. Ena amaperuana náichahi eta natuhusivanahi. Nararihi ena tivehacacani ena nacutiqueneana ajairana. Tavayuasiravacahi eta najamuraraivanahi. ²⁰ Natanucahi eta nasiñarajiyare. Nacaravahuhi eta iápemarecáre. Ticitianarecanahi tise macacani. Téteajiricacani. Apaesarichu nacamunu tise manaripavare. Énachucha navaraha tíucavana, nacachuriaracapa mácani achane. Típutsimuriávanapa nayehe nácani apamuriana. Vaipa navaraha tipauchacacana. ²¹ Ticapinarucacana. Ticapahianapa. Ticavaharasianavare. Piéstamareana. Tamutuchucha naicha eta tájiparacana. Puiti numetacavehare nápechava, tacutihi eta numetasi-rahahi cape juca viásinequenehi. Vahi títujicavnaimahi tisiapana te mávasa ema Viya ena tíchanahi eta juca tauriqueneanahi.

²² Vítisera, tiávahácahavihi ema Espiritu Santo. Te vísapá éma, tíjaracahavihi eta vémunaravaya. Viúrisamurercavayare, tinaracainapa eta vipanereruana máicha. Tíjaracahavi eta vicayeheraya paciencia. Vijapanurahiya máicha. Vicajiraivayareva máicha. Vítaurahiya. Vétaviuchaya eta viúrivayare. Tímicitacahaviya eta vijaneasiravaya apaesa vahi vicuquicha eta tauriqueneanahi. ²³ Te vítauchahi tamutu eta júcana, vicurisamurechahi ema Viya †. ²⁴ Tacahe, viti véhicanaripa ema Jesucristo, vaipa víchaimahi eta tauriqueneanahi tajamurachaqueneanahi eta viáquehe. ²⁵ Tásapihapapuca, eta mávahásirahaviripa ema Espiritu Santo, vísapavaya vámutu eta mavarahaqueneana máichayare te viáquehe. ²⁶ Vaipa táuricahini ecasiñavaicahini ecapinarujiricacahipucaini.

† Ema Pablo te mayeherepi eta máechajiriruvana, ani macahe: “Tájina jácani vanairipi tapamicahavini vahi vícha eta juca táuriqueneana”. Étasera eta macayemaquenehi, ani tacahe: “Vicatuparaha víchayarehi tamutu eta juca táuriqueneana”.

Váhivare etanucaimahi eta semanere mayehe mácani echamuri.

Vímicatajiricacayare

6 Nuparapenaveana, te natiarihipuca ímaha téjeca-pavanahi ena vichamuriana, econsejachayare éti ímatiequeneharipa maicha ema Espíritu Santo. Táuris-era eta échajirisiraina. Ecauneuchava éti apanava, machu iáquipaicava tayehe eta máquipaisiavahi ema echamuri. ² Ímicatacaca eta ecatiuchiravaina eta jácani íchararacavanahi. Ene tacahehi eta ítauchirahi eta manairipi ema Viáquenu Jesucristo, étaripa eta vémunasiracacayarehi. ³ Taicha nararihi ena tímijachavanahi vahi tiáquipaicavanaimahi tayehe eta pecatua-na. Vahi ecucahe éti. Vahi tacaemuñavacarehini, taicha eta juca vahi tánecapácare. ⁴ Váhivare tácaemuñavacare vácahehipucaini: “Núti, váhirichu nusipecatura. Núripana nayehe ena apamurirana”. Te viúrihipuca, vimatinairayarechucha. Víti véchinavahi eta viúrivahi eta vítaresirahi. ⁵ Véchaquenevapáchupa víti eta vítaresiraya mayehe ema Viya.

⁶ Nutuparacahe eta apana. Ecajiyare eta ímaha-queneana mácani tímitucahe eta máechajiriruva ema Viya, taicha eyeheyarehi eta máimiturapiana eta tiúrichaheyarehi.

⁷ Numetacahevare eta apana. Nuvaraha étupiricaya eta epanereruana. Machu ecatianaca ema Viya. Taicha te icha eta pecatua-na, yátupiqueneyare eta ecamitie-quenehavayare. ⁸ Te icha eta tájiparácana tavaraha-queneanahi eta iáqueheana, étarichuhi ticamitiequenehaheyare eta ítaresirana, tímicuñacaheyareva. Téhesera icha eta táuriqueneana mavarahaqueneanahi ema Espíritu Santo, yátupina táurina eta ítaresira. Ímahayareva eta iúchucuiraya, máichecuarquirénapa eta iúricacarevaya. ⁹ Eta tacahe, vahi vicucainajiruva eta víchirahi eta táuriqueneana. Váhivare vicuyacujie-quenehava eta vicuchapirahi eta vícuchihi mayehe ema Viya te táitecapapa eta jena sáchezare máijarasirahaviyare. ¹⁰ Táitusiava, te tatiarihinapuca eta vicamunucarevana nayehe ena achaneana, te vímahahipuca eta nacamunuiravahi, vítijivayare víchayare eta táuriqueneana nayehe. Tavetijipa te énahipuca

tipauchahavianahi ena vichamurianahi tayehe eta juca véhiruhi, vicajiyarehi éna.

Eta táichecuarqui eta máechajiriruva ema Pablo

¹¹ Ímaha ichapevacanecha eta juca nuletrana. Nuvahurupajipa núti eta juca nucajureirahehi éti. ¹² Ena nujaneanana israelítana, tétavicavahi eta nasemanevahi viyehe viti vicametarairuhi eta viúchucuiraya táichavenehi eta máepenirahi ema Cristo te crusu. Tásiha, ena nani ticamesajiricaheanahi navaraha ecamarcaya, éna navaraha témemunacavanayare nayehe ena nujaneanana, apaesa vaipa nacupanajiricavaca. Navaraha nahapapicayarehi eta nasemaneva. ¹³ Navarahahivare ticunachavanayare eta nacamesairahahi ecamarca te iáquehe, náimiturehéna éti eta éhisiraina eta vanairipiana. Énayapasica vahi náitauchahini támutuhini eta vanairipiana. ¹⁴ Nútisera, eta nítaresirahi, nuvavinavahi ichape maicha ema Jesucristo, máepeninanuhi te crusu níchavenehi núti. Tacahe, núti apana nínajicaripa eta néhisirainahini eta tayaherepiana eta apaquehe. Vaipa nútiparacaina tayehe, taicha eta máepenirahi níchavenehi núti.

¹⁵ Eta mávahásirahavihi ema Jesucristo, tamuturipa arairuhi eta vítaresira. Apanapa eta viyeherepiyare. Vaipa étaparacaimahi eta viyeherepiana ichasique-neanahi, váhivare eta vicamarcapucaini te viáquehe. ¹⁶ Éti, te esuapa eta juca nímiturapianahi eyehe, nuvaraha májapanuhehini ema Viya, máijaracahehini táurivaina eta epanereruana taicha eti yátupiquenehi machanerahehi ema Viya.

¹⁷ Tiuri puiti, németeaca núti tájina táeñamavacarehíni eta esuapajiraivahi eta nuyehé, váhivare ísapavahíni ena nácani ticamesajiricaheanahipuca éhica eta nayeherepiana. Núti, yátupiquenenuhi apóstolenuhi mayehe ema Viáquenu Jesús. Eta juca nujaranahi te náquehe, éta tímereuchanuhi eta yátupiquenérachi eta nucaemataneasirahi éma.

¹⁸ Nuparapenaveana, nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

Efesios

1 Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaquene, navairahi nímitucaya ena achaneana eta máechajiriruvana. Tásiha puiti, nucajurehe eta juca carta eyehe eti nuchamuriana ecavasanahi tayehe eta avasare Efeso, taicha éti machaneraheripa ema Viya, táuriquenehi eta éhisirahi ema Jesucristo. ² Nuvaraha macatajicahehinehi ichape ema Tata Vicaiyaquene, émapa ema Viáquenu Jesucristo. Nájaracahehinehi eta táurivaina eta epanereruana.

Tétavicavahi eta viúricacarevana táchavenehi eta viúrujasirahi ema Jesucristo

³ Núti nucunachaparaca ema Viya, ema Macaiyaquene ema Viáquenu Jesucristo taicha ichape eta máimicatasirahavihi táchavenehi eta viúrujasirahi ema Cristo. Puiti tachichahaviripa eta anuma. Ichape eta viúricacarevahi maicha ema Espíritu Santo.

⁴ Acane, te tamirahu eta táepaniravapa eta apaquehe, ema Viya tétavicavahi eta máemunasirahi namutu ena achaneana natiarihiqueneanayarehi. Tásiha, émajivapa manacahi eta mapanereruhi eta mavarahaquenehi, étarichuhi eta majacapirayarehi namutu ena ticasañavanayare mayehe ema Machicha Jesucristo. Eta viúrujasirayare ema Jesucristo, yátupiqueneyarehi machichahavi, matapiravarehaviyarehi te mamirahu, sántohaviyarevare. ⁶ Taicha mavarahahi vijirauchayare éma, vítsirijicavayarehi eta táetaviuchirava eta máemunasirahavihi. Mavarahahivare ichape eta viúricacarevana táchavenehi eta viúrujasiraya ema máemunaruquene Machicha. ⁷ Tásiha ema Viya, tíurihi eta máimaira, máimerecahi eta máemunasirahavihi ichape. Tíjaracahavihi ema Machicha tépeninahaviyarehi eta macaepahairayare eta vipecaturana, viúchucuhayarehi máicha. Énerichuvare tíjaracahavivare eta véchemaraivaya vímatiequenehairaya ichape, taicha tímitucahavihi eta mapanereruana. Váhisera máimerecavanehinehi eta juca mapanereruanahi acane; tapaemunava te tíucupaicapa ema Machicha. Tivapinavahi éma eta máítauchiraya eta mapanereruanahi ema Maiya. ¹⁰ Tamutu eta juca mapanereruanahi títauchavayarepahi, jácani tatuparaquipahi. Te jena sáchezare manerejicaripa, ema Viya manacainapa ema Machicha Jesucristo aquenucaquenehi, téchayarehi tamutu eta táichararacavana. Nasuapayarehiva namutu ena tiávihanahi te anuma, énapa ena tiávihanahi te juca apaquehe.

¹¹ Eta acane te tépanavainapa, ema Viya máetupiricapa eta mapanereruhi. Vahi máejequihahinehi. Tásiha, manacapa eta mavarahaquenehi. Acane tinerejicahavihi machichahaviyarehi vimutu viti viúrujiacana-yarehi ema Jesucristo, mavarairahi tíjaracahavi eta vícuchianahi. ¹² Viti vínapuicanahi véhica ema Cristo, mavarahahi tíuriyare eta vítaresiraya, apaesa nacuna-chayare ema Viya ena apamuriana achaneana eta máimicatasirahavi ichape. ¹³ Tacutiquene éti, te tínapucainapa esama eta máechajiriruva ema Viya eta mavarairahi ticuchucuhahe, enévanehi éhicahe ema Cristo. Tásiha, eta iúrujasiraipe éma, tiávahácaheripavare ema Espíritu Santo. Émapa títametacahe eta machichairahavepa ema Viya. Ema Espíritu Santo, ema vituparahahi vimutu viti vicasañanahi ema Cristo. ¹⁴ Eta mávahásirahavihi éma, títametacahaviparaca eta vijacapiraya eta vícuchianahi mayehe ema Viya te táitecapapa eta viúchucuiraya viti machichanaveanahi. Tásiha, tétavicavainapa eta vicunachirayare ema Viya taicha ichapequene eta máimicatasirahavihi.

Te tiyujaraca ema Pablo, mayaseaca ema Viya eta náitupajijiasiravaina ena téhicanahi ema Jesús

¹⁵ Eta tacahe, núti néchahehi éti tamutu te nuyujaransirana, taicha nusamairiricapa eta yátupirahi éhica ema Viáquenu Jesucristo étapa eta émunajirisiracacahi emutu eti machaneranahi ema Viya. Nuhasulupayachahi ema Viya eyehe. ¹⁷ Éma, macaiyaquenehi ema Viáquenu Jesucristo. Máetaviurehi eta majaraiva te mávihahi te anuma. Nuyaseacahi máijaracahehinehi eta échemaraivainahinehi maicha ema Espíritu Santo, apaesa ímatiequenehinehi yátupina eta emetacasiyanaya eta mapanereruanahi ema Viya. Nuvaraha ímatipai-paichaini éma. ¹⁸ Nuyaseacahivare éma yátupina eta ecaicutiariraya, eti máichuhaqueneanahi éma, eta táetaviuchirayarehi eta viúricacarevayare te jena sáchezare vicuchapaquenehi. Nuyaseacahivare ecaicutiaraya eta táetaviuchirayarehi eta táuricacarevayare eta viáviaya te anuma, vícuchihi viti machanerana ema Viya. ¹⁹ Nuvaraha ecaicutiaravare eta táetaviuchirahi eta máitupajijiasiravahi ema Viya, váhiquene tivitaimahi. Éma, macaemataneacahi eta vítaresira, mavarairahi viúripanayare viti vicasañavanahi mayehe. ²⁰ Ema Viya máimerecahi eta máitupajijiasirava ichape te macaechepucapa ema Cristo te máecari, macaejacapa éma te mavaure tayehe eta anuma mávihahi puiti. ²¹ Ema Cristo, émaripa ichapequenehi aquenuca-nayehe ena ángeleana. Tétavicavahi eta masuapaca-

revahi nayehe. Énerichuvare ena éreanana, mapamicavaca eta nasuapiraina. Éma, tétavicava eta macapicahuirahi. Nájina nácutihini éma. Nájinavare ticachuricaímahí. Apajarahiyarehi eta aquenucaira éma. ²² Ema Viya macaejacahi éma téchahi tamutu eta tatiarihi-queneana. Émaripa vicaiaquenehi vimutu viti machanerana. ²³ Víti, eta viúrujasirahi éma, tímicutijiricavaipahi máquehehavihi te juca apaquehe. Vicaemataneacahi eta táuriqueneana tímicutijiricavahi émainahini macaematanehini, taicha tamutu eta víchaqueneanahi, éma téchahavihi, tétumechahavivare.

Eta máemunasirahavi, ema Viya ticuchucuhavivi tayehe eta vícuñayahíni

2 Ema Viya tíjaracaheripa arairupa eta ítaresira. Tichavapa títareca eta íachanevana, tacuti eta machavirahi títareca ema Cristo te máecari. Taicha éti, cape juca ítaresirahi, tímicutijiricavaichaha épenaque-nénahíni táichavenehi eta evainarajivanaini éta pa eta epecaturanaini. ² Cape juca ítaresirahi éti, éhichavare eta tayeherépiana eta apaquehe, tauriqueneanahi. Esuapahivare eta mavarahaqueneana ema Váinaraji, éma mapamicavacahi ena achaneana masuapajirairahanahi me Viya. ³ Vimutu viti, tacahenihi eta vítaresirahi eta acane. Étachucha véhicahi eta tavarahaqueneana eta viáquehe. Vítijiricavaripahi víchahi eta tajamurachaqueneana eta viáquehe, éta pa eta vipaneruana tauriqueneanahi. Ichapemurihi eta vímiyusemasirahi ema Viya, vicutihi ena apamuriana masuapajirairahanahi mayehe. ⁴ Tímicutijiricavaichaha vépenaque-nénahini táichavenehi eta vípecaturanaini. Tétavicavasera eta majapanuirahavihi ema Viya. Ichapevare eta máemunasirahavihi. Tíjaracahaviripa arairupa eta vítaresira táichavenehi eta viúrujasirahi ema Cristo. (Táichavenehi eta majapanuirahéhi, ticuchucaheharehi.) ⁶ Puiti, eta viávahásirahi ema Cristo, yátupihí eta véchepusiraya, vicaicuchipa eta macaejasirahavinapa tayehe eta viávacureyare te anuma, vicachaneya ema Cristo. ⁷ Eta juca émavenehi ema Viya, mavarahahi máimereca maverahi eta viúricacarevana máijararuhavivare eta viyehe te jena sácheyare, taicha tétavicavahi eta máemunasirahavihi táichavenehi eta viúrujasirahi ema Jesucristo. ⁸ Taicha eta viúchucuirayare eta viápechiravaya vítareca, étavenehi eta majapanuirahavihi ema Viya. Vijacapacareripa eta mayehe, táichavenehi eta vicasiñairahi ema Jesús. Vahi étaparacaina tacuchucuhavivihini eta víchaqueneanahi, taicha vahi vítijivainahini váratahahini vijacapacarehini. Tacahehi éta, apaesa nacuija nacucasíñavavaica eta nacuchucuiravapuca. ¹⁰ Arairuinapa eta vítaresira maicha ema Viya. Émarichuvare ticajurucavahi eta véhisirahi ema Jesucristo, mavairahi víchayare eta táuriqueneana. Eta víchirahi, vítauchahi eta mapaneruana acane.

Eta véhisira ema Jesucristo, étamuriahavinapa. Vaipa víputsimuriavavacaimahi.

¹¹ Németeaca échavahi éti eta nacatiansiráhehi ena nujaneanana táichavenehi vahi éhichahini eta nayeherépiana. ¹² Éti, cape juca, tájina ímatiyahini eta máimiturapianahi ema Jesucristo. Vuíchahavare ímatihini eta iúricacarevayarehi táichavenehi eta matratune ema Viya viyehe viti israelítana, taicha ticaerajicheanahi te vimuri. Vuíchahavare ímatihini eta ícuchianayare máijararuhaneanaya ema Viya. Eta tacahehi, éti ímijachaipa vahi ejacapacare eta mayehe. Vuíchahavare ácasíñavahini eta mayehe. ¹³ Puitipasera eta éhisirahi ema Jesucristo, iúrujiacarpahi éma. Tásiha, émeñahavaipahi mayehe ema Viya, taicha ecasiñavahi eta máepeninahehi ema Jesucristo. ¹⁴ Énerichuvare, étavenehi eta viúrujasirahi éma, tihétamurichaviripahi vimutu: éti apavasanana, vítipa viti israelítana. Vaipa víputsimuriavavacahini. Tímicutijiricavaipahi étanainehi eta viúchusine. Macaepaharipahi eta vicitianajirísiracacáinihi. ¹⁵ Eta máijararesirahi eta máquehe te crusu ema Jesucristo, macaepaharipavare eta tapamisirahavini véhica eta vanairipiana éta pa eta nayeherépiana típicauchacareana. Puiti, vaipa étaparacainahini eta viúchucuiraya. Énerichuvare macaepaharipa tamutu eta vicitianajirísiracacáinihi táichavenehi eta apavasanahavirahi. Puiti vimutu viti véhicanahi ema Jesucristo, étamuriahaviripahi máicha. Tájina víchiravaimahi. Táitusiava tíurichaviripa vimutu mayehe ema Viya.

¹⁷ Eta tímitecachi ema Jesucristo, timetapanahavihi eta táurinaquene echajirirucava eta najacapacarevaya namutu ena achaneana. Éma, tíurichahavivarehi mayehe ema Viya vimutu: viti vínapucanahi vímati eta máechajiriruvana, étipa eti epaenumavahi ímati eta máechajiriruvana. ¹⁸ Puiti, eta viúrujasirahi ema Jesucristo, tiávahácahavihi ema Espíritu Santo. Tásiha, máichavenehi ema Espíritu Santo, vimutu vicuticaipahi eta vípauchiraipa ema Tata Vicaiaquene. ¹⁹ Eta tacahe, tájinapa táeñamacarehini eta ejacapacareva eta viyehe viti machanerana ema Viya. Esiapamuriahaviripahi víti. Tachichaheripa eta mávasa anuma. ²⁰ Eta esiapamuriahavirahi te vimuri, nímicuticharipa te náepiyaca eta ichape peti. Ema Jesucristo, tétavicavahi eta máetumechirahavihi vimutu viti véhicanahi éma. Macuti eta tatumearaya eta yúchamana, eta manasirahi eta máimiturapiana. Tásiha, visiapa viti apóstoleana éna pa ena profetana. Tacahe éti, eta esuapirahi eta vímiturapiana, esiaparipahivare. Ecuti eta labriyuana éta pa eta yucuquiána. Ema Espíritu Santo, tétavicavahi eta máitupajijiasiravahi tihétamurichahavihi. Vituparahapachuhi eta manasirahavihi. Máepiyacavacapaipa. Te máitauchapá tamutu, tétavicaínapa táurinavaya eta ichapequenehi templo, mapenayare ema Viáquenu, sántoquenehi.

Éma Pablo, éma ticatuparahahi ticametarairuyare nayehe ena apavasanana

3 Németeaca nuti ímatiequeneharipa eta máetaviuchirahi eta máemunasirahehi ema Viya. Éma, tivanecanuhi níchuhaheya eti apavasanana, mavarairahi éhicayare ema Machicha Jesucristo. Eta juca nucametarairuirihi eta eyehe, étara tiviuhanuhi puiti juca nucaeratairahi. Nútisera nuyaseuchaheparaca éti te nuyujarasirana. ³ Taicha ema Viya timetacauripahi te nuvapure eta mapanereruhi tapaemunava téchacarehi. Puiti te juca nucartane, eta échajicuirahi eta nájurehi, németeaca ímatiequenehayare tamuturipa nímatiequenehahi eta mapanereruhi ema Viya tayehe eta macuchusirahavihi ema Jesucristo. ⁵ Eta juca mapanereruhi ema Viya, nájina náimatiequenehahini cape juca tásinequenehi. Puítisera, ema Espíritu Santo tímechahaviripa viti mayeheana santo apóstoleana énapa ena profetana. ⁶ Ani tacahehi eta juca tayumurevanainihi: Eti apavasanana, éti apanavare ejacapacarehivare mayehe ema Viya maicha ema Jesucristo. Iúchucuhayare táichavenehi eta éhisirayare eta vimetarairuana. Esiapamuriahaviyare viti machanerana ema Viya. Étamuriahaviripa. Vicuticacainapa eta vícuchihi viti israelítana.

⁷ ¡Tétavicavahi eta majapanuiranuhi ema Viya! Núti-samipa máichuhaquenehi eta nucametarairuyarehi eyehe. Tásiha éma, tétavicavahivare eta máetumechiranihi te tamutu eta nucametarairuirahi. ⁸ Vahi németeacavahini nútinasamihini manerejica, taicha nararihihi ena títupajijiapanavanahi eta nuyehe. Tijapanunuhisera ema Viya. Nútisamipa manerejiruhi, mavarairahi numetapanahé eta máichuirahéhi éti apana eti apavasanana, eta ejacapiraya eta táuricacarequene vícuchi maicha ema Cristo. Tétavicavaya eta víuricacárevayare. ⁹ Tacahehi eta mapanereruhi ema Viya eta viyehe acane te tépanavainapa máepiyacaya tamutu. Váhisera táijahúchavahini mametacahavihini. Tapaenumava timetacanuhi nútí, matuparasiranuhi eta numetasiraheyare tamutu. ¹⁰ Taicha mavarahahi natiarihiyare camurianayare ena tisuapanayare yátupi. Eta táurivayare eta náehisira, tímereuchayarehi eta máetaviuchirahi eta máitupajijiasiravahi ema Viya. Náraminehi ena aquenucanahi tiávihanahi te anuma eta náimairahi eta juca. Eta tacahehi eta mámirapahi ema Viáquenu Jesucristo tamutu eta mapanereruana eta acane ema Maiya. ¹² Tásiha puiti, tájina táéñamavacaréimahi eta vipauchira ema Viya. Vicasiñavahi eta mayehe, taicha ema Jesucristo émahí ema vicasiñasarequenehi. ¹³ Eta tacahe, nutuparacaheya: Vahi ecuinajicava eta juca éhiruhi, váhivare ecupica eta esamairisirahi eta nucaeratairahi táichavenehi eta nucametarairuirahi eyehe. Evapinasera eta nucamichirahi eta nátajivana, taicha nuvarahahi nímereca eta táetaviuchirahi eta némunasirahehi.

Éma Pablo mayujaraucha ena machamuriana

¹⁴ Eta némechirana eta táetaviuchirahi eta máitupajijiasiravahi ema Viya eta juca mapanereruana, nútí népuyumiraucha ema Macaiyaquene ema Viáquenu Jesucristo, nucunachirahi éma. ¹⁵ Éma, Táiyaquenehi tamutu te anuma. Émarichuvare téchahi tamutu te juca apaquehe. ¹⁶ Nuyaseaca éma máijaracaheni éti, ichapenahini eta ítupajijiasirava étapa eta etumevaihini te íchanevana, maicha ema Espíritu Santo. Taicha ema Viya, tétavicava eta máitupajijiasirava, váhivare mayavanaimahi. ¹⁷ Nuyaseacavare yátupina eta ecasiñairaya ema Cristo, yátupinavare eta éhisiraina eta máimiturapiana. Túmeheyare eta émuna-raivahi. Tájina tihapapicahéimahi eta éhisirahi. ¹⁸ Nuyaseacavare ácutihini ena apamuriana echamuriana te tamutu avasareana, te yátupina eacutiara eta táichapevahi eta máemunasirahavi ema Cristo. Tájina títaina éta. Tayanapane vahi vicúcaicutiaraquenéna. Nuyaseacahivare yátupina émainahini ecasamure ema Viya.

²⁰ Tétavicavahi eta nucunachirahi ema Viya, taicha máituruequenehahi tíjaracahavi tamutu, máemeta-vicahi eta viyasearuana, étapa eta vipanerechirana. Tétavicava eta máitupajijiasirava ema Espíritu Santo eta máetupirisirahi eta visamureana. ²¹ ¡Vicunachapacarahini ema Viya vámutu viti véhicanahi ema Jesucristo! ¡Máichecuaraquirénapa eta vicunachira! ¡Amén!

Viúrujiacacahi maicha ema Espíritu Santo

4 Yátupi nútí tipresuchanuhi puiti táichavenehi eta néhisirahi ema Viáquenu. Eta tacahe, nutuparacaheya: Tacuija íchiravaina eta ítaresira te mamirahu ema Viya; taicha éti máichuhaquenéherichuhi éma, mavarairahi machaneraheyare. ² Yátupina eta emansuvaina, étapa eta iúrivaina. Ecayehe paciencia. Ecami-chayare jácani te ticaviurevanapuca nácani echamuriana, táichavenénahi eta émunasiracacainahi. ³ Émanarichuvare ema tiávahácahe, émaripa ema Espíritu Santo. Ísapava eta macurujisirahehi. Tacuija íchiravaina eta iúrujisiravahi. Étanainarichuhi eta epanereruana. Taicha ema Viya tíchuhahehi. Puiti ecuchapahi eta íápechiravayare ítareca. ⁵ Émanarichuhi ema Viáquenu. Tacarichuhi véhica eta máimiturapiana. Étanarichuhivare eta vicaicachasira eta víurujiasira éma. ⁶ Émanarichuhivare ema Viya, Vicaiyaquenehi vimutu. Éma téchahavihi vimutu. Ticaemataneacahavihi vimutu. Émavare tijaneacahavihi vimutu.

Vítucaquenepachuhi maicha ema Espíritu Santo

⁷ Énerichuvare ema Cristo, éma tíjaracahavihi eta vítucaqueneyarepachu, jácani mavarahaquenehi. ⁸ Taicha eta Sagrada Escritura, ani tacahehi: “Te tiárapa éma te anuma, mámamurihapaipa ena macuchureanahi. Máijaracasichavacapa eta náitupujijiasiravaya ena machanerana” tacahepa. ⁹ Epanerechaya puiti eta tacayemaquenehi eta márirahi. Eta juca tavaraha vi-

caicutiara eta máucupaisirahi tativa te juca apaquehe. ¹⁰ Te títauchavapa eta tímiucupaicahi, tíarapa tichavapa te mávasa anuma. Tichavavarepa eta émairayare técha tamutu. ¹¹ Tásiha, ema Viáquenu tituparacahavi víti, tíjaracahavivare eta vítucaqueneanayarepachu. Taicha tinacahavipa eta viávacurepachuya apóstolehaviya víti manerejiruqueneanahi. Ena apamuriana, manacahivare profetanahi náimatiequenehayarehi eta mapanereruanahi ema Viya apaesa náitametacavaca ena vichamuriana. Ena apamuriana, manacavare ticametarairurashianayare, náichuhayare ena achaneana náehica ema Viáquenu. Ena apamuriana, manacavacavare pastóreanayarehi, najaneacavacayare ena vichamuriana. Énapa ena apamuriana, manacavacavare máestroana, náimitucavacayare eta máimiturapiana ema Viáquenu. ¹² Taicha éma, mavarahahi máetupiricayarehi tamutu te etaracu eti machanerana; mavarahavivare vitiarihiyare víti vítátijiricahayare eti vichamuriana, vicajurusiraheyarehi eta éhisirahi éma. ¹³ Apaesa yátupina vácuti vámutu eta máurivahi ema Machicha ema Viya; táitecapavanevaréni eta sache eta viúrujisiravaya, tájinapa tahapapicahavimahi eta véhisirahi; vítamuturucaripahini tamutu eta vítucaqueneanahi tásihaqueneanahi me Cristo. Vácutipaini éma tamutu eta máitupajijiasiravahi. ¹⁴ Mavarahavivare vimutuyare vímatiequeneha. Vaipa vácutimahi ena amuyana, témunanasiricavanarichaha éna. Tísapajiricavanarichaha navayuaca tayehe eta apana náimiturapiana ena títuruéquenehana tivayuaricana, napamisiravacahi namutu náehica eta tauriqueneana. ¹⁵ Eta tacahe, vétumechavayare eta véhisirahi eta máimiturapiana yátupiqueneana, yátupinavare eta vémunaravahi, vicajurucacayarehivare eta viúruva, vicutiyare ema Viáquenu Jesucristo, taicha émahí ema téchahavihi. ¹⁶ Nímicutichahehi eta viáquehe. Camurihi eta táunavahi eta viáquehe; étanaichuhisera. Camurivare eta táitupajijiasiravanahi; tamutuhisera ticaematanehi, víchirahi eta vivarahaquenehi. Tájina vahi táejiacavahini. Tamutu tijaneacacahi. Ene vicahehi víti machaneranahi ema Jesucristo. Éma, vétumechavavihi vimutu víti. Eta viúrujisirahi mayehe éma, étamurivavihi. Vimutu vítucaquenepachuhi máicha. Vématanerepipachuhi máicha. Vijaneacacahivare. Vicajurucacapaipahi táichavenehi eta vémunasiracacahi.

Apanainapa eta vítaresira taicha eta viávahásirahi ema Cristo

¹⁷ Eta juca numetarapiana eyehe, nutuparacahéicha taicha matupararunuhi ema Viáquenu. Nucavanaripipa puiti: Vaipa ecuapecha ecuquicha eta náichaqueneanahi ena máimatirahanahi ema Viya, náichahi éna eta náitaresirahi jácani tavarahaqueneanahi eta napanereruana súnsurupiana. ¹⁸ Tamutu eta napanereruana tétavicavahi eta tamapicuvahi. Vahi apaesainahini tavehahini eta tijarahi. Máecharaireanahi éna, táichavenehi eta tamuracavahi eta nasamureana. Váhiquene navarahaimahi napauca

ema Viya apaesa macanaracavacahini éna. ¹⁹ Tájinapa apaesainahini náimatihini eta titsirihacare. Tijaracavanapa tayehe tamutu eta najamuraraivana. Tétavicavahi eta navapinairahi náichahi eta tauriqueneana tájiparacana. ²⁰ Étisera vahi tacucahe eta ítaresiraya puiti eta éhisirahi ema Cristo. ²¹ Taicha németeaca yátupihí esamaracacahi eta vímitusirahehi. Ímatiripahi eta táuriqueneanahi yátupiqueneanahi tásihaqueneanahi mayehe ema Jesucristo. ²² Tásiha puiti, vaipa ecuesacha echavaucha eta ítaresirainihí acane echipejiricavahi taicha tivayuacahe eta ejamurachirahi eta tauriqueneana. ²³ Puiti éti, ísapaya ema Espíritu Santo mávahácahe, máitsivachirayare eta epanereruana étapa eta ejamurachirana te íachanevana. ²⁴ Tásiha, apanainapa eta ítaresiraya. Yátupí eta ecaquehéraína ema Viya, ácutini éma eta máurivahi étapa eta masantuvahi.

Étupiricayare tamutu eta ítaresirana

²⁵ Tásiha puiti, vaipa épiyahirahimahi. Étupiruvayare tamutu eta échajirisiravaya nayehe ena echamuriana eparaepiyana, taicha étanarichuhi eta echamuriracacairahi, émanarichuhivare ema Viúrujaruhi, ema Jesús.

²⁶ Te tatiarhipuca eta táimiyusemacahe, ejaneacavaicha machu ecapeatura. Te esemapuca, vahi tacunasi eyehe. Énevanéna eperdonachacaca.

²⁷ Ecaunevayare, machu máiturucahe ema Váinaraji, táichavenénahi eta esemanevahi.

²⁸ Mácani tiámerahinihi, vaipa macuapechava macuamereca. Mácaematane apaesa macunachacare, apaesavare eta jácani máematanevachayare eta maviyihayare eta macajirayare ena ticamunuvanahi.

²⁹ Váhivare ecunacajacachava eta tájiparácana echájrurucavana tauriqueneana. Tátupiruva eta échajirisiraváina apaesa étaina eyuchusiha eta nasuapiraina nácani tismaheanayare, éta tétupirisamurechavacayare éna. ³⁰ Vahi ecuisapava ícha jácani tauriqueneana, machu ímipanerereca ema Espíritu Santo, émaripa ema sántoquenehi, tiávahácaheripa éma. Eta mávahásirahehi tímicutijiricavaipahi eta ecamaracahi, taicha ímaticaréipahi eta machanerahéirahi ema Viya; puíticha, étapa eta te títecapapa eta jena sáchehare viúchucuirayare.

³¹ Váipavare ecunaca eta semanereana. Váipavare ecatianarahimahi. Váipavare ecusemarairihi, váhivare ecuijajachava ecapiaracava. Vahi ecuichanareca. Ínájicaya éti tamutu eta júcana tauriqueneana. ³² Táit-siva étaviuchayare eta iúrivayare nayehe nácani apamuriana, ejaminurahiyare. Te tatiarhipuca eta náejecapirava, eperdonachacayare taicha ene macahehi ema Viya eta maperdonachirahehi máichavenehi ema Cristo.

**Tiúriyarehi eta náitaresirayare ena machichanaveanahi
ema Viya**

5 Puiti éti machichaheripahi ema Viya, máemuna-ruqueneheripa, tásiha ácutipa éma eta máurivahi. ² Émunajiricacayare eta itaresiraya. Ecutiyare ema Cristo eta máemunasirahavihi. Éma, macurismurecharipa ema Maiya eta máimijaresiravahi víchavenehi víti, macutihi eta sárarechicha uvesa nacaparuhi eta námavahuhi me Viya.

³ Eta machaneraheripahi ema Viya, vaipa táuricahini íchahini eta túhusicare. Tíñehi te mamirahu ema Viya. Váhivare ecupanerecha ícha jácani tiámanahi eta tamauriqueneana. Váhivare tacuvayuacahe eta tájiparácana. ⁴ Vahi ecunacajacachava eta échajirirucavana titsirihacarepiana, súnsurupiana, tájiparácaqueneana, taicha tájina tacunachacarévaina éta. Tamutusera eta échajisiranaya, amairipiquenéna eta ehasulupayachiraya ema Viya. Jéhevere, éta iúrihaquenehi. ⁵ Németeaca ímatiequeneharipa éti eta vahi tiúchucuhanaimahi nácani ticaecahicacanayare, ema achane te mavehapuca esu esena apayena, esu esena te suvehapuca ema achane apaima; nácanivare ena amaperuana tivehajiricacanahi; mácanivare achane mavehapuca ema maparajairava; nácanivare tijamurachana tamutu jácani náimahaqueneanahi. (Ena tavayuacavacahi eta najamurachirana, énarichuhi ticasíñarajiana.) Namutu ena nani tímereuchavanahi vahi machaneranainahini ema Cristo. Vahi tisiapanaimahi te mávasa ema Viya.

⁶ Tásiha éti, vahi ecuisapava nácani navaraha navayuacahe te náechajiriruva súnsurupiana, napamisiraheya ícha eta júcana tamauriqueneana, taicha eta júcana, éta tivíuchavacayare nácani masuapajirairahanahi me Viya, muracayare eta náicuñayare. ⁷ Tásiha, ejaneacava, machu ácuti ena nani tíchanahi eta júcana tamauriqueneana.

⁸ Échavaripa tacáhénihini eta itaresirahi acane étarichu iámapiricainihini iávacuhahi te timapicu. Puítiserá eta iúrujasiraipa ema Viáquenu, tijarahiripa eta ítare-sirahi. Tásiha, ímerecayare eta emicauchirayare ena apamuriana achaneana, ímeresirayare eta iúriya, éta-pa eta tipachinaqueneana eta itaresira, éta-pa eta yátupirahi eta éhisirahi ema Viya. ¹⁰ Tamutu sácheana ecaravahuinavarepa eta mavarahaqueneanahi máuriruanahi ema Viáquenu. ¹¹ Ejaneacava éti, machu iápechava ícha eta tamauriqueneana náichaqueneásahi ena achaneana te timapicu. Taicha tétaví-cavahi eta tatsirihacarevahi eta náichaqueneanahi eta nayumurusiravahi. Étiserá ímitucavacayare éna. Emicauchayare eta tamaurivahi eta náichaqueneana, apaesa náimaha eta táíñehivahi eta náichaqueneanahi. Tásiha, natiarihipuca ena tivarahanaya náinajicayare. ¹⁴ Eta emicahuchiravaca éna, tacuti eta táechajiriruva eta jirasare, ani tacahe:

Pítisami pímicutijiricava pépenaquene taicha eta tavayasiravahi eta pecatuana.
Péjamiuchavaichu eta pímacacarasiravahi te timapicu.

Písapava macaechepecavi ema Cristo, mavarahahi tímícauchaviyare.

¹⁵ Eta tacahe, yátupina eta ejaneasiravaina. Vahi ecucuti ena máecharaireana. Ímerecavaya eta ítupajijiasiravahi. ¹⁶ Ecamapuravachaha tamutu sácheana eta ímitusiravacahi ena achaneana, taicha maverana ena tíchanahi eta tamauriqueneana. ¹⁷ Tacuija eta esunsuvanaina. Epanerechayare apaesa ácaicutiara yátupi eta mavarahaquenehi ema Viáquenu. ¹⁸ Vahi ecucavaha taicha éta ticauyayacarehi ticamitiacahe. Ísapavasera émaira máechehe ema Espíritu Santo tamutu eta itaresira. ¹⁹ Eta ímiturapiyare nayehe ena echamuriana, eta salmo éta-pa eta jirasareana majirihuana ema Viya. Eta ecunachirainahi ema Viáquenu, iúrisamureyarehi eta ejiraira. ²⁰ Ehasulupayachaparacaya ema Vicaiyaquenehi te máijare ema Viáquenu Jesucristo tayehe tamutu jácani íchararacavana taicha tásihaqueneanahi eta mayehe.

²¹ Emutu éti, ímereca eta iúriya táichavenehi eta epicauchirahi ema Viya. Ísapava eta nacamunuiraheni ena echamuriana. Vahi étainachucha éhica eta evarahaqueneana.

**Ema achane ésupa esu mayena náimerecayarehi eta
náuriva énajicacayarehi**

²² Étiripa eti esenana ecaimaqueneanaripahi, tituparacahehi epicauchayarehi ena ímanaveana. Esuapajirahiyarehiva nayehe, tacutiyaichu eta esuapirahi ema Viáquenu. ²³ Taicha mácani achane, tatuparacahi éma, téchaya eta máitátiraya esu mayena, tacutihi ema Jesucristo tatuparacahi éma téchahaviyarehi vimutu viti véhicanahi éma. Émarichuvare ema ticatiuchahaviya vimutu viti machaneranahi. ²⁴ Tásiha, yátupihini eta vipicauchirahi visuapahi ema Cristo. Ene nacahe-yarehi ena esenana, nasuapayarehi napicauchayarehi ena náimanaveanahi te tamutu.

²⁵ Étiripa eti náimanaveanahi, tituparacahehi émunacavacayare ena eyenana, tacutihi eta máemunasirahavihi ema Jesucristo viti machaneranahi. Éma, tímijararecavahi víchavenehi, ²⁶ taicha mavarahahi tisantuchahaviyarehi. Tásiha, masipahasinahavipa eta viáchanevana eta visuapirahi eta máímiturapiana. Eta masipahasirahavi tacuti eta sucavira te une esu araimayare te tétupiricavapa tayehe eta sucaimairayare. ²⁷ Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejicaimahi, tájinavare tijararecavimahi, apanaimahi víchava. Mavarahavivare tétaví-cavayarehi eta visantovaya. Yátupi matapiravarehaviya víti. ²⁸ Ene ecaheyarehi eti náimanaveanahi, ímerecayarehi eta émunasirahi ena eyenana, tacutihi eta émunasirahi eta iáqueheana. Mácani máemunacahi esu mayena, tímícutijiricavahi eta máemunasiravahi éma. ²⁹ Taicha viti achaneana, eta vítaresirahi, váhiquene vícati-chaimahi eta vécheana. Tétaví-cavahi eta vijaneasirahi, véchapajiricahi, vénicahivare eta véche. Ene macahehi ema Cristo eta majaneasirahavihi, máechapajirisiraha-

vihivare viti machanerana. ³⁰ Víti tímicutijiricava eta táunavanahi eta máquehe táichavenehi eta viávahásirahi éma. Vicutijiricavavare eta maeche, máperanavare. ³¹ Échavaya eta táechajirisirahi eta Sagrada Escritura, ani tacahe: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa titáticacanayare. Eta navehacairahi, tímicutijiricavaipa étanarinehi eta náqueheana” tacahepa. ³² Te juca tametarapi, jararihi eta tacayemaquene tayumururevaquenehi. Puiti nímitucahe: Viti machanerana ema Cristo, eta viúrujasirahi éma, étanamuriháviripa tacuti eta étanarinehi eta náqueheana ena ticaimanahi. ³³ Tásiha, nuvaraha yátupina ácaicutiara eta juca nucayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta iáquehe. Énerichuvare eti esenana, tituparacahehi epicauchayarehi ena ímanaveana.

Ena amaperuana, náimeredayarehi eta náuriva nayehe ena ticachichana

6 Étiripa eti amaperuana, yátupina eta esupajiravaina nayehe ena ticachichaheana, taicha tituparacahehi ene ecaheyarehi eta éhisirahi ema Viáquenu. ² Ema Viya tíjaracavapa tíjaracaheyare eta iúricacarevaya eti esupajirahiana, taicha ani tacahe eta máechajiriruva: “Epicauchayare ena ticachichaheana. Te esupajirahi éti, nucajurucaheya te apaquehe. Tájina íchiravaimahi, iúritaresirainapa” macahepa. Tétavicavahi eta tasupacarevahi eta juca mavanairipi ema Viya eta eyehe.

Ena náiyana, náenana, táurini eta náimitusiravacaina ena nachichanaveana

⁴ Énerichuvare, eti náiyana, náenana, vahi ecuimiyusemaca ena echichanaveana tayehe eta evanesirana. Tauri eta ecavanairipira, apaesa napicaurahi eta najurusiraina, énajivayare ticaratacavana. Ímitucavaca tamutu eta máimiturapiana ema Viáquenu, apaesa nasupajirahi.

Ena ticaquenurecana, táurini eta nacaemataneasiraina

⁵ Énerichuvare eti ecaquenurecana, tituparacahehi esupajirahiyare nayehe ena iáquenuanahi. Epicauchavacayareva, émunacayareva. Táurivainahini eta ecaemataneasirahi, tacutirichu eta táurivahi eta ecaemataneasirahi ema Cristo. ⁶ Evapinavayarehi te esamureana eta ecaematana, vahi tacucarichu te natarihi ena iáquenuanahi te emirahu. Vahi ecuyacujiririha. Evapinavayaresera eta ecaemataneasirahi éna, taicha émarichuvare ema Viáquenu ema ecaematanearuhi. Ímrecavayare eta yátupirahi mavanarahehi éma. Tacaheyarehi eta ítauchirayare eta mavarahaqueneana ema Viya. ⁸ Taicha écharipahi émutu éti, vijacapayare eta vícuchihi mayehe ema Viáquenu te vítauchahi tamutu eta táuriqueneana. Vahi manereji-

caimahi nácani líbreanahi énapa ena ticaquenurecanahi; vínunayarehi tayehe eta vícuchihi.

Énapa ena náquenuana, tituparacavaca eta náurivaina nayehe ena nachanerana

⁹ Énerichuvare eti náquenuana, tituparacahehi iúriyareva nayehe ena echanerana, eJapanuyare éna tayehe eta evanesirana. Vahi ípicararerecaimahi te evanesirana. Ínunayarehi échava eta matiarahirahi ema Iáquenuhivare éti apanava, ema tiávihahi te anuma. Taicha éma, nájina máepuruquenéna ena achaneana.

Yátupina eta vicasiñavairahi me Viya; vé-tumechavavare eta véhisirahi

¹⁰ Puiti nutuparacahevere, nuparapenaveana, ecasiñava yátupina mayehe ema Viáquenu apaesa máijaracahe éma eta matumeva étapa eta máitupajijasirava. ¹¹ Nuvaraha numetacahe eta juca: Ema Váinaraji ticanarahavihi víti machaneranaavihi ema Viya. Tétavicavahi eta mavarairahi tiáquipaicahavi. Tásiha, tituparacahavi eta véchapajirisiravaya eta vicatiuchiravaya mayehe éma. Natarihivare ena camuriqueneana majupahana, énapa ena masuntarurana. Váhisera achaneanainahini, váhivare viparaepiyanainahini. Éreananahi éna, váinarajiqueneanahi. Tétavicavahi eta nasimutuvahi éna. Tétavicavahivare eta náitupajijasiravahi étapa eta natumeva eta nacaematana tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayuarauiana ema Váinaraji. Étumechava eta éhisira. Ecuti ema suntaru ticasíñavahi tayehe eta mamuiriha vahi tasiapahacaimahi eta espada. Tásiha, eratahayare ecamicha tamutu eta ecatajivairana. Vahi ecainajiruvaimahi. Iáquipaicyareva namutu ena machamuriana ema Váinaraji. ¹⁴ Yátupinahisera esupa eta vímiturapiana yátupiqueneana. Vahi ecuchavacuéjehava. Átupiruvahini eta ítaresirahi. Ecutiyare ema suntaru, manacahi eta máitijuhe, étapa eta fiérromehi tiávichayarehi eta matupa, tájinasarepa náicharaca ena mánarana. ¹⁵ Vahi tacuechuquiha eta ecametarairuyare eta majacapiraya ema Viya namutu ena achaneana. Etanucayareva eta eparupevaya apaesa erataha eta epaisirayare te acheneana eta ítecapirayare tayehe eta tayerehiqueneana avasareana. ¹⁶ Tacutiquene eta ticamunucarehicha, yátupinahhi eta ecasiñavairaina mayehe ema Viya. Eta ecasiñavairayare táimicutijiricavahi iáviuhinahini eta ticaemahaequenehayarehi eta tamuruirapahi eta mayucaraqui ema Váinaraji. ¹⁷ Tacutiquene, ecasiñavahi yátupina eta iúchucuirayare, tácuti eta macasiñavaira ema suntaru eta mayehe casco te machuti. Iúnacahi eta máechajiriruva ema Viya, máimiturehequenehi ema Espíritu Santo. Eta juca tímicutijiricavahi eyehenahini espada eta ecatiuchiravahi. ¹⁸ Te eyujaraca, eyaseacaya ema Viya máijaracahe eta etumevaina. Eta eyujarasirana, tacuija tahapapi-

ricahe eta máimitusirahehi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahi. ¹⁹ Énerichuvare, te eyujarasirana, eyaseuchanuhini me Viya, apaesa máijaracanhini éma eta nuvapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya. ²⁰ Ema Viáquenu tinacanhini núti námayarehi eta máechajiriruva, nucutiyarehi mácani achane embajador mayehe ema aquenuca Emperador. Éta tíchanuhi ticaviurenuhi eta napresuchiranuhi puiti. Eta tacahehi, nutuparacahe eyujarauchanu, eyaseuchanu me Viya, máijaracanhini eta nutumevaina eta nucametarairuirayarehi nayehe namutu ena achaneana te avasareana, váhivare nucuyacujihini eta nucametarairuirayarehi.

Eta táichecuarahui eta macartane ema Pablo

²¹ Tiuri puiti, máimahaherinesera ema vémunarquenehi vichamuri Tíquico. Éma, títametacaheyare tamutu eta níchararacávahi núti. Tétavicavahi eta máimicatasiranuhi eta vicaemataneasirahi ema Viáquenu. ²² Eta tacahe, névatacahi éma eta ara eyehe. Títametacaheyare eta víchararacavahi, tétumechaheyareva éti eta éhisiraya ema Viáquenu.

²³ Puiti nuyaseacahi ema Vicaiyaquenehi émapa ema Viáquenu Jesucristo, náijaracahehini eti nuchamuriana eta enarasirahi te esamureana tamutu eta epanerurana, tajurucahivaréni eta ecasiñavairahi eta nayehe, étapa eta émunasiracacahi. ²⁴ Nuyaseuchavare táetaviuchahini eta iúricacárevaya emutu eti yátupihini éta émunasirahi ema Viáquenu Jesucristo.

Tamutupa eta néchajirivanahi eyehe.

Filipenses

1 Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iúrujasiravahi ema Jesucristo. ² Nuvaraha máetaviuchahini eta macatajisirahe ema Tata Vicaiyaquene, émapa ema Viáquenu Jesucristo; nájaracahehini táurivaina eta epanereruana.

Em a Pablo mayaseuchavaca te mayujarasirana ena machamuriana

³ Tatiarihi eta te néchahe, nuhasulupayachahi ema Viya íchavenehi éti. ⁴ Te tamutu eta nuyujarasirana, tétavicavahi núrismureva eta nuyaseuchirahehi emutu éti. ⁵ Taicha te jena tnapucainapa sache eta nucametarairuirahi eta eyehe, ichapequene eta ímicatasiranuhi. Puiticha enasirichuhi. ⁶ Ema Viya, tétavicava eta máurichirahe eta ítaresira cape juca. Núti, tétavicavahi eta nucasíñavairahi mayehe eta máimiyaravaina eta máurichiraheyare, mavarairahi iuri eta machimapiraheya ema Jesucristo te jena sache machavirayare. ⁷ Énerichuvare nucasíñavahi eyehe eta ejacapiraya eta máurichirahehi éma, taicha némunacahehi ichape emutu éti. Nucasíñavahivare vicuticacipahi eta vijacpirahi eta máimicatasirahavihi ema Viya, tayanapane viyerehicahipuca, étaripa te juca návihahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava. ⁸ Tímararacaruhi ema Viya eta némunasirahehi emutu éti, nucutihi ema Jesucristo eta máemunasirahehi éma. ⁹ Nuyaseacahivare ema Viya eta iápajusiravainahini eta émunaraivaya. Ítupajijacavahini, támutuhini ímatiequeneha, apaesa ímatiparahini eta enerejsiraya eta táuriquenehi. ¹⁰ Taicha nuvaraha tápajupanávainahini eta iúrivaina eta ítaresirana, tájina téchipejicahémahi. Matapiravarehéyare, tiúriyarepa eta machimapiraheyare te machava ema Jesucristo. ¹¹ Nuvarahavare iápajusiravainahini eta íchaqueneana táuriqueneana eta ecaemataneasirahi ema Viáquenu Jesucristo. Tásiha, tétavicavayarehi eta nacunachirayarehi ema Viya ena achaneana eta náimairahahi éti.

Eta vítaresirahi, puiti émapa ema Cristo téchahavihi

¹² Nuparapenaveana, nuvaraha numetacahe tájinaichucha táichavahini eta nucaeratairahi. Eta návi-

hairahi núti te juca cárcel, camuriana ena numetaruanahi eta máemunaraivahi ema Viya eta nayehe. ¹³ Énaripa ena tasuntarurana eta palacio énapa ena apamuriana achaneana náecharipahi eta táemeratásiranuhi eta néhisirahi ema Cristo. ¹⁴ Tacutiquene, eta náimairanuhi eta nupresuvahi, ena camuriqueneana nuchamuriana táetumechavacainehi eta nacametarairuirahi eta máechajiriruva ema Viya. Vaipa napicahini taicha ichape eta nacasíñavairahi mayehe ema Viáquenu. ¹⁵ Nararihi éna, tiúrihi eta napanereruana eta náimituresirahi te máijare ema Cristo. Tatupiruvahi eta náichirahi, tásihaquenehi eta náemunasiranuhi, taicha náechahi éna eta návihairahi ani, nucatiuchirayarehi eta yátupira eta viúchucuiraya maicha ema Jesucristo. Nararihisamisera ena tímiturecanahi te máijare ema Cristo, váhisera tátupiruvacuénahini eta napanereruana. Nacapinaruraivarichucha, navarairahi ticachuricanuana. Napanerechaichuchavare tiápajucavayarehi eta néñamiravana, tavetijipa eta návihairahi nuti te juca cárcel. ¹⁸ Tájinachuchasera táichavahi. Núti vahi nucapinaruvacaimahi ena nani páureanasami. Ticurismurechanuanarichucha núti eta náechajisihairahi ema Cristo namutu.

Énerichu ichapemuriyarechucha eta núrismurevaya, ¹⁹ taicha németeaca tiúriyare tamutu eta níchavaquenevayare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicatasiranuhi. ²⁰ Núti, ichape eta nuvarairahi váhini nucutsirihaini. Nuvaraha nuvapinava eta nímiyanirava nucasíñavaya mayehe ema Cristo eta majaneasiranuhi apaesa náimatihini ena achaneana eta yátupirahi eta macasíñacarevahi ema Cristo. Tájina vahi nupicacavahini eta náimicatichiranuhipuca, táimicapacanupuca. ²¹ Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta núricacarevaya. ²² Téhesera te nítarecarichahapuca, nucamapuravayarehi nucaemataneacayare ema Viáquenu. Eta juca, vaipa nímatiequeneha tájahapuca tiúripanayarehi nuyehe. ²³ Nuvarahaiapanéni níjahúchavahini népenahini apaesa nunaracaini te machacaya ema Cristo. Eta juca tiúripanahi eta nímairahi. Váhisera nímatiequeneha tájahapuca eta néhiruyare. ²⁴ Néchahevaresera éti, néñamahevare nujunijicahe. Tiúripanaichupuca vuíchaha nucuepena. ²⁵ Tásiha, németeaca vuíchaha mavaraha népenahini ema Viáquenu. Nucuchapa nápechavahivaréni níteca eta ara eyehe, nucachaneheyaréchaha éti. Nímicatacahenumayare apaesa tápajucavahini eta iúrisamurevana eta ecasíñavairahi me Viáquenu Jesucristo. Tac-

ahe, tétavicavapaini eta viúrisamurevainahini eta viúrujiacacairaya.

²⁷ Eta ítaresiraya, ímereco yátupina eta éhisiraina eta máimiturapiana ema Cristo. Tayanapane váhipuca nucuiteca eta eyehe, ímiyanavasera eta étumechiravaina eta iúrujasiracacahi. Nusamairiricahehine táurihini eta ímiyaniravahi éhica emutu, étanainarichuhi eta epanereru, evapinavahi eta ecametarairuira eta véhiruhi tayehe eta viúchucuiraya. ²⁸ Vahi ecuarameca naicha nácani íánaranahi. Eta nacatianasirahehi, tímicaecherachahi eta nacaicuchirahi eta náicuñayare. Táimicaecherachahi eta iúchucuirayarehi éti maicha ema Viya. ²⁹ Éti, iúricacarehi maicha ema Viya eta ejaicapacarevahi mayehe, táichavenehi eta ecasiñavairahi me Cristo. Tacamunuhisera eta ecatajivairayare táichavenehi eta éhisirahi éma, ecaicuchirahi éta. ³⁰ Ecutinuripahi eta vicanarajirisiravacahi ena viánaranahi. Éti ímahanurichuhi cape juca eta nucanarairavacahi, puíticha esamairiricanuipahivare eta nunasirichuhi nucanaravacahi.

Tétavicavahi eta masuapajiraivahi ema Cristo. Tásiha puiti, tétavicavayarevare eta masuapacarevayare.

2 Tacahe puiti, németeaca esamavahi eta máetumechirahehi ema Cristo, iúrisamurera-hivare táichavenehi eta máemunasirahehi; evapinavahivare eta mávahásirahehi ema Espíritu Santo, máimitusirahehi eta ecajirahi eJapanurahihivare. ² Tacahe puiti, nuvaraha étanainarichuvare eta epanereru, ácuticacaini eta ecaemataneasiraina ema Viya; tácuticacahivaréni eta émunasiracacahi. Tásiha, tétavicavayare eta núsamurevaya ícha. ³ Éti eta ítaresiraina, tacuija eta ecasiñavavaisiraina, váhivare ecuimijuquiha eta evarahaqueneana. Nuvarahasera ímerechahini eta emansuvaina nayehe ena echamuriana; énahi émunaruqueneanahi. Nativaina ímicatacavaca éna, táetaviuchiravainahini eta náuricacareva ícha. Vahi ecutítátiiva.

⁵ Emutu éti íámanahini eta táurivahi eta juca mapanereru ema Jesucristo, tisuapajirahi éma. ⁶ Éma, tacahehi eta mapanereruanahi: Vahi macasiñavahini eta víyairahi éma. Tétavicavahisera eta mamansuvahi, éta-pa eta máurivahi. Tisapajiricavahi. ⁷ Tacahe, manaquicahi eta mávacuréni. Eta máucupauchirahavihi, macuti-paipa mácani achane macahequenechucha eta máuchusirahi. Tamutusera eta máitaresirahi, tétavicavahi eta masuapajiraivahi, macutihi mácani moso. Eta masuapajiraivahi, éta-pa tiámaparauchahi eta máepenirahi te crusu. Titsirihacavahinene, máitauchahisera. ⁹ Eta tacahe, ema Viya máijaracapa eta máejasihayarehi tayehe eta anuquehepana mávacureyarehi, éta-pa eta tacapicahuirahi ichape eta máijare, ¹⁰ apaesa námutu nácani tisanahini eta máijare Jesús, tépuyucanayarehi: ena tiávihanahi te anuma, éna-pa ena tiávihanahi te apaquehe, éna-pa ena nacaerataquenehi puiti te amahe apaquehe. ¹¹ Namutu náichayare: “Yátupi Aquenucaquene éma”. Tacahe, tétavicavahi eta vicunachirayarehi ema Tata Vicaiyaquenehi.

Tétavicava eta najaraiva ena téhicana ema Jesús, nacuti eta jarairiqui

¹² Núti nucunachahehi, eti nuparapenaveana némunaruqueneanahi, taicha tétavicavahi eta esuapiranuhi te nutiaririchaha te echacaya. Puítisera nuvaraha tápajucavaini eta esuapiranuyare, puiti eta nuyerehirahehi. Ema Viya, émarichuhi ema tinacahi te esamureana eta evarairayare ecurisamurechayare éma; tiávahácahevare eta ítauchirayare tamutu. Tásiha, muracaina eta ejaneasirava tayehe eta tájiparacana, epicavareni eta ímicatisamurechira ema Viya. Tacuija táemitiequenehahini eta tapachinavahi eta íachanevana.

¹⁴ Te tatiarihinapuca jácani íchaqueneanayare, vahi ecuevataemachavaca, váhivare ecuacapauchava, ¹⁵ apaesa tacuija échajisicavaini emutu. Tacuijavare etapiravainahi eta náimairaheyare ena achaneana. Ímrecavayarehi eta machichahérahahi ema Viya, tájina táechipejicahehine nayehe ena achaneana váinarajipaneréruana. Nímicutichinahe eta táurinavahi eta jarairiquiana vímahaqueneana te anuma te jácani yati timapicuquenehi. ¹⁶ Ímitucavacahini eta máechajiriruva ema Viya, eta íchuhairavacavare náehicavare, apaesa náuchucuhahini tayehe eta apana náitaresira. Tacahe, te máiteca machava ema Viáquenu Jesucristo, eta máimairaheyarehi eta juca táuriqueneana íchaqueneanahi, tétavicavainapa eta nucunachiravaya núti íchavenehi éti eta táurivahi eta nímitusirahehi. Vahi támapurujihini eta nucaemataneasirahehi. ¹⁷ Nímicutichahe eta esuapajiraivahi tayehe eta ecaemataneasirahi ema Viya. Ticutihi eta íámavahuhi mayehe. Núti, tijuricati táimicapacanupuca eta nucametarairuirahi eta eyehe. Eta népenirainapucaini tacutiyareva eta námavahuhi mayehe ema Viya, tacachane eta íámavahuhi éti. Núti nuvapinavahi eta níjarasiravahi népena, núsamurehivare eta nucamavahuirahi me Viya. Nuvaraha iúrisamureyareva éti apanava. Vahi ecutatiequenehanu. Ácutinu eta núsamurevahi núti.

Ema Timoteo émapa ema Epafrodito, vanairucanayare me Pablo

¹⁹ Nupanerechahi névatacayaréni ema Timoteo eta ara eyehe, máimahapanahe apaesa núsamurepaini eta nusamairirisiraheya te machavapa. (Máimahavirinesera ema Viáquenu Jesús eta vítujisiravaya.)

²⁰ Taicha ema Timoteo, yátupihi macutinuhi eta nuhapasamurechirava eta iúricacarevainahini éti. Náji-na apanainahini nácutihini éma. ²¹ Nararihinéni ena apamuriana, énachuchasera tiyayauruicavanahi. Vahi tihapasamurechavanaimahi eta iúricacarevaina eti machaneranahi ema Jesucristo. ²² Ímatiripahi éti eta máurivahi ema Timoteo eta máimicatasiranuhi tayehe eta vicametarairuirahi, tacutihi mácani machicha ema achane, eta táurivahi eta máimicatasirahi ema máiya. ²³ Vuíchahasera névatacaimahi éma. Néchanumayare eta juca níchararacavayare te juca. ²⁴ Nucasiñavahiné-

nisera mayehe ema Viáquenu Jesucristo eta nútijacarávainahini nímahapanaha.

²⁵ Tásihasea, nupanerechahi névatachivaréni puítirichu ema apana viparape Epafrodito, ema évataruhi tímicitacatanuyarehi, tiámapahivare eta enaquiruvana. Puiti éma, tétavicavahi eta máimicitasiranuhi tayehe eta juca vématanerepihi, vicanarairahi eta tamauriqueneana. ²⁶ Mavarahaipaichavare tímahahe éma apanava. Téñamavaipahi eta eyehe emutu éti taicha máechahi eta esamairirisirahi eta macajumairahi. ²⁷ Yátupihini eta macajumairahi, tiánehiyarehini tépena. Majapanuhisera ema Viya; tinaracahi. Tijapanunuhivare nútí apana apaesa vahi nucueñamavahichaini, vahi tacuapiquihanuhini eta néñamiravahi puiti. ²⁸ Eta tacahe, nuyayaucha puiti névataca éma, apaesa eta ímairainahini éti, iúrisamurevarepaini. Te néchapa eta iúrisamurevahi, éta pa tacaepaha eta néñamavahi eyehe. ²⁹ Táurisera eta eja capiraina éma te esamureana, taicha yátupihini echamurihini éma eta éhisirahi ema Viáquenu. ³⁰ Taicha éma, yátupihini tiánehipa eta máepenira, táichavenehi eta táetaviuchirahi eta mavaraira macaemataneaca ema Cristo. Váhiquene tiyavanavahini eta máitaresirahi, taicha muraca eta mavarairahi máitauca eta etuparasiranahi mayehe. Taicha éma ítsivahi éti, eta vahi ítujicavahini ítecahini éti jaracarávainahini ítátinuhini.

Tiúripána véhica eta juca yátupiqueneana

3 Nuparapenaveana, evapinava eta macachaneraheripa ema Viáquenu. Nútí, vahi nuyacují eta nápechirayare numetacahe te juca néchajiriruvahi te nájure taicha eta tiúrichaheyare éti. ² Échapavayare nayehe nácani achaneana tipamicaheana éhica eta mavanairipiana ema Moiséini, navarairahivare ecamarayare, náimijachahi machaneraheya ema Viya taicha eta ecamarcairahi. Ena nani, tétavicavahi eta náíñehivahi eta náemejecapirachira ena vichamuriana. Éna, nacutihi eta jácani tamucu tétavicavahi eta tanicaráivahi. ³ Jéhesaresera vítiquenehi machaneranahi ema Viya yátupiquenehavihi. Vicamarcaqueneanahi víti te visamureana maicha ema Espíritu Santo. Vítiquenehi yátupiquenehahivare víti véneuchavahi me Viya. Vivapinavahivare táichavenehi eta vicasiñairahi eta machanerahavirahi ema Jesucristo. Véchahi vahi étaparacainahini vítauchahini eta vanairipiana, étainapucaini visamacarehini táicha. ⁴ Jéhevare nútí, táurichahinéni nucasiñavahini nútí nusamacarehini, taicha nítauchahi tamutu eta viyeherepiana víti israelítana. Nucachurichahi ena nujaneanana. ⁵ Nútí yátupiquenenuhi israelítanuhi taicha nucamarcaripahi te óchopasache eta núchusirahi, náitauchahi éna eta viyeherepi. Mámariéquenenuhíni ema Benjamín. Yátupiquenenuhi hebreo. Yátupiqueneanahivare hebréoana ena ticachichanuana, énapa ena náchucanaveanaini. Nútí náchamurinuínihivare ena fariséoana. Nítucahi nímicapicaucha eta náitauchiraina yátupí eta víapajusiravahi religiósohavihi nayehe ena apamuriana nujaneanana israelítana. ⁶ Eta nímicapicauchira, ichape

eta nupanajirisiravacahi ena náinapureana creyénteana. Nucasiñavahi nútí eta nítauchirahi yátupí eta viyeherepiana. Tájina néchajisiacarevahini nayehe ena achaneana. ⁷ Puítisera eta néhisira ema Cristo, vaipa tacunachacarehini eta nusamiravahi tamutu eta juca níchaqueneanahi nusiñavirainihi. ⁸ Tacahe, eta nímairahi, váhinéni étaparacainahini tayehe eta víuchucuiraya. Puiti nínajicapa tamutu eta júcana, taicha tihapapicanuhi eta néhisirayarehi ema Cristo; táichavare vahi tácutihini eta táetaviuchiravahi eta táurivahi eta néhisirahi ema Náquenu Jesucristo. Puíticha tamutupa némitisica. Émachucha nucaemataneacahi. ⁹ Puiti eta návahásirahi éma, vahi étainahini eta táurivahi eta néhisirahi eta viyeherepiana. Ema Viya tijacapanupa táichavenehi eta nucasiñavairahi me Cristo. Taicha namutu ena ticasifiñavanahi éma, tijacapacareanaya me Viya. ¹⁰ Nuvarahahi nútí tajurucachucha eta nímatirayarehi ema Cristo. Nuvarahavare tacuíja tahapapica eta macaemataneasiranuhi, máimeresirahi eta táetaviuchiravahi eta máitupajijiasiravahi, tacutipa eta máechepusiraipa éma te máecari. Nuvarahavare nucapayayaráchivaréni eta macatajivairahi. Éta pa eta népenira, nuvarahavare táurichavacayare ena nuchamuriana, tácutihini eta táurichirahivahi eta máepenirahi ema Jesús. ¹¹ Taicha nútí nucanevahi eta néchepusiraya nútí apanava te nécari.

Yátupiya eta vicaratasiravaya te vivaraha vítujicava viveha eta vícuchihi

¹² Nútí vahi ními jachavaimahi tamutuhini nítaucha eta nútijisiravaya. Vuíchaha nítamuturuca. Nímiyanavaichuchasera eta nupamisiravahi, nuvarairahi nucurisamurechayare ema Cristo te tamutu, taicha eta tacahehi eta máichuiranuhi néhisirayare. ¹³ Nuparapenaveana, yátupiquenehi vuíchaha támutu nucapayaracahini. Nuvarahaipasera némitisicayare tamutu eta nunaquiruana. Tásiha, nétumechavainapa eta nítauchiraya tamutu eta mavarahaqueneanahi níchaqueneanayarehi. ¹⁴ Nupamicavahi taicha ichape eta nuvarairahi nucurisamurechahini ema Viya, nuvahahini eta nícuchihi mayehe. Taicha eta tacahehi eta máichuirahavahi, mavarairahi tíjaracahavi eta víurujiasirahi ema Jesucristo.

¹⁵ Tacaheyarehi eta epanerechirayare éti. Ecutinuyarehi emutu eti échemachanaripahi eta juca véhiruhi. Te vuíchaha ecaicutiarahini eta juca, németeaca tímitucaheyare ema Viya. ¹⁶ Jéhesare, yátupina vímiyanava véhica tamutu eta vímitucasivanahi.

¹⁷ Nuparapenaveana, nuvaraha yátupina ácutinu nútí eta núrivahi eta nítaresira, éhicavaréni eta náurivahi ena apamuriana téchemachanaripa. ¹⁸ Ichapemurihini eta nutuparasirahehi tayehe eta juca. Puiti eta nápechirahehi numetacahehi, níyahasmurehi taicha nararihichaha ena vuíchaha náimatiequeneha eta tacayemaquenehi eta máepenirahi ema Cristo te crusu. Eta nacatichirahi, vahi navaraha nasamararaca te véchajisíha. ¹⁹ Ena nánisami témitiequeneanayare taicha tétavicava eta tavayuasiravacahi eta najamura-

chaqueneana. Nacasamurechucha eta tájiparacana te juca apaquehe. Tisiñavavaicanahi, tivapinavanahi eta náichirahi eta tamauriqueneana titsirihacareana. ²⁰ Vítisera tachanerahavihi eta anuma. Eta tacahe, vicunevaipa eta vicuchapirahi ema Viáquenu Jesucristo ticatiurahiquene, másihairaya te anuma. ²¹ Máitsivachainapa éma eta juca viáquehesami. Apanainapa eta táimahiyare. Tacutinapa eta macáquehéra éma, tapachinaquenehi. Tétavicavainapa eta tatumevayare taicha ichapequene eta máitupajjiasiravahi éma. Maratahahi macapaquecha tamutu.

Iúrisamurereacavayare me Viáquenu

4 Nuparapenaveana némunaruqueneanahi, tétavicavahi eta nuvarairahi nímahahe, taicha nucajamurahehi éti, tétavicavahi eta núrisamurevahi ícha. Puiti nuvaraha ímiyanava túmehéna tayehe eta éhisirahi ema Viáquenu, eti némunaruqueneanahi.

² Nuvarahavare nutuparacavaca ena vichamuriana esu Evodia ésupa esu Síntique: Tachavaini eta náemunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu. ³ Nutuparacavivare, piti némunaruquenehi nucompañeruvahi: Pímicatacavacahini ena nani apinana esenana viparapenaveanahi, taicha éna ichape-murihi eta náimicatasiranuhi tayehe vicametarairuirahi. Náimicatacahi ema Clemente, énapa ena apamuriana ena nucompañeruanahi. Eta náijareana ena nani ticajuanaripa tayehe eta libro tiama eta víjareana viti vítareruanayare.

⁴ Támutuhini sácheana iúrisamurereacavahini me Viáquenu. Nuvaraha nápechahe numetacahe: Iúrisamurereacavahini mayehe. ⁵ Námutuhini ena achaneana námatihéhi éti eta táetaviuchirahi eta iúriava. Taicha ema Viáquenu, tiánehipa eta máitesiraya.

⁶ Vahi ecueñamava, te tatiarihinapapuca eta íchava. Ecasínavasera eta eyaseasira ema Viya te eyujarasirana. Ehasulupayachavare tayehe jácani máijjararurheanahi. ⁷ Jéhesare, ema Viya macaepahayare eta jácani ecatisamurevana eta juca máijjarasiraheyarehi táurivayare eta esamureana étapa eta epanereruana, táichavene eta iúrujasirahi ema Jesucristo. Eta macurisamurechirahavihi ema Viya, tétavicavahi eta tacachuriasirahi eta nacurisamurechira nácani achaneana.

Epanerechayare eta táuriqueneana

⁸ Títecapa, nuparapenaveana, epanerechinavayare tayehe tamutu eta yátupiqueneana, tayehe tamutu eta típicauchacareana, tayehe tamutu eta ítauravaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurisamurechirahi ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

⁹ Ímiyanava éhica eta nímiturapiana. Ítauchayare eta numetarapianahi esamararuaruanahi. Ácutinu eta níchaqueneanahi ímahaqueneanahi. Ítauchaya eta juca, tásiha ema Viya, tamutuina tájaracaheyare eta táurivaya eta epanereruana éti.

Tinaquiquicavanapa ena machamuriana ema Pablo, náimicatasiraya éma

¹⁰ Tétavicava eta núrisamurevahi eta mayehe ema Viáquenu eta máijjarasirahehi éma eta epanerechiranuhi tayehe eta íapechavahi ímiámareca eta nuyehe. Németeaca váhiquene émitisicanuhini. Étachucha eta emaitujisiravavanehi ímiámareca eta ímicatarapi eta nuyehe, tapaenumavahi. ¹¹ Vahi táichavenénahíni jácani nuvayuchiravainahini eta nucamunuirava. Núrisamuréichucha, nítucasamihi núti eta nítátiravahi tayehe jácani tatiarihiquenehi. ¹² Nítucahi eta nítaresirahi puiti eta nupaurévahi. Nítucahivare te nucaimahaqueneíchaha. Nítucahi eta nucamichirahi eta nátajivanahi, te nunicapuca, váhipuca; te nucaimahaquenehipuca, te tájinahivarepuca nímahaqueneánahini. ¹³ Núti nuratahahi nucamicha tamutu, taicha ema Cristo éma tétumechanuhi. ¹⁴ Tájinasera táichavahini eta ímicatasiranuhi tayehe eta ímiámarreruhi, evarairahi ímerezcanu eta émunasiranuhi, ítátiranuhi eta numaitujisiravahi nutanuchavahini.

¹⁵ Eti nuchamuriana, nucunachahe eta némechirahéhi eta ímicatasiranuhi eta nupaisirahi eta nucametarairuirahi te apanana avasareana. Tayanapane epaenumavahinéni épanava éhica ema Viáquenu, camurianaahi eta ímiámaresinanuhi eta enaquiruvana te náviharipa te Tesalónica. Énerichuvare, te núchucapa te provincia Macedonia, éti íapechavahi ímiámareca eta enaquiruvana. Jéhevare nájina apamurianainahini nacutihehinehi eta ímicatasiranuhi. ¹⁷ Váhisera étainahini jácani nuvarairahini íapechavahini ímiámareca eta nuyehe eta enaquiruvana. Nuvarahahi níminicapaequenehahe: Eta ímicataraivahi te juca apaquehe, puiti te anuma ánaqui táurujisiviavahi eta enaquiruvana te mamirahu ema Viya. ¹⁸ Nuti ichapemuripa eta nujacapirahi eta enaquiruvana, eta mámaquenepahi ema Epafrodito. ¡Tétavicavahi eta ecajiravahi! Eta ímiámarreruana, tacutirinehi eta inciensoinahini, eta táijiyevahi te mamirahu ema Viya. Tivapinava ema Viáquenu eta majacapirahi. Tacutihivare eta nanaquisira eta námavahuana te Templo. ¹⁹ Máimahahéine ema Viya. Éma, máitsivachayare tamutu eta enaquiruvana. Tájaracaheyare te jácani ecamunuiravana. Émaríhi téchayarehi ema Viáquenu Jesucristo. Éma, tétavicavahi eta tamutuirá marataha. ²⁰ ¡Máichecuarequereyare eta vicunachiraya ema Tata Vicaiyaquenehi, tijarahi eta vijirauchira éma! Amén.

Eta táichecuaraqui eta macartane ema Pablo

²¹ Eta iúrujasiracacahi mayehe ema Viáquenu Jesucristo, nuvaraha échajisinanuini namutu ena machaneranaahi ema Viya, vichamurianaahi eta véhisir-

ahi ema Viáquenu Jesucristo. Téchajicaheanahi éti ena nucompañeruana, ena nucachanequeneanahi ani te juca. ²² Téchajicaheanahivare namutu ena vichamuriana machanerana ema Viya, ena ticavasanahi ani te juca. Nararihivare ena tiávihanahi te mayehe palacio

ema Emperador, énarichuvare vichamuriana. Téchajicaheanahivare éna apana.

²³ Nuyaseuchaheparaca emutu éti me Viáquenu Jesucristo táetavicavahini eta iúricacarevaya máicha. Tamutupa eta néchajiriruvanahi eyehe.

Colosenses

1 Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaquene, navarairahi nímitucaya eta náechajiriruva. Puiti nucajurehe eta juca carta eyehe eti nuchamuriana ecavasanahi tayehe eta avasare Colosas, taicha éti machaneraheripa ema Viya, tiúrihi eta éhisirahi ema Jesucristo. Téchajicahe ema vichamuri Timoteo.

Nuvaraha macatajicahehine ichape ema Tata Vicaiyaquene, máijaracahine eta táurivaina eta epanerurana.

Emá Pablo masamairica eta náehisirahi ema Jesús ena ticavasanahi te avasare Colosas

3 Puiti títecapauchahaviripa ema vémunaruquene Epafras, ema vichamurihi eta vicametarairuihi. Éma, ichape eta macunachacarevahi. Tiúrihi eta máitauahirahi tamutu eta macavanarairahi ema Cristo, máimitusirahehi yátupi eta máimiturapiana ema Viáquenu. Éma Epafras títametacahavihi eta íchararacavahi, eta éhisiraipa ema Jesucristo, étape eta émunasiracacairahi emutu éti, émunasirahivare ena iúmurivanahi te apana avasareana, machaneranahivare ema Viya, taicha ecuchapavainapa eta esiapiraya tayehe eta mávasa anuma. Viúrisamurevahi eta visamairisirahi eyehe, vihasulupayachaparacahi ema Viya Macaiyaquene ema Viáquenu Jesucristo. Tamutu sácheana te viyujarasirana, viyaseuchahehi me Viya. Ichape eta viúrisamurevahi eta táurivahi esama eta macametarairuihi ema Epafras eta yátupiquene máechajiriruva ema Viya, etupiruvahi esuapa eta ímitucasivahi, te esamainapa eta máemunasirahehi éti apanava ema Viya. Étarichuhi eta juca vímiturapihi nayehe ena apamuriana achaneana ticavasanahi te apanana avasareana. Natiarhipahi ena tisuapanapahi eta vímiturapiana.

Emá Pablo mayaseuchavaca te mayujarasirana ena machamuriana

9 Eta tacahe, te visamairiricahepa, viyaseuchaheparaca me Viya tamutu te viyujarasirana. Viyaseuchahehi máijaracahéni eta ítusiraina, ímatiraina yatupina eta mapanereruhi ema Viya. Máijaracahéni eta échemaraivainahine, ecaicutiarayare eta máechajiriruvana, máichavenénahine ema Espíritu Santo. **10** Vítivi viyaseacahi ema Viya tacuijahine etapiravaina te mamirahu taicha eti machanerahehi éma, ítauchahine tamutu eta eaurisamurechirayare éma. Táurihine eta ecaemataneasirahi, támutuhine ítaparaha

eta táuriqueneana. Iápajucavapáipahivaréni eta ímatirayare éma. **11** Énerichuvare viyaseacahi ema Viya máijaracahéni eta ichapequene máitupajijiasirava apaesa ecamichahine tamutu eta ecatajivairana, ácayehine paciencia muraca, iúrisamurereacavachuchaine.

12 Ehasulupayachahine ema Tata Vicaiyaquene eta máichuirahéni éti apanava, mavarairahi tíjaracahivare vimutu eta tajarahiquene vícuchianahi viti machaneranahi éma.

Emá Viya mavaraha ticuchucuhahaviyare

13 Éma Viya ticatiuchahaviripa mayehe ema Váinaraji ticaratachavinine. Téquechaviripasera véhicayarehi ema Machicha Jesucristo máemunaruquenehi. Vaipa véhicaimahi eta nayeherepiana ena timapicumareana. Émapa téchahavihi puiti. Viávacuhaipa eta mavanairipiana. **14** Taicha ema Viáquenu Jesucristo tépenahi te crusu eta macaepahairaya eta vipecaturana, viúchucuhavahi máicha.

Emá Jesucristo, ema tinacuchahi tamutu. Émarichuvare téchahi puiti.

15 Yátupi máimahasihi ema Tata Vicaiyaquene. Émasera ema Jesucristo tétavicavahi eta macavasirahi ema Maiya, émapa tímimaticahavihi eta máurivahi ema Maiya. Éma, ichapequenepanahi Aquenuca. Éma, téchahi tamutu. **16** Éma, mavanahihi me Maiya eta máepiyasirahi tamutu eta vímahaqueneanahi puiti: te anuma, étape te juca apaquehe, étape tamutu eta vimaratahaqueneanapa vímaha. Ticavacureanahivare máicha ena ángeleana. Nararihi ena majupahaqueneanahi te machacaya, énape ena túparairucanahi, énape ena apamuriana tijacapanahi eta vanairipi nayehe ena majupahanahi, énape ena apamuriana ángeleana masuntaruranahi. Máepiyacahi tamutu, máitauahiraripa tamutu eta mapanereruanahi. **17** Éma Cristo manasiqueneripa acane te tamirahuichaha eta táepanirávayarehi tamutu. Púiticha éma téchahi tamutu. **18** Énerichuvare ema téchahavihi vimutu viti véhicahine éma, taicha machichaquenehaviripa. Éma, vínapuarahihi viti véhicahine, taicha éma tinacuchahi eta juca arairuhi véhiruhi. Énerichuvare maratahahi ticaechepecava te máecari, éne tacaheyare eta macaechepusirahaviyare víti apanavare. Púiticha, éma téjacahi tayehe eta mávacurehi aquenucairahi. Ichapequeneya eta vipicauchira vimutu. **19** Taicha ema Viya máijaracapa ema Machicha macutiyahehi eta masantuvahi, étape eta máurivahi, étape eta máitupajijiasi-

ravahi. ²⁰ Eta mapanereruhi ema Viya eta mavanesirahi ema Machicha te juca apaquehe, tépenayare te crusu taicha máetupiricayarehi tamutu eta juca apaquehe pecatupaire, étapa tamutu eta anuma. Macaepahayarehiva eta majarareruquenehi ema Satanás émapa ema Adán. Tichavayarehi tiuri tamutu.

Eta máepenirahi ema Jesucristo, mavacharecahi eta mámirahaviyare mayehe ema Maiya

²¹ Étiripa eti, cape juca iásinequenehi ecatianacainihi ema Viya. Vahi táurihini eta epanereruana, taicha eta íchirahi eta tauriqueneanahi. Iávamirahuinihi epauchahini ema Viya. Epicainihi éma. Émasera mavarahahi macamitiasinaheyare eta ecatianasirainihi. ²² Eta tacahehi eta máimitesirahi ema Jesucristo te juca apaquehe. Tépenahi te crusu táichavenehi eta macaepahairayare eta etapiravanainihi, masantochiraheyareva, apaesa tacuijapa ecuavamirahu te jena sácheharete eta mámirahayare te mami- rahu ema Viya. ²³ Tacahe, nuvaraha étumechavaya- rechucha, ímiyanava táuri eta éhisirahi. Vahi ecúyacujíquenehava eta ecuchahirahi eta iúchucuiraya. Vahi ecuemepurureca eta esuapiraipahi eta máechajiriruva ema Viya. Tétavicavahi tasuapacarevahi nayehe namutu ena achaneana te juca apaquehe, nájina tanere- jiruina. Nútiripa nuti Pablo vanairucaquenenuhi, étari- chuhivare tacahehi eta nucametarairuirahi.

Ema Pablo matuparahaichuhi máechapajiricayare ena máumurivana

²⁴ Puiti núti, vahi nucatiequenehavahini eta nucataji- vairahi táichavenehi eta nucatuparahairahi nucame- tarairu eyehe eti apavasanana. Ema Viáquenu Jesu- cristo, ichape eta macatajivairahi te crusu víchavenehi víti. Tatiarihichahasera eta macatajivairayarehi. Eta ju- ca nucatajivairahi, tácutihini eta macatajivairahi éma. Nucatajivanumapaipahi íchavenehi eti machicha- naveana, eti vichamurianahi. ²⁵ Taicha tituparacanuhi ema Viya eta néchapajiricaheyarehi emutu éti. Nuvanecasivahi mayehe eta nímitusiraheyare tamutu eta máechajiriruvana.

²⁶ Nímimatichaheyare tamutu eta juca mapanere- ruanahi ema Viya, tayumururevainihi eta táitaresirahi acane, énaripa ena viáchucanaveanaini vahi támutuhi- ni náimatihini. Puítisera ema Viya tímimatichahaviripa viti machaneranahi tamutu eta júcana. ²⁷ Tétavicavahi táramicarevahi maicha ema Viya eta máimimatichira- havihi eta juca tayumururevainihi ímitucasivahi puiti eti apavasananahi. Eta juca tayumururevainihi, émahí ema Jesucristo títecapauchaheripahi tiávahácheripa. Puiti, ejacaparépahe me Viya. Ecunevainapa maicha ema Jesucristo eta esiapiraya te mávasa anuma. ²⁸ Eta tacahe, émaquenehi ema Cristo véchajisihahi víti te vicametarairu. Étaripa te viconsejareca, te vímiture- capahi nayehe namutu nácani achaneana vicaimuna- queneanapahi, émarichuhi véchejisihahi, apaesa nácaicutiaraini tamutu eta mapanereruanahi ema

Viya, náechemarshivacahini táicha. Vivaraha ítamutu- rucaripahini te táitecapapa eta sache vímeresiraheyare te mami- rahu ema Cristo. ²⁹ Eta tacahe, nupamicavahi núti eta nucaemataneasirahi ema Viáquenu. Émaque- nehi tétumechanuhi eta nuratahairahi tamutu eta nímitusirahehi emutu eti nuchamurianahi.

Ema Pablo tímereuchava eta máemunasiravacahi ena machamuriana

² Núti ichapemurihi eta néñamiravahi eyehe eti numaimatiqueneanarichaha, énapa ena apamuri- ana vichamurianahivare ticavasanahi te Laodicea. ² Nuvarahahi ámutuhini étumechavahini te esamure- ana. Evapinavahini te iúrujisiravana taicha eta émunasiracacahi. Nuvaraha yátupina ímati ema Cristo, émahí araenumahi vanairucahi me Viya. Nuvarahahivare ímatiequenehayare eta mapanereruana ema Viya apaesa ichapenahini eta ecasiñairavainahini eta mayehe. ³ Nájina mácuti ema Cristo, ema tíjaraca- havihi tamutu eta vítipajijiasiravanahi, véchemarshivacahi máicha. ⁴ Eta tacahe, nutuparacaheca: Vahi ecuisapava nahapapicahe ena tiyururahiana. ⁵ Tayana- pane víyerehicacahi, vahi vímahacacahini, núrismure- hisera ticutirinehi étainahini návihahini eta ara eyehe, néchirahi eta tamajinairahi íchiravainahini, yátupihí es- uapa eta éhisirahi ema Cristo.

Vímiyanava tauri eta véhisirahi ema Jesucristo

⁶ Tásiha puiti, tauri eta iávahásiraina ema Viáquenu Jesucristo. Ímiyanava eta ítauchira eta íjarasiravahi éhica éma. ⁷ Etupihayare muraca mayehe ema Cristo, apaesa tápajucavapaipa eta ítipajijiasiravaina, ímati- rainapáipaicha éma. Émuracachavayare eta éhisirahi éma, yátupina esuapa taicha tacahehi eta ímitucasi- vanahi. Vahi ecucainajiruva eta ehasulupayachiraya ema Viya.

⁸ Échapavayaresera, taicha nararihi ena navara- hayare tiyurucaheana, navarairaya éhica eta napane- reruana. Vahi ecuisapava náemejecapavachahe éna. Machu náimitucahe eta nayeherepiana, náehiruhi ena náinapureanaini ticayeherepianahi tásihaque- nechucha te napanereruana éna. Eta júcana, tájina tavehapica apaesainahini eta máimiturapiana ema Cristo. Vahi ecusuapa ena nani.

⁹ Ema Viáquenu Jesucristo, jéhevare éma, yátupi- quenehi santo. Taicha ticuticacanahi ema Tata Ví- caiyaquene eta nasantuvanahi éna. Ticuticacanahivare eta náurivahi, étapa eta náitupajijiasiravahi. ¹⁰ Éti apanavare, puiti eta iávahásiraripa ema Cristo, tisantu- chahevacaripahi éma. Tájinapa ácamunuhini puiti eta iúchucuirapa. Taicha ema Viáquenu, téchavacahi ena ángeleana. Éma, túmepanahi nayehe ena éreanana. ¹¹ Ema Cristo, timarcachaheripa eta iáchanevana puiti eta iávahásiraipa éma. Ticamitisicaheripahi eta tajamurachaqueneanainihi eta iáquehe tavarahaque- neanainihi icha eta tauriqueneanahi. Jéheva- requene, eta emarachi éti, ecachuricahi eta nacama-

rcairahi ena israelítana náechatisirahi eta náquehe. ¹² Éti, cape juca iásinequenehi, vahi ímatihini ema Cristo. Vuíchaha ecamarcadhini mayehe. Tímicutijiricavahi táepenaquenénahini eta iáchanavana taicha eta epecaturanahi. Tímicutijiricavahi épenaquenénahini, ecaecarasihini tacutihí eta macaecarasirahi ema Cristo te máecari. Puítisera, eta ecasiñairaripa ema Jesucristo, ema Viya macaitaresinaheripa eta iáchanavana. Puiti ticutiripa échepurénaripahini éti, tacutiripahi eta máechepusirahi ema Cristo, maicha ema Maiya. Eta ecaicachasiraripa eta mayehe ema Cristo, tácutiarahi eta juca macaechepusiraripa eta iáchanavana. ¹⁴ Taicha ema Viya, eta máimairahi eta macatajivairahi ema Machicha máepenirahi te crusu, tiperdonachahaviripa eta vipecaturationa. Énerichuvare macaepaharipa eta vitapiravana tímicuñacahaviyarehini. Puiti matapiravarehaviripa eta máimairahavihi éma. ¹⁵ Eta máepenirahi ema Jesús tayehe eta crusu, máitahacavacaripa ema Váinaraji énapa ena machan-erana éreanana. Tájinarinehi natumevainahini eta mayehe. Puiti táquijicavacahi éna, te vipiaraca te máijare ema Jesús. Vaipa tipauchahavi anaimahi.

Éma Pablo mavanecavaca vahi nacusuapa ena tiyururahiana

¹⁶ Puiti nutuparacahe: Vahi ecusuapavaca ena navarahahi éhica eta nayeherepiana, apanapaneneji-queneana, nácani vahi tísapaheanaimahi enica eta apamuriana tinicacareana. Váhivare ecusuapavaca te ticamesajiricaheanahipuca epicaucha eta napies-tarana. Étaripa eta ecaematanerana te aracheruana caje, navarahaya epicaucha. Étaripa eta sache sávarumuhua, navarahayareva epicaucha. ¹⁷ Tamutu eta júcana, vaipa tásupacare taicha náchucarapianachucha éna. Étasera eta juca máechajiririvanahi ema Cristo, jéhevare eta yátupiqueneanahi. Tisuapacareanahi. ¹⁸ Eta tacahe, vahi ecusuapa ena nácani navaraha típicararecaheana, te náichahepuca: “Vahi tiuri eta juca éhiruhi”. Váhivare ecusuapavaca, te ticamesajiricaheanahipuca éstacava, étaipa eta ejirau-chirainaji ecasiñairainaji ena ángeleana. Éna náimijachahi tacarichu eta ejacapacareya me Viya taicha eta juca. Ena nani, ticasíñavavaicanahi taicha tímijachavanaripahi máechajicavacahiji ema Viya. Vaipa navaraha nacainajiru eta navayucasivanahi. Tamutu eta juca tímereuchavacahi éna, máehicarahanahi ema Cristo. ¹⁹ Vítisera vimutu viti apanapanenejiquenehavianahi véhicanahi ema Jesucristo. Eta viúrujiasiraipahi éma, vaipa apaimamajihavinahini máicha. Tímicutijiricavai-pahi mácani achane máitucahi eta macajurusirahi ena machichanaveana. Náurujiacahi namutu nácani machinanaveana, machinenana, mámarinaveanapuca. Émanarichuhisera ema téchahi. Ene vicahehi viti véhicanahi ema Cristo. Macarichu ema téchahavihi. Vímicatajiricacahi vicatiujiricacahivare vimutu maicha ema Viya.

²⁰ Puiti, eta éhisiraipa ema Cristo tíminajicaheripa eta éhisirainihi eta nayeherepiana ena achaneana

tamauriqueneana. Tacahe, vaipa ecusuapa ena ticamesajiricaheanahi te navanecahepuca: “Éhichavi eta viyeherepiana tayehe eta vinisiraya, apaesa ejapanucare eta me Viya”. Machu navayuacahe ena nani, taicha tamutu eta juca nayeherepianahi, tájina vahi étaparacaina tayehe eta viyapiraina te anuma. Eta juca nayeherepianahi, tásihaqueneanachucha te nachuti ena náchucanaveanaini. ²³ Eta juca nayeherepiana cútirinehi yátupiquenénahini tásihaquenénahini eta me Viya. Tásihasera vahi táimanaca. Ichape tayerehi eta máechajiririvana. Ena nani, tímijachavanahi nacurísamurechahi ema Viya. Tépiyacavanaripahi mánsuanahi eta náichirahi eta muraca penitencia. Téstacavanapa nájararecaripa eta naeche tayehe eta tacatiquene. Tamapurujihisera eta náichirahi, návi-raichuhi náichahi eta tajamuraraivahi eta náqueheana.

Tihapasamurerecahaviyare eta vivarairayare véhica eta máurivahi ema Cristo

³ Puítisera arairupa eta ítaresira maicha ema Cristo. Étainapa tihapasamurerecaheyare eta máurivahi éma étaipa eta ítecapauchira éma tayehe eta anuma máejasihahi te mavauere ema Maiya. Vaipa étaimahi tihapasamurerecaheyare eta eyeherepianainihi tamauriqueneanaini. ³ Taicha íjararuvaipa eta ínjaisirayare eta júcana. Puiti ticaitarecaheripa éma táichavenehi eta iávahásiraipa ema Jesucristo. Iúricahi puiti. Vuíchahasera ímahahini tamutu eta táetavichiraya eta iúricacarevaya. ⁴ Téhesera te machava ema Viáquenu Jesucristo, máitsivachainapa eta iáqueheanayare, tajarahiqueneanayare. Tásiha, ecachanapapa éma. Tétaficavaya eta viúricacarevaya vimutu máicha.

Vínajicayare eta viyeherepini eta viásinequene

⁵ Tásiha puiti, ínajicainapa eta eyeherepianaini tamauriqueneanahi. Nacuijapa nacuveha esu apana esena. Vaipa ecupanerecha eta panererucana tamauriqueneana. Vaipa ecujamuracha icha eta tamauriqueneanahi. Vaipa tihapapiricahemahi eta ecaimahaquenéraina, taicha ena titanucanahi eta juca, nacutihí nácani ticasíñarajiana. ⁶ Ena masupajirairahana, náichahi tamutu eta juca tamauriqueneana. Étaipa tímicuñacayarehi éna, taicha táimiyusemacaichucha ema Viya. ⁷ Éti apanavare étainichuhivare iávacuhainihi cape juca iásinequenehi. ⁸ Puítisera ínajica tamutu eta júcana: esemarajivana, ecatianaraivana, evainarajivana, iúmeharaivana, étaipa eta táíñemahiqueneana eta échajiririvana. ⁹ Vahi ecuépiyaequenehacáca. Ímereuchava yátupina eta ínjaisirahi tamutu eta eyeherepianaini cape juca ítaresirainihi. ¹⁰ Puíticha, amairiharipahi arairupa eta juca ítaresirahi, machichaheripa ema Viya. Tajurucapaipaini eta ecutirayare éma eta masantuvahi étaipa eta máurivahi éma. ¹¹ Tayanapane apavasananjihavihi viti véhicanahi ema Viáquenu, émasera tihetamurichahaviripa viti israelítana, étipa eti apavasanana, énapa ena máicacha-

sianana. Te mamiarahi ema Cristo, vaipa apavasanana-jihavinahini, étanarinepa eta vímahi maicha éma. Tayanapane tájina emarcainahini te iáqueheana. Váhisera ticachuricaheanaimahi ena ticamarcanahi. Tayanapanevare ecaquenuhipuca. Váhivaresera vicachuricaheamahi viti líbreanahi. Ema Cristo tiávahá-cahavíhi vimutu.

Vicaravahuinapa tiúriyare eta vítaresira

¹² Ema Viya tétavicaavahi eta máemunasirahehi. Eta tacahe, tinerejicahehi eti machaneranayarehi éma, ecutipaipe éma, eta masantuvahi. Eta tacahe, puiti étijiváinapa ecaravahuyare eta táurivayare eta ítaresi-rayare. Étaviuchayare eta eJapanuraivaya, émunarahiyareva. Ímerezaya eta emansuvayare. Écamicha tamutu. ¹³ Te tatiarihinapuca eta nájecapiravaina ena echamuriana eta eyehe, vahi ecucaticha, ácayehavare paciencia. Eperdonachacayare, ecutiyare ema Cristo eta maperdonachirahehi éti. ¹⁴ Tamutu eta juca numetaruheanahi, ítauchayare. Énerichuvare tiápajucavayare eta émunaraivayare. Taicha te vémunajiricacahi, tétavicaavayarehi eta viúricacarevaya eta viúrujíasiracacahi. ¹⁵ Vahi ecuemepureca eta iúrivahi maicha ema Cristo. Ísapavavare mayehe ema Cristo macanaracahe tamutu eta epanereruana. Taicha tacahehi eta máichuirahahi, mavarahahi étanayaréichuhi eta epanereruana eta iúrujíasiracacahi. Ehasulupayachahivaréni tamutu sácheana.

¹⁶ Étaviuchahini eta iúnasiráina te esamureana eta máechajiriruvana ema Cristo. Étumehacacahini eta ímitusiracacaya eta échemaráivayare. Evapinavahini te esamureana eta ejiraira te iúrujíasiravana. Ejirayare eta majiriahuana ema Viya, eta ehasulupayachirayarehi éma. ¹⁷ Tamutu jácani ecaematanerana, échajirisiravana, ímereuchava eta machaneraheirahi ema Viáquenu Jesucristo, iámirapaipa eta máijare. Te tamutu eta jácani íchararacavana, ehasulupayachayarehi ema Tata Vicaiyaquene.

Vímerezayare eta viúriya nayehe ena vichamuriana

¹⁸ Étiripa eti esenana ecaimaqueneanaripahi, epicauchayarehi ena ímanaveana. Esuapajirahiyare eta nayehe, taicha etuparahahi eta éhisirahi ema Viáquenu. ¹⁹ Éti apanavare eti náimanaveanahi, émunacayare ena eyenana. Vahi ecuímipananajica éna. ²⁰ Éti apanava eti amaperuana, esuapayare ena ticachichaheana, esamararasinavaya te jácani náechajisiraheana. Te ítaucha eta juca, ecurisamurechayare ema Viya. ²¹ Énerichuva eti náiyana, vahi ecuímiyusémaraca ena echichanaveana apaesa vahi nacuiapuñacava eta eyehe.

²² Étiripa eti ecaquenurecanahi, esuapajirahiyare nayehe ena iáquenuanahi. Ítauchayare eta navanairipianahi. Tátupiruva te esamureana eta ecaematanerana. Vahi tácarichuimahi ítaurahiyare te natarihi te echacaya ena iáquenuanahi. Te nájinahipuca, tacutiya-riherichu eta ecaematanerayare. Taicha ema Viya

tímararacahehi. Éma epicauchayarehi. ²³ Evapinavayare icha eta evanecasivanahi nayehe ena iáquenuana, táimicutijiricavahi émainahini ecaemataneaca ema Viáquenu. ²⁴ Taicha eti mamusurahehivare ema Cristo, ema tiápajucavahi iáquenupanahi. Écharichuhi éti eta tatiarihirahi eta ícuchihi íjaracasiyarehi eta mayehe.

²⁵ Énaserá ena tójecapavanapuca, máimararacahi ema Viya eta nájecapiravanahi. Étáinapa tímicuñacayarehi. Nájina mamunanequeneanaimahi.

4 Éti apanavare eti náquenuanahi ena músuana, tiúriyareva eta ecavanairipiraya, vahi ecuimipananajicavaca. Ítauchayare íjaraca eta nacamunuequeneanahi. Échavayare éti apanavare eta máimararasi-rahahi ema Viya, émahí Iáquenuquenehi.

Eta téqueneha matuparasirahavihi ema Pablo viti véhicani ema Viáquenu

² Puiti emutu éti, étumehavachucha eta eyujarasirahi eta me Viya. Vahi ecuyacujihini. Énerichuvare ehasulupayachaparacayare tamutu me Viya. ³ Énerichuvare ímicatachavi eyujarauchahavi, apaesa vítuji-cavapaini viúchucuha, vímijanavapaini vímimati-chahini ena achaneana eta juca tayumurevaihini mayehe ema Cristo. Étavenehi puiti présunuhi táicha. ⁴ Nécatiacachecha ímicatacanu eyujarauchanu apaesa nítujicava nucametarairu, taicha nutuparahaichuhi me Viya.

⁵ Táuri eta ítaresiraina nayehe ena máehicarahanarichaha ema Jesús. Tátupiruva tauri eta échajirisiravana, tapicauchacarehi. Táurivare eta ejicapiraina te natarihinapuca nácani tiyaserecaheanayare. Ecamapuravachaha puiti juca sácheana eta ímitusiravacahi.

Eta táichecuaraqui eta máechajiriruva ema Pablo

⁷ Máimahaherinesera ema vémunaruquenehi vichamuri Tíquico. Éma, títametacaheyare tamutu eta níchararacavahi núti taicha éma nucachanehi eta te juca návihahi. Tétavicaavahi eta máimicatasiranuhi eta vicaemataneasirahi me Viáquenu. ⁸ Eta tacahe, névat-acaíhi máiteca eta ara eyehe. Éma timetacaheyare eta víchararacavahi. Énerichuvare tétumehaheyare éti apanava. ⁹ Énerichuhivare névatacahi ema Onésimo némunaruquenehivare. Éma, tiásihahi eta ara eyehe. Puiti émarichuhi vichamurihi eta te juca. Tétavicaavahi eta máitauravahi eta macaemataneasirahi ema Viáquenu. Ena nani apinana, éna títametacaheanayare eta víchararacavahi víti te juca viávihahi.

¹⁰ Téchajicahe ema Aristarco, ema nucutiquenehi eta nucaeratairahi. Téchajicahavare ema Marcos, ema macheji ema Bernabé. Éti écharipa eta máitesirayare eta ara eyehe ema Marcos. Te máitecapauchahepa, tiúriyare eta ejacapirayare éma. ¹¹ Énerichuvare téchajicahe ema Jesús Justo. Nacarichuhi ena nani mapanana nujaneananahi israelítana tímicatacanuanahi. Nacachuricahi ena apamuriana nujaneanana vichamuriahahi. Ichape eta náimicatasiranuhi eta vicametarai-

ruirahi eta máechajiriruvana ema Viya. Ichape eta nacurisamurechiranuhi éna.

¹² Téchajicahevare ema Epafras, ema eyehe pastor. Ema maca, yátupiquenehi mavanara ema Jesucristo. Tétavicavahi eta máecharairisirahehi éti te mayujarasirana, mavarairahi ímiyanavahini étumechava yátupinahini ítauchahini eta mavarahaqueneana ema Viya.

¹³ Ichapemurihi eta nímararasirahi núti ema Epafras eta máecharairisiráhehi éti, énapa ena ticavasanahi te avasareana Laodicea étapa Hierápolis. ¹⁴ Énerichuhivare téchajicahe ema médico Lucas, ema vémunarquenehivare. Téchajicahevare ema Demas.

¹⁵ Tacahe, te támutupa eta échajicuirayare eta juca nucartane, ímiamarecaya nayehe ena apamuriana vichamurianahi ticavasanahi te avasare Laodicea.

Nuvarahavare échajisinanuini éna. Échajisinanuvare ema Nínfas, énapa namutu ena tíurujicavarahanahi te mapena. Nímiamarécahivareséra eta nucartane nayeheyare namutu éna. Te táitecapauchahe, échajicuhayarevare éti apanava. ¹⁷ Piti apanavare piti Arquipo, nutuparacaviyare: Pítauchayare tamutu eta juca pématanerepianahi, taicha eta pituparahahi me Viáquenu.

¹⁸ Nuti Pablo nútiquenepa nájucha eta juca táichecuaraquihí eta nucartane tayehe eta némechajirisirahehi. Nutuparacahe vahi ecuemitiscanu te eyujarasirana. Eyaseasinanu eta núchucuirávanéna.

Nuyaseuchaheparaca me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi e yehe.

1 Tesalonicenses

1 Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas †, émapa ema Timoteo. Vímiamarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. Nuvaraha macatajicahehini ema Tata Vicaiyaquene, émapa ema Viáquenu Jesucristo; náijaracahehini eta táurivaina eta epanereruana.

Ema Pablo tiúrisamure eta máechirahi náimyaniravahi náehisirahi ema Cristo

2 Viti vihasulupayachaparaca ema Viya eyehe emutu eti. Tamutu sácheana, te viyujarasirana, viyaseuchahe me Viya. **3** Taicha tamutu sácheana vécharairicaheparaca eta ímeresirahi eta esuapirahi éhisirahi ema Viáquenu Jesucristo, éta pa eta epamisiravahi ecaemaneacahi yátupi táichavene eta émunasirahi éma, éta pa eta ecamichirahi tamutu táichavene eta ecuchapiravahi eta machaviraya. Ema Tata Vicaiyaquene máimaha tamutu eta íchararacavana. **4** Nuparapenaveana, éti, máemunaruana ripa ema Viya. Véchahi eta manerejisirahehi éma.

5 Taicha te vímitucahepa eta máechajiriruva ema Viya tayehe eta viúchucuiraya, éti etupiruvahi ejacapa eta vimetarairuana taicha ímatihi yátupiquenériahi mayehe ema Viya. Ema Espíritu Santo tinacasamurechahehi eta táurivahi esama eta vímitusirahehi. Ímatihavihi eta mavanesarahavihi ema Viya. Ímahahivare eta viúrivahi eyehe.

6 Jéhesare puiti, étijivapa eta épaniravahi éhichavi eta viúrivahi víti, vicutiyare eta máuriva ema Viáquenu. Ecátajivanúmahi ichape taicha eta ejacapirahi eta vimetarapiana. Iúrisamurehiséra maicha ema Espíritu Santo. **7** Tacahe, ena apamuriana vichamuriana ticavasanahi te tinapaica eta Macedonia éta pa te Acaya, eta náimairahi eta yátupirahi eta esuapirahi, étarichuhi náehicahi éna. **8** Éti ímisamahi eta máechajiriruva ema Viya namutu ena achaneana ticavasanahi te Macedonia éta pa te Acaya. Téchacarehivare te tamutu avasareana te jácane vítecapihapahi eta juca yátupirahi esuapa ema Viya. Vaipa tácomesahini vimetataracavahini éna eta esuapajiraivahi éti. **9** Timetacahavianapahivare eta etupiruvairahi ejacapa eta vimetarapiana, éta pa eta ínajisiraipa eta esiñarajanaini, équesiravarípa eta ecaijuhherapa yátupi ema Viya. Puíticha tépanavaripa eta ecaemataneasirahi éma. Éma,

† Ema Silas, eta máijarequene Silvano te náechajiriruva ena romanoana.

yátupiquenehi Viya. Yátupiquenehivare eta masama-raiva. **10** Énerichuvare timetacahavianana eta ecuchapirahi eta machaviraya ema Machicha ema Viya másihairaya te anuma, ema maca Jesús émarichu ema macaechepucasiquenehi te máecari maicha ema Maiya. Émara ticatiuchahaviyare tayehe eta ecuñaraqui náicuchihi ena masuapajirairahana.

Eta máematanerepihi ema Pablo nayehe ena ticavasanahi te Tesalónica

2 Écharichuhi eti nuparapenaveana, tamutu eta náichirahavihi ena achaneana, tímicuñacahavianahi ánaqui te avasare Filipos. Váhisera vácatsimavahini te vítecapauchahepa ani, vímiyanavaríchucha vicametarairu taicha tétumechahávirichucha ema Viya eta vímitusirahehi eta máechajiriruva, camurianahineni ena ticatianacahavianapahi. Váhisera támapurujihíni eta véjirairahahi. Éti etupiruvahi ejacapa eta vimetarairuanahi. **3** Taicha vahi véjecapavahini eta vímitusirahehi. Váhivare étainahini vipanerechapahini eta tájiparacana tauriqueneana, váhivare vivayuarquina eta véchajisirapahi. **4** Víti manerejiruhavihi ema Viya taicha máechahi eta vítauchirayarehi eta vituparacasivayarehi mayehe. Eta tacahe, tituparacahavihi muraca víamayare eta máechajiriruva nayehe ena achaneana eta náuchucuiraina. Éta paichuhi eta juca véchajiriruvanapahi. Vahi étaina vivaraha táememunacahávihihi nayehe ena achaneana. Vítauchahi eta mavarahaqueneana ema Viya eta vicurisamurechihahi éma, taicha éma, máimararacahi eta visamureana. **5** Écharichuhi éti eta vicayemaqueneanapahi, vahi vétsetserajiricavapahini eyehe. Váhivare étaina vétsetseraruinapahini viverecahehinehi eta eplatane. Vitupiruvapahi eta vicayemaquenehi te mamirahu ema Viya. **6** Vahi vápanerechahini náetserajicahavihinehi ena achaneana, étiripa, viratahahineni vímereco eta vituparahaquenehi mayehe ema Viáquenu Jesucristo. Váhisera vávarahahinehi vímereco vácutihinehi mácani achane ticamusura. **7** Véchapajiricahehiséra tacutihinehi eta suéchapajirisira suémunasira súcani esena ena suchichanaveana. **8** Ichape eta vémunasirahehi. Vímitucahehi eta máechajiriruva ema Viya eta iúchucuiraya. Víjaracavahi ichape te visamureana, vivarairahi esuapa éti apanava, taicha vémunacahehi. **9** Nuparapenaveana, te vinasiqueneripa eta eyehe, eta vicametarairuirahi eta máechajiriruva ema Viya, ímaracahavirichuhi éti eta vicaematanerahi muraca eta vítatijirisiravahi. Tamutuhi sácheana, yátiana vicaema-

tanehi, taicha vahi vávarahahini vétsepanáracahéhini eta vinicaquenerepi.

¹⁰ Éti enecapaequenehahi tamutu eta víchararacavahi. Tímararacahávihi vavare ema Viya. Vitupiruvahi yátupi eta viúrivahi eta eyehe eti vichamurianahi. Tájina naviyahini nayunaca ena apamuriana achaneana. ¹¹ Énerichuvare échahi eta vétumechirahehi, émanapachuhi viconsejacha vicutihí mácani achane tiuri eta maconsejachira ema machicha. ¹² Vécatiacahehi ichape eta iúrivaina éti, ímerecaya eta macáchichairaherípa ema Viya, taicha íchuarecasivaipa mayehe eta ecachaneraya éma tayehe eta mávasa te anuma, te távihahi eta majaraiva.

¹³ Eta tacahe, vihasulupayachaparaca ema Viya eta táurivahi esama eta máechajiriruva vimetarapianahi. Éti, etupiruvahi ejacapa eta vimetasirahehi taicha eta esamirahi yátupiquenehi, tásihaquenehi ema Viya. Ímativanehi vahi vipanereruinchuchaini víti, émainapucaini mácani apana achane. Eta juca eta tíurichahehi eti esuapanahi. ¹⁴ Énerichuvare tíuríhi eta ecamichirahi eta ecatajivairahi nacatianasirahehi ena ejaneanana, ecutihí ena apamuriana vichamuriana ticavasanahi te Judea. Nuparapenaveana, ene nacahehi eta nacatajivairahi naicha ena najaneananarichu israelítana, táichavene eta náehisirahi ema Viáquenu Jesucristo. ¹⁵ Ena nani nujaneanana nacapacahi ema Viáquenu Jesucristo nacutihí ena náchucanaveánaini eta nacapasiravacahi apaicape ena profetanaini. Tipanajirichavianavare víti. Ena nani náimiyusemacahi ema Viya. Váhivare návaraha nasamahini ena apamuriana achaneana eta máechajiriruva ema Viya. ¹⁶ Taicha te vivarahainipa vímitucavaca ena apavasanana apaesa náuchucuhahini éna apanava, nacatichavare ena nujaneanana eta vímitucavaca éna. Tíchejimiráuchahavianapa. Eta tivíuchahi, tivayuchava paichucha eta natapiravana. Ema Viya vaipa macamichahini eta náejecapirávana. Puítisera táitecapáuchainapa eta náicuñaya máicha.

Emá Pablo mavaraha tíápechava máejiravaca ena machamuriana

¹⁷ Nuparapenaveana, tayanapane viyerehicacahi puiti juca cájeana, vahi vímahacacahini, tanasihisera vicaimairuhehi te viúquihana. Vivarahaine víjahúchavahini vítecapauchahe vímahahéhini. ¹⁸ Nútiripa nuti Pablo, ichapemurihineni nuvaraha níteca eta ara eyehe, énapa ena apinana nucompañeroana. Émasera ema Satanás tíchejimiráurucahávi chuchapúca jácani. ¹⁹ Véñamavahi víti eta eyehe taicha vivarahahi tánasihíni eta iúri va eta machimapiraheya eta machaviraya ema Viáquenu Jesucristo. Tásiha, víti vicuchapavainapa eta vijacapirayare eta vícuchihi mayehe éma. Viúrisamurénapa víti te jena sache, íchavenehi éti.

3 Eta tayerevaipahi eta vimaimanasirahehi, tétaví-cavahi eta véñamiravahi eta eyehe. Vaipa viúrisamurehini. Vivarahaipaicha vecha tájahapuca eta ícharacavahi. Tásiha, vipanerechapa vévatata ema vichamuri Timoteo, máiteca máimahapanáhe. Vinasi-

pa víti vicarichu te Atena. Taicha ema maca Timoteo, émarichuhi mavanara ema Viya, émarichuvare vicutihí quenehi eta vicaemataneahi tayehe eta máechajiriruva ema Viáquenu Jesucristo. Nuvanecahi tímicatapanáheya te muracacháheya eta esuapajiraivaina, ³ apaesa nacuija nacuchavacuejehava tayehe eta ecatajivairana naicha ena ticatianarahiana. Écharichuhi éti eta vicatajivairaya táichavene eta véhisirahi ema Jesucristo. ⁴ Váhiserá táramicare eta juca, taicha vimetacahévanehi te vinasiquenerichaha eta eyehe, eta vicatajivairayarehi. Jéhesaréinehi tí-tauchavahi puítiripa, ímaharipahi éti. ⁵ Eta tacahe, tétavíavahi eta néñamiravahi núti eta eyehe. Vaipa núrisamurehini íchavenehi éti. Tacahe, nuvanecapa ema Timoteo máimahapanáhe te enasirichuhipuca eta éhisirahi ema Jesús. Taicha nímicauyayahehi máquipaicahehíni ema Satanás, támapurujihini eta vicaemata-neasiráipa ema Viya.

⁶ Puítisera eta machaviraipa ema Timoteo, másihairahi eta ara eyehe, timetacahavipa tájinairahi íchiravainahini eta éhisirahi ema Viáquenu Jesucristo, étapa eta émunasiracacahi. Timetacahavivare eta écharairisiráhavihi émunasiráhavihi víti, evarairahi íjahúchavahini ímahahavi. Vicuticacahi eta vivairahi vímahaha víti. ⁷ Eta tacahe, nuparapenaveana, véchararaháinehi eta visamairisiráhehi eta táurivahi eta éhisirahi ema Viáquenu. Tacamitiacarine eta véñamiravahi. Étumechahavirinehi eta vicatajivairana. Tichavarinehi eta viúrisamureva. ⁹ ¡Ichape eta vihasulupayachirahi ema Viya táichavenehi eta iúrivahi! ¡Tájinarine tácutihini eta viúrisamurevahi mayehe ema Viya, íchavenehi éti! ¹⁰ Tamutu sácheana, yátiana, viyujaracahi mayehe ema Viya, viyaseacahi vítujsiravainahíni víápechava vímahaha. Vímitucahehíni eta apamuriana títuacareana tayehe eta juca véhisirahi ema Jesús. Támutuhini ítuca.

¹¹ Eta tacahe, viyaseacahi ema Tata Vicaiyaquene émapa ema Viáquenu Jesucristo nájaracahavíhíni eta vítujsiraváina víteca véjirapanáhe. ¹² Énerichuvare macajurucahini ichape ema Viya eta émunaraivaina nayehe ena echamuriana, énapa ena apamuriana achaneana, tácutihini eta vémunasiráhehi víti. ¹³ Májaracahéni táurivaina eta esamureana tacuija etapiravaina, máepachinachahini eta íachanevana apaesa ecurisamurecha ema Tata Vicaiyaquene te jena sácheya machaviraya ema Viáquenu Jesucristo, másihairaya te anuma, mámirayarepahi ena apamuriana manerejiruanahi.

Mavaraha ema Viya táuri eta vítaresiraina

4 Tiuri puiti, nuparapenaveana, vituparacachecha muraca te máijare ema Viáquenu Jesucristo. Táuri eta ítaresiraina puiti juca epaisirayare. Te tauri eta ítaresiraina, ecurisamuréchayare ema Viya. Puiti íápajupanaváinapáipa eta iúrivaya. ² Ítucaripahi eta juca ímitucasivanahi víyehe. Étarichuhi vivanecasivanahi mayehe ema Viáquenu Jesucristo.

³ Taicha eta juca mavarahaquenehi ema Viya, tiápajucavayare eta iávahásirahi éma. Vaipa ecuquicha eta pecatuana. Nacuijapa nacuveha súcani apana esena. Ésuripa esu esena, vahi sucuveha ema apana achane. Énaripa ena echichanaveana, tacuija eta natuhusivaina. ⁴ Nacuchapa eta náitauchiraváina yátupina te mamirahu ema Viya. Emutu éti, yátupina eta émunasiraina ena eyenanaveana. Tauri eta ítaresiraina te epenana. ⁵ Vahi ecucutipa ena ajairana esenamareana. (Éna náichahi eta juca taicha eta namaimatirahi ema Viya.) ⁶ Nacuija nacuveha esu mayena ema mácani echamuri. Taicha ema Viya, yátupi eta máicuñasirayare nácani ena tíchanahi eta juca. Étarichuhi eta vímiturapianahi eyehe cape juca te vítecinapa eta ara eyehe. ⁷ Taicha víti máichuhaqueneánaripa ema Viya, mavaraha tíúrinayare eta vítaresiraya, vaipa víchaimahi eta juca tauriqueneana. ⁸ Tacahe, ema mácani tépuruhi eta juca vímiturapianahi, máepuruhivare ema Viya; taicha mavanairipianahi eta juca, vimetacasivahi víti mayehe ema Espíritu Santo, eta mávahásirahavihi. ⁹ Puiti numetacahe núti: Tájina vaipa néñamava eta eyehe eta émunasiracacahi, taicha ema Viya tíjara-caheripa eta émunasiracacahi. ¹⁰ Vaipa néñamavahini taicha nusamairiricaheipa eta émunaravahi nayehe ena echamuriana títecapauchaheanahi tíásihanahi tayehe eta táunavanahi eta iávasa Macedonia. Nuparapenaveana, puiti vituparacahecha iápajucavayare éti eta émunaravaya. ¹¹ Énerichuva víápechava vituparacahe tauri eta ítaresiraina. Échapajirica eta émataneana. Ecaemataneacava yátupina, eviyihayare eta ecamunuqueneana tásihaqueneánayare te evahuana, ¹² apaesa tacuija ecucamunu te epenana. Te ítaucha eta juca, tipicauchaheanayare ena apamuriana achaneana.

Vahi téñamavacareana ena vichamurianaini náepenaqueneana taicha tíápechavanayare títarecanayare

¹³ Nuparapenaveana, énerichuvare vivaraha vimetacahé eta náichararacavayare ena vichamuriana náepenaqueneanaripa. Vahi ecucatisamureva nayehe. Ena apamuriana achaneana ticatisamurevanapa te náecarapana ena náepenaqueneana, taicha vahi nácasíñavahini me Viya, nacunevahini eta nápechiravaya téchepucana te náecari. Vahi ecucahe éti. ¹⁴ Víti visuapahi eta máechepusirahi ema Jesús te táequenepa eta máepenirahi. Tásiha, visuapahivare eta macaechepusirahaviya ema Viya te vépenapa, vicáchanéna ema Jesús viti véhicanahi éma. ¹⁵ Eta tacahe, vimetacahe eta juca vímitucasívanahi mayehe ema Viya. Te machavapa ema Viáquenu Jesús, te vuíchaha-puca vicuepenahi víti, vahi vicainapucavaimahi nayehe ena náepenaqueneana. ¹⁶ Taicha émarichu ema Viáquenu tíucupaicaya tichavayare, tíásihaya te anuma. Tipiaracaya muraca tíchuarecaya. Ema Arcángel énerichuvare tipiaracayareva. Ticaemayareva eta machuja ema Viya. Tacahe, téchepucanainapa tínapucanaya ena náepenaqueneana ena tisuapajirahianahi mayehe ema Cristo. ¹⁷ Tacahe, viti vítareruaichaha

viyanainapa. Vimutu vicáchanéna ena náepenaqueneánaini. Viácapajicáinapa ema Viáquenu te anuquehe te távihahi eta úcaji. Tásiha, máichecuaraquireyare eta vicachaneraya ema Viáquenu. ¹⁸ Eta tacahe, emetajiricacayare nayehe ena echamuriana tamutu eta juca vímiturapianahi, apaesa nacurisamurechavaya éna apanava.

Tiáramicareyarechucha eta machaviraya ema Viáquenu

⁵ Nuparapenaveana, vahi ecuemitiscava. Ecunevaicha yátupina, taicha téchacareipa eta táramicarevaya eta máitesirayare ema Viáquenu. Tacuti-yare mácani tíamereca te yati, nájina tinicapaina. Ene tacaheyare eta máitesirayare ema Viáquenu. Váhiserá vécha tájamuhuyarepuca. ³ Énaripa ena achaneana vuíchaha náemetecaimahi eta tánehiraripa eta máitecapiraya. “Viúririchucha puiti. Tájina víchiravaimahi” nacaheyare éna. Vahi tinicapauchavaimahi eta táitecapauchiraya eta náicuñayare tacuti-yare esu súcani esena ticajari, tíjahúchavapa ticati eta sujuhe eta suínasiraya. Ene nacaheyare éna. Tájina najunaiyaimahi. ⁴ Étisera, nuparapenaveana, écharipa eta juca. Vaipa iáramecaimahi te jena sache máitecapiraya ema Viáquenu, taicha tamutu sácheana ecuchapahi eta máitecapiraya. ⁵ Taicha víti víávihahi te majaravahi ema Viya, víti vipaichahi te sáchemuhu. Vahi táíñehavina eta yati, taicha vínajicaipa eta tamapicucquene. ⁶ Eta tacahe, tavaraha vicuneuchava tamutu sácheana, vijaneasiravainahini muraca. Váhini vicucutihini ena tivayuchavanahi tímacacarácavana, tájina náechaqueneana éna. Vítisera vijaneacavaya tamutu sácheana, yátiana. Tájina víchiraváimahi. ⁷ Ena achaneana, tímacacarácavanahi te yátiana, ena apamuriana ticávahaháracavánahi te yátiana. Vahi najaneacavahini éna. ⁸ Vítisera tamutu sácheana vicuneyare. Tiúriyarehi eta vipaisira, tájina víchiravaimahi. Yátupina eta véhisira ema Jesús. Vímiyanavahini eta vémunasiracacaina. Vácasiñavahini eta macuchucuirahaviya éma. Tájina vahi vicuyacujieque-nehava eta vicuchapiraya eta jena sache. ⁹ Taicha ema Viya manerejiruhavihi eta macuchucuirahaviya máichavenehi ema Viáquenu Jesucristo. Vaipa vicaicuñaimahi. ¹⁰ Ema Jesucristo tépenahi te crusu vítivenehi, mavarairahi vítarecayare vicachaneyare éma. Te máitecapa éma, macaechepucainapa ena náepenaqueneana vichamurianaini. Tásiha, viti vítarerua-naichaha tihetamurichahavinapa, taicha mavarahahi vicachaneyare éma. ¹¹ Eta tacahe, étumechacaca, ecaticacavare. Núti nucasíñavahi eta eyehe eta íchirapaipa puiti eta juca.

Ema Pablo tímiyanava eta maconsejachiravaca ena machamuriana

¹² Nuparapenaveana, énerichuvare vituparacahe eta epicauchiraina ena víyarahana pastoreana taicha ena tíconsejachaheanahi, tímitucaheanahi eta juca éhisir-

ahi ema Viya. ¹³ Échapajiricavacaya éna. Émunasi-návaicha, taicha éna tíurihi eta náimicatasirahehi. Tacuija ecuichiravaina éti eta nayehe.

¹⁴ Énerichuvare vituparacahe, nuparapenaveana, epamicayare muraca nacaematane ena plújuana, vahi náesachahi ticaemataneana. Énerichuvare étumechavaca ena tiyacujiririhana. Ena nani títanájiricanahi, muracaina eta ímitusiraina. Ecayeheyaresera paciencia nayehe namutu.

¹⁵ Échapavayare. Tijuricati natiarihína navaraha titupiacacheana, vahi ecujicapa. Váhivare ecuitsicava. Ímrecayaresera eta iúrivaya nayehe ena echamuriana, énapa namutu ena apamuriana achaneana.

¹⁶ Íúrisamurerecaya tamutu sácheana. ¹⁷ Vahi ecucainajiruva eta eyujarasirana mayehe ema Viya. ¹⁸ Tamutu jácani íchararacavanahi, ehasulupayacha ema Viya, taicha eta mavarahahi ema Viya ecaheyare eti éhicahahi ema Viáquenu Jesucristo.

¹⁹ Váhivare ecuemepurureca eta mavarahaque-
neanahi maicha ema Espíritu Santo eta eyehe. ²⁰ Te esama nácani téchajisihanahi ema Viya, vahi ecuepu-
ru. ²¹ Vahi ecuemunanasicava. Epanerechinavayare te

tájahapuca jácani esamaqueneanahi, ímahaque-
neanahi. Éhicaya eta táuriqueneana. ²² Téhesera vahi tíurihi, vahi ecuisapava, taicha eta tauriqueneanahi.

²³ Tiuri puiti, máijarahéni ema Viya táurivaina eta epanereruana. Yátupinahini tacuijahini ecuichiravaina eta iávahásirahi éma. Majaneasinahehine eta iáchanevana, eta iáqueheana. Tacuija eta etapiravainahini te machavapa ema Viáquenu Jesucristo.

²⁴ Taicha éti máichuhaqueneanahi éma. Yátupi eta macasiñacarevahi. Máitauchayareva tamutu eta juca.

Eta téqueneha matuparaha ema Pablo

²⁵ Nuparapenaveana, ímicatacavi eyujarauhavi me Viya.

²⁶ Échajisinhavi namutu ena vichamuriana.

²⁷ Nutuparacahe te máijare ema Viáquenu échajicuha eta juca vicartane te namuri ena vichamuriana apaesa námutu nasama.

²⁸ Nuyaseachaheparaca me Viáquenu Jesucristo táetaviuchahine eta iúricarevaya máicha.

2 Tesalonicenses

1 Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas †, émapa ema Timoteo. Vímiamarecahi eta juca vicartane taicha eta íavahásiraipa ema Tata Vicaiyaquene, táichavene eta éhisiraipa ema Viáquenu Jesucristo. ² Nuvaraha macatajicahehine ema Tata Vicaiyaquene, émapa ema Viáquenu Jesucristo; náijaracahehine eta táurivaina eta epanereruana.

Ena Viya máicuñacayare ena ticapecaturarahiana te táitecapapa eta machaviraya ema Cristo

³ Nuparapenaveana, tatuparaca vihasulupayachaparaca ema Viya, taicha visamairiricahe eta tápajusiravapaipaicha eta esuapirahi ema Viya. Tajurusirapaipahi eta émunasiracacairahi. Eta tacahe, vihasulupayachaparacahi ema Viya. ⁴ Tájinarine tácuti eta vicajamurairahehi nayehe ena vichamuriana te viúrujisirávana te jácani vítecapihapahi. Vimetacavacapahi eta táimiyani-rávahi eta éhisirahi, ecamichirahivare tamutu eta nacatianasirahahi ena achaneana étapa eta ecatajivairana, táichavene eta éhisirahi ema Viya. ⁵ Tímararacahehisera ema Viya eta ecamichirahi eta ecatajivairahi. Máimerecahi éma eta máuriva, máitauchirahi tamutu. Éma tijacapaheyare eta esiapirayare tayehe eta mávasa.

⁶ Máimaháinepaséra ema Viya eta máicuñasiravacayare ena ticatianacaheanahi éti, taicha macarichu éma ticatuparahahi juésyarehi téchayarehi. ⁷ Étiserá, ticanaracaheyare ema Viya eta ecatajivairana, vicuticainapa eta vinarasirayare te mamirahu ema Viya. Vinaracainapa vimutu, te máitecapapa ema Viáquenu Jesús, mápechiravaya títeca, másiháiraya te anuma. Te jena sáchezare, mámayarepahi ena mayeheana ángeleana, tífehianainapáipa máicha. Tacutinapaipa eta ichapequene yucu eta máucupaisirayare. ⁸ Eta tímitecayare éma, máicuñacayare ena váhiquene návarahahine náimati ema Viya, váhivare návarahahine nasuapa eta máechajiriruva. ⁹ Ena nani máehicarahanahi ema Viáquenu Jesucristo, ticaquijianainapa eta te infierno. Váhivare nacamichahine náimarraca eta mami-ra taicha táetaviuchahi eta máinehivahi. Tájina náuchucuiraimahi. ¹⁰ Te jena sáchezare te máitecapapa ema Viáquenu, viáramimícaína ichape eta mayehe vimutu viti manerejiruanahi. Tétavicavaya eta vicunachirainapa éma. (Éti apanava etiarihiyarehi, taicha esuapahi eta vímiturapianahi.)

† *Ena Silas, eta máijarequene Silvano te náechajiriruva ena romanoana.*

¹¹ Eta tacahe, tamutu sácheana te viyujarasirana, viyaseuchahehi me Viya eta ímiyaniravaina eta iúriava, taicha éti íchuarecasivahi eta mayehe. Énerichuvare viyaseuchahe me Viya eta máijarasirahéna eta ítupajijásiraváina tayehe eta juca ématanerepihi táichavenénahi eta esuapajiraivahi. Eta juca, ichape tacurismurecha ema Viya. ¹² Tásiha, ena apamuriana achaneana nacunachayare ema Viáquenu Jesucristo táichavenehi eta náimairahi eta íchirahi éti eta táuriqueneana. Énerichuvare, éti ecunachacarénapa me Viya, taicha tétavicavahi eta máemunasirahahi, émapa ema Viáquenu Jesucristo.

Ena Achane Váinarajiquene

2 Puítiripa, nuparapenaveana, naririhine ena tépiyaequenehanaripa ema Jesús, náimijacharipa matiarahiripa, tichavaripa puiti. Vituparacahecha vahi ecusuapa nácani tépiyahirahianapahi. Tayanapane nácahepuca: “Eta juca vimetacasivahi me Espíritu Santo”. Nácahepuca: “Ena Pablo tímítucahavihi eta juca”. Te náepiyaequenehahavipuca náimechahepuca eta carta, náimijachayarehi tásihaquene viyehe, váhiquenesera ecusuapavane. Váhi tacuimipanererecahe eta juca. Váhivare ecuarameca. Taicha te máitecapa yátupina ema Jesús, ticurujicahávinumayare viti manerejiruanahi.

Nuvaraha numetacahe eta apana. Te tánehipaicha eta máitesiraya ema Jesús, ena achaneana vaipa napicauchaimahi ema Viya. Náepuruinapa eta máechajiriruva. Tásiha, tímerecaváinapa ema Achane Váinarajiquene. Ena maca achane, macatichainapa masama eta máijare ema Viya. Étaripa eta nasiñarajiana ena achaneana, váipavare máuricaimahi. Macavanairipinapa ena achaneana te tamutu avasareana náepuyumirauchayare éma. “Nuti Víyanu. Núti ecasiñayare” macahénapa. Masapihainapa, ticaejacavainapa tayehe eta Templo. Téhesera támutupa, yátupiquenenapa eta máicuñayare muraca.

⁵ Échavarichuhi éti eta nímitusiraheparacahi cape juca te návihaichahahi eyehe. Numetacahehi eta táichararacavayarehi. ⁶ Puiti ena achaneana, nararhipa tivainarajichavanapaipahi. Vuíchahasera máisapahine ema Viya navayuchavahine. Mararihi ema maneruhi tíchejimiráuchavacaráchaha. Eta tacahe, vuíchaha máuchujicahíni máimerecavahíni ema Achane Váinarajiquene. (Éti ímaticuhui ema tíchejimiráurucahi.) Tacahe, ema Viya máisapainapa térajicava ema tíchejimiráurucahi. ⁸ Tásiha, mapaenumavainapa

tímerecavayare ema Achane Váinarajiquene. Tuparairucayare mayehe ema Satanás. Éma, tijaracayarehi eta máitupajijiásiravayarehi. Tamutuyare máimereca eta tiáramicareana tacutiyare yátupiquenénahíni mayehénahíni ema Viya. Ema maca, máetaviuchainapa eta mavayuaraiwa nayehe ena achaneana. Éna, tísapavainainapa náehica eta táíñehiqueneana mavayuaraiquianapahi. Váhiserá máyerémahi. Tiúcupaicavánéna ema Viáquenu Jesús. Tiáramicarénapa eta majaravayarepahi. Te máchajurapa, máquipaicainapa macapacainavarepa ema Achane Váinarajiquenéni. Tacahe, ena nani achaneana máiturevanahi témitiequenehanainapa. Ticaicuñanainapa taicha vahi návarahahini náehica eta yátupiqueneana tiúriana echájjirucavana. Te nasuapahini, tiúchucuhanahini tayehe eta ecuñaraqui. ¹¹ Taicha eta namasuapirahi ema Viya, máisapayarehi ena nani achaneana nasuapa eta mavayuaraiquiana ema Achane Váinarajiquene. ¹² Tacahe, namutuyare ticaicuñanayare éna, taicha vahi návarahahini nasuapa eta yátupiqueneana vímiturapiana. Navapinaichucha eta náichiraya eta tamauriqueneana.

Tiúchucuhanayare ena téhicanahi ema Viya taicha manerejjiruanahi

¹³ Étiserá, nuparapenaveana, máemunaruanahi ema Viya. Víti tatuparaca vihásulupayachaparácayare ema Viya íchavenehi éti, taicha manerejjiruhehi ema Viya te tépanavainapa. Táitusiava, te esamapa eta vimetarairuhi, etupiruvapa ejacapahi; taicha esamapa eta máichuirahéhi éma. Éma ticuchucuhaheyare taicha ímiyanavahi esuapa eta yátupiqueneana máimiturapiana ema Cristo. Émapa ema Espíritu Santo máimiyana eta mávahásirahéhi, májjaracahe eta esantuvainapaipaicha puiti juca ecaijuheyare. Tásiha, ítujicavainapa esiapa tayehe eta mávihahi ema Viáquenu Jesucristo, ímahainapa eta majaraiwa.

¹⁵ Tiuri puiti, nuparapenaveana, ímiyanava eta éhisiraina ema Jesucristo. Vahi ecuemitisica eta vímiturapianahi, te vimuturichaha eta eyehe, étapa eta juca véchajjirivanahi te carta, vémevataruanahi eyehe.

¹⁶ Nuparapenaveana, tétavicavahi eta máemunasirahavihi ema Viáquenu Jesucristo, émapa ema Tata Vicaiaquene. Tayanapane vahi víurihíni, énasera navarahahi ticurisamurechahavianaya. Tásiha, vicunevainapa eta víuricacarevaya, máichecuarairénapa náicha. ¹⁷ Puiti nuvaraha esamavaini éti eta nacurisamurechirahe te esamureana. Náetumechavaréni eta ímiyaniravaya icha eta táuriqueneana, táurihivaréni eta échajjirisiravana.

Éma Pablo mayaseacavaca eta nayujarauchiraina me Viya

3 Títecapa, vivaraha vituparacahe puiti, eti nuparapenaveana: Eyaseuchahavi te eyujarasirana mayehe ema Viya. Tasuápacareváiinahíni muraca nayehe ena achaneana eta vimetarairuana máechajjiri-

ruvana ema Viya, tácutihini eta esuapirávanehi éti. Táitecapauchavanehíni ena ticavasanahi te tayerehiqueneana te juca apaquehe. ² Énerichuvare, eyaseuchahavi macátuiuchirahávinahíni ema Viya nayehe ena achaneana váinarajiqueneána titupiarahiana. Taicha camuriana ena masuapajirairahanahi me Viya. ³ Váhiserá táéñamavacarehini eta máurivahi ema Viya eta viyehe, yátupihíni eta máitauahirahi tamutu. Tétumechahayare éma eta ímiyanavairaya. Tijaneacaheyareva mayehe ema Váinaraji. ⁴ Víti vicasiñavahi eyehe eta esuapirahaviya tamutu eta vitupararuheanahi taicha éti éhicahi ema Viáquenu, táicha esuaparipa eta táinapureanahi vitupararuheanahi cape juca. ⁵ Máimicatacahehini ema Viya eta ímatiraina eta máemunasirahéhi. Májjaracahevaréni eta ecayeheraya paciencia, ácutihini ema Cristo.

Tatuparaca vicaemataneayare

⁶ Nuparapenaveana, te natiarihinapuca ena echamurianahi plújuana, váhipuca náesachahi ticaemataneana, te váhipuca návarahahini náetumechavahini, nasuapahini eta vímiturapianahi, vivanecahe éti te májjaré ema Viáquenu Jesucristo: Vahi ecueméñahava nayehe. ⁷ Écharichuhi éti eta etuparahahi ítusiraina ítátijjirícava, éhisirayarehi eta viyeherepianahi víti te vívihuachaha eta ara eyehe. Vahi plújuhávimahíni.

⁸ Váhivare vinicairihihini te epenana. Víti vicaematanehi muraca eta vítatijjirisiravahi. Tamutu sácheana, yátiana, vicaematanehi, taicha vahi vávarahahini vétsepanáracahehini eta vinicaquenerepi. ⁹ Tatuparacahinéni víyaseacahehini eta énisirahavinahíni, vivarahiserá vímechahayarehi eta vicaemataneiraviana, apaesa étainarichuhíni éhica éti. ¹⁰ Étaripa te vinasiqueneichaha eta eyehe, vivanecahehi: Vahi ecuenica mácani vahi mavarahahi ticaematane. ¹¹ Puítiripasera visamairiricahi eta natiarihirahi ena echamuriana tinerejjicavanahi plújuana. Vahi náesachahini ticaemataneana, tinicairihianahi. Tímiapitavairicavanapaipahi te pétiana. ¹² Étíhi íchanahi eta juca, vivanecahe te májjaré ema Viáquenu Jesucristo: Yátupina táuri eta ecáematanéiraina, eviyayare eta ecamunuqueneana. ¹³ Éti apamuriana nuparapenaveana, vahi ecuinajica eta táurivahi eta ecaemataneana. ¹⁴ Te natiarihinapuca nácani vahi nacusuapa eta vivanairipianahi te juca carta, ecauneyare éna. Tásiha, emetacapa ena echamuriana vaipa nacucachane éna, apaesa nátsirihaihu ena nani eta namasuapajiravahi. ¹⁵ Váhiserá ecucatichavaca, econsejachavacachucha taicha echamurianahi éna.

Éma Pablo mayujarauchahi ena machamuriana

¹⁶ Tiuri puiti, nuyaseacahi ema Viáquenu ema tíurichahavirahi, máimiyana vahíni májjaracahéni eta iúrivaya te epanereruana, tijuricati tájahapuca ícharacava te sácheana, taicha mavarahahi eta iúrivaya. Ámutuhíni mávahácahehíni ema Viya.

¹⁷ Nuti Pablo, nútijacaruvapa nájucha eta juca táichecuaraquihi eta nucartane, apaesa ímati eta táimahihi eta nuyehe letra nuvahurupajihi.

¹⁸ Nuyaseuchaheparacahi emutu éti me Viáquenu Jesucristo, táetaviuchahini eta iúricacarevaya máicha. Tamutupa eta juca néchajiriruvahi eyehe.

1 Timoteo

1 Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahi-quenehi viyehe, émapa ema Viáquenu Jesucristo, ema vicunequenehi eta mápechiravayare tichava. ² Nímiama-reca eta juca nucartane piyehe piti nuparape Timoteo. Némunacavihi tímicutijiricavahi nuchichavinahíni táichavénehi eta péhisiranuhi eta nusuapajiraivahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Náijaracavini eta táurivaina eta pipaneruana.

Emá Pablo mametaca ema Timoteo eta macunerayare ena tihapapirahiana

³ Pécharipahi eta juca numetaruvahi, te nuyana-yarepa tayehe te tinapaica eta Macedonia, eta nutuparasiravahi pinasiyaréhi tayehe eta avasare Efeso. Vuíchaha pijunijicaimahi taicha pímatirípahi píti ena nani navarahahi tihapapicana eta vímiturapiana. Vahi picuisapavaca. ⁴ Pécatiacaicha ena vichamurianahi, vahi nacusuapa eta echájjirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náechajiriruvana te náechajisiha ena viáchucanaveanini. Eta juca náechajiriruvana, ticauyayacarehi táemejecapavachavaca ena vichamuriana, machu nachavacuejehava táicha. Étavanerecáinahipucáini náimicatacáhavihipucáini eta vítauchiráinahini eta véhisirahi ema Viya. ⁵ Nutuparacavihi taicha nuvarahahi náimerecaya ena vichamuriana yátupina eta náemunasiracacaina táuchurenare te nasamureana, tapachinavareni eta napanereruana. Tacuija nacúquichiraváinahini eta nasamiravahi te mamirahu ema Viya. Tauri eta náehisiraina ema Viáquenu. Yátupina nasuapa. ⁶ Taicha nararihi ena téjecapavanapaipa, nasuaparichucha eta tájiparacana súnsurupiana. Eta juca táiminajicavacapaipa tayehe eta vímiturapiana. ⁷ Tásiha, tépiyacavanapa náimatihitamu eta Sagrada Escritura. Navarahavare tímiturecana, váhisera nácaicutiarahíni eta tacayemaqueneana eta táechajisihaqueneanahi. Ena nacahehi: "Víti véchahi tamutu", tájjanéni náechihahíni.

⁸ Tájiina táichava eta tatiarirahi eta mavanairipianahi ema víyarahaini Moisés. Véchahi eta táuriva eta mavanairipiana, taicha éta, táimitucavacahi ena achaneana eta vahi nacuejecapava. ⁹ Taicha véchahi eta tacaemataneasirahi eta vanairipiana eta táimitupiruchiravacaya ena ticapecaturarahiana. Nácani

achaneana tíuriana, vahi énaina tatuparaca eta vanairipianahi. Tatuparacahisera ena nácani mapicaurirahana masuapajirairahana; énapa nácani váinarajipaneréruana ticapecaturarahiana; énapa nácani mapicaucharahana ema Viya, ena ticatichana eta máechajiriruvána; énapa nácani téhana ena náiyana, ena náenana; énapa nácani ticapahiana; ¹⁰ énapa ena túhusiana énapa nácani ticaecahiana ena nayenana, navehapa esu apana esena; énapa nácani tivehana ena nacutiqueneanahi ajaira; énapa nácani tíamerecana achane, amaperupuca, esenapuca; énapa ena tépiyahirahiana; énapa ena tépiyaequenerahiana. Énerichuvare eta vanairipi tatuparaca ena ticatichana eta táuriqueneana vímiturapiana. ¹¹ Taicha núti nutuparacasivahi me Viya eta nímituresiraya eta táurinaqueneanahi máechajiriruvana, eta tímicaijuhechahaviya tayehe eta táurinaquene mávasa ema Viya. Tétavicavahi eta macunachacarevahi éma.

Emá Pablo mahasulupayacha ema Jesucristo taicha eta máichuirahi

¹² Núti nuhasulupayacha ema Viáquenu Jesucristo, taicha eta máichuiranuhi mavanaranuyarehi. Tétumechanuhi yátupi taicha máimahahi eta nítauchirayarehi eta nutuparacasivayarehi mayehe. ¹³ Éma, tituparacaruhi eta juca, ichapemurihinéni eta néjecapiravahi mayehe, tíñemahihi eta néchajiriruvana mayehe. Nupanajiricavacahi ena náinapureanahi téhicanahi éma. Tijapanunhisera éma, vuíchahahinéni nusupahini néhicahini éma. Taicha vahi néchahini émahiné-nipuca nucatianacahi, eta níchirahi ena machanerana éma. ¹⁴ Tásihasera tétavicavahi eta máemunasiranuhi ema Viáquenu Jesucristo. Ichaperinehi eta máijarasiranuhi eta nusuapirahi yátupi éma, étapa eta máijarasiranuhi eta némunaraivahi.

¹⁵ Nuvaraha námutihini ena achaneana nasuapa eta véhiruhi taicha yátupihitamu eta juca vímiturapiana: Emá Viáquenu Jesucristo tímitecahi te juca apaquehe macuchucuhavacayarehi ena ticapecaturarahiana.

Nútiripahi nuváyuchapanaváinihi eta nucapecaturaraváinihi. ¹⁶ Émasera ema Viáquenu Jesucristo tijapanunuhi, táitusiava tíchuhanuhi núti. Taicha mavarahahi máimerecayare ichape eta mayehe paciencia eta nuyehe, nuvayurevaquenénihi eta nucapecaturaraváinihi. Eta tacahe, nucaicutiarapa eta majacapirayareva namutu ena tisuapanayare, máichecuaraquirénapa eta náitaeresiraya máicha.

¹⁷ Eta tacahe, macarichu vicunachayare vijirau-chayare tamutu sácheana ema Viya, taicha macarichuhi éma tamutu máituruequeneha. Éma, máimahasiquenehi, máepenacacahivare. Jéheva-requene éma, viyehihi Rey acanequene te tépana-vainapa, étapa puiti juca vicaijuheyare. Amén.

Emá Pablo matuparacahi ema Timoteo

¹⁸ Nuchicha Timoteo, nutuparacavicha muraca eta piratahairaina picanara eta tauriqueneana. Tiúri-yare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisiavirahi eta piúrivahi ena vichamuriana mametaruanahi ema Espíritu Santo. Vahi picuemepurureca. ¹⁹ Taicha nararihi ena ticainajiruvanapaipa, náechahinéni eta táíñehivahi eta náichaqueneanahi, váhisera návarahahini nácaínajiruvahini eta tauriqueneanahi. Tínajicavanarichucha eta náehisirainihi ema Viya. ²⁰ Émaripa ema Himeneo émapa ema Alejandro, tacahehi eta náinajisiravahi eta náehisirainihi ema Viya. Puítisera, ena nani níjararupa ema Satanás, taicha nuvaraha nachava, náinajicayare eta nacaecahirahi ema Viya.

Emá Pablo máimituca eta nayujarauhivaya

2 Tativayaresera nutuparacahe, vahi tacuechuquihá eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana. ² Énerichuvare eyaseuchayare ena aquenucana énapa ena apamuriana tuparairucana, apaesa táuri eta náechapajirisiraina eta avasareana, váhini vicuimahaini eta táíñehiqueneana. Víti vímianavahini viúrihini te mamirahu ema Viya, vicapicahuhini nayehe ena achaneana. ³ Taicha ema Viya Macatiurahiquene máuricahi eta víchirahi víti eta júcana. ⁴ Taicha mavarahahi éma máimimatichayare namutu ena achaneana eta yátupiqueneana máechajiriruvana apaesa náuchucuha éna apanava. ⁵ Taicha májina apanainahini ticatiuchavacaina éna, macarichu ema Tata Vicaiyaquene. Émapa ema Machicha ema achane Cristo Jesús, macarichuhi ema téchajirahi viyehe viti achaneana te mamirahu ema Tata Vicaiyaquene. Nájina apanaina téchajirahínahi viyehe. ⁶ Ema Viáquenu Jesucristo tíjaracavahi tépena taicha eta macuchucuirahaviya vimutu viti achaneana. Puítisera mavaraha máimimatichayare namutu eta juca arairuhi vímiturapiana. ⁷ Eta tacahehi, manerejirunuichuhi mayehenuhi apóstole, nucametarairuyare tamutu avasareana, nímitucayarehi ena apavasanana eta nasuapiraina éna eta yátupiqueneana máechajiriruvana ema Viya. Nutupiruvahi núti eta juca néchajisirahi, vahi népiyahiravainahi.

Emá Pablo máimitucavaca eta náicharacavaya te náurujisiravana

⁸ Tiuri, nutuparacahevare pímitucavacavare ena vichamuriana eta juca apana: Tauri eta náurujisiravaina te nayujarasirana. Ena ajairana, vahi nacueña-

mavahini me Viya eta máitauchirayare eta nayasearuhi. Tátupiruvahini te nasamureana. Vahi nacúsemamajuhehíni eta nayujarasirayarehi nacajapa-vaquichavapuca. ⁹ Énaripa ena esenana, táurihini eta nacamuirihairana. Vahi nacúyeheheécaicha eta nacamuirihaira. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyeheheacavahini eta oro, eta perla, eta tasivachaqueneana múiriareana. ¹⁰ Étaripa náurina- navahi yátupiquenehi, eta náimeresiravaina eta yátupina náehisirahi ema Viya, náichirainavare eta táuriqueneanapa. ¹¹ Énerichuvare, tiúriyare eta nasamararasira eta náimitucasivana. Vahi nacuéca-paemarahi nácani tímitucanahi. ¹² Énerichuvare ena esenana, vahi tatuparaca náimitucahíni ena víyarahana te viúrujisiravana, taicha vahi tatuparacahini náimitucahíni éna. Nasamararacayarechucha eta náimitucasivana. ¹³ Taicha te máepiyacainapa ema Viya ena viáchucanaveánaini, títapuca máepiyacahi ema Adan, téquenehapa esu Eva. ¹⁴ Váhivare émainahini ema Adan máinapucahini máquipaicavahíni. Ésuhi esu esena, tísapavahi mavayuaca ema Satanás. Eta suísapiravahi, tiáquipaicavanapa tayehe eta pecatu. ¹⁵ Tásiha, ticatajivainapa eta suínasirana. Puíticha tanasihi nayehe ena esenana. Tiúchucuhanayaresera, te náimiyanova náehica ema Jesús, étapa eta náemunasiraina ena vichamuriana. Tacuijavare natapiravaina te mamirahu ema Viya, táurihini eta napaneruana.

Tiúrianayarehi eta náitaresira nácani tatupararuana-yare eta avacurecacare pastorecare

3 Étaripa eta juca evacureca pastorecare, puiti nutupiruva numetacahe. Te natiarihinapuca nácani ajairana návaraha ticavacureana eta pastorecare, tájina táichiravaina, taicha eta juca evacureca pastorecare, éta tiúriana evacureca ticaijuhecare. ² Tacamunuhisera mácani ticavacureya eta pastorecare, tájina matapiravainaya eta máitaresirahi, tacuija nacuyunaca ena achaneana. Mácani ésunarichuhi esu mayena. Mácani ticapicahuhi. Mácani tijaneacavahi eta máitare-sira, máitucahi tipanerereca. Mácani achanesamure tijacaparahi nayehe nácani tichimarachanaya. Mácani máituca tímitureca. ³ Mácani vahi tavayuaruina eta téracare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi. ⁴ Ticaiyacareyare te mapena. Máitucayare eta macajurisirayare ena machichanaveana, tisuapajirahianayare tipicaurahianayare máicha. ⁵ Vahi tisiapaimahi mácani achane vahi máitucahi ticavanairipi te mapena. Taicha nararihi ena vahi náituca ticavanairipiana. Tavetijipapuca eta juca evacureca, vaipa náitucaimahi eta náechajirisiraina najaneasirayarehi ena vichamuriana. ⁶ Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirahi eta matuparahahi. Eta tacahe eta máquipaisiravahi ema Váinaraji. ⁷ Énerichuvare

tacamunuhi mácani pastoreyare ticapicahu nayehe ena apamuriana achaneana, apaesa vahi nacuechajica eta mayehe. Machu máituruca ema Váinaraji.

Tiúrianayarehi eta náitaresira nácani tatupararuana-yare eta avacurecacare ticaijare diácono

⁸ Énerichuvare, nácani ticavacureya eta diáconocare, tacamunuhi ticapicahuanayare eta náitaresirahi. Vahi apiapiemanaimahi eta náechajirisiravana. Váhivare ticavaharasianaimahi. Váhivare tijamurarahanaimahi.

⁹ Tacamunuhivare náimatiyare yátupi eta tisuapacareanahi mayehe ema Jesús, náitachiraripa tamutu, tájinapa náichiravaimahi te mamirahu ema Viya.

¹⁰ Nacasamairunumaya te yátupihipuca tiuri, tájinapuca náichiravaimahi. Téhesera tiúrianahi, énarata tuparairucanayarehi eta evacureca diáconocare.

¹¹ Énerichuvare, ena esenana, tacamunuhi ticapicahuana. Vahi nacuechajihí. Súcani tijaneacavahi eta súitaresira. Tájina náichiravaimahi, títaurahiánayare.

¹² Ema tuparairucayare, tacamunuhi mácani ésunari-chuvare esu mayena. Máitucayare eta máimitusirayare ena machichanaveana. Ticaiyacareyare te mapena.

¹³ Taicha te náitachahi tamutu eta natuparahana ena tuparairucana, ticunachacareanahi tipícauchacareánahivare. Tásiha, énerichuvare tétumesamúrechaváinapa eta nacametarairuirahi eta máimiturapiana ema Jesucristo.

Jéhevare eta juca téhicacare

¹⁴ Puiti nucunevaipa eta nítecapiravaneya eta ara piyehe, téhesera vuíchahapuca nucuítujicava níteca. Nucajurevihisera eta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejiruanahi ema yátupiquenehi Viya. Viúnacahi vímiturecahi yátupi eta máechajiriruvana. ¹⁶ Taicha eta juca véhiruhi vimutu, tétavicavahi eta táuriva:

Vimutuhi visuapahi eta máucupaisirahi te juca apaquehe ema Jesucristo, macaqueherahi eta juca viáquehehi viti achaneana.

Émaripa ema Espíritu Santo macametarapihivare eta yátupirahi Machicha ema Viya.

Náimahahivare ena ángeleana eta máechepusirahi te máecari.

Te tamutupa, tichavapa éma te mávasa anuma.

Tásiha, viti mavanarana véchajisihahi tamutu avasareana eta macuchucuirahaviyare vimutu viti achaneana.

Ichapemuriana ena ticasifávanahi mayehe, téhicanihi éma.

Natiarihiyare ena tínajicavanaya eta náehisira ema Jesús

⁴ Eta mametarapi ema Espíritu Santo, puiti juca vicaijuheyare, natiarihinapa ena timútserahávana-yarepahi tínajicavana eta náehisirahi ema Jesús. Nasuapainapaipa ena tiyururahiana. Náehicainapa eta

náimiturapiana ena éreanana. ² Nasapihainapa tisamacareanayare ena apiapiemana tépiyahirahiana. Ena nani, máimatiacavarahánahi eta náepiyahiraviana taicha náitunaipahi eta nacahirana. ³ Ena nani achaneana nayurucainapaipa ena vichamuriana. Ánipa nacaheyare: “Vahi táurica vitanucachini esu esena viyenainahini. Jucarihivare eta tinicacare, énerichuvare vahi táurica vinicahini” nacaheyare. Tamutusera eta juca tinicacareana máepiyaruana ema Viya vinicayarehi viti vímatiequenehanahi eta máechajiriruvana. Vihasulupayachayarehi te vinicayare eta máijarahavianahi ema Viya. ⁴ Taicha tamutuhi tiuri eta máepiyaruana ema Viya. Vahi táuricahini vépuruhíni. Vijacapayarehi tamutu, vihasulupayachayarehi te vinicaya; taicha víjaracasihi mayehe ema Viya, timetacahavihi eta táurivahi. Tacaursamurechahi ema Viya eta viyujarasirana. Puíticha tanasihi viyehe víti. Te vinica, vihasulupayachayarehi ema Viya.

Ema yátupiquene mavanara ema Jesucristo

⁶ Te pímitucavaca eta juca ena vichamuriana, pímerecahi eta yátupirahi mavanaravi ema Jesucristo. Eta juca táurinaquenehi échájirirucava, étarichuhi eta vímiturapianahi eta piyehe, éta tétumechaviyare eta pímiyaniravahi pisuapa eta juca véhiruhi. ⁷ Váhiserapicusuapavaca ena nani tíchanahi eta juca échájirirucavana tamauriqueneana. Súnsurupianachucha éta. Pímiyanavasera picaravahu eta piúritaresiráina mayehe ema Viya. ⁸ Tacuti eta náimicaravahuchirava ena ticavijarahiana eta pelota, navaraha náetumecha eta náqueheana. Tacamunuhisera nápepejiricava te sácheana. Píti, vahi tacuechuquiha eta picaravahirahi. Te yátupihí vicaravahu viúritaresiraya mayehe ema Viya, tétavicavaya eta viúrivaya eta visamiravaya puiti juca vicahehi, énerichuvare véchapajiricavainapa eta vicaijuheraya eta mávasa ema Viya, vicachaneraya éma. Eta tacahe, vétumechavachucha apaesa viúritaresira eta mayehe. Vímiyanavachucha vímitucavaca ena achaneana apaesa náurítatesira éna apanava mayehe ema Viya. Taicha yátupiquene eta échájirirucava ani tacahe:

Ema vicasiñaquenehi, éma yátupiquenehi Viya.

Éma, téchahavi vimutu viti achaneana.

Vivetiji viti véhicanaripa éma,

tétavicavahi eta macatiuchirahavipahi.

¹¹ Ena pímitureanaya, pituparacavacaicha muraca eta júcana. ¹² Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúri va apaesa étaina náehicavi ena vichamuriana. Tauri eta péchajisiráina. Tauri eta pítaresiraina, tájina pitapiravaimahi. Pémunarahi nayehe ena vichamuriana, énapa ena apamuriana achaneana. Yátupina eta péhisirahi, étapa eta picasiñavairahi mayehe ema Viáquenu. ¹³ Te vuíchahapuca nucuítecapa, pímiyanava eta pímitusirayare ena vichamuriana. Pímiyanavavare eta pétumechiravacaina. Péchajicuinayare eta Sagrada Escritura apaesanasama namutu. ¹⁴ Pémechavayare eta nametara-

pianahi ena víyarahana mametaruanahi ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepu-rureca eta péchemaraivahi maicha ema Viya.

¹⁵ Pipanerecha yátupina eta juca pimetacasilanahi. Pímereca eta táurivahi eta péhisirahi, apaesa náimaha namutu eta piúriváinapaicha. ¹⁶ Péchapavaicha yátupina eta pímituresirahi eta juca véhiruhi. Pítijiva pipamicava pítauchayare tamutu. Te pítaucha eta juca, picuchucuhavayare píti, énapa ena pímitureanahi.

Vímerecayare eta viúrivayare nayehe ena vichamuriana

5 Te natiarihinapuca náejecapava ena víyarahana ichavicapananahi piyehe, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare ena amaperuquijiana ajairana, tauri eta piconsejachiravacáina tácuti eta péchajisira ena pichuquiqueneana. ² Énerichuvare ena vénarahana ichavicapananahi piyehe, te náejecapavapuca, piconsejachavaca tauri tácuti eta péchajisira esu ticachichavi. Énapa ena amaperuana esenana, piconsejachavaca tauri tácuti eta péchajisira ena pichuquiqueneana. Tátupiruva eta péchajirisiravacaina éna.

³ Pímicatacavacaya ena tépenaimanahi, nácani tájinahi naviyavahini, yátupihi eta nacamunuiravana.

⁴ Téheserapuca natiarihihi ena suchichanaveana esu tépenaimahi, suámarianapuca, énapa títátianayarehi. Ticaravahuanainapa eta náitátijirísiravaya. Títsirijicavánainapa eta nacajurusiravacahi ena náenana, nátseanapuca. Eta juca, máurica ema Viya. Taicha tatuparacahi ena echichanaveana eta náitsirijisiraváina eta nacajurusira ena ticachichana. ⁵ Pímicatacayaresera súcani tépenaimahi sucarichuhipuca, nájina suchichainahi, nájinavare suviyavahi. Sucuchapainapa eta tásihaqueneya mayehe ema Viya, taicha suíjararuvaiya yátupi eta mayehe. Tiyujaracainapa tamutu sácheana, tamutu yátiana. ⁶ Ésusera súcani suícutichiravahi suicha eta suvarahaqueneanahi, ésu tímicutijiricavaipa suáquijiruvahi eta mayehe ema Viya. ⁷ Pímitucavacayare ena tépenaimanahi, apaesa táuri eta nacaemataneasiraina ema Viya, tacuija natapiravaina. ⁸ Taicha ena vichamuriana, tatuparacavacahi náeñamavayarehi tayehe eta náitátira ena náenana, ena nátseana. Nácani vahi nacuquicha eta juca, tímicutijiricavaipa vahi náitauchahini eta náehisirahi ema Viya. Tíápajucavapanapa éma eta nayehe ena masuápajirairahánahi.

⁹ Nacarichu pinacayare te nalista ena tépenaimana ena ticayehearipa sesenta año eta nahañora. Súcani émanarichuhi ema suímaini eta suítaresirahi. ¹⁰ Ésupa súcani tímaticarehi eta táurivanahi eta suématanerepiana. Súcani tíurihi eta sucajurusirahi ena suchichanaveana. Súcani tijacaparahi te supena nayehe nácani tichimarachanapahi. Súcani tiuri eta suéchapajirísira ena vichamuriana. Súcani téchapajirahi nayehe nácani

ticatajivanahi ticajumanahi, ticatiruhanahi. Súcani tamutuhi suítaparaha suicha eta táuriqueneana.

¹¹ Énaserá ena tépenaimanahi amaperuanarichaha, vahi picunaca te lista. Tijuricati tíaquipaicavana taicha tavayuacavacarichaha eta tájiparacana, natanuarichaha ema ajaira, navarahaichaha tíapechavanyarehi ticaimana. Tijuricati ticainajiruana eta náehisirahi ema Cristo. ¹² Tacamitisicavacapáipa, énapa tímijnacanapahi eta náehisirahi ema Cristo. ¹³ Énerichuvare ticauyayacarehi nayehe ena amaperuanarichaha, te pinaca eta te nalista, tijuricati tépiyacavanapa plújuana. Náematanepe tipaipiricana te pétiana, námapaipa eta cuéntoana. Tímisiáparacavánapáipa. Nacaemataneca náechajisihapáipa jácani náimahaqueneanapahi te pétiana. Vahi tácatuparaha náichahíni eta juca. ¹⁴ Eta tacahe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuija nacucayema ena ticunerahiana. ¹⁵ Taicha nararihi ena tépenaimanahi tínajicavanapaipa eta náehisirahi ema Jesús, náehicapa ema Satanás.

¹⁶ Te sutiarihhipuca tépenaimahi esu vichamurihi, te natiarihivarepuca ena sujaneanahi vichamuriana-hivare, ena títátianayarehi ena sujaneanarichu; apaesa vahi sucuapitavairicahi nayehe ena máimaruanahi ítátijiríruanahi, táichavenehisera jácani tamajinairahi naviyahini éna.

Tatuparacavacahi ena vichamuriana náimicatayare ena pastoreana eta náitátiravahi

¹⁷ Ena pastoreana, te tíurihipuca eta náechapajirisiravaca ena vichamuriana, ichapeyare eta náemunacarevayarehi. Tatuparacavacahi ena vichamuriana náimicatayare tayehe eta nanicaquenerepi ena pastoreana, taicha éna, eta náematanerepihi tímiturecanahi ticametarairuanahi. ¹⁸ Taicha ani tacahehi eta Sagrada Escritura: “Vahi picuitisumucha eta pivuiyera te ticaematanepehi taicha técuhapahi”. Ánivare tacahe: “Ema achane ticaematanehi, tatuparacahi ticavachayarehi mayehe ema macaematanearuhi”.

¹⁹ Vahi picusuapavane te tatiarihinapuca eta máepiyaequenena mácani náiyacarahi ena vichamuriana. Téhesera natiarihinapuca ena apinana, mapanapuca tinecapaequenehanahi eta máejecapiravahi, jéhesare tisuapacare éta. ²⁰ Téhesera yátupiquenehipuca eta máejecapiravahi, picajachayare muraca te namirahu ena machamurianahi náiyacarana, apaesa nátsiriha napica ena apamuriana, vaipa nacuquicha eta juca. ²¹ Nutuparacavicha muraca, pítauchayare yátupina eta juca numetarapianahi piyehe. Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi eta máichavaquenevahi mácani téjecapavahi, taicha máimararacahi ema Tata Vicaiyaquene, émapa ema Viáquenu Jesucristo, énapa ena mayeheana ángeleana manerejiruanahi.

²² Te matiarihinapuca mácani navaraha nacasiapa pastor, picasamairunumaya te tíurihipuca éma. Vahi picujahúcha picunacavane éma. Tijuricati tatiarihi-

napahi eta máejecapiravahi. Machu pítina tamuriaca taicha eta pímiapiaraina éma. Pijaneacavaicha tayehe eta juca. ²³ (Puiti néchavahi eta picajumamajipa eta pítaresirahi te piami. Tásiha, nuconsejachavi: Pímisi-riquicha apaesainarichu eta vino eta péresarama une, pípurujinahi.) ²⁴ Tacamunuhisera eta picasamairunumaya nácani tisiapanayare eta pastorecare, taicha nararihi ena máchasihi eta napecaturana. Vahi táimaticarevane, tapaenumavaya picasamairunuma éna. Nararihisera ena ticaecheravane eta napecaturana. Tímaticareanavane. ²⁵ Ene tacahehi, nararihi ena tímaticareanavanehi eta náichirahi eta táuriqueneanahi. Nararihivare ena tacamunuhi eta picasamairunuma, apaesa ticaecheravanehi eta táuriqueneana náichaqueneanahi.

6 Ena vichamuriana músuanahipuca, tatuparacavacahi napicauchayare ichape ena náquenuanahi. Vahi tijicapairihianaimahi apaesa vahi nacuyunaca ena achaneana eta máijare ema Viya, váhivare nacucaehi eta vímiturapiana. ² Étaripa te nacaquenuhipuca mácani vichamurihi, tiápajucavayare eta napicauchirayare. Vahi tímipanavanáimahi eta nachamurirahi éma. Náimerecayare yátupi eta táurivaya eta náemataneana, taicha ema nacaematanyeruhi, nachamurihi máemunaruvare ema Viya.

Ticurisamurechahavihi eta véhisira ema Jesús

Piti nuchicha Timoteo, pímitucayare tamutu eta juca nayehe ena vichamuriana. Pémechavacayare eta vímiturapiana. ³ Natiarihinapuca ena nácani navaraha tímiturecana eta apana doctrina. Nahapapicainapa eta vímiturapiana, tájinasera vahi tavehapicaimahi eta juca yátupiqueneanahi tásihaqueneanahi mayehe ema Viáquenu Jesucristo. ⁴ Ena nani, ticasíñavaváicanahi, tájinahineni náitucaquenénahíni. Ena nani, náurica téchajicana. Navayurevanapahi nácapaemachapahi tayehe eta tacayemaqueneana eta véchajiriruvana te vímiturecahi. Ticapinarurahiana éna, tiúmeharahiana, tíchanarahiana, tipícarácavanapa. ⁵ Tamutu sácheana ticatianarerecana taicha máuripanererrahána ena, máimatirahanahi eta yátupiqueneana. Navaraha nacavacharapiyare eta nayehe religión. Píti vahi picupauchavaca ena nani.

⁶ Jéhesareva, tétavicava eta viúricacareva máicha ema Viya, eta véhisirahi éma. Tavetiji te vicurisamurechava tayehe eta vicayehequeneanahi máijararuhavianahi éma. ⁷ Taicha te viúchucapa suyehe esu ticachahavi, tájina viámapahini vímahaquenenahíni. Ene tacaheyare eta vítavirayare, tájinavare viámaimahi eta vímahaqueneanahi. ⁸ Eta tacahe, te tatiarihipuca eta vinícaquenéna te vipenana, vicamuirihahipuca, tarataripa visuapayarehi. ⁹ Énasera nácani tipanerechanahi tirricuchavana, apanapanepa eta najamurachaqueneana. Tacananesiricapa eta naplatanechiavaya. Énajivapa tímicuñacavana taicha eta najamuraraivana súnsurupianahi. Eta juca ticauyayacarehi étaina támicuñaca eta náchanevana. ¹⁰ Táitsivahisera ena achaneana, náetaviuchahi eta tavayuasirahi

náichapa tamutu eta tájiparacana, táichavenehi eta najamurachira eta plata. Namapurujipaipa ena vichamurianaini. Natiarihinapaipa timutserahavapapaipa eta tayurusiraina eta najamuraraivana. Tásapihapapuca táiminajícaphi eta náehisirainihi ema Jesús. Énajivapa titanucavanahi eta naviurevahi, timutserahavanapaipa eta nacatajivairanahi eta náitaresiranahi.

Yátupina eta véhisiraina ema Jesucristo

¹¹ Pítisera vahi picupanerecha eta juca mamavarahaqueneana ema Viya. Pérajicava tayehe, taicha mavanaraviripa éma. Tátupiruvahi eta pisamure mayehe éma. Táimiyana ena juca táurivahi eta pítaresira. Tauri eta péhisiraina. Pémunaca yátupina. Picamichayare tamutu. Yátupina eta pimansuvaina te pisamure. ¹² Péturechavachucha eta picaemataneasirahi ema Viáquenu. Muracaina eta picasiñavaira mayehe. Vahi picuyacujiequenehava eta picuchapirahi eta pítaresiraya máichecuaraquireyare, taicha máichuhaquenevichihuhi ema Viya. Vahi picuemepurureca eta péchajiriruvanahi te namuri ena vichamuriana, te píjaracavainapa eta péhisirayare ema Viya.

¹³ Puiti, tímararacavihi ema Viya eta nutuparasiraviya. Éma, ticaitarecahi tamutu eta vímahaqueneanahi eta te juca apaquehe. Tímararacavivare ema Viáquenu Jesucristo. Pécharichuhivare eta matupiruvairahi eta máimereuchiravahi éma te mamirahu ema Poncio Pilato. ¹⁴ Pítauchayare píti tamutu eta juca nuvanairipianahi taicha tásihaqueneanahi me Viáquenu. Vahi pihapapicaimahi, apaesa tacuija táimicajachavi mayehe. Tauri eta machimapiravina ema Viáquenu Jesucristo te máitecapa te táitauchavapa te jena sácheyare máicutiarahi ema Tata Vicaiaquene. ¹⁵ Ichapenapa vicunachainapa ema Tata Vicaiaquene taicha macarichuhi éma yátupiquenehi tamutu marataha. Émahi Réyquenehi, Viáquenuquenehi. Tivanecahi namutu ena réyeana énapa ena aquenucana. ¹⁶ Macarichu éma, yátupiquenehi máepencaca. Máetaviuchahi eta maváyuháquiráivahi. Nájina tiratahaina ticachacayaina eta majaraiva tayehe eta mávihahi. Éma, nájina tímahaina, taicha máimahaquenehi éma. Éma, vipicauchaquenehi vivapinaquenehi ichape. Máitavacacainapa eta vicunachirayare éma. Jéhevare éma, tamutu marataha. Amén.

¹⁷ Énerichuvare ena vichamurianahi ticaimahaqueneanahi rícuana, pímitucavacayare eta vahi nacucajamurava. Váhivare nacucasiñava eta nacaimahaqueneháhi, taicha tijuricati títava eta náimahaqueneanahi, témitiequenehapa tamutu. Nácasíñavasera mayehe ema Viya, jéhevarequene ema ticasíñacare. Éma tíjaracahavihi tamutu eta vicamunuqueneana, viúrisamurecahi máicha. ¹⁸ Tacahe, ena vichamuriana rícuana, pímitucavacaichavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunuvanapahi. Tátupiruva te nasamure eta náijarasiraina ena ticamunuvanahi. ¹⁹ Te yátupina náitaucha eta juca, tatiarihi eta sáche-

yare najacampiraya eta apanayare náimahaquenea-nayare te anuma. Éna, ticaíjaranainapa eta nápechiravaya títarecana, taicha éna yátupihí eta náimicataráivahi eta náitaresirahi te apaquehe. Máichecuaraquirénapa eta náuricacarevaya.

Eta téqueneha matuparaha ema Timoteo

²⁰ Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahi picujicapavaca ena nácani

téchajisihana eta tájiparacana, técativánachucha. Váhivare picujicapa ena nácani navaraha ticanaraemachaviana. Ena nani tímijachavanahi náimatihíji eta táuriqueneana, tásihasera ichape nayerehi eta náehisrainahíni ema Viya. ²¹ Nararihipaipa ena vichamurianaini tínajicavanapa eta náehisirahi ema Jesús, taicha nasuapahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahini eta piúricacarevaya máicha. Tamutupa eta néchajiriruvahi piyehe.

2 Timoteo

1 Nuti Pablo mayehenu apóstole ema Jesucristo. Ema Viya tivanecanuhi eta nucametarairuirayare eta máechajiriruva, taicha macaechajiriruvahi eta máijarasirahaviya víti eta vítaresiraya táichavenehi eta mávahásirahavihi ema Machicha Jesucristo. Máichecuarquirénapa eta vítaresira máicha. ² Puiti nápechavavare nucajurevi eta juca apana nucartane piyehe piti nuchicha Timoteo némunaruquene. Nuvaraha macatajicavini majapanuvini ema Tata Vi-caiyaquene, émapa ema Viáquenu Jesucristo. Náijaracavini eta táurivaina eta pipanereruana.

Ema Pablo máetumechahi ema Timoteo

³ Núti nécharairicavihi te sácheana yátiana te nuyujarasirana, nuyaseuchavihi me Viya. Nuhasulupayachahi éma eta piúrivahi máicha. Éma nucasiñahi núti, tacutihi eta nacasiñairahi ena viáchucanaveanaini. Tájina níchiravainahi eta nusamiravahi te mamirahu. ⁴ Tétavacavihi eta nuvarairahi nápechavahini nímahavi. Vahi némitisicavahini eta píyairahi te nujunijicavinapa. Nuvarahahi píjahúchavahini pítecapauchanuhíni, núrismurepáini eta nímairavinahíni. ⁵ Taicha némechavahi yátupihí eta pímiyaniravahi pisuapa ema Viáquenu. Picápayayarácavacáinehi eta susuapirahi yátupi esu piátse Loida ésupa esu pena Eunice. Ichaperinehi pémechanuhi eta nayehe éna. Eta tacahe puiti, vahi néñamavahini eta piyehe.

⁶ Puiti nutuparacavicha muraca vahi picucaemaha eta péchemaraivahi maicha ema Viya. Pímiyanavachucha. Vahi tacumapurují eta nunasirahi eta nuvahuana te piápusi. ⁷ Taicha ema Viya vahi mavaraha vipícarácavahini. Éma tíjaracahavihi eta vitumesamurevana eta vicutuparahairahi. Éma tímitucahavihi eta vémunaravaya. Tíjaracahavivare eta vicaratasiravayare yátupi eta vítaresira. ⁸ Eta tacahe, vahi picutsiraha eta picametarairuiraya eta máechajiriruvana ema Viáquenu. Váhivare picutsiraha eta táemeratasiránuhi eta nucametarairuiranahi núti apana. Yátupina picamicha eta picatajivairaya. Taicha ema Viya, éma tíjaracaviya eta pitumevaya eta pímiyaniravaya picametarairu. ⁹ Ema Viya tiámavahi eta máemunasirahavihi acane te tépanavainapa tamutu. Tijapanuhavihi máichavenehi ema Machicha Jesucristo. Eta tacahehi te mapanerechainapa eta máichuirahaviyare vimutu viti véhicanayare ema Machicha, mavarairahi ticuchucuhaviyare, váhinéni viámavahini viúrihíni eta vítaresirahi. Puítisera ema Viya mavaraha mapecaturarehaviya te mamirahu. ¹⁰ Puíticha, eta majapanuira-

havihi ema Viya, máevatasinahavihi ema Machicha Jesucristo ticatiuchahaviyarehi. Éma, máechepurehi te máecari. Puiti manaquicahi eta máechajiriruvahi eta macaitaresirahaviya víti apana. Te jena sácheyare máitsivachainapa eta viáquehe, máepenacacahávinapa. ¹¹ Ema Viya tituparacanuhi nucametarairuyare eta juca. Éma tinacanuhi apóstolenuhi, nímitucayarehi ena apavasanana. ¹² Eta tímicaviuchanuhi eta juca, puíticha nucatajivahi ichape, taicha eta nítauchirahi eta nutuparacasivahi. Váhiserá nutsiraha eta néhisirahi, taicha nímatihí núti eta yátupirahi eta macasiñacarévhí ema nucasiñaquenehi. Néchahivare eta majacapirahi tamutu eta nématanerepiana. Nucunevainapa eta jena sácheyare eta máijarasiranuyare eta nícutihíni mayehe.

¹³ Píti apana, eta péhicayare eta juca yátupiqueneana nímiturapianahi piyehe, tájina vahi pihapapicaimahi. Yátupina pisuapa, yátupina eta pémunaraivaina taicha tiávahácaviripa ema Jesucristo. ¹⁴ Piúnacaicha yátupina eta juca máechajiriruvana ema Viáquenu. Te natiarihipuca návaraha nahapapica eta vímiturapiana, vahi picuisapava. Máimahavinesera ema Espíritu Santo, ema tiávahácavahihi. Éma tímicatacaviyare.

¹⁵ Títecapa, pécharichuhi píti eta namáimicatásiránuhi ena náiyarahanahi ena vichamuriana ticavasanahi te Asia. Émavanénahíni máítecahíni ema Figelo, émainahipucaini ema Hermógenes. ¹⁶ Macarichu títecapauchanuhi ema Onesíforo. Te títecapapa éma te Roma, matupiruhi titanucanu, tétupiacanupa te juca cárcel nucaerataiyahi. Éma, tájina mapicaimahi ena ticatianacanuana. Ticajinuhi eta nucamunuqueanahi. Pímaharichuhi píti apana eta máimicatasirahavihi te viávihaichaha te Efeso. Eta tacahe, nuyaseacahi ema Viya macatajicahini máimicatacahíni éma, énapa ena machichanaveana. Majapanuhini te jena sácheyare vítecapauchiraya ema Viya.

Yátupina eta véhisiraya ema Jesucristo

2 Pítisera némunaruquene nuchicha Timoteo, nuvaraha yátupina máetumechavini ema Viáquenu Jesucristo. ² Píti pímatirichuhi tamutu eta nímiturapiana, taicha pisamahi eta nímitusiravacahi ena vichamuriana te avasareana. Puiti pitanucaya ena apamuriana vichamuriana nácani pímitureana títauriahani. Pituparacaya éna tauri eta námitusiraina ena apamuriana vichamurianayareva, tácutirichu eta nímitusiravihi núti.

³ Nutuparacavi: Picamichayare piti tamutu eta picatajivairana. Yátupina eta masuntaruravina ema Jesucristo. ⁴ Picutiyare eta máuriva ema suntaru, tacarichu máechapajiricahi eta mavanairipiana ema mayehe comandante. Vahi máemitisicaimahi eta mavanahiana, tahapapicahipucáini jácani tájiparacana. Ene picaheyare piti eta pítauchirayare eta mavanairipiana ema Viáquenu. ⁵ Eta juca tacutihi ena ticavijarurahiana eta pelota. Te vahi náitauchahi tamutu eta tavanairipianahi, vahi tivéarecanáimahi. ⁶ Píti pipamicavaya muraca eta pítauchiraya eta pituparahana. Picutiya eta mapamisirava mácani isanitireru eta macaematanera te máesane, mavarairahi tiúchucuhayare eta máematane. ⁷ Pipanerecha yátupina eta juca numetaruvianahi. Németeaca tímicitacaviyare ema Viáquenu eta picaicutiarairayare tamutu.

⁸ Vahi picuemitisica eta juca nímiturapianahi mayehe ema Jesús, eta émairahi yátupiquene Cristo, mámaríequenenihi ema rey David. Éma, máepenaquenenihi. Macaechepuchaisera ema Viya. ⁹ Eta tímicaviuchanuhi eta juca, puíticha nucatajivahi ichape taicha eta nucametarairuirahi. Étara témeratacanuhi puiti, ticutirinehi nucaviurevahini. Váhisera vicainajiruvaimahi eta vicametarairuiraya eta máechajiriruva ema Viya, cápachi etiarhipa éti. Étinapa nítisivaheyare. ¹⁰ Nucamichaisera tamutu eta náichiranuhi, nuvarairahi nasuapahini nácani máichuhaqueneánayarepahi ema Viáquenu Jesucristo, apaesa náuchucuhahini éna apanava, náitujicavahíni nasiapa tayehe eta táuricacarequene mávasa. Máichecuaraquirequene eta vicachaneraya éma. ¹¹ Jéhesare, yátupiquenehi eta juca véhiruhi vimutu:

Te vépenaca mayehéhavihi ema Viaquenu, éma ticaitarecahaviyare vicachanenapa éma tayehe eta mávasa.

Te vicamicha eta vicatajivairanahi máichavenénahi éma, vítujicavayare vicajupahayare éma eta macavacureraya.

Téhesera vicaerajicavahi eta véhisirahi éma, éma apanavare ticaerajicahaviyareva te mamirahu.

Te vínajicavahipuca eta véhisirahi éma, émasera vahi máinajicahavihíni.

Manasirichucha ticuchapahavihi te viápechavayarepuca vichavayare mayehe.

Taicha éma, vahi apánapanéna eta mapanereruana.

¹⁴ Nutuparacavi: Pémechavaca ena pímitureana tamutu eta júcana. Pécatiacaicha muraca te máijare ema Viáquenu. Vahi nacuevataemajiricáca te jácani náechajirisiravána. Taicha tájina tájjaracaimahi, machu étaina tahapapica eta napanereruana ena vichamuriana eta nasámararásirainahi.

Yátupiyare eta náurivaya ena mavanarana ema Viya

¹⁵ Píti, yátupina tauri picha eta picaematanerahi ema Viya, picurisamurechirayare éma. Tájinasarépa piávamirahuimahi taicha tamutuhi tiuri eta pímataneana. Tatupiruvayarehi eta pímituresirahi eta yátupiqueneanahi máechajiriruva ema Viya. ¹⁶ Téhe-

sera natiarihinapuca ena téchajisihanahi eta tájiparacana técativacana, vahi picujicapajiricavaca éna. Pérajicava nayehe, taicha ena nani navetijiyarepáichucha eta náichira eta tamauriqueneana. ¹⁷ Tíñehiqueneanahi eta náechajirisiravana taicha eta tavayuarasiravahi, ticauyayacarehi nahapapica ena vichamuriana. Ene tacahehi eta náejecapiravanahi ema Hime-neo, émapa ema Fileto. ¹⁸ Péchapavayare nayehe ena nani apinana, taicha nacaerajiruvaiyare tayehe eta yátupiqueneana vímiturapiana. Taicha ena nani tépiyaequenehanahi eta táetavisiravarípahiji eta náechepusiraiyahiji ena náepenaqueneana. Jéhesare, natiarhipahi ena náemejecapavaruanapáipahi.

¹⁹ Vitiarichahasera viti vímianavahi véhicahi ema Viya. Taicha muraca eta vicasifñavairahi eta majaneasirahavihi, taicha éma tímatihavihi eta machanerairahavihi. Yátupivare visuapa eta juca máechajiriruva, ani macahe: “Náinajicayarehi eta tamauriqueneana namutu ena tiámanahi eta máijare ema Nuchicha Jesucristo” macahepa.

²⁰ Eta tacahe, víti, ichape eta vijaneasiravayare tayehe eta tamauriqueneana. Yátupiyarehi eta vicamunucarevaina mayehe ema Viya, vítauchirayarehi eta vicaemataneeasira éma. Jéhesare, ichapenapa eta vimunavayarehi mayehe. Véperajicavayarehiséra mayehe tacutiya eta náeperajisira ena rícoana eta nayereruvana táuriqueneanahi nayeheana jarra oro, nacurujana plata. Vahi náimipananajicáimahi. Vahi náimicutichaimahi eta apamuriana nayereruvana yucquisiana: eta raveta, eta yuvaraqui, etapa eta nacasuelana mátejisiana.

²² Eta tacahe, vahi picuehica eta natuhusivana ena amaperuquijiana. Tamutuhi najamuracha éna, nacaravahuhi jácani tamauriqueneanahi. Pítisera pímiyanava eta táurivahi eta pítaesirahi. Táuri eta picasifñairahi ema Viáquenu. Yátupinavare eta pémunaravaina. Pétipiricayareva eta náichavaqueneva ena achaneana. Énaina pitanuca pácachanevaca nácani pichamurinarichu tiúripanereruana, taicha éna nacasamurehi ema Viáquenu tamutu sácheana.

²³ Énerichuvare vahi picujicapajiricavaca nácani navarahahi tiyaserecaviana eta súnsurupiana. Taicha pímatipahi ena nani eta nacahirana, étachucha natanuca eta semanereana. ²⁴ Viti mavanarana ema Viáquenu, vahi viúriha vímisiaparacavahíni tayehe eta semanereana. Táitsivasera vétaviuchayarehi eta viúri-va eta nayehe namutu. Vicayeheyareva paciencia eta nayehe namutu ena achaneana. Vímiturahiareva eta táuriqueneana. ²⁵ Énaripa ena víánaranahi, tiúriyare eta véchajirisirayare. Vicuchapayare eta táetupirisiravaina eta napanereruana, májjaracahini ema Viya nasuapiraina eta máechajiriruvana, ²⁶ apaesa nacuchucuhavahini eta náchanevana eta tacaeratairahi maicha ema Váinaraji. Taicha eta máiturusiravacahi éma, mavarahahi náitauchaya eta mavarahaqueneanahi éma.

Ena achaneana tévínarajichavanáinapáipa

3 Eta apana eta juca nuvaraha péchayare. Puiti juca vicaijuheyare tavetijnapaipa eta taejeravayare nasamira ena achaneana eta náehisiraina ema Jesús. ²Taicha tivayuchavainapa eta náichirayare eta najamuraraivana. Tavayuacainapa eta plata. Ticasíñavainapa, navayuchayare eta náechajirisiravana. Tipanarahiana. Énerichuvare, masuápajiráiraháinapa nayehe ena ticachichana. Tájínainapa eta náitsirijirápinaya. Váipavare napicauchaimahi ema Viya, nasapihayarechucha nacaecahiyare éma. ³Nájinapa náemunaruimahi. Nájinavarepa najapanuquenémahi. Téchajihianainapa. Vaipa téchajicacarea-náimahi. Titupiarahianainapa. Nacatichainapa eta táuriqueneana. ⁴Cáetemarahlana. Mapicaurirahainapa. Ticasíñavaváicanainapa. Náuricainapa náicha eta piesta, tasapihainapa napauchayare, vaipa émaimahi napauchaimahi ema Viya. ⁵Nararihipuca ena tímijachavanainapa yátupinahini nácaijuhe ema Viya. Váhisera náunacaimahi eta máechajiriruvana, váhivare tísapavanaimahi máemetupirucha ema Espíritu Santo eta napanereruana.

Puítiripa nararihipa ena achaneana, étapa návacuha eta juca. Pérajicava eta nayehe ena nani. Vahi picuimi-siapava nayehe. ⁶Taicha nararihi ena achaneana tiyurarahiana tépiyacavanapaipa tipaipicana te pé-tiana, nayurucavacapaipa nácani esenana máecharaireana. Ena nani esenana tisipecaturanahi, tavayuaruanahi eta tájiparacana. ⁷Nametaínipa ticaravahuanahi, tájinasera vahi nacaicutiaraimahi eta yátupiqueneana. ⁸Puíticha ena nani tiyurarahianahi, éna ticaeahiana eta vímiturapiana yátupiqueneana taicha máuripanerérurahiána éna. Tacutihi acane ena iápemareana ema Janes émapa ema Jambres tiácapaemachanahi ema víyahaini Moiséini. Tímaticareanahisera eta namaimatirahi eta yátupiqueneana. ⁹Váhisera camurianaimahi ena náiturevanaya, taicha ena achaneana náimatiacavaneyarehi eta náepiyahiraivana súnsurupianahi éta, tacutiyaehi eta náimatiasiravacahi acane ena achaneana ena nani apina iápemareana tiácapaemachanainihi ema Moiséini.

Eta téqueneha matuparacasivahi ema Timoteo mayehe ema Pablo

¹⁰Pítisera péhicahi yátupi eta nímiturapiana. Picutin- uhi eta núrivahi nayehe namutu achaneana, étaripa eta nupamisiravahi eta néhisirahi ema Jesús, nucasiñavahi yátupi mayehe. Picutinuhivare eta nucayeherahi paciencia, étaripa eta némunaraivahi, étaripa eta nucamichirahi tamutu. ¹¹Péchahivare eta náichiranuhi ena achaneana, eta nucatajivairahi náicha. Ichapemurihi eta napanajirisiranuhi eta te avasareana Antioquía Ichipichu, te Iconio, étapa te Listra. Émasera ema Viya ticatiuchanuhi tayehe eta juca náichiranuanahi. ¹²Énesera tacaheyarehi eta juca. Tímiyanavayare tipanajiricahavianayarehi vimutu víti vivara-

hana véhica yátupi ema Jesucristo. ¹³Énerichuvare, ena achaneana váinarajiqueneana tiápajucavainapa eta navainarajivanaya. Énerichuvare ena ticaetemarahlana, tiápajucavainapa eta nacaetemaravaya. Énajicacainapa ticaetemacacanayare.

¹⁴Pítisera pímiyanavahi eta péhisirahi eta juca pímitucasivanahi. Yátupihi pímercahi eta pisuapirahi. Píti pímatihavirichuhi viti vímitucavianahi, nútiripa. ¹⁵Píamavahi te amuyavichaha pímatihí eta Sagrada Escritura. Éta, tímitucavihi tayehe eta víuchucuiraya te apana vítaresira, táichavenehi eta visuapirahi yátupi ema Jesucristo. ¹⁶Taicha tamutu eta Sagrada Escritura tásihaqueneanahi mayehe ema Viya. Jéhevarequene eta viviyihayare eta ticaravahucareana, eta vímitusihaya véchajisihayare ena achaneana eta víconsejachihayareva, vímitupiruchihavacaya tayehe eta táurivayare eta náitaresirana. ¹⁷Tacahe, ena vichamuriana mávaháruana ema Viya téchemarahianayarehi, yátupi náitucayarehi tamutu eta náichiraya eta táuriqueneana.

4 Puiti nutuparacaviyare muraca te máijare ema Viya, émapa ema Viáquenu Jesucristo. Taicha éma, títecavaneyare eta macavacureiraya te juca apaquehe. Viti vítareruanaichaha énapa ena náepenequeneanaripa vicayaserehinapa te mamirahu tájahahipuca eta vicaemataneasiranahi éma. ²Eta tac-ahe, pímiyanavachucha picametarairu eta máechajiriruva ema Viya te jácani pítujsiravana. Vahi picúyacu- jíéquenehava. Pécatiacavacaicha muraca ena téjecapavanihi eta náeneuchirávaina. Piconsejachavaca. Pétumechavaca ena tíuripanereruanahi. Pácayehesera paciencia eta pímitusiravacaya namutu. ³Taicha tatiarihiyare eta sácheyare ena achaneana vaipa nasuapaimahi eta vímiturapiana táuriqueneana, étainapa náichayare eta navarahaqueneanarichu. Natanucainapa ena nácani tímitucanayare tayehe eta tájiparacana, nacarichuinapa tisamacareanayare nayehe. ⁴Tasapihainapa náepuruyare eta yátupiqueneana, nacaepaquecuinapa. Étasera eta náepiyapiruvana ena achaneana, tasapihayare eta tisuapacareyarehi nayehe.

⁵Pítisera pinasiyareichu tájina píchiravaimahi. Picamichayare tamutu eta picatajivairana. Pímiyanavachucha picametarairu eta máechajiriruva ema Viya. Pítauchayare eta pituparacasivahi.

⁶Puítisera, núti tiánehipa eta nítaviraya te apaquehe. Nucutiripa eta yúcupi te títavayarepa témahayarepa, éneripa nucahehi núti. ⁷Váhiquene néñamavacare. Nítavavarerupa eta nuncanarairahi eta tamauriqueneana. Vahi nuvitaequenehahini. Nítauchahi eta nutuparacasivahi mayehe ema Viáquenu. Núnacahi muraca eta nusupirahi ema Jesús. ⁸Puiti núti étanecha nucuchapahi eta jena sácheyare eta máijarasiranuyare eta níjaracasiya me Viáquenu, taicha eta néhisirahi yátupi. Taicha éma, máítauchayarehi eta máijarasiránuyare eta nícuchihi mayehe. Váhivareséra nácarichuimahi núti nucaijaracasiyare. Énerichuva

máijaracayareva namutu nácani ticuchapanahi eta machaviraya.

Éma Pablo máimichuha éma Timoteo

⁹ Pítátijirícavaicha eta pítésirávaneyare ani nuyehe. ¹⁰ Puiti tijunijicanuripa éma Demos, taicha tétavicavahi majamurachirahi eta mavaraha ticaimahaqueneyare te juca apaquehe. Tiyanapa macaijuhehi tayehe eta Tesalónica. Émasera éma Crescente, névatacahi te departamento Galacia. Énerichuvare éma Tito, névatacavare te departamento Dalmacia. ¹¹ Macarinehi nuchanehi éma Lucas. Pivenumapahi éma Marcos, máiteca éma apanavare. Tétavicavahi eta nucamunuirahi éma. ¹² Éma Tíquico, nuvanecahi máiteca ara piyehe te avasare Efeso. Émainachaha pítvivaina. ¹³ Te píteca, pétavajicayarepahi te Troas, pivenuminanuya eta nuyehe capa nunaquiruhi mayehe éma Carpo, éta-pa eta nuyeheana libro, éta-pa eta apamuri ajumercana.

¹⁴ Numetacavivare eta máejecapiravahi éma Alejandro eta nuyehe; tétavicavahi eta macatichiranuhi éma maca herrero. Máimahainesera éma Viáquenu. Éma títsirijiequenehayare eta máichiranuhi. ¹⁵ Éta tacahe, picuneuchavaicha eta mayehe, taicha tétavicavahi eta macatichirahi eta vicametarairuirahi.

¹⁶ Étaripa, te tínapucainapa nucatiuchavahi te mami-rahua éna tuparairucana juéseana, nájina námicataca-

nuhini. Namutuhi tijunijicanuanahi. Tiuri, tacuijaseraini macuícharacáini éma Viya, maperdonachavacaini éna tijunijicanuanahi. ¹⁷ Émasera éma Viáquenu tijaneacanuhi, tímicatacanuhi. Vahi máisapanuhini nanacanuhi te tapena eta sárareana tinicarahiana. Nítujicavahi núchuca nuyana tayehe eta apanaqueneana avasareana, nucametarairuhi nayehe éna apavasaqueneana. ¹⁸ Éne tacaheyare eta máimiyaniravayare ticatiuchanu éma Viáquenu tayehe eta táíñehiqueneana. Tiámanuyarehi tayehe eta mávasa anuma. Máíhecuaruireyarehi eta vijirauchiraya éma. Amén.

Éta táíhecuaruqui eta máéchajiriruva éma Pablo

¹⁹ Péchajisinanuvaca éma Aquila ésupa esu mayena Priscila, énapa éna machichanaveana éma Onesíforo.

²⁰ Émasera éma Erasto, nunaquicahi te Corinto. Émapa éma Trófimo nunaquicahivare te Mileto taicha ticajumahi éma.

²¹ Pítecavanecha te tamirahuinarichaha eta muracana técticava. Téchajicaviana éna vichamuriana éma Eubulo, éma Pudente, éma Lino, esu Claudia, énapa éna apamuriana vichamuriana.

²² Núti nuyaseuchaviparaca me Viáquenu Jesucristo majaneacavihinini tamutu sácheana, táetaviuchavaréni eta iúricacarevaya emutu éti máicha.

Tamutupa eta néchajiriruvahi piyehe.

Tito

1 Nuti Pablo, nucajurevi piti nuparape Tito. Némunacavihi tímicutijiricavahi nuchichavinahini táichavenehi eta péhisiranuhi eta nusuapajiraivahi mayehe ema Cristo. Nuvaraha macatajicavini ichape, májapanuvini ema Tata Vicaiyaquene, émapa ema Viáquenu Jesucristo, émaripahi ema Macatiurahiquene viyehe. Náijaracavini eta táurivaina eta pipanereruana.

Acane, eta táepaniravahi eta juca apaquehe, ema Viya macametarapihi eta máijarasirahaviya eta vítare-siraya máichecuaraquiyare. Ene tacaheyare, taicha ema Viya tájina máepiyahiraivaina. Puiti, títecapauchahaviripa eta sache máicutiarahi ema Viya, eta máijarasirahaviripa viti apóstoleana eta máechajiriruvana, étaripa vémechaquenehi puiti ena achaneana. Tacahe, núti mavanaranuhi ema Viya. Manerejirunuhi ema Jesucristo, ema Macatiurahiquenehi viyehe. Tituparacaruhi nítauchayare núti eta námirayare eta máechajiriruva. Tivanecaruhi eta nímitusiraya ena apamuriana manerejiruana ema Viya eta nasuapajiraivanayare, mavarairahi náimatiequeneha tamutu eta tímitucacareana yátupiqueneana apaesa tauri eta náitare-siraina. Tacahe, nacunevaina eta jena sáchezare te máijaracahavipa eta vítaresiraya máichecuaraquirénapa.

Eta macatuparahaira ema Tito

5 Péchavarichuhi te nunaquicavinapa eta te tíurupuhi te mar ticaijare Creta. Nutuparacavihi pítauchayare tamutu eta numaitaureanahi. Eta nutupararuvahi pinerejicaya ena pinacaqueneanayare eta návacureanaya ena pastoreanaya téchapajiricanayare nácani náijamuripachu tisuapajirahiana. **6** Nayehepachuina pastor, tacamunusera mácani achane maoporavare eta máitaresira. Mácani, ésunarichuhi esu mayena. Tisuapajirahianahivare ena machichanaveana. Tacuija natapiravaina. Tisamarahiana éna. **7** Taicha tacamunu matapiravarena nácani pitupararuanayare; taicha éna, tuparairucanayarevare mayehe ema Viya. Mácani, tímitucacarehi. Mácani, vahi tiseमारairihi. Váhivare tavayuaruina eta téracare. Váhivare macueharahi. Váhivare tijamurarahi. **8** Mácanisera achanesamure tijacaparahi nácani tichimarachana. Máurica macachane ena tíuripaneréruana. Mácani, máituca tipanerereca. Mácani, títaurahi tamutu nayehe ena achaneana. Mácani, macaijuhe ema Viya, títaurahihivare mayehe. Mácani, táuriquene eta macaratasirava. **9** Énerichuvare tacamunu ema mácani tisuápajiráhiquene tayehe eta vímiturapiana tisuapacareana,

apaesa éma táurivare eta máimituresiraina. Taicha tacamunu eta máijarasirayare eta natumevaina ena tisuapajirahianahi. Tacamunuhivare eta macajimuyasiravacaina ena nácani ticatianacanárichaha eta máimiturapiana. Máijaracainavare eta nasuapajiraivaina.

10 Taicha nararihi camuriana ena titupiarahiana. Náetaviucha eta náechajiricavarasivana, tivayuarahiana éna. Nararihi ena nujaneanana tíápajucavana eta natupiaraviana. **11** Picamatinacayare ena nani. Vahi picuisapa eta náimitureca eta tamauriqueneana, machu náemejecapavacha ena vichamurianahi. Taicha vahi táuricacarehíni eta náimiturapiana. Ena nani náichahi eta juca taicha navarahahi navereacavaca eta naplataneana.

12 Matiarihinihi ema nayehenihi profeta nájaneanaichu ena cretenseana. Macahehi eta máechajiriruvahi nayehe: “Ena nujaneanana cretenseana, tépiyahirahiana éna. Tíñehi eta náichaquene nacuti eta sárare tíñehi. Cánisiuquiana. Plújuanavare éna” macahepa éma. **13** Yátupi tacahehi eta náitaresirahi puiti ena cretenseana. Eta tacahe, pituparacaicha muraca ena vichamuriana cretenseana, apaesa vaipa nacuaquipaicava tayehe eta tájiparácana. Tauri eta náehisira eta véhiruhi. **14** Vaipa nacusuapa eta náimiturapiana navayuarapiana ena nujaneanana israelítana. Machu nacusuapa eta náimiturapiana ena nácani navaraha tihapapiricavaca ena vichamuriana eta náehisira eta yátupiqueneana tímitucacareana.

15 Ena tipachinanahi te napanereruana téhepa nasamureana, énará ena nani nacaijuhe eta táuriqueneana taicha náurica eta nasamararasira tamutu eta táuriqueneanahi. Énasera ena masuapajirairahana váinarajipanereruana, éna vahi táurihini nasamira eta tíuriana echajirirucava yátupiqueneana. Taicha tachipejiquenehi tamutu eta napanereruana, muracasamureanapa táicha. Tájina nasamahini eta tamaurivahi eta náichirahi. **16** Éna nacahehi: “Véhica ema Viya”. Tímaticareanahisera eta namáehisirahi ema Viya, taicha náicharichucha eta tamauriqueneana tíñemahiana. Émasera ema Viya macaticha tamutu eta juca náichaqueneana táíñemahiqueneana. Ena nani, masuapajirairahanahi eta mayehe. Tájinasera vahi náituréquenehaimahi ena nani náichahini eta táuriqueneana.

Eta yátupiquene vímiturapiana

2 Pítisera pímiturecaya tamutu eta táuriqueneana. Ena víyahana ichanaruana, pímitucayareva eta najaneasiravaina eta náitaresira, náitaurahivaina, náitusiraina tipanererecana, nasuápajiráhiquenéna tayehe eta mavanairipiana ema Jesucristo. Náemunarahi nayehe ena achaneana. Yátupina eta nacamichiraina tamutu. ³ Énerichuvare ena vénarahana ichanaruana, pímitucayareva éna tauri eta náitaresiraina taicha éna, tuparairucanahivare mayehe ema Viya. Vaipa téchajihianaimahi. Váhivare tacuvayuaca eta tércare. Náimiturahisera eta táuriqueneana.

⁴ Náimitucayareva ena amaperuana esenana apaesa náituca eta náemunasiraina ena náimanaveana énapa ena nachichanaveana. ⁵ Náitusirayareva tipanere-recana. Napicaucha ena náimanaveana. Nasuapajirahivare nayehe. Napicauchacare nacaenacare te napenana, náitusiraina náechapajirica eta nayeruruvana. Náurivaina éna, apaesa tacuija náechajisiacarevaina tayehe eta náehisirahi eta máechajiriruva ema Viya.

⁶ Énerichuvare piconsejachayare ena amaperuana ajairana, yátupina eta náitusiraina tipanererecana.

⁷ Tamutu eta juca, pinaquipairuyare píti eta piúrivaina, apaesa étaina náehica ena vichamuriana eta piúrivahi píti. Étanarichu eta pímiturapiya, vahi pihapapicaimahi eta pímitucasivahi. Váhivare picuitsivacha. Tapicauchacare eta pímituresiraya. ⁸ Táuri eta pímimehapisirayare eta jácani péchajirisiravanaya, apaesa tacuija nacuviyava eta nacaecahiravina ena piánaranahi, titsirihavianayarechucha táicha.

⁹ Piconsejachayare ena músuana eta nasuapajiraivaina nayehe ena náquenuana. Náitauca támutu jácani navarahaqueneana ena náquenuana. Vahi nacujicapairihi tayehe eta vanairipiana. ¹⁰ Váhivare nacuvijaca eta nacayehequeneana ena náquenuana. Yátupina eta nacasiñacarevaina tayehe tamutu eta natuparahanahi. Náimereca yátupina eta náurivaina apaesa tajamurachacare eta véhiruhi, étarichuhi eta vímiturapiana mayehe ema Macatiurahiquenehi Viya.

¹¹ Ema Viya, acaneripa eta majapanuirahavihi vimutu viti achaneana. Eta tacahe, máimitesinahavihi puiti ema Machicha eta macuchucuirahaviya. Eta juca tímicaecherachahi víti eta majapanuirahavihi ema Viya. ¹² Puiti ema Viya mavaraha eta táuri eta vítaresiraina te juca apaquehe. Mavaraha yátupina eta vítusiraina vipanerereca, étapa eta vítauraivaina tamutu nayehe ena achaneana, étapa eta vítauraivaina mayehe ema Viya. Vaipa víchaimahi eta tájiparacana tauriqueneanahi. Váipavare víchaimahi eta tajamurachaqueana eta viáquehe. ¹³ Tásiha, vicunevainapa eta machavirayare ema Viáquenu Jesucristo ema Macatiurahiquenehi viyehe. Eta máitesiraya mámayarepahi eta tapachinaquene majaraiva. Tétavicava eta viúrisamurevainapa te jena sáchehare. ¹⁴ Éma, máepeninahavihi, mavarairahi macaichepaicaya tamutu eta víchirahi eta tauriqueneanahi. Máepachina-

chayare tamutu eta tamaeperajivana eta viáchanevana. Taicha mavarahahi machaneraquenehaviyare. Tacahe, puiti vivapinavayarehi vicha eta táuri queneana.

¹⁵ Tiuri, pímitucayare eta júcana nutupararuvianahi, tamutu piconsejachavacayareva ena achaneana. Tijuricati natiarihi navaraha téjecapavana, picortachavanezare. Pétumechava eta pímitusirahi taicha eta pituparacasivahi. Piúriyare eta pítaresira apaesa námutu napicauchavi, váhivare nacuepuru eta pituparahahi.

Eta vítaresira viti véhicana ema Cristo

3 Pémechayareva ena vichamuriana eta nasuapiraina ema ichapequenehi aquenuca, tásiha, énapa ena tuparairucana. Énerichu pémechavare ena vichamuriana énaína nápacucava eta návanacare tayehe jácani ematanecanaya. ² Vahi nacuechajica nayehe nácani achaneana. Váhivare nacumehareca. Váhivare nacutupiarahi. Mánsuanáinasera, najapanurahi nayehe ena achaneana.

³ Víti, acane eta masuápajirárahahavirichaha, vimáimatiéquenehahinivare. Víchahi tamutu eta tájiparacana tavarahaqueneana eta viáquehe. Tétavicavahi eta viváinarajívainihi eta vítaresirahi. Vicapinarurahini. Vímicatichavainihi nayehe ena achaneana. Vicatianarahinivare nayehe éna. ⁴ Puítisera, vaipa vácahehina, taicha máitsivacharipa eta vítaresira ema Macatiurahiquenehi Viya. Émasera, tétavicava eta máuriva eta viyehe. Témunacahaviripa. Váhinéni víchahini eta táuriqueneana, tijapanuhavisera éma. Masípacaipa eta visamureana, máquijicaipa eta tauriqueneanahi eta viyehe. Énerichuvare tíjaracahavipa ema Espíritu Santo. Ema Espíritu Santo máitsivachinahávipaipahi eta vítaresira, tímitucavipa eta viúrivayare eta viyeherepiyare. ⁶ Tétavicavahi eta viúricacarevanahi maicha ema Espíritu Santo máijjaruhi ema Jesucristo Macatiurahiquenehi eta viyehe. ⁷ Majacpahaviripa ema Viya, tiásihaquenehi eta máemunasirahavihi ichape. Énerichuvare timetacahavihi eta máijjarasirahaviyare eta vítaresiraya máichecuaraquirénapa. Tásiha, vivapinavahi víti eta vicuneiravahi eta jena sáchehare.

⁸ Yátupiquenehi tasuapacareva eta juca vímitucasivahi. Eta juca néchajisihaqueneanahi puiti, nuvaraha pímitucayare tamutu sácheana apaesa náimyanava naicha eta táuriqueneana ena vicutiqueneana tisuapajirahiana me Viya. Tétavicavahi táuriva eta vímiturapiana. Tájiha táichiravaina, taicha eta juca tíjaracarahi eta náurivaya nayehe namutu ena achaneana. ⁹ Puíticha nararihi ena tisuapanarichaha eta nahapapiruanahi nayeherepiana ena viáchucanaveánaini. Te návarahapuca náevataemachavi, vahi picujicapajiricavaca, taicha súnsurupianachucha eta nayasereruvianaya. Váhivare picuimicasiapava nayehe nácani tiyunacana eta mayeherepiana ema Moiséini. Te navarahapuca nácani ticajachaviana, vahi picujicapa.

Pihapapicayaresera eta tajuricatira eta nasemanevanahi. Técativachucha éta.

¹⁰ Te matiarihipuca ema mácani mavaraha mahapapica eta napanereruana ena vichamuriana, pímuchu hayare picórtachávaneya eta mapanereruhi. Te apihequenénapa eta pímuchuha, te máviraichu vahi macusupavi, pévatacayare mayana máuchuca. ¹¹ Taicha tímaticarepahi ema achane eta mamaimitucacarevaya. Étavenérahí eta mapecaturana táimicuñacaya.

**Eta téqueneha matuparacasivahi ema Tito mayehe
ema Pablo**

¹² Tiúri, névatacayare pítsivayare ema Artemas eta ara piyehe, téhesera émapuca névataca ema Tíquico. Te máitecapauchavipa ara piyehe, pítecávaneyare ani nuyehe te juca avasare Nicópolis, taicha nunasiyarechaha ani.

Nuvaraha táetavicavanúmachaha eta muracana técativachucha, nupaenumavainapa nuyanaya. ¹³ Énerichuva títecapauchaviya ema vichamuri abogado Zenas, émapa ema vichamurivare Apolos. Pímicatacavacayare éna eta nayanirayare. Péchapajiricayare éna, te náechuripuca eta napaisiraya. ¹⁴ Pímitucayare ena vichamuriana eta achanesamurevacaina, máejeraréna eta nacajiraivaina nayehe ena achaneana. Yátupina náitachucha eta nacamunucarevanahi.

¹⁵ Téchajicaviana namutu ena natiarihiqueneanahi nuyehe. Tásiha, péchajisinanuya namutu ena némuncasáreana vicutiqueneana eta visuapajiraivanahi mayehe ema Viya.

Nuyaseuchaheparaca emutu éti me viáquenu Jesucristo, táetaviuchahini eta iúricacarevaya máicha.

Tamutupa eta néchajiriruvanahi piyehe.

Filemón

1 Nuti Pablo tapresuchaquenenuhi eta néhisirahi ema Jesucristo, puiti nucachane ema Timoteo eta vicajureravihi eta carta piti Filemón, vichamurivihi vémunaruviquenehi tayehe eta vématanerepianahi. ² Vémechajisihavare namutu ena vichamurianahi tiúrujicavarahianahi te pipena. Péchajisinhavivare esu vichamuri Apia, émapa ema Arquipo, vicompañeroquenehi muraca tayehe eta vématanerepianahi. ³ Nuvaraha macatajicahéhini ichape ema Tata Vi-caiyaquene, émapa ema Viáquenu Jesucristo. Náijaracahéhini táurivaina eta epanereruana.

Eta máurivahi ema Filemón

⁴ Néchaviparaca te nuyujarasirana, nuhasulupayachahi ema Viya. ⁵ Taicha nusamairiricahi eta pímiyanirávahi pémunaca ema Viáquenu Jesús, péhicahi yátupi. Pémunacahivare namutu ena machanerana ema Viya. ⁶ Nuyaseuchavacahi me Viya nayehe namutu ena téhicavianapaipahi táichavenehi eta náimairahi eta pisuapirahi yátupi. Nuvaraha nácaicutiaraquenénaini muraca tamutu eta táuriqueneana máijjararuhavianahi ema Cristo Jesús. ⁷ Ichaperinehi eta núrismurevahi picha piti nuparape. Tijarahinehi picha te nusamure eta nusamairirísirahí eta pímiyaniravahi pémunacavaca yátupi ena vichamuriana, etapa eta picurismurechiravacahi ichape éna.

Ema Pablo máechejiucha ema Onésimo mayehe ema Filemón

⁸ Tiuri puiti, nuvaraha néchajiucha ema Onésimo. Picatajicanu piperdonachinanu éma. Núti yátupiquenenuhi mayehenuhi apóstole ema Cristo. Tituparacanu hinéni nuvanecavihiní. Étasera eta vémunasiracacahi, nuyaseacavi nuti paure ichavica, nucaerataquenehi puiti máichavenehi ema Cristo. Puiti éma, nuchichahi némunaruquenehi te juca cárcel taicha éma téhicahaviripa eta visuapirahi ema Jesús.

¹¹ Ema maca Onésimo, cape juca másinequenehi, vahi máitaurahini eta picamusurairahi. Tijunahivare. Púitiserá éma, ichaperinehi eta máitátiranuhi. Eta máitátiranuhi núti tacutiyare eta máitátiraviyareva píti apana. ¹² Puiti névatacayare éma eta ara piyehe. Picatajicanu pijacapanuyare táimicutijiricava nútinyarehi nítecapauchavi piyehe. ¹³ Nuvarahahineni mánasihini eta ani nuyehe. Émainahini pítsivainahini eta pivarairahi píteca pítátinuya eta návihairahi te juca cárcel táichavenehi eta nucametarairuirahi eta máechaji-

riruvana ema Viya. ¹⁴ Nuvarahahineni níminasicha éma, nucuchapahisera tájahapuca picayemayare píti. Váhiserá nuvaraha nupamicavi eta juca picatajisiranya, nucuchapayare eta pijicapiranuyare. Nuvaraha étachucha tásihaqueneyarehi eta táurivaina eta pipanereru. ¹⁵ Táitaurevaquene tijunijicavihi ánipi ema Onésimo. Émarichuserapuca jácani ema Viya tásihahi máisapahi eta macaheyarehi ema Onésimo. Púitiserá tétupiricavapa éma. Márajapainapa tichavayare eta ara piyehe, apajarahinapa eta máitátiraviya. ¹⁶ Váipa tácutimahi cape juca másinequenehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma te mavahua-na ema Viáquenu. Núti, ichape eta némunasirahi ema maca. Énénapa picaheyare píti apanava, tiápajucavainapaipa eta pémunasiraya ema maca.

¹⁷ Te yátupina pémunacanu eta nuchamurivirahi, pijacapanuyare éma táimicutijiricava nútinyarehi pijacapa. ¹⁸ Te tatiarihinapuca eta máejecapiravahi piyehe, ticantevehipuca, nútinarine picobracha.

¹⁹ Nuvachachaviyare núti. Nuti Pablo, nútiquenehi nájuchahi eta nufirmachirahi puiti eta nuvachachiraviyare. Nuvarahahineni némechavi píti apana eta pin-tevehi nuyehe eta nucatiuchiravihi. ²⁰ Tiuri, nuparape, picatajicanuchaha eta juca nuyasearuvivi táichavenehi eta nucachamurivirahi mayehe ema Viáquenu. Picurismuréchanuya.

²¹ Németeaca vahi táéñamavacare eta juca pisuapiranuyare. Eta tacahe, nucajurevihi puiti. Taicha néchahivare eta vahi tácarichuimahi pítauchaya eta juca nuyasearuvianahi. Tatiarihiyare jácani apanayare pijjararuvanayare píti tásihaqueneyare te pisamure. ²² Énerichuvare nuvaraha pétupirisinanuya eta nítecapihaya. Étanecha nucuchapahi eta tasamacarevaina eta eyujaracasana me Viya eta nítujisiravaina nítecapauchaha.

Eta táichecuarqui eta máechajiriruva ema Pablo

²³ Téchajicavi ema Epafras, ema nucompañerohi te juca cárcel, tapresuchaquenehivare ema apana eta véhisirahi ema Jesucristo. ²⁴ Énerichuvare téchajicahéana ena apamuriana vicompañeroanahi tayehe eta vématanerepianahi: ema Marcos, ema Aristarco, ema Demas, émapa ema Lucas.

²⁵ Nuyaseuchaparaca ema Viáquenu Jesucristo táetaviuchahíni eta iúricacarevaya máicha.

Tamu tupa.

Hebreos

Emá Jesús títametacahavi eta máechajiriruvana emá Tata Vicaiyaquene

1 Acane eta náitaresirahi ena viáchucanaveanaini, natiarihihi ena camuriqueneana santo profetana mavanaranahi emá Viya. Éna, náitametacahi ena achaneana eta máechajiriruvana mapanereruanahi. Ichapemurivare eta náimeresirahi eta máitupajijiasiravanahi emá Viya. Apanapanenéjivare eta náimituresira eta máechajiriruvana. ² Puítisera viti vítareruanahi puiti juca áñoana, emá Viya mavanecahi emá Machicha eta viyehe, títametacahaviya eta táequeneruana mapanereruana. Emá maca Jesucristo, Viyahivare éma, taicha machichahi emá Viya. Acane émahi tépiyacahi eta apaquehe, eta anuma, étapa eta vímahaqueneanahi puiti, máitauahirahi tamutu eta mapanereruana emá Maiya. Émarichuvare ticatuparahahi me Maiya eta émairahi téchahi tamutu. Puíticha émahi téchahi tamutu, máetaviuchahi eta máitupajijiasiravahi. Emá Cristo ticayehehi eta majarivahi máijjararui emá Maiya. Eta máucupaisirahi eta viyehe, tímimatichahavipa eta máurivahi emá Maiya. Tásiha, te tamutupa eta macaepahairahi eta vipeaturana vimutu viti achaneana, tichavapa te anuma. Ánaqui emá Maiya macaejacapa te mayehe trono te mavaure.

Emá Cristo, éma ticapicahupanahi nayehe ena ángeleana

⁴ Tacahe, emá Cristo, éma ticapicahupanahi nayehe namutu ena ángeleana, taicha emá Maiya máijjaracahi eta ichapequene mávacurehi ticapicahuhi. ⁵ Taicha eta máechajiriruvahi emá Viya mayehe emá Cristo, ani macahehi: “Píti yátupiquenévihi nuchicha. Puiti nucaejacavihi te piávacure” macahepa. Tacahe, ena ángeleana, tájina vahi máichahini: “Píti nuchichavi”. Váhivare máichahini: “Núti picaiyaquenehi”. Emá Viya máechajisihahi emá Cristo, ani macahehi: “Emá maca, emá yátupiquenehi nuchicha, taicha nútiquenenuhivare máiyanu” macahepa. ⁶ Tacahe, te macucupaicapa emá macarichuquene Machicha te juca apaquehe, macavanairipipa eta natsiusirayare nacunchirayare namutu ena ángeleana. ⁷ Énaserá ena ángeleana, táechajisihahi eta Sagrada Escritura, ani tacahehi: “Ena ángeleana vanairucanachucha éna. Nacutihí eta técativá eta najuricativa te ticavanahiana. Nacutihivare eta yucu eta nasipasirayare jácani tamaeperajiqueneana” tacahepa eta Sagrada Escritura.

⁸ Ánisera tacahehi eta táechajisihairahi emá Cristo: “Píti yátupiquenevihi Viya. Máitavacacayarehi eta aquenucavirayare. Tétavicava eta tatupiruvairayarehi eta pivanairipi. ⁹ Píjaracayarehi eta táurivayare eta náitaresira ena achaneana tiúriana tisuapavianaya. Énerichu píjaracayare eta náicuñayare ena achaneana váinarajiana masuapajirairahanahi eta piyehe. Eta tacáhe, emá Tata Vicaiyaquene, emá Ticachichavihi, tíjaracavihi tamutu eta picapicahuirayare nayehe ena pichamuriana téhicavianahi. Tétavicavahi eta náurisamureva pícha”. ¹⁰ Ánivare tacahehi: “Píti yátupiquenévihi Viáquenu. Píti pítucahi eta táimahiyare eta táepaniravahi eta apaquehe étapa eta anuma, pépiyaruani te pivahuana. ¹¹ Tayanapane títavayarehi tamutu eta juca vímahaqueneanahi, ichasipaipahi tacutipaipa eta táichasivapaipa eta vimuiríha. Pítisera pinasiyarehi. Te pímahapa táuricapa eta pítsivachiraya tamutu, máejerareyarehi pícha. Picañapupujicainapa tamutu. Taicha píti, máitavacacaviyarehi eta pítare-sirahi” tacahepa. ¹³ Jararihi eta apana máechajiriruvahi emá Viya, ani macahehi mayehe emá Cristo: “Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. Énaserá ena ángeleana, tájina vahi máichahini: “Péjaca ani te nuvaure”. ¹⁴ Taicha ena ángeleana, mavanaranahi emá Viya. Éna, espírituanahi. Vahi énajivainahini nacapicahuhini. Eta natuparahahi éna, tijaneacahavianaya víti macuchucureanayare emá Jesús.

Tacamunui eta vipamisirava tayehe eta véhisirahi emá Jesús

2 Eta tacahe, tituparacahe yátupina eta ecaravahuiraya eta ímitucasiqueneanahi, machu émitisica, machu étaina taviuchahe vahi iúchucuhahini. ² Eta acane, ena ángeleana, éna tímitucanahi emá víyahaini Moisés eta vanairipiana. Tétavicavahi eta tasuapacarevahi. Ticaicuñavaneanahi ena téjecapanahi, timasuapanahi eta nasamaquenehi. ³ Puiti numetacahe: Tisuapacarepanahi eta véhiruhi. Tájina vahi ticaitechémahi eta ícuñayare te váhipuca ecucamapuravahi eta iúchucuirayare. Taicha émarichuhi emá Viáquenu tínapucahi máichuhavacahi ena achaneana eta náuchucuirayare. Tacahe, ena tisamanahi éma, tíchuhavianapa víti. ⁴ Énerichuvare, emá Viya máimerecapahi eta tíamicareana, máicutiaranahi eta émairahi vanairuca, mavarairahi tisuapacareyarehi eta nametarapiana. Énerichuvare puiti emá Espíritu Santo, éma tíjaracahavihi eta vítucaquenepachuyare apaesa

vítauchayarehi eta vématanerepipachuhi víjarahi máicha.

Éma Jesucristo, achanehi eta máimahi eta máitesirahi te vitaracu

⁵ Éma Viya, váhivare énáinahini matuparacavacahini ena ángeleana eta énaireyare téchanaya eta arairu-yare avasare eta vicuchapaquenehi, étaripa eta véchajisiqueneharehi. ⁶ Éta Sagrada Escritura, ani tacahehi eta táechajiriruva: “Piti Tata Viáquenu, tétavica-vahi eta pijapanuirahavihi viti achaneanasami. Víti, váhinéni táunahini eta vítaresirahi. Váhivare véñama-carehini. Pítisera péñamavahi eta viyehe, váhivare pémitisicahavihini viti pépiyuanahi. ⁷ Te pépiyacapa éma viáchucaini Adán, vahi mácutinasivacahini ena ángeleana. Éna, nacachuricahi éma eta náitupajijiasiravana. Váhisera tánasimahi eta nacachuriasirahi. Taicha pijapanuhavihi viti mámariequenehana éma Adán. Píjaracahavihi eta viávacurehi tajarahiquenehivare, tétavicavahivare eta vicapichuirahi. Aquenuca-havihi pícha. Véchahi tamutu eta pépiyuanahi. ⁸ Visuapacarehi viti tamutu eta pituparasirahavihi” tachahepa eta Sagrada Escritura.

Tacahe, téchajisihavihi eta Sagrada Escritura eta véchirahi tamutu eta máepiyuanahi éma Viya, tájina ticaejeraimahi, maicha éma Viya. Vuíchahasera vímahahini vicayamuricahini tamutu táichavenénahini eta visuapacarevahi. ⁹ Mararihisera éma Jesús. Tiúcupaica-hi ánipihi te juca apaquehe, nacachuriacaripa ena ángeleana eta náitupajijiasiravana. Éta máemunasirahavihi vimutu viti achaneana, éma Viya máimicapacari-chahavare te crusu vítivenehi. Téhesera te táequene-pa, macaejacapa éma Jesús tayehe eta tajarahiquene mávacurehi tacapichahuene, táitsivahi eta macatajivairahi eta máepenirahi.

¹⁰ Éma Viya émarichuhi téchahi tamutu. Éma, tétavica-vahi eta máechemaraivahi eta manerejisirahi éma Machicha eta macuchucuirahaviyarehi, tiámahaviyarehi eta te mávasa, viti machichanayarehi. Émaripa éma Jesús, eta macamichirahi tamutu eta mátajivana, títauchavahi tamutu eta matuparahahi. ¹¹ Éta máepachinachiraripa eta viáchanevana, visiapamurihai-pa ena machichanaveanahi éma Viya, vicutiripa éma Jesús eta machichairahi éma Maiya. Éta tacahe, éma Jesucristo, ichape eta máurisamurevahi eta viyehe eta majacapirahavihi maparapehaviyare. ¹² Éta te Sagrada Escritura, ani tacahehi eta máechajiriruvahi éma Cristo: “Nuvapinava eta néchajisihairaviyare, Tata, nayehe ena nuparapenaveana. Nuvaraha nujirauchaviyareva, nacachanenuhivare éna”. ¹³ Ánivare tacahehi: “Tétavicava eta nucasiñavairahi mayehe éma Tata Nucaiyaquene”. Éta apana, ánivare tacahehi: “Ani návihahi núti, énapa ena pichichanaveanahi, éna pinereji-ruanahi píjararunuanahi piti Tata” macahepa.

¹⁴ Viti achaneana, étanarichuhi eta vicaechera éta-pa eta vítine. Éne macahehi éma Jesucristo, macaechehi, macaitinehivare étarichuhi tacutihi eta vítine víti. Éta tacahe, eta máepeninahavihi, macapaquechihayarehi

éma Váinaraji, émarichuhi muracaquenénihi eta máitupajijiasiravahi eta macapareresirahi. ¹⁵ Viti achaneana, ichapequenénihi eta vipisirahi eta vépeni-rayarehi, taicha vipicahi eta vícuñayare. Éta vipisirahi tahapapiricahi eta vítaresira. Émasera éma Jesucristo macaepaharipa eta vícuñayarehini, vaipa tápicacarehini eta viyehe. ¹⁶ Éma, eta máitesirahi, vahi étainahini táimitecchini eta máimicatasiravacayarehi ena ángeleana. Yátupihisera viti achaneana, víti máimicataruanayarehi, taicha eta vicasiñavairahi eta mayehe, vicutirahi éma víyahaini Abraham eta macasiñavairahi me Viya. ¹⁷ Éta tacahe, eta máucupaisirahi éma Viáquenu, tatuparacahi macaqueheyarehi eta viáquehe eta máitaresirahi, ticutihaviyarehi viti maparape-naveana te tamutu eta vítaresirahi, yátupiyarehi eta máetaviuchiraya eta majapanuirahaviya, máetaviucha-yareva eta macasiñacarevaya eta viyehe. Taicha macarichuhi éma tiyaseuchahaviparacahi te mami-ruhu éma Viya Macaiyaquene, macaepaháinahaviyarehi eta viviurevanahi táichavenehi eta vipecaturana viti achaneana. ¹⁸ Éma Jesús, ichape eta macatajivairahi, macaitsamarajiquenehi éma Váinaraji. Macamichahisera tamutu, vahi máisapavahini. Tásiha puiti, éma marataha tímicatacavaviyare víti eta vicamichirayare eta viátajivana táichavenehi eta macaitsamarajirahavihi éma Váinaraji.

Éma Cristo tiápajucavahi eta macunachacarevapanahi mayehe éma víyahaini Moisés

3 Nuvaraha numetacaheya éta apana, eti nuparapenaveana máepachiaruanahi éma Viya, máichuhaqueneanahivare éta esiapiraya éta mávasa. Nuvaraha epanerecha apaesa ácaicutiara éta táetavichirahi éta máitupajijiasiravahi éma Jesús. Éma, yátupihimavaneruhi éma Viya éta máimitusirahaviyarehi éta juca véhiruhi. Macarichuhi éma tiyaseuchahaviparacahi te mami-ruhu éma Viya. ² Éma Jesús, tétavicavahi éta máítauchirahi tamutu éta mavanahiana matuparacasi-vanahi me Viya. Énerichuvare éma víyahaini Moisés, títaurahivare éta mavanahi éta maconsejairavahi, máimitusirahivare éna achaneana tamutu éta mavanairipiana éma Viya. Énerichuvare máechajisihahi tatiarihiyare éta apana mapanereruana éma Viya vuíchahasera máimerecchini éma Viya. Émasera éma Jesucristo, éma tiápajucavapanahi éta macunachacareva, macachuricahi éma víyahaini Moisés. Ticunachacarepanahi taicha machichahi éma Viya, ticatuparahahivare téchahavihi vimutu viti machanerana éma Viya. Émasera éma Moisés vanairucaichucha. Éma Moisés máichuhavacahi éna achaneana. Émasera éma Jesucristo, émahitápachinachahi éta viáchanevana viti machanerana, tihetamurichahavivare. Víti yátupihimachanerahavihi, te vímiyanava éta juca véhisirahi éma, vicasiñavavare éta mayehe, viúrisamurevare éta vicuchapirahi éta viúchucuiraya te jena sácheyare.

Emá Viya tícuchahavihi eta vinarasihayare viti machan- eranahi

⁷ Eta tacahe, nuvaraha ejaneacava. Emá Espíritu Santo, ani macahehi eta máechajiruvahi tayehe eta Sagrada Escritura: “Puiti jena sache, esamayare esuapayare éti eta numetarapiana núti. ⁸ Tacuija eta tamuracavaina eta esamureana. Vahi ecucuti ena achaneana mámaqueneanahi emá Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi núti. ⁹ Tétavicavahisera eta nucamichiravacahi eta namasuapajiraivahi. Cuarenta áñoripahinéni eta nímechiravacahi eta tíáramicareana níchaqueneanahi, váhisera nasuapanuhini. ¹⁰ Eta tacahe, te táequenepa, nusemapa nayehe ena nani achaneana. Taicha éna, táetaviuchahi eta táejecapiravahi eta nasamureana. Vahi návarahahini náimatihini eta táurinaquene achene, nuvarahaquenehi nímechavaca. ¹¹ Núti nétupiricaripahi eta náicuchihi nanarasihayarehini eta nuyehe. Tétavicavahisera eta náimiyusemasiranuhi. Tásiha, nucahepa núti: Ena nánitátaji váhiquene nasiapaimahi tinaracanaimahi eta nuyehe” macahepa emá Espíritu Santo.

¹² Eta tacahe, nuparapenaveana, nuvaraha ejaneacavayare yátupina. Machu éhica eta napanereru ena masuapajirairahana, machu emutserahava íminajicava eta éhisirahi emá yátupiquenehi Viya Vicaiyaquene. ¹³ Étumechacacayaresera nayehe ena apamuriana echamuriana támutuhi sácheana puiti juca vicaijuhaye, apaesa nacuija navayuaca ena tivayuarahiana tayehe eta pecatu, machu étaina táemuracacha eta esamureana. ¹⁴ Taicha viti machamurihavianahi emá Cristo. Vijacapainasarepa eta vícuchihi mayehe éma, te vímianavahi eta vicasiñairava mayehe, vétumechiravahivare eta véhisirahi. ¹⁵ Eta tacahe, nápechavavare némechahe eta máechajiriruva emá Espíritu Santo: “Puiti jena sache, esamayare esuapayare éti eta numetarapiana núti. Tacuija eta tamuracavaina eta esamureana. Vahi ecucuti ena achaneana mámaqueneanahi emá Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi núti” macahepa.

¹⁶ Puiti nuvaraha epanerechaya eta juca. Némechaheya emá víyarahaini Moisés eta macuchusiravacahi ena viáchucanaveanaini tayehe eta avasare Egipto. Tétavicavayaréni eta náuricacareva. Tamapurujisera eta nasamirahi eta mahu emá Viya, máijjarasirahi eta mavanairipiana. Náimiyusemacapaipa éma eta namasuapirahi. ¹⁷ Tamapurujivare eta cuarenta áñohi eta macamichiravacahi emá Viya. Taicha tavayuacahi eta napecaturana éna, étapa tiviuuchahi eta náepenarasirahi te mávapahi apaquehe. ¹⁸ Eta namavarairavacahi nasuapahini, éma manacapa eta mayehe juramento eta namaitujisiravayare tisiapana nanaracahini eta mayehe. ¹⁹ ¡Ácaicutiara éti! Táichavenehi eta namaitujisiravahi tisiapana tayehe eta mávasa emá Viya.

⁴ Tacahe puiti, vicasiñavayare me Viya apaesa vítujicava vinaraca mayehe. Ticamunucarehisera eta ejaneasiravayare muraca machu émeppurecava éti, tijuricati vahi ecuitujicava esiapa. ² Taicha víti vicametasihivare eta víuchucuirayare tacutihi eta nacametasirahi éna. Tamapurujihisera eta nacametacahirahi eta náuchucuirayarehini, váhiquenesera nasuapahini. ³ Yátupisera jararihi eta vinarasihayarehi, taicha ánipa macahe emá Viya: “Núti nétupiricaripahi eta náicuchihi nanarasihayarehini eta nuyehe. Tétavicavahisera eta náimiyusemasiranuhi. Tásiha, nucahepa núti: Ena nánitátaji váhiquene nasiapaimahi tinaracanaimahi eta nuyehe” macahepa emá Viya. Vítisera viti visuapajirahiana, vítujicavayare visiapa tayehe eta juca vinarasihayare eta mayehe emá Viya.

Emarichuhi emá Viya máetupiricaripahi eta vinarasihaya, taicha tinaracapa éma, te táequenepa eta máitachirahi macaemataneasirahi tamutu eta juca apaquehe. ⁴ Taicha eta Sagrada Escritura, ánipa tacahe: “Saisi sache eta macaemataneahi emá Viya. Téhesera te sítequenepa sache, tinaracapa éma, taicha máitacharipahi tamutu” tacahepa. ⁵ Tásiha, nápechavavare némechahe eta juca máechajiriruvana emá Viya: “Váhiquene nasiapaimahi tinaracanaimahi eta nuyehe” macahepa. ⁶ Tacahe puiti, mávacuichahahi eta nanarasihayarehini ena tínapucanahi tisananahi eta náuchucuirayare, táichavenehi eta namasuapajiraivahi. Étainapasera víavihayare viti véquenereruana visuapajirahianayare. ⁷ Ánaquiaparipahi eta táetavisiravahi eta áñoanahi te táequenepa eta namasuapirahi ena nani, máichapa emá Viya eta te Salmo, ánipa macahe: “Puiti jena sache, esamayare esuapayare éti eta numetarapi núti. Tacuija eta tamuracavaina eta esamureana”. Eta macaheirahi eta juca, emá Viya máimicutiarachahi eta apana sache ticamapuravacarehi eta visiapirayare eta te vinarasihayare eta mayehe. ⁸ Yátupihi emá víyarahaini Josué macaitcapavacahi ena nani achaneana tayehe eta apaquehe natuparahahi. Váhisera étainahini eta nanarasihayare mavarahaquenehi emá Viya. Eta tacahe, eta máechajisihapa eta apana sáchevare visiapiraya víti. ⁹ Tacahe, jararihichaha eta juca tacapicahuquenehi vinarasihayare, táicuchihi eta viáchaneva viyehe viti machaneranahi emá Viya. ¹⁰ Eta visiapirayare vinaracaya eta mayehe emá Viya, yátupi máitavacacayare eta vinarasiraya, vaipa vicaematanémahi. Vicutiyahe emá Viya eta manarasirahi tayehe eta máemataneanahi. ¹¹ Eta tacahe, tavarahahi vétumechavayarehi tayehe eta visuapiraina éma, apaesa vítujicava visiapa tayehe eta vinarasihaya. Machu vémeppureca eta vícuchihi, machu vácuti ena masuapajirairahanahi.

¹² Taicha eta máechajiriruva emá Viya, tétavicavahi eta táitupajiasiravahi máicha, tamutuhi tarataha. Tacachuricahi eta tacasiriva eta espada. Tacapayacayarehi te amahe tayehe eta viáchanevana viti achaneana. Tímechahavi eta tamaurivahi eta visamureana. Tasiapavare eta vipanereruana. Tímituchavivare eta vétupirisieca eta vítaresirana. ¹³ Emá

Viya máimararacahi tamutu. Tájina vahi viratahaimahi viyumuruca eta víchaqueneanahi. Tamutuyarehi tiúchujica te mamirahu éma vépuyumiraureyarehi te máichuhahavipa eta vimetauresiravayare mayehe.

Emá Jesús macarichu éma tiyaseurahi eta viyehe

¹⁴ Emá Jesús, yátupiquenehi Machicha emá Viya. Macarichuhivare emá tiyaseurahi eta viyehe taicha mávaháruhi puiti emá Maiya mávihahi te machacaya. Eta tacahe, vicaratacavayarehi muraca tayehe eta véhiruhi. ¹⁵ Éma, yátupihí tiyaseurahiquenehi eta viyehe, taicha tímatihavi eta vimatumevahi. Tijapanuhavisera, taicha éma énerichuvare ticatajivahi tamutuhi macaitsamaraji emá Váinaraji, tacuti eta macaitsamarajahavihi víti. Váhisera macapeaturahini emá Jesús. ¹⁶ Eta tacahe, vicasiñavayarehi te viyujarasirana, vémeñahairavahi me Viya témunarahiquene. Taicha tétavicavahi eta majapanuraiva táichavenehi eta máemunasirahavihi. Éma, yátupihí eta máimicatasi-ravahi tayehe tamutu eta vicamunuiravana.

5 Nuvaraha epanerechaya nayehe ena nácani catuparahanayare tiyujaracarahiana viyehe viti israelítana. Éna, nerejianahi te nataracu ena achaneana. Natuparacasivaichuhi éna ticaitecapanayarehi me Viya eta námavahuana ena achaneana, étapa eta nanaquiruvana táichavenehi eta napecaturana, nayaseuchirayarehi ena achaneana mayehe emá Viya. ² Éna, tijapanurashianayarehi nayehe ena máiturereana énapa ena téjicapavana, taicha énarichuvare ticatajivanahi tayehe eta naeche máteji. ³ Étaripa eta nacatajivairana, ticamunuvanahi éna apana ticamavahuanahi mayehe emá Viya táichavenehi eta napecaturana.

⁴ Tacahe, mácani ticatuparahayare tiyaseurahiyarehi, vahi émajiriruvaimahi máichuhacasivarichuhi. Émahi emá Viya tíjaracahi eta matuparahahi mapicahuyarehi, tacutihi eta máijarasirahi emá víyahaini Aarón eta matuparahahi macapicahuirahivare. ⁵ Ene macahehi emá Cristo. Vahi émajiriruvainahini eta macatuparahairahi tiyaseurahiyarehi eta viyehe. Émarichuhi emá Viya tíjaracahi eta matuparahahi mapicahuyarehi, taicha ani macahehi emá Viya: “Píti yátupiquenévihi nuchicha. Puiti nucaejacavihi te piávacure” macahepa. ⁶ Eta apana máechajiriruva, ánivare tacahe: “Nunerejicavihi píti piyaseurahiyare. Nutuparacavihi péchajirahiyare nayehe ena achaneana. Máitavacacayare eta juca pituparaha, picutiyare emá nuvanaraini Melquisedec” macahepa emá Viya. ⁷ Tacahe, emá Cristo, te matiarichichaha ani te juca apaquehe, tiyaseuchavahi te mayujarasirana eta me Maiya. Mura-ca eta máumitirahi, máiyahairahivare. Tiyaseuchavahi vahi máemitisicahini emá Maiya eta macaechepusirayarehi te máecari te táequenepa eta máepenirahi te crusu. Jéhesare, tisamacarehi te mayujarasirana, táichavenehi eta mavarairahi máitaucha tamutu eta mapanereruana emá Maiya. ⁸ Taicha emá Cristo, machichahi yátupiquene emá Viya. Váhisera máeñamavahini. Váhivare majunijicahini eta macatajivairanahi. Macamichahi tamutu, macaravahuirahi eta

masuapajiraivahi. ⁹ Eta tamutuirapa eta máepenirahi, téchepucavarepa, tásiha maratahapa eta macuchucuhairahaviyare vimuti viti visuapanahi éma. Máitavacacayarehi eta vítaresiraya máicha. ¹⁰ Eta tacahe, emá Viya manacahi eta mávacure téchajirahi eta viyehe macutihi emá víyahaini Melquisedec.

Ecunevahi machu ánasi ácuti ena amuyana

¹¹ Ichapemuriyare eta táechajisihaquenehi eta juca numetaruhehi. Ticajerahisera nítametacahini taicha tétavicavahi eta tamuracavahi eta echutiana.

¹² Ánaquiaparípahinéni eta ecaravahuirahi, iúrihaini puiti máestrohevacainaipahíni. Ecamunuichahisera natiarihiyarehi nácani tíapechaheanaya títametaheanayarehi jácani vahi tácajerahini eta vímitucasivanahi me Viya. Puiti éti épiyacavaripahi máiturerehe. Ecutiripa ena amuyana, tacamunuhi vésicahiyarehi eta leche eta ticaitarecayarehi, taicha vuíchaha táitucahini tanicahini eta tinicacareana. ¹³ Taicha ena amuyana tiájicanachaha, vuíchaha técharecana, vuíchahavare napanerequenehaimahi eta táurivayare eta náitaresira. Ene ecahehi éti, apaesarichuhi ecaratacavahi eta éhisira eta táuriqueneana. ¹⁴ Énaserá ena yátupihí eta nacaravahuirahi, ena nacutihi ena ichanaruanahi. Téchanaripa náitucaripa tinerejiuchavana eta táuriqueneana, náepurupa eta tamauriqueneana.

6 Núti, nuvaraha ímiyanavayare eta ecajurusiraya eta échemaraivahi tayehe eta juca véhiruhi. Ichananuhénahini tayehe, vaipa ecucutihini ena amuyana. Éhicapaini yátupi eta máimiturapi emá Cristo. Vaipa ecuápechavahíni épanaequenereca eta táinapureanahi iáravahuanahi. Éti, vaipa ecamunuhini víapechahehíni vímitucahehíni eta éneuchiravayarehi eta epecaturana tímicapacaheyaréni, váhivare víapechavahini vímitucahe eta ecamunuirahi yátupina eta ecasiñavairayarehi me Viya. ² Éti ímatipa eta táichararacavahi te ecaicachasinapa, étapa eta táichararacavahi te nanacapa eta navahu te echuti. Ímativarepa tamutu eta vímiturapiana tayehe eta náechepusirayare ena náepenaqueneana, étapa eta ecuñaraqú máitavacacayare. ³ Tásiha puiti, nímitucaheyare eta apamuri, te máijaracanurichahapucaini emá Viya eta nítupajijiasiravaya, étapa eta ecaravahuiraya.

Ecunevahi, machu ínajicava eta véhiruhi

⁴ Páureanasamisera ena tínajicavanapuca eta véhiruhi, tichavanayarepuca. Taicha nácani natupiruvahi najacapa emá Jesús, tásiha énévanehi najirica te nasamure eta majacapiravacapa emá Viya, machichanaipa; mávahácaripa emá Espíritu Santo; tacurismurechavacavarepa eta máechajiriruva emá Viya; náimatiequenehavarepa eta náuricacarevaya tayehe eta arairuyare avasare, téhesera te nácani náinajicapuca eta náehisirahi, vaipa táitujicacareimahi tíapechavana náeneuchavahini. Taicha eta náinajisiravapa, náepurui-pahi emá Machicha emá Viya. Tímicu-

tijiricavaripa nacaecahihini éma te namirahu ena achaneana, nápechavahini náetataca te crusu éma. ⁷ Nímicutichayare. Eta macamirisirahi ema Viya eta tiquiva, táerapaisiravanehi tamutu eta apaquehe. Jararihi eta apaquehe, tiúrinasarepa eta tasucucurevuna, maicha ema Viya. ⁸ Jararihivare eta apana apaquehe, tájina tasucucureruvaina. Itapepai-rechucha, ijarevare. Ema Viya máijaracayarehi eta táicuñayare, tjuinapa te yucu táicuchihi.

Vahi vínjicavaimahi taicha tatiarihi eta vicuchapaquenehi

⁹ Puiti, muracacaha apaesa eta numetasirahehi, nútisera nucasiñavahi eta eyehe eta vahi ínajicavaimahi, eti némunaruanahi nuparapenaveanahi. Nucasiñavahi eta máijarasiraheya ema Viya eta iúricacarevayare te macuchucuhavipa. ¹⁰ Ema Viya tétavicavahi eta máitauravahi, váiparinehi máemitiscaimahi eta ecaemataneasiranahi. Éta taimereuchahehi eta émunasiravacahi ímicatasiravachivare ena echamurianahi tayehe eta juca véhiruhi. Máimahahi eta ímiyanavairahi ecaemataneaca. ¹¹ Nuvarahavare ímiyanavahini eta evapinavairavaca ámutu éti eta ecaemataneasirahi, yátupina ecasiñava mayehe ema Viáquenu, ecuchapaya eta machaviraya. ¹² Váhivare nuvaraha plújuhéna. Ímiyanavahi éhica ácuti ena echamurianahi yátupiquenehi eta nacasiñavairahi me Viáquenu, nacamichahi tamutu. Jéhesare, ecuticacasarepa éna eta ejacapiraya eta ícuchihi mayehe ema Viya.

¹³ Émechava eta acane eta máechajiriruvana ema Viya eta máijarasiravahi eta máuricacarevayare ema Abraham. Ánipa máicha: “Yátupiyare eta níjarasiraviyare eta piúricacarevayare, tásiha, níjaracaviyareva eta náichapemurivaya ena piámariéqueneana. Nútijiva nupamicava eta nítauchirayare eta juca néchajiriruvana níjararuviyare” máichapa. Ani tacahehi eta máechajiriruvana, taicha nájina apanainahini tipamicaimahi éma. Tásiha, émajiva tipamicavayare. ¹⁵ Ema víyarahaini Abraham, ichapemurihi eta macasiñavairahi me Viya, eta macuchapirahi eta máijararuvanihi ema Viya. Tásiha, tétavicavahi eta máuricacarevahi. Máimahahivare ema machicha Isaac éna ena mámarinaveana. ¹⁶ Tacutihi mácani achane, te maicha eta juramento, majurachahi te mamirahu ema Viya, mavaraha ema Viya mapamicayarehi eta máitaurainahina. Te mácani achane majurachapuca, tájina táeñamavacarehini eta máitaurayare. ¹⁷ Ene macahehi ema Viya, tjaracavahi eta mapamisiravayarehi máitauraha eta máijarasirahaviyare eta viúricacarevayare. Tipamicavayare, taicha mavaraha vahi véñamavaimahi. Tímaticarehi eta máurivahi ema Viya. Tájina táeñamavacaréna eta vicasiñavairaya muraca eta mayehe, taicha éma vahi máitsivachaimahi eta mapanereruana, váiparinehivare tépiyahirahimahi. Tájina véñamavaimahi eta vicuchapirahi eta máijarasirahaviyare eta vícuchihi. ¹⁹ Eta juca vicuchapaquenehi, éta tétumechahavihi muraca te viáchanevana.

Tétavicavayarehi eta vicasiñavaira eta vipauchirayare ema Viya, taicha mararihiyare ema tímisiapahaviyare te mávihahi ema Maiya. ²⁰ Taicha ema Jesús, ema tnapumirauchayarepahi eta máetupirisirayare eta viyanirayarehi, taicha macarichuhi éma ticatuparahahi eta mayaseuchirahaviyare, macutihi ema víyarahaini Melquisedec.

Ema Jesús, ema tiyaseurahi eta veyehe, macutihi ema víyarahaini Melquisedec

7 Ema maca Melquisedec, émahí maparajuruhi ema Abraham. Taicha acane, te jena año, ema viáchucaini Abraham éna ena masuntarurana téhacacanapa nacanarapa ena réyeana, navairahi nacuchucuha ena námereruana, émaripa ema máneva Lot, éna ena machichanaveana. Máitahacacavachisera. Matiarhivare ema apana rey, táquenuhi eta avasare Salem. Émahí ema Melquisedec. Éma, mavanarahivare ema Viya, tiyujaracarahi éma. Tacahe, te tichavapa te mapena ema Abraham, mácapapa ema Melquisedec, mavarahapa mayujarauchaya ema Abraham. ² Tacahe, ema viáchucaini Abraham títsirijicavapa. Máijaracapa ema Melquisedec eta diésmuri tayehe eta maganareruanahi nayehe ena mánarana. Étahi eta mámahuhí me Viya. Ema Melquisedec, aquenucahi éma tayehe eta avasare ticaijare Salem. Eta máijare, te véchajiriruva ticaijare: “Ema Rey máuriquenehi, tájina táichava tamutu te mávasa”. ³ Ema maca Melquisedec, eta majurusirahi, vahi táimaticarehini nájahahipuca ena ticachichanahi, nájinavare majaneanaina. Váhivare táechacare eta máuchusira éta ena máepenirahi. Énerichuvare, nájina ema máitsivainahini ema Melquisedec. Eta matuparahahi, ene macahehi puiti ema Machicha ema Viya, nájina máitsivainahini. Máichecuaraquirehi eta mávacure tiyaseurahi.

⁴ Nuvaraha epanerequeneha. Ema maca Melquisedec ticapichupanahi maicha ema Viya. Eta tacahe, ema viáchucaini Abraham máijaracahi eta diésmuri eta maganareruhi nayehe ena réyeana máitajaruanahi. ⁵ Acane, matiarhihi ema mámariequenéni ema Abraham, ticaijare Leví. Te táequenepa, matiarhihi ema mámariequenéni ema Leví, ticaijare Aarón, maparapehi ema Moisés. Tásiha, ema Moisés manacapa eta vanairipi, tatuparacahi namutu ena mámariequeneana ema Aarón, tiyujaracarahianayare éna. Tavanecahi ticobrarecanayare eta diésmuri eta navachayare ena najaneanarichuhi, mámariequenéna ena Abraham. Nájina tacaitiruinahini.

⁶ Émasera ema Melquisedec, vahi mámarinahini ema Leví. Majacapahisera eta diésmuri mayehe ema Abraham, te tamutupa eta mayujaracarahi éma. Tayanapane tímijachavahipuca ticunachacarepanahi ema Abraham táichavenehi eta máijararuanahi ema Viya eta mayehe ema Abraham. ⁷ Eta tacahe, vimutu vecha víti, mácani tiyujaracarahi ema apana, éma ticunachacarepanahi mayehe mácani mayujaracahiquenehi.

⁸ Tacahe, ena apamuriana tiyujaracarahiana tépenana-

paipahi, tásihasera namutu ticaitsivanapahi. Émasera ema Melquisedec vahi macaitsivahini. Puiti eta Sagrada Escritura táechajisihahi éma, máichecuaraquire eta máitaresirahi. ⁹ Émaripa ema Leví énapa namutu ena tiyujaracarahiana mámariéqueneanáinihi, natuparahaichuhi náicuchihi eta náuchusirayare mámariéqueneanayare ema Abraham. Tásiha, tímicutijiricavahi éna apanava navachachahi eta diésmuri ema Melquisedec te jena sache eta mavachachirahi ema Abraham. Énarichuyarehini najacapaya eta diésmuri.

¹¹ Ena tiyujaracarahiana mámariéqueneanáinihi ema víyahaini Aarón, éna tímítucanahi ena achaneana eta vanairipiana májureanahi ema víyahaini Moisés. Váhisera naratahaimahi napamicavaca ena achaneana náitaucha tamutu. Taicha te náitauchapucaini, váipapucaini tacucamunuihi ena apana tiyujaracarahi macutiyairehi ema Melquisedec, vaipa mámariéqueneháini ema víyahaini Aarón. ¹² Émasera ema Viya máechajisihahi ema apana tiyujaracarahiyare matupararayarehi. Émapa tímechahaviyare eta máitsivachirayare eta viyanihayare mayehe. ¹³ Jararihi puiti eta apana. Taicha ema Viáquenu Jesús, vahi mámariéqueneháini ema Aarón. Éma, máchucaini ema Judá. Te nataracu namutu ena majaneanaini, nájina émanainihini mayujaracarahihini. Ema Moisés vahi máechajisihahini matiarhiyare ema tiyujaracarahiyare, mámariéquenehi ema Judá. Émasera ema Jesús táechajisihahenehi eta Sagrada Escritura eta émairyare tiyujaracarahiyare.

¹⁵ Tacahe, vímatiequenehahi yátupi eta máitsivachirapa ema Viya eta viyanihayare eta mayehe, taicha ema arairuyare tiyujaracarahi, tacamunuihi eta macutiyairehi ema Melquisedec. ¹⁶ Taicha tacahehi eta máechajiriruvahi ema Viya, ani macahehi: “Nunerejicavihi píti, piyaseurahiyare. Nutuparacavihi péchajurahiyare nayehe ena achaneana. Máitavacacayare eta juca pituparaha, picutiyaire ema nuvanaraini Melquisedec” macahepa. Tásiha, vímatiequenehahi puiti ema ticatuparahahi ema Jesús táichavenehi eta máitaresirayare máitavacacahi. Vahi étaparacainahíni eta nájahahipuca ema máchucaini. ¹⁸ Tacahe, tépaha pa eta vanairipiana náehiruinihi ena náinapureana tiyujaracarahiana, étaripa eta vanairipiana manaquiruanahi ema Moisés. Taicha tájina táratahaini tacuchuhahavihini táichavenehi eta vimáitauchirahini víti. Vahi tacaitecapahavihini me Viya. Puítisera ema arairuhi, tétavacavapa eta macasiñacarévhahi éma. Émapa tacaitecapahavihi mayehe ema Viya.

²⁰ Ena náinapureana tiyujaracarahiana, tájina eta júramentoinahíni eta nacatuparahairahi. Émasera ema Jesús, ticapicahupanahi eta mávacurehi taicha tíjacavahi ema Viya eta juramento, te matuparacapa ema Machicha. Taicha eta Sagrada Escritura táechajisihahi, ani tacahe: “Éma Viya, váhiquene máitsivachaimahi eta máechajiriruvana. Majurachapa, ánipa macahe: Nunerejicavihi píti, piyaseurahiyare. Nutuparacavihi péchajurahiyare nayehe ena achaneana. Máitavacacayare eta juca pituparaha, picutiyaire ema nuvanara

Melquisedec” macahepa. Jéhesare ema Jesús, tétavacavahi eta macasiñacarévhahi eta máitauchiraya tamutu eta máijararuvanahi ema Viya. Tiúripanahi eta arairu viyanihayare me Viya. ²³ Tiuri, eta tayerevahi eta áñoanahi, camurianahi ena tiyujaracarahiana mámariéqueneánaini ema Aarón, taicha ticaitsivanapahi, arairuanapahi éna. Étasera tíchahi ena tépena napaichucha, vahi náimiyanavahini náitarecahíni.

²⁴ Émasera ema maca Jesús, máepenacacahi éma. Nájina nasiapahini máitsivainahini tayehe eta mávacurehi.

²⁵ Tásiha puiti, macarichu éma maratahahi ticatiuchahavihi viti vicasíñanahi éma. Éma, tacaitecapahavihivare me Viya. Máitavacacayarehi eta máechajirahavihi taicha váiparinehi tépenaequenehahavimahi.

²⁶ Tacahehi puiti eta macatuparahairahi ema Jesús téchajirahaviyare. Tétavacavahi eta vicamunuirahi éma, taicha yátupiquenehi santo, matapiravarehi éma. Tájinavare máimatiyahini macapecurahini.

Váhiquene macutihini ena pecatumareana eta napanereruana. Puíticha éma mávihahi tayehe eta anaquehe anuma te machacaya ema Viya. ²⁷ Éma, váhivare macutihini ena apamuriana tiyujaracarahiana. Éna, nacamunuichaha tamutuyarehi sácheana nacapaca eta sárare náijuchaquenyarehi, tásiha nativayarepa tiyaseuchavana tayehe eta napecaturaichu. Te tamutupa, tapaenumavapa nayaseucha tayehe eta napecaturana ena achaneana. Émasera ema Jesús, étaheichuhi eta mavachachirahi eta vípecaturana vimutu, tíjaracavainapa eta máepeni-rahi te crusu. ²⁸ Ena nani ajairana ticatuparahana tiyujaracarahianayarehi taicha eta vanairipiana, étasera vahi nánasihini te juca apaquehe, náepenaequenehapaichucha eta náematanerepianaini. Émasera ema Jesucristo tiyaseurahiquenehi yátupihí. Eta macatuparahairahi tacachuricahi eta nacatuparahairahi ena nani. Máitavacacahivare eta máechajirahívihi. Taicha ema Viya máichahi eta juramento eta matuparasirahi ema Machicha.

Éma Jesús ema vituparahahi téchajirahavihi viti véhicahi eta arairu viyanihayarehi

8 Tiuri puiti, nuvaraha yátupi ácaicutiara eta juca: Ticunachacarepanahi ema téchajirahahi eta viyehe víti. Taicha matiarhihi te anuma, téjacahi éma te mayehe trono te mavaure ema Viya. ² Ánaqui, eta máitauchihahi eta mávacure tayehe eta yátupiquenehi Santuario tiávihahi te anuma, máepiyaruihi ema Viya. Vahi tácutihini eta náepiyaruihi ena achaneana. ³ Namutu ena tiyujaracarahiana, tatuparacahi náimerecayare eta námavahuana éta pa eta nanaquiruvana. Éne macahehi ema Jesucristo, tatuparacahi máimerecaya eta námavahuyarehi, tiúripanahisera éta. ⁴ Ena náinapureana tiyujaracarahiana, nacarichuhi ena ticatuparahana náimerecayarehi eta námavahuana tacamunuqueneanahi eta nayujarasirahi eta te Templo te jena Jerusalén. Émasera ema Jesucristo, tájina vahi mácamunuihahi ticamavahu tayehe eta Templo. Taicha éma, anuma eta mayujarasirarehi. ⁵ Énasera

ena tiyujaracarahiana te juca apaquehe, eta náemamacasareana te nayujarasirana, étachucha eta tavasihi eta tiávihanahi te anuma. Véchahi eta tava-sichucha, taicha ema Viya máemechahi ema víyarahai-ni Moisés eta yátupiquene Santuário tiávihihi te anuma. Ánipa maicha: “Pépiyacayare eta Santuário tavasi-yare picha eta tiávihihi te anuma nímeruvihi te piávi-haipa te cerro” macahepa. ⁶ Émasera ema Jesús, tiúri-panahi eta máematánerepi taicha te anuma eta máechajiuchirahavihi. Éma, téchajiurahi tayehe eta arairu matratune ema Viya. Eta arairu matratune, tiúri-panahi eta táinapurehi, taicha tétavicaivahi eta viúrica-carevayarehi taicha máijaracahi eta máechajiruva ema Viya. ⁷ Jéhesare, eta táinapuiru matratune, vahi náit-ouchaimahi ena achaneana. Taicha te náitouchahi-pucaini, vahi tácamunuhini máijaracahini eta apana arairu. ⁸ Émasera ema Viya, eta máimairahi vahi náit-ouchahini, tiápechavavarepa eta máechajiruvahi, ánipa macahe: “Tatiarihiyare eta sáchevayare tépana-vayare arairu eta nutratune nayehe ena achaneana is-raelítana. ⁹ Vaipa tácutimahi eta natratunehi nayehe ena náchucanaveanaini te jena sache te nuvecu-hainapa te nuvahu, nucuchucavacapa tayehe eta avasare Egipto. Váhisera náitouchahini eta nutratunehi eta nuyehe. Eta tacahe, nujunijiacavacapa. ¹⁰ Eta nutratuneyare nayehe ena nani israelítana te jena sáchevare, nunacachutichayare te nachutiana eta nuvanairipiana. Najiricainapa te nasamureana. Jéheva-rénapa núti nacaiyaqueneyare. Tásiha, éna, jéheva-rénapa nuchichanavequeneanainapa. ¹¹ Vaipa nácomesaimahi ticaimitucasiana nayehe ena nachamuriana, énaripa ena naparapenaveana eta náimatiranuyare. Núti yátupiquenenuhi náquenunuhi. Namutuinaipa tímatinuanayare: ena amaperuana, ena ichanaruana, énapa ena ichavicana. ¹² Énerichuvare nuperdonachavacainapa núti eta napecaturana navainarajivana. Vaipa nécharairicaimahi eta natapira-vanaini” macahepa ema Viya. ¹³ Tacahe, ema Viya, te máechajisiha eta arairu matratune, tépaharipahi eta táinapurénihahi. Éta táemitururipahi. Vaipa tasuapaca-rehini.

Eta santuário tiávihihi te Jerusalén, tavasihi eta táimahi eta Santuário tiávihihi te anuma

⁹ Tacahe, eta táinapuiruhi matratune ema Viya nayehe ena nani náinapureana tiyujaracarahiana, tatiarihihi eta nayeherepichuhi te tiyujaracana me Viya. Jéhesare, te jena Jerusalén eta távihihi eta santu-ario nayujarasirare. ² Ani tacahehi eta táimahi te náepiyacainapa: Eta títapuca cuarto ticaijarehi “Lugar Santo”. Tacapicahuquenehi éta. Éta távihihi eta can-delero éta eta mesa távirare eta pan sagrado. ³ Eta apana cuarto, ticaijarehi “Lugar Santísimo”. Éta tétavi-cavapanapa eta tacapicahuira. Tatiarihihi eta ichape-quene cortina. ⁴ Te tachacaya eta ichapequene cortina, tatiarihivare eta mesa náijuchirare eta incienso, amair-ihá oro. Te tajuhe, tatiarihi eta cajune, amairihavare oro, tacaunaiyahi eta márimeana ajureca eta diez

mandamiento, éta eta cajeta amairihavare oro tacaunaiyahi eta maná, éta eta matsucurupa ema Aarón eta tímarutsicaipahi. ⁵ Te táinahu eta cajune, na-tiarihihi ena apinana ángeleana, ticaijare “querubín”. Eta juca querubín táimahi eta majaraivahi ema Viya. Tásiha, eta napavana táepacuhicahi eta cajune, eta náepusaisirarehi eta iti tavachasarehi eta napecaturana namutu ena achaneana. Jararihivare eta apa-muriana tayereruvanainihi eta santuario, váhisera nu-varaha nájuchahini te juca puiti.

⁶ Eta tacahehi eta táimahi eta náemamacasareana eta te santuario. Tacahe, tamutu sácheana ena tiyuja-racarahiana tisiapaparacanahi tayehe eta títapuca cuarto eta náitouchihaparacahi eta náematane-repiana. ⁷ Étasera eta te apajuhe, táetaviuchahi eta tacapicahuvahi. Macarichuhi tisiapa ema náquenu-muri ena tiyujaracarahiana. Étaherichuvare tisiapa te étana año, mámayarepahi eta táitine eta sárareana. Éta tivachachayarehi eta mapecatura ema tisiapahi, éta eta napecaturana ena achaneana. ⁸ Émasera ema Espíritu Santo mavaraha vímatiequenehaya eta juca. Eta cortina, éta tiávimirauchahi eta Lugar Santísi-mo, vahi táisapahini tisiapana ena achaneana. Púitise-ra vísapacarehi víti eta vítecapauchaya ema Viya. ⁹ Tamutu eta juca tacamunuhi vímatiequenehayare. Eta jena náichasareanahi ena nani tiyujaracarahiana eta nacamavahuirahi, vahi tacanarasinávachahini eta napanereruana ena téneuchavanahi, apaesa tiúriyare-pahini eta náitaresirana. ¹⁰ Vahi étaparacainahini tayehe eta náchaneva, taicha eta námavahusana éna, tinicacareanachucha téracarechucha, éta eta nacasi-pavahuirá te tisiapana tayehe eta Templo. Eta júcana nayeherepianahi, vahi tímiyanavaimahi. Taicha te tépenapa ema Cristo te crusu, máitsivachahi ema Viya eta vítecapauchirayarehi éma.

Tiúripanahi eta yátupiquenehi Santuário tiávihihi te anuma

¹¹ Púitiserá, tímerrecavapa ema Cristo. Jéhevare éma, yátupiquenehi tiyujaracarahi eta viyehé. Tétavicaivahi eta táuriva eta viáchanevana máicha. Eta Santuario te anuma távihihi eta mayujarasirare, vahi tayehe ena te juca apaquehe tamauriquenehi. Te jena, tamutu tiúri-hi, tipachinahivare. Tétavicaivahi eta tacunachacareva. Tacachuricahi eta santuario nayujarasirare ena apa-muriana tiyujaracarahiana, náepiyaruchucha ena vicutiqueneana achaneana. ¹² Ema Cristo, jéhevare éma mávihihi tayehe eta yátupiquene Lugar Santísi-mo te anuma. Vaipa mámvahuhini eta táitine eta sárareana chiqueru, chívanahipucaini. Eta má-mavahuhi éma, étaquenepa eta máitine. Étaherichuhi máicha éma. Vimutuhisera viti macuchucureanahi. Tásiha, máitavacacaipa eta vítaresiraya. ¹³ Ena nani tiyujaracarahiana náepusasapaicarichaha te náinahu ena nachipejiqueneanahi. Eta náepusasapairuhi, eta táitineana eta toro étapuca eta chívachicha, éta eta tsimapama tayehe eta esena chiqueru náijureasa. Eta júcana, tépachinachinavacahi eta náqueheana, apaesa

táisapacarepa nasiapa tayehe eta Templo. ¹⁴ Étasera eta máitine ema Cristo ema matapiravarequenehi, tétavicavahi eta táitupajijiasiravahi. Tacachuricahi eta náepusasapairuhi ena nani tiyujaracarahiana. Taicha taratahahi tacaepaha tamutu eta vipecaturana, viperdonachacarepa táicha. Tímicutijiricavahi tisipacavahi tamutu eta vipanereruanaini tamaeperajiquenehi, étaripa eta tímicapacahavivarehini. Puítisera eta vítaresiraya, émainapa vícaemataneacainapa ema yátupiquenehi Viya. Ema Espíritu Santo máetumechahi muraca ema Jesús eta máijarasiravahi tímicapacava te crusu, taicha mavarahahi eta mámavahuyarehi me Viya.

EMA JESUCRISTO, ÉMA YÁTUPIQUENEHI ABOGADO ETA VIYEHE

¹⁵ Puíticha ema Cristo, éma yátupiquenehi viyehe abogado, téchajiurucavahi tayehe eta táequeneruhi matratunehi ema Viya. Eta máepenirahi ema Cristo, mavachacharipahi tamutu eta vipecaturanaini viti máichuhaqueneanahi éma: viti, énapa ena náinapureanaini tijacapanahi eta táinapurénihi matratune ema Viya. Tásiha, yátupihi eta macuchucuiravahi, máijaracavahi eta vítaresiraya máitavacavarehi. ¹⁶ Nuvaraha nímicutichinahe: Mácani achane te manaquicahi eta testamento, májuchapa eta mavarairahi máijaracasichavacavarehi ena machichanaveana te máepenapapuca. Eta tasuapacarevavarehi, eta ley tacamesaequenehayarehi tacayasesereru te yátupipuca tépenaripa ema achane. Te yátupihi tépenaripahi, eta testamento tisuapacarehi. ¹⁷ Vuíchahasera tasuapacarehini eta testamento, te vuíchahahi tépena ema maca tépiyacahi. ¹⁸ Tacutiquenehi, eta táepaniravahi eta táinapuiruhi matratune ema Viya, tacamunupa tépena eta sárareana, apaesa navehaya eta táitine. ¹⁹ Ema víyahaini Moisés macametarapipa tamutu eta vanairipiana nayehe namutu ena achaneana. Tacahe, mavehapa eta titsi lana máitiapuschapa eta yucuqui, máepusasapaisihayarehi eta ítiama, táitineana eta chiqueruana, chívana. Tativa máepusasaca eta libro tíamahi eta vanairipiana. Máepusacavare ena achaneana náurujiruvanahi. ²⁰ Tacahe, mametacavacapa éma: “Eta juca ítiama népusaruhehi, eta táicutiara eta íjarasiravahi ítauchayare tamutu eta matratune ema Viya eta eyehe éti” máichavacapa ema Moisés. ²¹ Énerichuvare ema víyahaini Moisés máepusasacavare eta ítiama te tapaja eta santuário étapa tamutu eta náemamacasareana te nayujarasirana. ²² Taicha tacahehi eta vanairipi: Ticaepusahavarehi te iti tamutuyaréni eta náemamacasareanahi eta nayujarasiravarehi, náepachiasihayarehi. Taicha te vahi tacuepusaicavahini eta iti, váhivare tacuepahahini eta pecatuana.

ETA MÁITINE EMA CRISTO TACAEPAHA ETA PECATUANA

²³ Tacahe, eta juca náemamacasareanahi ena nani, tacamunuhi náepusasacavarehi eta nayujarasiravarehi

apaesa tapachinavacahini. Eta santuário te Jerusalén náepiyaruhi ena achaneana étapa eta náemamacasareanahi, náicutipaqueneanahi eta tiávihanahi te anuma. Étasera eta Santuário tiávihahi te anuma, tacamunuhi eta apana iti tasivachaquene, tacachuricavarehi eta iti náepusaruhi tayehe eta santuário tiávihahi te juca apaquehe. ²⁴ Ema Jesucristo, tájina máimatiyahini mayujaracahini eta te jena santuário te juca apaquehe. Étaquenehisera masiapa eta mayujarasiravare eta te Santuário tiávihahi te anuma. Puíticha matupihamirauchahi ema Viya eta mayaseuchiravahi víti. ²⁵ Ema maca tiyujaracarahi te juca apaquehe, áñopahi eta masiapura tayehe eta téqueneha cuarto Santísimo. Ticamavahupahi eta táitine eta sárare, vahi máitinénarichuhini éma. Émasera ema Cristo, étaherichuhi eta máepusaisirahi eta máitine. Vahi mápepejiricavahini te áñoana. Te mápepejiricavahini, énerichuhivaréni tiápepejicavahini eta máepenirahi puiti juca táepaniravahi eta apaquehe. Ema Viya mapanerequenehapa eta táichararacavarehi tamutu. Te máimahapa tiuri, mavanecapa ema Machicha te juca apaquehe. Tímitecahi eta macaepahairavarehi eta pecatu, máijarasiravaripa eta máepeniravarehi. Étaherichuhi máicha. ²⁷ Víti achaneana, eta víchararacavahi eta vítaresirahi, étaherichuhi eta vépeniraya vimutu. Te táequeneha, járajapainapa eta víyaseserehiyare. ²⁸ Énerichuvare, eta máitaresirahi ema Cristo, étaherichuhi eta máepenirahi te crusu eta macaepahairavare eta vipecaturana viyehe viti camuriqueneana achaneana. Yátupisera tiápechavaya tímerecava. Váipasera étaimahi tímiteca mavachachaya eta pecatuana. Eta tímitecayare éma, tépanahavivarepa viti véhicanahi vicuchapanahi éma eta macuchucuiravarehi.

ETA MÁITINE MÁEPUSAIRUHI EMA CRISTO, TACARICHUHI TARATAHA TEPACHIAHAVIVARE

10 Eta mavanairipiana ema Moisés, étachucha táicutiarahi eta arairuyarehi viyanihayare me Viya, eta tiúrichavivarehi. Ticutihi eta tacuna eta yucuqui. Vahi tánasihini máitavacacainahini eta mavanairipiana, taicha vahi táurichahini ena achaneana nácani tivarahanahi ticaijuheana ema Viya, taicha váhivare nasamavahini eta náuchucuirahi, tayanapane nápepejiricavahini te áñoana eta nacapasirahi eta sárareana. ² Te yátupinahini táurichavacahini eta náichirahi eta nayeherepi, vahi nacuaepepejiricavahini nacamavahuhini ena tiyujaracarahiana, énerichuvare ena achaneana tisamavanaripahini eta náuchucuirahi. ³ Taicha tacamunuhi nápechava te áñoana eta nacapasirahi eta sárareana, taicha tiápechavana ticapecaturanahi. Étaripa eta táepeniranahi eta sárareana táemecharairicavaca eta nacapecaturairaripa. ⁴ Taicha eta táitineana eta toro, étapa eta chivu, yátupiquenehi váhiquene táratahaimahi tacaepaha eta pecatuana. ⁵ Étasera te tíucupaicayareipahi te juca apaquehe ema Cristo, ánipa macahe mayehe ema Maiya: “Píti Tata, vahi pácamunu eta nucamavahuhini nunaquica-

vahipucaini eta piyehe, táitinehi eta sárareana. Píti píjaracanuhi eta juca náquehehi. Váhiserá táemepuru-recavaimahi eta píjarasiranuhi. Eta náquehe tisuapaviyare jácani pivanesiranuya. ⁶ Váipavare pácamunu eta nacamavahuira ena achaneana eta sárareana, náijuchahini te pimirahu, táimicapachahini eta tacaepahairayarehi eta pecatuana. ⁷ Núti, tímitecanuhi puiti nítauchayare tamutu eta pivarahaqueneanayare eta nuyehe, piti Tata. Nusuapaviyare te tamutu eta pituparasiranuhi tacajuquenehi eta te Sagrada Escritura” macahepa.

⁸ Tiuri puiti, nuvaraha ecaicutiarayare eta vaipa mácamunuhini ema Viya, váipavare máurica nácamavahuhini eta sárare náijuchahipucaini ena achaneana, navarairahi táepahayare eta napecaturana, tayana-pane nayeherepichucha eta náitauchirahi eta vanairipiana. ⁹ Énerichuvare, nuvaraha epanerechavare eta juca máechajiriruva ema Cristo: “Tímitecanuhi puiti nítauchayare tamutu eta pivarahaqueneanayare, piti Tata”. Eta tacahe, vímatiequenehahi vaipa tácamunuhini eta táinapure nayujarasirahi ena achaneana. Taicha ema Viya máitsivachahi eta apana, arairupa, taicha ema Cristo macarichuhi máitauchahi eta mavarahaqueneana ema Maiya. ¹⁰ Jéhevare, ema Viya tépachiacahaviripa máichavenehi ema Cristo, eta masuapirahi máitauchirahi eta mavarahaqueneana ema Maiya, máijararecahi eta máquehe eta máepeninahivihi. Étaherichuhi máicha, vahi mápepejiricavahini.

¹¹ Namutu ena nani tiyujaracarahiana vahi nanarahahini. Tamutuhi sácheana ticamesavana nanacahi eta námavahuana. Vahi táechuquihahini eta náichirahi eta juca. Tájinasera váhiquene tacaepahahini eta pecatuana. ¹² Émasera ema Jesucristo étaherichuhi eta máichirahi. Váhiquene mápepejiricavahini. Tacahe, téjacaripahi te mavaure ema Viya. ¹³ Énerichuvare puiti eta máejasiraipahi, macuchapavacaripa eta macaepuyusiraya ema Viya te mamirahu ena ticatianacanahi éma. ¹⁴ Taicha eta máepenirahi, eta má mavahuhi me Viya eta máquehe. Tétavicavainehi eta tajacapacarevahi me Viya eta máepachiasihahaviyarehi viti máichuhaqueneanahi. Váhiquene tacamunuhini mápepejiricavahini. ¹⁵ Ema Espíritu Santo, étarichuhivare tacutihi eta máechajiriruvahi, títametacahivihi. ¹⁶ Ani macahehi: “Eta nutratuneyare arairu nayehe ena nani te jena sácheyare, níjaracavayare nunacasamurechayare te nasamureana eta nuvanairipiana. Najiricainapa te napanereruana”. ¹⁷ Ánivare macahe: “Yátupina eta nucaepahairayare eta napecaturana. Vaipa néchaimahi eta natapiravanaini éta pa eta navainarajivanaini” macahepa. ¹⁸ Tacahe, nuvaraha ecaicutiara eta juca: Te yátupihí táepahairahi eta pecatuana eta má mavahuhi, vaipa tácomesahini tápepejiricavahini nacamavahuhini ena apamuriana.

Vicasiflavayare eta vicaijuheiraya ema Viya

¹⁹ Tacahe, nuparapenaveana, vácasiñava yátupi eta vítecapauchirayare ema Viya tayehe eta mávihahi Santísimo, táichavenehi eta máepachiasirahivihi te mái-

tine ema Jesucristo. ²⁰ Véhicayare eta juca arairu achene mavejiaruhi, yátupi eta tacaijuhériahi me Viya. Tájinapa táichejimirauchahavivini taicha mavejiacahi tamutu ema Cristo, eta máepenirahi te crusu. ²¹ Tacahe éma, yátupiquene tiyujaracarahi eta viyehe taicha émaquenehi téchahi namutu ena machichanaveana ema Viya. ²² Eta tacahe, tatupiruvayarehi eta visamureana eta vicaijuhériaya ema Viya. Vácasiñavaini eta mayehe, vahi véñamavaimahi taicha éma masipacaripahi eta visamureana apaesa tacuija vitapiravaina tayehe eta vipecaturana. Tájinapa eta táechipejicahavivini eta vipecaturana, tímicutijiricavahi vicavahini eta te tapachinaquene une. ²³ Eta tacahe, vímijanava vétumechava eta véhisirahi. Vahi viyacujimahi. Yátupina eta vicuchapira eta vícuchihi taicha ema Viya máitauchayare tamutu eta máijararuvahi eta viyehe. ²⁴ Puiti vétumechavayare vímicatajiricacayare eta tápajusiravaina eta vémunarivanaya. Vímitucacayareva eta víchirayare eta táuriqueneana. ²⁵ Váhivare viyacujimahi eta víurujisiravana. Vahi ecutihini ena víchamuriana, tinerejicavanahi mayanarahanahi te víurujicava. Vétumejiricacayaresera, tavetijipa puiti eta vímairapa eta tánehirapa eta masacheraya ema Viáquenu eta machavirayare.

²⁶ Taicha te ímijanavaichuchapuca icha eta pecatuana, tayanapanehi ímatiripahi puiti eta yátupiqueneana, eti émepururecaripahi ema Cristo eta ímicapasirahi táichavenehi eta epecaturana. Páurehesami, taicha nájina apanainahini ecasiñahini. ²⁷ Ena nani námepururecaripahi ema Cristo, tétavicavahi eta tamuracavaya eta náicuñayare. Tisiapanayare eta táíñehiquene yucu táijurequene. Eta juca eta náicuchihi návihayare ena ticatianacanahi ema Viya. ²⁸ Tacutihi acane eta macaicuñaira mácani téjecapavahi tayehe eta mavanairipiana ema Moisés. Te natiarhihipuca apinanahi, mapananahipuca ena testigoanahi, tímanahahi eta máejecapiravahi, tatuparacahi nacapacavanearehi ena tuparairucana. Vahi tijapanucaremahi éma. ²⁹ Tásiha, tétavicava muraca eta náicuñayare ena témepururecanahi ema Machicha ema Viya, ¿masi? Taicha námepururechavare eta máitine máepusairuhi, nacaecahivare ema Espíritu Santo, námepururechavare eta máemunasiravacahi ema Viya. Váhivare návarahahi náimati eta máitine máepusairuhi, étara vivachahi eta majacapirahaviyarehi ema Viya. ³⁰ Vimutuhi vecha eta máechajiriruvahi ema Viáquenu, ani macahehi: “Núti tituparacanu nícuñasiravacayare. Nútichucha némecharecavacayare éna”. Tásiha, ánivare macahehi: “Ticayaserehianayare ena achaneana te numirahu”. ³¹ ¡Tipicacarequenehi eta náicuñayare ena témepururecanahi te mamirahu ema Viya, tamutuquene máimaha!

³² Németeacaserá ímijanavayare éti tauri eta éhisirahi. Écharichuhi eta ítaresirahi cape juca, te épanavainapa eta ejacapirahi eta juca tajarahiquene máechajiriruva ema Viya. Ichapemurihi eta ecatajivairahi naicha ena ticatianacaheanahi. Ecamichahiserá éti. ³³ Etiarhihi éti ecaumehacasihi ecaehanahi te

namirahu ena achaneana. Etiaríhivare éti ímicatacanahi tayehe eta náichavaquenevanahi ena ticaehanahi. ³⁴ Ejanpuhivare nácani ticaeratanahi te cárcel. Tacutiquene ecurisamurechavachucha eta naverejisi-raheanahi eta ímahaqueneana, taicha échahi éti tatiaríhihi eta ímahaqueneanayarehi te anuma. Tétavíjavahi tíurípanahi tayehe, máitavacacahi éta. ³⁵ Tásiha puiti, vahi ecuyacujihini. Étumechavaserá eta ímitusiráhi eta máechajiriruva ema Viya. Éta tíuríchaheyare, ejacapayare eta mavachachiraheyare ichapequeneya. ³⁶ Ecayehechahavare paciencia. Ímíyanavavare ítaucha eta mavarahaquenehi ema Viya, tásiha yátupina ejacapainapa eta ícuchi eta mayehe. ³⁷ Taicha eta Sagrada Escritura, ani tacahehi: "Vaipa máyeremahi márjapainapa ema Cristo ema vicuchapaquenehi". ³⁸ "Nácani natupiruvahi eta nasamureana, ticasíñanuanayarehi eta náitaresiráhi. Énasera nácani tichavacuejechavanahi, nucaerajicavacayare táicha" tacahepa. ³⁹ Vítisera vahi vácutimahi ena tichavacuejechavanahi, énjíjivaya tímitaequenehavanayare. Vítisera víti vímíyanavanahi eta vicasiñavaira me Viya, vicuchucuhayarehi eta víachanevana táicha.

Tétavíjavaya eta víurícareva te vicasiñavahi mayehe ema Viya eta vítaresira

11 Te yátupi visuapa eta máechajiriruva ema Viya, vicasiñayare éma, vicasiñavavare eta mayehe eta máitachirayare tamutu eta máijjararuvanahi, tayanapane vuíchaha vímahaimahi. ² Ena víachucanaveanaini, tétavíjavahi eta nasuapajiraivahi. Macunachavacahi ema Viya taicha eta nasuapajiraivahi.

³ Tacutiquene, te visuapa eta máechajiriruva ema Viya, vímatiequeneha eta máepiyasiráhi acane eta juca apaquehe, tájinarichahasera eta táimahacarehini. Visuapahi tamutuhi máitacha eta mapanereruhi, máetupirisiráhi tamutu eta vímahaqueneanahi puiti.

⁴ Émarípa ema víyarahaini Abel, eta masuapajiraivahi mayehe ema Viya, tétavíjavahi eta tajacapacarevahi eta mámahavahi mayehe ema Viya, tacachurícahi eta mámahavahi ema maparape Caín. Tásiha, ema Viya macametarapíhi eta majacapacarevahi ema Abel. Puíticha, májinarípahínéni, ánaquiaparípahehi eta máepeniráhi, tanasíhisera eta tacunachacareva eta masuapajiraivahi.

⁵ Éta ema masuapajiraivahivare ema víyarahaini Enoc, vahi máepenanimahini te juca apaquehe eta mayaniraya te anuma. Tamutuhi eta máquehe mámahí tayehe eta apana vítaresira, eta mámirahi ema Viya. Eta Sagrada Escritura táechajisíhahi eta macurísamurechiráhi ema Viya. Táitusiava, mámapa éma. ⁶ Tásihasera víti, te tájínahi eta visuapajiraivainahini me Viya, váiparínehí vicurísamurechaimahi éma. Eta vicajúheiraya éma, tatíyavarehi tacamunu yátupina eta vicasiñavaira mayehe, eta majacapira-hávaya, víurícarevare máicha.

⁷ Émarípa ema víyarahaini Noé, ticasíñavahi me Viya. Tásiha, tíjacapacarepa. Taicha masuapahi eta mavane-casívahi máepiyasiráyarehi eta ichapequene pacure,

eta macuchucuíyavayarehi éma, énapa ena machichanaveana tayehe eta ichapequene une. Tájínachíhanéni ecutiararenahini eta taquívairayarehi. Máichuhavacavarepa ena apamuriana achaneana nasiapavare. Tícaícuñanapasera, taicha eta namasua-pirahi.

⁸ Émapa ema víyarahaini Abraham, masuapahivare eta máichuírahi ema Viya, máijjarasírayare eta apana apaquehe mávasayarehi. Tacahe, ema Abraham tíúchucapa te mávasaini, váhínéni máimatíhíni távíhapuca eta macajúhehí. Tícasíñavahísera me Viya eta mámirahi. ⁹ Eta máítecapirahi, tímíyanava eta macasíñavairahi me Viya. Manasípa macavasahi eta apaquehe máijjararúhi ema Viya, tayanapane vuíchaha mayehenahi eta apaquehe. Tájinavare mapenainahini. Cárpachucha eta mapenahi. (Ema machícha Isaac, ene macahehi eta máitaresiráhi, émapa ema mámiri Jacob. Taicha éna, éneríchuvare natuparacahi eta juca apaquehe návasayarehi.) ¹⁰ Émasera ema Abraham, vahi máéñamavahini. Yátupíhi eta macasíñavairahi, tíuchapaváichucha eta máijjarasírayare ema Viya eta mávasayare máepahacacayarehi eta tísíhaquene-yarehi te mavahuana ema Viya, máetupírírúhi tamutu.

¹¹ Ésurípa, esu Sara tícasíñavahivare mayehe ema Viya, máitachayarehi eta máijjarasírava eta sucachíchairaya, íchavícachícharípahínéni. Macherúhivare ésu. Máijjarachísera ema Viya eta suchícha taicha eta susuapirahi eta máitachírayare ema Viya tamutu eta máijjararuvanahi eta suyehe. ¹² Tacahe, ema Abraham íchavícachícharípahivare, mapáenumavapa tícachícha. Tásiha, tíuchucanapa ena camuríqueneana mámaríé-queneana. ¡Tétavíjavahi eta nasímutuvahí! ¡Vaípa natupachacarehíni!

¹³ Tacahe, namutu ena nani néchajisíhaqueneana, tímíyanavana eta nasuapirahi ema Viya tamutu eta náitaresíranahi. Tétavíjavahi eta nacasíñavairahi eta máitachíraya eta máijjararuvanahi. Te navapureana, náimahapa eta návasaqueneyarehi. Tásiha, vahi náetupírícahíni eta nanasírayare te juca apaquehe. Navarahaípahe náítecapauchavaneyarehi eta arairu avasare natanujírírúhi. ¹⁵ Éta tímicáecherachíhi vahi nacatíequenehahíni eta apaquehe návinénihi, taicha vahi náechajisíhahíni nachavahíni. ¹⁶ Natanucahísera eta arairu apaquehe tíurípanahi, eta tíávíhahi te anuma. Eta tacahe, tétavíjavahi eta máurisamurevahi ema Viya eta nayehe, táichavenehi eta nacasíñavairahi eta mayehe éma. Taicha máícuachavacahi eta arairu návasayarehi, émairahi nacáiyaquenehi éma.

¹⁷ Apanavare eta máímerechírahi ema Abraham eta masuapajiraivahi, te tícavanahípa eta macapasírayarehi ema machícha Isaac, máíjuchírayarehi eta macamavahíraya me Viya. Vahi macatíequenehahíni ema émanaracavahi machícha. Taicha yátupíhi eta masuapirahi ema Viya eta máechajiriruva, ani macahehi: ¹⁸ "Ema píchícha Isaac, níjaracayare ena camuríqueneana mámaríéqueneanayare". ¹⁹ Taicha ema Abraham máimatíhi eta tamutuírahi máíturíequeneha ema Viya. Maratahahi macaechepuca ema Isaac te

táequenepa eta máepenirahi. Téhesera te macapacayarepaini ema machicha, ema Viya téchajicapa. Vaipa máisapahini eta macapasirayarehi, taicha máimahapa yátupihini eta masuapajirairavahi ema Abraham. Tásiha, tímicutijiricavahini máechepurénahini ema amaperu Isaac.

²⁰ Émapa ema Isaac, yátupihivare eta macasiñavairahi me Viya eta máitachirayare eta máechajiriruvana. Te ichavicapa, mabendiciónchapa ema machicha Jacob émapa ema maparape Esaú, mavarairahi najacapayare eta táurinaqueneana máijjararuanaya ema Viya.

²¹ Émaripa ema Jacob, yátupihivare eta macasiñavairahi me Viya. Te tiánehipa eta máepenirayarehi, énerichuvare mabendiciónchapa ena apinana machichanaveana ema José, mavarairahi najacapayarehi eta náicuchiana. Te titapiricapa tamutu, téneuchavapa me Viya, ticayupaicaripa eta te mayupairiqui.

²² Émapa ema José, te tiánehipa eta máepenirayarehi, macaechajiriruvapa eta náuchusirayare ena israelítana tayehe eta apaquehe Egipto, nayanirayare te apaquehe náicuchihi. Eta macasiñavairahi mayehe ema Viya, macavanairipipa eta náunasirayarehi eta máperana éma, tásiha, námayarehi te náuchucapa.

²³ Énerichu eta nasuapajirairavahi ena ticachichanahi ema Moisés, ticasíñavanahi mayehe ema Viya. Vahi napicahini eta mavanairipiana ema rey eta nacapajisirayarehi ena amuyana ajairana. Eta náimairahi eta máurinavahi ema amuya, nayumurucapa éma. Mapana caje eta nayumurujirirahi. ²⁴ Tásiha, náitucuhi eta sucajurisirahi esu esena rícoquenehi, taicha ésu, machichahi ema rey.

Tacahe, ema Moisés, te ichanarupa énerichuvare tisuapajirahihi. Vahi macatiequenehahini eta majunijiasirayarehi esu ticajurucahi. ²⁵ Váhvare mapicarahini eta macatajivairayarehi eta macachanerayare ena majaneanana machaneranahi ema Viya. Vahi tavayuacahini jácani tájiparacana pecatuanahi te apaquehe. ²⁶ Ticasíñavaipahi éma eta tatiarirayare eta máimahaqueneanayare táitsivanayare eta macatajivairaya táichavenehi eta macatiuchirahi ena machamuriana, tacutihi eta macatiuchirahavihi víti ema Cristo. Tájinahinéni mácamunuhini eta táimahaquenehi tayehe eta avasare Egipto.

²⁷ Táichavenehivare eta masuapajirairavahi ema Moisés, vahi mapicarahini eta masemirayare ema rey tayehe eta Egipto eta macuchucuiravaca, má-mavacahi ena machamuriana israelítana. Tétumechavarichucha taicha ticasíñavahi eta majaneasiravacaya ema Viya, tayanapane máimahasi ema Viya.

²⁸ Eta masuapajirairavahi ema Moisés, máitachapapa eta mavanairipi ema Viya. Mavanecavaca ena machamuriana nacapacayare eta uvesachicha, nátsiquiriacaya eta iti te tapaja eta napenana, apaesa vahi macuesirujicavaca ema ángele ema tiámayarehi eta náepenira ena náechavimuri te jácani peti.

²⁹ Énaripa ena machumariana ema Moisés, eta nasuapajirairavahi, naratahahi nánueca eta ichape Mar Titsi. Témunahiricavahi tiájiji te túpiricuha eta nayanihayarepahi. Tásiha, ena masuntarurana ema rey te Egipto, navarahavarepa tiánuecana. Tichavapasera eta une. Téricanapa namutu. ³⁰ Táichavenehivare eta nasuapajirairavahi ena israelítana, tiáquipaicavapa naicha eta tayuchamarana eta avasare Jericó, te jena siétequenepa sache eta návicuruarasirahi eta avasare.

³¹ Ésuripa esu Rahab túhusini, eta susuapajirairavahi, vahi suépenahini te tépenaracanapa ena masuapajirairahanahi. Taicha ésu sucatiuchapa ena vanairucana me Josué.

³² Nuvarahahineni numetacahe tamutu eta nasuapajirairavahi ena apamuriana: ema víyahaini Gedeón, ema víyahaini Barac, ema víyahaini Sansón, ema víyahaini Jefté, ema víyahaini David, ema víyahaini Samuel, énapa ena víyahaini profetanaini.

Nararihivare ena apamuriana, tétavicavahivare eta nacasiñavairahi mayehe ema Viya. Váhisera nunaca támutu te juca eta náijareana. ³³ Eta nasuapajirairavahi éna, nararihihi ena títahacanapahi ena nánarana te avasareana. Nararihihi ena apamuriana aquencanahi, tatupiruhi eta nagobernachirahi eta návasana. Ema Viya, eta majaneasiravaca ena apamuriana, máeratajacachavacahi eta tajacana eta táíñehiqueneana sárareana. ³⁴ Ena apamuriana, macaemahainehivare eta táijurequene yucu te jórnua. Ena apamuriana, macuchucuhavacahi te navaraha náechatinucavacayarehi ena nánarana. Nararihivare ena matumerahanahi, máetumechavacahisera eta nacaemataneasirahi éma. Ena apamuriana, tétavicavapa eta náitupajijiasiravapahi tayehe eta guerra, náitahavacapaipa eta ichapequeneana ejército ena nánaranahi. ³⁵ Natiarivare ena esenana, eta nasuapajirairavahi, mápechava máimichava ema Viya títarecana ena najaneananaini náepenaqueneanahi. Natiarivare ena apamuriana náemépenahi eta nacatajivairasamihi. Nacamichahisera tamutu taicha eta nasuapajirairavahi, namavarairahi náinajiacahini ema Viya, navarairahivare náimahayarehi eta táuricacarequene eta náitaresirayare te náechepucapa.

³⁶ Natiarivare ena apamuriana, ichapemurihi eta nacaecahirasamihi, ticaestanahivare, táimitiacavahivare te cadena tayehe eta cárcel te nacaerataiyapahi.

³⁷ Ena apamuriana, natupisiruanapahi te márijahiana eta nacapasirapahi ena achaneana. Ena achaneana, eta návarairahi náiminajicayarehi eta náehisirahi ema Viya, nayuchatihecavare. Ena apamuriana náechatinucavacapahi te espada. Napanajiricavaca ena apamuriana, náimijunavacavarepa te napenana. Tiyananapa témestajiricavanapaipa. Tépacuchavanapa te taparumachichana eta sárareana eta náechuriasirapa eta nacamuiriquene. Tájinapa naviyavapahini taicha eta napaurevavacapaipa. ³⁸ Ena nani páureanasamí, ichape eta napicauchacarevainihi. Vaipa náuriahini eta najunanairisirahi te mávapahiana apaquehe eta tataracuana eta máriana, nacapenajuechapahi eta

enurujuheana. ³⁹ Jéhesare, namutu ena nani néchajisi-haqueneanahi, ticatajivanahi eta náitaresirahi. Majacapavacaipahi ema Viya táichavenehi eta nasuapajirivanahi. Vuíchahasera náijahúchavahini nacaijaracasihini eta náicuchianahi me Viya. ⁴⁰ Taicha mavarahahi éma tihetamurichahaviyarepa viti véquenehanahi visuapanahi ema Jesús énapa namutu éna. Vicuticacayarepa eta viúricacarevayare vimutu.

Vicutiyare ema Jesús eta macamichirahi tamutu

12 Puíticha víti apanavare vicamichayare tamutu eta vicatajivairana, vácutivaca eta nacamichira ena nani náinapureanahi téhicanahi ema Viya. Taicha puiti éna tímararachavianahi víti tájahapuca táicharacavahi eta vipaisirahi víti. Eta tacahe, tituparacahavi vínajicayarehi eta táitiasirahavihi eta tájiparacana, tiámaparaurahiana tayehe eta pecatuana. Tacahe, vicamichayare tamutu, táurivaya eta vicaemataneasirahi ema Viya, apaesa vijacapa eta vícuchihi. ² Vicutiyaeva ema Viáquenu Jesús. Éma, tímitucavahi eta véhiruhi, éma tínapuisinahavivare eta masuapajiraivahi. Tayanapane ichape eta matsirihahi te máimaha eta macatajivairayare eta macaetatairayare te crusu, vahi machavacuejehavahini. Tétumechavahisera taicha máechahi éma tatiarihihi eta táitsivayarehi. Tétavicavahi eta máurisamureva eta máejasirahi te mayehe trono te mavaure ema Maiya.

³ Puíticha éta, epanerequenehayare éhicayareva eta macamichirahi ema Jesús tamutu eta macatajivairahi naicha ena ticatianacanahi. Ene ecaheyare éti, vahi ecuyacujihini, étumechavayaresera eta éhisirahi éma. ⁴ Táitauerevaquene éti, tájinaichaha ímahahini ecatajivahini táimicapacahhipucaini eta ínajiasiraipa eta tájiparacana te juca apaquehe pecatupaire. ⁵ Vahi ecuemitisica eta máemunasirahehi ema Viya te jácani máemecharésiraheana táichavenehi eta machichaheirahi. Taicha ani tacahehi eta Sagrada Escritura: “Pitínuchicha, vahi picueñamava jácani máemecharésiraviana ema Viya, mavarairahi máetupiricayare eta pipanereruana. Váhivare picuinajicava tayehe eta maconsejachiraviana. ⁶ Taicha éma, máemecharecayarehi nácani máemunaruanahi machichanaveanahi” tacahepa. ⁷ Tacahe, ecamichayare éti jácani máemecharésiraheyare ema Viya táichavenehi eta máemunasirahehi eti machichanaveana. Tácuti mácani achane, te matiarahi ema machicha, tímerecavahi eta tacaiyairahi eta mapena eta máemecharésirahi ema machicha, mavarairahi máetupiricayare eta mapanereruana. ⁸ Yátupihhi eta máemecharésirahavi ema Viya vimutu viti machichanaveana. Téhesera te tacuija ímaha eta máemecharésiraheana éma, máimerecaripa éma vahi yátupinahini machíchahénahini. ⁹ Tacutihi eta vijurusirahi víti te amuyahavirichaha. Témecharecavahihi ena ticachichaviana, visuapavacapa táicha. Tásiha, tavetijipa eta visuapirayarehi ema Tata Vicaiyaquenehi apaesa éma tíjaracavayarehi eta táurivayarehi eta vítaresiraya. ¹⁰ Ena ticachichaviana, ánipirichu eta náimitusirahavihi já-

cani eta navarairahi éna viúriyarehi nayehe ena achaneana. Émasera ema Viya, tiúripanahi eta vímitucasivahi mayehe. Éta tiápajucava tiúrichahaviyare. Tépachinachaviyarehivare éta. Mavarahahi vicutiyaehi eta masantuvahi éma. ¹¹ Jéhevere, te tatiarihipuca eta vicaemecharahirana, vahi viúrisamurémahi táicha. Ticatihi visama. Téhesera te vétupiricava táicha, tétavicavayarehi eta viúricacarevaya te visamureana taicha tatupiruhi eta vítaresira.

Tétavicava tavarahacareva te visama eta máechajiriruva ema Viya

¹² Tacahe, nuparapenaveana, nutuparacahe étumechacaca nácani nayacujihpuca. Ímicatacaca eta etupihaira muraca eta éhisirahi. ¹³ Énerichuvare eta ecaijuheira eta me Viya, etanucayare tatupiruina eta ecaijuheira eta me Viya, etanucayare etupiruina eta eyanirayare. Vahi ecuepiñuñuica, machu náevejuca ena matumerahana ena téhicaheanahi te équene. Táuri eta íamiracacaina, apaesa nacaravahuyare náetupirica eta napanereruana, náetumechavavare énajiva.

¹⁴ Tacuijavare ecuechiravainahi nayehe namutu ena achaneana. Yátupina eta epachinavaina te esamureana éta eta iúriya eta ítaresirana. Taicha te vahi tiúrihi eta ítaresirana, vahi eratahaimahi ítecapaucha ema Viáquenu. ¹⁵ Ejaneacavaicha yátupina, machu etiarihipuca eyacujihhi, tásiha émpurureca eta máimicatasirahe ema Viya. Tacuija eta ecueimipananajicava eta esemirana. Machu tapareacavaca ena echamuriana eta evainarajivana, tacuti jácani sucureca máurirahana, tapareacayare eta apana sucureca táurinaquenehi, táimicapacapa. ¹⁶ Nacuijavare te etaracucaveha esu apana esena. Nacuija nacuepuru jácani tipicacacareanahi. Vahi ecucuti ema achane ticaijare Esaú. Eta mavarairahi tíjahúchava tinica, máijararecapa eta máicuchinihi mayehenihi, taicha éma, máechavihi ema maparape. ¹⁷ Écharichuhi éti, te táequenepa, te mavarahainipa majacapa eta mayehe bendición ema maiya, vaipa majacapacarehini, mametainipa tíyahahi. Vahi maratahahini ticajimuyacahini ema maiya.

¹⁸ Éti, tájina étaparacaina eta napisirahi ichapequenehi ena achaneana israelítana, acane te náitecapauchapa eta cerro Sinaí. Eta jara cerro, tatiarihihi eta yucu timuruhi te tápusi. Énerichuvare te távihahi eta timapicuquenehi, távihahivare eta táíñehiquene emarere. ¹⁹ Muracaquene eta machuja ema ángele. Muracavare eta mahu ema Viya eta máechajisiravacahi éna. Ichapequenehi eta napisirahi ena tísamanahi. Eta tacahe, tiyaseserecanapa vaipa macuechajicavacahini. ²⁰ Eta napicacarasiravahi, navaraha tichavacuejehavana. Ichapequenehi eta tapicahucareva eta cerro, taicha tatiarihihi eta muraca vanairipi, ani tacahehi: “Ecapaca nácani achane, jácanivare sárare tiápanapuca te juca cerro. Ecapacavanevarehi te márijahi, te váhipuca ticayuvayarehi te lanza” tacahepa. ²¹ Tacahe, tétavicavahi eta táíñehiva, émaripa ema Moisés ani macahehi: “Nuyayacarenecha

tímicutijiricavaipa eta iámavahuhi me Viya. Éta ecurisamurechirahi éma.

¹⁷ Esuapayareva nácani tímitucaheanahi, evapinavayare nayehe eta esuapajiraivahi. Taicha éna, tijanea-caheanahi eta iáchanevanahi éti. Náechahi éna eta ticayaserehianayarehi te mamirahu ema Viya. Ecurisamurechavaca éna eta esuapajiraivahi, tavapinacarénapa eta nacaemataneasirahena éti. Vahi ecuimipañerechavaca eta eyacujiva, emasuapajiraivapuca.

¹⁸ Eyaseuchanuyare núti te eyujarasirana. Nucasiñavaipahinéni núti táurivaipahi eta nupanereru. Tájinapa níchiravainahini. Nuvaraha níchayare eta táuriqueneana nayehe namutu ena achaneana. ¹⁹ Nuvarahasera eta eyaseuchinanu me Viya, máisapanuhini éma nijahúchavahini nuchavahini eta eyehe.

Ema Apóstole mayaseuchavacahi ena machamuriana me Viya

²⁰ Ema Viya, tétavicavahi eta macanarasirahavihi eta vipanereruana. Éma tétavicavahivare eta máitupajijiasirava taicha macaechepucahi ema Viáquenu Jesucristo te máecari, apaesa émayarehi yátupiquenehi Pastoryare, tijanearahi viyehe viti machichanaveana. Tisipahacahavipa eta te máitine apaesa máitavacacayarehi eta vicachanerayare éma. ²¹ Núti nuyaseuchahe

me Viya, máimicatacahehini ítauchayare tamutu eta mavarahaqueneana, íchirahi eta táuriqueneana apaesa ecurisamurechahini éma te tamutu eta ítaresira eta éhisirahi ema Machicha Jesucristo. ¡Máitavacacayare eta vicunachira ema Cristo! Amén.

Eta táichecuarahui eta natuparacasivahi

²² Nuparapenaveana, nuvaraha nuyaseacahe ácayehéni paciencia tayehe eta juca nuconsejarapihi eta eyehe. Ánipichichahi nájurehi tayehe eta juca nuncartane. Jararihisera camuriqueneana eta apana nuvarahahi numetaruhayarehini. ²³ Numetacahevare ema viparape Timoteo tiúchucuharipa te cárcel. Te máitecapavanepuca éma, nucachaneyarepahi te níteca eta ara eyehe. Nuvarahahi nímahapanaha.

²⁴ Néchajicahe emutu eti ejanearahiana ena vichamuriana. Échajisinanuvaca namutu ena vichamuriana vicutiqueneanahi tisuapajirahianahi te jácani návihahi éna. Ani te juca, nucachanevaca ena vichamuriana náiteruana te Italia. Téchajicaheanavare éna.

²⁵ Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha. Amén.

Tamutupa eta juca néchajiriruvahi eyehe.

Santiago

1 Nuti Santiago, mavanaranuhi ema Viya, mavanaranuhivare ema Viáquenu Jesucristo. Nuvaraha nucaitecapa eta juca néchajiriruva eyehe emutu eti nujaneanana israelítana éjanerepairuanahi te tamutu avasareana.

Eyaseacayare eta ítupajjiasiravaina

² Nuparapenaveana, nuvaraha nuconsejachahe: Te tatiarihinapuca eta ecatajivairana puiti juca ítaresirahi, vahi ecucainajiruva. Evapinavachucha, ácasíñava mayehe ema Viya. Taicha te yátupina ecasiñava mayehe, vahi tiáquipaicahémahi ema Váinaraji. Énerichuva ácamicha yátupina jácani apana táitecapaureheanaya. Ácuti nácani achaneana náitucahi ticaratacavana. Mavarahahi ema Viya tátupiruvahini eta ítare-sirana. Eta tacahe, te tatiarihipuca eta ecatajivairana, eaurisamurechavachucha. Evapinavaya, taicha iúripa-nayare eta iúchucuirayare.

⁵ Tacahe, te tatiarihinapuca eta téchacare, te váhipuca íturuequenehanini, eyaseacayare ema Viya eta ítupajjiasiravaina. Éma, tíjaracaheyare, taicha tájina mayavana éma. Váhivare ticajachahavimahi eta viyaseasirana jácani vicamunuqueneana. ⁶ Yátupina hisera ácasíñava me Viya eta eyaseasiranyare eta ítupajjiasiravaya. Vahi ecueñamava mayehe. Taicha te éñamavapuca, tímicutijiricavaipahi ecutihi eta táepacuruha eta une téquequerecavahi. ⁷ Taicha nararihi ena téquequerecavanachucha eta napanereruana. Vahi étanainarichuhini jácani navarahaquene-yare náicha. Nácani tacahehi eta napanereru, éna tájina máijaracaimahi ema Viya.

⁹ Émaripa mácani vichamuri, te páurehipuca eta máitaresirahi, tivapinavayaresera taicha eta máimicasiraipa ema Viya taicha eta máemunasirahi. ¹⁰ Émaripa mácani vichamuri rícoquenehi eta máitaresirahi, énerichuvare tivapinavayareva, tayanapane títahapuca eta máimahaqueneanahi. Taicha eta vímahaqueneanahi te juca apaquehe, vahi táeñamacarehini, taicha títavayarehi tamutu. ¹¹ Ánipirichu eta táurinajiva eta flureana; taicha te járajapapa eta muracana sache, tacajiyujicapa. Tamutu títava eta táurinajivainihi. Témiricaipavare eta taflurena. Ene macahe mácani ríco, vahi tánasimahi eta máimahaqueneana, tayanapane vahi macuvaraha táitava, máitucahipuca eta macaematana.

¹² Tétavicava eta náurivayare nácani vichamuriana ticamichanahi tamutu eta nátajivanahi. Járajapayare eta sácheanayare eta najacapiraya eta táitsivayarehi

maicha ema Viya, máijaracainapa eta táurivayare eta náitaresirayare, taicha ticunachacareanahi. Tacahehi eta mapanereruhi ema Viya nayehe ena témunacanahi éma.

Máisapa ema Viya eta jácani víchavaquenevanaya, mavarairahi tétupiricahaviyare

¹³ Téhevare tatiarihinapuca eta éjecapiravaya jácani tauriqueneanahi, vahi émaimahi émeteaca ema Viya. Taicha vahi tásihaquenéna me Viya eta juca tájiparacana. Nájinavare mapamiruimahi náichahini eta júcana. ¹⁴ Nácanisera náquipairuvana tayehe eta tauriqueneana, táuchurepa te napanereru tauriqueneana, tásiha navaraha náichayarehi eta pecatua-na. Vaipa nanecapavahini eta náichiraipa. Téhesera te táequenénapa, étapa tivuchayarehi. Tíñehicha eta táimicapasiravacaina.

¹⁶ Némunaruqueneana nuparapenaveana, machu éjecapava tayehe eta juca numetaruheanahi. ¹⁷ Ema Viya, étanarichuhi eta mapanereru. Vahi apanapane-jinahahi eta máuriva viyehe. Éma, tíjaracahavihi viti achaneana eta majaraiva, étapa tamichahuhi eta viáchanevana. Taicha tamutu eta juca táuriqueneanahi vijacapaquenehi puiti, tásihaqueneanahi me Viya. Vahi apaesasajiruinaichuhini eta táurivahi. Jéhevare eta yátupiqueneanahi. ¹⁸ Taicha acane tacahehi eta mapanereruana, mavarairahi vijacapayarehi eta yátupiqueneanahi máechajiriruvana apaesa machichahaviyarehi. Eta máitsivachirahi eta viáchanevana, ticaecherahi máitsivachayarehi tamutu eta apamuriana máepiyaruana te juca apaquehe.

Vímerecavaya yátupi eta visuapirayare eta máechajiriruva ema Viya

¹⁹ Eta tacahe, eti némunaruqueneana nuparapenaveana, nutuparacahecha yátupina tauri eta esamiraina eta máechajiriruvana ema Viya. Vahi ecuijajahúchava esema. Epanerechinava eta échajisiraya. ²⁰ Taicha nácani tisemarairihiana, vahi étainahini náichahini eta mavarahaqueneana ema Viya. ²¹ Puiti te juca vítaresirahi, jararihi eta tavarairahi vipanerechaya tayehe eta tájiparacana, tamaeperajisira eta viáchanevana. Tétavicavavare eta tapamisirahavihi vicha eta tauriqueneana. Puítisera nutuparacahe: Ínajicapa tamutu eta júcana. Ecasamureyareva eta máechajiriruva ema Viya eta ímitucasivanahi. Yátupina esuapa. Jéhevare, éta ticuchuchayare eta iáchanevana.

²² Ítauchayare eta tametarapianahi eta máechajiriruvana ema Viya. Vahi tacuejecapava eta epanereruana, machu ímijachapuca taratarichuhi eta esamararasirahi. ²³ Vahi ecucuti nácani nasamarararuchucha, tásiha vahi náitauchahini eta tavanairipihi, tímicutijiricavaipa nácani tímacunachavanahi te espejo. ²⁴ Tásihasera, vahi nasipacahini eta náimahaquenehi nachipeuquivahi. Tásiha, tiyananavanepa, náemitisicavanepa. ²⁵ Étisera ecutiyare ena natupiruvanahi eta nasamirahi táuriva eta yátupiqueneana vímiturapiana tásihaqueneanahi me Viáquenu. Vahi ecuemitisica. Tásiha, ítucayare enerejica eta táuriqueneana, esuapayareva eta ímitucasiqueneanahi. Tásiha, tétavicavaya eta iúrivaya táicha.

²⁶ Nararihipuca nácani tímijachavanahi religiósana. Téhesera vahi náitucahini ticaratajacachavana, ena nani téjecapavanahi eta napanereruana. Tájínachucha vahi émainahini nasuapahini ema Viya. ²⁷ Vítisera, eta vítauchirahi eta yátupiquene téhicacare, te vivaraha tájina véchajisiacarevaina te mamirahu ema Tata Vicaiaquene, tatuparacahi vijapanuyare vítátiyare ena amaperuana váchachichana énapa ena náepenaimaqueneana tayehe eta nacamunuiravanahi. Tituparacahavíhivare vahi víchaimahi eta pecatuana te juca apaquehe.

Nácuticaca ejacapa ena achaneana

2 Nuparapeneveana, éti éhicanahi ema máitupajijihaquenehi Viáquenu Jesucristo, vahi táurichahini enerejicavaca ena echamuriana ejacapaqueneanaya. ² Étaripa te natiarihinapuca nácani nasiapauchahe te iúrujisirarevana íchirana eta culto, vahi macarichuimahi tiuri eta ejacapiraya mácani tíurinahapahi eta macamuirihairahi, ticasurutijapahipuca eta oro. Énerichuvare ejacapayare mácani paure, tévichíjhaphípuca. ³ Taicha téjecapavahi eta epanereruana, te macarichuhi mácani tíurinamuirihapahi, échapajiricahi eta ecaejasirahi, mácanisera paure, te váipapuca ecuechajiricahi, váipapucaini ecuijaracahi eta máejasiha, tasapiha evanecainapapuca téjahapaica. Éti, vaipa étupicavaimahi eta juca enerejisiravacaichucha nácani ejacapaqueneanaya.

⁵ Némunaruqueneana nuparapeneveana, esamanuchaha. Ena páureanahi te juca apaquehe, majacapavacahi ema Viya, táichavenehi eta nacasiñairahi ema Machicha. Éna, tiápajupanavanahi eta náurivaya taicha ena ticaicuchianahi eta mávasa ema Viya taicha machaneranahi. Nacachaneyarehi ena apamuriana témunacanahi éma. ⁶ Étisera evarahapa ímitsirihavaca ena páureana, nasapihapa échapajiricahi ena rícoana. Ticutiripa vahi ímativacahini eta náemeratasiraheripa, te apaesachichapa éjecapava. ⁷ Ticutiripavare vahi ímativacahini eta nacaecahirahi ema Cristo, nacaecahivare eta íamirahi eta máijare tacapicahuquenehi.

⁸ Puítisera éti, yátupiyare ítaucha eta ticunachacarepanaquenehi mavanairipi ema Viya tayehe eta Sagrada Escritura. Ani tacahehi: “Pémunacayare ema piparaepiya tácuti eta pémunasiravahi píti”. ⁹ Téhesera

enerejicaichucha nácani émunaruanahi, ecapecatu-raichucha eta emasuapirahi eta mavanairipi ema Viya, éta tiviuachaheya. ¹⁰ Taicha te natiarihipuca nácani náitaucha tamutuyaréni eta vanairipiana, téhesera apaesarichu eta néjecapiravahi, étapa tiviuachahi eta náicuñayare, tímicutijiricavahi vahi náitauchahini.

¹¹ Taicha ema Viya, ani tacahehi eta mavanairipihi: “Vahi picuveha esu apana esena. Váhivare picucapareca”. Piti, te váhipuca pivehahini esu apana esena, picaparecahiserapuca, piáviraichuhi picaviurevahi.

¹² Iúrihainehi ejacaparalihini nayehe namutu, táurihini eta échajirisiravana. Vahi ecuemitisica eta tatiaríhiraya eta sache ecayaserehiraya tayehe eta juca vanairipiana. Étara tétupiricahavihi. ¹³ Taicha nácani majapanurairahanahi nayehe nácani apamuriana, tájínare najapanucarevaimahi te nacayaserehipa. Nácanisera tijapanurahianahi, ichape eta najacapacarevanaya me Viya te jena sáchevare.

Vímerecaya eta visuapajiravaya étapa eta vicaemataneasiraya ema Viya

¹⁴ Nuparapeneveana, nuvaraha níminicapaequenehaheya. Te natiarihinapapuca nácani nacahehi: “Núti nusuapa ema Viáquenu”, tásiha vahi náichahini eta táuriqueneanahi, vahi tisuapacare eta náechajiriruvahi. Németeaca vahi yátupinahini nasuapahini ema Viáquenu. ¹⁵ Nuvaraha nímicutichinaheya eta juca. Te mararihipuca mácani vichamuri ticamunuvahi eta mamuiriharapiyare, manicaquenerepipuca te sácheana. ¹⁶ Tásiha, mácani echamurihi tépiyacavahipuca tijapanurahihini. Máichahipuca: “Páurevisami piti, te picasarechahipuca, pépacuchava. Te pécuhapuca, pinica”. Tásihasera, te vahi máijarahini eta macamunquenehi, tamapurujichucha eta máichirahi. ¹⁷ Ene vicahe viti véhicana ema Viáquenu. Te vahi víchahini eta táuriqueneana, tamapurujichucha eta véhisirahi, vaipa tásuapacarehini.

¹⁸ Tiuri puiti, németeaca etiarhiyarepuca eti épuryare eta juca numetaruheanahi. Aninapapuca ecaheya: “Tarataripa eta vicasíñavairahi me Viya. Vaipa étaparacaina víchahini jácani apamuriana táuriqueneana” ecáhénapapuca. Nútisera numetacahe: Vahi tisuapacaremahi eta ecasiñavairahiji, te vahi íchahini eta táuriqueneana. Taicha eta íchirahi eta táuriqueneana, étapa tímereuchaheya eta yátupirahi eta ecasiñavairahi mayehe ema Viya. ¹⁹ Éti ímijachaipapuca tarataripahi ticuchuchuhaheya eta esuapirahi eta matiaríhirahi émanarichu ema Viya. Táitaurevaquene esuapahi eta matiaríhirahi ema Viya. Apanasica ena éreanana nasuapahivare eta matiaríhirahi ema Viya. Tayanapane eta nasuapirahi, váhiquene tíuchucuhainahi éna. Énaripa, tiyayacareanahi éna te nasama eta máijare ema Viya. ²⁰ ¿Vuíchahacaru ácaicutiarahini? Tiuri puiti, níminicapaequenehaheya, taicha nuvaraha ácaicutiara: Tacamunuhi íchayare eta táuriqueneana tacachaneyarehi eta ecasiñavairahi. Tamapurujicha eta ecasiñavairahi te vahi ecuquichahini eta táuriqueneana.

²¹ Nuvaraha némechahe mayehe ema viáchucaini Abraham. Eta acane, émaripa macaitsamarajihí ema Viya, te yátupihípuca eta masuapajiraiva. Mavanecahi máechatinucayarehi ema machicha Isaac. Tacahe, ema Abraham, máechatinucayarepaini ema machicha, máimeresirayarehi eta masuapajiraivahi yátupi. Eta tacahe, ema Abraham, tétavicavahi eta majacapacarevahi mayehe ema Viya. ²² Étara ícutiaraya eta juca masuapajiraivahi yátupi ema Abraham. Vahi máeñamahini ema machicha eta mavarairahi máimerecayare yátupihí eta masuapirahi. ²³ Taicha eta táechajiriruvahi eta Sagrada Escritura, ani tacahehi: “Ema Abraham masuapahi ema Viya. Tásiha, tétavica-vainehe eta majacapacarevahi ema Abraham. Éma, máemunacasarehi ema Viya”.

²⁴ Ácaicutiara yátupina eta juca. Viti achaneana vijacapacare me Viya táichavene eta vímeresira eta visuapirahi. Vahi tarataha eta vicaheira: “Núti nusuapa ema Viya”. ²⁵ Níminecapaequenehahe eta acane tacahevare eta súchucuirahi esu esena túhusiquenénihí ticaijaru Rahab. Ésu, ticatiuchavacahi ena vanairucanahi mayehe ema víyaraha Josué, suímicatacavacahivare eta náitujisiravayarehi tijunana nayehe ena ticaratacanayarehini. Eta máimairahi ema Viya eta juca suíchirahi, ichaperinehivare eta majacapirahi ésu. ²⁶ Eta juca tacutihi eta viáquehe te tajunijica eta viáchaneva, enevanerinehi tésamiricava eta viáquehe, tépenavaneyarehi. Ene tacahehi eta visuapajiraiva. Títavavare te vaipa vímeracahi eta viúrivahi, víchirahi eta táuriqueneana.

Eta vijaca, tamutu tajarareca

3 Nuparapenaveana, yátupi vimutu véjecapava tayehe eta véchajisirana. Nájina émanaina vahi macuejecapavaini eta máechajisira. Te matiarihinaini mácani achane vahi macuejecapavaini, ichapehini eta macunachacarevainahini, taicha éma, yátupihí eta máitupajijiasiravahi, máitucahivare ticaratacava eta máquehe. Eta tacahe, nuvaraha nuconsejachahe: Tacamunu najaneacava muraca nácani náimereca eta navarairahi máestroanayarehi tayehe eta máimiturapiana ema Viáquenu. Échavayare eta vicayaseserehi-rayarehi muraca me Viya viti máestroanahi.

³ Nuvaraha nímicutichinahe. Eta juca tímicutijiricavahi te vicapera eta cavayu: vinacapa eta freno, vichurujacachapa, viámapa te jácani vivarahaquene viámiha. ⁴ Tacutiquene eta ichape lancha, táevatajicaneni muraca eta tétaticava, étape eta tajunapira muraca eta une, taratahayarehisera táimitupirucha eta tayehe leme váhineni ichapenahini, ema piloto máimitupiruchayarehi te jácani mavarahaquene máimihayarepahi. ⁵ Ene tacahehi eta juca vijaca. Ánichicharichunéni tayehe eta viáquehe. Tasapiahisera táechajisihahi eta ichapequeneana. Tacutiquene eta yucu. Ánichicharichunéni eta táepanirava táijucha, taratahahisera táijucha eta ichapequene vámahí. Nácani achaneana te vahi náitucahini ticaratajachavana, amairijipa tamutu eta náitaresira. Tíñehi-

carehi najarareca ena nácani camuriana achaneana taicha eta náechajiriruvanahi. Ena nani téchajisihanahi eta tauriqueneana, éna mávaháruanahi ema Váinaraji, téchahi eta infierno. ⁷ Ena achaneana narataha namansucha eta cáyureana étape eta quichareana étape eta táíñehiqueneana sárareana tiávihana te apaquehe étape te une. ⁸ Étasea eta jacare, nájina ticaratacaina, táechajisihayarehi eta tauriqueneana. Tacutihi eta jumare te nájina tiratahaimahi típuchaina, tiámahivare eta tacapasiravacayare ena achaneana. ⁹ Eta jacare, étarichuvare táuchusiha eta náechajiriruvana ena ticunachanayarehi ema Tata Vicaiaquene. Ticunachacarehi eta juca. Váhisera ticunachacaremahi te tiúchucahi eta jacare eta náumehaira ena nacutiqueneana achaneana naparaepíyanahi me Viya. Nuparapenaveana, tatuparacahi vahi ecaecahihini ena ecutiqueneana tiámanahi eta macaquehera ena ema Viya. ¹¹ Tacutiquene eta une, te tipachinahi eta tajututurusirahi te apaquehe, vahi tíjahúchavaimahi titsiricava, táuchucapucaini tisucaremahini, ticheveamapucahini. ¹² Tacutiquene vahi tiúchucaimahi eta aceite tayehe eta tahi eta yana. Étaripa eta narasa, vahi tiúchucaimahi eta tahi siñávehinapahini. Ene tacahehi eta une, vahi tajututurucachini te apaquehe eta tipachina une tacachanepahipucaini eta ticheveama. Nuconsejachahe: Eacunachachucha. Vahi ecumehareca.

Te yátupihí eta véchemaraivahi, tatuparacahi víchayarehi eta táuriqueneana

¹³ Te natiarihinapuca te etaracu nácani náechemahahi tamutu, tatuparacahi náichayare eta táuriqueneana, yátupinavare eta namansuvayare. Étape tímicaecherachayarehi eta náitusirahi. ¹⁴ Te etiarihipuca eti ímijachavahi échemahahi tamutu, tásiha ecapinarurecarichuchasera te esamureana, evarahapa iápajupanavayarehi nayehe ena apamuriana eta ítupajijiasiravaya, vahi yátupinahini eta ítupajijiasiravainahini. ¹⁵ Eta juca échemaraivavacahi, vahi étainahini tásihaquenénahini me Viya. Tayehecucha te juca apaquehe tásihaquenechucha eta ne achaneana, máevaequeneruhi ema Váinaraji. ¹⁶ Taicha ena ticapinarujiricacanahe téhajiricacana. Vahi tácuticacahini eta napanereruana. Náicharichucha eta tájiparacana. ¹⁷ Nararihiserá ena yátupiquenehi eta náechemaraiva, tásihaquenehi me Viya eta náitupajijiasiravanahi. Náimerecachi tativa tatupiruvahi eta napanereruhi. Táurivahivare eta náitaresira. Ticatiurahianahivare nayehe ena apamuriana. Tisamarahianavare. Tijapanurahianavare. Eta náichirahi eta táuriqueneana, ticajirahianahi. Nájina nanerejiruina. Tatupiruvahi eta náechajirisiravana. ¹⁸ Nácani ticatiurahianahi, náetupiricahi eta náitaresira ena apamuriana. Jéhesare, tájinasarepa náichiravainahi. Nanaquipaicahi eta táuriqueneana.

Emá Viya mavaraha vínajica eta tájiparacana

4 Púitiripa, ¿tájaha tacayema eta éhajíricácahi? Éti ecuticacahi ena apamuriana eta ejamurarai-vanahi. Éta, timaurichahehi eta tájiparacana, étiji-vaichucha íchavahi. ² Éti ejamurachahi ecaima-haquene. Étasera emaitusiravahi, evarahapa ecapaca ena ticaimahaqueneanahi. Éti ecapinarurecahi. Éta emaitusiravahi, téhacacapa eta échajirisiravana; tásiha, éhacacauchapa. Nuconsejachaheyare: Eyaseaca emá Viya eta ecamunuqueneanahi. ³ Éti eyaseacahinéni éma, váhisera máijaracahehíni, taicha vahi táetupicavahíni eta eyasesearapiana, étachucha eta tajamurachaqueneanahi eta iáquehe.

⁴ ¡Tétavicavapa eta emaetupisiravahi eti achaneana! ¡Éjecapavahi ichape mayehe emá Viya! Evarahapa éhica eta nayeherepianahi ena achaneana masuapajirairahanahi. Tihapapicahepa eta tájiparacana te juca apaquehe. Masapihapa epuruyarehi emá Viya, ecati-nacapa éma. ⁵ Éti ímijachaipapuca táepiyevahi eta táéchajiriruvahi eta Sagrada Escritura. Ani tacahehi: “Eta mávahásirahavihi emá Espíritu Santo, téñamahiripa vahi vihapasamurechaimahi tayehe eta tamauriqueneana”. ⁶ Étaripa eta máemunasirahavihi emá Viya, tétumechahavihi, mamavarairahi víchahíni eta tamauriqueneanahi. Taicha ánivare tacahe eta Sagrada Escritura: “Emá Viya macatianacavaca ena tisiñavavairicana. Máemunacavacahisera máimicatacavacahivare ena mánsuana”.

⁷ Eta tacahe, esuapa yátupina emá Viya. Ecanaraya emá Váinaraji, te mavaraha mavayuacahe. Jéhesare, tijunijicahénapa éma. ⁸ Puiti, yátupina eta epauchirahi emá Viya. Tásiha, emá apanavare tipauchaheyare. Ínajicapa puiti eta íchira eta tamauriqueneana. Émitiscainapa eta ejamurachira eta tájiparacana te esamureana. Taicha éhicasareipa emá Viya. Vaipa ecupanerecha eta nayeherepiana ena achaneana masuapajirairahana te juca apaquehe. ⁹ Puiti, éneuchava me Viya. Íyauchava táichavenehi eta éjecapiravanahi. Vaipa ecuecarairicava, vaipa ecurisamure eta íchira eta tamauriqueneana. Ácatisamurevasera táichavenehi eta tamutu eta tamauriqueneana íchaqueneanahi. ¹⁰ Ecajapanuravayare eta éneuchiravayare te mami-rahú emá Viáquenu. Tásiha, tétavicavayare eta ejacapacarevainapa mayehe emá Viya.

Vahi picucaecahi emá pichamuri

¹¹ Nuparapenaveana, vahi ecuechajica mayehe mácani echamurihi. Taicha mácani téchajicahi mayehe mácani machamuri, macacahipuca, mavaraha máicuñaca mácani machamuri. Émaripa máepururipahi eta mavanairipi emá Viya. Nuvaraha numetacahé: Te épuruhi éti eta mavanairipi emá Viya, eta tímicaecherachahehi eta emasuapirahi éma. ¹² Emá Viya, émahí ticavanairipihi. Macarichu éma tatuparacahi téchayarehi te tíurhipuca eta náichaqueneana ena achaneana. Téchayarehivare eta máicuñasira-

vacahi ena téjecapavanahi. Vahi étina tatuparacahéni ícuñacahíni ena echamuriana.

Vahi vítina vecha eta vítaresira

¹³ Esamanuchaha. Vahi táuricahíni ácahehíni: “Puiti juca sácheana, achichupuca, nuyanaya te apana avasare. Níjararecaya eta nucayehequeneana. Tiámainucava nuchava te apana año. Ichapeyare eta nugareruyare”. ¹⁴ Éti, vahi échahíni tájahapuca eta íchavaquenévaya achichu. Taicha vahi evachareruina eta ítaresira. Tacutichucha eta iyaru. Ánipirichu eta tacaecheraira. Tásiha, témitiacaripavare. ¹⁵ Íúrihainehi ácahehíni: “Emá Viya téchahavihi eta vítaresira. Te mavaraha éma, vítauchayarehi eta juca vipanereruhi” ácahehíni. ¹⁶ Étiserá, tétavicavapa eta ecasiñavavairahi eta échajisirana. Ticutirinehi étinahíni échinvahíni eta ítaresirana. Vahi táurihíni eta ecasiñavavairahi. ¹⁷ Némechahe eta juca yátupiquenehi: Mácani máimatíhi eta macatuparahairahi máichaya eta táuriqueneana, tásiha te vahi máitauchahíni máichahíni, ticapecaturaipahi te mami-rahú emá Viya.

Eta náichavaquenévaya ena rícoana

5 Tiuri puiti, nuvaraha numetacahé eta náichararacavaya ena rícoqueneana. Éna, ichape eta nacatajivairayare. Náuríhaipa náiyahasamureripahíni taicha eta nacatajivairaya. ² Taicha títavainapa eta náimahaqueneana. Étaripa eta nacamuiríhairana eta táurinaqueneana, tanicacamecainapa eta cachusiri. ³ Tájinapa táichaquenemahi eta naplataneana étapa eta nayehe oro. Ichape eta nacatajivairaya, taicha eta náeñamirahi, tájina náimicatarapínahíni. Étainapa tímicuñacavayare te jena yucu te táitecapapa eta jena sáche-yare. ⁴ Nararíhi ena nani rícoqueneana, ichape eta navayuasiravacahi eta navachachirahi ena ticaemata-neacanahi eta nayehe. Tatiarihiyaresera eta sáche-yare táitecapauchayare eta náicuñayare, taicha emá Viya máimararacahi tamutu, masamahivare eta nayaseserepianahi ena páureanasami músuana. ⁵ Ena rícoana puiti te juca apaquehe, tétavicavahi eta náuritaresirahi. Tamutuhi nanica eta táurinisiqueneana, tisatuheherecanahi. Tésinanacavanahi nacuti eta cuchi te náesinacha. Éna, tíjahúchavayare eta náepenirayare, nacuti-yare eta táijahúchirava nacapaca eta cuchi náesinaruhi. ⁶ Tacutiquene náimicaviurehi náimicapacavare ena matapiravareanahi, náimipanapa eta namaitusirahi tícapauchavana nacatiuchavahíni.

Vicamichayare tamutu, taicha táetumechahavi eta vicuchapirahi eta machavirayare emá Viáquenu

⁷ Étiserá, nuparapeanaveana, ecamichayare tamutu, táichavenehi eta ecuchapirahi eta machavirayare emá Viáquenu. Ecutiyare mácani achane ticaematanerahi. Macamichahi tamutu eta macatajivairana. Tiámainucava te tíuchucuhapa eta máevaru, mapaenumavapa majacapa eta macuchapaquenehi máevaraquí. ⁸ Ene ecaheyare éti, yátupina ecamicha tamutu, váhivare

ecuinajicava eta juca éhiruhi. Ecuchapavachucha, taicha tiánehipa eta máitesirayare ema Viáquenu.

⁹ Nuparapenaveana, vahi ecuquicha eta tájiparacana nayehe ena echamuriana. Váhivare ecuemeteca éna, apaesa tacuija eta táimicatsiriacahe te ecayaserehipa te mamirahu ema Viya. Écharichuhi éti eta tánehirapa eta máuchujisirayare ema Juez, ecayaserehinapa.

¹⁰ Nuparapenavechichana, nuvaraha ácutini ena profetanani eta nacamichirahi tamutu eta nacatajivairahi, táichavenehi eta nacametarairuirahi te máijare ema Viáquenu. ¹¹ Némechahe: Ichape eta nacunachacarevahi eta viyehe nácani ticamichanahi eta nátajivanahi. Écharichuhi eta macamichirahi ema víyarahaini Job. Échahivare eta táuriquenehi máijaracasihi me Viáquenu. Taicha tétavicavahi eta majapanuraivahi ema Viáquenu.

¹² Tacutiquene nutuparacahecha éti nuparapenaveana: Te ecayaserehipuca, vahi ecuquicha eta juramento te máijare ema Viya, ema tépiyacahi eta anuma étapa eta juca apaquehe. Váhiquene ecuquicha eta juramento. Átupiruvachucha te itauchayarepuca, “Nítauchayare” ácahepa. Téhesera váhipuca, étupiruvayare “Vahi nítauchaimahi” ácahepa. Apaesa tacuija taviuchahe mayehe ema Viya.

Tatuparaca eyujarauchacacayare

¹³ Te etiarihinapuca éti ecatajivahi, tatuparacahi éneuchavayare me Viya. Te etiarihinapuca eti iúrisamureanahi, tatuparacahi ejira eta alabanza. ¹⁴ Téhe-

vare etiarihinapuca eti ecajumanahi, ímichuhayare ena víyacarana vichamuriana apaesa nayajisicahe eta aceite, te máijare ema Viáquenu. Tásiha, tiyujarauchaheanayare. ¹⁵ Jéhesare, tisamacareyarehi eta nayaseasirana, táichavenehi eta nacasiñairava me Viya. Tásiha, ema Viáquenu macanaracayarehi eti ecajumaquenehi. Te étapuca taviuchahehi eta epecaturana, macaepahayareva ema Viya eta epecaturana. ¹⁶ Eta tacahe, te tatiarihipuca eta éjecapiravanahi mayehe ema echamuri, eyaseacayare maperdonachahe. Tásiha, eyaseuchacacayare te eyujaraca eta enarasiraina. Taicha tétavicavahi eta tasamacarevahi eta nayujaracasa ena matapiravareana. ¹⁷ Émaripa ema vicutiquenéni achane víyarahaini profetaini Elías, te tiyujaracapa éma, tiyaseserecapa vahi tacuquiva. Tisamacarehi éma. Vaipa taquivahini. Mápana año, saisi caje eta tamajinairahi tiquiva. ¹⁸ Tásiha, tiápechavavarepa tiyujaracahi. Tiyaseserecapa táemiricahini eta tiquiva. Tiquivavarepa. Tacahe, tiúrinainehi eta evaraquiana te apaquehe.

¹⁹ Nuparapenavechichana, te natiarihinapuca nácani vichamuriana téjecapavanahi tayehe eta yátupiqueneana, eti ecatuparaha iúrichavacayarehi éna, econsejachavacayare apaesa nachava éna, nánajicahini eta nájecapiravana. Tétavicavahi eta táurivahi eta íturusiraina eta nachavira, taicha táemesiava eta ecuchucuiravacayare tayehe eta náicuñayarehini, taicha eta táemesiavahi eta táepahairapa eta camuriquenehi eta napecaturana.

Tamu tupa.

1 Pedro

1 Núti Pedro, mayehenu apóstole ema Viáquenu Jesucristo. Nucajurehe eta juca nucartane eti nuchamuriana éjanerepairuanahi ecaquijiqueneanahi tayehe eta apana avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia. ² Emutu eti, yátupiquenehi eta manerejisi-rahehi ema Tata Vicaiaquene taicha tacahehi eta mapanereruhi acane eta táepaniravahi. Émaripa ema Espíritu Santo, tiávahácaheripa máepachiasirahehi eta epecaturana eta te máitine ema Jesucristo, máitsivachinahehivare eta itaresirana, máimicatasirahehivare eta esuapajiraivahi me Viya. Puiti, nuvaraha tajurucaini eta ecaicutiaraira eta máemunasirahehi ema Viya; tájina navare tahapapiricahini eta táurivahi eta epanereruana.

Vijacapayare eta vícuchihi te anuma te tauri eta vítaresiraina

³ Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásiha, viratahahi vicamichahi tamutu eta viátajivana te juca vítaresirana taicha vicuchapahi eta sácheyare visiapaya eta mávasa ema Viya. Máitavacacayare eta vítaresirayare, táichavenehi eta máechepusirahi ema Machicha Jesucristo te máecari. Ánaqui, tájinapa ticapacahemahi, váipavare íchaimahi eta tauriqueneana. Máitavacacayare eta iúrisamurereasiravanayare. ⁵ Puítisera, tétavicavahi eta máitupajijasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucaheyare te jena sache táepaniravayare eta viúritaresiraya.

⁶ Puiti, apanapaneyarechaha eta ecatajivairayarechaha. Nucasiñavahisera eyehe éti, vahi ecainajiruvaimahi. Eta ecasiñavairahi me Viya, evapinavaichucha eta ecamichirahi tamutu, taicha ímatihini vaipa táunaimahi eta ecatajivairaya. ⁷ Ema Viya máisapahi eta juca ecatajivairana, mavarairahi ímereuchavayare eta yátupiquenehi eta ecasiñavairahi eta mayehe. Ecutiyare eta oro te nacaitsamaraji te yucu te yátupihipuca étaquenehi. Étisera étaviviriacahi eta tatumeva eta oro, taicha eta oro títavayarehi, témitiacayarehi. Te vahi ecainajiruva eta ecasiñavairahi mayehe ema Viáquenu, tétavicavayare eta ecunachacarevayarehi mayehe éma eta machimapiraheyare te machava.

⁸ Éti, vuíchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásiha, ichapeyarehiva eta iúrisamurevaya, tájina eviyaimahi ácyemahini eta ecunachiraya éma, te jena sache iúchucuhainapa eta ítaresiraya máichecuaraquirenapa. Étasera eta táitsivahi eta ecasiñavairahi mayehe ema Viáquenu.

¹⁰ Eta juca viúchucuirayare, acaneripahi eta tacaecherairahi. Énaripa ena víyaranaini profetanaini nájuequeneharipa tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espíritu Santo máitametacavacahi éna eta macatajivairayarehi éma Cristo étapa eta machavirayare tayehe eta táurinaquenehi mávasa. Énasera ena profetana vahi náimatimahi tamutu. Navarahahi náimatiyare ¿nájahapuca ema máiteruyarehi? ¿Tájahapuca eta máijareya? ¿Tájamuhuyarepuca eta máimere-siravaya? ¹² Émasera ema Espíritu Santo (ema másihaquenehi te anuma), mametacavacapa vahi náimaimahi ema Cristo, taicha camuriyarehi eta áñoana eta máitecapiraya. Vítipasera puiti viti vítarerunaichaha, vítipa vímatihini éma. Te vicametarairupa mayehe ema Jesucristo, ema Espíritu Santo títametacahahi te esamureana. ¡Tétavicavayare eta viúricarevayare víti, te viúchucuhapa! Énaripa ena ángeleana, ichape navarahahi náimatihini tájahapuca táichararacavayare eta viúricarevayare.

Ema Viya, eta máichuirahavihi, mavarahahi tépachinachahaviyare eta vítaresirayare

¹³ Eta tacahe, ecaratacava tayehe eta epanereruana, táurivainavare eta itaresiraya. Ecasiñavayare eta ejacupirayare eta ícuchihi me Viya, máijaruheyare te machavapa ema Viáquenu Jesucristo. ¹⁴ Ímrecavayareva eta machichairahahi, esuapajirahiyare. Vaipa ecuquicha eta íchaqueneanaini eyeherepianaini cape juca te vuíchaha ímatihini ema Viya. ¹⁵ Puítisera, sánturuhénapa eta itaresirayare. Taicha ema tíchuhahehi, tétavicavahi eta masantuvahi. ¹⁶ Taicha ema Viya, ani macahehi eta máechajiruvahi tayehe eta Sagrada Escritura: “Nuvaraha sántuhéna eta ítaresiraina, taicha núti, yátupiquenehi eta nusantuva”.

¹⁷ Te eyujarasirana éti, ani ecahehi: “Tata Vicaiaquene” ecahehi mayehe ema Viya. Ímatiyare yátupi éma eta nájinairahi manerejiruina, tacutiquene eta máemecharesirahi ena téjecapavana, máitsivachavahivare nácani tíchanahi eta táuriqueneana. Tacahe, yátupina eta epicauchiraina éma tamutu sácheana

puiti juca itaresiraichaha te juca apaquehe. ¹⁸ Ema Viáquenu Jesucristo ticuchucuhaheripa tayehe eta taurivainihi eta itaresirana, iámapiricaichaha eta nayeherepianaini ena iáchucanaveánaini. Écharichuhi éti eta mavacharesirahehi ema Cristo eta iúchucuirahi, váhisera te plátainahini, óroinahipucaini. ¹⁹ Étasera eta máitine máepusairuhi éma eta mavacharesirahehi, étivenehi ímijararecahi éma, cútiripa te cáijararecasi eta uvesa matapiravarequenehi. ²⁰ Acane te tépanavainapa eta apaquehe ema Viáquenu Jesucristo ticatuparahaipa tacaheyarehi eta máepeniraya. Váhisera táitachavavanehini. Tapaenumavapa puiti, títauchavahi eta étavenepa eta iúchucuirayarehi éti. ²¹ Énerichu táichavenehi eta éhisirahi ema Cristo, ímatipa puiti ema Viya, ema ticaechepucahi ema Machicha te máecari. Puíticha téjacaripa éma tayehe eta mávacure te anuma. Eta tacahe, tétavicavainehi eta ecasiñavairahi mayehe éma, ecuchapavaipa eta mayehe.

²² Puiti tipachinaripa eta iáchanevana táichavenehi eta esuapirahi eta yátupiquene máimiturapiana ema Jesucristo, máimitusiraheripa ema Espíritu Santo. Eta tacahe, ímerecavainapa puiti yátupina eta émunasiracacahi nayehe ena echamuriana. Evapinavavare eta te esamureana eta émunasiracacairahi. ²³ Cape juca, eta itaresirahi, tájina vahi íturuequenehahini eta iúchucuiraya. Puítipasera machichaheripahi ema Viya. Ítsivachapahi eta itaresirainihi eta esuapirahi eta máechajiriruva ema Viya. Éta ticaitarecaheyarehi; jéhevare eta máitavacacahi. ²⁴ Eta Sagrada Escritura, ani tacahehi eta táechajiriruva, májurehi ema víyarahaini profeta Isaías: “Eta vítaresirahi viti achaneanasami te juca apaquehe, vicutihi eta táimarusira eta muiji. Tijurucapa, tásiha tiájijipa. Eta vitumevainihi étapa eta vítupajijiasiravainihi, títavayare tacutihi eta flore: tépnehapa, tijiyupa, témiricapa. Étasera eta máechajiriruva ema Viya, jéhevare eta máitavacacahi” tacahepa. ²⁵ Eta juca máechajiriruva ema Viya, étaquehehi eta emetacasionahi apaesa táuripa eta éhisirahi.

² Eta tacahe, támutupa ínajica eta evainararajivainihi, tamutu eta ecaetemaraivainihi, eta apiepmairahénihi, eta ecapinaruraivainihi, étapa eta échajivanainihi. ² Puiti, eta ímatiriripahi yátupi eta máurivahi ema Viya, tijurucainapa puiti eta esuapirayare eta máechajiriruvana. Ecutinapa eta najurusira ena amuyana. Ánipichichapachu técuhana, tiájicanaripavare te nacheneana ena náenana. Ene ecahehi éti, yátupina eta evarairaya ecaravahu eta máechajiriruva ema Viya, apaesa tiápajucavaya eta ímatiequenehairaina eta mapanereruana.

Ena Cristo macutihi eta mari máepenacacahi

⁴ Yátupina eta ecasiñavaira me Viáquenu, taicha tétavicavahi eta macasiñacarevahi, macuti eta mari máepenacacahi. Éma, náepuruquenehi ena achaneana. Manerejiruhisera ema Viya taicha tétavicavahi eta macunachacarevahi mayehe. ⁵ Éneripa ecahehi éti, ecutiripa eta márijahiana máepenacacahi.

Tacahe puiti, táuripa eta ecachaneracacainapa. Macarichu ema Viya ema ecaemataneacaya. Tivayucaheya eta esuapajiraivaya eta máijarasiraheyarehi eta ématanepachuyare. Énerichuvare ecatuparahaipa sántuhénapa. Ecutiyare ena tiyujaracarahiana eta te Templo. Ecatuparahaipavare eyaseurahiya nayehe ena echamuriana. Étape eta ecamavahaira me Viya, étaripa eta esuapajiraivahi, eta ehasulupayachirahi ema Viya, étapa eta ecunachirahi éma. Tamutu eta juca, ecurisamurechayare éma, taicha émarichuhi ema Jesucristo ticaitecapinaheyarehi me Viya. ⁶ Eta Sagrada Escritura, ani tacahe eta máechajiriruvahi ema Viya: “Núti névatacahi ema Nuchicha Cristo eta eyehe. Taicha nunerejiruhi éma eta macurujisirayarehi ena nuchanerana návaháruanaya. Tétavicavahi eta macunachacarevahi eta nuyehe. Nácani ticasañavanahi eta mayehe ema nuvaneryare, vahi máinajiacavacaimahi” macahepa ema Viya. ⁷ Éti, tétavicavahi eta macunachacarevahi ema Cristo eta eyehe, taicha yátupihhi eta ecasiñairahi éma. Énasera nácani masuapajirairahanahi mayehe, náepuruhi éma, nacuti ena tépiyarecarahiana eta Templo, eta náepuruirahi eta mari ticunacharepanayare eta te peti. ⁸ Nácani masuapajirairahanahi eta máechajiriruvana ema Viya, tacutiqueneyarehi náepuruhi ema mavaneruhi ema Viya. Nacutihi mácani achane máquipairuhi táichavenehi eta macayutetuirahi. Tisemahi, mavaraha térajicavayare eta tímicyutetuchahi.

Ena machanerana ema Viya

⁹ Étisera manerejiruhheripa ema Viya, machichaheripa. Tachichaheripavare eta mávasa. Sántuhepa máicha. Tituparacaheripavare éma eyaseuchinavacayare ena achaneana eta mayehe. Majupahahehivare ema Rey. Puiti émapa macarichuhi téchahehi taicha mavecuhaqueneheripahi tayehe eta timapicu, tímisiapaheripa tayehe eta táuricacarequene majaraiva éma, apaesa emetajiricaya eta táuricacarequeneana máematanehepi ema Viya. ¹⁰ Cape juca itaresirahi éti, vuíchaha ímatihini ema Viya. Eyerehichaha éma, vuíchaha échahini eta majapanuiraherahi éma. Puítisera evapinavahi eta ímatirahi yátupi eta majapanuiraherahi, taicha machaneraheripa.

Yátupina eta ecaemataneasirayare ema Viya eta ítaresiraya

¹¹ Némunaruqueneana nuparapenaveana, puiti éti, tímicutijiricavaichaha estranjeroherahi taicha iávirichaha te juca apaquehe. Váipasera áyeremahi eta eyanirayare eta iávasayare te anuma. Eta tacahe, nuconsejachahe: Vaipa táuricahini íchahini eta tajamurachaqueneana eta iáqueheana. Taicha tétavicavahi eta tavarairahi tácamitieuqueneha eta iáchanevana. ¹² Iúrihisera eta ecachanerarichaha ena achaneana te juca apaquehe máimatirahanahi ema Viya. Tayanapanerine ticatianacaheana, téchejicanahi eta eyehe ecutihi ena máuritaesirana náicha. Ímerecayaresera eta

iúrivahi apaesa éna nacunachayare ema Viya, navarahainapa náehica ema Cristo taicha náimahahi eta táurivahi eta ítaresiranahi.

¹³ Táichavenenahi eta éhisirahi ema Viáquenu, ímrecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tuparairucana tanacaqueneanahi eta ley. Éna, ticatuparahanahi náicuñacavacayare ena achaneana váinarajiqueneana, téjecapavanahi. Énasera ena achaneana tiúriana títaurahianahi, ticaemunacasianayarehi. ¹⁵ Taicha ema Viya, éta mavarahahi íchayare eta táuriqueneana apaesa ecamatinacaya ena máecharaireana nácani téchajicahahi eta eyehe.

¹⁶ Yátupihí vaipa tapamiruhénahi éti eta esuapirahi eta mavanairipianaini ema Moisés eta iúchucuirayare. Váhisera ecuyunaca eta vahi tapamisirahenahini, táetseraruina icha eta tamauriqueneana. Esapihäsera ímrecavayare yátupihí eta mavanaraherahi ema Viya. ¹⁷ Epicaurahiyare nayehe namutu ena achaneana. Émunajiricayare nayehe ena vichamuriana. Ímrecapa eta epicauchirahi ema Viya. Epicauchayaherivare ema Emperador Presidente.

Vácuti ema Jesucristo eta macamichirahi eta mátajivana

¹⁸ Éti, te ecaematanerecapuca, esuapajirahiyare, epicauchayareva nácani íaquenuanahi. Vahi nacucarichu esuapa nácani tiúriana achaneana. Tácuticaca eta epicauchiraina nácani váinarajianahi. ¹⁹ Te ecatajiva náicha, tájinapa eta eviurevanainahini, tétavicavahi eta ecunachacarevaya me Viya te ecamichahi tamutu, taicha evarahahi ítaucha eta mavarahaquenehi ema Viya. ²⁰ Téhesera náicuñacahepuca táichavenénahi eta íchirahi eta tamauriqueneana, tájina ecunachacarevaimahi eta ecamichirahi, taicha tatupiruvahi eta ecaicuñairayare. Téhesera táimicuñacahepuca eta íchirahi eta táuriqueneana, ecamichirahi eta náichirahehi, tétavicava eta ecunachacarevaya te mamirahu ema Viya. ²¹ Taicha ema Viya, eta máichuirahahi, mavarahahi ecutiyarehi ema Cristo eta macamichirahi tamutu eta mátajivana íchavenehi éti, mavarairahi ecaravahu eta máurivahi, ecutiyarehi éma eta macayehera paciencia. ²² Éma, tájinahineni maviurevainahini, mapecaturainahipucaini. Nájinavare macaetemaquenénahini. ²³ Te nacaetemajiricapa, éma, vahi mácapae-machavacahíni, macatitiemahipucaini eta náemecatajivachirahi. Máechajicahisera ema Maiya, máimahainehi éma. Taicha yátupihí eta máicuñasiravacaya ena témecatajivachanahi. ²⁴ Yátupihí ema Cristo ticaicuñahi víchavenehi víti eta vícuñayaréni vícuchinihi táichavenehi eta vipecurana. Tétavicavahi eta mátajivana te máquehe eta náemetasirahi eta te crusu. Macamichahisera tamutu, mavarahahi vaipa tacuva-yuacahaví eta pecatu, tatupiruvayarehi eta vítare-siraina. Eta majarana, éta ticanaracaheyare. ²⁵ Eta ítaresirainihí acane éti, ecuti eta uvesa táemitiaru. Puí-

tisera íavahácaripa ema Cristo, émapa tijaneacahehi, ticatiuchahehivare eta íachanevana.

Tiúriyare eta náitaresirayare ena nacaimaqueneana

3 Tacutiquene eti esenana ecaimaqueneana, epicauchayareva ena ímanaveana, apaesa mácani vahi masuapahini eta máechajiriruvana ema Viáquenu, ecajimuyasamurechavaca táichavenénahi eta iúrivahi nayehe. ² Vaipa tácomesaimahi échajirica taicha náimahayare eta esuapajiraivahi nayehe, epicauchirahivare. ³ Ímrecayareva eta iúriya yátupiquenehi, tásihaquenehi te esamureana, tímicitijiricavahi eta iúrina eta emira. Tayanapanepuca ichanarutheripa, iúrinachavaya te esamureana. Evayuchahini eta étupisirava eta ésamirisirava. Eta juca, tétavicavahi eta ecunachacarehi mayehe ema Viya. Vahi étaparacaina eta evayuyujisirahipuca eta ecamuirihaira étapa eta ecatatasirana, váhivare étaina eta ecayehera oro. ⁵ Taicha acane ena vénarahana esenana náinapureanahi téhicanahi ema Viya, tacahehi eta náurinachiravahi eta náitaresirana, taicha yátupihí eta nacasiñavairahi mayehe ema Viya. Tásiha, tétavicavahi eta nasuapajiraivahi nayehe ena náimanaveana. ⁶ Ecutiyare esu vénaraha Sara. Suímerecachi eta susuapajiraiva mayehe ema suima Abraham, taicha ani sucahehi mayehe: “Náquenu eñi”. Tásiha éti, vahi ecupica eta esuapirahi ena ímanaveana. Ímrecapa yátupina eta iúrivahi nayehe.

⁷ Étipa ajairana ecayenaqueneana, eJapanuyare ena eyenana. Ejanecavare, échahi éna eta vahi túmenahini. Yátupinahisera eta émunasirahi éna, taicha ecuticacayare eta eJacapirayare eta ícuchihi eta ítaresiraya mayehe ema Viya te jena sáchehare. Te iuri nayehe, esamacareya te eyujaraca.

Tiúriyare eta ecamichirahi eta iátajivana táichavenénahi eta íchirahi eta táuriqueneana

⁸ Ámutu éti, ácuticacahi eta epanereruana. EJapanucaca, émunacacavare nayehe namutu ena echamuriana. Ecajirahi. Mánshéhahi. ⁹ Tijuricati natupiacahépuca, náumehahe, váhisera ecujicapa. Eyaseacachucha ema Viya eta náuricacarevaina. Taicha mavaraha ema Viya vijapanurahiyarehi víti, vicutiyare éma eta majapanuraivahi. Tatiarihiyare táitsivayare viyehe máicha. ¹⁰ Taicha ani tacahehi eta Salmo: “Mácani mavarahahi tiúritaresira te apaquehe, támutuyare sácheana tiúriya, vahi téchajijicaimahi tivayuare-caimahi. Váhivare ticaetemarecaimahi tépiyahira-himahi. ¹¹ Váhivare máichaimahi eta tamauriqueneana. Máichahisera eta táuriqueneana. Macamitiacahi eta semanereana. ¹² Ema Viya majaneaca ena náuriqueneana; tisamacareanahi eta nayujarasirana. Énasera ena tíchanahi eta tamauriqueneana, macatianaruanahi éma” tacahepa eta Salmo.

¹³ Nájina tíjaracavaimahi titupiacacheana te náimahahi icha eta táuriqueneana. ¹⁴ Tijuricati natarihipuca ena ticatianacaheanahi táichavenehi eta táurivahi eta

ítaresirahi, tásiha, tétavicavaya eta iúricacareva. Váhivare ecupica eta jácani náichirahepuca, váhivare iávamirahuimahi nayehe. ¹⁵ Íjaracavasera yátupi eta éhisira ema Viáquenu. Te nayaserecahepuca eta tacayema eta éhisirahi éma Jesucristo, tiúrihi eta ejicapiravacaya tayehe eta ecuchapaquene. Mánsuhéna éti, epicaurahivare. ¹⁶ Tátupiruva tamutu eta íchaqueneana, táurivare eta náimairahena namutu ena achaneana, apaesa ecamatinaca nácani téchajisiaracheanahi eta táurivahi eta éhisirahi ema Jesucristo, nátsirihapaini eta náechajjisira. ¹⁷ Te máisapahipuca ema Viya eta náemecatavachirahe táichavenehi eta iúrivahi, tacunachacareyare mayehe eta ecamichira. Tájinasera ecunachacarevaimahi te ecaviurevahi.

¹⁸ Yátupi ema Cristo, étaherichuhi vímicapacahi táichavenehi eta vipecaturana. Éma, tétavicava eta máuriva, matapiravarehivare. Tíjaracavahisera ticatajivaya víchavenehi víti váinarajiqueneana, mavarairahi tiámahavi me Viya. Tépenahi eta máquehe, étasera eta máchaneva tímiyanavaichucha títareca. ¹⁹ Tiyana-varepa máejirapanavacahi eta náchanevana ena náepenaqueneanani nacaerataqueneanahi te infierno. Ticametarairupa nayehe ena nani náepenaqueneana antivuanaini, machamurianaini ema víyarahaini Noé. Ichapehinenihi eta macamichiravacahi ema Viya eta macuchapiravacahi eta nasuapirainahini, vahi náeñamavahini eta náimairahi ema Noé máepiyasirahi eta ichape pacure. Tacahe, te témiricapa eta ichapequene tiquiva, macarichuhi ema Noé ésupa esu mayena, énapa ena machichanaveana énapa ena nayanana, óchoanaichuhi ena tiúchucuhanahi tayehe eta ichapequene une. ²¹ Tiuri puiti, eta une ticaeririjicavacahi ena masuapajirairahana, nímicutichahehi eta vícachasi. Eta vicaicachasirahi te víjaracavapa véhica ema Jesucristo, vahi étaparacaina táepachiacahavimahini eta viáquehe. Étasera eta vicaicachasirahi, éta-pa tímereuchahavi eta maperdonachirahaviripa ema Viya tamutu eta vipecaturana. Máepachinachinaviripavare eta viáchanevana, tájinapa taviuchahavihini, eta visamiravahi te mamirahu. Yátupina eta viúchucuirayare táichavenehi eta máechepusirahi te máecari ema Viáquenu Jesucristo. ²² Puiti éma, tiyanaripahi te anuma; téjacaripa te mavaure ema Maiya. Tétavicavahi eta masuapacarevahi nayehe namutu ena mayeheana ángeleana. Énapa ena váinarajiana, nasuapahivare.

Eti éhicanahi ema Viáquenu, tituparacahe ecaratacavayarehi apaesa vaipa íchaimahi eta tauriqueneana

4 Ema Cristo, ichapemurihi eta macatajivairahi eta máepenirahi te crusu. Macamichahisera éma tamutu. Eti apanavare, ecutiyare éma. Vahi iávamirahuimahi eta ecatajivairaya. Nímicutichaheyare eta mácani achane tépenapa, máinajicaripa eta pecatu. ² Eta tacahe éti, táichavenehi eta iúrujasirahi ema Jesucristo, tímicitijiricavaipa épenaipahini, ínajicaripavare eta pecatu. Puiti eta tápechiravaripa táitarecahini eta íchanevana, tatuparacahi ecaemataneacayare ema Viya. Vaipa tivayuacahémahi eta tajamuraraiva eta

iáquehe. ³ Tamapurujipa eta táetavisiravaripa eta áñoana eta íchirahi eta tauriqueneana, taicha emaimatirahi ema Viya. Tamutuhi icha eta tájiparacana, tivayuacahehi eta tajamuraraiva eta iáquehe. Evayuchavahi eta esenamaréranahi étapa eta ecavaharasiva. Ecasamurehi eta íchira eta piesta. Íchahi eta tájiparacana tauriqueneana eta ejaneasirahi eta esiñarajiana achanemirana. ⁴ Púitiserá éti, vaipa ecasiriquimurihini ena émunacasareana. Vaipa íchaimahi eta táíñemahiquene eta náitaresirahi. Ichapemurinehi eta náejiasirahehi. Tásiha, téchajicanapa eta eyehe. ⁵ Járájapainapasera eta sáchezare nacayaseserehirayare te mamirahu ema Viáquenu, taicha éma yátupi-quenehi eta macatuparahairahi eta vicayaseserehiraya víti, vítareruanaichaha énapa ena náepenaqueneana. ⁶ Eta tacahe, ema Jesucristo ticametarairuhi nayehe ena náepenaqueneana, mavarairahi macuchucuhayare eta náchanevana apaesa nápechavahini náitareca te mamirahu ema Viya, tayanapane eta náeche máteji táitavapapuca tayehe eta tacaecarasiyahi.

Yátupina eta émunajirisiracacaya, ítátijiricacayareva

⁷ Esamanuchaha, tiánehipa eta táitavirayare tamutu eta juca. Eta tacahe, ecaratacava eta epanereruana apaesa táurivaina eta eyujarasiranaya. ⁸ Tiápajucavayarehisera ichape eta émunajirisiracacayare éti. Te yátupihini eta émunajirisiracacahi, máejerareya eta eperdonachiracacaya eta jácani éjecapiravana. ⁹ Evapinavaya eta ejacapiracacaya, te epai piuchacaca te epenana. ¹⁰ Ema Viya tíjaracahevacaripa eta ítucaquene-pachuhi. Tacahe, yátupina ítauchaya eta ecaemataneasiracacahi te mamirahu. ¹¹ Eti máimitureana ema Viya eta échajisira, ecuneuchava échajica yátupi eta máechajiriruvana éma. Eti ímicatarahiana ítátivaca ena echamuriana, vahi éñamaimahi eta etumeva máijaruruhehi ema Viya. Étavenehi éhisirahi ema Viáquenu Jesucristo, tamutu tauri eta jácani íchaqueneana apaesa nacunacha ema Viáquenu namutu ena tímahaheana. Éma, ¡tétavicavahi eta macunachacarevahi! ¡Tétavicavahivare eta máitupajijiasiravahi eta máechirahavihi tiuri! ¡Máitavacacahivare eta véhisiraya éma! Amén.

Vahi ecuavamirahu eta ecatajivairaya táichavene eta éhisirahi ema Jesucristo

¹² Némunaruqueneana nuparapenaveana, vahi ecuarami eta muracairaya eta iátajivanayare, tímicitijiricavayarehi táamicarehini eta eyehe. ¹³ Evapinavachucha taicha ecapayayaracahi eta macatajivairahi ema Cristo apaesa evapinava te jena sáchezare eta enecapirayare éma eta máucupaisiraya mámirayarepahi eta majaraiva. ¹⁴ Te náumehahepuca máichavenéhahi ema Cristo, tétavicavayare eta iúricacarevaya éti. Taicha tiávahácaheyare ema Espíritu Santo, másihaquenehi te majaraiva ema Vicaiyaquene. Tayanapane náepurupuca éma, étisera ecunachahi éma. ¹⁵ Te etiarhipuca eti ecatajivahi náicha, tacui-

jasera étaimahi tiviuchahémahi jácani ecapahivainahini, iámeraivainahipucáini, váhivare étaimahi tiviuchahémahi jácani ímisiapirasiravainahipucáini tayehe eta náichaqueneana nácani apanana achaneana. ¹⁶ Étiserá, te ecatajivapuca táichavenénahi eta éhisirahi ema Cristo, vahi ecutsiriha. Evapinavachucha, ehasulupayachavare ema Viya tayehe eta ecaijarerahi eta máijare ema Cristo.

¹⁷ Puiti juca sácheana viávacurehi, táitecapaurehaviripa ichape eta vicatajivairayare, mavarairahi ema Viya vímereuchava eta viúriva víti machichanaveana. Énasera ena masuapajirairahanahi eta náichuirahi ema Viya, páureanasami taicha tíápajucava eta nacatajivairaya, ichape eta náicufaya. ¹⁸ Ichape eta vicatajivairahi te juca apaquehe viti macuchucureanayarehi ema Viya. ¡Páureanasamisera ena achaneana masuapajirairahana, váinarajiqueneanahivare! ¡Ichapepanayare eta nacatajivairaya! ¹⁹ Puiti viti véhicanihi ema Cristo, ichape eta vicatajivairahi. Váhisera vicainajiruvaimahi. Vímiyanavayarehi vicha eta táuriqueneana. Vácasiñava mayehe ema Vicaiyaquene eta majaneasirahavivare, taicha éma, tétavicavahi eta máitauravahi.

Emá Pedro maconsejachavaca ena machamuriana

5 Tiuri puiti, nuparapenaveana, nuvaraha nuconsejachahe emutu eti pastoreana ejaneacanahi ena vichamuriana. Nútiripa pastornuhi. Énerichuvare testigonuhi eta nímararasirahi eta macatajivairahi máepenirahi eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vikatuparahairaya viávihayare te majaraiva ema Cristo te táitecapa eta machaviraya. ² Tauri eta ejaneasiravacaina namutu ena vichamuriana, taicha éna tímicutijiricavahi uvesanainahini mayehe ema Viya. Ítauchayare eta etuparacasivahi. Ema Viya mavarahahi evapinavahini eta ejaneasiravacahi. Vahi ecuyacujiquenehavaca. Váhivare ecupanerecha ecavacha. Evapinavayaresera eta ecaemataneasiravacaya. ³ Váhivare ímipananájicavacáimahi taicha vahi ecavanaravacahini. Ímerecayarehisera eta iúrivaya nayehe, apaesa éna náehica eta iúrivana. ⁴ Apaesa te machavapa ema yátupiquene Pastor eta viyehe, tétavicavaya eta macunachiraheya. Tíjaracahenapa éma eta evachayare ícuchihi. Máitavacacainapa eta ecachaneraya éma te mávihahi eta te majaraivahi.

⁵ Eti apanava eti amaperuana, nuconsejachahe: Esuapayare eta navanesiraheana ena víyarahana. Emutuyare esuapacaca. Mánsuhénahi. Taicha ema Viya

vahi majapanuimahi ena ticasíñavavairicana. Tétavicavasera eta majapanuiravacaya ena mánsupaneremuanahi. ⁶ Te ímereca eta emansuvavacahi tayehe eta ecasiñavairahi eta me Viya, éma, te máimahapa tiuri, ticatiuchahenapa te tamutu eta íchararacavaqueneana. Tásiha, tétavicavayare eta iúrisamurevaya. ⁷ Te tatiarihipuca eta éñamiravana, emetaca tamutu ema Viya. Éma, ticanaracaheyare taicha tétavicavahi eta máeñamiravahi eta eyehe.

⁸ Ecuneuchava yátupina. Ejaneacavahivare, taicha ema viánarahi Váinaraji, macuti eta táíñehiquene sárare tatanujiriricahi eta tanicayarehi. Ene macahehi éma, matanucahi ena máquipairuanayare. ⁹ Eta tache, túmehéna ecanarairayare éma, machu máquipaicahe. Ácasiñava muraca eta mayehe ema Viáquenu. Écharichuhi vahi ácarichuhini eta ecatajivairahi. Túmehénahi eta ecamichiraina, ecutiya eta nacamichirahi ena vichamuriana ticavasanahi te tamutu avasareana. ¹⁰ Ema Viya, tíchuhahavihi, mavarahahi visiapayare tayehe eta mávasa táichavenehi eta véhisirahi ema Jesucristo. Ánipirinesera eta ecatajivairaya puiti juca sácheana. Émasera ema Viya, tétavicavahi eta majapanuravahi. Éma, tímararacahahi eta ecamichirahi; tásiha éma, tíjaracahenapa eta evayuchiravainapaicha eta etumevaya. Tájina ticayayacahemahi máicha. ¹¹ Éma, ¡máitavacacahi eta macunachacarevahi! ¡Macachuricahi eta máitupajijíásirava, máitavacahivare éta! Amén.

Eta táichecuaráqui eta macartane ema Pedro

¹² Ímati emutu ema vichamuri Silvano. Éma, tétavicavahi eta máitauravahi te tamutu. Puiti, émahi ema tíáminanurihi eta juca nucartane. Núti, ánipichichahi nájurehi eta eyehe. Esamanusera eta nuconsejachi-rahehi. Eta numetasirahehi tamutu eta juca, nuvaraha nétumechahe eta véhiruhi, taicha yátupihí eta vicaijuheirahi me Viya táicha.

¹³ Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecutihi eti eta manerejirahehi. Téchajicahehivare ema nuchicha Marcos.

¹⁴ Núti, eta néchajirisirahehi éti nuchamuriana, nuvaraha nétserarecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, máijaracahihini tanaraca tamutu eta epanereruana emutu éti machanerana ena Viáquenu Jesucristo.

Tamutupa eta juca néchajiriruvahi eyehe.

2 Pedro

1 Nuti Simón Pedro, mavanaranuhi ema Jesucristo. Manerejirunuhivare mayehenuhi apóstole. Nucajurehe eta juca nucartane eti nuchamuriana taicha tétavicavahi eta evapinairavahi eta juca véhiruhi. Puiti éti apanava ejacapacarehivare me Viya, ecaicuchiripavare eta iúchucuiraya maicha ema Viáquenu Jesucristo. **2** Puiti, nuvaraha tajurucaini eta ecaicutiaraira eta máemunasirahehi ema Viya, tásihaquenehi eta ímatiequenehairapaipahi eta mapanereruana éma, émapa ema Viáquenu Jesucristo. Tájnavare tahapapirichahini eta táurivahi eta epanereruana.

Eta náurivana ena téhicanahi ema Jesucristo

3 Táichavenehi eta vímatirahi ema Viya, tétavicavahi eta máitupajijiasiravahi eta macaemataneasirahavihi eta vítaresirana, mavarairahi vétaviuchahini eta viúrivahi, vicutiyarehi éma eta masantuvahi. Étahi eta mapanereruhi eta máichuirahavihi. Tásiha, visuapanepa taicha vímahapa eta majaraivahi, vímahavarepa tétavicavahi eta máurivahi taicha camuriquenehi eta táuriqueneana máichaqueneanahi. **4** Tíjaracavaripavare éma táetaviuchayare eta viúricacarevanayare maicha te jena sáchezare, tijamurachacareanahi tamutu. Muracahi eta vicasiñavairahi eta máitauhirayare tamutu eta júcana, taicha tétavicavahi eta máurivahi étapa eta majaraivahi. Táichavenehi eta ecasiñavairahi mayehe, tinacasamurechahehi eta ecasamurerayarehi étachucha eta táuriqueneana, ecutiyare éma eta macasamurerahi eta táuriqueneana. Vaipa tivayuacahemahi eta tajamurachaqueneanahi eta íaqueheana, taicha tétavicavahi eta tamaeperajichiraheni eta cape juca eta ítaresirana. **5** Eta tacahe, etuparahahi puiti, ímiyanavahini eta éhisirahi éma, epamicavavarehini iúriya nayehe namutu ena achaneana. **6** Epamicavavaréni ecaravahu apaesa ímatiequeneha eta mapanereruana ema Viya, ecaravahuvarehini ecaratacava, étumechavavarehini eta ecamichira eta jácani íatájivana. Epamicavahivareni ácuti ema Viya eta masantuvahi. **7** Epamicavahivareni iápajucaya eta émunaravahi nayehe ena echamuriana, ecajirayare. Epamicavahivareni eta émunaravahi nayehe ena apamuriana achaneana, tayanapane vahi náehicahavihini. **8** Eta tacaheyare eta ítaresirana éti, ítamuturusirahi tamutu eta júcana iúriyanahi, ecutiapaipahi ema Viáquenu Jesucristo eta máurivahi éma. Énerichuvare te muracahi íjaracava ecaravahupaipahi eta júcana, tiápajucavapaipahi eta ímatiequenehairahi eta máimiturapiana, tiápajucavapaipahivare eta

etumeva tayehe eta ecaemataneasirahi éma. **9** Nácanisera vahi návarahahini nacaravahu, tímicutijiricavahi ena púchuquiana énainapa ticatajivanayare. Taicha náemitisicaipahi eta máepachinachiravacahi ema Viya tayehe eta táinapurénihi napecaturana náichaquenénihi cape eta náitaresirahi.

10 Étisera, eti nuparapenaveana, nuvaraha échavahini eta máichuiraheni ema Viya, manerejisirahehi. Epamicavahini eta ímeresirahi yátupi eta machichaherahi. Eta ímiyaniravahi eta ecaravahuirahi eta juca néchajisiqueneanahi, jéhesare, tájina tímicaquipaica-hémahi. **11** Tásiha, tétavicavaya eta iúricacarevaya eta machimapiraheya ema Viáquenu Jesucristo te macuchucuhahepa eta te juca apaquehe, mámiraheya eta te mávacureya. Máitavacacaya eta macachanerahaviya vimutu.

12 Tacahe níti, nupamicavahi puiti eta némechiraheya eta júcana, tayanapane nímatiheni eta ímatiripahi, muracaripavare eta éhisirahi eta yátupi-queneana ímitucasivanahi. **13** Németeaca nétupicavahi eta juca nuconsejachiraheni puiti juca nítaresiraichaha te juca apaquehe. **14** Taicha vaipa náyeremahicha eta nítaviraya. Ema Viáquenu Jesucristo tímimetacanuhi eta nunarasiravanenapa te machacaya. **15** Nuvarahahisera vahi ecuemitisica eta juca numetaruhéanahi, tayanapanéinepuca népenaipa. Eta tacahe, nupamicavahi eta nímiájurecahe emutu, taicha nuvarahahi échayarehi tamutu sácheana.

Viti vímahahi eta majaraivahi ema Jesucristo

16 Viti vitupiruva eta vímitusirahehi tayehe eta táichararacavayare eta machaviraya ema Viáquenu Jesucristo, máimeresiraya eta máitupajijiasirava ichape. Vahi vépiyahirahimahi, váhivare vivehaquenéna te vichuti. Vímatipa yátupi, taicha vímahahi te viúquihana eta majaraivahi eta aquenucairahi. **17** Taicha víti vitirihihi te machacaya ema Viáquenu Jesús, vicachanehi éma tayehe eta cerro santo, te vinecapaequenehapa eta macajareirahi éma eta Aquenucairaya. Visamahivare eta mahu ema Tata Vicaiyaquene eta macunachirahi ema Machicha. Ánipa macahehi: "Ema maca éma yátupiquenehi Nuchicha némunaruquenehi. Tétavicavahi eta núrismurevahi máicha" macahepa.

19 Víti vítametacahi eta nacayemaqueneanahi ena víyaranaini profetana tayehe eta Sagrada Escritura, eta náechajisihairahi eta aquenucairayarehi ema Viáquenu. Eta náimiturapiana tacutihi eta tajaraiya eta lámpara eta tamicauchirahavihi apaesa táuriyare eta

vítaresirana te juca apaquehe taurivahi. Tacahe, étumechava tayehe eta ecuchapiravaya eta sáchezare te márajapainapa ema yátupiquene eta majaraiva, tétavicavayarepa eta mamicauchiraheyare tamutu eta esamureana. Tacahe, tituparacahehi esuapayare eta juca esamaqueneanahi vímitucasivanahi. ²⁰ Nuvarahasera yátupina ímatiequeneha eta juca: Vahi táurica viveha te vichuti eta vímijachirahi eta tacayemaqueneanahi eta Sagrada Escritura. Vicatuparahahi vicarahuyarehi eta yátupiquenehi. Ena víyarahaini profetana, váhivare navehaquenénahíni te nachutiana eta nájuequenehairahi eta máechajiriruvana ema Viya. Ema Espíritu Santo, éma tímitucavacahi eta nájuequenehairaya éna tayehe eta Sagrada Escritura vímahaquenehi puiti.

Natiarihiyare ena tépiyahirahianaya tímijachavanayare pastoreana

2 Tiuri, acane natiarihivaresera ena tépiyahirahiana tímijachavanahi profetana te namuri ena náchucanaveanaini israelítana. Ene tacaheyare puiti, natiarihiyareva ena tépiyahirahianaya, tépiyacavanaya pastoreana eyehe. Éna típichasicaheanayare. Témejecapavachaheanaya, apanaya eta náimiturapiana. Vahi émairahi náechajisiha ema Viáquenu ema náimicapuruhivare. Énajivahi tíchavanahi natanucahi eta náicuñayare, táijahúchiravayarehi eta náemitiequenehairayare. ² Camurianayare ena náemejecapavaruanayare, náehicainapa eta nayeherepi, táetaviuchirahi eta natuhusivahi. Náichavenehi éna, téchajicanainapa ena apamuriana achaneana, nacaecahinapa eta juca véhiruhi táurinaquenehi achene. ³ Ena nani, tímitucaheanaya eta náimiturapiana náepiyahiraivanahi, taicha navarahahi títuvavana tivereacaheanainapa éti, taicha tétavicavahi eta najamurarasirahi eta plata. Tájinasera náipuinayare, vahi táevejuacaimahi eta náicuñayare. Taicha acanevacaipa eta tacaecherairahi eta náicuñayare.

⁴ Nacutiyare ena ángeleana téjecapavanahi. Tájina vahi maperdonachavacaimahi ema Viya. Máquijicavacapa tayehe eta táíñehiquene infierno távihahi eta timapicuquene. Ticaitihanahi puiti te cadena. Te táitecapapa eta juicio, tiápajucavanainapa eta náicuñayare éna. ⁵ Nuvaraha némechahe nayehe ena machamurianaini ema víyarahaini Noé eta acane, váhivare májapanuvacahini ema Viya táichavenehi eta namasuapajiraivahi. Macamiricapa eta ichape tiquiva náicuñahi. Téricanahi namutu ena nani achaneana, taicha náepuruhi eta máichuiravacahi ema Noé, táurivayarehini eta náitaresirana. Nacarichuhi tíuchucuhanahi ema Noé, esu mayena, énapa ena sáisiqueneana machichanaveana. ⁶ Nuvaraha némechahevare nayehe ena ticavasaini te avasare Sodoma, étapa te Gomorra, váhivare majapanuvacahini ema Viya. Macamiricahi eta yucu, náicuñahi éna. Táijahúchavacapa tacamitiequenehavaca namutu. Títavanapa, amairihanecha tsimapa eta náitavirahi. Ema Viya máimerecachi eta juca, nayehe ena najuru-

reanapa te juca apaquehe puiti, mavarairahi máe-mechavaca ena achaneana váinarajipanereruanahi te napicayarepuca. ⁷ Téhesera te nataracu, matiarahi ema víyarahaini ticaicare Lot. Éma, tamutuhi sácheana ticatisamurevahi taicha máimairavacahi ena achaneana náichirahi eta tauriqueneana, masamirahivare eta náechajisihairahi eta titsirihacareanahi. Téñamavahivare éma eta máimairavacahi ena achaneana, natuhusivavacahi eta náitaresiranahi. Tacahe, macuchucuhahi ema Viya, taicha éma Lot, tétavicavahi eta máurivahi, tisuapajirahihi mayehe ema Viya. ⁹ Eta tacahe, ema Viya tétavicavahi eta macatiuchirahavi puiti, ticuchucuhahavi viti véhicanahi éma, tayehe eta viátacajivana. Énerichuvare yátupihhi matsecaripa eta náicuñayare nácani achaneana masuapajirairahanahi.

¹⁰ Ema Viya, yátupihhi máicuñacavacayarehi namutu ena tivayuchanahi eta náechipejisirahi eta náqueheana taicha tétavicavahi eta tavayuasiravacahi eta natuhusivana, énapa ena tépuruanahi ema Viáquenu eta émairahi téchavacahi. Ena nani, máeyajanahi. Mapicaurairahana, nájina návamirahuqueneana eta náumeharaiva. Nasapiha nacaecahivare ena ángeleana tiámana eta majaraivahi ema Viya. ¹¹ Apanasica ena ángeleana tiávianahi te mamirahu ema Viáquenu, vahi náijaracavahini nacajacharecahini ena váinara-jiana, tétavicavahinéni eta natumeva. ¹² Énasera ena nani tépiyacavanahi pastoreana, nacaecahisera eta téhicacareana namaitururequeneruanahi. Éna, nacutihi eta táitaresira eta sárare, tájina nacaicutiaraqueneana. Najurupairuchucha te apaquehe. Éna, táurivasahi eta justicia, máejehahi náerataca táimicapacavaneyare. Tépenanayarehi nacuti eta táepenira eta sárare. ¹³ Éna, náimicatajivachahi nácani apamuriana achaneana. Páureanasamisera éna, tiápajucavanayare eta nacatajivairayare.

Ena nani, tétupicavanahi eta náimairavahi, tíurismurereácavanahi eta nacavahairahi tamutu sácheana. Táitaurevaquenehi tétavicavahi eta natsirihacarevayarehi eta namaetupicushivanahi, eta nacasiriquirahehi te jácani énisiracacana ena echamuriana. Ticamapuravanahi ticurismurechavana, navarairahi náituruca jácani najamurachaqueneana. ¹⁴ Namutuchucha najamuracha nácani esenana. Tájina náipuina eta náesenamarévana. Náechemaha eta náiturusraya súcani esena máejerarehi. Náimitucavare ena ajairana tájina náituruéqueneha, nacuti-yare éna eta náesenamarevanahi. Tájina tivechuquihaimahi eta nacapecaturairahi. Ecuñaraquisera eta náicuchihi éna. ¹⁵ Témunasiricavanahi éna, taicha namaimatirahi eta achene nacajuheya eta táuriquenehi. Nacutipahi eta mayeherepini ema maca achane Balaám, machichaini ema Beor. Éma, tétavicavahi eta majamurachirahi eta plata, mavachayare eta máichirayare eta tauriqueneana. ¹⁶ Ema Viya máimahahi eta taurivahi eta mapaneruhi ema Balaam. Eta tacahe, eta burro macaperaquenehi ema Balaam téchajicapa, tacajachahi ema Balaam. Éma, macacutiarahi

eta táechajiriruvana eta mapera. Enevanepa témitiac-ahi eta mapanereruhi tamauriquenénihí.

¹⁷ Ena nánitátaji achaneana nacutihi eta tiájicu eque. Nacutivare eta úcaji támarairuhi eta técaticava. Éna, jararihipa eta náicuchi náicuñayare tayehe eta táetavire eta tamapicuva. ¹⁸ Ena téchajisiavanapa ticunachavanapa eta náichaqueneana napecaturanahi náiturreanahi. Náiminajicapaipe nácani náiturevanapahi eta táurivainiripahi eta náehisirahi eta táuriqueneana, tichavanapaipa tayehe eta tamaeperajivanahi eta náitaresira. ¹⁹ Éna, ánipa tacahe eta náechajiriruvahi: “Víti, nájina vísapaimahi tipamicahavi. Tacutirichuhi te vicha eta tamauriqueneana étapuca eta táuriqueneana. Vítijiva véchinavahi eta vítaresiraya” nacahehi. Éna, tímijachavanahi líbreana. Énaserá tiápajucavanahi ticaeratanahi taicha eta tavayuchiravahi eta napecaturana étapa eta namaeperajivana. Nácani tavayuaranahi eta napecaturana, vaipa énaínahini náechinavahini. ²⁰ Tacutiquene nácani tínajicavanahi eta náehisirahi ema Viáquenu Jesucristo, tichavanapa tayehe eta tamaeperajivahi eta náitaresirana te juca apaquehe, éna, tiápajupanavanapa eta nacaicuñairayare, taicha eta naviurevahi. ²¹ Tiúripánaichuhipucaini vahi nacuatihini eta táurinaquene véhiruhi, váchupa náimatiripahi eta tiúrina achene, tásiha tínajicavanarichahavare tayehe eta táurinaquene vanairipi najacapaquenénihí. ²² Jucarihi eta náechajiriruva náchucarapi, ani tacahehi: “Te tiáhica eta tamucu, táimichavayarehi tanica eta táhiruha. Étapa eta cuchi, tamapurují vícachahini éta, taicha técarajicavayarehi te tiúrají”. Ene nacahehi ena tínajicavanahi tayehe eta véhiruhi, tichavanapa tayehe eta tamaeperajiqueneanahi.

Vaipa táyeremahi eta machavirayare ema Viáquenu Jesucristo

3 Némuraruqueneana nuparapenaveana, apihepa puiti nímiamaréca eta juca nucartane. Eta táechajiriruvahi eta apinaquene nucartane, nuvarahahi nuconsejachahe, apaesa tacuija tahapapicahe eta éhisirahi ema Viáquenu. ² Nuvarahavare yátupina eta esuapiraina eta Sagrada Escritura nájureanahi eta acane ena víyarahánahini santo profetana, étapa eta máimiturapiana ema Viáquenu Macatiurahiquene. Étarichuhivare vímiturapihi puiti eta eyehe viti apóstoleana.

³ Tínapucayare nuvaraha némechaheyare eta juca. Te jena sache tánehipa eta táitavirayare, tímerecavainapa ena achaneana ticaecahirahiana tayehe eta juca yátupiqueneana vicuchapaqueneanahi víti. Eta náitaresirahi éna, apanachucha eta tihapapiricavacahi eta náichirahi eta tamauriqueneana najamurachaque-
neanahi. ⁴ Áninapa nacaheyarecacha: “Táicharacava eta juca ecuchapaquenehi. Vuíchahacaru machavahini ema Cristo, ímijachaquenehi tichavavaneyarehi. Vaipa tasuapacare eta machaviraya. Taicha puiti tacutirichuhi eta náitaresirainihí ena viáchucanaveánahini. Tanasirichuhi eta táepaniravahi acane eta apaquehe. Vahi táitsivachavahini” nacahepa.

⁵ Ena nani, vahi návarahahini napanerequeneha eta táitsivachiravahi maicha ema Viya. Jéhesare éma, eta acane, máechajiriruchucha eta máepiyasirahi tamutu eta anuma étapa eta apaquehe. Máechajiriruchuchavare eta táimeresiravahi máicha, eta tiájipahi tétupiecachi te une. Énerichuvare, te táequenepe, únehi eta náicuñahi máicha, macamirisirahi eta ichapequene tiquiva. Téricanahi namutu ena masuapajirairahanahi. ⁷ Numetacahe puiti: Ema Viya tiápechavayare máicuñacayare eta juca apaquehe. Yúcuayahisera eta tacamitiequenehayare tamutu eta anuma étapa eta juca apaquehe. Taicha éma, manacaripahi eta máechajiriruva, máicutichahi eta tayerevaya étapa eta távaphianahi. Jéhesare, te jena sáchehare, títapecavacayare namutu ena achaneana masuapajirairahanahi váinarianahi.

⁸ Váhivare ecuemitisica, nuparapenaveana, eta matuparaquihí ema Viya, vahi tácuti eta vituparesira viti achaneana. Éma, étana sache matuparacahi, vítisami mil áñoripa eta vitupachirahi tayerevaipa. ⁹ Éma, manacahi eta juca tayerevahi, mavarairahi macuchapayare ena achaneana eta náeneuchiravayare mayehe. Vahi tácahequenénahini eta juca táitaresirahi maicha eta apaquehe. Ichapemuri eta macayeherahi paciencia eta viyehe, mamavarairahi vámutuhichaini vémitiequenehíni. Nararihiserá ena achaneana téjecapavanahi te napanereruana. Eta náimairahi eta mayerevahi ema Viya eta máicuñasiravacayarehi, náimijachahi vaipa maratahaimahi máicuñaca eta juca apaquehe.

¹⁰ Esamanuchaha. Te táitecapapa eta sáchehare táitavirayare tamutu maicha ema Viya, vahi vinecapauchavaimahi, taicha tacutiyare eta mayumurusirava eta máitesira mácani tiámerahi. Eta anuma, étapa tamutu eta távaphianahi, tamutuyare témitiaca. Ticaemayare muraca, tacutiyare eta tacaemaira eta ichapequene yucu te ichape curiche. Étapa eta tiávihanahi te apaquehe, tamutuyarehi títava, énapa ena távaphianahi. Tamutuyare táijuchayare eta yucu.

¹¹ Tásiha éti, écharipahi eta juca táitavirayarehi eta anuma étapa eta apaquehe, táijuirayare tamutu te yucu. Puítipa tacamunuipehi ámutuhini ésenicahini ema Viya, étaviuchahini eta iúrivahi eta ítaresirahi. Puiti, yátupi ávarahahini táitecapavanehini eta jena sáchehare. Eyaseaca ema Viya táitecapavane. ¹³ Taicha viti machaneranahi ema Viya, vicuchapainapa eta arairuyare anuma étapa eta arairuyare apaquehe, vícuchihi mayehe ema Viya. Tájinainapa eta pecatuana, vaipa tihapapicahavimahi. Tétavicavayarehi eta táuriva.

¹⁴ Eta tacahe, némunaruqueneana nuparapenaveana, puiti eta ecuchapirayare eta juca tacaitsivairaya tamutu, étumechavayarechucha eta ecasiñairahi ema Viáquenu Jesucristo, apaesa tauri eta machimapiraheyare, tacuija etapiravainahi. ¹⁵ Échava yátupina eta macayeherahi paciencia eta viyehe ema Viáquenu taicha mavarahahi ticuchucuhaviya. Étarichuhivare tacahehi eta máimiturapihi ema apana viparape vémunaruquenehi Pablo, táichavenehi eta

máitupajjiasiravahi máijjararuhi ema Viya. ¹⁶ Tamutu eta macartaneana máimiamarermanahi eta eyehe, étarichuhi táechajisihahi eta júcana. Jararihisera tica-
jerahi eta ecaicutiarairainahini. Nararihisera ena
ticaravahuana apaesachicha, vuíchahavare túmeva-
caimahi eta náehisirahi. Náequepicasamichucha eta
táimiturapi eta macartane. Nahapapicavare eta
táimiturapihi eta apana Escritura. Táimicuñacavacaya-
resera eta nahapapisirahi.

¹⁷ Eta tacahe, némunaruqueneana nuparape-
naveana, vahi tacumapuruji eta ímatiequenehairahi

eta juca, machu nahapapicahe eta epanereruana ena
tivayuarahianatataji. Máchuvare náiminajicahe eta
éhisirahi ema Viáquenu. ¹⁸ Puiti, nuvaraha tajurucapa-
richuchaini eta ímatiraina ema Viáquenu Jesucristo.
Tajurucaparichuchavaréni eta evapinairavahi eta
máemunasirahehi ema Ticatiuchahavihi. ¡Tétavica-
vahini eta vijirauchira, vicunachahini éma, te vinara-
sirana, te véjamisirana! ¡Te visiapainapa eta mávasa,
vímiyanavayare! ¡Amén!

1 Juan

Eta viúrujasira ema Jesucristo

1 Nuti Juan nímiama-reca eta juca nájure eta eyehe. Nuvaraha numetacahe éti, eta véchaquenehi mayehe ema Jesucristo, ema tíjaracahavi eta echájirirucava ticaitarecarahi. Éma, matiarhihi acane te tépanavapa tamutu. Tacahe, tiúcupaicahi, tímerecavahi eta viyehe. Visamapa eta máechajiriruva. Camuri eta sácheana eta vímararasirahi éma te viúquiha. Vé-mamahaca te vivahu. ² Éma, matiarhihi acane, manasiqueneripahi mayehe ema Maiya. Tiúcupaicapasera eta viyehe. Víti vímatipa eta achánequenériahi éma. Tásiha, puiti vimetacahe eta juca vímahaquenehi étapa eta visamaquenehi. Vimetacahe taicha vivaraha iúrujicavahíni eta viyehe. Taicha víti viúrujicavahi mayehe ema Tata Vicaiyaquene émapa ema Machicha Jesucristo. Tásiha, éti apana iúrujicavahíni nayehe. ⁴ Tásiha, nucajurehe eta juca taicha nuvaraha yátupina eta iúrisamurevaina.

Eta majaraivahi ema Viya

⁵ Vimetacahe eta máimitusirahavi ema Jesucristo. Eta juca eta macayemaquenehi: “Jararihi eta tijarahi mayehe ema Tata Vicaiyaquene. Tájina timapicuina mayehe, taicha mavayure eta máuriva”.

⁶ Tiúri, te vinasirichupuca víti te timapicu, tásiha te vicahehipuca: “Viúrujicava mayehe ema Viya”, tásiha víti vépiyahirahiripa. Vahi viúrujicavahini mayehe, váhivare visuapahini eta mavanairipiana. ⁷ Téhesera yátupina eta visuapira eta mavanairipiana, vinasirichuhi eta te majaraivahi ema Viya, tacutihi eta manasarichuhi éma eta te majaraivahi. Tásiha, eta vinasirarichuhi eta te majaraivahi, viúritarecayarehi eta viúrujusiracaca nayehe ena vichamuriana. Énerichuvare máepachinachayare tamutu eta vicapecaturairana, taicha te tépenapa ema Jesucristo Machicha ema Viya, máepusaicahi eta máitine eta máepachinachirahaviyarehi.

⁸ Te vicahehipuca: “Tájina eta nupecaturaina”, tacahe, vahi vátupiemahini eta vipanereruhi. Vítijiva vivayuarcavahi víti.

⁹ Téhesera vitupiruvahi eta vimetauresiravahi eta vicapecaturairana mayehe ema Viya, jarahiripa eta maperdonachirahavihi. Taicha tíjaracavahi éma eta maperdonachirahaviyare, vahi táeñamavacarehíni. Énerichuvare májahaya tépachinachahaviyare tamutu eta tauriqueneana viyehe. ¹⁰ Téhesera vicahehipuca: “Tájina nupecaturaina”, vépiyaquenehahi ema

Viya. Vímicutijiricapa ema máepiyahirahini. Vahi tátupiruvahíni eta vijachapirainahini eta máechajiriruva.

Ema Jesucristo, ema ticatajirahi

2 Nuchichanaveana, nucajurehehi eta júcana taicha nuvaraha vahi ecucapecaturaini. Téhesera íchapuca eta pecatu, mararihi ema ticatajirahi viyehe te mamirahu ema Tata Vicaiyaquene. Ticajare Jesucristo ema ticatajicahavirahi. Éma, matapiravare; té-tavicava eta máuriva. ² Éma, tímicapacavahi táichavenehi eta macaepahairayarehi eta vipeccaturana apaesa viúri mayehe ema Viya. Váhisera tácarichu eta vipeccaturana víti. Táimicapacahi éma eta macaepahairayarehi eta napecaturana namutu ena achaneana te juca apaquehe.

³ Tiúri puiti, vicasínavahi eta vímatirahi ema Viya, taicha visuapahi eta mavanairipiana. ⁴ Te nararihipuca ena nácani achaneana nacahehi: “Núti nímati ema Viya”, téhesera vahi nasuapahini eta mavanairipiana, tacahe náepiyevahi éna. Vahi tásuapacarehini eta náechajiriruva. ⁵ Étasera eta visuapirahi víti eta mavanairipiana tímechahavihi eta viávahásirahi ema Viya. Yátupihíni eta vémunasirahi ema Viya. ⁶ Víti vicahehi: “Viávaháca ema Viya”, tásiha, tacamunuhi eta táurihini eta vítaresirainahini tácutihini eta táurivahi eta máitaresirahi ema Jesucristo.

Eta mavanairipi ema Viya eta vémunasiracacaina

⁷ Nuparapenaveana, nuvaraha némechahe te juca carta eta macavanairipirahavi ema Jesucristo eta vémunasiracacaya. Te tépanavainapa eta ecaijuherahi ema Jesucristo, vímitucaheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi ema Jesucristo. ⁸ Puítirichu nuvaraha tápajucava eta ecaicutiarairaya eta máemunasirahavihi éma. Manasarichuhi éma te majaraiva ema Maiya. Tásiha éti, te esuapa eta juca mavanairipi, te émunacaca, epauchainapaipa eta majarai-va ema Viya. Térajicavainapa eyehe eta timapicu.

⁹ Te nararihipuca ena nácani achaneana nacahehi: “Núti návihahi eta te majaraiva ema Viya”, téhesera nacatichahipuca ena nachamuriana, návirarichuhi te timapicu. Vahi napauchaimahi eta majaraiva ema Viya.

¹⁰ Nácanisera náemunacahi ena nachamuriana, nanasirichuhi te majaraiva ema Viya. Tásiha, tiúrihi eta napaisirahi, apaesa vahi náejecapavahini. ¹¹ Énasera ena nácani nacatichahi ena nachamuriana, nanasi-

richuhi éna te timapicu. Vahi náechahíni eta napaisirayare eta náitaresira, taicha eta timapicu vahi táis-
apahíni náimairiricahíni.

¹² Eti nuchichanaveana, nucajurehe taicha néchahi eta maperdonachiraheripahi ema Viya eta epecaturana émavenehi ema Jesucristo, táichavenehivare eta ímatirapa ema Tata Vicaiyaquene.

Eti ávinaveana, nucajurehe taicha éti ímatihi ema Jesucristo, ema matiarhiquenehi acane te tépanavapa tamutu.

Eti átinaveana, énerichuvare nímiajurecahehi taicha tanasirichu iúnacahi te esamureana eta máechajiriruva ema Viya. Tásiha éta, tétumechahehi eta ecapaquechiraipahi ema Váinaraji.

¹⁵ Emutu eti, vahi ecujamuracha eta tamauriqueneana te juca apaquehe. Váhivare ecujamuracha eta tatiarhiqueneana tayehe eta juca apaquehe. Te nararihipuca ena najamuracha eta tamauriqueneana te juca apaquehe, vaipa émainahini náemunaca ema Tata Vicaiyaquene. ¹⁶ Taicha tamutu eta napaneruana ena achaneana te juca apaquehe, tájina táurivaina. Napanerechahi naicha eta tamauriqueneana. Najamurachaipa eta apayehe. Navarahaipa nacayehe náimijachaipapuca tíuríhi eta náimairahi. Te ticaimahaqueneanapa, tisiñavanapa táicha. Eta juca napaneruana, vahi máijjaruinahini ema Tata Vicaiyaquene.

¹⁷ Numetacahe puiti: Títavainapaipa tamutu eta apaquehe. Énerichuvare títavainapaipa tamutu eta najamurachaqueneana ena achaneana. Vítisera, te visuapa eta mavarahaquene ema Viya, máichecuaraqirénapa eta vítaresira.

Ena ticatianacana ema Cristo

¹⁸ Nuchichanaveana, puiti tiánehinapa eta táichecuiraya, títavainapa tamutu. Vimetacaheripa eta máitesirayare ema maca achane ticaijare Ánticristo, ema ticatianacayare ema Viáquenu. Puítiripa nararihipa ena ticatianacanahi ema Cristo, navarahaipa máitecavane ema Ánticristo. Tásiha, véchainapa eta tiánehinapa eta táichecuiraya tamutu. ¹⁹ Ena ticatianacana ema Cristo náuchurehi eta viyehe. Váhisera víumurvainahini éna. Taicha te víumurvainahini, nanasirichuhini eta viyehe. Náerajirupaipahisera eta viyehe. Tásiha, vímatipa eta vahi víumurvainahini.

²⁰ Ema Viáquenu Jesucristo tíjaracaheripa éti ema Espíritu Santo. Tásiha, emuturipahi ímati eta yátupiqueneana. ²¹ Nucajurehehi táichavenehi eta ímatirahi. Nuvaraha ácaicutiaraqenénahini eta yátupiqueneana. Te esuapa eta yátupiqueneana, vahi ácutimahi ena tépiyahirahiana.

²² Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús váhira émaina Cristo Machicha ema Viya” nacahehi. Ena nácani achaneana, ticatianacanahi ema Cristo. Tacuti eta nácahehini: “Váhira émaina yátupiquene Tata Vicaiyaquene, váhivare émaina Maiya ema Jesús” nacahepaini. ²³ Numetacahe eta apana: Nájina tiávahácanaimahi ema Tata Vicaiyaquene ena vahi nasuapahini

ema Jesús eta machichairahi ema Tata Vicaiyaquene. Viávahácahisera víti ema Tata Vicaiyaquene vimutu viti visuapanahi ema Jesucristo eta machichairahi ema Viya.

Eta viávahásirahi ema Jesucristo

²⁴ Tásiha, ecapanereruyaréchucha éti eta máechajiriruva, tamutu eta esamaqueneanaripahi eta te tépanavainapa eta ecasiñairahi ema Jesucristo. Eta ecapanereruiria eta júcana, iávahácayare ema Tata Vicaiyaquene émapa ema Machicha. ²⁵ Taicha tíjaracavahi ema Jesucristo tíjaracahaviya eta vítaresira máichecuaraqirénapa.

²⁶ Puiti nararihi ena navarahayare tivayuaracaheana. Tásiha, nucajurehe apaesa ecuneuchava éti nayehe ena témejecapavarahiána.

²⁷ Éti, mávaháruheripa ema Espíritu Santo mavaneruhi ema Jesucristo. Tásiha, nájina apanaina ácamunuhini máimitucahehini, taicha tímitucahehi tamutu ema Espíritu Santo. Éma, yátupiquenehi eta máechajiriruva. Éma, vahi tépiyahirahi. Timetacahehi éma: “Ánasirichu iávahácahi ema Jesucristo”.

²⁸ Puítisera, nuchichanaveana, ímiyanava eta iávahásiraina éti ema Jesucristo apaesa túmesamurehéina éti, vahi ecutsiríha mayehe eta te machava. ²⁹ Éti échahi eta máetaviuchira eta máurivahi ema Jesucristo. Tásiha, ímatiyare ena apamuriana machichanaveana ema Viya, táichavene eta náichirahi eta táuriqueneana.

Viti machichanaveana ema Viya

3 Nuchichanaveana, tétavicava táamicareva eta máemunasirahavi ema Tata Vicaiyaquene. Yátupihí tímijarechahavihi “machichanaveana”. Puítiripa yátupiquenehi machichahaviripahi. Énasera ena apamuriana achaneana vuíchaha nácaicutiarahíni eta macachichairahavihi ema Viya, taicha vuíchaha náimatihíni eta máemunaravahi éma. ² Némunacasareana, vécharipa eta macachichairahavipa ema Viya. Vuíchahasera tímechahavi éma eta viúrivayare. Vécharipavare eta vicutirayare ema Jesucristo eta te machava. Taicha vímahayare eta máimahiquene éma. ³ Tásiha, vimutu víti vicunevayare eta vicutiraya ema Jesucristo, puiti vácuticaca viúrihini tácutihini eta máurivahi éma.

⁴ Nuvaraha némechahe: Namutu ena tisipecaturana, nacaticha eta mavanairipiana ema Viya, étara eta juca napeaturahi. ⁵ Ema Jesucristo, tájina matapiravaina éma. Vímatiripasera eta tímitecahi éma te juca apaquehe eta macaepahairayare eta vipecaturana. ⁶ Víti, te viávahácahi ema Jesucristo, tituparacahavi vaipa vicuimisiapava tayehe eta pecatuana. Énasera ena ticapecaturarahiana vahi náimatihini ema Cristo.

⁷ Nuchichanaveana, vahi ecuisapava navayuacahe. Víti, te vímisiapavahi tayehe eta táuriqueneana, vímerecoya eta viúriava. Vicutinapa ema Jesucristo eta máetaviuchirahi eta máuriva. ⁸ Te náimisiapava ena

apamuriana tayehe eta tauriqueneana, éta tímereuchavacahi eta machichairavacahi ema Váinaraji. Taicha ema Váinaraji, ema tinacuchahi táquenuhi eta pecatu. Numetacahe eta apana: Ema Machicha ema Viya tímitecahi eta macaepahairayare eta majararueruanahi ema Váinaraji.

⁹ Víti machichahaviripa ema Viya. Váipa vímisiapavaimahi tayehe eta vicapecaturairana taicha vicutinapa éma eta tamajinairahi matapiravaina. Éma, tájina mapecaturaina. Eta macachichairahavihi ema Viya, vahi vicapecaturaimahi. ¹⁰ Nácani vahi tíchanahi eta táuriqueneana, váhivare náemunacahíni ena nachamuriana, náimerecachi eta vahi machichavacainahini ema Viya. Tímerecavanahivare eta machichairavacahi ema Váinaraji. Vítisera, eta víchirahi eta táuriqueneana, étapa eta vémunasiracacahi, vímerecavahi eta macachichairahavihi ema Viya.

Eta vémunasiracaca

¹¹ Te tépanavainapa eta ecasiñairahi ema Viya, vimetacahehi eta mavarairahi eta vémunasiracacayare. ¹² Tásiha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetavichirahi eta mavainarajivahi. Ema maca Abel, táimicapacahi eta masuapajiraivahi, máichirahi eta táuriqueneana. ¹³ Nuparapenaveana, énerichuvare puiti nararihiya ena achaneana ticatichaheanayare éti apana. Váhiserá ecuarami eta juca.

¹⁴ Nuparapenaveana, véchahi víti eta víápechiravaya vítareca te táequenéraya eta vépeniraya. Vícaijuhenapa eta vítaesiraya máichecuaraquireya. Véchahi eta juca, táichavenehi eta vémunasirahi ena vichamuriana. Énaserá ena vahi náemunacahini ena nachamuriana, nanasirichu. Vahi tíuchucuhanimahi tayehe eta náepenira. ¹⁵ Namutu ena ticatichanahi ena vichamuriana, nacutihi ena ticapahiana. Eta náichararacavayare ena ticapahiana, véchahi eta namauchucuirayare. ¹⁶ Ema Jesucristo tímechahavihi eta máemunasirahavihi, taicha tíjaracavahi tépena vítivenehi. Tásiha víti, te jácani táichararacava, tituparacahavi víjaracavayare vépena énavene ena vichamuriana, vímechiraya eta vémunasiracacahi. ¹⁷ Te mararihi ema mácni achane ticaimahaquenehi, te vahi achánesamurénahi mayehe ema machamuri eta macaijuherahi, ema maca váhivare máemunacahini ema Viya. ¹⁸ Nuchichanaveana, vémunacacachucha vicajicaca eta vicayehequeneana. Vahi vicúyacujiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

Vicasíñavaya te mamirahu ema Viya

¹⁹ Tásiha, eta te vémunacaca, véchahi eta yátupirahi machichahavi ema Viya. Téheserapuca tipicacaracavahi eta visamure, vicaesamiricayare eta visamure, taicha ema Viya tímahahavihi eta vicasíñairahi eta majapanuirahavihi. Taicha majapanurahiquenehi éma.

Téchahi tamutu. ²¹ Tiúripána, némunacasareana, te tájina eta tapicacararasiravaina eta visamure. Tásiha, vahi vipicaimahi eta viyasearapianaya mayehe ema Viya. ²² Vicasíñavainapa eta máijarasirahaviyare tamutu eta viyasearuanahi, taicha visuapahi eta mavanairipiana, vicurisamurechahi ema Viya. ²³ Eta juca mavanairipianahi: “Ecasiña ema Nuchicha Jesucristo, énerichuvare émunacaca”. Tacahehi eta mavanairipi viyehe. ²⁴ Te visuapa eta mavanairipiana, vívahácahi éma, énerichuvare éma tívahácahaviya. Véchahi eta matiarahirahi ema Viya eta viyehe, máicha ema Espíritu Santo mavaneruhi éma.

Ena mávaháruana ema Espíritu Santo énapa ena mávaháruana ema Váinaraji

⁴ Némunacasareana, ecuneuchava nayehe ena tépiyacavana ticametarairuana. Taicha puiti nararihi éna. Vahi mavaneruanaina ema Viya, váhivare mávaháruanaina ema Espíritu Santo. Tásiha, te náitecapauchepuca ena návaraha tímitucaheana, éti eyaseresinavaya te yátupipuca vanairucana me Viya. Esamayare te étarichupuca eta vímiturapianahi víti. ² Eta juca eta ímatiarayare ena mávaháruana ema Espíritu Santo te nacahehipuca: “Ema Jesucristo yátupiquenehi achane eta máuchusirahi”. ³ Énaserá ena apamuriana, te náñauchahipuca eta yátupirahi achane ema Jesucristo, vahi mavaneruanaina ema Viya. Éna, ticatianacanahi ema Cristo. Vimetacahehi eta náitesirayare ena ticatianacana ema Cristo. Tiuri, puítirichu nararihipa ani viyehe.

⁴ Nuchichanaveana, éti machichahe ema Viya. Néchahi núti eta emaisapiravahi tivayuacaheana taicha mávaháruhehi ema Espíritu Santo. Éma, túmepanahi mayehe ema Váinaraji, náehiruhi ena nani tivayuarahiana. ⁵ Ena nani, tahapapiricavacahi eta tájiparacana tayeheana eta apaquehe tauriqueneana. Tásiha, ena achaneana máehicarahanahi ema Víáquenu náuricaipa náitecapauchavaca. ⁶ Vítisera machichahavihi ema Viya. Tisamararacahaviana ena tímatiana ema Viya. Énaserá ena apamuriana máimatirahana ema Viya, vahi tíurimahi eta nasamirahavi. Tásiha, tímaticareanaya ena mávaháruana ema Espíritu Santo. Énerichuvare tímaticareanaya ena mávaháruana ema Váinaraji.

Témunarahiquene ema Viya

⁷ Némunacasareana, tacamunu eta vémunacaca vámutu. Taicha ema Viya tímitucahavihi eta vémunasiracacaya. Vimutu víti vémunacacani, étapa tímereuchahavihi eta macachichairahavihi ema Viya, yátupihí eta vímatirahi éma. ⁸ Énaserá ena nani vahi témunacacana, vahi náimatihini ema Viya. Taicha ema Viya, yátupiquenehi eta máemunaraiva. ⁹ Éma, tímechahaviripa eta máemunasirahavihi, eta mavanahirahi ema macarichuquene Machicha. Mavanecahi títeca te juca apaquehe, tíjaracahaviyare eta vítaesirayare máichecuaraquirénapa. ¹⁰ ¡Tétavícava eta máemunasi-

rahavihi! Vítisera vahi vitívainahíni vémunaca ema Viya. Mativahi ema témunacahavihi. Eta máemunasi-rahavi ema Viya, máijararecahi ema Machicha. Mavanecahi tépenayare te crusu étavene eta macaepa-hairayare eta vipecaturana.

¹¹ Némunacasareana, máetaviucha eta máemunasi-rahavi ema Viya; tásiha, vítipa tacamunu eta vémunasiracacáina. ¹² Nuvaraha ácaicutiara eta juca: Nájina tímahaina ema Tata Vicaiyaquene. Téhesera víti, te vémunacacapuca, tiávahácahaviya éma. Tásiha, vicutihi ema Viya eta máemunaraivahi éma.

¹³ Puiti, viti viávahácahi ema Viya, énerichuvare tiávahácahavihi éma. Véchahi eta mávahásirahavihi ema Viya, máichavenehi ema Espíritu Santo mavaneruhi eta viyehe. ¹⁴ Tásiha, viti vicachaneanaripa ema Jesús, vimetacavacapaihi namutu ena vímanarua-napaihi eta máucupaisiraipa te anuma, taicha vivaraha náimatiyare namutu eta mavanasirahi ema Viya máiteca ema Machicha ticatiuchahaviyare vimutu viti achaneana te juca apaquehe. ¹⁵ Tacahe, te nararihipuca ena nacahehi: “Ema Jesús machichara ema Viya”; tásiha, tímaticareanahi éna, mávaháruanahi ema Viya, etapa eta návahásirahi éma.

¹⁶ Víti véchahi eta yátupirahi máemunasirahavihi ema Viya. Eta tacahe, vicasiñavahi eta mayehe. Témunarahiquene éma. Tásiha, víti apana, te vémunarahipuca, viávahácaya ema Viya; éma apana, tiávahácahaviya. ¹⁷ Vétaviuchaya eta vémunasiraya ena vichamuriana taicha eta viávahásirahi ema Viya. Tásiha, vahi vipicaimahi eta jena sáchezare te viyanapa te mamirahu ema Viya. Vahi vipicaimahi taicha machichahavihi ema Viya, vicutihi ema Jesús eta macachichairahi ema Maiya, tayanapanepuca vítarecarichaha te juca apaquehe.

¹⁸ Ena apamuriana achaneana tipicacaracavanahi taicha téchavanahi eta nacaicuñairaya. Vítisera vahi vipicaimahi taicha vicasiñavahi eta máemunasirahavihi ema Viya. Te yátupihipuca vicasiñahi, macaesamiricaya eta visamure eta vipisira. Tásiha, nácani tipicanahi, napicahi taicha vahi nácasíñavahini eta máemunasiravacahi ema Viya.

¹⁹ Víti vémunacahi ema Viya taicha ema mativahi témunacahavi. ²⁰ Te nararihipuca ena nacahehi: “Víti vémunaca ema Viya”; téheserapuca nacatichaichucha ena nachamuriana, éna tépiyahirahianahi. Taicha náimahanénipuca ena nachamuriana, váhisera náemunacahini, ene tacahehi eta namaemunasirahi ema Viya máimahasiquenehi. ²¹ Eta juca eta mavanairipihi viyehe ema Viya: “Émunacanu nuti yátupiquenehi Viya; émunacavare ena echamuriana”.

Virataha vínajica eta tamauriqueneana

5 Yátupihí eta macachichairahavipa ema Viya vimutu viti visuapanahi ema Jesús eta émairahi ema Cristo. Tásiha, vémunacarine ema ticachichahavihi. Tásiha, te vémunaca ema Viya, téhepa visuapa eta mavanairipiana, tituparacahavi tacutiyareichu eta vémunasiraya namutu ena vichamuriana, taicha

machichanaveanahivare éna, viparapenaveanahi te mavahuana ema Viya. ³ Étavene eta vémunasirahi ema Viya, visuapaya eta mavanairipiana. Taicha vahi táyacujicarehini eta visuapiraya eta mavanairipiana. ⁴ Tásiha, viti machichanaveana ema Viya viratahaya vínajica eta tamauriqueneana eta vítaresiraya. Taicha tímicitacahaviripa ema Jesús táichavenehi eta vicasiñairahi eta mayehe. ⁵ Víti visuapahi eta yátupirahi Machicha ema Viya ema Jesús. Tásiha, viti véhicanahi éma, vicarichuhi víti virataha vínajica eta tamauriqueneanahi eta vítaresira.

Ema Jesucristo, Manerejiruhi ema Maiya

⁶ Te títecapa ema Jesucristo, tímerecavapa te juca apaquehe, une eta macaicachasiyahí. Énerichuvare eta máitine máepusairuhi eta máepenirahi te crusu. Tásiha, te vímatiequeneha eta macaicachasirahi te une, etapa eta máepusaisirahi eta máitine, témechahaviripa eta manerejiruichuhi ema Maiya. Eta une etapa eta máitine témechahavipa ema Jesús eta émairaquenehi Cristo. Ema Espíritu Santo, émapa títámetacahavi. Taicha ema Espíritu Santo yátupihí eta mametarapiana. Eta une, eta máitine, émapa ema Espíritu Santo, eta juca mapanaquene témechahaviripa. Ticuticacahi eta tacayemaqueneana. ⁹ Tacutihi eta masuapacareva ema mácani achane tiuri. Tiápajucavasera tasuapacarevapana eta mametarapiana ema Viya mayehe ema Machicha. Ánipa macahe: “Émara nuchicha, némunaruquene ema maca”. ¹⁰ Tásiha, te vicasiña ema Machicha ema Viya, visuapava vicasiñava te visamure eta yátupirahi eta mametasirahi ema Viya. Ena apamuriana vahi nasuapahini ema Viya, námicutichapa máepiyahirahihíni ema Viya, taicha vahi nasuapahini eta mametarapianahi mayehe ema Machicha. ¹¹ Étarichuvare eta juca eta mametasirahi ema Viya, eta máijarasirahaviripa eta vítaresirayare máíchequeraquirénapa. Ema Machicha ema Viya, éma téchahi eta vítaresira. ¹² Ena ticasíñanayare éma, títarecanayare. Énasera nácani vahi ticasíñanahi ema Machicha ema Viya, vahi títarecanaimahi.

Eta vítaresirayare máíchequeraquiyare

¹³ Tiuri, némunacasareana, nuvaraha échayare eta ítaresirayare máíchequeraquirénapa, taicha ecasiñahi ema Machicha ema Viya. Eta tacahehi eta nucajureirahehi.

¹⁴ Tásiha, tájina táéñamavacarehini eta viyasearuanahi ema Viya, taicha véchahi víti eta masamirahavihi, taicha eta viyasearapiana tásihaqueneanahi eta vímatiequenehairahi eta mavarahaquenehi ema Viya.

¹⁵ Tásiha, véchahi eta máijarasirahaviya tamutu eta viyasearuana, taicha véchahi eta tasamacarevahi eta viyasearapianahi eta mayehe.

¹⁶ Tamutu eta tamauriqueneana náichahi ena achaneana, ema Viya máimijarechahi “pecatuana”. Jararihi eta pecatuana tífehípana mayuchaticavaneya ema Viya eta vítaresira táicha. Jararihivare eta apana

pecatuana váhirichu tíñehicha. Te mararihipuca ema mácani vichamuri ticapecaturarahi, eta váhirichu tíñehicha eta máepeniraina; te ímahapuca eta macapecaturairahi, éti eyaseuchaya éma, mayehe ema Viya. Tásiha, ema Viya máíjaracayare eta máítaresiraya-rechaha ema ticapecaturarahi. Téhesera mararihipuca ema mácani ticapecaturarahi eta tíñehipana mayuchaticavaneya ema Viya eta máítaresira, vahi nuvanecahe eta eyaseuchahini ema maca achane ticapecaturarahi.

¹⁸ Vecha eta vahi vímisiapavaimahi tayehe eta vicapecaturairana viti machichanaveanahi ema Viya. Taicha ema Machicha ema Viya tijaneacahavihi vimutu víti. Vahi máratahaimahi ticaetemahavi ema Váinaraji.

¹⁹ Taicha véchahi eta macachichairahavihi ema Viya. Váhisera vámutu. Nararihihi ena apamuriana achaneana machaneranahi ema Váinaraji.

²⁰ Vítisera véchahi eta máítesirahi eta te juca apaquehe ema Machicha ema Viya. Éma tímitupanahavihi. Émavenehi témesenicahavihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa víti ema yátupiquenehi Viya. Émara ema macarichuquenehi yátupiquenehi Viya. Éma, tíjaracahaviya eta vítaresiraya máichecuaraquirénapa.

²¹ Nuchichanaveana, vahi ecucasiñaraji; vahi ecucuti ena achaneana ticasiñarajiana eta achanemirana. Tamutupa eta juca néchajiriruvanahi eyehe.

2 Juan

Eta vémunaraivaya

1 Nuti Juan, víyarahánupa, nucajurevi eta juca nu-cartane piti ati. Néchajicavi piti manerejiruhi ema Viya. Énerichuvare némechajirisihavaca ena pichichanaveana. Eti némunaruhequenehi núti, tacuti eta náemunasiravaca namutu ena apamuriana títucana tisuapana eta yátupiquene máechajiriruva ema Viya. ²Viti vémunacahe taicha vicuticacahi eta visuapira eta yátupiquene máechajiriruva ema Viya. Máichecuaraqirénapa eta visuapiraya. ³Nuvaraha macatajichehini ichape ema Tata Vicaiyaquene, émapa ema Jesucristo, Machicha ema Viya. Nájapanuhehini, nájjaracahehini eta táurivaina eta epanereruana, taicha yátupiquenehi eta náemunasirahehi.

⁴Núrisamureinehi eta néchirahi eta nanerejisiravahi ena pichichanaveana, tíurihi eta náehisirahi eta yátupiqueneanahi, tímiyanavanavare eta nasuapirahi eta mavanairipiana eta viyehe ema Tata Vicaiyaquene, taicha ene vicaheyarehi.

⁵Tiuri puiti, ati, nucajurevi, taicha nuvaraha némechavi eta juca mavanairipi ema Viya, étarichu eta vémunasiracacayare vimutu. Te vémunaca ema Viya, visuapaya tamutu eta mavanairipiana eta viyehe. Te tépanavainapa eta vicasañairahi ema Viya, tivanecahaviripahi eta vémunasiracacayare. Tásiha puiti, eta ecaheyare eta émunasiracacairayare eta ítaresirayare.

Ena tivayuarahiana

⁷Nuvaraha némechavi eta juca, taicha nararihi te juca apaquehe te viávihihi ena navarahahi ticaetemaheanaya. Ena nani, vahi návarahahini náimicaecherà-

chahíni eta máuchusirahi yátupiquenerahi achane ema Jesucristo. Ena nani, tivayuarahianahi, ticatianacahivare ema Cristo. Vahi návarahahini véhica éma.

⁸Tásiha, ecaunevayare tayehe eta navayuarapiana. Échapavachucha éti, machu nacamitísicahe tayehe eta ícuchihi ématanevachahi. Nuvaraha ejacapayare tamutu.

⁹Viti visuapahi eta máimiturapiana ema Cristo, viti viávahácahi ema Tata Vicaiyaquene émapa ema Machicha. Váhiserá návahácaimahi ema Viya nácani vahi návarahahini nasuapa eta máimiturapiana ema Cristo. Tasapihapa, náimitucahi eta nayehechivarichu eta napanereruana. ¹⁰Tacahe, te náitecapauchahepuca te iúrujisiavahi ena nácani, téhesera vahi nacuechajisiha eta máimiturapiana ema Cristo, tasiha, vahi ecujachapa te epenana. Váhivare ecuichuha: “Yare, ani, ítecapauchanu” vahi ecuquicha éna.

¹¹Taicha te íchapuca eta juca, ticutinapapuca eta étirichuhi nachamuriana ena tivayuarahiana. Váhira ecuimisiapava nayehe, máchura étaina etapiravaina eta juca náichirahi éna eta tamauriqueneana.

Eta táichecuaraqui eta macartane ema Juan

¹²Tiuri, júcaríhi apamuri eta numetaruheanaya. Vuíchahasera numetacahemahi puiti te juca carta. Taicha nucunevahi eta nítesiraya eyehe apaesa véchajiricavainapa eta vímanajirisiracacayare. Tásiha, viúrisamurénapa vimutu.

¹³Téchajicaviana ena suchichanaveana esu péchavi, ésurichuvare manerejiruhi ema Viya.

Tamutupa eta juca néchajiriruvahi eyehe.

3 Juan

Éma Juan macunacha éma Gayo

1 Nuti Juan, víyarahánupa, nucajurevi piti némunaruquenehi Gayo. Núti yátupihí eta némunasi-rávihi.

² Némunaruquene, nuyaseuchavihi me Viya táurivaina eta pémataneana. Énerichuvare nuyaseuchavivare táurivaina eta pítaresira, tácutini eta táurivaipa eta piáchaneva. ³ Tétavicavahi eta núsamurevahi, te títecanapa ena vichamuriana, taicha timetacuanapa eta pisuapirahi, péhisirahi eta yátupiqueneana echájjirirucávana mayehe éma Cristo.

⁴ Tájinarínehi tácuti eta núsamurevahi taicha eta nusamairírsiraparacahi eta éhisirahi eti nuchichanaveana eta yátupiquene echájjirirucava mayehe éma Cristo.

⁵ Némunaruquene, tájina táichavahi eta pijacapirahi péchapajirisirahi ena vichamuriana, váhinéni pímatiquenevacáinahíni éna. ⁶ Te títecanapa ani te viúrujisiavahi, timetacahavianainapa. Tájina táichava eta piúri-va, pímicatasiravacahi eta nayanira ena vichamuriana. Eta picaheyare pímiyanavaini eta piúri-va nayehe, taicha eta juca víchirahi tacurisamurechayare éma Viya. ⁷ Taicha éna, táimipaicahi eta nacametarairuirahi eta tiuri echájjirirucava mayehe éma Jesucristo. Eta napaisirahi, tájina nayaseserecapahini éna nayehe ena achaneana masuápajiráiraharíchaha. ⁸ Tásiha, tavarahaichu eta véchapajirícavaca ena nani, apaesa eta vímicatasihaya éna eta nacametarairuiraya eta yátupiquene tiuri echájjirirucava.

Éta mamaurivahi éma Diótfes

⁹ Nucajureripa ena pichamuriana te piávihi. Mararihisera éma Diótfes. Éma máurica ticainapu-

puiricava te namirahu ena achaneana. Éma, vahi masuapa eta vituparahana. ¹⁰ Tásiha, te nutiarihinapa eta ara eyehe, núti nítametacaheyare tamutu eta máichaqueneana. Éma, téchajicahi eta viyehe. Cátichacarehi eta máechajiriruvana, váhisera másuapacarehini. Váhivare tácarichu eta juca máichahi. Éma, vahi majacapaimahi ena vichamuriana tipaicanahi. Te natiarihi ena navaraha najacapa, éma maca macavanairipi nacuija nacujacapa. Énerichuvare mavaraha macaerajica te emuri ena tivarahana najacapa.

¹¹ Némunaruquene, vahi picuicutipa ena tíchanahi eta tauriqueneana. Picutiyaresera ena tíchanahi eta táuriqueneana. Taicha viti víchana eta táuriqueneana, viti machichanaveana éma Viya. Énaserá ena tíchanahi eta tauriqueneana, éna, vahi náimatihíni éma Viya.

Éma Juan macunacha éma Demetrio

¹² Nutuparacavi pijacapayare éma Demetrio. Namutu nacunacha éma, taicha yátupiquenehi táuriva eta mayeherepi. Núti apanavare énerichuvare nucunacha eta máuriva. Píti pímatinuhi, eta tatupiruvahi tamutu eta néchajiriruvana.

Éta táichecuaráqui eta macartane éma Juan

¹³ Tiuri, jucarihi apamuri eta numetaruvianayare. Vuíchahasera numetacavimahi puiti te juca carta.

¹⁴ Nútijapainapasera eta ara piyehe apaesa nímahavi. Tásiha, véchajiricavainapa eta vímanasirácacayare.

¹⁵ Puiti, nuvaraha máijaracavini éma Viya eta piúrivaina tayehe tamutu eta pipanereruana. Téchajicaviana ena piájjiriareana. Tásiha, péchajisinanu émanapachuina ena nájjiriareana núti.

Tamutupa eta juca néchajiriruvahi piyehe.

Judas

1 Nuti Judas néchajicahevaca emutu eti nuparape-naveana nuchamurianahi. Núti mavanerunuhi ema Viáquenu Jesucristo. Éti ímatihi ema nuparape Santiago. Núti nucajurehevaca eta juca nucartane taicha eti apanavare machanerahepa ema Tata Vi-caiyaquene, taicha esuapahi eta máichuarapihi. Tétavica-vahi eta majaneasirahehi táichavene eta iúrujiasirahi ema Machicha Jesucristo. ² Puiti, nuvaraha taju-rucaini eta evapinairavavacahi eta máemunasirahehi ema Viya, etapa eta majapanuirahahi; tájinavare tahapapiricahini eta táuriva eta epanereruana.

Yátupiyare eta náicuñayare ena tivarahanahi náemeje-capavacha ena vichamuriana

³ Tétavica-vahi eta nuvarairahi nucajurehe emutu éti, nétumechaheyare eta éhisiraina ema Viáquenu Jesús. Púitiserá nusamairiricapa eta náimisiapiravahi eta eye-he ena nácani tépiyahirahiana tímijachavanahi vichamurianahi. Tásiha, nuvaraha ecuneuchavaya nayehe. Étumechacaca, vahi ecusuapavaca ena nánitá-tajiana, machu náemejecapavachahe. Táimiyana tauri eta éhisiraina eta véhiruhi. Taicha ena víyarahana apóstoleana tímitucahavianahi eta máimiturapiana ema Viáquenu Jesucristo. Tásiha, vahi táuricahini vihapapiricahini. Énasera ena nani tépiyahirahiana, tétavica-vahi eta namapicauravahi eta me Viya. Éna tímijachavanapa eta vahi máicuñacavacáimahi eta náichira tamutu eta tájiparácana taicha tétavica-vahi eta máemunasiravaca. Tavetijipa tíñemahipanapa jararihiva eta náimiturapi, ánipa nacahe: “Vahi tipicau-chacare ema Jesús, váhivare táuricahini vácahehi émara Viáquenu. Te échajisihapuca éma, tatupiruvachucha ‘Jesús’ íchayare, taicha vahi émaina téchahavi víti” tacahehi eta navarahaquene éna. Máimahnepasera ema Viya eta náicuñayare éna, taicha acanevacaipa eta mametarapi ema Viya: “Muracaqueneya eta náicuñayare namutu ena ticaecahinuanahi eta némunasiravacahi”.

⁵ Németeaca éti écharipa eta náichararacavahi ena viáchucanaveanaini israelítana eta náuchusirapa te avasare Egipto. Nuvarahasera némechahe émahi ema Viáquenu ticuchucuhavacahi namutu éna. Téhesera te táequenepa, tétavica-vahi eta namasupajiraivahi ena namutuyaréni. Tásiha, máitapaimuríhapa ena masupajirairahanahi. ⁶ Énerichuvare némechahe eta náichararacavahi ena ángeleana masupajirairahanahi. Ena nani aquenucarahanaini te anuma, sántuanainihi. Tímisiapavanapasera tayehe eta taurique-

neanahi. Tásiha, ema Viya macavanairipipa eta náiyaracuha ena ángeleanaini tējecapavanahi eta te timapicu infierno, nacaerataiyahi. Púiticha váhiquene títurucavanaimahi tiúchucana. Te jena sácheyare mayaseseresihaya ema Viya, muracayare eta náicuñayare namutu éna. ⁷ Échahivare eta náichararacavahi ena achaneana ticavasanahi te apinaquene avasare Sodoma etapa eta Gomorra, etapa eta avasarchichana te tachacayanahi. Éna, tétavica-vahi eta tavayuchiravacahi eta náesenamarevana. Navetijipa ena tivehacacana ajairacacana. Tacutiya eta tájihúchiravahi eta máemechaesiravacahi ema Viya ena ángeleanaini, macamiricahi eta yucu, tájuchavacapa namutu ena nani achaneana váinarajiqueneana. Eta juca tavaraha yátupina vicaicutiarahi tayehe eta nacaicunáiravacayare eta te yucu infierno namutu ena tíchanahi eta tauriqueneanahi. Máitavacacainapa eta nacatajivairaya. ⁸ Táitusiava, vahi náechavahini ena nani tímisiapavanahi eyehe. Navayucharichucha eta náechipejisirahi eta náquehe taicha tétavica-vahi eta tavayuasiravacahi eta natuhusivana. Ena nani tépuruanahi ema Viáquenu eta émairahi téchavacahi. Nacaecahivare ena ángeleana tiámana eta majaranavahi ema Viya. ⁹ Vahi táurihini eta juca. Nuvaraha némechahe eta jena sache máepenirahi ema víyarahaini Moisés, ema Váinaraji mavaraha mámayarehini eta máquehe. Ema Váinaraji macanarapa ema Arcángele Miguel, mavaraha máimiyusemaca. Váhisera masemahini ema Miguel. Váhivare macajacharecahini. Ánipa máicha: “Páurevisami píti. Pímahaya eta pícharacavayare maicha ema Náquenu” máichapa. ¹⁰ Énasera ena nánitátajiana achaneana, vahi napicaurahihini. Tíjaracavana nacaecahi jácani tájahánapuca váhinéni náimatiequeneha. Éna nacutihi eta sárareana. Tini-canahi, téranahi, esenamareanahi. Nájjina tatsirihacahinahi. Éta tamicuñacavacaya.

¹¹ ¡Páureanasami ena nani! Muracayare eta náicuñayare te yucu, taicha nacutihi ema Caín eta mamasupajiraivahi me Viya. Nacutivare ema Balaam ema tēmejecapavacachavacahi ena achaneana eta mavarairahi eta plata. Nacutivare ema Coré ema tépuruhi ema mavaneruhi ema Viya. Éta taviuchahi eta macapasirahi ema Viya. ¹² Tétavica-vahi eta natsirihacarevahi eta náimisiapiravahi eyehe te iúrujisiravana eta énisirana ena echamuriana. Taicha éna, tájjina napícauchaquenénahini eta náurisamureravahi te nanisirana, náerirana. Éna, navarahahi epicauchavacayare éti, navarairahi ticaetmajiricaheana. Ena nánitátajiana nacutihi eta úcájiana te ichape sácherehi. Ticutimahi

tiquivayarehi. Técaticavachuchasera eta támapahi. Táji-na taquivahini. Nacutivare eta yucuquiana máhiri-quireana te ticahipaipa eta apamuriana yucuquiana tachamuriana. Tamapuruji eta vicuchapirahi eta náichirahi eta táuriqueneana taicha nacutivare eta yucuquiana tájiqueruana vinereruana, tépurihapa. Váipaque ne tímarucaimahi. ¹³ Éna, nacutivare eta táepacuruha eta une te técticavapa muraca eta ichape une, camurihi eta tarisasama. Tétavicavahi eta tatsirihacarevahi eta náichaquenehi eta tamauri-queneana. Nacutivare eta jarariquiana tiyejejecavane. Jararihisera eta nacaicuñaiyayare eta ichapequene timapicu. Máitavacacayare eta nanasirayare.

¹⁴ Ena nánitátajiana, tétavicavahi eta nacaecahirahi tamutu. Étachucha natanucahi eta najamuraravana. Ticasiñavavaicana eta náechajirisiravana. Nacunachahi ena ticaimahaqueneanahi, navarairahi nacaetemajiricavaca éna. Ticaicuñayaresera, taicha ema víyarahaini profeta Enoc acane máimaha te mavapure eta náicuñayare éna. Ánipa macahe: “Nímahahi te nuvapore eta máitecapirayare ema Viáquenu te juca apaquehe. Mámayarepahi namutu ena mayeheana ángeleana. Tétavicavahi eta nasimutuvahi. Nacurujicavacayare namutu ena ticapecaturarahiana. Náimerecayareva tamutu eta naviurevana ena achaneana váinarajiqueneana, taicha tétavicavahi eta náichirahi eta tamauriqueneana. Navetijinapa ena ticaecahirahiana me Viya, ichapepanainapa eta naviureva” macahepa. Tétavicavahi eta masuapacarevahi ema víyarahaini Enoc, taicha mámariequenehi ema Adán, sántoquenehivare éma.

Ena Judas matuparacavaca ena machamuriana

¹⁷ Nuvarahavare némechahe, eti nuchamuriana némunarqueneana, eta nametarapi ena víyarahana apóstoleana mayeheanahi ema Viáquenu Jesucristo. ¹⁸ Ánipa nacahe: “Vahi táyerémahi eta náuchujisirayare ena ticaecahirahiana tayehe eta táuriqueneana máimiturapiana ema Viáquenu. Váhivare návarahahíni nánajica eta tamauriqueneana” nacahepa. ¹⁹ Puiti nu-metacahe: Natiarihipa puiti ena ticaecahirahiana.

Tímaticareana éna, taicha navaraha náiputsicavaca ena vichamuriana. Étachucha natanucahi eta najamuraravana. Éna, vahi návarahahíni émainahíni máechavacahini ema Espíritu Santo.

²⁰ Étisera némunarqueneana, étumechacacaya eta éhisirahi ema Viáquenu, taicha tétavicavahi eta tasan-tuvahi eta véhiruhi. Ísapavayareva tímitucahe ema Espíritu Santo eta eyujarauchirana. ²¹ Tauri eta ítaresira, vahi ecuemitiscavahini eta táetaviuchiravahi eta máemunasirahehi ema Viya. Váhivare ecuyacujihini eta ecuchapirahi eta jena sáchezare táepaniravaya eta vítaresira. Máitavacacayare eta vítaresiraya taicha eta majapanuirahavihi ema Viáquenu Jesucristo.

²² Étumechayare ena echamuriana nácani tipanerechanaripa náehica ena tivayuarahiana. ²³ Ena apamuriana, ena téhicanaripa eta náepiyahiraviana, epamicayare éna apaesa tachava eta náehisiraina yátupina ema Viáquenu. Ecuchucuhavacayare eta náejecapiravana, tacuti te vicuchucuhahi eta viyereruvana te tíjahúchavapuca tiju eta vipena. EJapanuyare nácani muracaripahi eta náejecapiravanahi. Ecuneuchavasera, machu napareacahe eta náejecapiravana, taicha tétavicavahi eta tamauriva. Epicayare éta.

Tétavicava eta vicunachirahi ema Viya

²⁴ Ema Viya, tétavicava eta máitupajijiasiravahi. Macarichuhi éma maratata ticatiuchahavi tayehe eta vícuchinihi vícuñayarehini, taicha mavanecahi máepeninahaviya ema Machicha, ema Viáquenu Jesucristo. Puíticha tétavicavahivare eta majaneasirahehi éti apaesa vahi ecuaquipaicavahini tayehe eta pecatu. Taicha mavarahahi máepachinachayare eta iáchanevana, tacuijahivaréni eviurevaina eta mámirahayare te mamirahu te jena sáchezare. Tétavicavainapa eta iúrisamurevaya te ímahapa eta majaraivaquenehi. Acane nacunachanahi ena ángeleana. Énerichuvare víti, tétavicavayareva eta vicunachiraya éma vimutu víti, taicha tétavicavahi eta máramicarevahi taicha ichapequenehi eta máitupajijiasirava. Vépuymiraucha eta víjarasirava visuapayare. Máitavacacayare eta vitsiusirayare éma. Amén.

Apocalipsis

1 Ema Tata Vicaiyaquene mavarahahi tímimatichahaviyare eta táijahúchiravaya táichararacavayare eta apaquehe, apaesa vecha viti mavanaranahi. Ema máimechahi eta juca, ema machicha Jesucristo. Tásiha, ema Jesús mavanecapa ema ángele timetacanuyarehi nuti Juan mavanarahi. Eta tacahe, nájuchahi puiti eta juca apaesa écha éti apanavare eta táichararacavayare. ² Tacuti eta yátupihí eta nucametarairuirahi núti eta máechajiriruvana ema Viya, étarichuhi eta máimiturapiana ema Jesucristo, puiti nutupiruva numetacahe eta juca numetacasivanahi eta máimerunuanahi ema ángele. ³ Tétavicava eta náuricacarevaya ena téchajicuhanaya eta juca máechajiriruvanahi ema Viya, eta máimimatirunuhi. Énerichuvare tétavicava eta náuricacarevaya namutu ena tisamanaya tisupanaya eta juca. Taicha tiánehinapa eta táitavirayare tamutu.

Ema Juan macajure ena siétemuriqueneana machamuriana

⁴ Nuti Juan nucajurehe eti siétemuriana nuchamurianahi ejanereruanahi tayehe eta tinapaica te Asia. Nuvaraha macatajicahehíni ichape ema Tata Vicaiyaquene, émapa ema Jesucristo. Táurihivaréni eta epanereruana. Ema Tata Vicaiyaquene matiariquenehi te tépanavainapa, puiti manasirichuhi eta viyehe, émarichuva manasiqueneyare te táitavapa tamutu. Te tamirahu eta máejasihahi trono, natiarihi ena siétequeneana mayeheana arcángeleana. Navarahivare eta iúricacarevainaini. ⁵ Ema Viáquenu Jesucristo, ema yátupiquenehi tiámaparauhavihi eta juca vímitucasivanahi. Énerichuvare ema máinapuiruhi téchepuca te máecari, apanapa eta máquehe. Éma, yátupiquenehi Rey. Namutuhi macachuricavacaya ena réyeana te juca apaquehe. Éma, yátupihí eta máemunasirahavihi, masipasinahavihi eta viáchanevana tayehe eta vipecaturana te máítine máepusairuhi. ⁶ Énerichuvare, tinacahavihi te namuri ena manerejiruanahi tuparairucavayarehi eta mayehe, mavarairahi viyujaracaráhiyare mayehe ema Viya. ¡Támutuhini sácheana vicunacha eta máitupajijiasiravahi! ¡Viáramiparacahini eta aquenucairahi! ¡Amén!

⁷ Ímaha, márajapainapa ema Cristo. Támayarepahi eta úcaji. Namutuyare nanecapa ena achaneana te juca apaquehe. Náimahainapa, tásiha, tipicanainapa. Tíyahahacavanainapa eta náimairayare, énaripa ena námariéqueneana ena tijarachanahi, taicha técha-

vanahi éna eta nájecapiravahi ena náchucanaveanaini. ¡Ene tacaheyare! ¡Máitecapavanepaini!

⁸ “Nútira nunacuchahi eta táepaniravahi eta apaquehe. Nútirichuvare nécha eta táimiyansiravaya tiuri. Néchayareva eta táitavirayare tamutu” macahehi ema Viya, tétavicava eta máitupajijiasirava, máituruequenehahi tamutu. Éma, matiariquenehi te tépanavainapa, puiti manasirichuhi eta viyehe, émarichuva manasiyare te táitavapa tamutu.

Eta máimeresirava ema Jesucristo mayehe ema Juan

⁹ Nuti Juan, nútirichu echamurinuhi. Nútirichuvare ecutiquenenuhi tayehe eta vicatajivairahi, vicamichahisera tamutu taicha tétumechahavihi ema Jesús. Taicha vicunevaipahi eta visiapirayare te mávasa, aquenucahaviya.

Núti, tiáquijicanuanahi tayehe eta tiúrupuhi ticajare Patmos te etupiereca mar, táichavenehi eta nucametarairuirahi eta máechajiriruva ema Viya, néchajisihairahivare eta máijare ema Jesucristo. ¹⁰ Te jena sáchequenehi lumincuquenehi, ema Espíritu Santo tímimahanuhi eta mavarahaqueneana tímechanu ema Jesucristo. Tacahehi eta táepaniravahi eta máimimahuquenehi. Tativapa nusamahi eta mahu ema émana te nuquecu. Muraca eta máechajisiranuhi. Tirurehucha eta nusamirahi. ¹¹ Ánipa macahehi:

—Piájuchaya tamutu eta juca pímahaqueneanaya. Pímiamarecapa eta piájure nayehe ena siétemuriqueneana pichamuriana: ena tiávihanahi te Efeso, ena tiávihanahi te Esmirna, ena tiávihanahi te Pérgamo, ena tiávihanahi te Tiatira, ena tiávihanahi te Sardis, ena tiávihanahi te Filadelfia, énapa ena tiávihanahi te Laodicea † —macahepa.

¹² Tacahe, néviurucavapa. Nuvarahapa nímahayarehi ema téchajicanuhi. Tásiha, nímahapa eta siete candelero tiúquiana, amairiha oro. ¹³ Te enumuhumuri eta siétequene candelero, matiaríhi ema achane vivasimahi. Tiúmaji eta mamuiríha. Títecapa te máivapeana. Ichapeme eta máitíjuhe, títecapa te matupa. Amairihavare oro. Eta máitíjuhehi táicutiarahi eta aquenucairahi éma. ¹⁴ Eta machutimaca amairiha tijapu, tirapepejicaquenehi. Eta máuquihana, tétavicavahi eta tavayuhauquiraivahi. ¹⁵ Eta máivapeana tijanunupevachava, tacuti eta bronce eta tajanunusira. Eta mahu, tétavicavahi eta tamuracavahi eta marurehuchirahi. ¹⁶ Te mavahu vaure, macaratacahi eta siete

† Tamutu eta jucana avasareana tiávihanahi te provincia Asia. Púitícha eta juca provincia ticajare Turquía.

jarairiquiana. Te majaca tiúchuchi tavasimahiyaréni eta espada. Táetaviuchahi eta tacasiriva, tínunapehivare. Eta mamira, tétavicavahi eta táeramemesirahi tacuti eta sache.

¹⁷ Nupicarinehi eta nímairahi. Náquipaicavapa te máivapeana. Tiánehi népenaini eta nupisirahi. Émasera manacapa eta mavahu vaure te nápusi. Máichanupa:

—Vahi picupicanu. Nútichucha nuti nunacuchahi eta táepaniravahi. Nútirichuvare néchahi eta táitavirayare tamutu. ¹⁸ Núti yátupiquenénu nucaitarecarahi, taicha nuchavahi nítareca te táequenepa eta nacapasiranuhi. Puiti máichecuaraquirénapa eta nítaresira. Nútirichuvare necha ena tépenana. Nucaechepecuyare eta náqueheana ena nápenaqueneana nácani níchuhaqueneanayare. ¹⁹ Piti Juan, piájuchayare eta juca pímaqueneanahi puiti, étapa eta pisamaqueneanahi nutupararuvianahi nayehe ena pichamuriana, étapa eta táchararacavayare nímechaquenéviyare. ²⁰ Numetacaviya eta tachayemaquenehi eta siétequene jarairiqui nucarataruhi te vaure, étapa eta siétequeneana candeleroana óroquiána. Éta juca siete jarairiqui, énara ena ticametarairurahiana nayehe ena siétemuriqueneana pichamuriana. Eta siete candeleroana, énara ena siétemuriqueneana nuchanerana.

Eta mametarapi ema Jesús nayehe ena machaner-anahi ticavasanahi te Efeso

² “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Efeso: Núti iáquenunuhi taicha núti nucaratacachi eta siétequene jarairiquiana te nuvahu vaure. Núti návihahi te tamuri eta siétequeneana candeleroana óroquiána, táicutiarahi eta néchirahahi emutu éti. ² Núti nímati tamutu eta íchaqueneanahi, étaripa eta tamuracavahi eta ecaemataneasiranuhi, ecamichirahi tamutu. Váhivare iúricahini ecasiriquihini ena achaneana váinarajiana. Váhivare ejacpahini ena tépiyacavanapahi apóstoleana, ímatiacavanehi éti ena tépiyahirahianapahi. ³ Nímatihe eta ecamichirahi tamutu eta iátajivanahi táichavenehi eta ecaemataneasiranuhi núti. Vahi eyacujihini. ⁴ Jucarihisera eta juca eviurevahi nuyehe. Puiti ecamitiacaripa eta émunaraivana. Vaipa tácutihini eta émunaraivanahi te épanavainapa. ⁵ Puiti nuvaraha étupiricayare eta juca, tachava eta émunaraivahi. Éneuchavaya tatavaina apaesa íchavare eta táuriqueneana tacuti eta acane. Te vahi ecuetupiricava, nútijacaruvayare níteca, nítsivachayare eta candelero ícutiarahi eyehe. ⁶ Éti, ecunachacarehi eta ecaticirahi eta tamaetupisiravahi eta nayeherépiana ena apamuriana téhicanahi ema Nicolás. Ene nucahehi núti, nucaticahivare eta nayeherépiana.

⁷ “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucasiapaheyare núti tayehe eta paraíso

ícumunahi me Tata. Nénicaheyareva eta tahi eta yucucui tiama eta táuricacarevayare eta ítaresira.

Eta mametarapi ema Jesús nayehe ena machaner-anahi ticavasanahi te Esmirna

⁸ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Esmirna: Núti nunacuchahi eta táepaniravahi. Nútirichuvare néchahi eta táitavirayare tamutu. Nuti nacaparuhi, nuchavahisera nítareca. ⁹ Núti nímati tamutu eta íchaqueneanahi, eta ecatajivairahi, étapa eta epaureravanahi. Tétavicavahisera eta iúricacarevahi, tímicutijiricavaipahi rícohénahíni. Nímativare vahi esemahini taicha eta épiyaequeneanahi nayehe ena tímijachavanahi machanerana ema Viya. Mávaháruanahi ema Váinaraji, machanerannahivare. ¹⁰ Vahi ecupica eta ecatajivairaya. Numetacache: Ema Váinaraji tímisiapaheya te cárcele eta máitsamaresiraheya te tíminajicaheyarepuca. Ecamichachuchasera, taicha díesquenerichu sache eta ecatajivairayare. Nutuparacache: Ejicapaicayare tayanapanepuca nacapacache. Núti níjaracahayare eta táitsivayare. Tiúriyare eta ítaresiraya.

¹¹ “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucuchucuhayare. Vahi ecatajivaimahi tayehe eta nacatajivairayare te yucu ena masuapajirairahanahi.

Eta mametarapi ema Jesús nayehe ena machaner-anahi ticavasanahi te Pérgamo

¹² “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Pérgamo: Núti nítuca némecharecavaca nácani téjecapavana taicha nucayehe eta espada, táetaviurequenehi eta tacasiriva. ¹³ Núti nímati tamutu eta íchaqueneanahi. Nímativare eta éñamiravahi taicha namutuyaréni ena échácayapenána téhicahani eta máimiturapi ema Váinaraji Satanás. Váhiserá ínajicavahini, étumechavaichucha eta éhisiranuhi núti. Étaripa te ímahapa eta nacapasirahi ema nuchaneraini Antipas, yátupiquenehi eta masuapiranuhi éma. Ena machaneranahi ema Váinaraji nacapacachi éma te jena iávihahi éti. ¹⁴ Jucarihisera eta juca eviurevahi nuyehe. Taicha ísapavaichucha natarihihi ena nanerjiruvana ena echamuriana vahi návarahahini náinajicanica eta tinicacare nayujararehi te tamirahu eta nasiñarajiana. Tacutiquene esenamareanahi éna. Eta acane, ema máratátaji Balaam tímitucahi ema Balac eta máimiaquipaisiravacachi ena israelítana tayehe eta juca tauriqueneanahi. ¹⁵ Énerichuvare nararihi ánaqui te emuri ena apamuriana váhivare navaraha náemitisica eta máimiturapiana ema Nicolás. Tétavicavahi eta nucaticirahi núti eta máimiturapiana ema Nicolás taicha tétavicavahi eta tamaetupisiravahi.

¹⁶ Eta tácahe, éneuchavayare eti éjecapavanahi. Te vahi

ecueneuchava, nútijapayare némecharepanaheyare tayehe eta tacasiriquene espada táuchurequenehi te nujaca.

¹⁷“Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nénicaheyare eta ícuchihi me Viya eta ticaijare maná, tayumururevaquenerichaha. Énerichuvare níjaracahevacyare eta tijapu mari. Eta te mari tatiarihiyare eta ajureca arapiru. Nájinasera tímatiequenehaimahi. Macarichu ema ticayeheyare, éma tímatiyare eta máijare arapiru.

Eta mametarapi ema Jesús nayehe ena machaner-anahi ticavasanahi te Tiatira

¹⁸“Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Tiatira: Núti Machichanuhi ema Tata Vicaiyaquene. Núti nímatihí tamutu, taicha tijarahivaca eta núquihana, tétavicavahi eta tavayuhauquiravahi. Eta nívapeana tijanunucavacava tacuti eta bronce eta tajanunusirahi. ¹⁹Núti nímati eta íchaqueneana. Nímativare eta émunasiranuhi, eta esuapiranuhi yátupi, eta échapajirisirahi ena achaneana, étapa eta ecamichirahi. Nímativare muracapanaihi eta ecaemataneasiranuhi. Tiápajucavaipahi puiti tayehe te épanavainapa. ²⁰Jucarihiserá eta juca eviurevahi nuyehe. Íspahi tisiapamurihahe esu esénatátaji. Ésu, vahi táetupicavahini eta suyeherepiana, sucutihi esu Jesabélnitataji eta acane. Tímijachavahi mavanara ema Tata, suémejecapavachahiserá ena nuchanerana. Suímitucavacahi naicha eta piesta, tásiha nanicavare eta tinicacareana nayujaraureanahi te tamirahu eta nasiñarajiana. Suímitucavacavare eta natuhusivayare. ²¹Núti íchapemurihi eta nucuchapirahi ésu, eta suéneuchavahini, apaesa suínajicahini eta sutuhusiva. Váhiquenesera suvaraha suínajica eta suyeherepi. ²²Puiti níjaracayare eta suícuñayare. Ticajumayare apaesa suíveca te sucamane. Ichape eta sucatajivairaya. Énerichuvare ena suítirevanahi, nícuñacavacyareva muraca, te vahi nacuínajica eta suíchaqueneasanahi ésu. ²³Énerichuvare ena suchichanaveana níjaracayare eta najumayare, nímicapasiravacyare. Tásiha, échainapa eti nuchaneranahi eta nímatirahi tamutu eta epanereruana, eta te esamureana éti. Nímahainepasera núti eta nícharacavacyare ena téjecapavanahi, étapa tiámayare eta náichaqueneana. ²⁴Tájina apanainahini eta eviurevahi nuyehe. Núrismurehi eyehe eti matapiravareanahi, eti vahi éhicahini eta suímiturapiana esu esénatátaji. Váhivare ávarahahini íjaracava éhica eta suhiapemarevanahi, susíñavavairisirahi eta máimitusirahi ema Satanás. Tásiha puiti, nutuparacahe eti nuchanerana iávihanahi eta te avasare Tiatira: Ecaratacava muraca tayehe eta juca éhiruhi. Ecuenuyare eta nuchaviraya.

²⁵“Emutu eti ecamichanahi, ímiyanavahivare eta éhisiranuhi, váhivare ínajicahini eta ecaemataneasiranuhi, núti níjaracahénapa eta tuparairucairahénapa

tayehe eta avasareana. ²⁷Ecutinuyare núti eta máijarasiranuhi ema Tata Ticachichanu eta tamuracavahi aquenucairanuhi. Ene ecaheyare éti. Muracayare eta aquenucairaheyare. Ecaratacayare eta etsucurupayare fiérroqui. Esuapacareyare muraca. ²⁸Tétavicavayare eta ejaravayare nicha núti, taicha nujupahaheyarehi éti. ²⁹Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayarehi esuapa.

Eta mametarapi ema Jesús nayehe ena machaner-anahi ticavasanahi te Sardis

3 “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Sardis: Núti néchavacahi ena siétequeneana arcángleana, étipa eti ecametarairurahiana taicha núti távamiraurehi eta siétequeneana jarairiquiana. Núti nímati tamutu eta íchaqueneana. Ena achaneana tímijachanahi tíurihi eta ecaemataneasiranuhi. Nútisera nímararacahi eta esamureana. Nímatihe tiánehi eta ínajisirainapa eta éhisiranuhi. ²Ecaunchavayare apaesa vahi ecuemitiaica eta éhisiranuhi. Taicha nímararacahi núti vahi tátupiruvahini te esamureana eta ecaemataneasirahi ema Tata. ³Puítisera, éneuchavayare apaesa tacuijapa ecuichiravaina. Échavayare éti tamutu eta ímitucasivanahi. Yátupina eta éhisiraya. Te vahi ecuetupiricava eta epanereruana, nútijapayare tíjahúchavayare eta nítecapirayare némecharepanaheya. ⁴Váhinéni ámutuhini éjecapavahini éti ecavasanahi te Sardis. Natarihihi ena matapiravareanahi, váhivare náechipejicavahini. Ena nani, níjaracavacainapa eta namuirihayare tijapu. Ticachanenuanayareva taicha tatuparacahi eta návihairayare eta nuyehe.

⁵“Emutu eti ecamichanahi, ímiyanavahivare eta éhisiranuhi, níjaracaheyare ecamuirihayare eta tijapu. Váhivare nucaepahaimahi eta íjareana tayehe eta libro tiama eta nalista ena náitareruanayare. Nímimatichahayareva eta me Tata, énapa ena ángeleana. ⁶Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayare esuapa.

Eta mametarapi ema Jesús nayehe ena machaner-anahi ticavasanahi te Filadelfia

⁷“Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Filadelfia: Núti yátupiquenénuhi Viya, yátupiquenehivare eta nusantuva. Nucarichu núti néchahi eta tapajacura eta arairuyare avasare Jerusalén, tacuti eta máechapajirisirahi ema náchucaini rey David eta táinapuiruinihi Jerusalén. ⁸Núti nímati eta íchaqueneanahi eta ecaemataneasiranuhi. Nímahahivare eta vahi camurihénahini. Nímatihivare eta ecatajivairahi, váhiserá ecainajiruvahini eta éhisiranuhi. Ímiyanavahivare esuapahi eta nímiturapiana. Tásiha, puiti níjaracaheyare eta apana ématanerépiya. Nájina nísapaimahi tihapapiricaheánaimahi eta

ítauchiraya éta. ⁹ Núti nítahacavacayare ena israelítana tépiyacavanahi machanerana ema Tata, machanerana hisera ema Váinaraji. Nucaepuyucavacayare te emirahu, apaesa náimati eta némunasirahehi.

¹⁰ “Éti, ítauchahi eta nuvanairipi eta ecamichiraya tamutu. Eta tacahe, nujaneacaheya núti apaesa vahi tacuimivehahe te táitecapapa eta nucaetemajirisiravacayare namutu ena achaneana távapahianahi te juca apaquehe. ¹¹ ¡Tiánehipa eta nuchaviraya! Étumechavaya eta éhisirahi, machu émepurureca ejacapi-rayare eta ícuchianayare.

¹² “Emutu eti ecamichanahi, ímiyanavahivare eta éhisiranuhi; nítisirijicavayare eyehe. Máichecuaraquireyare eta ecachaneraya ema Tata te mávasa. Iámayare eta máijare, étapa eta níjare arairu. Iámayarevare eta táijare eta arairu Jerusalén, taicha tachichahevacya. ¹³ Ema Espiritu Santo tímitucaheyare eta juca numetarapiana. Emutu eti nuchaneranahi, etupiruvarehi esuapa.

Eta mametarapi ema Jesús nayehe ena machaner-anahi ticavasanahi te Laodicea

¹⁴ “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Laodicea: Núti náichasa ‘Ema títaurahi’. Námapahi eta yátupiqueneana táuriqueneana echajirirucava. Núti tájinaquenéhi néjequiha. Núti nítauchahi tamutu eta mapanereruanahi ema Tata, te népiyacapa eta anuma étapa eta apaquehe. ¹⁵ Eta juca numetarapi eyehe éti: Nímati eta íchaqueneanahi. Éti apáesasajíruichucha eta éhisiranuhi. Éti, vuíchaha ímereuchavahini eta ecatianasiranu; váhisera yátupinahini tatupiruvahini eta éhisiranuhi. Tacamunuinehi átupiruvahini, yátupinahini ímrecava eta éhisiranuhi. Machu étaina taviuchahe eta nucaerajisiraheña nuyehé. ¹⁷ Taicha éti ímijachavahi rícohe, tájina íchiravainahini, tájnavare ácamunuhini. Vahi esamauchavahini ichapemurihi eta éjapanuravahi. Váhineni rícohenahini. Etihinéni ecáijare páureana, púchuquiána, mamuiriareana. ¹⁸ Nuvaraha nuconsejachahe: Te evarahapa yátupina eta erricovayare, íteca eta nuyehé. Jéhevare núti núrichaheyare, ecutiyaere ena ticayeheana eta yátupiquene oro. Jéhevare núti níjaracaheyare eta emuirihayare tijapu apaesa vahi ecutsiriha te numirahu. Nétsarachaheyareva eta ipuruji apaesa ímairirica. ¹⁹ Núti nétupiricaya eta napanereruana namutu ena némunaruaana te náejecapava. Te vahi nacusua-panu, némecharecayarehi. Tásiha éti, tituparacahehi étupiricavane eta epanereruana, étumechavavare tayehe eta éhisira. Éneuchavavare apaesa tacuija ecuichiravaina. ²⁰ Núti nujapanurahi. Nuvaraha tachava eta vicachaneracacahi. Vaipa ecuévuisiha eta nuyehé. Íchuhanuvare. Viápechava vivapinava eta véchajirisiravaparacayare †.

† Te juca, ema Viáquenu tímicutijiricava eta máehahamesira te jácáni tapajacura, mavarairahi masiapa, manica macachane ena ticavasanahi te tajuhe. Étasera eta máechajisiqueneana, vahi étainahini eta tapajacura eta vípena. Te juca, ema Viáquenu máechajisi-

²¹ “Emutu eti ecamichanahi, ímiyanavahivare eta éhisiranuhi, núti nucaejacahevacyare tayehe eta néjasihayare, tacutiyaere eta néjasirahi te mavaure ema Tata, taicha eta nétumechiravahi nucamichirahi tamutu. ²² Ema Espiritu Santo tímitucaheyare eta juca numetarapiana. Emutu eti nuchaneranahi, etupiruvayare esuapa” tacahehi tamutu eta máechajiriruvana ema Viáquenu eta eyehe.

Ema Juan máimaha eta natsiuresira te anuma

4 Te táequenepa eta juca, nímahavarepa eta téjiacahi eta anuma. Nusamavarepa eta mahu ema émarichuhi ema tínapucahi téchajicanuhi. Tirurehucha eta mahu. Tíchuhanupa, ánipa macahe:

—Yare, piápana. Nuvaraha nímechaviyare eta táicharacavayare puiti juca vicaijuheyare —macahepa.

² Tacahe, eta nusamirahi eta íchuarapi, ema Espiritu Santo tíjaracanupa eta nucaicutiarairayare tamutu eta nímahaqueneanayarehi. Tíjahúchavapa nímaha ema Viya, téjacahi te trono te anuma. ³ Tiáramicarehi eta máimahi. Tétavicavahi eta máurinavahi. Eta máimahi tacuti eta tajanunusira eta márijahi jaspe étapa eta cornalína. Te tachachacuana távihahi eta trono, tétavica eta tajaravahi tacutiyaréni eta táimahi eta ahe eta táurinava. Véresera eta táimahi. ⁴ Távihahi eta ichape trono, tatiarivare te tachachacu eta vénticuatro trono. Natiarivare ena vénticuatroanavare téjacanahi tayehe, víyahana tuparairucana. Tijapu amairiha eta namuirihana. Namutu ticayeheana corona te nachutiana, amairiha oro. ⁵ Tásiha, nímahahi eta térameca tásihaquenehi tayehe eta trono. Nusamavare titurehuchanahi. Ticaemapa. Tásiha, tatiarivare te tamirahu eta trono eta siete tijarahivaca tacutiyaréni tanene eta yucu. Énahi ena sítequeneana arcángeleana mayeheana ema Viya. ⁶ Tijarahivare te tamirahu eta trono tacutipa eta tajarahivahi eta ichapequene une.

Natiarivare ena cuátroqueneana tijanearecanahi te machacaya ema Viya. Éna, ecutiareana eta máitupajijiasirava. Tacutimahi ticauquihavacahi te namirahu téhepa nachepa. Amairiha eta náuquihana. ⁷ Eta tínapuca tavasimahiyaréni eta sárare táíñehiquene ††. Eta apana tavasimahiyaréni eta torillo. Eta apana tacutimahiyaréni achanemira. Eta apana tacutimahiyaréni eta ichape mátihi tírarairicahi. ⁸ Tacahe, ena nani cuátroqueneana ecutiareana tíávihanahi tayehe eta trono, sáisivaca eta napavana. Ticaquihavacavare amairiha eta napavana. Ena nani, vahi táechuquihahini eta nacunachirahi ema Viya, ema acanevacaquene eta máitaresirahi. Tijiranahi tamutu sácheana, yátiana. Ánipa nacahe:

“Tétavicavahi eta pisantuva, piti Tata.

Tétavicavahivare eta pítipajijiasiravahi,

hahi eta majapanuirahavi étapa eta mavaraira vichavaya vipaucha éma, tachavahini vivapinava mayehe, víuriyareva te machacaya.

†† Te jena avasare Asia (puiticha ticáijare Turquía), tatiarivare te táíñehiquenehi sárare náimijarechahi “león”. Te táiyahapa, eta tahu tacuti eta ichapequene toro, étapapuca eta ichi ajaira.

píturuequeneha tamutu.
Piti pitiarihiquenehi te tépanavainapa eta apaquehe.
Puiti pinasirichuvare eta viyehe.
Pítirichuvare pinasiyare te táitavapa tamutu.
Puiti vihasulupayachavihi eta pichanerahavihi”
nacahepa ena ángeleana.

¹⁰ Énavarepa ena véinticuatroqueneana víyahana
tupairucana tépuyucanahi te mamirahu ema Viya,
mávihihi te mayehe trono. Nacamavahupa eta
nayeheana corona. Titsiurecanavare. Ánipa nacahe:

¹¹ “¡Tata Víyaquene, piti Viáquenuvihi!

¡Tétavicavahi eta piúrivahi!

Picarichuhi piti vicasíñaquenévi.

Ichapequenehi eta vicunachiravihi.

Tamutuhi pirataha píti.

Taicha píti pépiyacahi acane tamutu eta juca

vímahaqueneanahi puiti.

Pítirichuvare péchahi puiti tamutu eta

pépiyuanahi”.

Ena Cordero macarataca eta ajureca tiama eta siete sello

5 Tacahe, te mavahu vaure ema máejaruhi tayehe
eta trono, nímahapa macaratacachi eta ichapeme
ajureca ticayuruquihi, ticanaracacachi eta letra te
tajuhe étapa te táquecume. Ticaipistahi tayehe eta si-
ete sello, táipistaruvanahi. ² Nímahapa ema ángele tip-
iaracachi muraca. Tétavicava eta tamuracava eta mahu.
Ánipa macahehi:

—¡Puiti táuricapa máimerecava mácani tatupararuchi
tívepistacayare eta tayeheana sello eta juca ajureca,
maveruruasirayare! ¡Tatuparacapa máiteca puiti!
—macahepa.

³ Nájinasera nájaracavahini navejapanahini eta
ajureca: énaripa ena tiávihanahi te anuma, énavanere-
cainahipucaini ena tiávihanahi te apaquehe, énaripa
ena tiávihanahi te amahe apaquehe. Nájinavare
tipatsicavaina náimarahacahini eta ajureca. ⁴ Níyahaha-
cavapa núti eta nímairahi namajinairahi nájaraca-
vahini naveruruacahini eta ajureca, náechajicuhahi-
pucaini, étavanerecainahipucaini náimarahacahini.

⁵ Tacahe, téchajicanupa ema émana víyaraha tuparai-
rucahi. Máichanupa:

—Vahi picuiyaha. Taicha matiarahi ema Cristo, ema
yátupiquenehi manerejiruhi ema Viya ema téchaya
tamutu eta juca apaquehe. Éma, tíjaracavahi eta
máepenirahi víchavenehi víti. Tichavaripahisera títare-
ca. Tásiha, macarichu ema tatuparacachi maveruru-
cayare eta ajureca, mavepistahayareva eta siétequene
tayeheanahi sello táipistaruvanahi —máichanupa ema
víyaraha.

⁶ Tacahe, nímahavarepa ema Jesús, ticaijarehivare
Cordero. Titupihahi éma te tamirahu eta trono,
nachayacahi ena cuátroqueneana ecutiarareana éna-
pa ena víyahana tupairucana. Nímahahi eta ma-
jara, taicha táimicapacachi éma eta macaepahairahi eta
vipeaturana viti achaneana. Siete eta majihuana. Eta
juca táicutiarahi eta aquenucairahi. Siétevere eta

máuquihana. Eta juca táicutiarahi eta tamutuirahi
máimatiqueneha, taicha navanahihi ena siéteana ar-
cángeleana mayehe ema Viya, eta náimarahasiraya
tamutu eta apaquehe. ⁷ Ema maca Cordero tiyanapa,
majacapahi eta ajureca te mavahu vaure mayehe ema
máejaruhi te trono. ⁸ Te macaratacapa eta ajureca, ena
nani cuátroquene ecutiarareana, énerichuvare ena
véinticuatroqueneana víyahana tupairucana
tépuyucanapa te mamirahu ema Cordero. Ena nani
véinticuatroqueneana, namutuyehehi te navahuana
eta guitarra étapa eta escudilla, amairhasera oro. Tia-
ma eta incienso, táicutiarahi eta táurivahi eta nayuja-
rasiranahi ena machaneranahi ema Viya. ⁹ Tijiranahi
eta juca jirasare arapiru. Ánipa nacahe:

“Picarichu píti tituparacavihi eta picaratasirayare eta
ajureca, pivepistasirayare eta tayeheana sello.

Tituparacavihi taicha píjaracavahi píti tímicapacavihi
eta pivachasirahaviyarehi tayehe eta pítime vimutu
víti apaimamajiquenehavihi te juca apaquehe.

Taicha pivarahahi machanerahaviyarehi ema Tata Vi-
caiyaquene.

¹⁰ Píjaracahavivare viyujaracarahiye mayehe ema
Viya.

Píti píjaracavahi eta aquenucairahaviya tayehe eta
avasareana” nacahepa.

¹¹ Tásiha, nusamavarepa eta nahu ena camuri-
queneana ángeleana nachayacahi eta trono, eta návi-
hahi ena cuátroqueneana ecutiarareana, énapa ena
tupairucana. Tétavicava eta nasimutuvahi éna.

¹² Énerichuvare tijirana muraca. Ánipa nacahe:

“Piti Cordero, piti nacaparuchi, picarichu tatuparacachi
píjaracavahi puiti eta piávacure mayehe ema Viya.

Tétavicava eta piúricacarevahi táicha.

Tétavicava eta pímatiequenehairahi tamutu.

Tétavicava eta pitumevahi.

Tétavicava eta pipicauchacarevahi.

Tétavicava eta picunachacarevahi.

Tijarahi visama te vijirauchavi” nacahepa.

¹³ Nusamavare eta tahu tamutu eta máepiyuanahi
ema Viya, eta tiávihanahi te anuma, étapa eta tiávi-
hanahi te apaquehe, énerichuvare eta tiávihanahi te
amahe eta apaquehe, étapa eta tiávihanahi te une.

Ánipa tacahehi:

“Tétavicava eta pítipajijiasiravahi, piti Vicaiyaquene,
pítipa piti Cordero.

Éti, tétavicava eta epicauchacarevahi.

Éti, tétavicava eta ecunachacarevahi.

Tijarahi visama eta vijirauchirahe.

Máitavacacayare eta vitsiusiraheyare” nacahepa.

¹⁴ Énapa ena cuátroqueneana ecutiarareana najica-
papaipa:

—Amén, ene vicaheparacayare —nacahepa.

Tásiha, ena véinticuatroqueneana víyahana
tépyumurihanapa, natsiucapa ena apinana.

Eta táepistasira eta sélloana

6 Tacahe, nímahapa ema Cordero te mavepi-
stacapa eta tínapuca sello. Tásiha, nusamapa ema

émana ecutiararehi. Eta mahu tacutichucha tirurehucha. Ánipa macahe:

—Yare, piúchuca —macahepa.

²Tacahe, nímahapa eta cavayu tijapu. Ema ticaperahi, tatiarihi eta mataquiriqui. Tásihapa, ticaijaracasipa eta corona éma. Eta juca tácutiarahi eta máquipairisiraparacaya ena mánarana, taicha guerrerohi éma.

³Nímahavarepa ema Cordero mavepistacavarepa eta tápinane sello. Nusamavarepa ema apana ecutiararehi:

—Yare, piúchuca —macahepare.

⁴Tacahe, tiúchujicapa eta apana cavayu. Titsi eta táimahi. Ema ticaperahi mámahí eta ichapequenehi espada. Ticavanahipa eta manacasamurechirayare ena achaneana eta náehacairayare. Téchepucaínapa eta guerra. Ticapajiricanainapa ena achaneana camuriqueneana.

⁵Nímahavarepa ema Cordero mavepistacavarepa eta tamapanane sello. Nusamavarepa ema apana ecutiararehi, máichapa:

—Yare, piúchuca —macahepare.

Nímahapa eta cavayu tiquisa. Ema ticaperahi macaratacachi eta balanza te mavahu. ⁶Nusamavarepa eta mahu ema apana te namuri ena cuátroqueneana ecutiarareana. Ani macahehi eta máechajiruvahi:

—Ticatajivanayare ena ticaematnerahiana. Vaipa tisivachaimahi eta mavacha mácani achane. Diez páneana eta mavachayare te étana sache. Étaripa eta arusu † mapanarine kilo eta navachayare te étana sache. Étasera eta aceite comer, vahi téjiacavaimahi, étaripa eta tachi eta uva —macahepa.

⁷Te mavepistacavarepa ema Cordero eta tacuatrone sello, nusamapa ema apana cuátroquene ecutiararehi, máichapa:

—Yare, piúchuca —macaheparavare.

⁸Nímahapa eta apana cavayu tiyacaca. Ema ticaperahi, éma ticaijarehi “Ticaparerecaya ena achaneana”. Matiarivare ema téhicapahi, ema táquenu eta náchanevana ena náepenaqueneana. Tacahe, eta cuarta parte eta nasimutua ena achaneana tépenanaya naicha ena apinana. Taicha ticapajiricanainapa ena achaneana tayehe eta guerra. Ena apamuriana técuhanainapa. Apanapanenapa eta najumanayare. Énerichuvare tanicainapa eta sárareana táíñehiqueneana.

⁹Te mavepistacavarepa ema Cordero eta tacincone sello, nímahapa eta mesa tiámahi eta mayucuneasa ema Viya. Te tápecu, nímahavarepa eta náchanevana ena náepenaqueneana támicaparuanahi eta náehisirahi ema Viya. Vahi náinajicahini eta náehisirahi te náimahapa eta nacatajivairayare. Váhivare timatinanaimahi eta nametasirahi eta máechajiriruva ema Viya. ¹⁰Puiti éna, tipiaracanahi. Ani nacahe eta napiarasirahi:

—Tátachicha, sántoquenevivihi píti. Yátupiquenevivihi eta picasiñacareva. Píti pirataha tamutu. ¡Puiti vivaraha

† Ema ecutiarare máechajisihahi eta taqui ticaijare cebada. Eta juca tacuti eta arusu.

pítauchayare eta pitsirijiequenehairayare ena ticapachavianahi te apaquehe! ¡Vivarahapa nacáemecharahipaini! —nacahepa.

¹¹Tásiha, ticaijaracasianapa eta namuirihanayarehi eta tijapu. Ticametacasianapa nanarahasiranumayare apaesainahi. Tiámainucavayarehi te tiyuriticavapa eta natupayare ena nachamuriana nacaparuanayarechahavare ena téhicanahi ema Cristo.

¹²Te mavepistacavarepa ema Cordero eta tasaisine sello, nímahapa eta tamuracavahi tayamurisirahi eta apaquehe. Eta sache témahavarepa, tétavicavahi eta taquisava. Énerichuva eta caje amairihapa ítime. ¹³Eta jarairiquiana tiávihanahi te anuma, témiririjicapa te juca apaquehe, tacuti eta tahi eta mitu te muracaicha técticava. ¹⁴Eta anuma témitiacavarepa tacutipa te téchuquimeca eta ajumeruca. Tásiha, eta ichapequeneana cerro tiyamuricavacapa tiyjecavavacapa. Étaripa eta tíurupuhiana te mar énerichuvare tiyjecavavacapa. ¹⁵Tacahe, tijunanapa ena réyeana te avasareana, énapa ena presidenteana, énapa ena comandanteana, énapa ena aquenucarahana, énapa ena rícoqueneana, énaripa ena músuana, énapa ena libreana. Ticayumurúquianapa te tajuhe eta ichapequeneana máriana cerro.

¹⁶Ánipa nacahe:

—Vicavi eta ichapequeneana mari, apaesa vahi macuimahavahi ema Viya, apaesa viúchucuha tayehe eta táíñehiquene máicuñaraqui ema Cordero.

¹⁷Táitecaparehavipa puiti eta ichapequene juicio. ¡Páurehavisami! ¡Nájina tacaemachaquenemahi! —nacahepa.

Ena dócemuriqueneana israelítana nacamarcaque- neanayare

7 Tacahe, nímahapa ena cuátroqueneana ángeleana. Titupihanahi te táinahu eta juca apaquehe, náichejimirausirahi tamutu eta técticavana. Éna, náichejicahi eta técticava apaesa tacuija eta téctica-va te apaquehe étaripa te une, étavanerecainahipucaini tacaecherahini te yucuquiana. Ticatuparahanasera éna nacamiriuchayarehi eta táicuñayare te apaquehe étape te une mar. ²Énerichuvare nímahavarepa ema apana ángele tiásihahi te táuchusinehi eta sache. Macaratacachi eta mamarca ema yátupiquene Viya Vicaiyaquene. Ema maca ángele máechajicavacapa muraca ena cuátroqueneana ángeleana. ³Tacahe, ema ángele máichavacapa:

—Vuíchaha ecucamirica eta táicuñayare eta apaquehe eta une te mar étape eta yucuquiana. Tapainumavaya te vimarcachavacapa te nanahuana ena mavanarana ema Viya —máichavacapa.

⁴Tásiha, te tamutupa eta nacamarcairavacahi, nusamapa eta natupa ena nacamarcaqueneanaripa. 144,000 eta nasimutua. Násihaqueneanahi nayehe ena dócemuriqueneana israelítana. ⁵Doce mil ena ticamarcanaahi machichanavéqueneana ema Judá. Doce mílvare ena ticamarcanaahi machichanavéqueneana ema Rubén. Doce mílvare ena ticama-

rcahani machichanavéqueneana ema Gad. ⁶ Doce mílvare ena ticamarcanahi machichanavéqueneana ema Aser. Doce mílvare ena ticamarcanahi machichanavéqueneana ema Neftalí. Doce mílvare ena ticamarcanahi machichanavéqueneana ema Manasés. ⁷ Doce mílvare ena ticamarcanahi machichanavéqueneana ema Simeón. Doce mílvare ena ticamarcanahi machichanavéqueneana ema Leví. Doce mílvare ena ticamarcanahi machichanavéqueneana ema Isacar. ⁸ Doce mílvare ena ticamarcanahi machichanavéqueneana ema Zabulón. Doce mílvare ena ticamarcanahi machichanavéqueneana ema José. Doce mílvare ena ticamarcanahi machichanavéqueneana ema Benjamín.

Camurianavare ena apavasajuecuana tijapumuirihavacahi

⁹ Tacahe, nímahavarepa ena camuriqueneana achaneana tiásihana te tamutu avasareana, apaechajiriruvaqueneana. Vaipa titupachacareana eta nasimutuvahi. Titupihanahi éna te tamirahu eta trono, mávihahi ema Cordero. Tijapumuirihavaca eta namuirihana. Tásiha eta náurisamurevahi nacaratacahi te navahuana eta cáchipaca. ¹⁰ Namutu tipiaracanahi, ánipa nacahe:

—Vihasulupayachavi, piti Tata Vicaiyaquene, pítipa piti Cordero, taicha éti ecuchucuhavahi —nacahepa.

¹¹ Tacahe, namutu ena ángeleana titupihanahi te tachacayahi eta trono, nachayacahivare ena cuátroqueneana ecutiarareanahi, énapa ena víyahana tuparairucana. Tásiha, tépuyucanapa te tamirahu eta trono. Tétipaimurihanapa. Natsiucapa ema Viya. ¹² Ánipa nacahe:

“¡Eta vicaheyare!

Máitavacacayare eta vitsiusiraviyare.

Taicha tétavicavapa eta picunachacarevahi.

Tétavicavavare eta pímatiequenehairahi tamutu, éta-pa eta pipicauchacarevahi, éta-pa eta pitumeva.

Picarichu piti péchahavihi.

Ichape eta vihasulupayachiravihi.

Tijarahi te visamure te vijirauchavi. Amén”.

¹³ Tacahe, ema émana víyahana máichanupa:

—Te pivaraha pímati, nímitichaviyare ena nani ticamuirihanahi eta tijapu, távihavarepuca násiha —máichanupa.

¹⁴ Tacahe, níchapa núti:

—Picatajicanu, pimetacanu, tata.

Tásiha, máichanupa:

—Ena nani éna ena nacatajivaqueneanahi ichape taicha eta náehisirahi ema Jesús, tiúchucuharipasepa. Ticasipaipa puiti eta náchanevana tayehe eta máitine ema Cordero. Puiti ticamuirihanapa tijapu, taicutiarahi eta tájinairaripa naviurevainahini. ¹⁵ Eta tacahe, titupihanahi puiti te tamirahu eta trono mávihahi ema Viya. Najirauchahi, natsiucahi éma tamutu sácheana yátiana te mayehehi templo. Éma majaneacavacahi. ¹⁶ Ena nani tájinapa nácamunui mahi, vaipa téchuhana, váipavare timauneana. Váipavare ticatajiva-

naimahi taicha eta tájitureva eta sache. ¹⁷ Taicha ema Cordero, ema tiávihi te tamirahu eta trono, tétavicavapa eta majapanuraivahi, majaneacavacayarehi. Máesichayareva eta tiúriama une ticaitarerahi. Énerichuvare ema Viya macamitiasinayare eta náiyaira —máichanupa ema víyahana.

Éma Cordero mavepistacapa eta téqueneha sello

⁸ Tacahe, mavepistacapa ema Cordero eta téqueneha sello tayehe eta ajureca. Tamuturine timatina. Média-horapuca eta tamatinaira. ² Tásiha, nímahapa ena siéteana ángeleana, titupihanahi te mamirahu ema Viya. Ticaijaracasianapa eta siete chujareana nachujanayarehi. ³ Tásiha, títecapavarepa ema émana ángele. Mámapahi eta censario, amairiha oro. Tatiarihi te mamirahu ema Viya eta mesa tiámahi eta mayucuneasa. Amairihavare oro. Ema ángele titupihapa te tamirahu eta mesa. Nájaracapa eta incienso tisimuri. Tacahe, macaratacapa eta censario te tápusi. Macapusisiacapa ema Viya, tacachanepaipa eta nayujarasirana namutu ena machanerana ema Viya. ⁴ Tásiha, eta taquijarera éta-pa eta mayujarasirana tiápanapa mayehe ema Viya, tásihaquenehi te mavahuana ema ángele. ⁵ Tásiha, ema ángele mavehavarepa eta apamuri emaniqui eta te mayucuneasa. Máinicachapa eta censario. Tásiha, máepuraicapa te apaquehe. Tíjuhúchavapa térameca, ticaema, titurecapa. Tiyayacarepa eta apaquehe.

Eta nacachujairayare ena siétequeneana ángeleana

⁶ Tacahe, nímahavarepa ena siétequeneana ángeleana titsecavanaripa eta nacachujairayare.

⁷ Te ticachujapa ema títapuca ángele, témiricapa te apaquehe eta uverequi éta-pa eta tiquiva ítiama. Témiricavare eta yucu. Táijuchapa eta tercera parte te apaquehe. Támairiacapa eta yucuquiana, eta muiji, éta-pa eta sucurecana.

⁸ Te ticachujapa ema apana ángele, témiricavarepa eta ichape mari. Timurupahi eta táemirisira tayehe eta mar. Eta une, ítiama táicha. Tercera pártéhivare eta ítiama. ⁹ Támairiacapa tacapapajicavaca eta sárareana tiávihana te une. Éta-pa eta pacureana tachimararuanahi, técharicavanapa. Téririjicanapa tamutu.

¹⁰ Te ticachujapa ema apana ángele, témiricapa eta ichape jarairiqui. Tétiraraicaparine eta táemirisirahi. Tajararecapa eta une tayehe eta tercera parte eta cacajureana éta-pa eta cáquiureana. Venenoamapa taicha eta jarairiqui. Ichapemurianavare ena achaneana tépenaracanahi taicha eta náerirahi eta une tisucareama. Eta tacahe, ena tacaitiruanahi tímijarechanahi eta ecuñaraqui: Eta Súcareama Venenoama.

¹² Te ticachujapa ema apana ángele, tiúchujicapa eta tépacuchahi eta sache, eta caje éta-pa eta jarairiquiana. Óchorine hora eta táetaviuchirahi eta tamapicuva. Tacahe, óchovare hora eta tacaache-

rairahi eta sache. Ocho hóravare eta tacaecherairahi eta caje étapa eta jarairiquiana.

¹³ Tacahe, nésenicapa te anuquehe. Nímahavarepa ema émana ángele tiárraica. Nusamapa tipiaracapaahi muraca, ánipa macahe:

—Páureanasami ena tiávihanahi te apaquehe. Tétavicavaya eta nacatajivairayare, puiti te táitachavapa eta nacachujairaya ena mapanaqueneana ángeleana, téquenehanaya ticachujana —macahepa.

9 Te ticachujapa ema apana ángele, nímahapa ema ángeléni mavasíhi eta jarairiqui. Máquipairuvahi te apaquehe. Másapa ema Viya eta mavejiasirayare eta pozo táupenaquene ticaijare Abismo. ² Tacahe, mavejiacapa eta táupenaquenehi pozo. Tiúchucapa eta ichape quijare tacutipa eta taquijarera te tiju eta evitarahi. Eta sache, timapicupa taicha eta quijare.

³ Témunahiricavapa tiúchuca eta tavasiqueneana eta tsacarana, tayehe eta quijare. Amairipahipa tamutu eta apaquehe. Tajarachapahi eta tayucaraivahi tacutipa eta tayucaraiva eta sáserahi. ⁴ Ticatuparacasipa vahi tacunica eta tamuijira eta apaquehe étapa eta tapacajiana eta sucurecana étapa eta yucuquiana. Eta tatuparahahi eta tayucavacayarehi namutu ena achaneana. Nacarichu tacaitica ena ticamarcanahi te nanahuana tayehe eta mamarca ema Viya. ⁵ Cínco-yarehi caje eta tayereva eta tayucareresirayarehi. Váhisera tépenanáimahi ena achaneana tayucaque-neanayarehi. Tétavicavasera tacativayarehi nasama. Eta tayucaraqui tacutiyarehi eta sáserahi eta tacativayarehi nasama. ⁶ Te jena sácheanayare ena achaneana navarahayare ticapacavana. Váhisera tépenanáimahi, tayanapane navarahayare tépenana.

⁷ Eta juca tavasiqueneana tsacarana, nímicutíchapa eta cavayuana te titsecavanahi tayehe eta guerra. Tásiha, te tachuti tacutimahiyaréni ticayehe corona oro. Eta tamira achanemirayaréni. ⁸ Tiuji eta tachutimaca, tacutiyaréni eta suchutimaca esu esena. Tíñehivaca eta táheana. ⁹ Eta taparuma tacutiyaréni eta fierro muracaquenehi. Vahi táechucaimahi eta isavipe. Eta tárrairahi, ¡tétavicavahi eta tamuracavahi! ¹⁰ Ticaijiquivaca tacutiyaréni eta sáserahi. Eta juca tiyucarahi, cinco cájeyarehi eta tacaitemajirisiravacayare ena achaneana. ¹¹ Mararihivare ema táquenu ema téchahi éta, ema ángeléni tivejiacahi eta táupenaquene pozo. Ema maca ángeléni, eta máijare te náechajiriruva ena hebreoana “Apolión”. Te véchajiriruvana víti, ticaijare “Tijararerahi”.

¹² Títauchavapa eta títapuca ecuñaraqui nímahaquenehi. Jucarihichahavaresera apinachaha eta ecuñaraquiyare.

¹³ Te ticachujapa ema apana ángele, nusamapa eta mahu ema apana te tápusi eta cuátroquene esquina tayehe eta mesa oro eta tiámahi eta mayucuneasa ema Viya, tiávihihi te mamirahu éma. ¹⁴ Ticavanairipipa ema ángele ema ticachujahi, ánipa macahe:

—Picaiticapa ena cuátroqueneana ángeleanaini váinarajiana, tiávihanahi te tachacaya eta cajacure Eufrates —macahepa.

¹⁵ Taicha acane ema Viya manerejicaripa eta juca hora eta macaitisirainapa ena cuátroqueneana ángeleanaini, máisapainapa eta nacapasirayarehi camuriqueneana achaneana, ena mapamuriqueneana eta náichapemuriva. Tacahe, téjapucanapa éna. ¹⁶ Tacahe, tiúchujicanapa ena suntaruana ticaperana. Nusamapa eta natupa. Doscientos millone eta náichapemuriva.

¹⁷ Tacahe, eta nímairahi ena ticaperana, tatiarihi eta náicutiara te natupana. Eta táimahiana titsi, azul, tiyacaca. Táíñehiquenehi eta tachuti eta naperana. Tiúchucapaipa eta yucu, eta quijare te tajaca. Azufrepuha eta táepuha. ¹⁸ Camurianahi ena achaneana, ena tacaparuanaipahi eta juca mapanaquene ecuñaraqui eta tacuchusirapahi te tajaca: eta yucu, eta quijare, étapa eta azufrepuha. ¹⁹ Énerichuvare tatiarihi eta táijiqui ticutipainehi eta quichare. Tétavicavahi eta táíñehivapahi eta tacaparaqui táuchurepahi te tajaca étapa te táijiqui.

²⁰ Énase ena apamuriana achaneana tacaitiruanahi eta ecuñaraqui, váhiquene navarahaimahi náinajica eta náichira eta tamauriqueneana. Váhiquene téneuchavanáimahi. Váhivare náinajicahini eta nacapahivana, eta nahiapemarevana, étapa eta náesenamarevana, étapa eta námeraivana. Váhivare náinajicaimahi eta najirauchira ena éreanana, eta natusirahi eta nasiñarajiana náepiyaruanahi oro, plata, bronce, márijahi, yucuqui. Tamutu eta juca mayamuricacahivare, váhivare tapaicahini, váhivare tasamarahihini, váhivare táimairiricahini.

Ena ángele macaratacahi eta ajurecachicha

10 Tacahe, nímahapa ema apanavare ángele tiúcupaicahe te anuma. Tétavicava eta máíñehiva. Tamuichapahi eta úcaji. Te mápusi, tatiarihipa eta ahe. Eta mamira, tétavicava eta tajararasirahi tacuti eta táimahi eta sache. Eta mapaiqueana tijarahivaca ticutipahi timuruquiape. ² Téjiacahi eta ajurecachicha eta macaratasirahi te mavahu. Tásiha, eta mapaique vaure mácatayaecahi eta une te mar. Eta étaquiape sapa tacatayacahi te tiájipahi. ³ Tásiha, tipiaracapa muraca, tacuti eta tahu eta tíñehiquenehi sárare. Te títapiricapa, nusama eta nahu ena apamuriana tacutiyaréni eta tirurehuchahi. Siétequenehi eta najicapirahi. ⁴ Te timatinapa, nuvarahapa nájuequenehayarehini. Nusamapasera ema téchajicanuhi te anuma. Máichanupa:

—Vahi picuajucha eta juca pisamaquenehi. Piáñauchayare eta juca. Váhivare picumetajirica —máichanupa.

⁵ Tásiha, ema maca ángele nímahaquenehi eta mácatayasirahi eta une étapa eta tiájipahi, masuvechapa te anuma eta mavahu vaure. ⁶ Ánipa macahe:

—Tivanecanuhi ema Viya, ema acanevacaquenehi eta máitaresira, ema yátupiquenehi tépiyacahi eta anuma, eta apaquehe, eta mar, étapa tamutu eta tiávihaqueneanahi tayehe. Éma, tivanecanuhi numetaca eta juca máechajiriruvahi: “Tájinapa vaipa tiy-

eremahi eta táitaviraya". ⁷ Ánaquiaparipahi eta nacametacasivahi ena profetana eta mapanereruana ema Viya. Púitsera te macachujapa ema téqueneha ángele, títavainapa tamutu eta mapanereruanahi —tacahepa eta mametarapihi ema ángele.

⁸ Tacahe, nusamavarepa eta mahu ema téchajicanuhi tásihaquenehi te anuma. Tivanecanuvarepa nupaucha ema ángele titupihahi tayehe eta une étapa te tiájipahi. Ánipa macahe:

—Piyana piyaseaca eta ajureca macarataruhi ema ángele —macahepa.

⁹ Tacahe, nuyanapa mayehe ema ángele. Nuyaseaca pa eta ajureca. Tásiha, éma máichanupa:

—Júcahi eta ajureca. Piveha, pinica. Títiveyare eta pisamira te pijaca tacutiyare eta mápama. Étasera te piامي, tisucareyare pisama —macahepa.

¹⁰ Tacahe, nuvehapa eta ajurecachicha te mavahu ema ángele. Nunicapa. Jéhesaréinehi títivéinehi eta nusamira te nujaca tacutirinehi eta mápama. Téhesera nujiricapa, tisucarepa nusama te nami. ¹¹ Tásiha, nucametacasivarepa:

—Píti piápechavaya picametarapiya eta náichararacavayare namutu ena aquenucana te juca apaquehe, énapa ena achaneana ticavasanahi te tamutu avasareana.

Ena Viya mavanecainapa ena apinana mavanaranyarehi profetanaya

11 Tacahe, te nuvapure, tíjaracuanapa eta ecutiriqui. Tásiha, máichanupa ema Viya:

—Piyanyare tayehe eta Templo te Jerusalén. Pícutichaya tamutu eta peti étapa eta canchón. Pícutichavare eta náijuchirarehi eta sárareana námavahuqueneana. Tásiha, pitupachayareva áyananahipuca ena achaneana téneuchavarahanahi eta te canchón. ² Váhisera picucuticha te aneca tamirahui eta Templo. Taicha ena apajuecuruhana, nísapaqueneana eta návihairaya éna. Nísapainavarepa eta náitahsiraya eta tayereruvanaini eta avasare tacapicahuquenehi Jerusalén. Ichape eta namapachichijisirayare. Cuarenta y dos caje eta náichirayare. ³ Nútisera nuanecavacainapa ena apinana nuanerua profetana. Éna, tiquisamuirihanayarepahi eta namuirihana. Eta juca táicutiarayarehi eta náichuarésirayare náeneuchava ena achaneana. Mil doscientos sesenta sache eta nayerevayare —macahepa.

⁴ Tásiha, nímahapa te anuma te mamirahu ema Viya eta apina yucuqui olivo étapa eta apina candeleroana te mamirahu ema Viya, ema téchahi tamutu eta juca apaquehe. Eta juca táicutiara eta majaneasiravaca ena apinana mavanarana, taicha manerejiruanahi éna, nacametarairuyare eta náeneuchiravayare ena achaneana. Te natiarihinapuca nácani tivarahanayare titupiacana, éna ticatiuchavanayare. Tiúchucayare eta yucu te najaca. Táijuchayare muraca, tacapacayareva ena nánaranayarehi. ⁶ Énerichuvare ena nani, naratahayarevare náichejica eta tiquiva te jena sácheana nacametarairuyare. Étaripa eta une, náepiyacayare

ítiamayare náicha. Nacuchucayareva eta táíñepahiyare nayehe ena achaneana, apanapanenejiyarehi náicha, te jácani navarahaquenyare éna. ⁷ Téhesera te táitachavapa eta nacametarairuyare, macanaravacainapa ema Tíñehi Achane Váinarajiquene ticaijare Útsutsure. Émaripa ema majupaha ema Satanás. Tásiha, masapihainapa ticaparecayare macapacavacainapa ena apinana mavanarana ema Viya. ⁸ Tásiha, ema Tíñehi Achane Útsutsure vahi máisapaimahi náecara eta náqueheana. Tanasiyarehi te aneca. Tacahe, náimahayare namutu ena achaneana te juca apaquehe. Mapana sache y medio eta nacaheyare te calle eta te avasare. Eta juca avasare, étarichuhi eta macaetainehi ema Viáquenu. Eta juca avasare, tétavicavahi eta tamauriva tacuti eta avasare Sodoma, étapa eta Egipto. ¹⁰ Ena achaneana, natiarihiyare te tamutu avasareana ena tiúrisamureanaya eta náimairaya ena tépenanahi. Ticapiestaranainapa. Tíjaracasichacacainapa eta námavahuana. Taicha títavanaripa ena nani profetanaini, énaripa ena tihapapiricanahi eta náichira eta tamauriqueneana. ¹¹ Tásihasera, te táequenénapa eta mapanaquene sache y medio, macaechepucavacainapa ema Viya. Tichavanainapa títarecanayare. Namutu ena achaneana náimahaya. Ichape eta napisirayare. ¹² Tacahe, ena nani apinana profetana nasamainapa eta mahu ema tíchuhavacahi te anuma. Muraca eta mahu eta máichuiravacahi:

—Yare, íteca, iápana —máichapa.

Tacahe, járajapapa eta úcaji táepanavacapa éna, támapa te anuma. Ena ticanaranahi náimararacaripa eta nayanirahi. ¹³ Enevanepa tiyayacarepa eta apaquehe. Muraca eta tayamurisirahi. Camuri eta pétiana tiáquipaicavavacahi. Siete mil eta náichapemuriva ena náepenaqueneanahi. Ena achaneana táemachanahi, tétavicavainehi eta napisirahi. Náimatinumainehi ema Viya. Napiaracapa, nacunachapa eta máitupajijiasiravahi ema Viya tiávihahi te anuma.

¹⁴ Títauchavapa eta juca apinaquene ecuñaraqui. ¡Váhisera tayerequenehaimahi eta mapanaquene ecuñaraqui!

Ticachujapa ema téqueneha ángele

¹⁵ Tacahe, ticachujapa ema téqueneha ángele. Tásiha, ticaemapá muraca te anuma. Ánipa tacahehi eta nahu eta nusamirahi:

—Títauchavapa puiti eta émairayarepa ema Viya técha, ticavanairipiyare namutu ena achaneana te juca apaquehe. Macaejacapa ema Machicha Cristo, máijaracainapa eta mávacureyare. Acanevacainapa eta émairayare techa tamutu —tacahepa eta nahu.

¹⁶ Tacahe, tépuyucanapa ena véinticuatroqueneana víyarahana, ena téjacanahi tayehe eta trono te mamirahu ema Viya. Tísiucapairicanapa, nacunachapa ema Viya. ¹⁷ Tijiranapa, ánipa nacahe:

“Vihasalupayachavi, Tata.

Tétavicavahi eta pítupajijiasiravahi, píturuequeneha tamutu.

Píti pitarihiquenehi te tépanavainapa eta apaquehe.

Pinasirichuhivare puiti eta viyehe.
 Puiti péjacapa tayehe eta piávacure ichapequene,
 pítirayarepa pecha tamutu.
¹⁸ Tétavicavahi eta nasemanevahi ena achaneana eta piyehe.
 Muracapanainapasera eta pícuñasiravaca éna.
 Puiti ticayaseserehianainapa te pimirahu ena náepenaqueneana.
 Jéhesare, picamitiequenehainapa namutu ena ticamitiequenerahianaini te juca apaquehe.
 Puiti pítsirijicavainapa eta nacaemataneasiravihi ena pivanarana ticametarairurahiana eta péchajiriruva.
 Puiti píjaracainapa eta náicuchihi ena yátupique-
 neanahi
 pichichanaveanahi tiámanahi eta píjare:
 nácani ichavicana, araitanana, énapa ena amaperua-
 na” nacahepa.
¹⁹ Tacahe, téjiacapa eta tapajacura eta Templo tiávi-
 hahi te anuma, mapena ema Viya. Ticaeherapa eta
 sagrario tacaunaiyahi eta echajirirucavana matratu-
 neanahi ema Viya nayehe ena israelítana. Tásiha,
 enevanepa téramecahi, ticaemapa, tirurecapa. Témiri-
 capa eta uverequi timitutupahi. Tiyamuricavarepa eta
 apaquehe.

Máimahavare ema Juan esu esena tínacayarehi etapa eta táíñehiquene sárare ticaijare Serpiente

12 Nímahavarepa eta apana ecutiarare te anuma. Tiáramicarehi éta. Sutiarihi esu esena. Eta sumuiraha tacutiyaréni eta tajaraiwa eta sache. Te tápecu eta suívapeana tacutiyaréni eta caje. Eta te suyehe corona te suchuti, jararihi tacutiyaréni eta dócequeneana jarairiqui. ² Esu suca esena ticajarihi. Tipiararecahi eta suínasirayarehi. Ichape eta sucatajivairahi.
³ Tásiha, témunahiricavarepa tiúchujica eta táíñehiquene sárare. Ichapequenehivare. Ticaijare Serpiente. Máchaneva ema Satanás. Titsi eta táimahi. Siete eta tachuti. Diez eta tajihuana. Ticayehehi eta corona eta te tachutiana. ⁴ Eta te táijiqui, táestacapa eta mapamuriana eta táichapemuriva eta jarairiquiana, tacamiricapa te juca apaquehe. Tásiha, titupihapa eta sárare te sumirahu esu esena esu tínacayarehi. Titse-cavaipa eta tanisirayarehi eta suchicha. ⁵ Tacahe, ajaira eta suchichahi esu esena. Námavanepasera mayehe ema Viya, te mávihahi te trono. Ema suchicha, aquenucayarehi tayehe tamutu eta avasareana. Macaratacayare eta matsucurupa fiérroqui. Váhique-
 neyarehi tijapanucareanaimahi nácani náichahi eta tauriqueneana. Muracayarehi eta náicuñanayare ena téjecapavana. ⁶ Tásiha, esu esena tijunavanepa te mávapahi apaquehe eta suáviyaharehi maicha ema Viya. Natiarihiyahisera ena ténicanayarehi ésu. Mil doscientos sesenta sácheana eta náitátirayarehi esu esena.

⁷ Tacahe, tiúchujicapa ema Arcángele Miguel énapa ena ángeleana machamuriana. Téhacacanapa naca-narapa eta Serpiente. Énerichuvare natiarivare ena

tayeheanahi ángeleanaini váinarajianahi. ⁸ Apaquehe-rerupasera eta ichapequenehi Serpiente, énapa ena tachamuriana. Tásiha, vaipa máisapa ema Viya nanasihini te anuma. ⁹ Tacahe, ticaquijianapa te juca apaquehe namutu ena ángeleanaini, émapa ema náquenu-murihi Serpiente, ema ticaetemahi acane esu Eva. Émarichuhi ema Váinaraji ticaijarehivare Satanás. Puíticha ticaetemajiricavacahi ena achaneana te juca apaquehe.

¹⁰ Nusamavarepa te anuma eta mahu muraca, ánipa macahe:

—Títauchavapa puiti eta náuchucuirapa ena téhicanihi ema Cristo. Máimererupa ema Viya eta tamutuirahi marataha. Máijaracapa ema machicha Cristo eta émairapa techa tamutu. Taicha ticaquijipa ema Satanás, ema timetauchaparacainihi me Viya eta náichavaquenevanahi ena vichamuriana, tamutu sácheana, yátiana. ¹¹ Ena vichamuriana naratahaipa ticatiuchavana mayehe ema Satanás. Vaipa macapaquechavacaimahi éna, taicha yátupi ticasifñavanahi tayehe eta máepenirahi ema Cordero. Énerichuvare náimimatichahi ena apamuriana achaneana eta máechajiriruvana ema Viya. Éna, vahi napicacavavacahini tayehe eta náitaresira. Tijaracavanahi te náepenirayarehi, vahi návarahahini náinajica eta náehisirahi ema Cordero. ¹² Tétavicavaya eta iúrisamurevaya puiti, emutu eti iávihanahi tayehe eta juca anuma. Páureanasamisera ena ticavasanahi te apaquehe etapa eta tiávihanahi te une te mar, taicha ema Váinaraji máucupauchavacaipa. Tétavicava eta masemanevapahi taicha máechahi eta ánipirinehi macaheyare —macahepa ema maca.

¹³ Tacahe, eta Serpiente, eta táimairahi eta tacaquijirahi te anuma, táucupaisiraipa te juca apaquehe, tacamesapa táehicarairica esu esena suínaruhi.

¹⁴ Ésusera ticaijaracasipa eta apina ichapequeneana supavanayarehi tacuti eta tapava eta ichape mátihi. Sumaitasiavayarehi tiara tayehe eta mávapahi apaquehe suáviyaharehi. Ánaqui natiarihiyareva ena téchapajiricanayarehi. Mapana año y medio eta náenisirayarehi. Eta Serpiente vahi táitecapauchaimahi ésu.

¹⁵ Tásiha, eta Serpiente táhicapa eta une te tajaca, tavarairahi tíjahúchava tatiarihi eta cajacure apaesa suéricahini esu esena. ¹⁶ Étasera eta apaquehe tacatiuchapa esu esena. Téjiacapa eta apaquehe, táerapaicavanepa eta une táhiruamahi eta Serpiente. ¹⁷ Tacahe, eta táimairavahi eta Serpiente vahi táratahahini, tavetijipaicha eta tasemirahi suyehe esu esena. Tiyana nayehe ena suchamuriana, énapa apavequeneanahi. Tavarahapa tacapacayarehi ena sucutiqueneanahi tisuapanahi ema Viya, téhicanahivare eta máimiturapianahi ema Jesucristo.

Máimahavare ema Juan eta útsutsure etapa eta sárare tíñehiquene

13 Te táequenepa eta juca, te nuvapure, nutupihahi tayehe eta playa eta mar. Nímahapa eta útsutsure tiúcupaicapahi tásihahi te une. Siete eta

tachuti. Dies eta tajihuana. Te tápusi eta tajihuana tatiarihi eta tayehe corona. Eta juca sárare tavasimahiyaréni eta ichini. Táíñehiquenehi eta tajaca. Eta táiva-peana tacutiyaréni eta táivape eta aticure. Tásiha, te tachutiana tatiarihi eta ajureca tímijachavahi Viyainahini. Macunahisera ema achane majupaha ema Satanás. Eta tacahe, eta Serpiente táijaracapa eta máitupajijiasiravayarehi ema Útsutsure eta macaete-maraivayarehi maratahairayarehi tamutu. Aquenu-cayare te tamutu avasareana maicha eta Serpiente. ³ Te étana machuti ema Útsutsure, tatiarihi eta majara eta ticapacahi. Tásihasera, tichavahi títareca, tinaracavarepa. Tacahe, eta náimairahi ena achaneana te tamutu avasareana, ichaperinehi eta nárami. Tásiha, náehicapa nasuapapa ema Útsutsure. ⁴ Natsiucavarepa eta Serpiente, taicha eta náimairahi eta táijarasirahi eta máitupajijiasiravahivare ema Útsutsure. Tásiha, nacahepa mayehe:

—Tétavicavahi eta máitupajijiasiravahi ema maca. Nájinavare tiratahaimahi nacanara náquipaica éma —nacahepa.

⁵ Tacahe, ema Viya máisapahi ema Útsutsure téjacahi te mávacure, ichape aquenuca, ticavanairipipa tayehe tamutu avasareana te juca apaquehe. Ema Viya vahi máicuñacavanehini eta masiñavavaisirahi, tímijachavahi Viyainahini. Tíñemahipivaca eta máechajisira, macaechirahi ema Viya etapa eta mapena. Macaechivare ena tiávihanahi te anuma. Énerichuvare mapanajiricavaca ena machanerana ema Viya. Máimicaratavacapa, mavarairahi máimicapavacaya. Cuarenta y dos caje eta macamichirahi ema Viya eta máimiyusemasirahi ema Útsutsure. ⁸ Eta acane te tépanavainapa eta apaquehe, tatiarihi eta libro tiama eta nalista ena títarecanaya te apana vítare-sira. Macarataruhi ema nacaparuhi Cordero. Natiarihisera ena apamuriana tájinahi eta nalista tayehe eta libro. Ena nani ena titsiucanahi ema Útsutsure.

⁹ Te evarahapuca ecaicutiara eta juca, tavaraha epanerechaya ichape. ¹⁰ Mácani témeratacayare ema apana, énerichuvare éma te tacaicutiaravapa ticaeratayareva éma apanavare. Mácani ticaparecahi, nacapacayareva éma. Eta tacahe, nácani machanerana ema Viya, tatuparaca nacamichayare tamutu, náimereca yátupina eta náehisirahi ema Viya.

¹¹ Tásiha, nímahavarepa eta apana sárare, táíñehiquenevare. Tiúchujica te amahe apaquehe. Eta juca sárare, macunahi ema achane ticaijare Falso Profeta †. Eta juca, tatiarihihi eta apina eta tajihuana, tacuti eta tajihu eta uvesa. Étasera eta táechajisira tacutiahu eta tahu eta Serpiente Satanás. ¹² Énerichuvare ema Falso Profeta majupahahi ema Útsutsure. Muraca eta tasuapacareva eta mavanairipiana ema Útsutsure maicha ema Falso Profeta. Éma, maratahahi tímereca eta tiáramicareana. Maratahahivare macamirica eta yucu tiásihaya te anuma. Náimahahi namutu ena achaneana te juca apaquehe. Ichape eta náramirahi.

† Te pivarahapuca pecha eta apana, pitanuca eta capítulo 16.13.

Étavenehi eta juca táimeresirahi eta tiáramicareana, étainapa tivayuacaya ena achaneana, tisuapacarenapa titsiucarenavarepa ema Útsutsure. Taicha náimahahi eta manarasirahi eta majara te tumare; tíapechava títarecahi. Tacahe, ema maca Falso Profeta macavanairipipa náepiyacaya eta máimahi ema Útsutsure, nasiñarajiya. ¹⁵ Ema Viya macamichahi tamutu eta máichaqueneanahi ema Falso Profeta. Vahi máicuñacavanehini eta máchanechirahi eta náepiyaruhi máimahi ema Útsutsure. Téchajicayare máicha. Eta juca nasiñaraji títipajijiacavainapa tivanereca, ánipa tacahe:

—Namutu tatuparacahi natsiucanu núti. Nácani vahi návarahahini titsiucanuhini, ecapacavacayarehi —tacahepa.

¹⁶ Tacahe, ema Falso Profeta macavanairipinapa nacamarca te navahu te vauve, te nanahupuca ena achaneana: ena amaperuana, énapa ena ichanaruana, énapa ena ichavicana. Tayanapane rícoanahipuca, páureanahipuca, líbreatahipuca, mósoanahipuca. Námayarehi eta máijare ema Útsutsure etapa eta mayehe número. Énerichuvare macavanairipipa vahi nacuisapa nacujachapa eta navacharapiana ena marmarcareana. Ticatajivanainapa eta náiturusirayare eta nacamunuqueneana taicha vahi nacamarcahini.

¹⁸ Tacamunuhi yátupina vipáneréquenehayare maicha ema Viya, apaesa vácaicutiara eta tacayemaquenehi tayumururevahi eta tuparaqui máijare ema Útsutsure eta 666. Éta, tacunahi eta máijare ema maca achane.

Eta najirasa ena 144,000 ena téhicanahi ema Cordero

14 Tacahe, nímahavarepa eta plaza ticaijarehi “Sántoquenehi Sión”, te mamirahu ema Viya, máejasirahi eta te trono, te návihahi ena cuátroana ecutiareana énapa ena véinticuatroqueneana víyarahana tuparairucana. Nímahavarepa ema Cordero. Te machacaya natiarihihi ena 144,000queneana téhicanahi éma. Éna, ticamarcavacahi te nanahuana eta máijare ema Cordero émapa ema Maiya. Nusamavarepa eta muraca ticaemahi te anuma tacutiyaréni eta muraca titureca. Tásiha, títsivachavavarepa. Nusamapa ticapununeanahi eta camuriqueneana guitarrana. Tacahe, ena 144,000queneana tijiranahi te mamirahu ema Viya. Arapiruhi eta najirasahi. Nájina apanaina títucaína eta najirasahi. Nacarichu títucaína ena 144,000queneana. Ena nani náuchucureanahi te namuri ena ticavasanahi eta juca apaquehe. ⁴ Matapiravareanahi éna te mamirahu ema Cordero. Tájinavare váhiquene náechipejicavahini, navirainahini esu esena túhusi. Náehicahi ema Cordero te jácani mapaisirana. Ena nani, ena náinapureanahi masantuchaqueneanahi ema Viya émapa ema Cordero. ⁵ Tájina náimatiyahini eta náepiyahirahihini. Tájinaquene natapiravainahini te mamirahu ema Viya.

Eta nametarapi ena mapanana ángeleana

⁶ Nímahavarepa ema émana ángele tiárarairicahi. Ticametarapihi eta téqueneha mametarapi eta máichuaresirahi eta náneuchiravaina ena achaneana tiávianahi te tamutu avasareana, apaechajiriruvaqueneana. Máitavacainapa eta náitaresiraya nácani ena tisuapanahi. Muraca eta máichuaresirahi, ánipa macahe:

—Éneuchava eta epecaturana. Epicauchayare ema Viya, taicha éma tépiyacahi eta anuma, eta apaquehe, eta mar, étapa eta cáquiureana. Émaina ejiraucha, ecunachaya. Émaina etsiuca. Taicha járajapainapa puiti eta máicuñasiraya ena achaneana máneuchavarahana —macahepa.

⁸ Tacahe, tiúchujicavarepa ema apana ángele. Émapavavare téchajica. Tiáramicare eta macayemaquene. Ánipa macahe:

—Tájinapa táipuina tacamitiaruinapa eta ichapequenehi avasare Babilonia, taicha tétavicavahi eta tamutuirahi taicha eta tamauriqueneana. Tavayuacahi tamutu eta apana avasareana táichiraya eta tamauriqueneana, tacutihi súcani esena suétaviurequenehi eta sutuhusivahi, namutupahi suvayuaca —máichapa.

⁹ Te títapiricapa, émapavavarepa téchajica ema émana ángele, ema namápananehi. Muracavare eta máechajisirahi. Ánivare macahe:

—Tájinavarepa táipuina eta náicuñanayare ena tijirauchanahi ema Útsutsure étapa eta máimahi náepiyaruhi nasiñarajihí, énaripa ena tiámanahi eta mamarca te nanahuana étapa te navahuana. ¹⁰ Muraca eta nacatajivairaya taicha ichape eta náimiyusemasirahi ema Viya. Ticaepujuquichacasianainapa eta te muracaquene yucu, táetiraráisina eta tamuraira. Muracaquenehi eta nasamira. Táitusiava, natsirihainapa eta máimarasira ema Cordero, énapa ena ángeleana. ¹¹ Máichecuaraquireyare eta nacaicuñarayare. Tájina ticaemahaimahi eta yucu. Támutu sácheana, yátiana nacaheyare te yucu ena tijirauchanahi tisiucanahi ema Útsutsure, tiámanahivare eta mamarca, tacuna eta máijarehi ema nasiñarajihí. ¹² Eta tacahe, ena machaneranahi ema Viya, ena tisuapanahi eta mavanairipiana, túmesamureanayare eta náehisiraya ema Jesús, puiti nacamichayarehi tamutu —máichapa ema ángele.

¹³ Tacahe, nusamavarepa ema téchajicanuhi te anuma. Ánipa macahe:

—Piájuchayare eta juca numetaruvianayare: ¡Tétavica eta náuricacarevaya ena táimicaparuanayare puiti juca vicaijuheyare eta náehisirahi ema Viáquenu! —máichanupa.

Énerichuvare ema Espíritu Santo máichanupa:

—Jéhevare, najacapainapa eta náicuchihi taicha eta nacaemataneasirahi ema Viáquenu. Tájinapa nácamu-nimahi, tinaracanainapa —macahepa.

Eta nacurujisiraya ena ángeleana ena achaneana

¹⁴ Te nésenicapa, nímahapa eta tijapu úcaji. Matiarihíhi ema támaquenepahi. Téjacahi éma te úcaji. Achanehi eta máimahi. Te machuti tatiaríhihi eta mayehe corona oro. Németeaca titsecavaipa eta macurujisirayare eta trigo. Tásiha, tiúchucapa ema émana ángele te tajuhe eta Templo. Mapiaracapa muraca ema téjacahi tayehe eta úcaji. Máichapa:

—Puiti piyana. Picurujica namutu ena achaneana manerejiruanahi ema Viya, taicha tiyuriticavapa eta natuparaha. Piputuvahu † —máichapa.

Tacahe, ema téjacahi te úcaji, tíjahúchavapa macurujicapa ena náequenereruanahi manerejiruanahi ema Viya. Macuchucavacapa eta te juca apaquehe.

¹⁷ Tásiha, tiúchucavarepa ema apana ángele te tajuhe eta Templo te anuma. Németeaca matsecaripavare eta macurujisirayare, étapa eta uva ††. ¹⁸ Énerichuvare tiúchujicavarepa ema apana ángele eta te mesa tiámahi eta mayucuneasa ema Viya. Éma, téchahi eta yucu. Tacahe, mapiaracapa muraca ema matsecaripa eta macurujisirayare. Máichapa:

—Puiti piyana. Piputuvahu picurujica ena apamuriana achaneana te juca apaquehe. Tícuñacacareanapa ichape, taicha tétavicavahi eta náichirahi eta tamauriqueneana. Vaipa ticuchapacarehini eta náneuchiravaina ‡ —máichapa ema ángele.

¹⁹ Tacahe, tiyanapa ema ángele. Macurujimurihapa ena achaneana tíchanahi eta tamauriqueneana. Tíñehiquenehi eta náepenirahi taicha títecapapa eta táíñehiquene ecuñaraqui tiásihahi me Viya taicha eta náimiyusemasirahi éma. Tacajapapahesivacahi éna.

²⁰ Te tachachacu eta viávasa eta tacajapapahesivacahi. Tiúchucapa eta náitine, tacuti eta cajacure. Étana metro eta táupenava. Tresciento kilómetro eta táunavayare.

Ena siétequeneana ángeleana najacapapa eta siétequene ecuñaraquiana

15 Tacahe, te nésenicapa te anuma, nímahavarepa eta apana ecutiarare. Tétavicavapa eta táramicarevahi. Natiaríhivare ena siétequeneana ángeleana. Ticatuparacasianapa éna eta nacamirisirayarehi eta siétequene ecuñaraquiana te apaquehe. Te táitavapa eta juca ecuñaraquiana, títavainavarepa eta masemanevahi ema Viya.

² Nímaha tativa eta ticutiyaréni táimahi eta une te ichapequene cáquiure. Tétavicavasera eta tajanusira tacutihi eta espejo. Tásiha, tacutiyaréni eta yucu eta táimahi. Natiaríhivare ena máisapavaranahi najirauchahini natsiuchahipucaini ema Útsutsure étapa

† Te pivarahapuca pecha eta apana, pitanuca Mateo 13.24-39, étapa te 24.30,31. †† Te juca, ema Juan máechajisihahi eta nacurujisirahi eta uva, tahi eta épire. Te jena avasare, eta nayeherépi ena achaneana, nácatayayajica eta uva te raveta, navarairahi nacuchuca eta tachi. ‡ Ema ángele máimicutijiricahi eta tíñehiquene ecuñaraqui ticapacayare ena camuriqueneana achaneana étapa eta sárameana. Vuíchahasera étaina eta táequeneha ecuñaraqui.

eta máimahi náepiyaruihi, váhivare náisapavahini nacamarcahini eta mamarca. Te tachacaya eta une titupihanahi. Nacaratacahi eta nayeheana guitarrana máijjaruana ema Viya. ³ Tijiranahi eta jirasare majirasaini ema víyahaini Moisés, mavanaraini ema Viya. Najirauchahi ema Cordero. Ani tacahehi eta jirasare:

“Píti ichapequenevihi aquenuca, Tétavicava eta pítupajijiasirava. Tamutuquenehi píturuequeneha. Tétavicavapa eta táramicarevahi eta pépiyuanahi. Tiúricacarehivare eta pinaquipairuanahi.

Vahi apanapanenejinahini eta péchajiriruvana. Yátupihhi eta piúriya.

Píti aquenucavihi, péchaya tamutu avasareana.

⁴ Namutuhi tipicaviana, piti Tata.

Namutuvare ticunachaviana taicha piti yátupiquenevihi eta pisantuva, nájina nácutivihini.

Títecanayare nácani achaneana te tamutu avasareana.

Titsiucavianayare taicha náimahahi tatupiruvahi tamutu eta píchaqueneanahi”.

⁵ Tásiha, nímahavarepa te anuma téjiacahi tamutu eta Templo. Nímahapa tiúchucanahi ena siétequeneana ángeleana te téqueneha cuarto te tajuhe, énaquenehi ena ticatuparahanahi eta siétequene ecuñaraqiana táequenereruyare tiúchujica. Eta namuirihana, amairiha eta lino tijapu tirapepeacavaca. Eta náitijuheana ichapemevaca, títecapavaca te natupana. ⁷ Tásiha, nímahapa ema émana ecutiarareana nacuatronehi. Máijjaracavacapa étasivaca eta escudilla oro ena siétequeneana ángeleana. Te tajuhe eta escudilla támapahi eta táíñehiquene ecuñaraqui tácutiarahi eta masemaneva ema Viya. Éma, acanevacaquenehi eta máitaresira. Máimahapa tamutu eta tauriqueneanahi náichaqueneanahi ena achaneana. ⁸ Tacahe, nímahapa tíjahúchavapa eta tajurusirahi eta majaraivahi ema Viya, ema acanevaca eta máitaresirahi. Tétavicavahi eta mapicauchacarevahi taicha eta matumeva, maratahairahi tamutu. Tásiha, nájina tiratahaina tisiapana te Templo, váhivare tímahacarehini eta tapajacura táichavenehi eta tavayuchiravahi eta majaraivahi. Tiámainucava te táitachavapa eta siétequene ecuñaraqui táequenereruyarehi námaquenepahi ena siétequeneana ángeleana.

Títauchavapa eta ecuñaraqiana nacamiriruihi ena siétequeneana ángeleana

16 Nusamapa muraca eta mahu ema Viya tásihaquenehi eta téqueneha cuarto náuchusinehi ena siétequeneana ángeleana. Ticavanahianapa éna. Ánipa tacahe eta navanahi:

—Eyanapa ecamirica te apaquehe eta juca siétequene ecuñaraqui táíñehiqueneana tiávihanahi te escudilla taicha eta nusemanevahi —máichapa ema Viya.

² Tacahe, tianapa ema tínapuca ángele. Máepusaicapa te apaquehe eta ecuñaraqui tiávihahi te escudilla macarataruhi. Tacahe, ena achaneana tiámanahi eta mamarca ema Útsutsure, táichavenehi eta natsiusirahi

eta máimahi nasiñarajihhi, témunahiricavapa táuchucavaca éna eta caracha ticajachacarepa tijechevare, tacutiyaeni eta espuntiu.

³ Ema apana ángele máepusaicavarepa eta macarataruhi tayehe eta mar. Tacahe, eta une tíjahúchavapa ítiama, tijecheamapa. Tépenaracanapa tamutu eta sárarechichana ticavasanahi te mar.

⁴ Ema apana ángele máepusaicavarepa eta macarataruhi tayehe eta cajacureana, te cáquiureana, étapa te tatavarapiana. Énerichuvare ítiamaavarepa.

⁵ Nusamavarepa ema máepusaicahi eta juca ecuñaraqui tayehe eta cajacureana. Macahepa éma:

—Tétavicavapa eta piúriya, piti Tata Vicaiyaquene, eta pícuñasiravacaipa puiti ena ticaviurevanahi. Yátupiquenevihi eta pisantuva. Píti pitirihiquenehi te tépanavainapa, puítiripa pinasirichuhi eta viyehe.

⁶ Tícutichavanainapa puiti eta navarahaquenehi térana eta íti ena tépusaicanahi eta náitine ena pichanerana táimicaparauana eta náehisiravihi píti, étapa eta nacametarairuirahi eta péchajiriruva. Puiti píjaracaipa eta náerirayare eta ítiama taicha navirevanahi éna.

⁷ Nusamavarepa eta mahu ema apana tayehe eta mesa tiámahi eta mayucuneasa ema Viya. Ánipa macahe:

—¡Tata Vicaiyaquene, tétavicavapa eta vicunachiravi! Píti, tétavicava eta pítupajijiasirava, píturuequeneha tamutu. Pitupiruvahi eta pícuñasiravacahi ena ticaviurevanahi. Vahi pémetavicahíni —máichapa.

⁸ Ema apana ángele máepusaicavarepa eta macarataruhi tayehe eta sache. Tacahe, eta sache tépanavainapa eta tavayuchiravayare tíjure, táijuchirapa eta apaquehe énapa ena achaneana. ⁹ Jéhesaréinehi, táetaviuchapa eta táijurevahi. Táijuchavacapa ena achaneana. Váhiquenesera náeneuchavahini, váhivare návarahahini náesenicahini ema Viya. Navayuchaichucha eta nasemanevahi. Nacajachapa ema Viya, ema ticavanairipipa eta ecuñaraqiana.

¹⁰ Ema apana ángele máepusaicavarepa eta macarataruhi te táinahu eta mávasa capital ema Útsutsure, eta máejasihahi. Tacahe, ticutipa timapicupa te návihahi ena majupahana. Vaipa náimatiequenehahíni tájahapuca eta náicharacavaya namutu ena machanerana. Ticapitiquiahechavanapa ena achaneana taicha eta tacativa nasama. ¹¹ Tacahe, tisesamamureanapa nacajachapa ema Viya taicha eta tacativahi nasama eta najarana nacarachana. Váhiquenesera téneuchavanáimahi mayehe ema Viya. Váhivare náinajicaimahi eta náichira eta tauriqueneana.

¹² Ema apana ángele máepusaicavarepa eta macarataruhi tayehe eta ichapequene cajacure ticaijare Eufates. Tacahe, eta cajacure táijicupa, apaesa máejerare eta nánucuiraya ena aquenucana tiásihanahi te tinapaica eta táuchusine sache, énapa ena suntarua.

¹³ Tásiha, nímahavacapa ena mapanaqueneana ticaetemarahanahi: ema Serpiente, ema Útsutsure, émapa ema Falso Profeta. Tiájajacanahi éna. Te najaca, tiúchuchi eta tavásiyaréni eta varutete. Ére-

ananahi eta júcana, náchanevanahi ena mapanaqueneana. ¹⁴ Éna, títupajjiacavanahi tíchanahi eta tiáamicareana tavayuarauianahi nayehe ena aquenucana te tamutu avasareana. Navaraha nacurujicavacayare, énapa ena nayeheana ejército nasuntaruana apaesa namutu ticanaranaya ema Viya. Tíjuhúchavatera muraca eta máquipapaisiravacainapa éma, taicha tétavicava eta máitupajjiasirava, máituruequeneha tamutu.

¹⁵ (Nutí, tíjuhúchavaya eta nítecapauchiraheyare éti. Váhisera tánecapacaremahi eta nítesira. Eta tacahe, tétavicava eta iúricacarevaya te ecunevahi, machu ímacariana eta nuchimapiraheyare, etsiriacarépa.)

¹⁶ Tacahe, ena mapanaqueneana éreanana nacurujicapa ena aquenucana énapa ena nasuntarurana tayehe eta vámahi ticaijare Armagedón te náechajiriruva ena israéltana.

¹⁷ Ema téqueneha ángele nasietenehi máepusaicapa eta mayehe escudilla te anuquehe. Tásiha, nusamapa muraca eta mahu ema Viya tiásihahi te trono tayehe eta Templo. Ánipa macahe:

—¡Títauchavapa puiti tamutu! —macahepa.

¹⁸ Tacahe, tiúchucapa eta térameca. Ticaemapa. Tirurecapa. Tiyamuricapa eta apaquehe, muraca eta tayamurisira. Tájina tácuti eta tamuracava nasamasarehini eta acane eta táepaniravahi eta apaquehe. ¹⁹ Te tamutu eta avasareana te juca apaquehe, tiáquipaicavanapa eta pétiana. Tavetijipa eta ichapequene avasare Babilonia. Tiáquipaicavapa tamutu eta pétiana. Mapana eta táejepahi eta apaquehe te tajuhe eta avasare. Taicha ema Viya máechavapa eta naviurevanahi ena tachichanaveana. Máimerecapa éma eta masemanevahi. ¡Tétavicavahi eta tamuracava eta táicuña! ²⁰ Énerichuvare, tamutu eta tiúrupuhiana téricapa. Eta cérrona témítiequenevarepa. ²¹ Témiricavarepa eta ichapequene uverequiana. Tájnavare tácuti eta táichapeva. Cuatro arroba eta tajitacarevavaca. Tásiha, ena achaneana tisemanaichucha, nacajachaichucha ema Viya, taicha tétavicava eta tamuracava eta ecuñaraqui, eta táemirisirahi eta ichape uverequi.

Esu esena túhusi téjacahi te tamaiquehe eta apnavare sárare tíñehi

17 Tásiha, tipauchanupa ema émana ángele nasietenehi ena ticaratacanahi eta escudillana. Máichanupa:

—Yare, nímechaviyare eta suícuñayare esu esena túhusi, tavayurevahi eta supecaturana. Ésu, tacunahi eta ichapequene avasare te tachausi eta mar. ² Ena aquenucana te juca apaquehe namutuhi suíturucavaca sucachanevaca éna. Suíchuhavare ena suvarahaqueneanahi suíturucavaca tayehe tamutu eta tájiparacana tamauriqueneana —máichanupa.

³ Tacahe, ema Espíritu Santo tímimahanuhi eta mavarahaqueneana tímechanuya ema ángele. Ema ángele tiámanupa tayehe eta mávapahi apaquehe. Ánaqui nímahapa esu esena téjacahi te táinahu eta

táiñehiquene sárare, máchanevahi ema Útsutsure. Títisi eta táimahi. Te táquehe, amairiha eta ajureca táimijarechavahi, tímijachavahi Váyainahini. Siete eta tachutiana. Diez eta tajihuana †. ⁴ Esu suca esena, eta táimahi eta sumuiruha mularume étapa eta títisi.

Tétavicavahi táurinaavavacahi eta suyereruvana, amairiha oro étapa eta táurinaqueneana márijahichichana, étapa eta tiúrinana perla. Tásiha, te suvahu sucaratacahi eta ichape suéresero oro. Tiámahi eta tájiparacana pecatuana táíñemahiqueneana suíchaqueneanahi eta suítaresirahi sutuhusivahi. ⁵ Te suchuti, tatiarihíhi eta ajureca eta suíjaruhi, tayumururevachuchasera eta tacayemaquenehi: “Eta ichapequene avasare Babilonia, tacachichapa ena túhusiana. Táquenyare eta tájiparacana táíñemahiqueneana”.

⁶ Nucaicutiarapasera eta suícharacavahi esu esena ticavahahi ésu. Táecavahachahi taicha eta suérirahi eta náitineamaini ena machanerana ema Viya, ena suímicaparuanaahi taicha eta náechajisihairahi ema Jesús. Eta nímairahi eta juca, ichaperinehi eta nárame-sirahi. ⁷ Tacahe, máichanupa ema ángele:

—¿Tájaha tacayema piárameca? Numetacaviyare puiti eta tacayemaquene eta juca pímaquenehi suyehe esu suca esena, étapa eta sárare superahi, eta siétequenehi tachuti, eta diésquenehi tajihuana. ⁸ Eta juca sárare pímaquenehi, tanasiqueneripahineni acane, tájinaipahisera puiti. Tiúchujicayarevaresera tásihaya tayehe eta táupenaquene pusu. Ichape eta náramesirayare eta náimairayare ena achaneana, namutu ena tájinahi eta nalistainahini acane te tépanavainapa eta apaquehe, tayehe eta libro tiamata eta nalistana ena náitareruanayare. Tatupiruvayaresera eta sárare tépenayare títaequenénapa.

⁹ “Pisamanuchaha. Puiti numetacaviyare eta tacayemaquenehi eta pímaquenehi, te pivarahapuca picaicutiaraya. Esu esena tacunahi eta ichapequene avasare. Eta juca siétequene tachuti eta sárare tacunahi eta siétequene cerro távihahi eta avasare. ¹⁰ Tacutiquene eta juca siétequene tachuti eta sárare náicutiaranahi ena siétequeneana aquenucana. Cíncoanapasera ena nájinaripa puiti. Matiarisera ema émana aquenucaichaha puiti. Ema apana vuíchaha títecapahi. Téhesera te máítecapapa ema téquenehayare, vaipa tiyeremahi. ¹¹ Étarichuvare eta sárare táitareruihi acane, tájinaripahisera puiti. Éta, macunahi ema nahóchone ena siétequeneana aquenucana. Te máuchujicapa, majacapa eta návacureana ena siétequeneana aquenucana. Tíjuhúchavatera eta máitaviraya.

¹² “Eta pímaquenehi diésquene tajihuana nacunahi ena apamuriana diésqueneana aquenucanayare. Vuíchahasera ticatuparacasiana. Najacapayaresera eta natuparahanaya ena aquenucanaya eta te návasana. Ánipirichusera nacaheyare eta nacachanerayare eta sárare. ¹³ Ena nani diésqueneana aquenucana tínunana eta napanereru. Náimicatacaya eta sárare eta

† Te pivarahapuca pecha eta apana, pitanuca eta capítulo 13.1-8.

aquenucairanahi te návasana. ¹⁴ Tacahe, ena nani nacanarainapa ema Cordero. Váhisera náratahaimahi. Máitahacavacayarehi ema Cordero. Taicha éma, yátupiquenehi Rey, Aquenucahivare. Mavanecahi ena réyeana énapa ena aquenucana. Natiarihiyareva ena macachanequeneanayare éma. Nacanerejiquenehi eta máichuirahi ema Viya. Tásiha, yátupihí eta náehisirahi éma.”

¹⁵ Tásiha, máichanuvarepa ema ángele:

—Esu esena túhusi pímahaquenehi, tacunahi eta ichapequene avasare. Sucaetemaqueneanahi suítahacavacahi ena aquenucana te tamutu avasareana. Eta jena mar pímahaquenehi te tachaui eta suéjasihahi esu túhusiquenehi, tacunahi eta náichapemuriva ena achaneana te tamutu avasareana. Eta diésquenehi tajihuana eta sárare pímahaquenehi tacunahi ena diésqueneana aquenucana. Éna, nacatichayare esu túhusi. Téhesera te táequenepe eta juca, náitara-cainapa ésu eta sucayehequeneanaini. Náepachiacainapa. Náquipaicayare tamutu eta supenapa. Tásiha, eta náemachayare náijuchainapa te yucu. Eta nacuticacairaya, navaraha náimicatata ema Útsutsure, étapa eta nacamitiequenehaya esu túhusi, vahi tásihahini eta napanereruana éna. Émarichuhi ema Viya tíjaracavacahi eta napanereruanaayarehi, náichirayare eta mavarahaquenehi éma —macahepa ema ángele.

Eta táquipaisiravahi eta avasare Babilonia

18 Nímahavarepa ema apana ángele tiúcupaicapahi másihahi te anuma. Muraca eta matuparahahi. Mamicauchaparinehi eta apaquehe eta majaraivapahi. ² Téchajicapa muraca, ánipa macahe:

—Tájinapa táipuina táquipairuvainapa eta ichapequene avasare Babilonia. Nájinapa nánasihini nacapenahini ánaqui. Énanecha ticapenanahi ena váinara-jiana, étapa eta cáyureana tacajachacarequeneana.

³ Muracaqueneya eta táicuña taicha namutu ena achaneana te avasareana, tétavicavahi eta tavayuasiravacahi eta túhusicare, étanecha nacasamurehi. Énaripa ena aquenucana, énerichuhivare nacahehi éna táemesiavahi. Énerichuvare, ena tíjararecarahiana eta tétacare, tétavicavaipahi eta náurisirahi tarricohavacaipahi eta tímítahacavacayare ena apamuriana —macahepa.

⁴ Nusamavarepa te anuma eta mahu ema apana ángele. Ánipa máichanu:

—Eti machaneranahi ema Viya, vahi ecuehica eta napecaturana ena achaneana te juca avasare. Íuchucavanesera, machu tavehahe eta táíñehiquene táicuñayare taicha eta napecaturana. ⁵ Taicha tétavicavapa eta táuruquechiravahi eta napecaturana. ¡Ániquehepa! ¡Ema Viya máimaraacahi tamutu eta tamaeperajivanahi! ⁶ ¡Puiti eti nuchamuriana ángeleana, ícuñacayare! ¡Íjaracayare muraca eta táitsivayare taicha tavayuaca náichahi eta tamauriqueneana ena tachichanaveana eta juca avasare! Cape juca náimicatajivachavacahi ena páureana. Puiti, ichapepa-nayareva eta íjarasiraya eta nátajivaya. ⁷ ¡Émechare-

cayare muraca! Ichapena eta nacatajivaira taicha tétavicava eta náijarasiravahi eta nacaetemaraivahi eta napanereruhi: “Tájina níchiravainahini eta náivihahi. Núti néchahi. Tájina nácamunuimahi. Vahi nucatajivahini” tacahehi eta napanereruana. ⁸ Eta juca napanereruhi naviurevana eta táijahúchirainapa eta náicuñayare. Técuhanainapa ena tachichanaveanahi eta juca avasare. Ticatisamurevanainapa. Tíjuyare eta napenana, táimijuchavacainapa éna. Tépenaracainapa namutu. Máijahúchahi máicuñacavaca ema Viya, máemereuchirahi eta tamutuirahi marataha —máichanupa ema ángele.

⁹ Natiarihivare ena aquenucana te avasareana, ena tavayuaruanahi eta túhusicare, táimiaquijiaruana eta tavayuasiravacahi. Éna, te náimahapa tipusisicapa eta yucu, tíyahanainapa ticatiequenehavanainapa.

¹⁰ Nayererequinainapa eta náimarasirayare táichavenénihi eta napsirayare eta yucu táicuñayare eta avasare. Tásiha, nacachenapa:

—Páurevisami, piti ichapequene avasare Babilonia. Tíchechupa puiti eta táijahúchiravapa eta pícuña —nacahepa.

¹¹ Énaripa ena comerciánteana tíjararecarahiana eta tájiparacana te avasareana, tíyahanayareva ticatisamurevanaya eta náimairayarehi eta táitavirapa eta avasare. Taicha nájinainapa tiviyechaimahi eta námaqueneasana: ¹² oro, plata, táurinaqueneana márijahichichana, perla, yeréucava táurinaqueneana, seda, apaimamajiqueneana mularumeana, títsimeana; énerichuvare eta náepiyaruana tijapu íapé ticaijare marfil, yucuqui táurinaquene, bronce, fierro, étapa eta mari ticaijare mármol. ¹³ Étaripa eta canela, eta apana táijiyequeneana táhiana yucuqui nasucureana, eta tá-tuyucuqui inciensosare, tíjiyequeneana brillantina, perfumeana. Étaripa eta tétacareana, eta acéiteana, eta harina te trigo. Étaripa eta sárareana ticavanaracarevaca, eta vuiye, cavayu, burro, énerichuvare eta tinicacareana uvesa, vaca. Étaripa eta carro. Énaripa ena achaneana ticamusuracareana náijarareruana-yarehi.

¹⁴ Tiápechavavarepa téchajica ema ángele, ánipa maicha eta avasare:

—¡Jéhesare pítitátaji! Títavapa puiti eta picayeheraini eta táurinisiqueneana tinicacareana, tétavicavainehi eta tavayuasiravihi. Énerichuvare títavavarepa eta picayehevaini eta tímahacareana táurinaqueneana pipincanillavainihi —máichapa.

¹⁵ Énerichuvare ena nani tíjararecarahianaini eta juca tájiparacana ichapemuriqueneana tarricuchaqueneanahi eta avasare, nayererequinairipa eta náimarasirahi eta tacaicuñairayarehi eta avasare. Ticatisamurevanaripahi. Tíyahanaripahi. ¹⁶ Tásiha, nacahepa:

—Páurevisami piti ichapequene avasare. Tétavicavainihi eta piúrinavainihi. Picutinihi esu esena eta táurinava eta sumuiraha lino, mularume, titsi eta tayehejaca eta sumuiraha. Eta piyereruva amairiha oro, táurinaqueneana márijahiana, perla. ¹⁷ ¡Puiti, tétavi-

cavapa eta táijahúchiravaipa témitiaca tamutu eta pímaqueneanainisamihi! —nacahepa.

Énerichuvare, namutu ena comandanteana táquenu-anahi eta lancha, énapa ena pasajeroana, énapa ena marineriana, énapa ena ticaemataneanahi tayehe eta lánchana te mar, nanasipa namutu te tiyerehi. ¹⁸ Eta náimairahi eta taquijarera eta yucu táijuirahi eta avasare, tipiararecanapa eta nacatiequenehairahi. Tíyahanapa. Nanachivare eta máteji te nachuti. Tásiha, nacahepa:

—¡Páurevichapucaini! ¡Tamapuruji eta juca ichapequenehi avasare! ¡Táijina apanaina avasarena tácutihini eta juca ichapequenehi avasare! ¡Títavapa tamutu eta tarricovainehi virrichochiravainihi vimutu viti tímisiapanahi eta táimahaqueneana viyereruasanahi te lánchana tayehe eta juca mar! ¡Puiti tétavicavapa eta táijahúchiravahi eta táemitiequenerahi tamutu! —nacahepa.

²⁰ Tiápechava téchajicapa ema ángele, ánipa macahe:

—¡Íurisamurecarepa puiti eyehe eti iávihanahi te anuma, étipa eti apóstoleana, étipa eti profetana, emutu eti machaneranahi ema Viya! Taicha máitsirijiequeneharipa puiti ema Viya tamutu eta táemecatájivairahehi —macahepa.

²¹ Tacahe, tiúchujicapa ema émana ángele, máetaviure eta mamuracava. Manaracuhapa eta ichapequene mari ticheyame. Máquijiecapa te une. Tásiha, macahepa:

—Tacaheyare eta tamuracavaya eta náquipaisiraya eta ichapequene avasare Babilonia. Tájinapa tímiapecháimahi náimahahini. ²² Tamutu timatina eta te távinihi. Tájinapa tímiapecháimahi tacasamahuhini eta irimaraquiana te cálleana eta nacapununeraini eta guitarrana, siviure, nacajane, étapa eta nachujana. Nájinavarepa ena ticachujarahianaini. Váipavare ticasamahuimahi eta piéstana ena araimarahiana. Nájinainavarepa ena ticaemataneanaini eta tinicacareana. Títavainapa tamutu eta ematanecanaini. Étaripa eta tamichahuana, tamutupa témitiequenehana. Tamapurujipa eta náiturequenehanini ichape ena comerciánteana, náijarareca eta tasimutuqueneana. Tamapurujivarepa eta tavayuasiravaca eta apamuriana avasareana téhicanahi éta, taicha puiti náijina ticatajicaimahi eta ichapeni avasare. ²⁴ Eta júcatataji avasare, ticaviurevahi eta nacapasiravacahi namutu ena machaneranaini ema Viya te juca apaquehe, énaripa ena profetanaini —macahepa.

19 Te táequenepa eta juca, nusamavarepa eta nahu ena camuriqueneana achaneana tayehe eta anuma. Muraca eta najiraira. Ánipa nacahe:

“¡Aleluyapa puiti!

¡Tétavicavahi eta vicunachiravahi piti Tata!
Eta picatiuchiravahi, pímercahieta nacapasiravacahi nam eta pítupajijiasiravahi.

² Taicha títauchavapa eta náicuñahi ena ticaviurevana, vahi pémetaviacavacahini eta náemecha-

rahiana ena túhusiqueneana tachichanaveanainihi eta avasare.

Ichape eta navayuareresirainihi ena achaneana te apanana avasareana eta túhusicare.

Puiti pítipa pítsirijiequenehahi eta nacapasiravahi viti machaneranaini”.

³ Tiápechavanavarepa tijirana:

“¡Aleluyapa puiti, taicha acanevacainapa eta tacaicuñairahi eta juca avasaretataji!” nacahepa.

⁴ Tásiha, ena vénticuatroqueneana víyarahana tuparairucana énapa ena cuátroqueneana ecutiareana tépuyumurihanapa te mamirahu ema Viya, ema téjacahi te trono. Natsiucapa eta nacunachirahi. Ánipa nacahe:

—¡Amén! ¡Aleluya!

⁵ Tásiha, nusamavarepa eta mahu ema téchajicahi tayehe eta trono. Macahepa:

—Puiti etsiucayarepa ema Viya, emutu eti machaneranahi, étipa eti amaperuana epicaurahiana mayehe —máichapa.

Eta táurinaquene mapiestara ema Cordero

⁶ Nusamavarepa eta nahu ena camuriqueneana achaneana. Tijajacanahi. Tétavicavahi eta tamuracavahi eta najirairahi. Ánipa nacahehi:

“¡Aleluyapa puiti!

Taicha téjacaipa te mávacure ema Viáquenu, tinacuchavapa eta émairapa técha tamutu éma.

Taicha tétavicava eta máitupajijiasirava, tamutuquenehi máituruequeneha.

⁷ ¡Vámutu vicunacha éma!

¡Tétavicava eta viúrisamurevapa puiti!

Taicha títauchavapa puiti eta macurujisiravahi ema Cordero, tímicutijiricavahi te araimamuhu.

⁸ Viti véhicanahi ema Cordero, tétavicavahi eta vipachinavaipahi máicha, tacutihi súcani araimayare ticaetupirihapa, sucamuirihavare eta táurinaquene múiriare lino, tijapu tirapepemeca” nacahepa.

(Eta juca lino, tácutiarahi eta táurivahi eta víchaqueneana viti véhicanahi ema Viya.)

⁹ Tacahe, máichanupa ema ángele:

—Piájuchayare eta juca: Tétavicavapa eta náuricacareva nácani nacaichuhasiqueneanahi tayehe eta táurinaquene mapiestara ema Cordero.

Tásiha, máichanuvarepa:

—Eta juca nímechaquenéviana, yátupiqueneanahi máechajiririvanahi ema Viya —máichapa.

¹⁰ Tacahe, népuyucapa te máivapechacaya ema ángele. Nuvarahapa nutsucayarehini. Émasera máichanupa:

—Péchepecachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi títauchanahi eta mavanairipiana ema Jesús. Ema Viya, éma tatuparacavihi pitsucayare. Taicha étirichuhi vicutiqueneana eta vicame-tarairuira eta máechajiriruva ema Jesús —máichanupa.

Ena Jesús, macaperahi eta tijapu cavayu

¹¹ Tacahe, nímahavarepa eta anuma téjiacahi. Tiúchucapa eta cavayu tijapu. Eta máijare “Tímimtirahi me Viya” † ena ticaperapahi éta. Éma, yátupiquene títaurahi; taicha éma, tatupiruva eta máhaquenucavahi. Éma, macatiuchavacahi ena náuriqueneanahi. Énasera ena tíchanahi eta tamauriqueneana, muraca eta máicuñasiravacahi. Éta pa eta macanarairavacahi ena mánarana, vahi macapacavacaimahi ena tájina naviurevaina. Énasera ena nacaviurevanahi, máitaequenehavacayare. Eta tacahe, eta mamuiriha ticaepapamehi te iti. Eta máuquihana timurhevaca tacutiyareni eta yucu. Te machuti ticayehi eta camuriquene coronana. Tatiarihivare eta ajureca tiámahi eta apana máijare. Macarichusera eta téchahi eta tacayemaquenehi eta ajureca. ¹⁴ Náehicapahi ena mayeheana ejército, tiásihanahi te anuma. Namutu ticaperavaca eta cavayu tijapu. Eta namuirihana, amairiha eta táurinaquene lino tijapu. ¹⁵ Te majaca ena tnapucapahi, tiúchucapa tavasimahiyaréni eta tacasiriquene espada eta macapasihayare ena mánarana. Macaratacachi eta matsucurupa fiérroqui eta macurujisiravacaya. Mácatayayajicavacayare ena mánarana tacutiyare eta nácatayayajisirahi eta uva eta nacuchusirahi eta tachi táitvequenehi. Éta tímereuchayarehi eta tamuracavayare eta náicuñaya, taicha tétavicavahi eta náimiyusemasirahi ena Viya ena máitupajijihaquenehi, máituruequenehavare tamutu. ¹⁶ Tatiarihivare eta ajureca te tacheyarapi eta mayehe capote tépacuchahi eta mapaheana. Eta táechajiriruva eta ajureca, ani tacahehi: “Éma yátupiquenehi Rey, Aquenuchavare. Mavanecahi ena réyeana énapa ena aquenucana”.

¹⁷ Nímahavarepa ena ángele titupihahi te tamirahu eta sache. Mapiaracavacapa eta cáyureana tiárrarairicaráhiana te anuquehe. Ánipa macahe:

—¡Yare, emutu eti cáyureana, iúrujicava! Enicayare eta táurinisiquene tinicacare máeniruhezare ena Viya. ¹⁸ Enicayare eta náecheanaini ena aquenucanaini comandanteanaini, ena ajairanaini tímijachavana túmeana, énapa ena nayeheanaini ejército nasuntaruranainipahi, éta pa eta táeche eta cavayu naperanaini. ¡Vénicaheyare namutu éna! —macahepa.

¹⁹ Tacahe, nímahavarepa ena Útsutsure, énapa ena apamuriana majupahana aquenucana te avasareana, énapa ena nayeheana ejércitoana. Matarihivarehi ena Falso Profeta, ena tímerecaparacainihi eta tiáramicareana, mavayuarauquianahi nayehe ena achaneana eta náisapiravayarehi ticamarcana, natsiusirayarehiva eta máimahi ena Útsutsure. Tacahe, namutu ena náurujiruvanahi ticanaranahi ena ticaperahi eta cavayu tijapu énapa ena téhicanahi mayeheanapahi ejército. Tacahe, ena ángeleana nacaratacapa ena Útsutsure, émapa ena Falso Profeta. Tásiha, ena apinana náitareruichaha náepujuquichapa tayehe eta táijurequene yucu táetirarisina

† Te pivarahapuca pecha eta apana, pitanuca eta Juan 1.1-8.

eta tamuruira. Éta nacaicuñaiyahi. ²¹ Tásiha, ena tica-perahi eta cavayu tijapu, máijahúchapa macapapajicavaca ena suntaruana mánarana. Eta macaparaqui eta tacasiriquene espada táuchurehi te majaca. Tásiha, járajapapa eta camuriquene cáyureana, tanicapa eta náecheanaini. Tisatuhevaca pa.

Ena táichavaquenevaya eta mil año

20 Nímahavarepa ena émana ángele másihapahi eta te anuma. Mámapahi eta ichapepi cadena, éta pa eta llave, tacaerataiyayare eta táupenaquene pusu. ² Tacahe, ena ángele macaratacapa eta táifihiquene Serpiente, eta ticaetemarerecachi acane, émarichuhi ena Váinaraji Satanás. Tacahe, ticaitihapa ena Satanás tayehe eta ichapepi cadena. Mil áño yare eta macaitihairayare. ³ Tacahe, ena ángele máiyaracuhapa éma ena te mávacu pusu táupenaquenehi. Manacapa eta llave, máerataequenehapa. Manacavarepa eta ajureca, ánipa tacahe: “Machu évejiaca eta juca tapaja”. Tayerevayare eta mil año, vahi ticaetemarerecachimahi nayehe ena achaneana. Te táequenepasera eta mil año, tiúchujicainavarepa eta ticaetemarecainavarepa, ánipinesera.

⁴ Tacahe, nímahapa ena achaneana náechepureanahi nacaparuanainihi. Éna, táimicaparuanahi eta náehisirahi ena Jesús, étaripa eta nacametarairuirahi eta máechajiriruva ena Viya. Ena nani, vahi náepuyumirauchahini ena Útsutsure, váhivare natsiucahini eta máimahi nasiñarajihini ena apamuriana achaneana, váhivare návarahahini nacamarcahini eta te nanahu éta pa te navahu. Ena nani, ena náinapurehi téchepucana te tamirahuichaha eta mil año. Nímahapa ena náejasiraipa te trono, catuparahanapa éna, juéseanariipa. Mil año ena nacatuparahairayare. Énasera ena apamuriana náepenaqueneanapa masupajirairahainainihi, vuíchaha téchepucanaimahi. Tiámainucava te táequenénapa eta mil año, napaenumavainapa téchepucanayare. ⁶ ¡Tiúricacareanayare ena nani tiápechavanayare títarecana puiti juca! Masantuchainapa ena Viya. Vaipa tiápechavanaimahi tépenana. Vaipa ticaicuñanaimahi eta te táijurequene yucu. Tiyujaracarahianaya mayehe ena Viya, éta pa me Cristo. Aquenucarahanayare, taicha ena Cristo máijaracainapa eta natuparahanayare. Mil año ena nacatuparahairayare.

⁷ Tásiha, te táequenénapa eta mil año, tiúchucainavarepa ena Satanás tayehe eta macaerataiyahi.

⁸ Tépanavainavarepa ticaetemarerecayare nayehe ena achaneana te tamutu avasareana. Étaripa eta apinaquene avasare ticaijare Gog éta pa eta Magog, macaetemaresihayare. Mayurucavacainapa eta nacatianasiraya ena Viya. Tásiha, ticurujicacanainapa ena nayeheana ejércitoana. Tétavicavainapa eta nasimutuvayare. Vaipa titupachacareana eta nasimutuvahi. ⁹ Tacahe, tiyananapa. Ichapecuequeanapaine eta nayanine, taicha eta nasimutuvahi. Nacapayacayarehi eta nachayasirayare eta avasare máemunaruinihi ena Viya, návihahi ena machanerana. Émasera

ema Viya, enevanepa máitaequenehavacahi. Tiúcupa-icapa eta yucu tiásiha te anuma, táijuchavacapa namutu. Nájina tacaemachaquenéna. ¹⁰ Tásiha, ema Satanás ema tivayua-recainihi, nacaratacapa náepujuquichapa tayehe eta táijurequene yucu, táetiraraisina eta tamuruira. Étaripa eta mávihahi ema Útsutsure, émapa ema Falso Profeta. Tájina nanarasiraimahi. Tamutu sácheana, yátiana eta nacatajivairaya, máichecuara-quireya.

Étapa tiámahaviyare eta víchaqueneanahi vicaevatainapa tayehe eta vívihayare

¹¹ Nímahavarepa eta ichapequene trono tijapu. Téjacahi ema Viya tayehe. Tétavicavahi eta máramicarevahi. Eta nímararasirahi éma, némitiacapa. Vaipa necha távi-hapuca návihahi téhepuca anuma, téhepuca apaquehe. ¹² Nímahavarepa namutu ena náepenaqueneanaini: ena amaperuana, énapa ena ichanaruana, énapa ena ichavicana. Taicha tichavanahi eta náchanevana namutu, téchepupujicanahi éna tayehe jácani náepenineanainipahi. Namutu titupihanahi te mamirahu ema Viya téjacahi te trono. Tásiha, tatiarihi eta libro tiama eta nalistana ena náitareruanaya. Tatiarihivare eta apamuriana libro tacajuiyahi eta náichavaquenevanahi ena achaneana. Ena ángeleana náechajicuhapahi. Nácani náichahi eta tamauri-queneana, étapa tiviuchahi eta nacayaseserehira-yarehi, nacaicuñairayare. Te tivayuchapuca eta napecaturana, muraca eta náicuñayare. ¹⁴ Eta nacaicuñaiyahi eta táijurequene yucu, táetiraraisina eta tamuruira. Namutu ena tájinahi eta náijarénahíni tayehe eta libro tiama eta nalista ena náitareruanayare, náepujuquichapa tayehe eta táijurequene yucu, tamutu eta náqueheana étapa eta náchanevana. Máitavacacainapa eta nacatajivairayare. Máitujianainapa tayehe.

Ticasipainapa eta anuma étapa eta apaquehe

21 Nímahavarepa eta tacasipairaripahi, tamuturipahi arairu eta anuma étapa eta apaquehe. Tájina eta ichapequene une mar. ² Tásiha, nímahavarepa núti tiúcupaica eta tiúrina avasare. Ticajarehi Arairu Jerusalén. Tétavicavahi eta tasantuva, taicha tásihapahi te anuma te mávihahi ema Viya. Tiúrinapahi eta tacaetupirihirahi, tacutihi te ticaetupirihí esu araimayare. ³ Nusamavarepa muraca eta mahu ema ángele, tiásihahi te anuma. Ánipa macahe:
—Puiti, ema Viya macucupaicapa eta mapena te juca apaquehe. Ánina macavasaya. Tiávaháchénapa eti achaneana. Yátupiquenénapa Ecaiyaqueneya éma. ⁴ Tacahe, ema Viya macamitasinaheyare eta íyairana. Váipavare épenaimahi. Váipavare ecatisamurevaimahi. Tájina ticaiyacahémahi. Váipavare ecatajivaimahi taicha tájinapa tiviuchahémahi —macahepa ema ángele.

⁵ Tacahe, nusamavarepa eta mahu ema Viya ánipa macahe:

—Puiti tépanavapa arairu, tamutupa ticaitsiva nicha núti —macahepa.

Tásiha, máichanuvarepa ema ángele:

—Piájuchayare puiti eta juca, taicha yátupiqueneya eta táichararacavaya. Tamutuyare títauchava. Jéhevare eta tisuapacareana —máichanupa.

⁶ Ánivarepa macahe ema Viya:

—Títauchavapa puiti tamutu eta nupanereruana. Nútira néchahi tamutu eta táepaniravahi eta apaquehe. Nútirichuvare néchahi eta táimianiravahi tiuri. Puiti núti nítauchapa tamutu. Eti emaunehi, núti níjaracaheyare eta máitavacaca une ticaitarecarahi. Tájina vahi evacharecaimahi. ⁷ Tacutiquene, eti ecami-chanahi, ímianavahi eta éhisiranuhi, níjaracaheyare tamutu eta júcana ícuchianayarehi. Núti ecaiya-queneya, taicha nuchichaheyare éti. Núti néchaheya éti. ⁸ Ticaicuñanayaresera namutu ena tipiturijiana, ena masuapajirairahana, ena máeperajiana, ena ticapahiana, ena túhusiana, ena iápemareana, ena ticasifñarajiana eta achanemirana, énapa ena tépiyahirahiana. Ticaquijianayare namutu ena tayehe eta náicuchi táijurequene yucu máitavacaca eta tamuruira, táetiraraisina eta tamuruira. Váhiquene tíuchucanaimahi tayehe —macahepa.

Eta arairu avasare Jerusalén

⁹ Tacahe, tipauchanupa ema émana ángele nasietenehi ena ticaratacanahi eta siétequene escudilla tiámaphi eta siétequene ecuñaraqüiana táíñehiqueneana. Tásiha, máichanupa:

—Yare. Nímechaviyare eta avasare, návihahi ena machanerana ema Cordero. Tímicutijiricavahi esu araima sucaetupirihiquenehi eta suítauchiravayare —máichanupa.

¹⁰ Tásiha, ema Espíritu Santo tímimahanuhi eta mavarahaquene tímechanuya ema ángele. Ema ángele tiámanupa eta te tápusi eta ichapequene cerro anuquehequene. Tímechanupa eta táucupaisirahi eta avasare Arairu Jerusalén. Tétavicavahi eta tasantuva taicha tásihahi te anuma te mamirahu ema Viya. ¹¹ Eta juca avasare, tétavicavahi eta tajaravapahi taicha tiámahi eta majaraivahi ema Viya. Eta táimahi eta tajaravahi tacutiya-areni eta tajanunusira eta márijahi tijararacahi. ¹² Te tachachacuana eta avasare, tatiarihi eta tacuti yúchama tímítutuche. Anuquehe eta táichapeva. Tatiarihi eta dócequene tapajacurana, távi-hahi eta ajureca náijare ena dócequeneanaini náchucanaini ena israelítana. Natiarihivare ena ángeleana tayehe eta tapajacurana. ¹³ Tatiarihi mapana tapajacura te tinapaica eta táuchusine eta sache. Mapanavare tapajacura te tinapaica eta cajaha. Mapanavare tapajacura te tinapaica eta vana. Tásiha, eta mapanaquenevare te tinapaica eta tasiapine eta sache.

¹⁴ Te apaquehe eta yúchama, tatiarihi eta doce márimeana táejahameruanahi eta yúchama. Támahi eta dócequene náijareana ena apóstoleana mayeaneanahi ema Cordero.

¹⁵ Ema ángele ema téchajicanuhi macaratacahi eta máicutiriqui úruqui, máicutichihayare eta tapajacurana étapa eta yúchamana. ¹⁶ Eta avasare falaru eta táimahi. Eta táunava ticuticacahi eta tajuhe. Dos mil doscientos kilómetro eta táichapeva eta avasare. Ticuticacahi eta táunava, eta tánuqueva, étapa eta tajuhe. ¹⁷ Máicutichavare eta yúchama. Sesenta y cuatro metro eta tánuqueva.

¹⁸ Eta yúchama amairiha mari jaspe timájumeana. Eta avasare amairiha eta yátupiquene oro. Tijanunucahi tacuti eta cristale eta tajarahivahi. ¹⁹ Eta márimeana tachunusipévanahi eta yúchama, tatiarihihi eta táurinaqueneana mari. Eta títapuca tacayehehi eta mari ticaijare jaspe. Eta apana tacayehehi eta ticaijare zafiro. Eta apana tacayehehi eta ticaijare ágata. Eta apana tacayehehi eta ticaijare esmeralda. ²⁰ Eta apana tacayehehi eta ticaijare ónice. Eta apana tacayehehi eta ticaijare cornalina. Eta apana tacayehehi eta ticaijare crisólito. Eta apana tacayehehi eta ticaijare berilo. Eta apana tacayehehi eta ticaijare topacio. Eta apana tacayehehi eta ticaijare crisoprasa. Eta apana tacayehehi eta ticaijare jacinto. Eta téqueneha tacayehehi eta ticaijare amatista. ²¹ Eta dócequene tapajana tacayehehi eta doce perla. Tayehepachuhi eta tapaja eta étana perla. Eta títapuca calle, tacayehe eta yátupiquene oro, tijanunucahi tacuti eta cristale eta tajarahivahi.

²² Te jena avasare, tájina nímahahini eta Templo nayujarasirénahini. Tájina tácamunuhini eta nayujarasirareyare taicha matiarhihi ema Viya máitupajijihauene máituruequenehavare tamutu, émapa ema Cordero. Návaháruhi namutu. ²³ Tacutiquene, vahi tácamunuhini eta sache étaripa eta caje eta tamicauchirainahini eta avasare. Taicha tamicauchahi eta majaraiva ema Viya, émapa ema Cordero. ²⁴ Tájina támatiyaimahi ticaerata eta tapajana, taicha tájina timapicuina tayehe, tájinavare yátina. Tásiha, namutu ena achaneana te apanana avasareana macuchucureanahi ema Viya, ichape eta napicauchirayare eta Arairu Jerusalén, ichapevare eta nacunachirayare. Tisuapajirahianayarehi tayehe eta vanairipiana tásihaqueneanahi eta juca mávasa ema Viya. Énerichuvare ena aquenucana te avasareana, ichape eta námavahuanayare me Viya te jena avasare mávihahi éma.

²⁷ Tájina námatiyaimahi tisiapana ena nachipejiqueneana énaripa ena tícharahiana eta tamaeperajivaqueneana énaripa ena ticaetemarrahiana. Nacarichu tatuparaca tisiapanayare ena tatiarihi eta náijareana tayehe eta libro macarataru ema Cordero, tiama eta nalista ena náitareruanayare.

22 Tásiha, ema ángele tímechanuvarepa eta tapachinaquene cajacure. Tétavicavahi eta tacaitarecaravahi eta tahunera. Tacutiyareni eta cristale eta tajararaesira. Eta táuchusihahi eta mayehe trono ema Viya, émapa ema Cordero. ² Tacahe, tatiarihihi eta yucuquiana, ticaitarecarahi eta tahi. Eta távihahi te enumuhuiyapahi eta títapuca calle, te tachaupahivare eta cajacure. Tásiha, dócehe ticahi te

étana año. Cájepachu eta tacahira. Ipurujivare eta tapacaji, tacanaraca ena achaneana te avasareana.

³ Tájinapa tímiapechaimahi tiviuachaimahi ena achaneana ticavasana tayehe eta juca avasare, máejasihahi ema Viya, émapa ema Cordero. Vimutu viti mavanaranahi, máitavacacayarehi eta vijirauchirayarehi, vitsiusirayare. ⁴ Vímararacayare eta mamira tamutu sácheana. Vicamarayare eta máijare te vinahu. ⁵ Aquenucahaviyare. Máichecuaraquireya eta vicatuparahairayare. Ánaqui tájinapa yátina, tájinainapa eta timapicu. Vaipa vicamunumahi eta tajaraiiva eta sache. Váhivare vicamunumahi eta vimícahu. Taicha tamicauchayare eta majaraivahi ema Viya.

Tiánehipa eta máitesirayare ema Jesucristo

⁶ Máichanuvarepa ema ángele:

—Eta juca nímeruvihi, yátupiqueneya eta táichararacavaya. Tamutuyare títauchava. Jéhevare eta tisuapacareana. Taicha émarichuhi ema Viya tivanecanuhi eta nímitusiravi píti. Acane ema Viáquenu máimitucavacahi ena profetana eta mapanereruana. Puiti mavaraha nímechaheyare eti mavaneranahi eta táequenereruhana mapanereruana, tayehe eta táijahúchirainapa eta táichavaquenevaya. ⁷ Énerichuvare ema Viáquenu máichahehi: “Níjahúchavánenapa nútijapa”.

¡Tétavicava eta náuricacarevaya ena tisuapanahi, napanerequenehairahi eta nímechaviqueneanahi, étaripa eta piájurequeneanahi te juca libro! —macahepa ema ángele.

⁸ Tétavicava eta náramirahi nútí eta nímairahi tamutu eta júcana, nusamirahi nuti Juan. Tásiha, te tamutupa, népuyucapa te máivapeana ema ángele ema tímechanuhi eta juca. Nuvarahapa nutsucayarehini.

⁹ Émasera máichanupa:

—Péchepecachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi ena ticametarairuana eta máechajiriruvana ema Viya, énaripa ena tisuapanahi tamutu eta tacajuqueneanahi te juca libro. Éma tatuparacahi pitsucayare ema Viya —máichanupa.

¹⁰ Énerichuvare máichanuvarepa:

—Vahi picuñaucha. Pimetajirica eta juca pimetacasi vanahi eta máechajiriruva ema Viya piájuchaqueneana eta te juca libro, taicha tiánehipa eta táitauchiravayare tamutu eta táichararacavayarehi. ¹¹ Énaserá, nácani váinarajianahi, vahi picucamesavaca. Námiyanavachaha naicha eta navainarajiva. Nácani tíchanahi eta tauriqueneana, námiyanavachaha naicha eta tauriqueneanahi. Nácaniserá tíchanahi eta táuriqueneana, tatuparacahi námiyanavachucha naicha eta táuriqueneana. Nácani matapiravareanahi te mamirahu ema Viya, námiyanavavare náuri eta mayehe —máichanupa.

¹² Ánivare macahe ema Viáquenu:

—Nútijapavanénapa. Námayarepahi eta náijaracasionayrajiva. Nácani tíchanahi eta tauriqueneana, náre ena ticaemataneacanuanahi eta náitaresirahi te

juca apaquehe. Énerichuvare námayarepahivare eta nayeheanayare ena masuapajirairahana. ¹³ Nútira néchahi tamutu te tépanavainapa eta apaquehe. Nútirichuvare néchahi eta táimiyániravahi tiuri. Puiti nútí nítauchayare tamutu —macahepa.

¹⁴ Tétavicava eta náuricacarevayare nácani tépachinachana eta náchanevana, tacuti te ticasipajihana eta namuirihana. Éna tatuparacahi nanicayarehi eta tahi eta yucuqui ticaitarecarahi. Tatuparacahivare nasiapayare eta Arairu Jerusalén. ¹⁵ Énaserá ena masuapajirairahanahi vahi títujicavanaimahi tisiapana. Nanasiyare te aneca, énapa ena iápemareana, ena túhusiana, ena ticapahiana, ena ticasíñarajiana eta achanemirana, énerichuvare ena tiúricanahi tépiyahirahiana ticaetemarahiana.

¹⁶ Macahevare ema Viáquenu:

—Nutí Jesús, nuvanecahi ema nuyehe ángele máimicaecherachayarehi tamutu eta juca numetarápiana puiti eyehe eti nuchanerana te avasareana. Nútí, yátupínuhi Reyhi ecuchapaquenehi, mavanerunuhivare ema Tata. Tétavicavahi eta nujaraivahi taicha eta aquenucairanuhi ichape —macahepa.

¹⁷ Ema Espíritu Santo énapa ena téhicanahi ema Cordero, tíchuarecana éna:

—Yare, epauchahaví —náichapa.

Énapa nácani tisamanaya eta juca ichuárapí, énerichuvare éna náichuarecavare:

—Yare, epauchahaví —náichapa.

Énapa nácani timauneanayare, náiteca apaesa náera eta une ticaitarerahi. Tájina vahi navacharecaimahi.

¹⁸ Emutu eti esamayare eta juca mametarapiana ema Viya tacajuqueneanahi te juca libro, nuvaraha numetacahe nútí: Nácani navayuyupicayare eta táechajisihaqueneanahi eta juca libro, énerichuvare ema Viya mavayuchinayare eta nacatajivairayare tayehe eta juca ecuñaraqüianayare táechajisihaqueneanahi. ¹⁹ Énerichuvare ecaunechava eta iáñauchira eta táechajisihaqueneanahi te juca libro, machu máñauchahe ema Viya eta esiapira eta juca mávasa sántoquenehi, machu vahi macuenicahe eta tahi eta yucuquiana ticaitarecarahiana, étaripa nímahaqueneanahi nájurequeneana te juca libro.

²⁰ Émarichu ema Viáquenu títametacahi tamutu eta júcana. Énerichuvare máichahehi:

—Yátupi nútíjapavaneyare —macahehi.

¡Jéheyavapuca, Tata Jesús! ¡Pítecavanepaini! Amén.

²¹ Aní táichecuiya eta juca nájurehi. Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.